


Irinibare Tosorintsi Ocomantëgotëri Antigomi

Jesoquirisito



New Testament in Nomatsiguenga (PE:not:Nomatsiguenga)

Irinibare Tosorintsi Ocomantëgotëri Antigomi Jesoquisisito

New Testament in Nomatsiguenga (PE:not:Nomatsiguenga)

copyright © 2008 Wycliffe Bible Translators, Inc.

Language: Nomatsiguenga

Translation by: Wycliffe Bible Translators, Inc.

Nomatsiguenga [not], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nomatsiguenga

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
cc057d06-df39-5d12-b492-cf028fb9485d

Contents

Mateo	1
Maricos	50
Irocas	81
Joan	132
Iragátane Jesus	167
Iromasati	206
1 Corintios	225
2 Corintios	242
Garasiasati	254
Ejesosati	262
Jeriposati	270
Corosasati	275
1 Tesarónicasati	280
2 Tesarónicasati	284
1 Timoteo	287
2 Timoteo	292
Tito	296
Jeremón	298
Ebereo	299
Santiago	316
1 Peroro	321
2 Peroro	327
1 Joan	331
2 Joan	335
3 Joan	336
Joras	337
Yoniaguéri Joan	339

IRA MATEO ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

Isanguenaquero iripajiro imatsiguengajegui Jesus.

(Ir 3.23-38)

¹ Yamai nasanguenataiguëmiro iripajiropague icharineegui jirai Jesoquirisito. Irirori imatsiguenga David aisati Abaram.

² Aro jirai itimi Abaram. Ainta itomi ira jitacha Isac. Aisati Isac itomintacari Jacob. Jacob itomintaigari ira Jorá aisati ireintiegui. ³ Jorá ijinantacaro Tamar. Itomintacari Baris aisati Tsara. Baris, iriro iriri Esirromo. Esirromo iriri Aram. ⁴ Aram itomintacari ira Aminarab. Aminarab iriri Nasón. Nasón iriri Saramón. ⁵ Saramón itomintaari ira Bos. Iniro Bos ojita Rajab. Itomi Bos ijita Oberi. Iniro Oberi jitacha Irot. Oberi iriri Isaí. ⁶ Itomi Isaí jitacha David, ira itingomi joríojegui. Cara Abaranquë irooti David ainta icarati 14 sërari. Yaguimintacari Orias David, itomintaari Saromón. ⁷ Saromón iriri Roboam. Itomi Roboam, Abías. Itomi Abías, Asa. ⁸ Asa itomintaari ira Josabá. Itomi Josabá irianti Joram. Itomi Joram, Osías. ⁹ Osías iriri Joatam. Itomi Joatam jitacha Acás. Acás iriri Esequías. ¹⁰ Ira itomi Esequías, Manasés. Itomi Manasés: Amón. Amón iriri Josías. ¹¹ Josías itomintaari ira Jeconías aisati ireintiegui. Aro cara Daviriquë irooti Jeconías, ainta 14 sërari. Cara itimi Jeconías, ipocaiguë tojai soraro paniaigacha Babironiaquë, yágaiganaqueri omagaro joríojegui canta Babironiaquë.

¹² Aique iconijapë Saratieri itomi Jeconías. Itomi Saratieri irianti Sorobabé. ¹³ Sorobabé iriri Abió. Itomi Abió: Eriaquim. Eriaquim iriri Asoro. ¹⁴ Asoro itomintaari Saroco. Itomi Saroco, Aquim. Aquim iriri Erió. ¹⁵ Itomi Erió: Eriasari. Eriasari iriri Matán. Itomi Matán irianti Jacob, ¹⁶ ira tomincari José ojimetsari María. María iniro Jesus Ira aisati jitacha Quirisito Agabisaicoontatsiri. ¹⁷ Ainta 14 sërari cara yágaiganaqueri joríojegui canta Babironiaquë irooti cara iboguë Quirisito.

Cara iboguë Jesoquirisito.

(Ir 2.1-7)

¹⁸ Yamai nongomantëmi ati ocanta jirai cara inë Jesoquirisito. Ainta José aisati iinatsari ojita María. Aroque iquengaigaca irágobaguima, carari teraiquerai iraneiro. Iroco cantënguicha poguë María, itasongancaro Isère Tosorintsi. ¹⁹ Cara igóquero José cara poguë María iquengasëretaca: “Te onganinate ca poguë. Ainiro oniagueteri sërari. Quero náguero. Nojocajironi comanoroni. Quero nocomantiri omatsiguenga. Paniro nanganquero: ‘Nojocajimini yamai’ ”. Irianti caninari José, icoque ingábintsero María, te iraninte iraguipasiguitiro. ²⁰ Iroontita iquianca José irojoquero, iriguito yoniagapari ironomire Tosorintsi cara iquisaniqueri. Icantasiringapëri:

—José, obiro imatsiguenga jirai David, quero pitsorogui cara páguëro María tenta iriro ogaguirone sërari pijinatsari. Ira ojaniquite itasongancaro Isère Tosorintsi. ²¹ Ontsomaaquenica poro Otomi, pijitiri Jesus Irironta agabisaicoquerine imatsiguenga, irojocajineri ora icantaguëti te onganinate.

²² Antagaisati ocanca nega arota omoncaratima ora icanque Tosorintsi jirai cara isanguenatacaqueri comantantatsiri jitacha Isaías:

²³ Ainta omëníbaque tsinane te oneiri sërari, ontsomaaqueri Otomi Ira jitënguichane Emanoel.

Emanoel ocanti irinibarequë jorío: itsibatacái Tosorintsi.

²⁴ Aro icabirica José iquemisanquero ora icomantasiringaqueri ironomire Atingomi. Iátasiquero María, icanquero:

—Aro caraquenta nágasantëmi nobangoquë.

²⁵ Carari terai iraneiro irooti cara ontsomaaqueri Otomi. Cara aroque iboguë ijiqueri Jesus. Aique yágasantëro ijinantacaro.

2

Ipocaiguë ogótasantiri jonogasati iraniaquerini Jesus.

¹ Aro iboguë Jesus canta poeboroguë jitacha Berén cara quibatsiquë jitacha Jorea. Igáantë Eroris itingomi cara Jerosarënguë cara yaretaiga sërari ogótasantiri jonogasati. Ipaniaca jaanta cara iconteti paba. ² Yosamitaigapëri Jerosaresati:

—¿Nega ini yamai ira Itingomi joríojegui? Cara nopaniaca naniaigabaqueri ionogasatite, aro nigóiguë, irirai iboguënguitsi. Yamai nipocasitaiguëri nomanocotaiguëri.

³ Cara iquemocotobëri itingomi jitacha Eroris, iquenganeintasantanaca aisati itsoroganë. Itsorogaiganaque aisati omagaro Jerosaresati. ⁴ Aique Eroris yapatotaiguëri antagaisati saserirotipague obatatsiri aisati omagaro irægüi ogameantiro isanguenare Moisés. Aro yosamitaigabaqueri

—¿Nega iriboguë ira jitënguichane Quirisito?

⁵ Yotabitaiguëri:

—Cara poeboroquë jitacha Berén yaca quibatsica ojita Jorea. Jirai isanguenatocoqueri ira comantantatsiri jitacha Miqueas:

⁶ Aiti Berén cara Joreaquë. Quero itsoinguiro Berén otiomijani poeboro: querootisati ijitiro carantatsiro aronta Berénquë iriboguë Irirosónori, Itingomi omagaro jorío.

⁷ Aique comanoroni Eroris icaimagantaiguëri cogatsi iraneiri Jesus. Yosamitaiguëri:

—¿Ati ocanta cara iconijatomopëmi jonogatsi cara piniaigabaqueri ora pigóontacari cara iboguë Itingomi? Pingomantasantina.

⁸ Aro icomantaiguëri. Aique Eroris igáqueri aisati:

—Atsi pijáigue yamai. Pingogaiguëri Ira Janequi. Pinetsaiguëri atiraca itimi aisati atiraca icanta. Aique popigaima yaca, pingomantaigapëna naro. Nocoguini naneiri naro aisati, nantingomimpëmari.

⁹ Aique iáiguë, iniaigairi jonogatsi ibaqueri irooti cara yaratingopë jonoica pongotsi cara ini Janequi. ¹⁰ Cara iniaiguëri jonogatsi icaninatasantaiganaque. ¹¹ Icanaque pongotsiquë, iniaigapëri Ira Janequi aisati María iniro. Aro yobaticagueritotasipari, yamanocotaiguëri, ijitaiguëri Itingomisonori. Aique itatarecoquero itsibogotequë ipasitaigacari maba ora pënatacha tojai: oro, aisati pite casangajengaro. ¹² Aique isemaiguë ira maba matsiguenga. Iquisanitaiguë. Aro Tosorintsi icamanaasiringaqueri, icanqueri: —Quero pipiganaja Eroriquë. Popiganajima piguebatsitequë cara basiniatiquë abatsi. Aro iquenantaigaaro basiniati abatsi irooti cara ipaniaca.

Isiganaca José Ejípitoquë, yáganëri Jesus aisati María.

¹³ Aroqueque iátaigai ira ogótasantiri jonogatsi aique iquisanique José. Aisati iconijatomopëri ironomire Atingomi irisaanganetsite, icomantasiringapëri icampëri:

—José, pingabiritima, páganëri Ira Janequi aisati iniro; pisiganëma cara Ejípitoquë. Pintime irooti cara nongomantaimi, cara popigaima, icoguirininta Eroris Ira Janequi irógüiri.

¹⁴ Aro irooti tsitiniriquë iáiguë. Yáganëri Janequi aisati iniro canta Ejípitoquë. ¹⁵ Canta, itimaigapë irooti cara icamaque Eroris. Aique ipigaigapaa iguebatsitequë. Icanque irooti ora isanguenatocoqueri jirai ira comantantatsiri jitacha Oseas. Atingomi isanguenatacaqueri: Icanque Tosorintsi: “Itimabeta Notomi canta Ejípitoquë. Nacaimairi iripigapaima aisati”.

Ira Eroris yógagantëri janequipague cara Berénquë.

¹⁶ Cara te iripigaima ira ogótasantiri jonogatsi, aro igótanë Eroris cara te inguemisantiri. Aro iguisasanótanaca Eroris, igátaiguëri isorarote, icanqueri:

—Pijáigue cara Berénquë, pógaiguëri antagaisati janequi sërari. Póguiri ira irirai ibogatsi aisati ira agabisatsi pite osarini. Popoguiriaiguëri omagaro.

Icanque negaca Eroris aroquenta icomantasantapëri ira ogótasantiri jonogatsi, ati ocanta iniaiguëri jonogatsi. ¹⁷ Jirai isanguenatocoquero oca comantantatsiri jitacha Jeremías.

¹⁸ Oquemocoquengani tsinane ocaimëgotasantëri otomijegüi tojai piraicoqueri. Iroronta cantaca Iraquel, piraicotaiguëri ojaniquite cara Iramáquë jirai. Te onganinasëretanæ yógaiguërinta otomijegüi.

Ipiganaña José Nasarequë, yáganëri Jesus aisati iniro.

¹⁹ Icanaque Eroris. Aro iquisaniqueri José. Iconijatomopëri ironomire Atingomi irisaanganetsite cara Ejípitoquë. ²⁰ Icantasiringapëri:

—José, atsi yamai pijátaje popiganajima piguebatsitequë. Páganëri Ira Janequi aisati iniro aroquenta icamaque ira cogabitacha irógüirime Janequi.

²¹ Aro yáganairi Ira Jesus aisati iniro, iáque cara iguebatsitequë imatsiguenga. ²² Cara yaretaja José iquemocopëri Ariquero itingomi Joreasati. Ariquero itomi Eroris ógueri. Aro itsorogopëri. Aisati Tosorintsi icamanaasiringaqueri:

—Pigamemari Ariquero.

Aro yogaganaca José canta Garireaquë. ²³ Cara yaretaja, itimopë poeboroquë jitacha Nasaret. Aro omoncaraca ora icanque comantantatsiripague jirai: Quirisito Nasaresati.

3

Joan baotisantantsiri icomantagueanti cara tera ontimingani.

(Mr 1.1-8; Ir 3.1-18; Jn 1.19-28)

¹ Aro aique iáque Joan baotisantantsiri cara tera ontimingani cara Joreaque. Icoman-taguetaigapëri imatsiguenga ² icantopiantê:

—Pingantaigaima yacaqueroca, pijocajiro ora picantagueti te onganinate, pomasini-atitaje, quero picantaja pibega jirai. Pabentimari Tosorintsi pënibaquenta orequima cara intingombintaiguëmi Tosorintsi.

³ Jirai ira Joan isanguenatoqueri comantantsiri jitacha Isaías. Icanque Isaías: Ainta ira cajemaquenguitsine cara te ontimingani; inganque: “Coraguetaque Atingomi; págacananatobëri; pinguemisantasantobëri, piganinatiro paneingomento pibega cara pobetsicoboguitineri irabo itingomi pigatingatineri”.

⁴ Ora iguitsagare Joan irianti cameyopiti, imatsaguitari imasitsa. Irianti yaagui ira tsguëriquipague. Aisati itsimiri pitsia. ⁵ Ipocasitaigapëri tojai Jerosaresati iquemisantaiguëri, aisati omagaro Joreasati, antagaisati ira timaigatsi aronisati nijaaquë jitacha Jorirán. ⁶ Ainta tojai icampëri:

—Aiti nacantaguetero ora te onganinate. Nocoguini ingábintsena Tosorintsi iragabisaicotajina.

Aique ibaotisataiguëri Joan Joriránquë.

⁷ Aisati iátasitaigabitacari tojai bariseo aisati arosonori saroseo icogabetaigaca imaotisa-taguemeame, carari iguisatsaigabaqueri Joan icabëri:

—Te pinganinataigue, obirojegui aisa picantaigacari marangue. ¿Pairi comantaiguëmi pisigopitanëmaro cara iratsipiriacagaiguëmi Tosorintsi cantauibi maranguepague cara isigopitaigacaro pamari? ¿Pijitasitaiguemame cara quero itsipiriacaguimiro? ⁸ Pinintica nomaotisaiguëmi, aro caninataque pintimaigue caninasati arota nogótimi pijocasantëroca ora picantagueti te ongemeite pinguemisantasantiri Tosorintsi. ⁹ Quero picantaigui: “Naroegui imatsiguenga Abaram. Iroero iniacaninataguëtaiguëna Tosorintsi; quero iguisina”. Pamatobica obiati. Ingoqueca Tosorintsi, imiaguetero ocaegui mopë imatsiguenga Abaram carari quero pogabisaicotiri iroero, quero iáti Jonocaguitequë irironta jorio imatsiguenga Abaram. Querootisati pabisaicoti obironta imatsiguenga Abaram. ¹⁰ Carari pënibaque inguisaiguëmi Tosorintsi. Picantaigacaro pibega anchato te ine oguitso; iritotëro casintaro, irojoquero tsitsiquë. Aisa picanta obioto te pinguemisantantiri Tosorintsi, te pingantineri, irojoaguëmi Sharincabeniquë. ¹¹ Aroca nogóque ijocajiro imatsiguenga ora icantagueti te onganinate, nobaotisantëri nijaaquë. Carari pënibaquenta iribocapë basini sërari, teni aisa ingantina nibega naro. Ibaquina Irironta Natingomisonori, nitsoingaa naronta cantaca iromeraro Irero. Naro baotisataiguëmi nijaaquë, carari pinguemisanquerica Irero ogaiguëmirone Caninaro Isère Tosorintsi inasërequimi. Aisati ingasitigatëri Sharincabeniquë ira tsoengatsi te inguemisantantiri. ¹² Aroca omposaguiquero antianquero arosa, aique opoteguiquero. Ataquero omasiqui, iroonti oguitso ágüë oguëro cara ogantaroriquë. Aisati ingantima Atingomi irianiantimari antagaisati matsiguenga. Ingábintsaiguëri ira quemisantaiguërine, irianti cantaguetero te onganinate irojoqueri tsitsiquë cara te otsibague.

Cara ibaotisataca Jesus.

(Mr 1.9-11; Ir 3.21-22; Jn 1.31-34)

¹³ Aique iáque Jesus Joriránquë, ipaniaca Garireaquë. Iátasiqueri Joan cara imaotisatobëri.

¹⁴ Te iraninte Joan imaotisatobëri, icabëri:

—Quero nobaotisatimi. Caninataque pomaotisatina naro Obiati. ¿Pairi picogobiti nomaotisatimi Obironta Natingomisonori?

¹⁵ Yotabitanëri Jesus:

—Pinintacaguina yamai. Nocogasanti pomaotisatina icocaquinaronta Tosorintsi.

Icanque Joan:

—Aro nomaotisatëmi.

¹⁶ Aro ibaotisantëri nijaaquë. Cara yagatanai Jesus, aique iniobëro Isère Tosorintsi, opaniaca Jonogaguitequë, pamasobingopë paguëpëri Jesus, ocampari sompaguiti, pinampari.

¹⁷ Iriguito icemaigabaquitiguiri Tosorintsi canta Jonogaguitequë, icanque:

—Icari ica Notomi nanintasanotirini. Tojai nacaninabentasantobiqueri.

4

Icogabeca camagari irantacaquerime Jesus ora te onganinate.

(Mr 1.12-13; Ir 4.1-13)

¹ Aique Isère Tosorintsi páganëri Ira Jesus cara tera ontimingani. Cara, icoque camagari irianiantimari. Icogabeca irantacaquerime Jesus ora te onganinate. ² Cara, itica Jesus 40 cataguiteri, te irapëmate pairoraca. Págasantëri itasegane. ³ Aro iátasiqueri Jesus camagari, irianiantëmari. Icantabepari:

—Obiaronorica Itomi Tosorintsi, pomeguero oca mopëca pan, popero.

⁴ Yotabitanëri Jesus:

—Quero nopeguiro. Ocanti Sanguenari jirai isanguenati comantantsiri:

Te patiro intimantimaro pan matsiguenga, carari intimantëmarotisati Irinibare Tosorintsi cara inguemisanqueroca.

⁵ Aique yáganëri camagari cara Jerosarénquë. Cara, yoguëri jonoica oquibe pongotsi irasi Tosorintsi. ⁶ Aro icantabecari:

—Obiroca Itomi Tosorintsi, atsi pomatsecanë osobinta quibatsiquë. Pinguenguero ocanti Sanguenari:

Tosorintsi iragáquimiri ironomire irisaanganetsipague iromisanquemi. Irágaigabaquemi arota quero poparigopë mopëquë.

⁷ Yotabitanëri Jesus:

—Quero picantiri Tosorintsi ora inganque; posamitiri ora icogui inganque. Aisati ocanti Sanguenari:

Quero piniantari Pitingomi Iriantinta Pitosorintsite.

⁸ Aisati yáganëri Jesus camagari jonoquë oquibequë oguitoja. Ijigotëneri omagaro quibatsi, ⁹ icantabecari:

—Pinetsaiguëri antagaisati timaigatsi quibatsiquë. Aroca pingingominquina naro, pobicagueritotasiquinaca, aro nomëmiro omagaro, nangantaiguëri antagaisati intaegui cara intingomintaiguëmi iriro.

¹⁰ Yotabitanëri Jesus aisati:

—Pijáte, jaara, obiro Satanás. Ocantiti Sanguenari negaca:

Pingingomintimari paniro Atingomi Irironta Pitosorintsite. Paniro Iriro pomanocoqueri pinguemisanqueri.

¹¹ Aro iátaji camagari ijocanëri. Aique ipocasitaigapëri ironomirepague Tosorintsi irisaanganetsite, imitocotaigapëri Jesus.

Iáque Jesus Garireaquë.

(Mr 1.14-15; Ir 4.14-15)

¹² Cara Jesus iquemocoqueri Joan cara yomianquengani, iáque Jesus cara Garireaquë.

¹³ Te intime Nasarequë, carari iáque Caperinaoquë. Caperinao iroonti poeboro onamijaquë oquibe angaare jitacha Garirea. Aisati pini aronisati iguebatsite Saborón aisati irasi Nejatari. ¹⁴ Aro omoncaraca ora isanguenatocoque Isaiás comantantsiri jirai cara icanque:

¹⁵ Ainta matsiguenga timaigatsi quibatsipaguequë: Saborón aisati Nejatari timatsi onamijaquë angaare jitacha Garirea; aisati aiquero basiniquë angaare oquibeguintesonori; aisa antatinta Jorirán; aisati Garirea canta itimaigui tojai matsiguenga cagarijegui jorio. ¹⁶ Jirai icantabetaigacari ibega iraugui timatsi tsitiniriquë tenta irogóguëri Tosorintsi. Iriátaiguëme Sharincabeniquë, carari yamai aisati icantaigari ira timaigatsi cataguteriquë, aroquenta iquemocotaigabaqueri Jesus.

¹⁷ Aro iparintaca Jesus iquenguitsatomotaiguëri matsiguenga canta, icantaiguëri:

—Pingantaigaima yacaqueroca, pijocajiro ora picantaguëti te onganinate, pabentimari Tosorintsi pënibaquenta orequima iragáantane cara intingomibintaiguëmi.

Jesús icoigaiguëri irogomere.

(Mr 1.16-20; Ir 5.1-11; Jn 1.35-51)

¹⁸ Iroontita yanësigui Jesus cara onamijaquë angaare jitacha Garirea, iniopëri Simón aisati ireinti, Antiris. Simón aisati ijita Peroro. Isiriatasegui simaguitinta ini. ¹⁹ Iniopëri Jesus aro icampëri:

—Intsome, piguiatanëna. Jirai pitarobacaati pisiriati sima carari nomëmi irorai pitarobacaare; pinguemisantacaguinari matsiguenga.

²⁰ Aito cara ijocanëro isiritite, yoguiataiganaqueri. ²¹ Yogagaiganaca negaqueronta, Jesus iniopëri pite basini, Santiago aisati ireinti, Joan. Iriro pitirooti itomi Sebereo. Yobetsaigaseguero irisiriamoento cara ibitoquë. Aisati icaimaigapëri Jesus. ²² Aito cara ijocaiganaqueri iriri cara ibitoquë, yoguiataiganaqueri.

Icomantagueanti Jesús cara Garireaquë.

(Mr 1.35-39; 3.7-8; Ir 4.42-44; 6.17-19)

²³ Iquenagueque Jesus cara Garireaquë; yogomeanti omagaro poeboropaguequë cara yapatoitaiga jorio. Aisati iquenguitsatocotagueantëro iragáantane Tosorintsi cara intingomibintaiguëri matsiguenga. Aisati Jesus yogaguibegajiri tojai janaitatsiripague.

²⁴ Iquemocotaiguëri Jesus omagaro Siriasati. Aro yamaigapëri tojai imatsiguenga janaitaguetatsiri aisati catsibaguetatsiri arota iraguibegajiri. Yamapëri Jesusiquë ira inanca camagari, ira tingaraachari, aisati ira emëngari. Yogaguibegajiri antagaisati.

²⁵ Yoguiaitaigapëri tojaisonori matsiguenga: Garireasati, Tecaporisisati, Jerosaresati, Jore-asati, aisati ira paniacha antatinta Jorirán.

5

Iquenguitsaque Jesus cara oguitojaquë; icomantëgotaiquëri ira iraganinasëretaiquë Tosorintsi.

(Ir 6.20-26)

¹ Cara Jesus iniaiguëri tojai matsiguenga ira botoibiritaigacari, aro itonganaque oguitojaquë, isobigopë. Ishongaigapari irogomerejegui. ² Aique yogometaiguëri, icantaiguëri:

³ —Iraganinasëretaiquëri Tosorintsi antagaisati ira cantatsi: “Nantingomintimari Tosorintsi. Nocoguini irojocajinaro ora nacantaguetomotiri quimingari, iragabisaicotajinata tenta nagabisaicotajima naneni”. Aro iragabisaicotajiri Tosorintsi. ⁴ Iraganinasëretaiquëri Tosorintsi omagaro ira agasëretaiagacha, omagaro ira aragacha. Aro inganinasëretaiaganaqueri Tosorintsi. ⁵ Iraganinasëretaiquëri antagaisati ira te inguengasantima, quero iguisabacaga. Aro Tosorintsi ingábintsasanoiguëri, imëri ora caninaro. ⁶ Iraganinasëretaiquëri Tosorintsi omagaro ira cogasantatsi ingante caninasati. Iromitocotaiguëri intime caninasati. ⁷ Iraganinasëretaiquëri Tosorintsi antagaisati ira cantaneintëgotiri ira basini. Aisati ingantaneintëgotasantëri irirojegui Tosorintsi. ⁸ Iraganinasëretaiquëri Tosorintsi omagaro ira quingasëretaiagacha caninasati aisati cantatsi caninaro. Aro ironijaguëmari iriro Tosorintsi. ⁹ Iraganinasëretaiquëri Tosorintsi antagaisati ira aguimairenqueri quisachari. Aro intomintaiguëmari Tosorintsi. ¹⁰ Aroca inguisaiguëmi aroquenta picaninataiguë, pinganinasëretaiague. Aro iragasobicaiguëmi Tosorintsi cara igáanti Iriró. ¹¹ Aisati inganquimica catsimari, irinibatocotimica ora te onganinate, intoiguëgotimica aroquenta piquemisantaiguëna, pinganinasëretaiague. ¹² Jee, pinganinasëretasantaiguë: imaiquëmi Tosorintsi ora caninaro cara Jonogaguitequë aisa icanta ipaiguëri comantantatsiri jirai cara iguisaiguëri imatsiguenga. Iroero quero pipëgataguëteri, ingantocoquiminta Tosorintsi caninaro.

Ira quemisantatsiri yosiacaró pibega patiari aisati pibega michero.

(Mr 9.50; Ir 14.34-35)

¹³ Aisati icantaiguëri Jesus:

—Pigóiguë obotiatëri ibatsa arota quero isititi. Carari omasangatanëca patiari ora cochotacaguero, quero ocomeitanai, ojoqueroti sotoquë iranëiro ogatiquengani. Obirojegui posiacaro pibega patiari: poganinataiguëri matsiguenga. ¹⁴ Aisati obirojegui picantaro michero yaca quibatsica. Iniaiguëmi matsiguenga ora picantaiguë aisa ocanta iniaiguëro poeboro inatsi oguitojaquë. Quero pimána. ¹⁵ Aisati posanguëquitocotaiguëri matsiguenga ora caninaro aisati picantaro michero. Cara poboquerotica, quero pimániro osobica cantiri, carari poguërotica jonoquë arota osanguëquitocotiri omagaro timatsi pongotsiquë. ¹⁶ Aisati obirojegui, pintimaigue caninasati arota iraniaiguëmi pomatsiguengajegui cara caninasati picantaiga. Aro iranianinataiguëri Pabatí Ira timatsi Jonogaguitequë.

Jesus icomantëgotëro isanguenare Moisés.

¹⁷ Përosati yogomeque Jesus:

—Teri iroero nopocasite nojocaguimiro cara piquemisantaiguëro isanguenare Moisés aisati isanguenare comantantatsiri. Nipocasique nogometaiguëmiro ora icantasati. Nomoncaraquero. ¹⁸ Aisonori nangantaiguëmiro oca: otsonguëmaca quibatsi aisati Jonogaguite carari quero pitsonga isanguenare Moisés irooti cara omoncaraquima antagaisati ora icanque. ¹⁹ Queroca piquemisantasantiro isanguenare, aisati aroca pogometiri pomatsiguenga cara quero iqemisantasantiro, quero iniacaninasantimi Tosorintsi cara iragáantanequë. Carari aroca pinguemisantasantëro omagaro isanguenague aisati pogometaiguërica pomatsiguenga inguemisantasantiro, aro imëmi Tosorintsi pomitocotaiguëri cara igáanti. ²⁰ ¿Pijitasitaiga Tosorintsi iniacaninataiguëri bariseo aisati ira ogomeantiro Sanguenari? Yamai nongomantaiguëmi, teni iromoncarataiguero ora icogaigabitari Tosorintsi. Aisati obiro, queroa pabisiri iriro, queroa picaninatasantaiguë, quero piáti obiro cara iragáantanequë Tosorintsi cara itingomibintanti.

Icanque Jesus: “Quero piguisabacaga”.

(Ir 12.57-59)

²¹ Aisati icanque Jesus:

—Pigóiguë icantaiguë jirainisati: “Quero póganti. Aroca póganque, ingasitígatëmi Tosorintsi”. ²² Carari nongomantaiguëmi Naro: quero piguisaneintiri pomatsiguenga. Aroca

pinguisaineinqueri, ingasitígatēmi pitingomi. Aroca pinganqueri: “Te pigóte”, inguisaiguēmi obatacagantatsiripague icarati 71. Quero picantēmatiri pairoraca querota pitsipireiro cara Sharincabeniquē. ²³ Cara pijáqueca ibangoquē Tosorintsi aroca pógueñeri pitaquineri pobira cara itagantariquē, carari piquianca aiti ora iguisēgotantimi pomatsiguenga, ²⁴ atsi pijocanēri pobira cara, pijátasitiri ira quisēgotimi. Pobetsicobagaima, págacananatobagaima. Aique popigaima ibangoquē Tosorintsi, pógueñeri pobira. ²⁵ Aintaca pomatsiguenga irácagantēmi, pobetsicagairi pinguencaguimari. Pingante: “Intsome obetsicobagaima”, queroquerei yáganēmi cara poesitoquē. Aro ira joes iragáqueri soraro: “Páganēri ica”. Aique iromianquemi cara iromingamentoquē. ²⁶ Aique queroca pipēnabentiro antagaisati pirebetiri, quero yomisotocajimi aisati.

Icanque Jesus: “Quero pintantopitiro pijina; querootisati pintantopitiri pijime”.

(Mt 18.8-9; 19.9; Mr 9.43-47; 10.2-12; Ir 16.18)

²⁷ Pērosati icantaiguēri Jesus:

—Pigóguē icantaiguē jirai: “Quero pintaguetiro tsinane cagaro pijina. Quero pintaguetiri sērari cagari pijime”. ²⁸ Carari nongomantaiguēmi Naro: pinetseroca tsinane pinebetēmaro, aisati pinguengasēretēro pintēro, aroque pintēro ora te ongomeite. Aroque paguimintimaro pijina. ²⁹ Nosiacagantēmiro: oraca antaquemine piroquisonori ora quimingaro, pijocajiro ora picantagueti te onganinate. Aro pobetsiquiro pisēre aisatime ongantima pinguitsoguimero piroqui, pijoquintirome. Aro quero piáti Sharincabeniquē. ³⁰ Oraca antaquemine pobacosonori ora te onganinate, pijocajiro ora picantagueti te ongomeite. Aro pobetsiquiro pisēre aisatime ongantima pitotirome pobaco, pijoquintirome. Aro quero piáti Sharincabeniquē. ³¹ Aisati ongantingani jirai: “Aroca pingoque pijocajiro pijina, pisanguenatinero pomero ora pijogantaimaro, aro pijoquero”. ³² Carari nongomantaiguēmi Naro: quero pijoquero pijina. Aroca pijoquero, aisati págae basini, aroque paguimintēmaro pijinasonori, picantagueti ora te ongomeite. Aisati ira ágairone ora pijoque, aiti irantane ora te onganinate. Aintaca tsinane ojoqueri ojime ágairica basini sērari, aroque antantopitiri paguimintacari ojimesonori. Iroonti patiro caninataque pijoquero pijina aroca aguimintēmi, quero basini.

Icanque Jesus: “Quero pamatobitiri pomatsiguenga”.

³³ Aisati icanē Jesus:

—Aisati pigóguē onganti. Aroca pijoquero, aisati págae basini, aroque paguimintēmaro pijinasonori, picantagueti ngani jirai: “Quero picantasita: ‘Igóque Atingomi nasatironguēro omagaro nacanquimi’. Aroca nomatobiquimi, iróguinata’. Aroca pingaque: ‘Igóque nasatironguēro omagaro nacanquimi’, aro pomoncaratima aisonori”. ³⁴ Carari nongomantaiguēmi Naro: quero picantasitēmata. Quero pinibati: “Aisonorica aiti Jonogaguite, aisa ocanta nanibare, aisonori catingasati nomoncaraquimaro ora nacanquimi”. Nangantaiguēmi Naro: ora Jonogaguite iroonti iragáantamento Tosorintsi. Igóti aisonorica pinibati. ³⁵ Querootisati pinibati: “Aisonorica aiti quibatsi, aisati aisonori catingasati ora nacanquimi; nomoncaraquimaro”. Carari ora quibatsi iroonti ora yagatiqui Tosorintsi. Igóque pitsoiganica. Querootisati pinibati: “Aisonorica aiti Jerosarén, aisati aisonori nanibatēmi catingasati”. Carari nangantaiguēmi itingomibintaiguēri Atingomi omagaro Jerosaresati. Igóti Iriro aisonorica pinibati. ³⁶ Querootisati picanti: “Iritoinata naguisiquē queroca ninibati catingasati”. Nacanquimi te pigóte ati ongantima pingamaque; paniro igóque Tosorintsi. Pintingomintimari Iriro igótinta pitsoiganica. ³⁷ Pinibate catingasati. Quero pitsoiga, querootisati pamatobianti. Caninataque pintēroca pairoraca, pingante: “Jee, nantēro”. Queroca pintiro, pingante: “Quero nantiro”. Aroque. Te onganinate pomitojaiguero pinibare.

Jesus icanti: “Quero pipégatari ira basini”.

(Ir 6.29-30)

³⁸ Pērosati icanque Jesus:

—Pigóguē ongantingani jirai: “Aroca pinguitsoguēneri iroqui basini, caninataque iripēgaquimi inguitsoguemiro pasi piroqui. Aroca piquēriaitēri pomatsiguenga irai, caninataque iripēgaquimi iriquēriajiquimiro pasi piji”. ³⁹ Carari nongomantaiguēmi Naro: quero pipégatari ira quisimi; aroca irancho tangaborotēmica cara poborosonoriquē, popisatima pomētiguimari queroca poboro ingapojaboroquemi aisati. ⁴⁰ Aisati aroca ingoque sērari iráganēmi catingasatiquē joes, ingoque irágopitēmiro pigamisate, pomeri pobasitoro aisati. ⁴¹ Aroca iromeratēmi paniro, inganquimi: “Páganēnaro oca nasica poro quirometoro”, aro pigabisēneri pite quirometoro. ⁴² Aroca iromanaquemi pomatsiguenga: “Pomenaro”, aro pomētiguiri. Aisati aroca inganquimi: “Pomirisitataro oca”, aro pomirisitaqueri, quero pometopitari.

Icanque Jesus: “Pinintaiguëri quisaneinquimi, pingábintseri”.

(Ir 6.27-36)

⁴³ Përo icantaiguëri Jesus:

—Piquemaiguë cara pomatsiguenga cantaigatsi: “Pingábintseri pomatsiguenga, carari pinguisaneintiri ira quisaneintimi obi-ro”. ⁴⁴ Carari nangantaiguëmi Naro: pinintaiguëri omagaro ira quisaneintimi aisati cantasitëgotaguëtaiguëmi, aisati pomancotaiguëri iraugui cantëgotaguëtimu catsimari arota ingábintsaguëri iriro Tosorintsi. ⁴⁵ Cara pingantaiguë negaca, poniagaiguëma aisati picantari ibega Tosorintsi, Ira piquemisantaiguë, Ira tointaiguëmi. Ainta Iriri canta Jonogaguëtequënta, cara yobetsiquiri paba cara yobariaguëte-tocotaiguëneri antagaisati, ira caninari aisati ira te inganinate. Aisati angani, yobariatëneri antagaisati, ira quemisantatsi aisati ira te inguemisante. ⁴⁶ Aroca pingábintsëri paniro ira cábintsëmi, ¿Pijiqueco iraniacaninatëmi Tosorintsi? ¿Teco aisati ingábintsabacagaiguëma ira coigotaiguëmi piguireguëte, ipagantineri cobeingari cara Iromaquë? ⁴⁷ Aroca pobetsataiga-baquitari paniro pomatsiguenga, ¿Pairo picantaiguë caninari? ¿Teco aisati irobetsatobagaiguëma ira cagari jorío, ira te irogóguëri Tosorintsi? ⁴⁸ Pinganinatasantaiguënaque, pingantaiguëmari ibega Piri Tosorintsi. Icaninatasantoti Iriri; inintasantaiguëri omagaro matsiguenga.

6

Yogometagüi Jesus ati angantima angábintsante.

¹ Aisati icantaiguëri Jesus:

—Pigamema. Quero piquemisantomemega arota iraniacaninataiguëmi matsiguenga aisonori obi-ro iroontita pematobitaigaseguëri. Aroca pomatobitaiguëri negaca, quero iniacaninatimi Pabati Tosorintsi canta Jonogaguëtequë. ² Cara pomasitaiguëmarica pomatsiguenga ira cogatsi pairoraca quero picomantaguëteri basini. Irooti icanque ira quemisantomemegacha. Cara ipirica pairoraca ira coguitiacha, icomantaiguëri antagaisati. Icoqui iraniacaninataiguëri iriro. Nangantasantaiguëmi oca: iniacaninatabitarica iriro imatsiguenga, quero iniacaninatiri Tosorintsi. Aroque yáguëro iraisati. ³ Carari cara pomasitaiguëmarica ira cogatsi pairoraca, pomániro. Quero pigótacaguëri basini. ⁴ Aro quero igóti pomatsiguenga cara pomitocoqueri ira coguitiacha. Carari irogótocoquimi Tosorintsi, imëmiro ora caninari.

Yogomecái Jesus ati angantima cara omanocoqueri Tosorintsi.

(Ir 11.2-4)

⁵ Përosati yogomeanti Jesus:

—Aisati, cara pomancotaiguërica Tosorintsi, quero posigari ibega ira quemisantomemegachari. Yamanagaseguëri iriro cara yapatoitaiga joríojegui aisati cara abatsiquë arota iraniacaninataiguëri imatsiguenga. Aisonori nacantaiguëmi oca: aroque yáguëro iraisati. ⁶ Carari cara pomancotaiguërica Pabati, pinganaque tsomagui, pisitocotanëma, aro pomancotiri Piri. Iraniaquëmi Iriri paniro obi-ro, iraniacaninatëmi, imëmiro ora caninano. ⁷ Aisati cara pomancotaiguërica, quero pinibatasita aisati picantari ibega ira te irogóguëri Tosorintsi. Inibatasitaiga iriro bero bero bero aronta ijitaigabita inguemagabaqueri Tosorintsi cara yomitojaiganaquero irinibare. ⁸ Quero posigaigari ibega iriro. Igótasanti Tosorintsi antagaisati ora picogaigui cara queroquerai pamaniri. ⁹ Iro-ro cara pomanaiguërica Tosorintsi, pomancotiri cantacha negaca: “Pabati nasiatiegui, ainta Obi-ro Jonogaguëtequë, nocogaigui cara iraniacaninataiguëmi omagaro matsiguenga Obi-rona Natingomisonori. ¹⁰ Nocogaigui pigáantasantaiguëna yaca quibatsica; aisati nocogaigui nanganque antagaisati ora picocagaiguëna. Aisati nocogaigui inganque omagaro matsiguëngajegui ora picocagaigui aisati ingantaiguëmari iraugui timaiguëti cara Jonogaguëtequë icantaigaseguë omagaro ora picocagaigui. ¹¹ Pomapinintaiguëna no-peri antagaisati cataguëteri. ¹² Aiti nacantomotaguequimi ora te onganinate. Pingábintsantaiguëna, pijocajinano quero piquengainaro aisa ocanta nojocajineri ora icantaguëtomotina matsiguenga ora te onganinate, teni nanguisaneintajiri. ¹³ Quero pinintacaguëri camagari ira irantacaguëna ora te onganinate. Përosati cara pigáantasantaiguëti omagaro. Pasintaguëtaro antagaisati. Përosati pitasangantasantaguëti Obi-rona sintsirisonoriguëte. Përosati picobeingaguitetasanti. Aro ocarati, amen”.

“Pijocajineri ira basini ora icantomotaguequimi”.

(Mr 11.25-26)

¹⁴ Aisati icantaiguëri:

—Aitosati aroca pijocajineri ira basini ora icantomotaguequimi te onganinate, ingábintsaguëmi Pabati Tosorintsi Ira timatsi Jonogaguëtequë, irojocajimiro aisati ora picantaguëti obi-ro te onganinate, quero iquengaimiro. ¹⁵ Carari quero-ca pijocajineri

pomatsiguenga ora icanquimi te onganinate, querootisati ijocajimiro Atingomi ora picantagueti cagaro caninatatsi.

Yogomecái Jesus ati angantima cara atitaiguêma.

¹⁶ Përosati yogometaiquëri Jesus:

—Cara pittimaca pomanoçoqueri Tosorintsi, quero pigótacaguiri basini matsiguenga. Quero aisa picantagari ibega ira quemisantomemegacha; cara ititopiantaiga iriro, yogasëretomemegaca arota irogóntëmari cara itita, aisati iraniacaninataiguëri matsiguenga. Nacantocotaiguëri oca: aroque yáguëro iraisati. Quero ipiri Tosorintsi. ¹⁷ Carari nacantaiguëmi, cara pititaiguêmaca, caninataque pobetsiquima, pinguibima pibega cara pametaiga. ¹⁸ Aro quero igótocotimi pomatsiguenga cara pitita. Carari irogóquimi Pabati jonoquë, imëmi aisati.

Icanque Jesus: “Pingogue cara imëmi ora pasi canta Jonogaguitequë”.

(Ir 11.34-36; 12.32-34)

¹⁹ Aisati icantaiguëri Jesus:

—Quero pomitojaiguero ora pasintagueta yaca quibatsica: yaca aiti ora irapë cajiro, aiti basini oraaquima, basini egatanë, aisati ora ingositëmimo cosirinti. Otsonganaquima omagaro. ²⁰ Carari pingogue iromitojaiguemiro tojai ora pasi përonta cara pinë canta Jonogaguitequë, cara quero yapiro cajiro, quero piraaga, querootisati icositimiro, quero pitsonga. ²¹ Aitica ora pasintagueta yaca quibatsica, pinguengasëretapinintiroca ora inatsi yaca quibatsica; carari aitica pasi canta Jonogaguitequënta, pinguengasëretapinintirica Tosorintsi. ²² Aiti piroqui ora piniaanta, ora pigónta. Posiacaro obotagantsi ora po-boonta tsitiniriquë, piniantaro. Aroca ocaninatomoquimi, pigóganaque, ²³ carari queroca ocaninati, quero pinei, quero pigóti, pitimi tsitiniriquë. Aisa ocanta aroca pinguengasëretapininquero ora te ongomeite, quero pigótiri Tosorintsi, përosati pitimi tsitiniriquë.

Icanque Jesus: “Aroca pintanontabitiba obiati quero picantiro ora icocaquemi Tosorintsi”.

(Ir 16.13)

²⁴ Aisati basini icanque Jesus:

—Quero picantiro piquemisantiri pite pobatorote. Aisa ocanta aroca pingantineri Tosorintsi omagaro ora icocaquemi quero picantanonta obiati. Aroca pingoque pingantanontima obiati, quero pintineri Tosorintsi. Quero picantiro pite. Aroca pinintasantëri Tosorintsi, quero picogui popobotiri piguirequite. Aisati pinintirica piguirequite, quero piquemisantiri Tosorintsi.

“Quero pogasëreta Irironta omisantimi Tosorintsi”.

(Ir 12.22-31)

²⁵ Aisati icanque Jesus:

—Yamai nongomantaiguëmi: quero pogasëretocotaro poperi, pomire, piguitsagare, pairorapageraca. Irironta timaquimine Tosorintsi, ¿Queroco ipaiguimi poperi aisati? ¿Queroco icaaguimi pomanchaqui aisati? ²⁶ Pinetsaiguëri tsmiripague, pingueinguema. Teni imanguitanontima, teatisati iráguero ibanguire iroquero ibangoquë, carari ipagueiguëri Pabati Tosorintsi iraperi antagaisati cataguiteri. Aroca yomisantaiguëri tsmiripague, aisati obirojegui iromisantasantaiguëmi pabisaguërinta tsmiripague. ²⁷ Aroca pinguengasëretëma, ¿Aroco pomitojaiguëro posarinite? Quero. Pitsipirasita cara piquengasëreta. ²⁸ Aisati ¿Pairo pogasëretocobiritaro piguitsagare, pairoraca pinguitsagatima? Pinetsaiguero otegapague tobari. Te onguenque. Te onguirique, teatisati ontëmate, ²⁹ carari iroro caninarosonori. Jirai itimi Saromón, itingomi joriojegui. Iquitsagata caninasati iguitsagare carari te aisati ingantimaro pibega orapague otega. ³⁰ Tosorintsi aganinatëro otegapague tobari, ora quero ocosamaniti omanapague osiguiricanë, iritagüero matsiguenga. Cara yoganinatëro otegapague Tosorintsi, ¿Teco iromisantaiguëmi obiro aisati; inguitsagataiguëmi? ¿Pairo pitsoingobitaiguëri? ³¹ Iroro, quero piquengasëretaguëta quero posamita: “¿Pairo nopë? ¿Pairo nóguëma? ¿Pairo nanguitsagaquima?” ³² Aisati icogaiguero ocapague ira te inguemisante. Quero posigari irirojegui, aroquenta igóquero Pabati Tosorintsi cara Jonogaguitequë ora picogaiguë obiro. Iromisanquemi. ³³ Pingogue obitsita quemisantasantërine Tosorintsi, pintingomintasantimari, aisati pingogue iraniacaninatimi. Aique imagueiguëmiro ora picoguitaiga. ³⁴ Iroro, quero piquengasëretaguëta naramani, pairoraca pinganque. Cara orequima naramani, aro pinguenguero. Aiti ora piquengasëreti yamai; te onganinate pigasëretima naramani aisati.

7

“Quero pini joes, quero picomantëgotiri basini”.

(Ir 6.37-42)

¹ Përosati inibatë Jesos, icanque:

—Quero pini joes. Quero picomantëgotiri pomatsiguenga. Aroca pingomantëgotëri: “¡Cara icantagueti iriro ora te onganinate!” aro ingantocoquemi Tosorintsi aisati: “Aiti ora picantagueti obiro”. ² Aroca pinguisaneinqueri basini, iripëgaquimi obiro inguisaneinquimi aisati. Aisa ocanta pingábintsëri basini, aisati ingábintsëmi obiro. Cara picomantëgotëri basini matsiguenga, aisa inganquima ingomantëgotëmi obiro Tosorintsi. ³ Aitica picantagueti obiro te ongameite, quero picantëmatiri pomatsiguenga: “Aiti picantagueti quimingaro”. Nosiacagantëmiro; aitica pairoraca oquibe cara piroquiquë, ¿Caninataqueco piniaquero arosata cara iroquiquë pomatsiguenga? Quero. ⁴ ¿Pairo picantobitiri: “Majire pine, nágabitsaquemiroti ora arosata piroquiquë”, carari quero pineiro aitinta oquibe pasi piroquiquë? ⁵ Tojai picantasita. Obitsita joquërone ora oquibe pasi piroquiquë. Aique piniasantë cara pijocajineri pomatsiguenga ora arosata inaaqueri iroquiquë. Aisati picoguica pingantiri pomatsiguenga irojocajiro ora icantagueti te ongameite, pobate pijocajiro ora quimingari picantagueti obiro. ⁶ Te onganinate pomapinintiri otsiti caninari ibatsa tenta ingarasiatimiri; teatisati onganinate pomapinintiri chanco irapëro caninari mopë catari jitacha përira, queronta icogui yapiro. Iratscabitëmaro, irojoquero, inguisanaquima, iratsicanëmi. Aisati ocanta ocaninatasanti Irinibare Tosorintsi. Caninataque pinguenguitsatomotaguetiri pomatsiguenga, carari aroca inguisaneintocoquemiro tenta iranintaigue inguemisantiro, quero picomantairi aisati.

Yogomeque Jesos: “Përosati pomanocotopiantiri Tosorintsi”.

(Ir 11.9-13)

⁷ Aisati icantaiguëri Jesos:

—Aroca pomanaqueri Tosorintsi, aro imaignëmiro. Pomanocotopiantiri, aisa ocanta pingoqueroca pairoraca, aro imaignëmiro. Aisa ocanta pirequimaca pongotsiquë, pingaimapëri casintaro, “Pisirenaro”, aro irasiriëmiro. Aisati cara përosati pomanocotopiantëri Tosorintsi, imaignëmiro. ⁸ Aisonori imaimi Tosorintsi ora pomanocotopiantëri. Aisati cara pingogaiguëca iranetsacaquimi. Cara pingaimapërica irasitëcoroquë, irasiriëmiro. ⁹ Aroca iromanaquimi pitomi: “Apati, pomena pan”, querosonori popiri mopë. ¹⁰ Aroca iromanaquimi: “Pomena sima najagueni”, quero popiri marangue. ¹¹ Pinetsaigue. Te pinganinatasantaigue obiro, carari pigóiguë pingábintsaguëri pitomi popabaqueri ora icoguitiaca. Icaninatasanti Tosorintsi, Ira timatsi Jonogaguitequë, igótasanti icábintsaguëri antagaaisati ira manëgotaguiri. Imaiguëri ora caninaro.

Icanque Jesos: “Pinintobagaiguema”.

(Ir 6.31)

¹² Aisati yogometaiguëri irogomere Jesos, icanque:

—Aroca pingogue ingábintsaguimi matsiguenga, pingábintsagueri obiro. Pinintica ingantaneintëgotimi iriro, aro pingantaneintëgotiri obiro aisati. Iroro ora isanguenataiguë jirai Moisés aisati omagaro comantantatsiri.

Jesos icomantëgotëro pite abatsi.

(Ir 13.24)

¹³ Aisati icomantaiguëri matsiguenga Jesos:

—Aroca pininti pingapë cara itimi Tosorintsi, pingapë otiomiriquë omoro. Aiti basini omoro oquibe, aisati basini abatsi oquibe cara te omomirintsite iriaguë matsiguenga, Carari iragui quenantaro abatsi oquibe iriaguë cara Sharincabeniquë, iratsipiriantëquero përosati. ¹⁴ Irari quenantaro otiomijaniquë omoro aisati otiomijani abatsi iraretaiguëma cara Jonogaguitequë. Arosanori quenantaigaro oquibe abatsi, carari arosataanti matsiguenga icaigapë omoroquë otiomijani aisati iquenantaigaro otiomijani abatsi.

Jesos icomantëgotëri matobiantatsiri.

(Ir 6.43-44)

¹⁵ Aisati icantaiguëri Jesos:

—Pigamemari matobiantatsiri ingomantomemeguëmiro Irinibare Tosorintsi. Ingantabepëmarime ibega oisha; pijitaigabaqueri quero icantimi pairoraca. Carari irianti cantapëmarime ibega secari irianti cobeingarisonori. ¹⁶ Pinetsasantaiguero ora icantagueti, ora pigóontëmari icaninataca. ¿Páguëroco oba cara totseisiquë? Teni. ¿Paguëroco igo cara jirinasiquë? Teatisati. Aisati icantaiga matobiantatsiri: tiguëti ingantiro caninari. ¹⁷ Pigóiguë caninaroca anchato aisati caninaro oguitso. Aisati teca onganinate anchato teatisati ongameite oguitso. ¹⁸ Ora caninaro anchato tiguëti ongantima onguimingate oguitso.

Aisati ora anchato ora te ongemeite tigueti ongantima onganinate oguitso. ¹⁹ Pigóiguëro anchato te onganinate oguitso, otoquero ataquero aisati. ²⁰ Aisati pigóigabaquero ati icantaigapa ira cogatsi irogometimi. Pigóiguë itimica caninasati, aisati irogomepëmiro Irinibare Tosorinti caninasati. Carari teca intiomotimi caninasati, teatisati irogomeante catingasati.

*Ira játaiguënguitsine cara Jonogaguitequë.
(Ir 6.47-49; 13.25-27)*

²¹ Aisati icanai basini Jesus:

—Aintaca pairiraca cantënane: “Natingomi, Natingomi”, quero iáti cara Jonogaguitequë cara nigáanti Naro. Aintanta inabita inganquina: “Obiro Natingomi, natingomintasantëmi”, carari quero iáti cara nagáantanequë. Irianti játënguitsine Jonogaguitequë iragui quemisanqueri Pabati aisati icantasantineri ora icocaquemi omagaro. ²² Aiquenta cara nopocaje nongomantëgotaigapëri antagaisati matsiguenga, nanganqueri negaraca iriatë aisati pairoraca inganque. Ainta tojai cantasitënane “Natingomi, nocomantëgotëmi. Aisati nacantaiguëri matsiguenga inancari camagari: ‘Naquemisanquerinta Jesoquirisito Natingomisonori, iroro pijátopitiri ica, pijocanëri’. Aro iátaji, ijocanëri. Aisati nita-songanti Obironta omitocoquena”. ²³ Carari nangantaigapëri: “Teni nogóiguemi. Pijáigue jaanta, tenta pinguemisasantantina. Piquemisantomemegasita. Tojai picantagueigui ora te onganinate. Picantanonta obiati”. ²⁴ Pinetse, aroca pinguemobëro ora nogometaguëmira pinguianquero, pinguemisanguero ora nococaquimi, pintaiguëro, aro naniacaninataiguëmi. Obiro pingantimari ibega sërari ogótatsiri yobetsiquëro ibango coshobatsariquë. ²⁵ Opariaque oquibe angani, pipoque jarini omotoncaatapa, ocoquintimatasantapë sintsiri. Carari përosati pini ibango iroronta yobetsiquë coshobatsaroquë. Coshori pongotsi. ²⁶ Carari teca pinguemobëro ora nogometaguëmira, te pinguengero, te pinguemisantiro ora nococaquimi, te pingantiro, aro nangantaiguëmi: obiro ibega sërari te irogote. Yobetsiquëro ibango cara sibatabatsaroquë. ²⁷ Opariatapë oquibe angani, pipoque jarini omotoncaatapa, ocoquintimatasantapë sintsiri. Aito cara pitëanë pongotsi catsiguero; páganëro jarini. Itsipiriasicaro ira obetsicabitaro. Aisa onganquima pitsipiriasiquima queroica picantasantiro omagaro ora nococaquimi.

*Itonquero Jesus yogomequeri imatsiguenga cara oguitojaquë.
(Mr 1.22)*

²⁸ Aroque itsonquero Jesus yogometagaqueri matsiguenga cara oguitojaquë. Iquen-ganeintasantaigapëri. Icantobagaiganaca matsiguenga:

²⁹ —Tojai igóti Iriro. Teni asi angumiro cantacha nega. Yogomeanti aisati icantari ibega Atingomi; teni aisati ingantima ira ogomeantiro isanguenare Moisés.

8

*Jesús yogaguibegajiri ira iribatsasetaga.
(Mr 1.40-45; Ir 5.12-16)*

¹ Aroqueque icomantanque Jesús cara oguitojaquë, yanongopa. Aro yoguiataiganaqueri arosonori matsiguenga. ² Aro iátasiqueri poro sërari iribatsasetaga. Yobaticagueritotasi-pari, yamanopëri:

—Natingomi, pinintica piguëtetainaro nobatsagoro. Nigóque picoguica pigaguibegajina.

³ Aro itimagonaguitasitanacari Jesús yotsagaqueri icanqueri:

—Nocogui yamai; nagabisaicotajimi.

Aito cara opeganaa ora iribatsagoro ibeganaa. ⁴ Aro igáqueri Jesús, icanqueri:

—Quero picomantaguetiri pairiraca, carari pijáte catingasati, poniagapëmari saseriroti, ira nibabintimiri Tosorinti. Pingantiri: “Nibatsagabeta, carari pinetsena yamai, abisëgotaina”. Aisati pomeri pobira: iróquimiri saseriroti iritaguëneri Tosorinti cara igáqueri Moisés jirai. Ora irogóontimi cara piquëtetana.

*Jesús yoguibegajiri ironomire capitán.
(Ir 7.1-10)*

⁵ Aro yogaganaca Jesús, aisati ira aguiataiguëri, yaretaigacaro poeboro jitacha Caperi-nao. Ipocasipëri sërari cagari jorio, irianti Iromasati. Iriro capitán, igátaiguëri 100 soraro.

⁶ Icampëri Jesús:

—Natingomi, ainta nonamire cara nobangoquë, emëngatëni. Ainta icatsitasantëni. Nocogui pigabisëgotairi.

⁷ Icanëri Jesús:

—Aro najáque cara, nagaguibegajantiri.

⁸ Carari yotabitanëri capitán:

—Nigóquimi, Obiro Natingomi caninari; nitsoingaa naati, te nanganinate. Quero piáti nobangoquê. Nigóque aroca patiro pinibate, aro irobegajima. ⁹ Ainta agátinari, aisati ainta soraro ira nigátaigui naro. Aroca nagáqueri nosorarote: “Pijáte”, aro iriátê. Aroca nanganqueri basini: “Popoque”, aro iribocapê. Aisatica nagáqueri nomeraro: “Pingantiro oca”, aro inganquero. Aisati ocanta pibega Obiro. Omoncaraquima pairoraca pinibati.

¹⁰ Aro iquenganeintacari Jesus, icantaiguêri iraegui aguiataiguêri:

—Nacantasantaiguimini: tojai iquemisantasanti ica, yabisanaqueri antagaisati joriojegui quemisantatsi. ¹¹ Aiquenta cara igáanti Tosorintsi, iribocaigapê arosonori basiniati matsiguenga paniaigacha omagaroquê quibatsi. Irisobicaigapê intsbataigapê mari nomatsiguengajegui Abaram, aisati Isac, aisati Jacob cara iragáantanequê Tosorintsi. ¹² Carari quero ipoqui tojai jorio cara tenta inguemisantaiguêri Tosorintsi. Icgabeca Iriro iriáigui jorio cara iragáantanequê, carari itsoingaguêri Iriro jorio. Iroro iragátaguêqueri cara otsitinitasanti. Tojai iratsipiriasantaiguê cara aisati iratsiaguuitetanê.

¹³ Aique icanqueri capitán Jesus:

—Yamai, pijáte pobangoquê. Aroquenta piquemisanquina noguibegajiri ponamire. Aro irooti ibeganaa ironomire.

Jesos yogaguibegajiro iraguiro Peroro.

(Mr 1.29-31; Ir 4.38-39)

¹⁴ Cara iáque Jesus ibangoquê Peroro, icanaque iniopêro iraguiro pinariasega osamentoquê. Ojanaitê ocatsingaeguisigui. ¹⁵ Aro yotsagaquero obacoquê, yoguibegajiro. Aito cara ocabiritaja, opêri iraperi.

Jesos yogaguibegajiri tojai basini janaitaguetatsiri.

(Mr 1.32-34; Ir 4.40-41)

¹⁶ Cara ochapinitanê, iátasitaiguêri, yáganêri tojai matsiguenga ira inanca camagari. Ijocajineri Jesus igamagarite, aisati yogaguibegajiri omagaro janaitaguetatsiri. ¹⁷ Icanquero Jesus negaca arota iromoncaraquero ora isanguenatocoqueri jirai comantantatsiri jitacha Isaías:

Aiquenta iribocapê Quirisito agabisaicoquerine tojai janaitaguetatsi, tojai ingábintsaguêri.

Icanque Jesus: “Piguiatapêna”.

(Ir 9.57-62)

¹⁸ Cara yapatobiritaigapari Jesus arosonori matsiguenga, icanqueri irogomere:

—Intsome antatinta.

¹⁹ Ainta inasegui paniro ogomeantiro isanguenare Moisés, yotsitipari Ira Jesus, icampêri:

—Ogomeantatsiri, negaraca pijáque nocoguini naguiatanêmi.

²⁰ Yotabitanêri Jesus:

—Aiti imoro somani cara isami, aisati aiti imagosi tsimiripague cara isami, carari te ine nasi nobango cara nanareaquima Naro arota nopaniaca Jonogaguítequê, nomatsiguengatapê cara niboguê yaca quibatsica.

²¹ Ainta basini irogomere icanqueri:

—Natingomi, nocoguini naguiatanêmi, carari pênibaque ingamaque apati. Pinintacaguina natianêri; aique coshoni naguiatanêmi.

²² Yotabitanêri Jesus:

—Piguiatina obiro. Ainta tsoengatsiri, ira te inguemisantari Tosorintsi; iritjairita piri.

Jesos yoguimairenquero sintsiri coguentima.

(Mr 4.35-41; Ir 8.22-25)

²³ Aro yotetanaca Jesus pitotsiquê, aisati itsibataiganacari irogomere. ²⁴ Aro inariopa Jesus isamapê. Omanapague coraque pipoque oquibeguinte coguentima, omotoncaatapa, potiatanaca pitotsiquê. Pêrosati isamasegui Jesus. ²⁵ Aro itsorogasantanê irogomerejegui, icabocapêri icanqueri:

—¡Natingomi, atsiticoiguên! ¡Pigabisaicotaiguena!

²⁶ Icabirica icantaiguêri:

—¿Pairo pitsorogobitaiguê? ¿Pairo te pinguemisantobitina?

Aique yoguimairentajiro sintsiri coguentima aisati yoguimairenquero angaare aro omairiatasantanai. ²⁷ Inetsaiguêri Jesus irogomere, iquenganeintasantaiganacari, icantobaca:

—¿Ati icanta ica? Inibatê, aro oquemisantasantanêri coguentima aisati angaare.

Jesos yogabisaicoqueri pite matsiguenga inancari tojai camagari.

(Mr 5.1-20; Ir 8.26-39)

²⁸ Aro yaretocotaigaca antatinta quibatsiquè jitacha Garara. Cara ainta pite sèrari cara itiaigani igamaga aroque inantaigacari camagari itonguibocari yotsitipari Jesus. Ira camagari tojai icatsimatacaqueri ira pitirooti sèrari. Aro itsorogasantèri imatsiguenga, te inguenaigae cara itiaiguiru igamaga. ²⁹ Icaimaigapè:

—Obiro nigóquimi, Jesus, Obiro Itomi Tosorintsi. ¿Pairo pipocasibiriquina? ¿Naroco pipocasique yamai pitsipiriacaiguèna? Terai omoncaratima nara cara natsipirique canta Sharincabeniquènta.

³⁰ Ainta inaigasegui arosonori chancho yapaisigui. ³¹ Aro yamanaiguèri Jesus camagari: —Aroca pigabisaicoqueri ica sèrarica, pigátaiguena cara chanchoeuguèra ninampèmaru iriro.

³² Jesus icantaiguèri:

—¡Pijáiguel!

Aro iáiganaque, inantaigapari ira chanchoeuguè. Isigaiganaca chancho cara tarangaquè, imatsematseiganaque angaarequè tobtotobtotn. Itsiticaiganaque ijogataiganaca omagaro chancho. ³³ Aro ira omisantiri chancho isigaiganaca cara poeboroquè, icomantagueigapèri imatsiguenga omagaro ora iniaque. Aisati icomantègotèri sèrari ira inantabeca camagari. ³⁴ Aro iátasitaiguèri Jesus tojai Gararasati, icantaigapèri:

—Atsi pijáte yamaica. Quero pipocaji yaca aisati.

9

Yogauibegajiri emèngari Jesus.

(Mr 2.1-12; Ir 5.17-26)

¹ Aro yotetanaca Jesus cara pitotsiquè, iátocoiguè Irro aisati irogomerejegui cara Capernaoc. ² Yamapèri sèrari emèngari te iranèibintsataje, yamègotantaigacari jatasintsi. Igóque Jesus cara iquemisantaiguèri, icabèri:

—Pinganinasèrete, nomatsiguenga. Nojocajimiro ora picantagueti te onganinate. Quero iguisègotaimiro Tosorintsi.

³ Ainta inasegui irapague ogomeantiro isanguenare Moisés. Icantaneintobaganaca: “Icantocotaguetasitari Tosorintsi Ica”.

⁴ Igóque Jesus ora iquenganeintaigaca, icantaiguèri:

—¿Pairo picantocobiritaiguèna ora te ongomeite? ⁵ Aroca nanganque oca: “Yamai noguibegajimi, panèitanae”, ¿Teco pinetsaigabaqueri? Quero ca nacantiro, picabíntsaiguèna. Carari pijitaiquè nacantasita cara nacanqueri: “Nojocajimiro ora picantagueti te onganinate”. ⁶ Nocogui noniaguèmi te nangantastima. Nopaniaca Jonogaguetequè, nomatsiguengatapè cara niboguè yaca quibatsica. Icanquena Pabati: “Pijocajineri ira cantaguetiro te onganinate; aique quero aguisègotètajari ora icantagueti”. Nocogui pigóigui aiti nojocajineri ira cantaguetiro quimigari yaca quibatsica.

Aique icanqueri ira emèngari:

—Pingabiritima, págairo pijatasi, pijáte pobangoquè.

⁷ Aro icabiritanaca, iátaji ibangoquè. ⁸ Iniaigabaqueri omagaro ira bototaigacha, iquenganeintantaigaca iniacaninataiguèri Ira Tosorintsi, icantocotaiguèri:

—Aisonori icaninatasanti Tosorintsi. Icantocotajiri Ica, cara yogauibegajiri janaitague-tatsiripague.

Icaimèri Mateo Jesus: “Piguiatanèna”.

(Mr 2.13-17; Ir 5.27-32)

⁹ Aro yogaganaca Jesus cara nisobiqui nara, najita Mateo. Iniopèna cara nocoicotaguetiri nomatsiguenga iguireguite, nomagantairi nogobeingarite canta Iromaquè. Icampèna:

—Intsome. Piguiatanèna.

Aro nacabiritanaca, noguiatanèri. ¹⁰ Aique náganèri cara nobangoquè napaaguèri. Yapaiguè basini nagaimane tojai: irogomere Jesus, aisati ira natsibataiga coigotantatsi iguireguite nomatsiguenga ipagantaiguèri cobeingari Iromaquè, aisati ainta basini ira cantaguetiro te onganinate. ¹¹ Aro iniaigapèna bariseoeguè, yosamitaigapèri irogomere Jesus:

—Te ingomeite Ogometimiri. Yapègotaiuguèri coigotantatsiri aisati ira cantagueti aisati te onganinate. ¿Pairo icantobica negaca? Icantaguetiro ora te onganinate Irro.

¹² Cara iquemaigabaqueri bariseo Jesus, icanqueri:

—Ira cajigatatsi te ingoguiru jompiantatsi, carari ira janaitatsi iriro coguiru. ¹³ Pijáiguel, pinguenguero ora icanti Tosorintsi, jirai isanguenaquero Oseas:

Te nongogue póguinari pobira, pitaguinari; iroonti nocogui pingábintseri pitimanamireegui pingantaneintègotiri.

Te iroro nopocasite nangaimaguetiri caninatatsiri, irianti nangaimagueque ira cantague-tiro te onganinate arota ingantaigaima yacaqueroca.

Icomantë Jesus paio te iritibiritima irogomere.

(Mr 2.18-22; Ir 5.33-39)

¹⁴ Aique ipocasitaiguëri irogomere Joan baotisantantsiri, yosamitaigapëri Ira Jesus:

—Pinetse, nititopianta narogui aisati bariseo. ¿Paio te iritibiritaguema pasi pogomere?

¹⁵ Yotabitaigabaqueri Jesus:

—Pigóiguë ora ametaiga cara irágantë sërari. Ingaimaiguëri imatsiguenga, irapajaqueri inganinataiganaque omagaro. ¿Paio te iragasërebitima igaimane? Carari cara iriátë jaanta ira águèrone iina, aro iragasërequima, irititaiguëma. Aisati nacanta Naro, aiquenta najátaje, aro iragasëretocoquina, irititaiguëma nogomere. ¹⁶ Aisati pigóiguë cara pigabitëro inaga piguitsagare, páguëro inagasite manchaguintsisite. Aroca pigabitanimaro iroraisite, cara ámanaquima ontisaraanairo oquibe ora inagasite piguitsagare. ¹⁷ Aisati pigóiguë ametaiga eiro oguëro irorai oja oba cara irirai imasiquë oisha. Cara onguéchanë obaa iritopiganëma imasi, quero paparaata. Quero pairi ogantarone oja oba irinagamasiquë. Igóque cara onguéchanë oja oba intonganë irinagamasi, oparaatëma obaa. Aisati oca nogometaiduëmi te onganinate ongonaguero ora yametaiga omatsiguenga jirai.

Yogubegajiro araasetatsiri Jesus; aisati yoganiatairo irisinto Jairo.

(Mr 5.21-43; Ir 8.40-56)

¹⁸ Iroontita inibatasegui Jesus, ipocasiqueri itingomi jorío ira omisantiro pongotsi cara yapatotaiga, yobaticagueritotasipari, icampëri:

—Yamaica ocamaque nasinto, carari nocogui pijátë cara nobangoquë, potsagatiro pigainainaro.

¹⁹ Aito cara yoguiataiguëri Jesus aisati irogomere. ²⁰⁻²¹ Ainta tsinane piraaseti cosamani ocarati 12 osarini, piátasiqueri Jesus itisitaquë potsagapëri, oquianca: “Aroca notsgaitëri onamiquë iguitsagare, aroje iragaguibegajina”. ²² Aro yapisitanaca Jesus, inioberò, icabëro:

—Pinganinate, nomatsiguenga. Piquemisanquinanta, aroque pibeganaa yamai.

Aito cara pibeganaa.

²³ Aro iátaji, yaretaigaca ibangoquë itingomi jorío, iniaigapëri arosonori matsiguenga icobëbensiguero ogamaga irisinto aisati iragaigaca tojai. ²⁴ Aro icantaiguëri Jesus:

—Pijáigue. Teni ongame oca piraicotaiguica, pisamini.

—Icabintsáigabaqueri Jesus matsiguenga. ²⁵ Cara yomisotocaguëri iriro Jesus, icanaque tso-magui, yágobagotapëro irisinto itingomi, aro ocabiritanaa. ²⁶ Aique iquemocotaguetaiguëri Jesus antagaisati ira timaguetatsi cara aronisati.

Jesus iniacagajiri pite comarajari.

(Mt 20.29-34)

²⁷ Cara yogaganaa Jesus, yoguiataiguëri pite sërari comarajari icabitaigabaqueri icanque:

—Obiro imatsiguengasonori David jirainisati, pingantaneintëgotaguena naro.

²⁸ Icanaque Jesus pongotsiquë, aisati yoguiataiguëri ira pite comarajari. Yosamitaigaba-queri Jesus:

—¿Pijitaiduëna quero naniacagajimi?

Yotabitaiganaqueri:

—Jee, Natingomi. Nigóiguë naro aro pingantaigainaro piniacagajina caninasati.

²⁹ Aro yotsagaiguëri Jesus iroquiquë. Icantagabaqueri:

—Aro nanganquemi ora pijitobitaiduëna.

³⁰ Aito cara iniasantanai. Aisati icantasantaiguëri Jesus:

—Quero picomantiri basinipague: “Iniacagajina Jesus”.

³¹ Iriro cantënguicha iáiganaque icomantaguetaiganaqueri imatsiguenga icanque:

—Iniacagajina Jesus Natingomi.

Inibatagairi Jesus ira te irinibate.

³² Cara isotocaji pite, yamaigapëri Jesusiquë sërari inancari camagari. Te irinibate. ³³ Aro yomisotocajineri igamagarite Jesus inibatagajiri caninasati. Iraegui jorío niaiguëri Jesus iquenganeintasantaigacari icantobagaiganaca:

—Jirai te aniaiguëri sërari cantacha negaca.

³⁴ Carari icantaiguë bariseoegui:

—Imitocoqueri itingomi camagari; iroro ora igátaguëquineri matsiguenga igamagarite.

Icantaneintëgotaguëri matsiguenga Jesus, icoque inguemisantaiguëri.

(Mr 6.34)

³⁵ Aro iquenagueque Jesus omagaro poeboropaguequë. Yogomeantagueque cara yapatotapinintaiga jorío, aisati icomantëgotantaguequero iragáantane Tosorintsi. Aisati yogaguibegajiri tojai janaitatsiripague. ³⁶ Iniaiguëri Jesus arosorori matsiguenga ira botoibiritari icantaneintëgotaiuguëri, icanque:

—Tojai itsipiriaiguë, ijocaigaca aisati icantaigari ibega oisha ira te irine omisantirine.

³⁷ Aique icanqueri irogomere:

—Aisati, icaegui icantaigaro tojai oguitso panguirintsi, carari te irine tojai ira obiguitirone. ³⁸ Pomanocotiri Pitingomi iragátaiguëri tojai comantantatsiri iriáiguë, inguemisan-tacagaiguëri matsiguenga.

10

Jesus icoigaiguëri irogomere.

(Mr 3.13-19; Ir 6.12-16)

¹ Aique icoigaiguëri Jesus ira irogomere icarati 12. Ipaiguëri itasorintsite ora irojogantaguequimari camagari quimingari. Aisati ipaiguëri iragaguibegajiri iraugui janaitague-tatsi.

² Ainta irogomere icarati 12. Iritsita Simón aisati ijita Peroro, aisati Antiris ireinti Peroro, aique Santiago itomi Seberoo, aisati Joan ireinti Santiago. ³ Aique ainta Jeripe aisati Baritoromé; aique Tomás aisati naro najita Mateo ira coigotantatsiri; aique Santiago itomi Arijeo, aisati Tareo; ⁴ aique Simón ira nintasantiro ibaísite aisati Joras Cariotisati ira ágagantëri Jesus.

Igátaiguëri irogomere Jesus cara ingomantagueantë.

(Mr 6.6b-13; Ir 9.1-6)

⁵ Aro igátaiguëri Jesus iraugui irogomere, icantaiguëri:

—Quero piáigui basiniatiquë matsiguenga cagari jorío, querootisati piáti cara itimaigui Samariasati. ⁶ Caranti pijáiguë joríojeguiquë ira naniaiguë cantaca oisha te irine omisantaiguërine. ⁷ Atiraca pijáiguë pinguenguitsatacaguetiri pomatsiguenga: “Pëníbaque orequima cara iragáantëri ira quemisanqueri Tosorintsi”. ⁸ Piguibegajiri ira janaitaguetatsiri, piguëtetairi ira iribatsasetaga, pijocajineri matsiguenga igamagarite. Tojai nacábintsaiguëmi, carari te nongoicotimi. Yamai atsi obirojegui, pingábintsaiguëri matsiguenga quero picoicotiri cara pomitocotaiguëri. ⁹ Quero páganë piguireguitë, ¹⁰ querootisati páganë pitsaguine, querootisati páganë pite piguitsagare, querootisati pisapatote querootisati pigotiqui. Caninataque imasitaiguëmi poperi ira quemaigabaquemi aisati ora pingogaiguë. ¹¹ Cara pirequima poeboroque, pingogopëri quemisantasantsiri, pintiomotiri iriro irooti cara pigaganëma basiniquë poeboro. ¹² Cara pingapë pongotsi, piniacaninatapëri ira timatsi cara, pobetsatapëmari caninasati. ¹³ Aroca iraniacaninataigabaquemi iriro, pomanocotiri Tosorintsi ingábintseri casintaro pongotsi, carari queroa inianacinataigabaquemi, quero picantiri Tosorintsi icábintsi. ¹⁴ Queroa iniacaninatobëmi, querootisati iquemisantobëmi, popotetanaineri pojongabatsari pisapatotequë, aro pigaganëma. Pingantiri: “Tenta pinguemisantobëna, aiquenta iratsipiriacaquemi Tosorintsi”. ¹⁵ Aisonori nacantasantaiguëmi: itsipiriaiguëro Soromasati aisati Gomorasati, carari aiquenta cara ingomantëgotaiuguëri matsiguenga Tosorintsi iratsipiri-acagasantaiguëri iraugui te iraniacaninataigabaquemi.

Icanqueri irogomere Jesus: “Aiquenta inguisaiguëmi matsiguenga”.

(Mr 13.9-13; Ir 12.2-13; 21.12-19)

¹⁶ Pérosati icomantaiguëri irogomere Jesus:

—Yamai nagátaiguëmi, carari picantari oisha ira nagáque cara cobeingariquë. Tojai iratsipiriacaquemi tsoengatsiri. Pinguengasantaiganaquemi, pingante ora caninaro. Quero pitsipiriacaquemi pomatsiguenga. ¹⁷ Pigamemari matsiguenga. Irágaiganaquemi catinasati pitingomipaguequë, iratsipiriacaiguëmi. Aisati irágaiganaquemi matsiguenga cara yapatotaiaga iripasataiguëmi. ¹⁸ Cara irogóiguëca piquemisanquina, irágaiganaquemi cara itingomipaguequë. Aro pinguenguitsatocoquina pigótacaguinari basiniati matsiguenga cagari jorío ati ongantima nagabisaicotajiri cara inguemisanquena. ¹⁹⁻²⁰ Cara irágaiganaquemi quero piquenga quero picanti: “¿Pairoroco nanganqueri?” Irogomeantëmiro Isère Tosorintsi ora pinganque. Quero pigótasita obirojegui ora pingomantë carari onibataquemi Isère Tosorintsi. ²¹ Aiquenta tojai inguisëgotaiuguëna matsiguenga. Paniro irácagantëri ireinti irócagantëri, basini irócagantëri iraisati itomi, aisati basini irócagantaguequeri ira casintaigari. ²² Piquemisanquënantata, inguisaiguëmi matsiguengajegui, carari quero pijoquero cara piquemisanquina. Aroca pérosati pinguemisanquena nagabisaicotaiuguëmi nágaiganaquemi cara Jonogaguitequë pintiomotaigapëna.

²³ —Cara inguisaiguëmica iraequí timatsi patiroquë poeboro, aro pisiganëma, pigaganëma basiniquë poeboro. Aisonori nongomantaiguëmi oca: quero piátaguëti omagaroquë poeboro cara itimaiguë joríopague queroquerai nipocaji Naro, Naronta paniënguicha cara Jonogaguitequë, nomatsiguengatapë. ²⁴ Quero ibatiri ira ogometiri irogomere. Querootisati ibatiri ira meratari iromerataga. ²⁵ Aisati irogomere inganquima ira ogometiri, aisati iromeraro ibega ira meratari. Aro yamai tojai iguisaiguëna omatsiguenga ijitasitaiguëna Naro Berisebó itingomi camagari. Piquemisanquinanta, aisati inguisaiguëmi, irajitasitaiguëmi pairiraca, ²⁶ carari quero pitsorogaiguiri. Yamai aiti tojai ora te irogóiguero, carari aiquenta irogóiguë omagaro cara Naro Pitingomi aisati obirojegui nogomere caninari. Aisati irogóiguëro ora icantaguëti antagaisati matsiguenga te onganinate. ²⁷ Yamai patiro nocomantaiguëmi obiro, te irogóiguero tsoengatsiri, carari aiquenta pigótacaqueri. Yamai nimánabecaro, carari aiquenta pingomantasantaiguëri antagaisati oca nacanquimica. ²⁸ Ainta coguënguistsine iróguimi, carari quero pitsorogaiguiri queronta icantimi igátimi cara Sharincabeniquë. Irianti pintsoroque Tosorintsi: ingoquëti Iriro iróguimi aisati iragáquemi Sharincabeniquë. ²⁹ Pinetse, pigóiguë ipimantagani tsimiripague iraguëri matsiguenga, carari teca iranintacaguiri Pabati Tosorintsi quero icami paniro tsimiri. ³⁰ Aisati igóitiro atiraca ocarati piguisi, igótasantëro. ³¹ Pinetse. Tojai pobataiguëri tsimiripague, tojai iquengasëretaiquëmi Tosorintsi. Iroero quero pitsoroquëti. ³² Aroca pinganqueri matsiguenga: “Ira Jesoquisito Natingomi”, aique cara Jonogaguitequë, nanganqueri Pabati: “Itingominquena iriro, nomatsiguengatacari”. ³³ Carari pinganquerica matsiguenga: “Cagari Jesos Natingomi”, aisati canta Jonogaguitequënta, nanganqueri Pabati: “Tenta intingomintina iriro, iroero te nogótaguëtiri iriro Naro”.

“Popomirintsibentiri Quirisito”.

(Mt 16.24-25; Mr 8.34-35; Ir 9.23-24; 12.49-53; 14.26-27)

³⁴ Aisati icanë Jesos:

—Quero pijitasita cara nipoque irágacatinatobagaiguëma omagaro matsiguenga. Quero yágacatinatobaga. Nipoque nanganqueri iroonti inguisabacagaiguëma. ³⁵ Nipocasique iroonti inguisasëretiri sërari iriri, onguisasëretiro tsinane oniro, onguisasëretiro tsinane aguero, ³⁶ inguisasëretiri sërari imatsiguengasonori. ³⁷ Pigóiguë caninataque pinintaiguëri piri aisati piniro, carari caninatasantaque pinintasantina Naro. Queroca pinintasantina Naro, quero naniacatinatimi obiro. Caninataque pinintaiguëri pitomi aisati pisinto, carari caninatasantaque pinintasantina Naro. Queroca pinintasantina Naro, quero naniacatinatimi obiro. ³⁸ Nocogui pingantinaro omagaro ora nongocaquëmi irooti cara pingamobiquina. Pinintica piguiatanëna pinguemisasantantina, aro pinatanëro pigorosite, quero picantanonta obiati. Cara inguisatsaiguëmi matsiguenga aroquenta piquemisanquina, queroca popomirintsibentina obiro, quero naniacatinatimi Naro. ³⁹ Aroca pingábintsasantëma obiati yamai, pitsipiriasantanë aiquenta. Carari pinguemisan-tasantinaca yamai, irooti cara iragamagaiguëmi pomatsiguenga, aiquenta pintiomopëna Jonogaguitequë, pintimasanotapë caninasati. ⁴⁰ Antagaisati ira ágacatinatiguëmine obiro, irágacatinatëna Naro aisati. Ira ágacatinatënane Naro, aisati irágacatinatëri Pabati Ira agáquina. ⁴¹ Cara irogóquimica obiro comantëgotëri Tosorintsi, irágacatinatigaquëmi, aro imëri iriro Tosorintsi aisa ocanta imëmi obironta comantantatsiri. Aroca irágacatinatobëmi caninasati obironta caninari, imëri Tosorintsi aisa ocanta imëmi obiro. ⁴² Aisati cara irogóquimica piquemisanquina, iroero imëgotaguëquimi nija catsingajari, iraniaqueri Tosorintsi imëri aroquenta icábintsabaquëmi obiro.

Iroero oca yogomequeri irogomere Jesos.

11

Joan igáqueri irogomere iraniaqueri Ira Jesos.

(Ir 7.18-23)

¹ Aro, cara itsonquero Jesos yogometaiguëri irogomere icarati 12, yogaganaca cara poeboropaguequë. Yogometaguequeri ira timaigatsi cara aisati icomantagueiguëri. ² Aroque yomianquengani Joan cara iromingamentoquë. Yamai cara iquemocoqueri Jesos ora icantagueque, Joan igátaiguëri irogomere:

³ —Pijátasitaiguëri Jesos, posamitaigapëri: “¿Obiroco Agabisaicoontatsiri ira noguiaque, basinico naguiaiguë?”

⁴ Aro yaretaigapari Jesos yosamitaigapëri. Yotabitobëri Jesos:

—Popiganajima, pingomantapëri Joan omagaro oca piniaque aisati ora piquemaque.

⁵ Pingantiri cara inianai comarajatabetachari, yanëtanai carancaratsi, ibeganai iribatsasetaga iquëtetana; iquemaiganaji maguemitari, icaniantanai camabitachari,

iquemisantaigabaquero Caninaro Nibarintsi ira coguitiacha, yogabisaicotaigairi Tosorintsi. ⁶ Yoganinasëretaiquëri Tosorintsi iraegui te iritsoenguena, te ingomëtina.

Jesos inibacananatëgotëri ira Joan.

(Ir 7.24-30; 16.16)

⁷ Cara ipiganaja irogomere Joan, aiqne inibatëgotëri Joan Jesos. Yosamitaigabaqueri iraegui botoibiricari;

—Cani piãtaiguë cara tera ontimingani, piquemisantaiguëri Joan. ¿Pairo piãbiritaiquë? Pigóiguërinta iriro caninari sérari, iquemisantasantërinta Tosorintsi. Isintsisëreti. Cagari iriro icantaro choco ora posebati coguentima aiqnero yaca aiqnero cara. ⁸ ¿Pairo piãtasitaiguë? ¿Pinaiquerico iquitsagaca caninasati? Teni. Pigóiguë cara ira quitsagatacha iguitsagare caninaro sibitaro itimaigui cara ibangoquë itingomi. ⁹ ¿Pairo piãbiritaiquë? ¿Teco pigóiguëri iriro comantanquero Irinibare Tosorintsi? Aisonori ora nangantaiguëmi ibataiguëri basiniegui igomantantatsirite Tosorintsi. ¹⁰ Irirori sanguenatëgotënguicha jirai cara ingantocopëna Naro:

Icanë Tosorintsi: “Notomi, aiquenta nagáqueri ira obatacaquemine, ingomantaigapëri imatsiguenga: ‘Aique nara coraque Natingomi. Piganinataigueneri paneingomento’”.

¹¹ —Nacantasantaiguëmi ora aisonori, ainta tojaisonorori comantantatsiri, carari noguibatëri Joan, ira baotisantantatsiri. Irironta ogótasantëri Tosorintsi, ibataiguëri basini matsiguenga. Carari antagaisati imaiquëmari Tosorintsi, intingomintasantaiguëmari, irobotasantaiguëri ira Joan, irogótasantantëri Tosorintsi. ¹² Jirai icomantagueque Joan; yamai nocomantagueaiganaguemi Naro. Iroto pigóontaganacari Tosorintsi. Yamai icogasantaiquë tojai matsiguenga cara iragabisaicotajiri Tosorintsi, inganaque iragáantanequë, intingomintaiquëmari. ¹³⁻¹⁴ Jirai antagaisati comantantatsiri iquenguatsatocotaiguëri Quirisito, aisa icanta Moisés icomantëgotëri. Icantaiguë: “Queroquerai ipoqui Quirisito, irobotacaqueri Erías”. Aique yamai ipoque Joan. Irro aisati icampari ibega Erías. Pijitaigui cara imoncarapëro Joan Sanguenari. ¹⁵ Aitica piguemita ora piquemanta, pinguemisantiro ora nocomantimi.

Caninasati inibatëgotëri Joan Jesos.

(Ir 7.31-35)

¹⁶ Aisati icantaiguëri matsiguenga Jesos:

—Aisati picantaigari janequipague imaguimpitaigui saatëriquë icanqueri basini: ¹⁷ “Natamporatabeca carari te piguiataiguena; nosoncatabitaca carari teatisati piguiatina; nacántatabitaca nogasëretabeca, carari teatisati piragasëretaiquema”. ¹⁸ Pinetse, picogaigabitaca ingantaiguërome pomatsiguenga pairoraca picocaqueri. Pinaigabaqueri Joan itica aisati te iroguima piari, aro picantocotaguetasitaigari: “Oo, inancari Joan camagari, iroro ititaguëca”. ¹⁹ Aro nopaniaca Naro Jonogaguitequë, nomatsiguengatapë; te natitima, aisati nógaro piari. Aro picantocoiguëna: “Tojai yapasanti Irro, aisati Irro singuitachari, imatsiguengatacari ira coigotantatsi aguireguite aisati itsibataigari ira cantaguetaiagatsi ora te onganinate”. Carari igóque Tosorintsi cara icanque Joan caninasati aisati Naro nacanque caninasati antagaisati ora icocaquena; aisati omagaro quemisantina, irogóiguëri caninaro ora icocaquena Pabati.

Iroto oca icantaiguëri Jesos.

Iratsipiraiquë antagaisati ira tsoenguiri Ira Jesos.

(Ir 10.13-15)

²⁰ Aique icomantëgotaiquëri Jesos ira niaigabitari cara itasanganti carari përosati itsoingaiganagueri. Icanque:

²¹ —¡Tojai pitsipiraiquë obirojegui, Coraseisati! ¡Tojai pitsipiraiquë obirojegui, Betsairasati! Tojai piniaigabitëna cara nitasongagueanti, carari te pingantëmatima yacaquero, te pinguemisantina. Carari iraniaquiname cara nitasongagueanti Tirosati aisati Sirósati, inguengasëretaiquemame iriro, irojocaguërome ora icantagueti te onganinate, inguemisantaiguëname, imasiniatiquerome imanchaqui aisati irisobicaiguëme somamomquë arota ironijagaiguemari imatsiguenga cara iragasërequima. ²² Aiquenta, cara ingomantëgotaiquëri Tosorintsi, iratsipiriacagaiguëri ira Tirosati aisati ira Sirósati tojainta te inganinataigui. Carari iratsipiriasantagaiguëmi obirojegui Coraseisati aisati Betsairasati aroquenta piniaigabitobëna cara nitasonganti, carari te pinguemisantina. ²³ Aisati obirojegui Caperinaosati pijitasitaigabitaca pijáiguë Jonogaguitequë, carari pamatobitaigaca obiati përosatinta pitsingaiquëna. Irro pijátaguëque canta osobinta. Iraniaiguërome ira Soromasati omagaro iniaiguëro Caperinaosati, inguengasëretaiquëmame iriro, querome itsongaiguirime jirai Tosorintsi, inëme ibeoborote irootime yamai. ²⁴ Aiquenta Tosorintsi

iratsipiriacaiguëri ira Soromasati aisati, carari tojai iratsipiriasanotagaiguëmi obi-rojegi Caperinaosati.

Aroque inibatëri tsoengatsiri Jesus.

“Popocasitina”, icanque Jesus.

(Ir 10.21-22)

²⁵ Aique yamanocoqueri Tosorintsi Jesus, icanqueri:

—Pabati, Obiro caninarisonori. Nacarasiaquemi Obironta Itingomi antagaisati Jonogaguitesati aisati omagaro quibatsisati. Ainta cantasitacha: “Nigótasanti naro”, carari pimánopitaiguëri ati picanta Obiro aisati ati ongantima pigabisaicotaiguëri. Irianti pigótacagaiguëri ira quemisanquena ira te inguengasitima igótasantëmi iriro. ²⁶ Caninataque piganinataiguëri iriro, picoquenta pigótacagaiguëri.

²⁷ Aroque icanqueri Iriri, aque icantaiguëri imatsiguenga Jesus:

—Ira Pabati ipëna omagaro igótacaquina antagaisati. Paniro igótasantaquina Naronta Itomi; te irogótocotina basini matsiguenga. Teatisati pairi ogótirine Iriro. Paniro nigótiri Naro, Naronta Itomi. Irianti Tosorintsi nigótasantacagaiguëri ira nogometaguë. ²⁸ Cara pitsipiri-aiguëca, aisati cara omomirintsitomoquimi pairoraca, popocasitina Naro, pingomantinaro antagaisati. Aro nangantaneintëgotaiguëmi, nomagoriasëretagaiguëmi arota quero opomirintsitomotaquimi aisati. ²⁹ Pinguemisanquina Naro, pingoguro ora nogomeantane, aro tojai nangábintsaiguëmi nantsibatëmi tenta nanguengasantima Naati. Nanintasantëmintana, nomagoriasëretagaiguëmi. Aroca pinguemisanquina aro tojai nangantaneintëgotaiguëmi, nomitocoquemi pabequero pairoraca. ³⁰ Quero nimeratimi quero nobomirintsitimi, quero natsipiriacaquimi iroonti nomitocotopiantaiguëmi.

12

Yogometocoquero sábaro Jesus.

(Mr 2.23-28; Ir 6.1-5)

¹ Aro basiniquë sábaro iáiguë Jesus aisati irogomerejegui cara panguirintsisiquë. Itasegaiguë irogomere, yágaiguëro oguitsotere tirigo yapaiguëro oguitso. ² Cara iniaigapëri bariseo, icantaigapëri Ira Jesus:

—Pinetseri pogomere. Yamai sábaro iroonti cataguiteri comagoriantague, teni on-gomeite yamai irobiguitantimaro.

³ Yotabitobëri Jesus;

—¿Teco pinibatapinintiro Sanguenari ora comantëgotaiguëri David aisati ira itsibata cara jirai págaiguëri itasegane? ⁴ Aro icanaque ibangoquë Tosorintsi, icampëri saseriroti: “Nitasegaiguëni”. Aiti pan ora yobetsiquineri Tosorintsi aque poguëngani catingasatiquë Iriro. Te iranintacagaiguëri iraperi matsiguengapague; irianti saseriroti paiguëro. Carari icábintsaigabaqueri saseriroti, ipaigabaqueri. Aro yapaigapë David aisati ira itsibata. Yamai te pingante: “Te onganinate irape David”, aro ¿Pairo picantobique yamai: “Te onganinate irape icaegui”? ⁵ Aisati isanguenaque Moisés:

Quero pitarobacaati sábaroquë.

Pigóiguë antagaisati sábaroquë iátopianti saseriroti cara ibangoquë Tosorintsi intapinintaiguë, carari te pinguisëgotimari iriro. Piniacaninataiguëri. ⁶ Nacantaiguëmi cara ainta yaca Ira obaquero ibango Tosorintsi. ⁷ Teco pigóiguëro oca Sanguenarica jirai:

Icanque Tosorintsi: “Te nongogue póguinari pobira, pitaguinari; iroonti nocogasantipingantaneintëgotanëri pomatsiguenga”.

—Pinguemisanquerome oca icanque Tosorintsi, querome picantocotirime icantagueti te onganinate icaegui nogomere obiguitëro tirigoguitso. ⁸ Nopaniaca Naro Jonogaguetequë, nomatsiguengatapë cara niboguë yaca quibatsica. Iroro nocomantëgotaguëquero sábaro pairoraca anganque sábaroquë.

Cara sábaroquë yogaguibegajiri ira camabocori Jesus.

(Mr 3.1-6; Ir 6.6-11)

⁹ Aro yogaganaca, icaigapëro pongotsi cara yapatotaiga jorío. ¹⁰ Ainta sërari camabocori. Aintasati bariseo yosamitobëri Ira Jesus:

—¿Caninataquëco piguibegajiri ica camabocorica sábaroquë?

Icogaiguë bariseo cara iragaguibegajiri arota ingantocotasiquimari Jesus: “Itarobacaati Jesus sábaroquë, te inganinate tenta inguemisantiro isanguenare Moisés”. ¹¹ Aro yotabitaiguëri Jesus:

—Pinetse, aroca sábaroquë imariaque omoroquë poishate, ¿Queroco págairi, pomisotocajiri? Caninataque pingábintsairi. ¹² Aroca pingábintsairi oisha sábaroquë, ocaninatasanti angábintsairi matsiguenga sábaroquë.

¹³ Aique icanqueri ira camabocori:

—Pintimagonaguitima pobaco.

Aro itimagonaguitanaca, ocaninatanai ibaco pibega basini. ¹⁴ Iniaqueri bariseo, iguisaneintaiganakeri. Íatagueque yosamitobagaigaca:

—¿Ati anganqueri Jesus, agamaguëri?

Jirai ora Sanguenari ocomantëgotëri Jesus.

(Mr 3.7-12; Ir 6.17-19)

¹⁵ Cara igóque Jesus cara icogaiquë iróguiri, yogaganaa yoguiataiganaqueri tojai matsiguenga. Aintasati tojai janaitaguetatsiri ira yogaguibiaguetaji Jesus antagaisati. ¹⁶ Aro icantaiguëri:

—Quero picomanti: “Yogaguibegajina Jesus”.

¹⁷ Cara icanque negaca, imoncaraquero ora icomantëgotëri jirai comantantatsiri jitacha Isaiás. Isanguenaqueri Irinibare Tosorintsi cara icanque Iriro:

¹⁸ Pinetseri Quirisito Ira nogoigane inganque antagaisati nococaqueri. Tojai nanintasan-tiri, tojai naniacananatëri. Nagáquineri Nasëre coshoni oguëri, omitocoqueri. Ingo-mantaiguëri basiniati matsiguenga, cagari jorío, ora caninano aisati atí ongantima ora naganinanatimari omagaro. ¹⁹ Quero ipëgatsataro pairoraca; quero icaim-asita; quero iquemacagari matsiguenga. ²⁰ Quero itsipiriacaguiri agasëretachari ingantaneintëgotëri. Querootisati yamatobitiri ira cogatsi irogótina. Përosati ingábintsantë, irooti cara intingomibintaiguëri antagaisati matsiguenga caninasati. ²¹ Irogótoqueri basiniati matsiguenga cara iragabisaicontë Iriro. Aisati intingom-intaigabaquimari Iriro.

Iro ro oca icantocoqueri Tosorintsi jirai.

Ira bariseo icantocotaguetasitaigari Ira Jesus.

(Mr 3.20-27; Ir 11.14-23; 12.10)

²² Aique yamaigapëri Jesus poro sërari inancari camagari; te iranee, teatisati irinibate. Yogaguibegajiri; iniacagajiri aisati inibatagari. ²³ Iquenganeintasantaigacari antagaisati ira niaiguëri. Yosamitobagaigaca:

—¿Iriroco Quirisito, imatsiguenga David, Ira oguiaiguë?

²⁴ Carari yotabitaiganaqueri bariseopague:

—Imitocoqueri Berisebó aisati ijita Satanás, itingomi camagarijegui. Iro ro ijogan-taguëcari camagari Ica.

²⁵ Aro igóque Jesus ora iquengasëretaigaca, yotabitaiganaqueri:

—Aroca irógobaguimame matsiguenga timaigatsi quibatsiquë, ¿Queroco ipoguirobaga? Aisa icanta iraeui timaigatsi poeboroquë; aroca inguisabacaguëma quero përosati itimaigui cara. Aisa icanta matsiguenga pongotsiquë; quero ca iquengaiga, querootisati itimotobaga përosati. ²⁶ Tesonori iromitocotina Satanás. Ipëgatina. Pinetse: arome iromitocoquiname Satanás cara nojoqueri jaanta camagari, ¿Queroco itsongabacaga iriati Satanás? ²⁷ Aisati irirome omitocoquinane cara nojoqueri camagari, ¿Iriatisatico camagari omitocotaiguëri pogomere cara ijoqueri camagari iriro? Iriro ogótacagaiguëmi pogomere cara pamatobita obiati. ²⁸ Carari Iroonti Isëre Tosorintsi omitocoquina cara nojoqueri camagari, ¿Teco iroro pigóontaiquema ainta yaca Tosorintsi, icogabeta iragáante, icogui pitingomintimarime? ²⁹ Aintaca cogatsi ingositiri sintsiri, ¿Teco iritsita águërine, iraguëshotëqueri? Aique irágopitëri pairorapagueraca queronta ipëgatari casin-taro. Querome nagobeiri Satanás, querome nojoquiri camagari. ³⁰ Ira te inguemisantina, iguisaneinquina, irianti iquemisanti Satanás. Aisati ira te iraguiatina, te iromitocotina.

Jesus icomantëgotëri ira cantëgotaguetasitaro Isëre Tosorintsi.

(Mr 3.28-30; Ir 12.10; 6.43-45)

³¹ Aisati icantaiguëri bariseopague Jesus:

—Tosorintsi ingábintsaiquëri antagaisati ira cantaguetiro te onganinate aisati oma-garo ira nibataguetasitacha te ongomeite, irojocajineri, quero iguisasëretajiri. Carari quero icábintsiri ira cantëgotaguetasitaro Isëre Tosorintsi. ³² Nocomantaiguëmi cara nopaniaca Jonogaguitequë, nomatsiguengatapë cara niboguë yaca quibatsica, carari ingábintsaiquëri Pabati antagaisati ira nibatocotinane ora te ongomeite. Quero icábintsiri ira cantëgotaguetasitaro Isëre. Quero icábintsiri yamai, querootisati icábintsiri aiquenta. Iroonti iratsipiriacagaiguëri përosati. ³³ Aroca ocaninati anchato, aisati caninano ogu-itso; teca onganinate anchato, querootisati ocaninati ogu-itso. Aroca piniaquero ogu-itso, ¿Teco pigóte ocaninatica ora anchato? ³⁴ ¡Obirojegui cantaquibi marangue! Te pingomeitaigui; tiguëti ongantima pigóte pinibataigue caninano inibatinta matsiguenga ora iquengasëretaca. Te onganinate pinguengasëretaiguëma, iroro te onganinataguëte ora pinibataigui. ³⁵ Ira caninari sërari iquengasëretapinintiro caninano, iroro icantaguëtiro ora

caninaro. Ira te ingomeite iquengasëretapinintiro ora te onganinate; iroro icantaguëtiro ora te onganinate. ³⁶ Aiquenta ingomantëgotaiquëmi Tosorintsi: inguiancagaiguëmiro antagaisati pinibarepague ora pinibatasitaiga yamai. ³⁷ Ocaninatica ora pinibataigui, aro iraniacandinataiguëmi, carari teca onganinate pinibare, inganquemi: “Aiti pinibatagueti te onganinate, tojai pitsipiriaque”.

Jesos icomantëgotëri tsoengatsiri iraugui cogatsi iraniaiguëro itasorintsite.

(Mr 8.11-12; Ir 11.29-32, 24-26)

³⁸ Aique icantaigabitacari bariseopague aisati irapague ogameantiro Sanguenari:

—Ogameantatsiri, nocogaigui nanetsëmi pitasonguinaro pairoraca arota nogótimi Obiroca Quirisito.

³⁹ Yotabitanëri Jesus:

—Te pinganinataigue tojainta pitsingaiquëri Tosorintsi. Quero nitasongomotaiguimi ora pigóontëname. Aiti ora icanque Jonás: pinguengasëretiro cara yosiguina nibega Naro, aro pinguemisantina. ⁴⁰ Jirai ainta iguibeguinte sima inguëri ira Jonás omaganimo caninano. Maba cataguiteri inë isegotoquë aique ijocajiri sotoquë. Aisa nanganquima Naro, nangamaquenica, natiaquima, maba cataguiteri ninë omoroquë quibatsi, aique nangabiritanaima. ⁴¹ Aiquenta, cara ingomantëgotaiquëmi Tosorintsi, ingabiritaiguëma Nínebesati ingantocotaiguëmi inganque: “Aiti picantagueiguë obirojegui te onganinate. Jirai naquemisantaigabaqueri ira Jonás nopasinatica nojoçaigaro ora te onganinate, nacantaigaa yacaqueroca. Obirojegui, piniagaibaqueri Agabisaicoontatsiri, tojai ibaqueri ira Jonás Irironta Atingomi, carari te pinguemisantaigabaqueri. Inguisasantaiguëmi Tosorintsi”. ⁴² Aisati jirai ainta tsinane itingomi omatsiguenga, Sebasati. Cara opaniaca parigoti, oquemocoqueri Saromón cara tojai igóque iriro, aro piátasiqueri jaanta oniopëri oquemisampëri. Yamai aintana Naro obirojeguiquë, nobaqueri Saromón carari te pinguemisantaiguena. Aiquenta, cara Tosorintsi ingomantëgotaiquëri antagaisati matsiguenga, ongabiritanaima ora tsinane Sebasato ngantocotaiguëmi: “Picantasantaiguëro obirojegui te onganinate cara ipocasitaiguëmi Ira Agabisaicoontatsiri, carari te pinguemisantaigabaqueri Iriroro. Inguisasantaiguëmi Tosorintsi”. ⁴³ Obirojegui jorío picantagari ibega sërari inancari camagari quimingari. Ijocajiri camagari sërari, yogabisaicotaja iriati. Iátagueque igamagarite cara piriaguiteroquë quibatsi. Icgabeca iromagoriaque, carari tiguëti iromagoriaque. ⁴⁴ Aique iquianca; “Nopiganajima nobangoquë, cara sërariquë cara nopaniaca”. Ira sërari icantaro ibango camagari. Aro ipiganaja iniopëro ositaga otarogaga obetsicaga irisobicomento irisomaminto, antagaisati. ⁴⁵ Aro iátasitaiguëri basini camagari quimingarisonori icarati 7. Icampëri: “Intsome antime nobangoquë”. Aro yagobiaiguëri icasëretaigapëri sërari. Jirai itsipiriaque sërari arosata; yamai inantasantacari camagari. Yogatsitasantaca. Aisa picantaiga obirojegui. Jirai pitsipiriaigabitaca tenta pigóigue. Yamai piniabetobëna carari te pinguemisantina. Iroro pigatsitaguëtaiguëma, pitsipiriasanoiguë.

Jesos imatsiguengataigacari antagaisati quemisantaiguëri.

(Mr 3.31-35; Ir 8.19-21)

⁴⁶ Iroontita iquenguitsati Jesus, icomantaguëtaiguëri ira botoibiritaigapari cara pongotsiquë, aro pipocasiqueri iniro Jesus, aisati ireintiegui. Ainta sotoquë, ocaimagantaigapëri.

⁴⁷ Icomantëqueri Ira Jesus:

—Parepa piniro, aisati pirentijegui. Ainta sotoquë; ocoguini onibatimi.

⁴⁸ Yotabitanëri Jesus:

—¿Pairoroco inato? ¿Pairoroco igueegui?

⁴⁹ Aro ijigotaiguëri irogomere, icanqueri:

—Icaegui nogomere, irianti igueegui, aisati iroontiegui inato. ⁵⁰ Pairiraca cantatsi ora icocaqueri Tosorintsi Ira timatsi Jonogaguetequë, irianti nomatsiguengasonori: najitaiguëri igue, aisati tsio, aisati inato.

13

Icomantëgotëri ira panguitatsiri Jesus.

(Mr 4.1-9; Ir 8.4-8)

¹ Irooti cataguiteri isotocaji Jesus cara pongotsiquë, iáque cara onamijaquë angaare, isobiaque. ² Yoguiataiganaqueri irogomere, aisati yapatoibiritaigapari tojai matsiguenga. Iniaquero Jesus pitotsi otsatocotaga; aro yotetanacaro isobiaque. Iraegui matsiguenga përo cara inaiguë onamijaquë. ³ Aro tojai yosiacagantaguecaro quingabaguirentispague. Icanque:

—Iáque panguitatsiri imiongaguitaguequero oguitsopague tirigo iritoganequë.

⁴ Opariguitagarantapë arosata oguitso abatsiquë; aique ipogopë tsmiripague, yapapëro oguitso. ⁵ Basini oguitso opariguitagarantapë mopësiquë cara te ine tojai quibatsi

aropirigasata arosonorinta mopë osobibatsaquë. Omanaanti piabitanaca; ⁶ cara ijonogatapë paba yogasiguiricapëro tenta ine oparipague; aro ocamaguetanai. ⁷ Aisati basini opariguitapë cara totseisiquë; aro piabitanaca carari pomatobairo totsei, te ine oguitso tirigo. ⁸ Basini opariguitagueque cara caninabatsariquë quibatsi, iroro caninatënguisti. Pianë piquibianë caninasati pinanë oguitsopague. Aiti panguirintsi oguitsotané ocarati 100, aisati basini ocarati 60, aisati basini ocarati 30 oguitso. ⁹ Aitica piguemita ora piquemanta, pinguemisantiro ora nacantaiguëmira.

Païro yogomebirique Jesos quingabaguientsiquë.
(Mr 4.10-12; Ir 8.9-10)

¹⁰ Aique yosamitaigapëri irogomere:

—¿Païro pogomebiriantaigari quingabaguientsi ira basinipague? Te inguemaiguemi ora picantaiguëri.

¹¹ Yotabitanëri Jesos:

—Nocogui pigóigue ati icanta Tosorintsi cara igáanti, carari ira matsiguengapague te nongue irogóigue irirojegui. ¹² Aintaca igótabela, aro nogótacagasantëri. Carari basinipague, te ingogue inguemisantina, quero iquemaiguina. Quero nogometiri iriro catingasati. Aisati nãgabitsaqueri nobegopitëri ora igótabela. ¹³ Iroro nogomeantaguëcari quingabaguientsi nosiacagantineri tenta iraninte irogóigue. Inetsabetaiga carari te iranee, iquemaigabitaca carari te ingueme, te irogóitagaquero ora nacantaigabitacari. ¹⁴ Jirai isanguenaque Isaiás comantantãsiri, isanguenatocotaiguëri icaegui matsiguengaca:

Icanque Tosorintsi: “Pinguemaigabitëmaro Nanibare, carari quero pigótobëro; pinetsabequima ora noniaguëmira carari quero piniasantaiguero. ¹⁵ Te pinintaigue pigóigue aisatime pinganquima te ine pisëre; iroro quero piquengasëretaguëta. Tenta pinintaigue pinguemiro, iroro oshabitaguëpëmi piguemita, quero pigóigui. Querootisati piniasanti tenta pinintiro. Queronta pipocasitina, quero nogabisaicotajimi”.

—Ocarì oca icomantëgotaguëri jorìo jirai. ¹⁶ Carari obiro nogomere piniasantaiguero ora noniaguëmira, piquemisantaiguina, iroro yoganinasëretaguëtaiguëmi Tosorintsi. ¹⁷ Nangantaiguëmìro ora aisonori: icogaigabitaca jirai comantantãsirijegui aisati caninatãsiri iranaiguërome oca piniaquea obiro. Icogaigabitaca inguemiro oca piquemaiguëca yamai, carari te iraneina teatisati inguemaiguena.

Jesos yoniaguëri ora ocanti quingabaguientsi.
(Mr 4.13-20; Ir 8.11-15)

¹⁸ Aisati icantaiguëri Jesos:

—Yamai noniaguëmìro quingabaguientsi irasi panguitatsiri. ¹⁹ Nocomantëgotëro iragãantane Tosorintsi. Ainta quemaigabitacaro, carari te inguemobëro. Aro ipoque camagari yãgabitsaqueri nanibare ora iquengaigabitaca. Irìro aisati icantaro pibega oguitso pariaquenguisti abatsiquë. ²⁰⁻²¹ Ainta basini tojai iquemabetobacaro ora nogometiri, icaninabentabecaro, carari cara inguisaneintocoqueri imatsiguenga, te përo cara inguemisantiro nanibare, opomirintsitomotanacari, ijocajiro yomaguissantajiro ora iquemisantabeca tenta irogótasantiro. Aisati icantaro oguitso pariaquenguisti mopësiquë. ²² Ainta basini tojai iquematsatabecaro nogomeantane, carari iquengasantiro pairoraca inaguetatsi yaca quibatsica, aisati inintasantiro ora yasinta. Iroro te inguemisantaguëtina. Irìro cantaca oguitso pariaquenguisti totseisiquë ora te onintacaguero ontojaigue, te ine oguitso. ²³ Aintasati basini matsiguenga arosatapague iquemisantasantobëro ora nogometiri. Përosati iquemisanquima, icanque antagaisati nococaqueri. Icantaro pibega oguitso pariaquenguisti caninabatsaroquë quibatsi, ora tojaiganaquenguisti. Aiti openguitereì ora inënguisti oguitso 100, aiti basini cara pinë 60, aisati basini cara ocarati 30 oguitso.

Ocarì oca yoniagantaro Jesos quingabaguientsi irasi panguitatsiri.

Jesos icomantëgotëro tobari te ongomeite.
(Mt 13.36-43)

²⁴ Aisati yogomeanti Jesos basiniquë quingabaguientsi. Icanque:

—Nosiacagantaiguëmìro basini. Cara igáanti Tosorintsi ocantari ibega sërari panguitiro caninaro tirigoguitso. ²⁵ Aro tsitiniriquë isamë iriro aisati iratirite. Cara isamaiguë, ipocasiqueri basini quisaneintirira ira panguitatsiri, ipanguitaguequineri irootiquë iritogane oguitso tirigoniro ora cantabitaro tirigo. Aique iátaji. ²⁶ Aiquenta, cara oquibianë tirigo, onguitsotanë, aique ongonijatanë tirigoniro. ²⁷ Aro iniaiguëro iratirite casintaro tirigo, iátasitaiguëri, yosamitëri: “¿Teco caninaquero tirigoguitso cara pitoganequë? ¿Nega opaniaca ora tirigonirora?” ²⁸ Yotabitaiguëri: “Irianti panguiquinaro ira quisaneintina”.

Aique yosamitaiguëri iromeraro: “¿Pairoroco picogui nangantaigue? ¿Caninataqueco nasi-ajiro?”²⁹ Icanque: “Quero yamai. Aiquenta. Aroca pisiajiro yamai pisiajitaiguero tirigo aisati.³⁰ Ineta yamai. Ongantimata. Aiquenta, cara osamabinguique, nagátaiguëmi: ‘Trot-sita picarataguetaje tirigoniro, piguëshotiro páganëro pitaguero. Aique pobibinguitobëro tirigsonori, poguinaroti cara pongotsiquë’ ”.

Iroro yosiacagantaiguëneri irogomere Jesus.

Yosiacagantëro Jesus oguitso mositasa.

(Mr 4.30-32; Ir 13.18-19)

³¹ Aiti basini quingabaguëntsi yosiacagantëneri matsiguenga Jesus:

—Aisati cara iragáantanequë Tosorintsi ocantaro pibega oguitso mositasa ora ipan-guitë sërari cara togantsiquë.³² Ora mositasaguitso iroonti quiripiquiserossonori, carari oquibianë obaquero basini panguirintsi. Ipocaigapë tsmiriripague, yogapëro imagosi otseogapaguequë.

Yosiacagantëro Jesus ora piponganta pan.

(Mr 4.33-34; Ir 13.20-21)

³³ Aisati basini, iquenguitsataiguëri Jesus:

—Cara itingomibintanti Tosorintsi aisati ocantaro ora piponganta pan. Cara obetsiquëro pan tsinane, águëro tojai opane tirigo, oconaguëro arosata piponganta pan. Aique opon-ganë antagaisati.

³⁴ Yameca Jesus yogomeantaigari quingabaguëntsi ira botoibiritaigapari. Iroonti quingabaguëntsi inibatantari.³⁵ Imoncaracaro Sanguenari cara isanguenaque coman-tantatsiri:

Icanque Tosorintsi: “Tojai nosiacagantëneri matsiguengajegui nongomantaiguëri ora te irogóigue jirai cara nobetsiquëro quibatsi jiraissonori, irooti yamaica”.

³⁶ Aique ijocaiganaqueri Jesus ira botoibiritaigacari, icanaque pongotsiquë cara yosami-taigapëri irogomere:

—Nocogaiguë pingomantinaro paio ocanti ora tirigoniro ora piquenguitsatomo-taiguëna.

³⁷ Yotabitanëri Jesus:

—Nopaniaca Naro cara Jonogaguitequë, nomatsiguengatapë yaca quibatsica. Naro nosiacari ira panguitiro tirigoguitso.³⁸ Ora togantsi ocancaro quibatsi cara atimaigui eiro. Ora oguitso caninaro ocantaigari ibegaiga ira quemisanqueri Tosorintsi. Ora tirigoniro osigari ira quemisanqueri camagari.³⁹ Ira quisaneinqueri panguitatsiri, iriantari icantari Satanás. Cara yobiguitanti aisati ocantaro cara otsonquema quibatsi cara nopocaje Naro. Iraegui obiguitatsi iriantari ironomire Tosorintsi irisaanganetsite.⁴⁰ Pinguenguema. Yapatotaiguëro tirigoniro, itagaiguëro. Aisa ocanta nanganque aiquenta cara otsonquimaca quibatsi.⁴¹ Nagátaiguëri tojai ironomire Tosorintsi, irapatotaiguëri cara nagáantanequë antagaisati cantaguetatsi ora te onganinate aisati basini ira cantacaqueri quimingari.⁴² Nojocagantaiguëri cara pamariquë Sharincabeniquë; tojai iratsipiriaiguë canta, tojai iratsitsiaguitetanë.⁴³ Aique irosangueguitetaiguë antagaisati caninataigatsiri inganquimari ibega paba. Intsibataiguëmari Pabati cara igáanti Jonogaguitequë. Aitica piguëmita ora piquemanta, caninataque pinguemisantiro oca nocomantëmica.

Jesus yosiacagantëneri ira quirequi irománaga, aisati imapënequi shaota (ira jitacha périra).

⁴⁴ Përosati yogomeque Jesus:

—Cara igáanti Tosorintsi aisati ocantari ibega tojai quirequi irománaga quibatsiquë. Iniasipari sërari, aito cara iquiaque imánanontanaari iriro aisati, te ingomantëgotiri. Aro iáque, ipimantaguequero omagaro ora yasinta, yamanantë quibatsi cara inasegui quire-qui. Yamai icaninabenqueri tojai quirequi.⁴⁵ Aisati iragáantane Tosorintsi ocantari sërari manantiri imapënequi shaota caninarisonori ira jitacha périra.⁴⁶ Iniopëri paniro, ican-inatasanti ipënatasantaca. Inintasantiri, iroro ipimantaguëquero antagaisati ora yasinta, yamanantëri ira imapënequi shaota.

Yosiacagantëro Jesus siriamontotsi.

⁴⁷ Aisati yoniagaiguëri matsiguenga Jesus. Icanque:

—Aisati cara itingomibintanti Tosorintsi ocantaro pibega irisiriamonto sërari yágantari sima. Ijocaiguëro angaarequë, inosiquëgotëri yobiriatëgotëri tojai simapague.⁴⁸ Iacaró, aro inosiquëgotaiguëri irisiriamontoquë cara onamijaquë, isobicaiguë, yágaguetaiguëri sima-pague caninari yoguëri cantiriquë. Ira te inganinate ijoguequeri.⁴⁹ Aisa ocanta cara otsonquima quibatsi cara nopocaje Naro. Nagáqueri ironomire Tosorintsi irisaanganetsite

ingasiriconiatiaiguëri antagaisati matsiguenga caninataguetatsiri. Aique aisati ingasiriconiatiqueri ira te inganinataigue, ⁵⁰ irojocaiguëri cara Sharincabeniqué cara përosati iratsipiriaiguë aisati iratsitsiaguitetanë. ⁵¹ ¿Piquemaiguëro oca nocomantaiguëmica?

Yotabitaiguëri irogomere:

—Jee, naquemaiguëro.

⁵² Aisati icanque Jesus:

—Aroca inguemisanquena ira ogomeantiro Sanguenari, irogótanëro tojai. Igóquero ora isanguenatagueque jirai, aisati inguemisanquenaca, irogóque ora nogomeanti Naro yamai. Irogóque ogomeantatsiri ati ocanta cara igáanti Tosorintsi.

Ipiganaja Jesus cara Nasarequë.

(Mr 6.1-6; Ir 4.16-30)

⁵³ Tsonque Jesus cara yogomeantaro quingabaguirentsi, aique iáiguë Iriro aisati irogomere, ⁵⁴ ipiganaja quibatsiquë cara ipaniaca. Icanaque pongotsiquë cara yapatoitaiga jorío, yogomeantapë. Iquenganeintasantaigabacari ira quemaigabaqueri. Yosaminatobaganaca:

—¿Ati icanta cara yogomeanti? ¿Nega opaniaca ora igóque Iriro? ¿Pairo itasongantaguetá?

⁵⁵ ¿Cagarico Ica, itomi José obetsicaguetatsi mesa, sóbicomentotsi? ¿Irorori iniro María? Aisati igóiguëri eiro ireintiegui: Santiago, aisati José, aisati Simón, aisati Joras. ⁵⁶ ¿Teco aisati ontime iritsiro eiroguica? ¿Negaraca opaniaca ora igóque aisati ora icanque?

⁵⁷ Aro iguisaneintaiguëri, itsoingauguëri. Iroro icantaguëtaiguëri Jesus:

—Ainta quemisantaiguëri quinguitsatiro Irinibare Tosorintsi ira paniacha parigotiquë, carari itsoingauguëri imatsiguengasonori comantantatsiri.

⁵⁸ Te tojai iritosongaguetete Jesus cara Nasarequë. Tojainta itsoingauguëri imatsiguenga.

14

Eroris ijiqueri Jesus irianti Joan.

(Mr 6.14-29; Ir 9.7-9)

¹ Aique iquemocoqueri Jesus Eroris, itingomi Garireasati. ² Icantauguëri iromeraroegui: —Ira Jesus, iriantijengari Joan baotisantantatsiri. Nógagantabacari, carari najique icabitajaja aisati, iroro itasongantaguetëque.

³⁻⁴ Aroqueque Eroris yágabitsaqueri iina ireinti jitacha Jeripe; iina ojita Erorías. Icantabecari Joan:

—Te ongomeite págabitsatiri iina pirenti.

Iroro yágagantaguetëqueri Joan Eroris yomianqueri yoguëshotiaqueri sogatsaquë coshotsari. ⁵ Ico gabeca Eroris iroguirime ira Joan, carari itsorogaiguëri matsiguengajegui. Igóiguë matsiguenga cara Joan icomantëgotëri Tosorintsi. Ijique Eroris: “Aroca nógagantëri, inguisëgotaiguëmari matsiguengajegui”. ⁶ Aique pareca cataguiteri isantone Eroris. Icaimaguetaiguëri tojai imatsiguenga, yoganinasëretaigapëri. Aro omaninquebintëri osinto Erorías. ⁷ Iniacaninatobërona ora tsinane ira Eroris, aro icanquero negaca:

—Paioraca pomanaguina, aro nomëmiro. Igóque Tosorintsi cara quero namatobitimi.

⁸ Aro ocomantatsaqueri oniro, ocantacaquero negaca:

—Nocoguini pógagantiri ira Joan baotisantantatsiri, aique pomapënarora ora iguito cara tsibetaquë aique nomëro inato cara ogóque aisonorica icamaque.

⁹ Yogasëreca itingomi cara icantasanotëro, aisati cara iquemaiguëri antagaisati igaimane ora icantasanotëro irisintotsari. ¹⁰ Aro igáqueri soraro irobotëaquintiri Joan cara iromingamentoquë. ¹¹ Aique yamapënero tsibetaquë iguito Joan, ipëro irisintotsari. Iroroque përo oniro. ¹² Ira irogomere Joan ipocaiguë, yágaiganaqueri cara iritijaigairi. Aique iáiguë, icomantaigapëri Ira Jesus:

—Yogamaguëri Joan Eroris.

Yoguibatëro Jesus itasonguëro pan, yomitojaiganaquero.

(Mr 6.30-44; Ir 9.10-17; Jn 6.1-15)

¹³ Cara iquemaque Jesus aroque icamaque Joan, iátacagaiguëri irogomerejegui canta tenta ontimingani. Yotetanaca pitotsi. Aisati cara iquemocotaigabaqueri matsiguengajegui ijocaganaquero iboeborotepague yoguiataiganaqueri cara onamijaquë. ¹⁴ Cara yagatocotaigapë Jesus, iniaigapëri tojai matsiguenga ira aguaigaseguiri. Tojai icantaneintëgotaigapëri yoguibegaigairi janaitaguetatsiri. ¹⁵ Aro ochapinitanë cara ipocaisaigapëri irogomere, icantabetaigairi:

—Yaca teca ontimingani, aisati aroque ochapinitanë. Yamai pigátaigueri icaegui matsiguengaca iriáiganaque poeboropaguequë iromananteta iraperi.

¹⁶ Icantauguëri irogomere Jesus:

—¿Pairo iratsipiribitaiguë iriáigae? Pomaigueri obirojegui ora irapaiguë.

¹⁷Yotabitanëri:

—Teri ine yaca ora nomaiguëri. Yaca aiti oca pan ocarati pabocorooti aisati pitenianti sima. Quero cotonguiboro.

¹⁸Icanque Jesus:

—Pomenaro yaca.

¹⁹Aique yogasobicaiguëri iraugui matsiguenga cara tobarisiquë. Aique yáguëro Jesus ora pan aisati sima. Inetsanaque jonoquë, icanqueri Iriri:

—Pabati, nacarasiatocoquemiro oca noperijeguica popaiguëna.

Aro itibatsaaguequero pan Jesus, yotsatengaiguëri irogomere cara imauguëri matsiguen-gajegui ira aguiataiguëri. Aisati yotsatengaigacari sima. ²⁰Yapaiguë antagaisati, ique-maigaca. Aique yobiitaguetajiro irogomere ora irangarataneegui, iagajiro 12 cantiri.

²¹Tojai yapaiguë sérari icarati 5,000, aisati tsinanejegui, aisati ojaniquitejegui.

Yanëiatanë Jesus jonoicaa nija.

(Mr 6.45-52; Jn 6.16-21)

²²Aique icantaiguëri Jesus:

—Nogomere, potetaiguema pitotsiquë, pobataigue antatinta.

Aique igátaiguëri ira botoibiritaigari:

—Yamai pijáigue pobangojeguiquë.

²³Aro itonganaque Jesus oguitojaquë cara yamanaque, inibatëri Iriri. Ainta Jesus paniro inë cara otsitinitanë. ²⁴Ora pitotsi aroqueque pinë aganguijaquë, icomatabitacaro irogomerejegui. Te iraretima iroontita omotoncaatasantapa nija aisati poguipigapigatoco-queri coguentima. ²⁵Cara igogaraaque iáque Jesus aiquero pitotsiquë, yanëiaapë jonoicaa angaare, te iritsitigue. ²⁶Iniaigabaqueri irogomere, te irogóigueri, itsorogasantanaque, icalbaitanë icantobaca:

—¡Eeeel ¡Coraque camagari cara iráganacái!

²⁷Carari yotabitaigapëri Jesus:

—Quero pitsorogaigui. Naanti bocapaatsi, pinganinasëretëgotina.

²⁸Aro icabëri Peroro:

—Obiroca Natingomi, pingaimina najáque nanëiatanë jonoicaa nija irooti cara pinasegui Obiro.

²⁹Yotabitanëri Jesus:

—Omana popogopë.

Aro yaguëtanë Peroro, yanëiatanë jonoicaati nija iáque aique cara inasegui Jesus. ³⁰Pënibaque irarequimari cara iniaquero nija omotoncaatapa itsoroganë, iparintanaca itsitiganë. Icaibatanëri:

—¡Natingomi, págobaina!

³¹Aito cara yacotasitobairi Jesus, yágobagotobairi ira Peroro, icanqueri:

—Arosata piquemisanquina, ¿Pairo pitsoingobiquina?

³²Aro yotetaigaro pitotsi Jesus aisati Peroro. Aro osantocotanai coguentima. ³³Aito cara iraugui inasegatsi pitotsiquë yobaticagueritotaisitaiganacari icantaigabaqueri:

—Aisonori, Obiro Itomi Tosorintsi.

Jesus yogaguibegajiri ira janaitaguetsiri cara Jenesarequë.

(Mr 6.53-56)

³⁴Aro imontiaiganaja, yaretaigapaa Jenesarequë. ³⁵Ainta timaigatsi cara, igótoberri Ira Jesus, icomantëgotaguëri, yotsatengaiguëri imatsiguen-gajegui. Aro yamapëneri tojai janaitaguetsiri. ³⁶Yamanocopëri cara iranintacaqueri irotsagataigapëri ogarasiquë iguitsagare. Aro yogaguibegaigairi omagaro ira otsagaqueri.

15

Ora yametaiga joríojegui.

(Mr 7.1-13)

¹Aique iátasitaiguëri Ira Jesus bariseopague aisati ira ogameantiro isanguenare Moisés. Ipaniaigaca Jerosarénquë. Yosamitaigapëri:

²—Eiroegui jorío. Ametaiga queroquera api, anguibocoquima. Iroto yogometagaí omatsiguenga jirai. ¿Pairo te ingantobitaigue negaca pogomerejegui? Yapasitaiga te inguibocotima. Yoguimingatata iriati.

³Yotabitaiguëri Jesus:

—Tojai pomoncaratasitaigaro ora icantasiagueta omatsiguenga jirai, iroro te pinguemisantaguëtiro ora yogometaguëmi Tosorintsi. ¿Pairo picantobitaiga obirojegui negaca? ⁴Icanque Tosorintsi:

Pinguemisantiri piri aisati piniro.

Aisati icanque:

Ingameta ira cantëgotaguetasitari iriri aisati iniro.

⁵ Carari obirojegui, pogometaiguëri pomatsiguenga: “Pingantiri ira casintimi: ‘Quero nomitocotimi. Nomëmime quirequi, nangantaneintëgotëmime carari aroque nacanqueri Tosorintsi nomëri Iriro naguireguitè’ ”. ⁶ Pogometaiguë quero picábintsairi piri. Cara picanque negaca, te pogometiri Irinibare Tosorintsi, teatisati pinguemisantiro. ⁷ Picantaisitaigabita piquemisantasitabeta. Aisonori icomantëgotaguëmi ira comantantat-siri Isaiás cara isanguenaque jirai:

⁸ Icanque Tosorintsi: “Ica matsiguengaca inibatasitëgotina ora caninaro, carari te inguenganeintina. ⁹ Yamanocotasitina cara yapatotasitaiga; iroonti yogometa irinibare matsiguenga”.

Ora aguimingasëretiri matsiguenga.

(Mr 7.14-23)

¹⁰ Aique Jesus icaimaiguëri ira botoibiritaigari, icantaiguëri:

—“Pinguemina, pigóiguero oca nocomantaiguëmica: ¹¹ ora apaiguë, te oguimingatiro asëre. Iroonti ora inibatasitagueta irooro aguimingasëretacái cara aquianquero quimingaró.

¹² Aique iátasiqueri Jesus irogomere, icomantaigapëri:

—¿Teco pigóte iguisaneintobitaiguëmiro bariseoegui ora picanqueri?

¹³ Yotabitaiganaqueri Jesus:

—Iriro icantaigaro pibega panguirintsi. Aiquenta irisiabonguitiquëro Pabati jonoquënintaberi antagaisati ora te imanguitiro Iriro. ¹⁴ Aro irinaigueta bariseoegui, te irogóigue; aisati icancari sërari comarajari ingatsatobaganëmaca ira basini comarajari. Pitirooti imarigaiganaque omoroquë.

¹⁵ Icanqueri Jesus Peroro:

—Teni nanguemimi; pingomantina ora ocanti oca picanquinaca.

¹⁶ Icanqueri Jesus:

—¿Teraiquerai pigóte? ¹⁷ ¿Teco pigóte pairoraca opë ojáque asegotuquë aique agabisairo? Te ongantiro pairoraca asërequë. ¹⁸ Cara pinibati pairoraca piquengasëreti; queroca piquenga caninasati, quero picaninasëreti, pinibatü ora te onganinate. ¹⁹ Ora piquenga opaniaca paneingomentoquë: cara piquenganeintaguetiro te ongomeite, cara póganti, cara pintaguetiro tsinane cagaro pijina, aisa cara tsinane ontaguetitiri sërari cagari ojime, cara picositanti, cara pitsoiguëgotantagueta, cara picantocotaguetasitari pomatsiguenga, omagaro oca paniacha paneingomentoquë. ²⁰ Omagaro oca aguimingasëretimi. Irooro te pinganinataguëtaigue, carari aroca popë queroquerai piquibocota querootisati poguiminasëretimi.

Oquemisanqueri Jesus tsinane Cananasato cagaro jorío.

(Mr 7.24-30)

²¹ Aique iáiguë Jesus aisati irogomerejegui cara Tiroquë aisati Sirónquë. ²² Piátasiqueri Cananasato, cagaro jorío. Ocampëri:

—Natingomi, Obiro imatsiguenga David itingomi jorío jirai. Nocoguini pingábintsena naro aisati nasinto. Inancaro camagari, yogatsitasantëro.

²³ Carari te irotopitiro, imairetanë. Aro icantaiguëri irogomere:

—Pingantiro ojátaje, tojainta poguiatacái paserigacái.

²⁴ Icanquero tsinane Jesus:

—Igáquina Pabati nangábintsaigneri joríojegui. Icantaigari ibega oisha ibiaga.

²⁵ Aro pobaticagueritobiripari, ocanqueri:

—¡Natingomi, pomitocotina!

²⁶ Yotabitobëro Jesus:

—Te onganinate irágopitiri janequi iraperi imaigueri otsiti. Cagarimi obiro jorío. ¿Pairó nomitocobiriquimi?

²⁷ Potabitanëri:

—Aisonori, Natingomi, ora picanque, carari yapiro otsiti opetoqui ora pariaguetatsi imesanequë casintari.

²⁸ Aique icanquero:

—Tsinane, caninataque piquemisanquina. Yamai aroque nopabaquemiro ora pamanocoquina.

Irooti pabisacoontanaa osinto.

Jesus yogaguibegajiri tojai janaitaguetatsiri aronisati angaarequë.

²⁹ Aro yogagaiganaca Jesus aisati irogomerejegui irooti onamijaquë angaare jitacha Garirea. Aique itongaiganaque, isobicaigapë. ³⁰ Ipcasaitaigapëri tojai matsiguenga, yágaiganaquineri tojai janaitaguetatsiri: ainta carancaratsi, ainta comarajari, ainta ira patebocotatsi, ainta ira te irinibate, aisati tojai basini. Yobaticagueritotaguëpari. Aro Jesus yogaguibegajiri omagaro. ³¹ Aro iquenganeintasantaigacari matsiguengajegui ira niaiguëri Ira Jesus cara inibatagajiri ira te irinibate, yosebatagaari ira emëngari, yanëitagairi carancaratsiri, iniacagajiri comarajari. Icantaguë matsiguenga:

—Caninari Tosorintsi, Ira iquemisantaiguë joriojegui.

Yogatsitairo Jesus itasonguëro pan, yomitojaiganaquero.
(Mr 8.1-9)

³² Aique icaimaiguëri irogomere Jesus, icantaiguëri:

—Tojai nacantaneintëgotaiguëri antagaisati ira botoibritaiguëna. Ocarati maba cata-guiteri itsibataiguëna, yamai te inae iraperi. Itasegasantaiguë. Yamai aroca nagátagairi iriáigae, iromagotasantanë queronta yapi, quero yaretaiga ibangopaguequë.

³³ Yotabitaiganaqueri irogomere:

—Pinetse, yaca teca ontimingani. ¿Nega nágaiguëneri pan ora irapaiguë? Tojaisonorinta matsiguenga.

³⁴ Yosamitëri Jesus:

—¿Ati ocarati pan inatsi?

Yotabitanëri irogomere:

—Ocarati 7, aisati ainta arosataanti sibaí.

³⁵ Aro icantaiguëri matsiguenga Jesus:

—Pisobicaigue quibatsiquë.

³⁶ Aro yáguëro pan aisati sibaí, icanqueri Iriri:

—Aro nega, Pabati, nacarasiaquemi popabaquinaro oca perintsica.

Aique itibatsaaguequero, yotsatengaiguëri irogomerejegui arota cara irotsatianquimaro ira botoitaigacha. ³⁷ Yapaiguë antagaisati, iquemaigaca. Aique yobiitaguetajiro ongarataga, iagajiro cantiri oquibe ocarati 7. ³⁸ Yapaiguë tojai sërari icarati 4,000. Aisati papaiguë tojai tsinane aisati janequi. ³⁹ Aique igátaganaqueri Jesus, icanqueri:

—Yamai pijáigae pobangopaguequë.

Aique yotetaiganaja Jesus aisati irogomere pitotsiquë, imontiaiganaca irooti Maga-raraquë.

16

Icogabeca bariseo iritosongueme Jesus.

(Mr 8.10-13; Ir 12.54-56)

¹ Aique iátasitaiguëri bariseopague aisati saroseopague; icogaigabitapa iranianimari Jesus irantacaquerime ora te onganinate. Icantabepari:

—Atsi yamai nocogaiguini nanetsemi cara pitasanganti, ora nogóontëmi aroca popani-aca Jonogaguitequë.

² Yotabitaigabaqueri Jesus:

—Pinetsaigue, aroca ochapinitanë piniaquero onguiraaguitetë, ¿Teco pingantaiguë: “Quero oparigui angani”? ³ Aisati cara onguëtaguetanë, piniaqueroa onguiraaguetamanë jonoquë, aisati aitica mingori tsitaro, pingantaiguë: “Yamai omariaque angani”. Pigóiguë ati ocanta jonoquë, omariaqueca angani, carari te pigóigue omoncaraca tojai Sanguenari ora ocanti iribocapë Agabisaicoontatsiri. ⁴ Te pinganinataigue tojainta pitsoingaguëri Tosorintsi. Picogabeca pineina cara natasonganque, carari quero noniaguimiro. Patiro piniaquero aiquenta nanganquimari ibega Jonás.

Aique iáque, ijocaiganaqueri ira bariseo aisati saroseo.

Ora piponganta pan irasi bariseo aisati saroseo, iroonti irogomeantane.

(Mr 8.14-21)

⁵ Aro yaretocotaigaa antatinta Jesus aisati irogomere. Aique irogomere iquengaiguëro pan; yomaguisanquero te iromapëro. ⁶ Aro icantaiguëri Jesus:

—Pigamaiguemaro ora piponganta pan irasi bariseoegui aisati irasi saroseoegui.

⁷ Aique yosamitobagaigaca irogomere:

—¿Pairo icantobicái: “Pigamema ora piponganta pan irasi bariseo”? Tentajengari nomapëro pan.

⁸ Igóque Jesus ora iquengaigaca, icantaiguëri:

—¿Pairo pijibiritaiguë nacantocoquemiro pan? Patiro arosataanti piquemisantaiguëna.
 9 ¿Terai pigóigue? Cani ocarati pabocorooti pan, carari napaagaiguëri 5,000 sërari. Págaigairo
 pobiitaguetajira ora ongarataga. ¿Ati ocarati cantiri pinê?

Yotabitanëri:

—Ocarati 12.

10 —Aisati ocarati 7 pan, aisati nopaguetaiguëri pan sërari icarati 4,000. ¿Ati ocarati
 pobiitaguetaji cantiriquë oquibe?

—Ocarati 7.

11 Icanque Jesus:

—¿Pairo te pigóigue? Te nanguincotiro pan ora peguënguichane cara nacanquemi:
 “Pigamema ora piponganta pan irasi bariseo aisati saroseo”.

12 Aique igóiguë irogomere te ingantocotiro aisonori ora piponganta pan, iroonti ocan-
 taro pibega irogomeantane bariseoegui aisati irasi saroseoegui.

Icanqueri Jesus Peroro: “Obiro Quirisito”.

(Mr 8.27-30; Ir 9.18-21; Mt 18.18)

13 Aique iáiganaque Jesus aisati irogomere cara poeboroquë jitacha Sesárea, ora yobet-
 siquë Jeripo. Aro yosamitaiguëri irogomere Jesus:

—Nopaniaca Naro Jonogaguetequë, nomatsiguengatapë, carari, ¿Pairiraca ijitaiguëna
 matsiguenga?

14 Yotabitaiguëri:

—Aintapague ijitaiguë Obiro Joan baotisantantsiri. Ainta basini ijitaiguëmi: “Ira Jesus
 Irianti Eriás, ipocaji”. Ainta basini ijiquemi Obiro Jeremías. Aintasati icanque Obiro
 comantantsiri.

15 Aro yosamitaiguëri:

—¿Pairo pijitaiguëna obirojegui?

16 Yotabitanëri Simón aisati ijita Peroro:

—Obiro Quirisito Agabisaicoontantsiri ira noguiaiguë. Aisati Obiro Itomi Tosorintsi
 caniatacagantantsiri.

17 Icanqueri Jesus:

—Aisonori picanti, Simón itomi Jonás. Te irogometimiro matsiguenga; Irianti oni-
 aguëmiro Pabati cara Jonogaguetequë. 18 Najitimi Peroro ora popairo ocanti mopë.
 Nococaquemi pinguemisantacagaiguëri basini matsiguenga tojai cara Naro Itomi Tosor-
 intsi. Irapatolibiritaiguëna. Nangábintsaiguëri querota yagobeiri camagari, querootisati
 yobiacaguiri cara iquemisanquina. 19 Nomëmiro pinguemisantacaguiri matsiguenga
 aisa ocanta pisirecoquineri sitëcori arota ingasitapëri Tosorintsi cara igáanti. Queroca
 iquemisantimi matsiguenga yaca quibatsica, pingantiri cara quero iáti Jonogaguetequë.
 Aisati inganque Tosorintsi: “Aisonori picanqueri. Tenta inguemisantina, quero no-
 maguisantineri ora icantaguete te onganinate”. Carari antagaisati ira quemisanquero
 Irinibare Tosorintsi yaca quibatsica, pingantiri cara iriaté jonoquë cara përosati intio-
 queri Tosorintsi. Aro përosati inguenguemi Tosorintsi, inganque: “Aisonori. Nojocajineri
 ira quemisanquina ora icantaguete te onganinate, nomaguisantajineri”.

20 Aique Jesus icantaiguëri irogomere:

—Quero picomantiri matsiguenga: “Iriro Jesus Irianti Quirisito”.

Jesus icomantaiguëri irogomere cara ingamaque.

(Mr 8.31-33; Ir 9.22)

21 Aique icomantaiguëri irogomere Jesus:

—Coraque cataguiteri cara najáque Jerosarénquë. Canta, tojai iratsipiriacaiguëna ira
 antiasipari aisati itingomiegui saseriroti aisati ira ogomeantiro isanguenare Moisés. Aisati
 irógaiaguëna, carari ongaraque maba cataguiteri, aro nanganiantanae aisati.

22 Aro yáganëri Peroro casiriconiati, ipëgatsacari:

—Natingomi, te onganinate oca picanqueca. Nocoguini quero itsipiriacaquimi, querota
 picami.

23 Aro yapisitasitanacari Peroro Jesus, icantasantotëri:

—Pijáte, picanquina aisati picantari ibega Satanás. Quero pintaguinaro ora te ongani-
 nate. Te pigóte ora icocaquina Tosorintsi, iroonti pigóque ora icogui matsiguenga.

Ora inganque ira quemisantantiri Jesus.

(Mt 10.38-39; Mr 8.34-38; Ir 9.23-27; 14.27)

24 Aique Jesus icantaiguëri irogomere:

—Iranintasantëca pairiraca aguiatanëna inguemisantantina, iranatanëro igorosite,
 quero icantanonta iriatí, iroonti imomirintsibenquinaro pairoraca nongocaqueri Naro.

Aroca iratsipiriacaqueri basini, përosati inguemisantanëna Naro. ²⁵ Ira cogabitacha ingábintsëna yaca quibatsica, tenta iraninte iratsipiriero, aiquenta iratsipiriasantë. Irari quemisantasantënanane yaca quibatsica, irooti cara ingamobiquina Naro, aiquenta intiomuquina Jonogaguitequë, intimasantanë caninasati. ²⁶ Aintaca sërari irasintaguëtimaro antagaisati ara inatsi yaca quibatsica, cara ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro? Aroca iriátë Sharincabeniquë, tiguëtionori nangintima iriátë Jonogaguitequë, inganiatanae. ²⁷ Nopaniaca cara Jonogaguitequë, nomatsiguengatapë cara niboguë yaca quibatsica. Aiquenta nopigaima aisati yaca quibatsica, nongobeingatasantapë aisati icanta Pabati icobeingatasanti; intsi-bataigapëna ironomirepague Pabati irisaanganetsite, aro nongomantëgotaiquëri antagaisati matsiguenga. Nomaiguëri omagaro icanquero ora nococagaiguëri; irianti ira quero iquemisantaiguina, natsipiriacaqueri. ²⁸ Aisonori nacantasantaiguëmi, nogomerejegui, aintapague obiroquë ira queroquërai icami iranaiagabajina cara nopocaje Naronta Itingomisonori; noniaguëmiro nosanguëguitere.

17

Ipasiniatitanë Jesus.

(Mr 9.1-13; Ir 9.28-36)

¹ Aro pabisanaque 6 cataguiteri cara Jesus itonganaque oquibequë oguitoja. Yágaiganaqueri casiriconiati ira Peroro aisati Santiago aisati Joan ireinti Santiago. ² Aro ipasiniatitomopëri Jesus. Yosanguëborotapë aisati icampari ibega paba. Aisati oquëtatatanotanë iguitsagare. ³ Aisati iconijatatomopëri Moisés aisati Eriás, inibatobagobaca Jesus. ⁴ Aro icanqueri Jesus Peroro:

—¡Natingomi, caninataque ninaigue yaca! Pinintiroca, nobetsiquëmiro yaca maba pongotsi otiomijani, patiro pasi, aisati basini irasi Moisés, aisati irasi Eriás.

⁵ Iroontita inibatasegui Peroro, paguëtaguëpëri mingori poganguibotaigapëri posanguëguitocopëri. Aro iqumaigabaquero Irinibare Tosorintsi cara mingoriquë, icanque:

—Iriro nanintasanti Notomi Ica. Tojai nacaninatasantobiqueri. Pinguemisantaiguëri Iriro.

⁶ Iquemaigabaquero oca irogomere, aro ipariaque yaquitomotaiganaca itsorogasan-tanë. ⁷ Ipocasitaiguëri Jesus. Yotsagaitaiguëri icanqueri:

—Pingabiritima, quero pitsorogaigui.

⁸ Aro icabiritanaa icogabetajari Moisés aisati Eriás, te irinaje, Irianti panibani inasegui Jesus. ⁹ Aique cara yanongaiganaca, igáqueri irogomere Jesus icanqueri:

—Quero picomanti oca piniaiguëca. Aiquenta cara nangamaque aisati nangani-atanae, aro pingomantaiguëri basini matsiguenga. Pingomantëgotina Naro omagaro ora pigótoconoquina aisati cara nopaniaca Jonogaguitequë aisati nomatsiguengatapë.

¹⁰ Aique yosamitaiguëri irogomere:

—Ira ogomeantiro Sanguenari cantatsi: “Iribocapae iritsita Eriás cara queroquërai ipoqui Quirisito Ira Agabisaicontatsi”. ¿Pairo yogomebiriqueri oca? ¿Pairo te iribocobipë Eriás?

¹¹ Yotabitaiganaqueri Jesus:

—Aisonori icantaiguë: “Ingonijapae Eriás, irobetsicaguëpë omagaro”. ¹² Yamai nomomantaiguëmi cara aroque ipocaji Eriás carari te irogótaigabaqueri matsiguenga; tojai itsipiriacaigabaqueri. Aisati nanganquima Naro, tojai iratsipiriacaigaguëna.

¹³ Aique igóiguë irogomere cara Jesus inibatëgotëri Joan baotisantatsiri.

Jesus yogaguibegajiri janequi tingaraachari.

(Mr 9.14-29; Ir 9.37-43)

¹⁴ Aro cara yanongopaa osobi, ainta arosonori matsiguenga yapatotaiga. Aro ipocasipëri Jesus sërari, yobaticageritotaguëpari, icampëri:

¹⁵ —Natingomi, pingantaneintëgotinari notomi; tojai itingaraacani, tojai itsipiriacaque. Iparigopiantë tsitsiquë irisacanëma; aisati iparigatapiniquë nijaaquë. ¹⁶ Namabitapari yaca pogomerequëca nacantabepari: “Pigaguibegajiri notomi”, carari tiguëti ingantiri iragabiari iragabisaicotajiri.

¹⁷ Yotabitanëri Jesus:

—¡Te pigóguero Irinibare Tosorintsi! ¡Terai pinguemisantaiguero obirojegui, terai pinganinataiguë! ¿Ati ongantima nantsibataiguëmi nogometasitaiguëmi carari te pigóiguë tojainta pitsoingaguëna?

Aique icanqueri casintari janequi:

—Atsi pomapënarí pitomi.

¹⁸ Aro Jesus iguisatsatëri ira camagari, ijoqueri, yogaguibegajiri ira janequi.

¹⁹ Aique yosamitaiguëri Jesus irogomere casiriconiati:

—¿Pairo te nagabiobitiri nagátiri ira camagari?

²⁰ Icantaguëri Jesus:

—Teni pigabeiri tenta pinguemisasantantina. Arosataanti piquemisantaiguëri Tosorinti. Aisonori nacantasantaiguëmi: aroca piquemisantaiguëri pinganqueroca ora ogui-toja, “Ogaganëmata canta”, aro ogaganëma. Aisa ocanta mositasaguitso otiomijanisonori oquibianë, aisa ocanta cara pinguemisantaiganaque. Pinguemisantasantaiguëca, pingan-queroca pairoraca nongocaquemi. ²¹ Carari pinintica pijoguiri camagari cantacha ica, patiro pingantiro aroca pomanocotasantëri Tosorinti aisati aroca pititima.

Yogatsitai Jesus icomantaiguairi irogomere, icanqueri: “Pënibaque nangamaque”.

(Mr 9.30-32; Ir 9.44-45)

²² Iroontita yanëitaiganaque cara Garireaquë, Jesus icantaguëri irogomerejegui:

—Nopaniaca Jonogaguitequë, nomatsiguengatapë cara niboguë yaca quibatsica. Carari irácagantaiguëna matsiguenga, ²³ irógaguëna. Ongaraque maba cataguiferi aro nangani-atanae.

Iquemaiguëro irogomere oca nibarintsica, aro yogasëretaignana.

Ipënabentiro Jesus ora irobetsicantaguetimaro ibango Tosorinti cara Jerosarénquë.

²⁴ Aique iáiguë Caperinaoquë Jesus aisati irogomere. Cara ainta ira coigotëri quirequi irobetsicantaguetimaro ibango Tosorinti. Ipocasiqueri ira Peroro, yosamitapëri:

—¿Iripënabentapininquerinico Ira ogometimiri iguirequite arota iraganinatiro ibango Tosorinti?

²⁵ Icanqueri Peroro:

—Jee, iripënabentiri.

Cara ipiganaja Peroro cara pongotsiquë, yosamitëri Jesus:

—Simón, ¿Pairo piquianca? Irapague itingomi, ¿Pairo icoicotopianti iguirequite? ¿Icoico-querico imatsiguengasonori? Teca, ¿Iriantico icoicoqueri basiniati matsiguenga?

²⁶ Yotabitanëri Peroro:

—Icoicotaiguëri basiniati matsiguenga.

Aro icanque Jesus:

—Aisonori, te ingoicotiri imatsiguengasonori. Aisa nacanta Naro, te ingoicotina Pabati aroquenta nomatsiguengatacari. ²⁷ Carari te naninte inguisaneintina ira coigotantatsi quirequi. Yamai pijáte angaarequë, pimate sima. Ira iritsita páguë, pintiguiranguiri, piniaqueri poro quirequi. Páganëri, pomeri ira coigotantatsi quirequi, popënabentina Naro aisati popënabentima obiro.

18

Icomantë Jesus pairi obaquenguitsine cara itingomibintanti Tosorinti.

(Mr 9.33-37; Ir 9.46-48)

¹ Aique irogomerejegui Jesus iátasitaiguëri, yosamitaiguëri:

—Cara igáanti Tosorinti, ¿Pairi obaquenguitsine?

² Aro icaimëri janequi Jesus, yogobëri aganguisati, ³ icanque:

—Aisonori nongomantëmiro oca: pinguengasërete basiniati, pingantiro yacaqueroca. Queroca aisati pincanta ibega janequi, quero paretta cara igáanti Tosorinti. ⁴ Teni inguenguma iriati caninari ica janequica. Pairiraca cantëmarine ibega ica janequica iriro obaquenguitsine cara iragáantanequë Tosorinti. ⁵ Pairiraca ágacaminatëri ira cantari janequi iquemisanquinanta, aisati yágacaminatëna Naro. ⁶ Pairiraca antaquerine janequi quemisanquina ora te onganinate, natsipiriacaqueri. Caninataqueme ingamaque queroquerai intaguiri ora te onganinate, aisa onganquimame iragaguibeintsatsatëgotëneri oquibe mopë itsonoquë, irojoquerime angaarequë ingamaque. ⁷ Aiti tojai ora quimingari yaca quibatsica, aisati ainta tojai intaqueri basini ora te onganinate, carari iratsipirias-antëro ira antaquerira.

Pijoquiro pairoraca antaquimine ora te ongomeite.

(Mt 5.29-30; Mr 9.41-48; Ir 17.1-2)

⁸ Aisati icanque Jesus:

—Yamai nosiacagantëmiro. Aroca antaquimi pobaco ora te onganinate, pijocajiro ora picantaguëti quimingari. Aro pobetsiquiro pisëre aisatime ongantima pitotirome pobaco pijoquerome. Aisati piguiti ontaquemiroca te onganinate. Caninataque pinë paboconirobi queroca paguitinirobi cara Jonogaguitequë, arota quero piáti Sharincabeniquë cara pini tsitsi ora te otsibacanete. ⁹ Aroca antaquimiro piroqui ora te onganinate, pijocajiro ora

quimingari. Pobetsiquiro pisëre aisatime ongantima páguirome pijoquerome piroqui. Caninataque pijáte paoquinirobi cara Jonogaguitequë, querota piátacaguiro pitirooti piroqui cara Sharincabeniquë cara te otsibacanete tsitsi aisati pitsipiriasantë përosati.

“Quero pitsoingui janequijegui”.

¹⁰ Aitosati icanque Jesos:

—Aisati, quero pitsoingui janequijegui, aintanta ironomire Pabati jonoquë yomisantaiguëri janequi, aisati icomantëgobentaiguiri. ¹¹ Nopaniaca Jonogaguitequë, nomatsiguentatapé. Nipocasiqueri nagabisaicotaigairi ira játaiguënguistsineme Sharincabeniquë.

Jesos yosiacagantëri oisha ibiaga.

(Ir 15.1-7)

¹² Aisati icantaiguëri irogomere Jesos:

—Nosiacagantëmiro aisati. Aroca ini casintari 100 iroishate, imiaquimaca poro, ¿Queroco ijocaiganaqueri 99 cara tongagariquë, iriátasitëri ingogajantiri iroishate ira peguënguicha poro? ¹³ Cara iraniajirica, inganinabenqueri iroishate aroquenta iniajiri, pabisëro cara icaninabentaiguiri irægüi te imeguima. ¹⁴ Aisa icanta Pabati, te iraninte iriáte Sharincabeniquë paniro janequi.

Icanque Jesos: “Pogometiri popiguemisantane cara quero icantagueti ora te onganinate”.

(Ir 17.3; Mt 16.19; Jn 20.23)

¹⁵ Aisati icantaiguëri Jesos:

—Aroca pigasërequima ingantaguetomoquiminta popiguemisantane ora te onganinate, pijátasitiri casiriconiati pingantiri. Quero picomantiri basini. Aroca inguemisantobëmi, intimaque caninasati, caninataque, págacaninatobagajima aisati. ¹⁶ Queroca iquemisanti, pijátasitajiri aisati páganëri basini popiguemisantane, paniro queroca pite. Intsi-bataiguëmi irogóontimarota pairoraca pinganqueri, aisati ingampëri iriro cara inguengasëretaquimari irapiguemisantane. ¹⁷ Queroca iquemisantaigabaquemi, pingomantëgotiri cara yapatotaiga quemisantatsirijegüi. Aisati ingamanaiguëri. Queroca iquemisantaiguiri antagaisati irapiguemisantane, aro pingueincotaigueri ibega tsoengatsiri aroque icantagueque te onganinate. Quero pijitiri quemisantatsiri. Irianti cantacha coigotantatsi quirequi ipagantineri cobeingari Iromasati. ¹⁸ Pairoraca pingantaiguëri yaca quibat-sica, irootisati inganqueri aisati Tosorintsi canta Jonogaguitequënta. Pingantaiguërica popiguemisantane cara icantagueti te onganinate, iroro quero pomaguisantaguetineri, aro irooti inganqueri Tosorintsi. Aroca irobetsicasërequima, pijocajineri pingantaiguëri te ine icantagueti yamai, aisa ocanta ora inganqueri Tosorintsi inguengasëretëmi irojocajineri aisati. ¹⁹ Nagatsitaimiro: cara pomanaguëri Tosorintsi cara Jonogaguitequë obiro aisati basini, aroca pinguengasëretima, aro imaiquëmi Tosorintsi ora pomanaguëri. ²⁰ Aisonorinta atiraca irapatotaiguema pite quemisanquinane queroca maba, aisati aintana Naro nantsibataiguëmari.

Pijocajineri basini ora icantaguetomoquimi te onganinate.

(Jn 20.23)

²¹ Aique iáque Peroro, yosamitëri Ira Jesos:

—Natingomi, nigóque cara ingantaguetomoquinaca te ongoimeite nopiguemisantane, caninataque nangábintseri nojocajineri ora icantaguetomoquina, quero nipëgatari. Carari iragatsitainaroca, ¿Ati ongarate nojocobentajiri? ¿Aroco ongarate 7?

²² Yotabitanëri Jesos:

—Nangantasanotëmi, quero patiro pijocobentajineri siete, carari tojaisonorori pijogopi-antaineri përosati; quero pipëgatari. ²³ Aisati ora iragáantane Tosorintsi ocantari ibega ibatorote cogatsi cara iripënabentairi iratirite. ²⁴ Icaimobëri paniro iromeraro, irebetiri tojaisonorori quirequi. Icantabepari: “Popënabentajinari naguireguite”. ²⁵ Yotabitanëri: “Tiguëti ongantima nopënabentajimi yamai tenta irine quirequi”. Aro igáqueri basini: “Páganëri ica. Pomimantiri. Aisati pomimantiro iina, ianiquëte, ora yasinta, omagaro; nágairi quirequi irebetëna”. ²⁶ Aique yobaticagueritocari iromeraro, yamanaqueri: “Nobatorote, quero popimantina. Aiquenta nopënabentajimiri antagaisati”. ²⁷ Aro icantaneintëgotanairi iromeraro ibatorote, icanqueri: “Nangábintsaimi, nojocajimiri ora pirebetëna nomaguisantocotajimiri. Quero nocoicotajimi”. Aro yomisotocajiri. ²⁸ Cara iáque iromeraro, iniopëri irapimeraro irebetiri iriro arosata quirequi. Yágatsonotobëri icanqueri: “Popënabentajinari ora pirebetëna”. ²⁹ Aro yobaticagueritotabecari, yamanaqueri: “Quero picoicotinari yamai. Aiquenta nopënabentajimiri antagaisati”. ³⁰ Carari te ingábintsairi. Yomianqueri iromingamentoquë icanqueri: “Cara popënabentajina, aro nagáqueri cara iromisotocajimi”. ³¹ Cara iniaigabaqueri imatsiguenga, yogasëretagaca. Iátasitaiguëri

ibatorote, icomantaigapëri: “Naniaiguëri ira picábintsai cani, te ingábintsante iriro yamai. Yomianqueri irapimeraro irebetërinta iriro arosata”.³² Aro ibatorote icaimagantairi aisati iromeraro, icabëri: “Te pinganinate obiro. Picanquena: ‘Quero popimantina’, irooti nojogantaimiro ora pirebetëna. Nacábintsasantëmi, carari te pingábintsari irebetimi obiro arosata.”³³ Aisati ¿Caninataqueme pingábintsarime obiro ira irebetimi arosata, aisati pingantiname naro cara nacábintsëmi?”³⁴ Aro iguisanaca ipasatëri yomianqueri icanqueri: “Yamaica quero nomisotocajimi irooti cara popënabentajina antagaisati ira pirebetina”.³⁵ Aisa ocanta queroca picábintsairi ira cantaguetomoquimine te onganinate, queroca pijocajineri, querootisati icábintsaimi Pabati Jonogaguitequë.

19

Iáiguë Jesus aisati irogomere aiqero Joreaquë.
(Mr 10.1)

¹ Aroque icomantagueque Jesus cara Garireaquë. Aique yogagaiganaja Iriro aisati irogomere cara Joreaquë, canta antatinta Joriránquë. ² Aisati yoguiataiganakeri tojai matsiguenga. Aintasati tojai janaitaguetatsiri. Yoguijegajiri Jesus.

Jesus yogometocoqueri ira joquërone iina.
(Mt 5.31-32; Mr 10.2-12; Ir 16.18)

³ Aisati iátasitaiguëri Jesus bariseopague; icogabeca iraniantëmari irantacaquerime ora te onganinate. Yosamitaigapëri:

—¿Caninataquero irojocajiro iina sërari aítica pairorapagueraca ora te iranintocotiro?

⁴ Yotabitobëri Jesus:

—¿Teco pinibatapinintabetimaro Sanguenari? Jirai Tosorintsi yobetsiquëri ira sërari aisati tsinane. ⁵ Aisati icanque Tosorintsi:

Cara iráquero iina sërari, irojocanëri iriri aisati iniro, irágasantëro iina, intimacaquero casiriconiati. Coshoni iroquero iina, pitirooti inganquima paniro ibatsa.

⁶ Jirai inabitaca sërari aisati iina; yamai coshoni irogobaquima, intimaiguë inganquima paniro. Iniaiguëri Tosorintsi iriantti paniro ibatsa. Ipanirootitaiguëri. Iroero te onganinataguëte irojocobagajima. Querootisati ijocaguiri basini matsiguenga.

⁷ Aisati yosamitaigapëri bariseo:

—¿Aisonori? ¿Pairo isanguenabirique Moisés jirai?

Pisanguenatinero pijina pomero ora pijogantaimaro, aro ocaninati pijocajiro.

⁸ Icantagabaqueri Jesus:

—Te pinganinasëretague, aro icanquemi Moisés cara caninataque pijocajiro pijina. Carari te iranintacaguimi Tosorintsi pijocajiro. Icoquemi quero pijoquero.

⁹ Nacantaiguëmi Naro, aroca pijoquero pijina, aisati págae basini, aroque paguimintëmoro pijinasonori. Patiro aroca aguimintëmi, aro caninataque pijocajiro. Aisati ira agairone tsinane ora ijoque ojime aroque yaguimintacari ojime.

Icantocoqueri Jesus ira te iráque iina.

¹⁰ Aro icantaiguëri irogomere:

—Aique, queroca ocaninati ijocajiro iina, caninataque quero yáganti.

¹¹ Icanqueri Jesus:

—Tiguëti ongantima inguemiro antagaisati sërari oca nacantaiguëmica. Paniro inguemiquero ira yogometasanti Tosorintsi. ¹² Ainta ira te irágobinte iina. Aintasati basini ira yágaguitsoiti, quero pini iina. Aisati ainta te iraninte iráguero iina. Icoquini intimasitima arota inganquineri pairoraca ingocaqueri Tosorintsi. Aroca pinguianquero oca piquemaque, aro pinguengasëretëro.

Jesus yoguëneri janequipague ibaco.
(Mr 10.13-16; Ir 18.15-17)

¹³ Aique pamapëneri Jesus janequipague, ocantaigapëri:

—Poguineri pobaco notomipague, pomanocotiri Tosorintsi arota ingábintsari.

Icantagabaquero irogomere:

—Quero paseriguiri Atingomi.

¹⁴ Carari icanqueri Jesus:

—Quero picantiri. Nocoguini iribocasitaigapëna janequijegui. Igóiguë iriro intingomintina. Antagaisati icantaigari ibega ica intiomoquina cara itingomibintanti Tosorintsi.

¹⁵ Aro yoguëneri ibaco, yamanaque:

—Pabati, nanintini pingábintsaiqueri icaegui janequipague.

Aique iáque Jesus.

Jesos icamanaaqueri ira sērari casintasantachari.

(Mr 10.17-27; Ir 18.18-27)

¹⁶ Aro ipocasiqueri oboina sērari yosamitapēri:

—Ogomeantatsiri, picaninati. ¿Pairo caninatatsi nanganque naro arota nantimaque pērosati canta Jonogaguitequēnta?

¹⁷ Yotabitanēri Jesos:

—¿Pairo picantobiquina Naro caninari? Paniro ini caninari, Irianti Tosorintsi. Carari picoguica pijáte Jonogaguitequē, pingantiro omagaro ora isanguenaque Moisés.

¹⁸ Icanque oboina:

—Aiti tojai isanguenaque. ¿Pairo pininti nanganque?

Yotabitanēri Jesos:

—Quero póganti, quero pintiro tsinane cagaro pijina, quero picositanti, quero pit-soiguēgotari pomatsiguenga. ¹⁹ Pinguemisantiri piri aisati piniro quero pipēgatsatari; pinintiri pitimanamitane aisa ocanta cara pintinta obiati.

²⁰ Icanqueri sērari:

—Aroque naquemisanquero omagaro oca cara ninē janequi irooti yamai. ¿Paironibani nanganque basini?

²¹ Icanqueri Jesos:

—Pinintica iraniacaninatimi Tosorintsi, atsi pijáte pomimantiro antagaisati ora pasinta, pomaguetiri ira coguitiaguetacha omagaro opēnataga; aique imēmi Tosorintsi ora caninaro cara Jonogaguitequē. Cara pomimantēroca antagaisati, omana piguiatanēna Naro.

²² Cara iquemabecaro oca, iáque oboina yogasēretasantanaca irironta casintaguetasantacha, te iraninte imimantiro. ²³ Aro icantaiguēri irogomere Jesos:

—Aisonori nacantasantēmi: opomirintsitomocari casintaguetachari iriátē cara itingombintanti Tosorintsi. ²⁴ Nagatsitaimiro aitosati, opomirintsitomocari cameyo ingue otimijaniquē omoro quitsapi. Carari omomirintsitomotasantēmari casintachari iriátē cara iragáantanequē Tosorintsi.

²⁵ Iquemaiguēri irogomere iquenganeintasantaigacari, yosamitobaca:

—¿Aisonorico? ¿Pairo inganque matsiguenga cara irabisaicotajima?

²⁶ Jesos inetsaiguēri irogomerejogui, icantaiguēri:

—Quero icantiro matsiguenga, carari Irianti Tosorintsi inganquero antagaisati. Te omomirintsitomotimari Iriro.

Quero itsipiriaro quemisantatsiri ira aguiatēri Jesos.

(Mr 10.28-31; Ir 18.28-30)

²⁷ Aique icanqueri Peroro:

—Pinguengaiguena noreogui, tojai nocogasantaigui naguiataiganaquemi, iroro nojocagaguētanēro omagaro nasintaiga. ¿Pairo nágaigae aiquenta?

²⁸ Yotabitanēri Jesos:

—Nangantasantaiguēmi aisonori: aronta nopaniaca Jonogaguitequē nomatsiguen-gatapē, aiquenta nopocaje aisati iroraiquē quibatsi nagáantasantapē antagaisati. Cara nosobiaque nagáantomentoquē, obirojegui aguiataiguēna yamai, aisati pisobicaiguē pigáantomentoquē ocarati 12. Pigáantaiguēri joríojegui. ²⁹ Aroca piguiataiganaquina, quero pitsipiriaro. Aroca pijocaiganaquero pobangopague, pirentipague, pitsiropague, piri, piniro, pitomipague, piguebatsitipague, pairorapagueraca, quero pitsipiriaro. Aroca pijogobitanēnaro arosata piguiatēna, imaiquēmi Tosorintsi tojai. Aisati irágaiganaquemi cara Jonogaguitequē cara pintiomoqueri Tosorintsi pērosati. ³⁰ Ainta yamai tojai itingomipague yaca quibatsica, carari quero igáanti canta Jonogaguitequē cara panironta Atingomi. Aintasati yamai tojai itsipiriaiguē yaca, imaintaiguēri matsiguenga carari aiquenta imaiquēri Atingomi iromitocoiguēri cara igáanti Iriro. Icaranti yamai carari aiquenta irobaque.

20

Jesos icomantēgotēri merantachari obasiquē.

¹ Aisati basini icanque Jesos:

—Aisati nongomantaiguēmiro ati icanta Tosorintsi cara igáanti. Ainta casintaro irobasite. Oquētaguetanē iátasitamanēri sērariipague poeboroquē intarobacaatineri irobasitequē.

² Iniopēri iraequi cogati intarobacaatineri, icampēri: “Pintarobacaatina yamai irooti chopiniquē, aro nomaiguēmiri paniro quirequi ira jitacha tenario”. Icabēri: “Aro, caninataque”. Aique iáiguē itarobacaquineri irobasitequē. ³ Cara ijonogatapē paba, aisati iátaji casintaro obasi poeboroquē, iniaigapēri basini sobicaigatsi te intarobacaate.

⁴ Icampēri: “Pinintica pintarobacaatina yamai cara nobasitequē, nopēnabenquimi

caninasati”. Yotabitanëri, ⁵ “Aro”, aique iáque itarobacaquineri. Aisati catanga paba iátaji poeboroquë itarobacaataqueri basini. Aisati cara inëmatanë paba igáqueri basini intarobacaatineri. ⁶ Aisati pënibaque ochapinitanë iátaji. Iniopëri basini te irante. Yosamitapëri: “¿Pairo te pintarobacaabirite?” ⁷ Yotabitoberri: “Tenta pairi meratinane”. Icampëri casintaro: “Atsi pijáte pintarobacaatina aisati nobasitequë; pintsibatimari ira obataiguëmi”. ⁸ Cara ochapinitanë ira casintaro icanqueri ira omisantineri irobasite: “Popatotaiguëri iraegui tarobacaataiguëna nobasitequë, popënabentiri. Piguibatëri popënabentiri ira carantënguisti ipoque. Aique popënabenqueri basini irooti cara popënabentiri ira obapënguisti naarai coniamaniquë”. ⁹ Aro ipoque ira tarobacaatënguisti arosata, ipënabenqueri paniro tenario. ¹⁰ Aisa ocanta ipaiguëri ira parintënguicha catanga, aisati ira boquënguisti cara ijonogatapë paba. Aique icaimaiguëri iraegui parintënguicha coniamaniquë. Iquengaigabitaca iriro iripënabentëri tojai, carari ipënabentaiguëri paniro tenario aisati. ¹¹ Yágaigabaqueri iguirequite, iguisatsatëri ira tarobacaataqueri. ¹² Icantaguëri: “Ira carantënguisti itarobacaataiguë arosataanti, carari pipënabentaiguëri iriatiasati popaiguëna naro. Naanti niáigamanë cara oquëtaguetamanë, natarobacaatasantaiguë, icatsiringatasantë paba, tojai nomasobitaiguë. Caninataque náguëme basini quirequi”. ¹³ Paniro yotabitanë casintaro oba: “Nomatsiguenga, teni nomatobitimi. ¿Teco nangantimi naarai, ‘Nopënabenquemi paniro tenario’, picanquena, ‘Aro’? Aquengaigaca. ¹⁴ Yamai, páganëri pasiatu, pijáte. Nocoguini nopënabentaiguëri ira carantënguisti aisa inganquima pibiaca obiro. ¹⁵ ¿Teco onganinate nopasitacarico naguirequite? ¿Pigusaneinquinanico obiro aroquenta nacábintsaiguëri basini?” ¹⁶ Nongomantaiguëmi yaca quibatsica iraegui imaintaiguë imatsiguenga, iraguibataiguëri Tosorintsi cara Jonogaguitequë. Irari aguibataigacha yaca quibatsica ingarantaiguë canta. Aintanta tojai matsiguenga icantaigabitari Tosorintsi: “Pinguemisantina”, carari arosataanti ira quemisantaiguëri. Tojai quero iáti Jonogaguitequë.

Mabataque icanque Jesus: “Nangamaque, aisati nangabiritajima nantimaje”.

(Mr 10.32-34; Ir 18.31-34)

¹⁷ Aique iáguë Jesus aisati irogomere aiqero Jerosarenquë. Yáganëri casiriconiati irogomere, icomantaigairi:

¹⁸⁻¹⁹ —Yamai intsomaigue Jerosarenquë. Naro paniacha Jonogaguitequë, nomatsiguengatapë cara niboguë yaca quibatsica. Iroro cantënguicha cara Jerosarenquë iráguëna itingomipague saseriroti aisati iraegui ogomeantiro isanguenare Moisés. Ingantaiguëri ira Iromasati: “Páguiri Jesus, póguiরি tenta ingomeite”. Irisërontaiguëna, iripasataiguëna, iribëquëgotaiguëna corosiquë carari ongaraque maba cataguiteri nangabiritanaima nanganiatae.

Piátasiqueri Jesus iina Sebereo.

(Mr 10.35-45)

²⁰ Aique piátasiqueri Ira Jesus iina Sebereo, otsibatapari otomi, Joan aisati Santiago. Pobaticagueritotasipari ocampëri:

—Nocoguini pingábintsena.

²¹ Yosamitobëro:

—¿Pairo pininti?

Potabitapëri:

—Aiquenta, cara pigáantë pigáantanequë, nocoque irisobicomoquimi notomi, paniro pobacosonoriquë, ira basini pomatepacoquë. Iromitocotaiguemita cara pingingomibintanque.

²² Icabëro Jesus tsinane aisati otomi:

—Te pigóte pairoraca pomanaguina. Aiquenta natsipirique tojai. ¿Teco pintsorogue cara pitsipiriauquë obiro?

Yotabitanëri Santiago aisati Joan:

—Teni nontsorogue, nangantaiguëro naro.

²³ Aro icanqueri Jesus:

—Aisonori pitsipiriauquë, carari quero nopimiro cara pisobicomoquima aiquenta. Paniro Pabati përine pairiraca tsipaquinane Naro cara nagáantë.

²⁴ Iquemaiguëri basini irogomere icarati 10. Aro iguisaneintobiqueri ira Santiago aisati Joan, aroquenta icogabeca pitirooti irobataiguërima.

²⁵ Iriro cantënguicha Jesus icaimaiguëri irogomerejegui, icantaiguëri:

—Pigóiguë ira itingomipague basiniatsi matsiguenga cagari jorio yametaiga imerataigari imatsiguenga. ²⁶ Carari quero aisati picantaigari ibegaiga iriro. Pinintaiguëca piguibatima obiati, pomitocotaiguëri pomatsiguenga pingábintsaguetaiguëri, quero pimeratari. ²⁷ Pomitocotaiguëri pomatsiguenga pairoraca ininti. Pingantimari ibega iromerataga.

²⁸ Nopaniaca Jonogaguitequë, nomatsiguengatapë arota nomitocotaigueri matsiguenga, quero nimeratari. Aisati nipocasique nangamobitaiguëri antagaisati matsiguenga arota iragabaisicotajiri Tosorintsi cara inguemisantaiguëna Naro.

Jesos yogaguibegajiri pite comarajari.
(Mt 9.27-31; Mr 10.46-52; Ir 18.35-43)

²⁹ Cara yaretaiga Jesos aisati irogomere Jericóquë. Cara yogagaiganaca, yoguiataigana-
queri abatsiquë tojai matsiguenga. ³⁰ Ainta isobicaigasegui pite comarajari onamiquë
abatsi. Icomantaiguëri iriro:

—Coraque Jesos.

Aro icaibaitanë pitirooti:

—¡Natingomi, Obiro imatsiguenga David! ¡Pingantaneintëgotaiгуena!

³¹ Aro iguisatsataigabaqueri ira botoitaigacha icanqueri:

—¡Pomairetaigue!

Aiquero iáiguë icaimasantaiganaque:

—¡Natingomi, pingantaneintëgotina Obironta imatsiguenga David!

³² Iquemaigapëri Jesos, yaratingopë, icaimagantëri, icanqueri:

—¿Pairo picogaiguë nanganquemi?

³³ Yotabitaiguëri pitirooti:

—Natingomi, nanintaiguini piniacagajina.

³⁴ Aro icantaneintëgotaiгapëri Jesos, yotsagataiguëri iroquiquë. Aito cara inianai aisati.
Aro yoguiataiganaqueri ira Jesos.

21

Icanaque Jesos Jerosarénquë.

(Mr 11.1-11; Ir 19.28-40; Jn 12.12-19)

¹ Aro yaretaigacaro poeboro jitacha Betajajé Jesos aisati irogomerejgui. Pinë Betajajé
osobiquë oguitoja jitacha Olibos ora oguitoja catingasatiquë Jerosarén. Aro Jesos igáqueri
pite irogomere, ² icanqueri:

—Pijáigue catingasati poeboroquë. Cara, piniaquero tsinane boro otsatocotaga, otsi-
batari itiomijani. Pintaicotiro pomapéro yaca. ³ Aintaca matsiguenga irosomitobëmica:
“¿Pairo pitsaicobiritiro boro?” aro pinganëri: “Icoquironi Atingomi”. Aro inganquemi:
“Páganëro”.

⁴ Icanque Jesos negaca cara imoncaraquero ora isanguenatocoqueri jirai comantantat-
siri jitacha Sacarias. Isanguenaque:

⁵ Pingomantiri Jerosaresati: “Coraque Pitingomi. Iriro caninarisonori, quero iquenga
Iriati. Iqueicotanacari itiomijani boro”.

⁶ Aique iáque pite irogomere, ⁷ yamapëneri ira pite boro, antiasiporo aisati itiomijani.
Yoguëneri iguitsagarepague imiticaraqüë, aro iqueicotanacari Jesos. ⁸ Ainta inaigasegui
tojai matsiguenga yoguiaguëri Jesos. Yogaguetaiguëneri iguitsagarepague cara abatsiquë
arota iragaticanëro boro. Aisati yogaguetaiguëneri otiomijani otsego anchato aisa icanta
icantaigabaquineri itingomi. ⁹ Ibataiganaqueri tojai matsiguenga aisati yoguiataigana-
queri tojai. Icaimaiganaque:

—Ainta Agabaisaicoontatsiri, imatsiguenga David. Intsome antingomintobëmari.
Intsome aniacaninatobëri. Igáqueri Tosorintsi aroquenta iniacaninatëri Iriro. Caninari
Tosorintsi jonoquënintaberi.

¹⁰ Aro icanaque Jesos cara Jerosarénquë. Iquenganeintasantëgotobacari Jerosaresati,
yosaminatobagaiganaca:

—¿Pai ica?

¹¹ Yotabitaiguëri basini:

—Irianti Jesos Nasaresati. Ipaniaca toonquë cara Garireaquë. Iriro comantantatsiri Ira
igáque Tosorintsi.

Jesos ijocaigapëri ira pimantaguetatsiri cara oquibequë pongotsi irasi Tosorintsi.

(Mr 11.15-19; Ir 19.45-48; Jn 2.13-22)

¹² Aro icanaque Jesos cara oquibequë pongotsi irasi Tosorintsi, iguisaigapëri antagaisati
ira manantatsiri aisati ira pimantatsiri, ijocaigapëri sotoquë. Aisa icanqueri ira campiatiri
quirequi aisati ira pimantiri paroma; yotëatapëri imesanepague aisati irisobicomen-
topague. ¹³ Icantaguëri:

—Ocanti Sanguenari:

Icanque Tosorintsi: “Caninataque pomanocotaiguena yaca nobangoquë”.

Carari obirojegi te pomanocotiri, iroonti picositapinintaigabaqueri ira bocaigatsi iro-
manocotaigapëri Tosorintsi.

¹⁴ Aique ipocasitaiguëri Jesus tojai comarajari aisati tojai carancaratsirsi. Yoguibeigaibaqueri. ¹⁵ Cara iniaiguëri itingomi saserirotipague aisati ira ogomeantiro isanguenare Moisés, iguisaneintaiganaqueri Ira Jesus, aroquenta itasorintsitagueque Iriro. Aisati Iriro icaimëgotaiiguëri janequi cara oquibequë pongotsi, icantaiguë:

—¡Intsome antingomintaiguemari imatsiguenga David!

Aro iguisaneintasantaigaca saseriroti, icantaiguëri:

¹⁶ —¿Piquemaqueroco oca icantocotaiguëmi janequi? Te onganinate ijitaiguëmi Itingomi.

Yotabitanëri Jesus:

—Jee, naquemaiguëri. Teco pinibatiro Sanguenari ora cantatsi:

Intingomintaiguëmari Ira Quirisito janequi aisati tsorori janequi ira tsotatsi. Irinibacani-nataigabaqueri.

¹⁷ Aro iáiguë Jesus aisati irogomere, iáiganaque cara Betaniaquë cara isamaigapë. Ora Betania iroonti poeboro otiomijani.

Jesus yogasiguëriqueri iguera.

(Mr 11.12-14, 20-26)

¹⁸ Cara oquëtaguetanai ipigaigaa Jesus aisati irogomere aiqero Jerosarënuë. Cara abatsiquë itaseguë Jesus. ¹⁹ Cara onamiquë abatsi iniopëro panguirinti jitacha iguera. Iátasiquero. Icogabecaro ojito, carari te ine, iroonti osi. Icampë:

—Querota basini pinai ojito oca igueraca.

Aito cara pisiguiricanë iguera, ocamaque.

²⁰ Iniaiguëro irogomere, iquenganeintaigacaro, yosamitaiguëri Ira Jesus:

—¿Ati ocanca pisiguiricasitaca iguera omanapague?

²¹ Yotabitaiguëri Jesus:

—Nacantasantaiguëmini, aroca pinguemisanqueri Tosorintsi, pingantaiguëro aisa nacanta nacanquero iguera. Aisati pinganquerica Pabati: “Pigaganënaró oca oguitojaca, pijoquiro cara angaarequë”, aro inganquimiro. Carari quero pitsoingui. ²² Aisatica pinguemisanqueri, inganquimiro pairoraca pomanocoqueri.

Yosamitaiguëri Jesus joríojequi: “¿Pari agáquemi?”

(Mr 11.27-33; Ir 20.1-8)

²³ Aitosati icanaque Jesus cara oquibequë pongotsi irasi Tosorintsi. Iroontita yogomeantasegui, aro iátasitaiguëri itingomipague saseriroti aisati irapague ogomeantiro isanguenare Moisés, yosamitaiguëri:

—¿Pari agáquemi cara pijocaiguëri pimantaigatsirsi? ¿Pari uguëmi cara pijica itingomi?

²⁴ Yotabitaiguëri Jesus:

—Aisati Naro, patiro nosamitaiguëmi; aroca potabitaiguëna, aisati nongomantaiguëmi pari agáquena Naro. ²⁵ ¿Pari agáqueri Joan cara ibaotisatiguëri tojai omatsiguenga? ¿Iriroco agáqueri Tosorintsi? ¿Iracó agáqueri matsiguenga?

Icantobagaiganaca jorio:

—Anganquerica: “Igáqueri Tosorintsi”, aro ingancái: “¿Pari te pinguemisantobitaiguëri Joan?” ²⁶ Carari aroca anganqueri: “Igáqueri matsiguenga”, aro inguisaigacái omatsiguen-gapague ijitaiguënta cara igáqueri Joan Tosorintsi cara ingomantagueque.

²⁷ Aro yotabitaiguëri:

—Teni nogóigue pari agáqueri.

Icanqueri Jesus:

—Aisati Naro, quero nocomantimi pairiraca agáquena nangantagueté ocapague pini-aiguëca.

Ira saserirotipague aisati icantari ibega oboina te iriátsatiri iriri.

²⁸ Aisati icantaiguëri Jesus:

—Yamai nongomantaiguëmiro quingabaguirentsi: ainta sërari aisati piteni itomi. Igáqueri itomi obatatsi: “Notomi, pijáte yamai pintarobacaate cara obasiquë”.

²⁹ Yotabitanëri: “Quero nantiro”, carari iquianca, aique iáque itarobacaapë. ³⁰ Aisati igáqueri basini itomi: “Notomi, pijáte yamai pinte cara obasiquë”. Yotabitanëri: “Aro, Apa, najáque”. Carari te iriátsatiri. ³¹ Yamai nosamitaiguëmi: ¿Pari antasantëneri iriri ora icocaqueri?

Yotabitaiguëri:

—Ira obatatsi, aroquenta itarobacaaque obasiquë.

Aro icantaiguëri Jesus:

—Nangantasantaiguëmini oca: irobataiguëmi iriáiguë Jonogaguetequë ira coigotantatsi quirequi aisati ora antapinintaguetiri sërari cagari ojime. ³² Ipoque Joan baotisantatsirsi, icomantapëmi ati pingantaiguëma cara pinganinataiguë, carari te pinguemisantobëri.

Irianti quemisantaiguëri ira coigotantineri Iromasati piguirequite, aisati oquemisanqueri tsinanepague antaguetaguëri sërari çagari ojime. Icantaigaa yacaqueroca cara iriáiguë Jonogaguitequë, carari te pomasiniatiitima obiro, te piganinataiguema, quero piáti jonoquë.

Jesos icomantëgotëri ira omisantiro obasi.

(Mr 12.1-12; Ir 20.9-19)

³³ Aisati icantaiguëri Jesos:

—Aiti basini nosiacagantëmiro: pingumaigabaquero. Ainta sërari panguiquero obasi. Yotanquero. Aisati iquiaque omoro cara iragaticaguitëro oguitso aisati ora irágantëmaro oja. Aisati yobetsiquëro pongotsi oquibiantsa jonoquë ora iranetsantimaro. Aro yogaiguëri omisantineri irobasite, aique iáque jaanta basiniquë quibatsi. ³⁴ Cara omoncaraca cataguëteri cara oragatanë oiguo, igátabecari iromeraro: “Pijáigue, pingampëri ira omisantinaro nobasite imagantaiguenaro nasiati”. Aro iáigabitaca. ³⁵ Carari ira omisantiro iniaigabaquëri, yágaigabaquëri. Paniro ipasataiguëri, basini yogamagaiguëri, basini ibasegaiguëri mopëquë yoguipigabitacari. ³⁶ Ira casintaro igátaigabitacari basini iromeraro tojai. Aitosati icantaigabaquëri. ³⁷ Aique iquengasëretaca ira casintaro: “Yamai nagáquëri notomi. Iranianinataigabaquëri iriro”. Aro igáquëri itomi. ³⁸ Irari omisantineri irobasite inioberí itomi inibatobaganaca: “Coraque itomi casintaro. Cara ingamaquenica iriri, iriroquerai ágairone obasi. Intsome ógaigabaquëri, águero obasi asintaigaimaro eiroquerai”. ³⁹ Aro yágaigabaquëri, yáganëri sotoquë obasi, yogamagaigabaquëri. ⁴⁰ Cara iribocapë ira casintaro obasi, ¿Pairo inganqueri iraequi omisantaiguëri?

⁴¹ Yotabitaiguëri saseriroti:

—Cara iriboque, irágaigapëri ira catsimari omisantatsiri, iratsipiriacaquëri, irógaigapëri. Aique irogaiguëri basini omisantineri irobasite, irianti caninari, ira pagantirine iraisati oja oba.

⁴² Aro icantaiguëri Jesos:

—Teco pinibataiguero ora Sanguenari ocanti:

Jirai itsoingaguëro mopë ira obetsiquirori mopëpongo, ijoquero tenta irogóguero cara icoiguëro Tosorintsi iroonti otingomi mopë, otingomi pongotsi, cantaca otिंगomipoa. Carari yágaio ora mopë, itingomiantacaro pongotsi. Icaninabenquero Atíngomi, iniacaninatëro, icantacagajiri matsiguenga cara irogajiro otingomi mopë. Aisati naquenganeintasantëro naroequi.

⁴³ Iroro nocomantaguëtaiguëmi: quero piniaiguëri Tosorintsi cara igáanti. Irianti jáguënguitsine Irirorquë basiniati matsiguenga ira quemisanquerine intingomintaiguëmari Tosorintsi. ⁴⁴ Pairiraca pariaquenguitsine yaca mopëca iricarapë itonguiquë; pairiraca otsinaque oca mopëca onganqueri cantaca pibega pojongabatsari. Naanti osigarora ora mopë otingomi nacantocotaiguëmiro; quero ca pigótina, pitsipiriaque; quero ca piquemisantina, pijáque Sharincabeniquë. Pairiraca comëtobëne iripoguirianguëngani.

⁴⁵ Aro iquemaigabaquëri Ira Jesos itingomi saseriroti aisati ira ogomeantiro Sanguenari, igóguë cara Jesos iquenguisatocotaiguëri irirojegu. ⁴⁶ Iguisanaintaigabitacari, icogaigabitaca irácagantëtime, carari yomitsorogaiguëri matsiguenga igóguënta matsiguenga cara aisonori Jesos icomantëgotëri Tosorintsi.

22

Jesos icomantëgotëri ira cajemaiguëri imatsiguenga cara irágantë itomi.

(Ir 14.15-24)

¹ Aisati icanque Jesos oca quingabaguirentsica.

²—Nongomantaiguëmi ati ocanta cara itingomibintanti Tosorintsi. Ainta itingomi yobetsiquëneri itomi cara iráquero iina. Icaimaiguëri tojai matsiguenga. ³ Igátabecari iromeraro, icaimagantaigabitacari igaimanejegu, carari te iribocague. ⁴ Aisati igátabetajari basini iromeraro icantaiguëri: “Pingantiri nagaimane: ‘Aroque pobetsicaca antagaisati. Yógaiguëri ibaacate aisati iroishate aneri. Popogopë pinganinasëretapapë’”. ⁵ Carari te ingumaigabaquëri. Iáguë atiraca. Iáque paniro cara iritoganequë, iáque basini cara imimantagueantë. ⁶ Ainta basini ágobëri iragátane icantaigabaquëri catsimari. Aisati yogamagaigabaquëri basini iragátane. ⁷ Cara igóque itingomi, iguisanaca, igátaiguëri isoraro-teegui iboeborotequë. Yogamagaigapëri ira igaimane, aique itagaigapëro ibangopague. ⁸ Aique icanqueri iromeraro itingomi: “Aroque nobetsiquë omagaro, carari te ingomeite nagaimanejegu, te iriboque. ⁹ Pijáigue cara abatsipaguequë, pingaimiri matsiguengajegu, pingantiri: ‘Pijáigue ibangoquë atingomi, pinganinasëretëgotineri itomi águënguitsine iina’”. ¹⁰ Aique iáguë iromerarpague, icaimaguequëri imatsiguengajegu. Yapatoitaigaca tojai, caninari aisati ira te inganinate. Iagaigaparo pongotsi. ¹¹ Aro iáque itingomi cara

irobetsataiguë mari ira bocaigatsi. Iniopëri paniro sërari ira te ingue caninaro iguitsagare. ¹² Yosamitapëri: “Nomatsiguenga, nopaguetaiguëri nagaimane caninaro quitsagarintsipague arota pinguitsagatima caninasati. ¿Pairo te pinguitsagabiritima obiro?” Te irotopitiri. ¹³ Aro icanqueri iromeraro: “Piguëshotiri ibacoquë aisati iguitiquë, pomisotoguiro sotoquë cara tsitiniriquë. Cara, iraraquma aisati iratsitsiaguitetanë”. ¹⁴ Pinguemina: ainta tojai icaimaigabita Tosorintsi carari te inguemisantiri; arosataanti ira icoigaigüë.

Yogomequeri bariseo Jesus cara inganquineri itingomi ora icoicoqueri.

(Mr 12.13-17; Ir 20.19-26)

¹⁵ Aique iáiguë bariseoegui, yosamitobagaigaca:

—¿Pairo anganqueri Ira Jesus aniantimari? Aroca angantacaqueri ora te onganinate, aro cara anguisëri.

¹⁶ Aro igátaiguëri irogomere aisati ira aguiataiguiri Eroris. Iáiguë icantaigapëri Ira Jesus:

—Ogomeantatsiri, nigóiguë aisonori pogomeantiro Irinibare Tosorintsi, aisati poniaguinaro catingasati atiraca ongantima naretaiguë mari Tosorintsi. Te pintsoroguiro pairiraca. ¹⁷ Yamai pingomantina pairoraca piquianca Obiro: ¿Caninataqueco omëri Sésar aguireguite? ¿Teco onganinate omagantëri cobeingari cara Iromaquë?

¹⁸ Igóque Jesus cara icogaigabita iromatobitirime, irantacaguiri ora te ongomeite. Yosamitaigabaqueri:

—¿Pairo picogobiti pomatobitina? Te pinganinate. ¹⁹ Poniaguinari quirequi ira pipënantiriri Iromasati.

Aro yamaigapëneri quirequi, ira jitacha tenario.

²⁰ Yosamitëri Jesus:

—¿Pairo casintaro oca irosiacagomentoca? ¿Pairo ijita sanguenatëgotënguicha yaca tenario-oca, iroonti iripajiro?

²¹ Yotabitanëri:

—Iroonti irasi Sésar nogobeingarite.

—Icantaiguëri Jesus:

—Aro, pomaiguëri Sésar ira icoicoquem, aisati pomaiguëri Tosorintsi ora iraisati, ora icocaquem iroso.

²² Iquemaiguëri, iquenganeintasantaiganaca. Aique iáiguë, ijocaiganaqueri.

Icantaiguëri saroseo Jesus: “Aisonori angabiritajima”.

(Mr 12.18-27; Ir 20.27-40)

²³ Irooti cataguiteri iátasitaiguëri Jesus saroseopague, ira ijitasitaiga cara quero icabiritajia igamagaegui. Aro yosamitaigapëri:

²⁴ —Ogomeantatsiri, jirai isanguenaque Moisés:

Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguëma itomi ireintitomaco.

²⁵ Jirai ainta naroequiquë poro sërari, aisati ireinti icarati 6. Yágabitaro iina, carari te irine itomi. Aique icamaque iriro. Aro iina yágairo ireinti. ²⁶ Aisati icamaque iriro, te irine itomi. Aisati icantaigaca ireintiegui yágaigabitaro tsinane icamaiguë omagaro, teni irinëmate itomi. ²⁷ Aique ocamaque tsinane aisati. ²⁸ Cara ingabiritajima, ¿Pairo ágairone? Pinetse, ijinantaigabitaro antagaisati ireintiegui.

²⁹ Aro yotabitanëri Jesus:

—Tojai pamatobitaigaca obiatiegui tenta pigóiguero Sanguenari, teatisati pigóiguero itasorintsite irasi Tosorintsi. ³⁰ Aisonori cara angabiritajima, antimaigae, quero ágai ajina. Antagaisati ira cabiritajachane ingantaiguë mari ibega ironomire Tosorintsi: quero yágai iina. ³¹ Ingabiritajima omagaro camaigatsiri. ¿Teco pinibatiro ora icanti Tosorintsi jirai? Icanque:

³² Naro Tosorintsi. Iquemisantina Abaram. Iquemisantina Isac. Iquemisantina Jacob.

Te ingante: “Iquemisantabequina”. Aroca iquemisanquerini Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi.

³³ Cara iquemaigabaqueri tojai matsiguenga, iquenganeintaigaca. Icanque:

—Caninasati yogomeanti Jesus.

Icomantëgotëro Jesus ora obatasti ora icocaqueri Tosorintsi.

(Mr 12.28-34)

³⁴ Ira bariseo iquemocotaiguëri saroseo, cara caninasati yotabitaiganaqueri saroseopague Jesus yoguimairenqueri. Iroso itorogaiganaque saroseo cara iraniaitaiguë mari aisati. Aro ipocasitaiguëri Jesus bariseopague. ³⁵ Icoigaigabita

iramasitacaguimarime Jesus irinibarequë. Ainta paniro bariseo ogameantiro Sanguenari, yosamitëri iriro:

³⁶ —Ogameantatsiri, aiti tojai pogometaguequina Sanguenari. ¿Pairo obatatsi ora anguemisanque?

³⁷ Yotabitanëri Jesus:

—Pinintasantiri Atingomi, Irironta Pitosorintsite pomasëretasantimari obiati, përosati pinguenqueri, pinguemisantasantiri.

³⁸ Ocari oca iroro obatatsi cara Sanguenariquë. ³⁹ Ora otsibata, ocanti negaca:

Pinintiri pitimanamitane pibega cara pininta obiati.

⁴⁰ Aroca pingantaiguëro oca, aro pomoncarataiguëro antagaisati isanguenare Moisés aisati omagaro isanguenataiguë comantantatsiripague.

Quirisito imatsiguenga David.

(Mr 12.35-37; Ir 20.41-44)

⁴¹ Cara përosati yapatoitaigasega bariseopague, yosamitaiguëri Jesus:

⁴² —¿Pairo piquengasëretëgotacari Quirisito? ¿Pairo imatsiguengataca?

Yotabitaiganaqueri bariseo:

—Iriro matsiguengatacari David.

⁴³ Icantaiguëri Jesus:

—Jirai Isëre Tosorintsi osanguenatacaqueri ira David; ijiqueri Quirisito “Natingomi”. Isanguenaque David:

⁴⁴ Ira Tosorintsi icanqueri Natingomi: “Pisobigue yaca nobacosonoriquëca. Pintsibatina nagáantomentoquë irooti cara nagabeiri antagaisati ira quisaiguëmi, irajitaiguëmi Itingomi”.

⁴⁵ Iriroca Quirisito Itingomi David, ¿Pairo pijitobitaiguëri Iriro imatsiguenga David? ¿Pairo te pijitobitaiguëri Pitingomi obirojegui aisati?

⁴⁶ Aro Jesus yoguimairentasantaiguëri bariseo irooti cara te pairi otabitirine. Itsorogaiganaque aro te irosomitaigairi aisati.

23

Jesus yogometaiguëri matsiguenga ati icantaiga ira ogameantiro Sanguenari aisati bariseoegui.

(Mr 12.38-39; Ir 11.42-46; 20.45-46)

¹ Aigue icantaiguëri Jesus ira imatsiguengajegui aisati ira irogomere.

² —Iraegui ogameantiro Sanguenari aisati ira bariseoegui ijitasitaigabita aisati ican-taigari Moisés: yogomeantagueero isanguenare Moisés. ³ Caninataque pingantaiguero ora yogometaiguëmi, carari quero poguiatiri aroquenta icantasiaigacaro irinibare, tenta ingantiro iriati ora icomantaigabitëmira. ⁴ Tojai yobomirintsitaiguëmi cara picanquero ora yogometaiguëmi, carari te iromitocotëmatimi iriati. ⁵ Antagaisati icanaguei iriro, icantasiaigaro arota iraniacaninataiguëri imatsiguenga. Yogasitaro arosata Sanguenari cara ichotaiquë aisati ibacoquë. Aisati yobetsicasitaigacaro oquibesonori ogarasiquë iguitsagarepague arota iraniacaninataiguëri matsiguenga, ingantocotaiguëri: “Caninari bariseo aisati ira ogameantiro isanguenare Moisés, iquemisantasantaiguëro”. ⁶ Aisati cara yapaigui icogasantaiguë intsibataiguëmari itingomipague, aisati cara yapatotaiga jorío icogasanti irisobicomanto caninaro. ⁷ Icogasantaiguë irobetsataiguemari matsiguenga-jegui cara opimantagani pairoraca, irobetsataiguemari: “Ogometinari”. ⁸ Carari obiro, quero picantari. Quero picogui irajitimi “Ogometinari”, panironta ogometimiri, Naanti. Aisati picantobagaiga, pijitobagaiganaca: “Nopiguemisantane”. ⁹ Aisati yaca quibatsica, quero pijitasitari piri pairiraca, panironta Piri ini cara Jonogaguetequë. ¹⁰ Querootisati pinintacaguiri irajitimi “Natingomi”, panironta Pitingomi, Irianti Quirisito. ¹¹ Pingoqueca pintingomintima, aro caninataque pobatacaguiri ira basinipague, pomitocotaiguëri iriro. ¹² Pairiraca quingachane caninari, irajiquima obatatsi, aro Tosorintsi iraguipagui-itëri, inganqueri carantatsiri. Aisati ira carantatsi, inganqueri obatacagantatsiri cara inguemisantasantëri imatsiguenga.

Jesus isintsitsataiguëri ira ogameantiro isanguenare Moisés aisati bariseo.

(Mr 12.40; Ir 11.37-48; 20.47)

¹³ Icantaiguëri Jesus:

—Obirojegui ogameantiro Sanguenari aisati obirojegui bariseo, tojai ingasitigataiguëmi Tosorintsi tenta pinintacaguiri pairiraca iraretima cara iragáantanequë Tosorintsi, teati-sati pijáigue obiro. ¹⁴ Tojai pamatobianti. Aisati tojai ingasitigataiguëmi Tosorintsi aro-quenta págabitsaquero obango ogamaimentaga iroontita pamanocotasantatsitari Tosorintsi

arota iraniacaninataiguemi pomatsiguenga. Tojai iratsipiriacaiguemi. ¹⁵ Tojai ingasitígataiguemi. Popomirintsibentaigari basini, pogometaguetaiguëri cara iromatobiantê aisa ingantaiguemi pibega obiro. Yabisanaguemi iriro. Pamanocotasitaigari Tosorintsi obiro, carari te pingantiro caninaro; aisati yamanocotasantasitaigari pogomere, teatisati ingantiro caninaro. Aisa icantimi, icanquero ora iriátanquima Sharincabeniquê. ¹⁶ Ingasitígataiguëmi obirojegui. Aisa pingantimari ibega comarajari oniagasitari imatsiguenga comarajari negaraca pini abatsi. Picantasitaro: “Aroca inganque poro, ‘Iroontita pinê ibango Tosorintsi, pigóontimaro quero namatobitimi’, aro caninasati yamatobiantê. Carari aroca inganque, ‘Iroontita inê oro cara ibangoquê Tosorintsi, pigóontimaro quero namatobitimi’, aro aisonori iromnacaraquero irinibare”. ¹⁷ ¿Pairo picantobitaiga negaca? Te pininte pigóigue ora caninari. Ora ibango Tosorintsi ocaninatasanti, aisati ira oro caninari aroquenta poganinatêri ibango Tosorintsi. ¹⁸ Aisati picantasitaro: “Aroca inganque matsiguenga, ‘Iroontita pinê cara atagantêneri Tosorintsi obira, pigóontimaro quero namatobitimi’, aro caninasati yamatobiantê. Carari aroca inganque, ‘Cara ini obira omapêneri Tosorintsi arota ataquineri, aro pigóontimaro quero namatobitimi’, aro aisonori imoncaraquero irinibare”. ¹⁹ ¿Pairo picantobitaiga negaca? Te pininte pigóigue ora caninaro. Ocaninatasanti ora atagantêneri Tosorintsi ibatsa obira. Aisati icaninati ibatsa aroquenta poganinatêri ora atagantineri. ²⁰⁻²² Pinetsaiguê. Tojai picantaiguê: “¿Teco ine atagantineri Tosorintsi aisati ora inatsi jonoica?” “¿Teco ine ibango Tosorintsi aisati Irro tsomaguira?” “¿Teco ine Jonogaguête aisati Irro sobicatsi cara iragáantementoquê?” Picantasitaro pairo-rapagueraca pijitasita caninataque pomatobitaiguêri pomatsiguenga. Pijitasita ¿Teco intime Tosorintsi? Aisonori itimi, igóque ora picantaguêti, ingasitígataiguëmi. ²³ Obirojegui ogomeantiro isanguenare Moisés aisati obirojegui bariseo, ingasitígataiguëmi Tosorintsi pamatobiantinta. Pinetsa: picantaguetaigabitacari. Aroca páguê quirequi 10, aro pomabaqueri paniro irasi Tosorintsi. Aroca páguê 10 osi pobanguirepague, aro pomabitêmaro patiro osi. Carari te pinguengaiguero ora icocagasantaigabitimi Tosorintsi: icogabeca pintimeme caninasati, icogabeca pingantaneintêgotirime pomatsiguenga pingábintserime, icogabeca pinguemisantrime aisati pomoncaratirime pinibare. Caninataqueme pingantaiguêrome antagaisati ocapague; aique aroca páguê pairoraca ocarati 10, patiro pomêri Tosorintsi. ²⁴ Te pigótêmataigue, carari picogabeca pogometaguêrime matsiguenga Irinibare Tosorintsi. Aisonori tojai popomirintsitasantabitacaro ora cagaro icocaquimi Tosorintsi, iroro cantênguicha te pinguengatêmataiguêri ora icocagabequimi. ²⁵ Ingasitígataiguëmi obirojegui Tosorintsi tojainta pamatobianti. Piquibasantêro pitasane otisitaquê, carari te pinguibatetiro tsomagutinina; cara osititêti. Aisa picanta obiro, poganinatasita arota iraniacaninataiguemi matsiguenga, carari te piganinasêretima pisêrequê. Pêrosati picositanti aisati pamatobianti. ²⁶ Te pigóigue. Aisati picantari ira te iranee. Obit-sita quibatequerone tsomaguête, aique quero oquebatsitaji otisitaquê. Aroca pigainasêretêma, aro iraniacaninatêmi aisonori matsiguenga. ²⁷ Obirojegui, bariseo aisati ogomeantiro isanguenare Moisés, ingasitígataiguëmi Tosorintsi pamatobiantinta. Aisati picantaro yogantari camatsirini, ibotsotiro catari. Ocaninatabitaca sotoquêranti carari tsomagui quimungaro isititi, jagaca itonguiporoqui. ²⁸ Iniacaninatabitacaro matsiguenga ora picantaguêti carari te piganinasêrete: tojai pamatobianti aisati tojai pintapinintiro ora te ongomeite. ²⁹⁻³⁰ Ingasitígataiguëmi Tosorintsi tojainta pamatobianti obirojegui. Jiraisonori pomatsiguenga ógaiguêri ira comantabitari Irinibare Tosorintsi, Ira caninari. Yamai pobetsicaiguêro pongotsipague pinguengantêmaro comantantsiri. Aisati picantasitaiga obirojegui: “Nantimeme naati jirai, quero nóguirime, quero nacantarime nomatsiguenga óguêri”. ³¹ Picanque: “Nomatsiguengatacari jirainisati”. Aisonori picantaiguê, irootisatinta pintaiguê cantacha irasi jirainisati. ³² Aisati posigari pomatsiguenga jirai, obirojegui óguêri aisati. Ora iparintaca jirai, picantaiguê obiro yamai. ³³ Picantaigari marangue; pamasiqueri ira basini. Picantaguetasanoti tojaipague ora te organinate, te piganinatêmataigue. ¿Pijiquêro quero piáiguê Sharincabeniquê? Aisonori pijáiguê canta.

Icomantêri Jesus: “Ingasitígataiguëmi Tosorintsi”.

(Ir 11.49-54; 13.34-35)

³⁴ Pêrosati icanque Jesus:

—Aiquenta nagáquemiri basini comantantatsiri, ogótsisiri, aisati ogomeantirone Irinibare Tosorintsi. Nigótaiguëmi, ainta ira pógagantaiguê, basini popêcotaiguêri, popasataiguêri basini cara papatotaiga, aisati pinguisaiguêri basini negaraca iriátagueque. ³⁵ Ainta picantaguêti, picogaiguinta pigamagaiguêri antagaisati caninatatsiri. Jirai póguêri Abel, aisati basini tojai. Aisati pogamaguêri Sacarías, itomi Berequías, iroontita iquemisan-tacagabecari imatsiguenga cara ibangoquê Tosorintsi. Pintimaigueme obirojegui jirai,

aisati póguerime. Pasi poguiro póganti. ³⁶ Aro Tosorintsi ingasítigatèri omagaro ira cogaiatsi iróguiri basini. Aisati ingasítigatèmi obirojequinta ógueri. ³⁷ Joo, obiro Jerosaresati. Tojai pógapinintiri ira quinguitsatocotaiguimiri Tosorintsi, aisati pobasiaqueri mopèquè ira igáquemi. Aisa ocanta tiapa omisantiri ojaniquite itiomijani, ocábintsaiguèri, aisati nocogabeca Naro nangantimaro, nangábintsaiguemime, carari te pinintaigue pinguemisan-tobèna. ³⁸ Pijitasaiga Jerosarén caninaro, carari nojocanèmi Naro, aisati irojocanèmi Pa-bati Tosorintsi quero inomotajimi. ³⁹ Quero piniaigaina aisati irooti cara piniaigabaquina nopocaje aisati nantingomibintaigapèmi, pingantocotaigabaquena: “Coraque Ira igáque Atingomi. Icaninatasanti Irirò”.

24

Icanque Jesus: “Aiquenta irogomeriguètèro ibango Tosorintsi”.
(Mr 13.1-4; Ir 21.5-7)

¹ Aique isotocanè Jesus cara ibangoquè Tosorintsi, iáque. Ipocasaiguèri irogomere, ijigotaiguèneri ibango Tosorintsi aisati pongotsipague otsibataro. ² Aro icantaiguèri Jesus: —¿Pinaigabitacaro ora pongotsipague? Aisonori nongomantèmi oca: aiquenta irogomeriguètèro antagaisati. Irogaguetajiro. Quero pini yaca pite mopè otsibatobagaa.

³ Aique iáiguè itonganaque oguitojaquè jitacha Olibos. Isobigopè Jesus. Aro comanonori yosamitaigapèri irogomere:

—Pingomantina: ¿Ati ongantima cara irogomeriguètèro orapague pongotsi? ¿Pairo ogótacaquinane ati ongantima cara popogopae? ¿Ati ongantima omoncaraquima anta-gaisati oca picantaiguèna?

Icomantaiguèri Jesus: “Aiquenta iribocaiguè tojai matobiantatsiri”.
(Mr 13.5-8; Ir 21.8-11)

⁴ Aique yotabitanèri Jesus: —Arotasha pine quero yamatobitimi. ⁵ Iribocaiguè tojai, ingampè: “Naro Quirisito”. Iromatobitaigapèri tojai matsiguenga. ⁶ Pinguemopiantèrota inganque: “Yomanátobacani canta”. Inganque basini: “Aiquenta iromanátobaguima canta jaanta”. Carari quero pogasèreta: tojai irógobaquima, carari queroquerai omoncarata omagaro nacantaiganaquemi. ⁷ Aiquenta inganquima matsiguenga inguisaiganaqueri basiniati matsiguenga, inguisègotobagaiguèma irógobaquima. Aitosati iritasegaiguè tojaisonori matsiguenga. Aisati ontojaiganaque janatigantsipague. Tojai osebataguetanèma omagaroguitequè quibatsi. Iratsipiriaiguè matsiguengapague, ⁸ iroro cantènguicha queroquerai yobomirintsasantiri matsiguengajegui. Aiquenta coraque agabenisonori.

Tojai inguisaguetèri quemisantatsiri.
(Mt 10.17-22; Mr 13.9-13; Ir 21.12-19)

⁹ Aisati icomantaiguèri irogomere Jesus: —Aroca irogóiguè matsiguenga piquemisantaiguèna, ingantobitaiguèmiro catsimari, irógarantaiganaquemi, inguisaiganaquemi antagaisati matsiguenga. ¹⁰ Ainta tojai irojocajiro cara iquemisantabeca, aique inguisaiguèri ira quemisantatsirisonori, irácagantaiguèri. ¹¹ Ingonijapè tsoengantatsiri, ingantaigabitèma: “Nanguemisantacagaiguèmi”, carari iromatobitaiguèri antagaisati quemisantabetachari. ¹² Tojai ingantaguequero te ongomeite, aisati tojai irojocajiro cara nintobagaigaca. ¹³ Carari nagabisaicotajiri antagaisati ira quemisantaiguènanane pèrosati. ¹⁴ Pijátagueque antagaisatiquè quibatsi, pingomantaiguèri omagaro matsiguenga oca Caninaro Nibarintsica, cara nocogui intingom-intaiguena; aique omoncaraquima antagaisati oca nacantaiguèmica.

Aisati icanque Jesus: “Aiquenta imomirintsitaiguè Joreasati”.
(Mr 13.14-18; Ir 21.20-24)

¹⁵ Aisati icomantanque Jesus: —Jirai isanquenaque comantantsiri jitacha Daniel: Aiquenta ingapè cara ibangoquè Tosorintsi ira quimingarisonori cantaguetasantatsi ora te ongomeite, iraguimingatèro antagaisati.

Pigóiguero Sanguenari. Cara piniaiguèrica ira nocomantègoti yamaica inganaque iban-goquè Tosorintsi, ¹⁶ aroca pitimi cara Jerosarénquè pisigaiganaquima otisipaguequè. ¹⁷ Aintabica obiro jonoquè pobango, quero piápanènti tsomagui págapanèntiro ora pasinta; iroonti pisigasantanèma. ¹⁸ Aroca pinè pitoganequè, quero pipigasitapanaantaro basini piguitsagare. ¹⁹ Tojai otsipiriaiganaquero tsinane ora pèribatatsi aisati ora tsotagatsi ojaniquite queronta pisigasantanaca. ²⁰ Pomancotiri Tosorintsi arota quero pisigaiga catagüiteriquè omarigantetetica angani, querootisati cara sábaroquè cara pamagoriaigui.

Icanque Jesus: "Tojai iratsipiriaiguë antagaisati ira timaiganaquenguitsine".

(Mr 13.19-23; Ir 17.22-24)

²¹ Aitosati icanë Jesus:

—Aique tojai iratsipiriasantaiguë matsiguenga. Iratsipiriasanoiguë abisëro ora it-sipiriaiguë matsiguenga jiraisonori irooti yamaica, aisati abisëro omagaro inanënguitsine aiquenta. ²² Aroca ongosamanitanëma cara iratsipiriasanoiguë opoguiriaiguëri omagaro matsiguenga ingamaque, carari Tosorintsi ingábintsaiguëri antagaisati quemisanqueri iraugui icoiguë, arota quero ocosamaniti atsipiriagantsi. ²³ Aintaca paniro cantatsi: "Iriro Quirisito Ica", quero piquemisantiri. Aisati inganquemica: "Intsome canta Quirisitoquë", querootisati poguiatiri. ²⁴ Coraque iribocapë tojai matobiantatsiri ingampëmi: "Naro Quirisito". Aisati iribocapë basini inganque: "Naro comantëmirine Tosorintsi". Tojai iritosongantë, ingoque iromatobitaiguëri tojai matsiguenga, carari quero yamatobitiri ira quemisantantatsi ira icoiguë Tosorintsi. ²⁵ Piquemaquena yamai nocomantaiguëmi atiraca ongantima aiquenta queroquerai ini. ²⁶ Aroca inganquemi: "Ainta Quirisito cara tera ontimingani", quero piquemisantiri. Aitosati, aroca inganque: "Ainta tsomagui pongotsi", quero piquemisantiri. ²⁷ Nopaniaca Jonogaguitequë, nomatsiguengatapë. Cara omabocapái tegotsitanatsi moretatsiri, osangueguitetanëro omagaro jonoquë, aisa nangampaima Naro cara nopogopae quibatsica. Nomabocaigapairi, carari iraniaigabaquina antagaisati. ²⁸ Atiraca ini igamaga, aito cara imarigasipëri tisoegui. Aisa ocanta tojainta itsoinganti joríojegui, iroro iribocasitaguëtaiguëri tojai matobiantatsiri.

Ati ingampaima cara iribocapae Jesus aiquenta.

(Mr 13.24-27; Ir 21.25-28)

²⁹ Aisati icomantaiguëri irogomere Jesus:

—Aro tojai iratsipiriasantaiguë antagaisati matsiguenga, omomirintsitomotaiguëri. Cara abisanaque atsipiriagantsi, aique intsitinitanë paba, aisati quero iconijaguitetanaí manchacori. Aitosati imariaguepë jonogasati, aisati osebatanëma omagaro jonoquë. ³⁰ Aique nongonijapë Naro cara jonoquë, iragasëretocotaigabaquina antagaisati tsoengatsiri. Iraniaigabaquina cara nopogopë mingoriquë. Nosangueguitetaigapëri nongobeingatasantapë nagáantaiguëri omagaro Naro paniacha Jonogaguitequë, nomatsiguengatapë. ³¹ Aisati nagátaigapëri nonamireegui intibotë catsiguesonori irapatoitaiguëri antagaisati quemisantaiguëna iraugui igoigane Tosorintsi atiraca itimagueti quibatsiquë.

Yosiacagantaiguëneri iguera Jesus.

(Mr 13.28-31; Ir 21.29-33)

³² Aisati icantaiguëri irogomere Jesus:

—Yamai nosiacagantaiguëmiro anchato jitacha iguera: pinguengasantiro. Cara iroraini otsego, ositanae osi, aro pigóiguë pënibaque osariganaje. ³³ Aisa ocanta, cara piniaigabaquero oca nacantaiguëmica yamai, pigóiguë pënibaque orequima cataguitერიquë cara nopogopae. ³⁴ Nanganquemi aisonori: queroquerai icamaigu joríojegui tsoengatsiri cara queroquerai omoncarata oca nocomantaiguëmica. ³⁵ Omeganëma omagaro ora inatsi jonoquë aisati omeganëma oca quibatsica, carari quero opega nasi nanibare irooti cara omoncaraquima omagaro ora nacantaiguëmi.

Te ogótengani atiraca ongantima cara iribocapae Jesus.

(Mr 13.32; Ir 17.26-30, 34-36)

³⁶ Aisati icanque Jesus:

—Te irogóte pairiraca atiraca ongantima nopocaje Naro. Te irogóigue ironomireegui Tosorintsi. Nipoque, nomatsiguengatapë carari teatisati nogóte Naro. Paniro igóti Pabati. ³⁷⁻³⁹ Jiraisonori, cara itimi Noë, yapapinintaiguë imatsiguenga, isinguitapinintaigaca, yágapinintaiguëro iina, itimabeta aisa ocanta itimaigabitaca omatsiguenga yamai. Te inguemisantaiguëro cara icamanaigabitacari Noë: "Coraque onangasantapëma". Aro yotetanaca Noë pitotsiquë, yasitocoqueri. Aique omabocaigacari matsiguenga angani, ponangasantanaca, pitsongaiguëri, itsiticaiganaque. Aitosati inganquima yamai matsiguenga, atiraca ongantima nopocaje Naro, quero iquemisanti, nomabocaigapëmari. Aique iratsipiriaiguë antagaisati tsoengatsiri. ⁴⁰ Aintaca piteni sërari cara togantsiquë, paniro náganë nantsibatánëmari, irari itsipa quero náganëri. ⁴¹ Aintaca pite tsinane mitoquirori singui, náganëro paniro nantsibatánëmaro, orari otsipa quero náganëro.

Icanque Jesus: "Piguaiguena".

(Mr 13.33-37; Ir 12.41-48; 21.34-38)

⁴² Përosati icanai Jesus:

—Piguaiguena, pinguenguena, tenta pigóigue atiraca ongantima cara nopogopae. ¿Nomabocaigapëmica? ⁴³ Aisa icanta casintaro pongotsi, icositaguëti. Aroca irogóqueme

atiraca ongantima iriboque cosirinti, ingaguitême, quero inintacagui i cositiri. ⁴⁴ Aisa nacanta Naro. Pinguenguena piguiaiguena. Quero ca pinguenguina, aro nopocaje nomabocaigapëmi. ⁴⁵ Pingantimari ibega caninari iromeraro casintari, igótasanti, igáanti basini iromeraro itsipa. Icanqueri ibatorote: “Obiro, pinganquineri basini arota popaaguiri caninasati”. Aique iáque. ⁴⁶⁻⁴⁷ Aroca iraniopëri iromeraro cantatsi caninasati, aro ingampëri ibatorote: “Caninasati picantaguetiro ora nococaquemi. Yamai nocogui pomisantantiro omagaro ora nasinta, nigóntina yamai quero pamatobiantí”. Aro inganinasëretë iromeraro. ⁴⁸ Carari quero picantari ibega basini iromeraro te inguemisanti ira ibatorote, inganqueca: “Yamai játaque ira meratinari, querojengari ipigapaa omanapague”, ⁴⁹ aro inguisëri basini iromeraro itsipa, ingapojapinintiri, irisinguitopiantëma. ⁵⁰ Aro ira ibatorote iromabocapëmari iromeraro te ingomeite, tenta iragueiri. ⁵¹ Aro ingasitigatapëri, iragáqueri intsibataiguëmari matobiantatsiri. Canta, iragasëretasantëma, iraraquma, iratsitsiaguite-tanë. Quero picantari ibega iriro, irari posiguima caninari iromeraro quemisanqueri ibatorote.

25

Icomantëgotiro Jesos 10 tsinane terai ágante.

¹ Aisati basini icantaiguëri irogomere Jesos:

—Yamai nosiacagantëmiro aisati ati ocanta iragáantane Tosorintsi. Aintaca 10 tsinane terai ágante. Ocoagaguë otonguiboquimari ojime otsipa aisati ontsibataiguëmari cara jiesitaquë. Aroque otsitintanë, aro áganëro omicherotepague. ² Pabocorooti tsinane ogótsisiri; ora basini pabocorooti te ogóigue. ³ Oraegui te ogóte páganëro omicherote carari te áganë oja ora obotacagajimarone. ⁴ Oraegui ogótsisiri páganëro omicherote aisati páganë oja oboontaimaro. ⁵ Tenta iriboque omanapague ojime otsipa, opotsiquitaiguë písamaiganaque. ⁶ Aro aganguite oquemaigabaqueri icaimaigapëro: “Coraque pijimetsari, pijáte pitonguiboguintimari”. ⁷ Omanapague ocaguitaiganaque 10 tsinane, pobetsicanëro omicheroe-guite. ⁸ Aro ora te ogóte ocantabecaro ogótsisiri pabocorooti: “Pomabaquina arosata oja pasi; otsibaqueca nomicherotepague”. ⁹ Potabitaiguëro ogótsisiri: “Quero. Quero cotonguiboro oja naro aisati obiro. Aroca nomëmi naro, aisati otsibacanë nasi nomicherotepague. Pijáigue pomanantontima pasi obiro”. ¹⁰ Iroontita piáigue omanantaiguë, yareca ojime otsipa. Otsibataigacari cara pongotsiquë iroro pabocorooti tsinane ogótsisiri aisati basini igaimane, icaigapë yapaigapë. Yasitocoigaca sitëcoriquë. ¹¹ Aique paretaigapaa ora tsinane te ogóte, ocantaigabitapaari: “Pisirenaro naro aisati, naniaigapaimi”. ¹² Carari yotabitobëro tsmagui: “Quero. Teni nogóiguemi pairiraca obiro. Te naninte popocasitina yaca”. ¹³ Pinguengasëretimaro oca nosiacagantëmica. Pigamema, tenta pigóigue atiraca ongantima cara nopigaima.

Icomantëgotëri ira omitojaiguëneri iguireguita casintari.

(Ir 19.11-27)

¹⁴ Aitosati icanque Jesos:

—Aisati basini nosiacagantëmiro ati ocanta iragáantane Tosorintsi. Aisa ocanta sërari játënguitsine jaanta basiniatiquë quibatsi: queroquerai iáti icaimaiguëri iromeraroegui, icomantaiguëri: “Nanintini pomisantinari naguireguita”.

¹⁵ —Icanqueri paniro: “Jerica pabocorooti iguibe quirequi tojai iripënaró. Pomisantinari”. Icanqueri basini: “Jerica pite iguibe quirequi tojai iripënaró. Pomisantinari”. Aisati ipabaqueri basini iromeraro paniro iguibe quirequi tojai iripënaró iromisanquineri. Paniro ipëri tojai, irironta ogótasantatsiri. Ira basini ipëri arosata tenta irogótasante. Aro ipaguetanëri, aque iáque canta jaanta basiniquë quibatsi. ¹⁶ Ira águëri tojai quirequi iáque yamanantë ipimantë. Yomitojaigasantëneri iguireguita ibatorote, icarati pabocorooti aisati. ¹⁷ Aisati itsipa águëri pite iáque, yamanantë, ipimantë, yomitojaigasantëneri, yáguë basini pite. ¹⁸ Irari águëri paniro, iáque iquiaquero omoro, imánaquineri iguireguita ibatorote quibatsiquë. ¹⁹ Aiquenta ipigapaa ibatorote, icaimaigapëri iromeraro: “Yamai pomapënarí naguireguita”. ²⁰ Ipoque ira águëri pabocorooti, yamapë aisati basini pabocorooti, icanqueri ibatorote: “Jerica piguireguita popanaquina jirai. Namanantë, nopimantë tojai, aro nomitojaiguëri. Jerica basini, aisati icarati pabocorooti”. ²¹ Aro icanqueri ibatorote: “Caninataque picantasantëro ora nococaquemi. Cani nopanaquemiri arosata pomisantëneri caninasati, yamai nocogui pomisantinari tojai basini. Aisati naninti tojai pinganinatomotina naro”. ²² Aique ipoque ira águëri pite, yamapë aisati basini pite, icanqueri ibatorote: “Jerica piguireguita popanaquina jirai. Namanantë, nopimantë, tojai nomitojaiganaqueri. Jerica basini, aisati icarati pite”. ²³ Aro icanqueri ibatorote: “Caninataque picanque ora nococaquemi. Cani pomisantëneri arosata. Yamai naninti pomisantinari tojai basini. Aisati nocogui tojai pinganinatomotina naro”. ²⁴ Aique

ipoque ira ágabitenguicha paniro, icanqueri ira ibatorote: “Nobatorote, nigóquimi obiro, te pingábintsante, notsorokuemi. Najique aroca nomitojaiganaquemirime piguiregite, págabitsaquinari omagaro. Iroro te nomitojaigaguëtiri. ²⁵ Nítiaqueri antagaisati. Jerica naguipigaimiri ira pasi”. ²⁶ Yotabitèri ibatorote: “Te pinganinate. Tojai poperataca. Pigótabeca nocogabeca naro pomitojaiguenarime naguiregite. ²⁷ ¿Pairo te pomabiritiri ira ogapinintiri quirequi? Pomairime iriro, iripênabentainarime nágantajimarime basini. Iraguipigainarime omagaro nasi”. ²⁸ Aro ibatorote icanqueri basinipague: “Págabitsatiri naguiregite, pomeri ira omisantinari caninasati, aroquenta cani yomitojaiganaqueri pabocorooti iguibe quirequi irooti cara yáguè basini pabocorooti. ²⁹ Iroro nomasantè inomotiri tojai, irari inatsi arosata iriro nágabitsaque. ³⁰ Yamai páganèri ica cara otsitinitasanti cara iraragasèretasantima aisati iratsitsiaguitetanè”.

Jesos icanque cara aiquenta ingomantègotaiquèri omagaro matsiguenga.

³¹ Aisati icomantè Jesos:

—Nopaniaca Jonogaguítequè, nomatsiguengatapè. Aiquenta najátaje, nopigaima aisati. Intsibataigapèna tojai ironomire Tosorintsi irisaanganetsite. Nosobigopè nagáantomentoquè, nantingomibintaigapèri omagaro matsiguengajegui. ³² Nopatotaiguèri antagaisati matsiguenga, negaraca itimagueti. Naro aisati nanganquimari ibega ira casintari ibira inaguiri casiriconiati iroishate aisati igábarate. Aisati Naro ninaqueri casiriconiati ira quemisanquina aisati ira tsoengaiguina. ³³ Nanganqueri ira quemisantaiguèna: “Popocaigapè yaca nobacosonoriquèca”. Nanganqueri ira tsoengaiguina: “Popocaique yaca nomatepacoquèca”. ³⁴ Aique nongomantaigabaqueri iraugui nobacosonoriquèni: “Omana, inganinatagaiguèmi Pabati. Jiraisonori yobetsiquèmiro iragáantane arota pintiomiotaiguèri. Yamai pijáigue pingarataiguèri. Caninataque irobabintaiguèmi. ³⁵ Cara nitaseguè, popèna noperi. Cara nomiretè, popèna nomire. Te pigótaiगतitina irore cantènguicha pobangopaguequè pogasomabaquina. ³⁶ Te ine nomanchaqui jirai, obiro paiguènaroro. Najanaitènti, obiro bocasitaiguèna. Yomianquina cara iromingamentoquè, pipocasitaiguèna picábintsaiquèna”. ³⁷ Aique irosomitaiguèna ira caninataigatsiri: “Natingomi, ¿Atiraca ocanta cara pitaseguè, cara napaagaiguèmi? Teni nanguengero. ¿Atiraca ocanta cara pomiretè cara nopaiguèmi pomire? ³⁸ ¿Atiraca ocanta cara nacábintsaiquèmi nobangopaguequè? ¿Atiraca ocanta cara nopabaquemi pomanchaqui? ³⁹ ¿Atiraca ocanta pijanaitè, aisati yomianquemi, niátasitaiguèmi? Teni nanguengaiguero”. ⁴⁰ Aro notabitaiguèri: “Aisonori nangantantaiguèmi: cara picábintsèri paniro quemisanquina, aisati picábintsèna Naro”.

⁴¹ —Aique nangantaiguèri ira nomatepacoquèni: “Yamai pijáigue canta Sharincabeniquè, cara tsitsiquè ora te otsibague. Yobetsiquèro Tosorintsi jiraisonori; yobetsiquèneri Satanás, cara iriáiguè camagari, aisati antagaisati ira aguiataiguèri. Yamai pingarataiguèri canta iriro aisati obirojeguè. ⁴² Jirai nitasegabitaca, te pomaiguena noperi. Nomiretabitaca, teatisati pomaiguena nomire. ⁴³ Naquenagueque, te pomena jatasintsi ora nasamantèma. Te ine nomanchaqui, carari te pomasitaiguènaroro Naro. Najanaitè, te popocasitaiguèna pinetsaiguèna. Cara yomianquena iromingamentoquè teatisati popocasitaiguèna”. ⁴⁴ Aique irosomitaiguèna: “Natingomi, ¿Atiraca naniaigabitèmi cara pitaseguè, cara pomiretè, cara te ine pomanchaqui, cara te ine negaraca pisamè, cara pijanaitè, cara yomianquemi, cara te nomitocotaiguèmi?” ⁴⁵ Aro notabitaiguèri: “Aisonori nangantantaiguèmi: cara te pingábintseri ira quemisanquina, teatisati pingábintsèna Naro”. ⁴⁶ Aique iraugui nomatepacoquèni iriáiguè cara Sharincabeniquè pèrosati ingasitigataiguèri Tosorintsi. Irari iraugui caninataigatsi iriáiguè cara Jonogaguítequè, intiomotaigapèna pèrosati.

26

Yosamitobaca jorío: “¿Ati anganqueri cara ágagantèri Jesos?”

(Mr 14.1-2; Ir 22.1-2; Jn 11.45-53)

¹ Tojai icomantanque Jesos, aique icanqueri irogomere:

² —Pigóiguè ongaraque pite cataguiteri omoncaraquima cataguiteri jitacha Pásicoa. Nopaniaca Jonogaguítequè nomatsiguengatapè, carari irácagantaiguèna iribèquègotagantèna.

³ Aro yapatotaigaca itingomipague saseriroti aisati ira ogameantiro isanguenare Moisés aisati jorío antiasiparipague. Yapatotaigaca cara ibangoquè itingomi saseriroti, ira jitacha Caijás. ⁴ Yosamitobaca:

—¿Ati anganqueri cara ágagantèri Jesos agamagaiguèri?

⁵ Aisati iquengaigaca:

—Quero águiri jiesitaquê. Iriro iniacaninataiguê matsiguenga. Aroca águëri ingui-saigacái eiroegui.

Oshaguêantacari casangajengaro Jesus Betaniasato.

(Mr 14.3-9; Jn 12.1-8)

⁶ Aique yogaganaca Jesus canta Betaniaquê, Iriro aisati irogomere. Ainta ibango-quê Simón, ira iribatsasebaguitaga jirai. ⁷ Yapasiguini Jesus aro pipogopê tsinane. Pamêgotasitapêri asaiti casangajengaro ora pênatacha tojai; pinantaro pobetsicagani mopê sibitaro jitacha aribásitoro. Pisataicoquero oshaguêantacari Jesus iguitoquê. ⁸ Aro igu-isêgotaiganacaro irogomere Jesus, icanque:

—¿Pairo paparaabiriquero casangajengaro? ⁹ Caninataqueme omimantêrome casanga-jengaro águêrime tojai quirequi omêrime tojai ira coguitiacha omitocotaiguêrime.

¹⁰ Yotabitaiguêri Jesus:

—¿Pairo picantobibiriquero oca tsinaneca? Patiro ocanquinaro caninaro. ¹¹ Pêro cara irine obirojeguiquê ira coguitiachari te irine iguireguita; cara pinintica pomitocotaiguêri iriro. Carari quero nini Naro pêrosati yaca. ¹² Ocabêna caninasati. Oshaguêantobênaro queroquerai iteina. ¹³ Aisonori nangantaiguêmi: aiquenta pinguenagueque omagaroquê quibatsi, pinguenguitsatomotaguetaiguêri matsiguengajegui Caninaro Nibarintsi. Aitosati pingomantêgotiro oca tsinaneca arota irogótocotiro matsiguengajegui.

Joras iquianca irácagantêri Jesus.

(Mr 14.10-11; Ir 22.3-6)

¹⁴ Aique iáque paniro irogomere Jesus. Ijita Joras Cariotisati. Iátasitaiguêri itingomipague saserioti, ¹⁵ icantaigapêri:

—Aroca nágagantêri Jesus, ¿Aro popênabenquina?

Yotabitêri:

—Jee, nomaiguêmi quirequi.

Aro ipaiguêri quirequi iguitso icarati 30. ¹⁶ Aique ipigapaa Joras, inetsasantêri Jesus arota irogóontimari atiraca ongantima irácagantêri.

Yobetsiquêneri Jesus cara icarantacaro yapê. Aisati Jesus icomantêgotêri ira ágagantêrine.

(Mr 14.12-21; Ir 22.7-13, 21-23; Jn 13.21-30)

¹⁷ Pareca Pásicoa cara yametaiga joríojegui yapaigui pan te ingonaguero ora piponganta. Iátasitaiguêri Jesus irogomere, yosamitaiguêri:

—Natingomí, ¿Nega pininti nobetsiquêmiro cara popê Pásicoaquê?

¹⁸ Icantaiguêri Iriro:

—Pijáigue cara Jerosarênquê; cara, piniaigapêri matsiguenga, pingantiri: “Icanque Ogometinari: ‘Pênibosare nomoncaraquero omagaro. Nanintini nopaiguê Pásicoaquê cara pobangoquê, Naro aisati nogomerejegui’ ”.

¹⁹ Aique iáguê irogomere, iniaigapêri sêrari. Yoniagaigabaqueri ibango cara yobetsiquêro perintsipague asi Pásicoa. ²⁰ Cara otsitinitanê, ipocaiguê Jesus aisati irogomere.

²¹ Cara yapaigasegui, icomantê Jesus:

—Aisonori nangantaiguêmi, ainta paniro yaca ira ágagantêne.

²² Aro yogasêretaigaca antagaisati, panirootipague yosamitêri:

—Natingomí ¿Naroco ágagantêmine?

²³ Yotabitaiguêri Jesus:

—Irianti ira pêcoquina cara napê noberatotequê. ²⁴ Nopaniaca Naro Jonogaguite-quê, nomatsiguengatapê yaca quibatsica. Jirai isanguenatocoquina Sanguenariquê, aroque nomoncaraquero omagaro. Irari atspiriasantêrone ira ágagantêne ¡Caninataqueme querome ini iriro, querome itsipireiro!

²⁵ Aique yosamitêri Joras, ira ágagantêrine:

—Natingomí ¿Naroco ágagantêmine?

Yotabitêri Jesus:

—Jee, Obiro.

Yogomeantê Jesus cara irapapinintobiqueri quemisantatsiri aisati irógobitaiguêmari.

(Mr 14.22-25; Ir 22.14-20; 1 Co 11.23-26)

²⁶ Cara yapaigasegui, Jesus yáguê pan, icarasiaqueri Tosorintsi. Aique itibatsaague-quoero, yotsatengaiguêri irogomerejegui. Icantaiguêri:

—Jeroca pan osigaro nobatsa. Popaiguero. ¿Teco nangamobitaiguêmi?

²⁷ Aique yáguê irógomento, icarasiaqueri Tosorintsi, ipaiguêri irogomere, icantaiguêri:

—Pôgaiguemaro obirojegui. ²⁸ Iroero osigaro naraa, ora naraatobitanêneri omagaro matsiguenga cara nangamobitaiguêri. Yamai naraa ocanti irorai Nibarintsi; iroero ingábintsantaiguêmari Tosorintsi cara icanque jirai. Cara irabentaiguêna matsiguenga

inguemisanquina, Tosorintsi irojocajineri matsiguenga ora icantagueti te onganinate, quero iquengairo. Nacantaiguëmi yamai arota pigóigue ati ocanta iragabisaicotajiri Tosorintsi antagaisati quemisanquinane. ²⁹ Yamaica quero nógaaro oja oba irooti cara nantsibataiguëmi cara iragáantanequë Pabati. Cara iragáantë Iriri omagaro omasiniatitanë. Aique nóguëmaro iroraia aisati obirojegui.

Jesos icantaiguëri irogomere: “Yamai tsitiniri pijocaiganaquina”.

(Mr 14.26-31; Ir 22.31-38; Jn 13.36-38)

³⁰ Aroqueque icántataiguë Jesos aisati irogomere, iáiguë cara oguitojaquë jitacha Olibos. ³¹ Yaretaigaca. Aro icampë Jesos:

—Yamaica tsitiniri pijocaiganaquina, cara ocomantëgotëmi Sanguenari: Nóguërica ira omisantiri oisha, aro irisigaiganaquema iroishate, inguenagueque porocague.

³² Carari nanganiatanae, nobataiguëmi canta Garireaquë.

³³ Aro icanqueri Peroro:

—Aroca irojocanëmi antagaisati basini icaegui, quero nojoquimi naro.

³⁴ Yotabitanëri Jesos:

—Aisonori oca nongomantëmi: yamaica tsitinirica queroqueraí icaimi tiapa sërari, ongaraque maba pinganque: “Teni nogótiri Ira Jesos”.

³⁵ Icanque Peroro:

—Aroca nantsibatëmi nangamobiquemi, quero nacanti: “Teni nogótiri Ira Jesos”.

Aisati icantaigabitaca omagaro irogomere.

Jesos yamanaqueri Iriri cara panguirintsisiquë jitacha Jetsemaní.

(Mr 14.32-42; Ir 22.39-46)

³⁶ Aique iáiguë Jesos aisati irogomere cara Jetsemaníquë. Icanqueri:

—Pisobicaigue yaca; najáque Naro cara, nomanocoqueri Pabati.

³⁷ Yáganëri mabani casiriconiati: Peroro aisati piteni itomi Sebereo. Tojai yogasëretasantaca, iquenganeintasantaca. ³⁸ Icantaguëri ira yoganë maba Jesos:

—Tojai nogasëretasantaca agabenisonori. Pisobicaigue yaca, pingaguíte.

³⁹ Aique yogaganaca caraquerora yaquitomopa quibatsiquë. Yamanocopëri Iriri:

—Pabati, teni naninte natsipirie, carari quero nacantiro ora nocogabeca Naro, iroonti nanganque ora picocaquena Obiro.

⁴⁰ Aique ipigasitapaari irogomere. Iniopairi isamaigasegui. Yosamitëri ira Peroro:

—¿Teco pabebintsatiro pobotsiquene, te pabetiro pingaguitëmate arosata? ⁴¹ Pingaguíte, pomaniri Tosorintsi iromitocotaguemi arota quero picantaguetiro ora te ongomeite. Picogabeta pingantirome ora nococaquemira, carari te pingantiro.

⁴² Aro ipiganaja yamanaji aisati:

—Pabati, picocagasanotënaroca natsipiriero, aro caninataque. Nomoncaraquero antagaisati ora picocaquina.

⁴³ Ipipagaa aisati iniopairi irogomere aitosati isamaigasegui, tojainta ipotsiquitasantë.

⁴⁴ Aisati iátaji yamanocotajiri Iriri. Irootisati yogatsitairi ora icanqueri naaraiquerai.

⁴⁵ Ipigasitapaari irogomere, icampairi:

—¿Somatsibico? Yamai aroque omoncaraca. Jirai nopaniaca Jonogaguítequë, nomatsiguengatapë. Yamaica irácagantëna ira cagari caninataigatsi. ⁴⁶ Pingabiritaiguema, intsome ajáte. Coraque ipoque ira ágagantënane.

Yáguëngani Jesos.

(Mr 14.43-52; Ir 22.47-53; Jn 18.2-11)

⁴⁷ Cara inibatasegui Jesos, yarepa Joras ira yogometabeta Jesos. Icarataigapëri tojai matsiguenga. Yamaigapë isabirite aisati anchaqui cara igátaiguëri itingomipague saseriroti aisati antiasiparipague. ⁴⁸ Aroque icomantaiguëri Joras icanque:

—Ira nasarapëma Irianti Jesos. Págaiganaqueri.

⁴⁹ Aique iátasiqueri Jesos Joras, yasarapari, icanque:

—¿Aintabi, Ogometinari?

⁵⁰ Yotabitanëri Jesos:

—Nomatsiguenga, ¿Pairo pipocasiti yaca?

Aique ipocasitaigapëri antagaisati, yágaiganaqueri. ⁵¹ Aro paniro irogomere yáguë isabirite, itoguimitatëri iromeraro itingomi saseriroti. ⁵² Jesos icanqueri:

—Pomíngairo pisabirite cara poguiroriquë. Antagaisati ira carantobagaro isabirite, ingamantëmaro sabiri iriro aisati. ⁵³ ¿Teco pigóte nongocaquerica Pabati, iragátaiguënarime tojaisonorí ironomire, inguisëcobentina? ⁵⁴ Carari arome inguisëcobenquiname, iragabisaicotajiname, quero nomoncaratiro ora ocomantëgotëna Sanguenari.

⁵⁵ Aique icantaiguëri ira bocasitaiguëri:

—¿Pairo pamasibiriquinaro pisabirite aisati anchaqui? ¿Naroco cosirinti? Tojai piniaga-bitëna cara nogometaguimi cara ibangoquë Tosorintsi, te páguina. ⁵⁶ Carari páguëna yamai aroquenta omoncaraca ora ocomantëgotëna Sanguenari.

Aique ijocaiganaqueri Jesus antagaisati irogomere, isigaguetaiganaca.

Yágaiganaqueri Jesus catingasatiquë itingomipague joríojegui icarati 71.

(Mr 14.53-65; Ir 22.54-55, 63-71; Jn 18.12-14, 19-24)

⁵⁷ Aro yágaiganaqueri Ira Jesus ibangoquë Caijás, itingomisonori saserirotipague. Cara, yapatobiritaigari basini itingomipague saseriroti aisati ira ogomeantiro isanguenare Moisés, aisati antiasipari. ⁵⁸ Yogulatanëri Peroro acarantanë. Icapë tantotsiquë tso-magui itsibataigacari sorarojegui. Icoqui irogóte itiraca inganqueri ira Jesus. ⁵⁹ Aro itingomipague saseriroti, aisati antiasipari, aisati omagaro itingomipague jorío icarati 71 itsoiuguëgotagacari Jesus arota iróguiri. ⁶⁰ Ainta tojai tsoiguëgotacarira, carari te inguen-gaiguema. Aique ipoque pite basini tsoiguëgotantachari ⁶¹ icantaigapë:

—Naquemaqueri cara icanque: “Nogomeriguetëro ibango Tosorintsi; ongaraque maba cataguiteri nobetsicaïro aisati”.

⁶² Aro icabiritanaca itingomi saserirotipague, icanqueri Ira Jesus:

—¿Pairo te potapibiritiri? ¿Pairo ojita oca icantocotaiguëmica?

⁶³ Imairetopitëri Jesus, te irotopitëmatiri. Aique itingomi saseriroti igáqueri:

—¿Teco iraneimi Tosorintsi Ira catimanerisonori? Pingomantasantina: ¿Obi-roco Quirisito, Itomi Tosorintsi?

⁶⁴ Yotabitëri Jesus:

—Jee, Naro. Nopaniaca Jonogaguetequë, nomatsiguengatapë. Aiquenta piniagaina nosobigopë ibacosonori-quë Tosorintsi sintsirisonoriguinte, aisati piniagaina cara nopoque mingoriquë, nopigapaima yaca quibatsica.

⁶⁵ Aique iguisanaca itingomi saseriroti itisaraanëro imanchaqui, icanque:

—Piquemaigabaqueri. Ijitosorintsitatitaca Iriati. ¿Pairo ongogobique basini comantëgotërine? Piquemaiguëri cara icantocotaguetasitari Tosorintsi. ⁶⁶ ¿Pairo piquianca obi-rojegui? ¿Pairo anganqueri?

Yotabitaiguëri joríojegui:

—Iriati cantagantënguicha, caninataque ingamaque.

⁶⁷ Aro ibasioquiqueri iroquiquë aique ijobaboroqueri iboroquë, icapojaboroqueri. In-
chotangaborotëri ⁶⁸ icanqueri:

—Jaa, Quirisito, pingomantina: ¿Pairi capojëmi?

Icanque Peroro: “Teni nogótiri Jesus”.

(Mr 14.66-72; Ir 22.54-62; Jn 18.15-18, 25-27)

⁶⁹ Ainta isobiaque Peroro saaguiteroquë. Oniaqueri tsinane ironomire itingomi saseriroti, ocanqueri:

—Aisati obi-ro aguatiari Jesus, Ira Garireasati.

⁷⁰ Iquemaiquëri antagaisati cara icanquero Peroro:

—Teni nogóte pairoraca picanquina.

⁷¹ Iátabeca cara icabitapa, oniaqueri basini tsinane ironomire itingomi, ocantocoqueri:

—Ica aisati yoguiatëri Jesus, Ira Nasaresati.

⁷² Aisati icanai Peroro:

—Teni nogótiri ira posamitëna. Igóque Tosorintsi cara nacanque catingasati. Aroca nontsoiguëma ingasitígatinata.

⁷³ Aique ocosamanitanë arosata, ainta basini icantaiguëri:

—Aisonori poguiatiri Ira Jesus. Naquemaiguëmi cara pinibati; obi-ro Garireasati.

⁷⁴ Yotabitanëri Peroro:

—Tesonori nogótiri sërari ira picantocoquina. Igóque Tosorintsi aisonori nacanquemi. Quero-ca ninibatimi catingasati, nocogui ingasitígatina Tosorintsi.

Irooti cara icaimanë tiapa sërari. ⁷⁵ Aro iquengairo Peroro ora icanqueri Jesus: “Quero-
querai icaimi tiapa sërari, mabataque pinganque: “Teni nogótiri Jesus””. Aro isotocanai Peroro iáque iragasantaca.

27

Yáganëngani Jesus Piratoquë.

(Mr 15.1; Ir 23.1-2; Jn 18.28-32)

¹ Oquëtaguetamananaque, iquengaigaca iróguiri Jesus antagaisati itingomipague saseriroti aisati antiasipari jorío. ² Yoguëshotaguëri yáganëri cara itimi basiniati itingomi cobeingari, ira jitacha Pirato.

*Icamaque Joras.**(Irag 1.18-19)*

³ Cara igóque Joras, ira ágagantëri Jesus, cara iquengaigaca iróguiri Jesus, iquengasëretabitaca. Yoguipegaineri itingomipague saseriroti aisati antiasipari ira 30 iguitso quirequisonori. ⁴ Icantai gapëri:

—Jerica piguireguite. Teni onganinate ora nacanque, tenta ingantëmate Jesus ora quimingaro. Notsoigëgotasitacari naro.

Yotabitobëri saseriroti:

—Jemita ora picanque, iroonti pasi.

⁵ Aique imionganaineri quirequi cara ibangoquë Tosorintsi, ipiganaja Joras. Aique iáque, yágüë sibitsa isiticanaca iriati. ⁶ Ira itingomipague saseriroti yágairi iguireguite, icantaiguë:

—Te inganinate angábintseri ica quirequica omeri Tosorintsi. Iriantinta ipënabenqueri eiro arota iróçagantiri.

⁷ Aro yosamitobaca:

—¿Pairo anganqueri?

Iquengaigaca:

—Intsome omanantaiguero quibatsi atiantimari ira camatsine ira te aneiri paniacha parigotiquë.

Aro yamanantë quibatsi ora yágapinintaigui, inti cobiti.

⁸ Iroto irooti yamai ojitagüëca oca quibatsica: asi iraraa. ⁹⁻¹⁰ Aro imoncaraquero isanguenare Jeremías:

Yágaigari ira 30 iguitso quirequisonori. Irianti quirequi ipënataca cara yágagantëri Quirisito. Irianti arosata cara yametaiga jorio jiral. Yamanantaiguë quibatsi caninaro asi cobiti. Ira Atingomi agáqueri iromanantëro.

Aro isanguenaquero Jeremías jiral.

*Icomantëgotëri Jesus Pirato.**(Mr 15.2-15; Ir 23.3-25; Jn 18.33-19.16)*

¹¹ Aro yaratingopë Jesus catingasatiquë basiniati itingomi cobeingari jitacha Pirato. Yosamitobëri iriro:

—¿Obiroco itingomi joríojegui?

Icanqueri Jesus:

—Jee, Naro.

¹² Aique cara icomantëgotëri itingomipague saseriroti aisati antiasipari, imairetanë Jesus, te irotopitiri. ¹³ Icanqueri Pirato:

—¿Teco pinguemiro oca icantocotaiguëmica? ¿Pairo te potapibiritiri?

¹⁴ Carari te irotopitëmatiri. Iquenganeintacari Pirato, te irogóte pairo inganque.

¹⁵ Aro antagaisati osarini omoncaraca jiesita cara iquengaigaca joríojegui jiraisonorri cara yabisobenqueri ironomire Tosorintsi cara Ejípitoquë. Cara jiesitaquë yameta Pirato iromisotocajiri paniro ira iromingane, ira icoigaiguë jorio. ¹⁶ Ainta tojai iromingane. Paniro jitacha Barabás. Irianti ógueri. ¹⁷ Cara yapatotaigaca jorio, yosamitaigabaqueri Pirato:

—¿Pairo picogaigui nomisotocajimi? ¿Picogaiguico nomisotocajimiri ira Barabás, iraco Jesus nomisotocajimi, aisati ijitaigui Quirisito?

¹⁸ Igótoqueri Pirato cara iguisagantasiacari Jesus joríojegui tenta iraninte inguemisan-tiri imatsiguenga. Ijitateca Pirato inganqueme jorio: “Nocogaigui pomisotocajinari Jesus”. ¹⁹ Isobigasegui Pirato iragáantomentoquë cara yameta iquemaguetiri matsiguenga, ocomantabitapari iina:

—Quero pógagantiri Jesus. Icaninati Irero. Naraningui naquisaniqueri, tojai naqueinco-queri.

²⁰ Carari itingomipague saseriroti aisati antiasipari jorio iquiancagajiri joríojegui iromanocoqueri Pirato iromisotocajiri ira Barabás aisati iróçagantiri Ira Jesus. ²¹ Aisati yosamitairi Pirato:

—¿Pairo picogaigui nomisotocajimi?

Yotabitaiguëri:

—Pomisotocajinari ira Barabás.

²² Aique yosamitaiguëri Pirato:

—¿Pairo nanganqueri Ira Jesus, aisati ijita Quirisito?

Icantaiguëri joríojegui:

—¡Popëicotiri!

²³ Yotabitaiguëri Pirato:

—¿Paioroco icantagueque te ongomeite ora nopëicobiriqueri?

Icaimaiganaque jorío:

¡Popëicotiril!

²⁴ Aro igótanë Pirato itsipiriasica yosamitabitacari tojointa iguisaneinqueri Jesus joríojegui. Aro igáqueri ironomire:

—Pomapëna nija.

Yamapëneri, iquibococa irogótacaguiri jorío te iraninte irócagantiri Jesus. Icanque:

—Teni naninte naro nógagantiri. Pinintaiguica obirojegui, iroonti pasi. Teni naro agáantirine.

²⁵ Yotabitaiguëri matsiguenga:

—Nocogasantaiguë ingamaque. Caninataque inguisenata naroequi Tosorintsi aisati caninataque inguiseri notomijegui.

²⁶ Aique yomisotocajiri Barabás. Aisati igáqueri soraro iripasataigueri Jesus, aisa iribëquëgotëri.

Isërontaigacari Jesus soraropague.

(Mr 15.16-20; Jn 19.1-3)

²⁷ Aique yágaiganaqueri cara ibangoquë cobeingari, icaimaiguëri tojai basini soraro. ²⁸ Aique yágabitsaqueri imanchaqui, ipëri basini inaga, quiraauquisaa magori.

²⁹ Imatseiqueri iroonti totsei. Aisati ipëri chocopi, icanqueri:

—Pomogotiro oca ocarapi chocopi.

Aique ishongaigapari soraro yobaticagueritotomemegapari, isërontaigacari, icantaiguëri: —¡Obiro Natingomi! ¿Aisonorico Obiro itingomi joríojegui?

³⁰ Aisati ijobataiguëri, yágabitsaqueri chocopi ipasataiguëri iguitoquë. ³¹ Aroqueque icabíntsátaiguëri, aisati yágabitsaqueri quiraauquisaa magori manchaguintsi, icaagobëri iraisati imanchaqui, yágaiganaqueri cara iribëquëgotaiiguëri.

Ipëicotaiiguëri Jesus cara corosiquë.

(Mr 15.20-32; Ir 23.26-43; Jn 19.17-27)

³² Aro yágaiganaqueri Jesus. Itonguibocari sërari Sirenesati, ijita Simón. Aro imeratobacari soraro, igáqueri:

—Páganëneri igorosite.

Aro yáganëneri.

³³ Yaretaigaca Górogotaquë ora ocanti osigaro iguito igamaga. ³⁴ Aro ipëtabecari Jesus oja obaa ogonoataga isincana; iniantacaro Jesus, te iraninte iróguimaro. ³⁵ Cara aroque ipëcotaiiguëri soraro corosiquë, aique imaguimpibintëqueri imanchaquipague Jesus ipabacaguecaro yotsiantancaró. Aro omoncaraca Sanguenari ora cantatsi: Imaguimpibintaiguëro nomanchaqui ora irogóontëma pairiraca áganërone.

³⁶ Aique isobiaque osobiquë corosi inetsaiguëri. ³⁷ Aisati yoguëro jonoica corosiquë, isanguenare Pirato. Isanguenaquero pairoraca ipëcibiriqueri. Ocanti: “Iriro Ica Jesus Itingomi joríojegui”. ³⁸ Aisati ipëcotaiiguëri pite cosirinti itsibatacari Jesus. Ainta paniro ibacosonoriquë Jesus, basini imatepacoquë. ³⁹ Ainta yabisanaqueri abatsiquë, iniopëri Jesus, icabíntságapëri, ipoteguitotaiigapa, ⁴⁰ icantaiguëri:

—Pogomeriguetiro ibango Tosorintsi, aisati ongaraque maba cataguiteri, pobetsicairo. Atsi yamai pigabisaicotajima Obiati. Obiroca Itomi Tosorintsi piguëtanæ corosiquë.

⁴¹ Aisati isërontaigacari itingomipague saserirotijegui, aisati iragui ogoameantiro isanguenare Moisés, aisati bariseoegui aisati antiasipari, icantobaganaca:

⁴² —Yogabisaicotaiiguëri imatsiguenga carari te iragabisaicotima Iriati. Iriroca Itingomi joríojegui, iraguëtanæ corosiquë. Nanetsaiguëri, aro nanguemisantaiguëri.

⁴³ Itingomintabecari Tosorintsi Iriro. Icanque: “Naro Itomi Tosorintsi”. Nanetsaiguëri aroca iragabisaicoqueri Itomi yamai.

⁴⁴ Aisa icanqueri ira cosirintí ipëcotacaca icantocotaguëtasacari, isërontaigacari aisati.

Icamaque Jesus.

(Mr 15.33-37; Ir 23.44-46; Jn 19.28-30)

⁴⁵ Cara catínga paba otsititinanë antagaisati quibatsi irooti cara ochapinitanë. ⁴⁶ Aro icaiabatanë Jesus:

—Eri, Eri, ¿Irama sabacatani?

Ocanti: “Pabati, Notosorintsite, ¿Pairo pijocobitanëna?” ⁴⁷ Ainta matsiguenga cara iquemaiguëri icantaiguë:

—Pinguemiri. Icaimëriini Eriás comantantatsiri.

⁴⁸ Aro isiganaca poro, yáguë ichomicantaro, yoaquero obaaquë cochori. Yoguëneri chocopiquë itimagonaguitanaca ipëri Jesus iróguimaro. ⁴⁹ Ainta basini icanque:

—Irinita. Quero popiri. Atsi anetserita aroca iribocasitapëri Eriás iragabisaicopëri.

⁵⁰ Aro icaimasantanai Jesus, irooti icamantaca.

Inibatëgotëri ira niaiguëri Jesus cara icamaque.

(Mr 15.38-41; Ir 23.47-49)

⁵¹ Cara icamaque Jesus, aito cara otisaraanaca aganguisati ora yotigantaro ibango Tosorinti. Iroonti oquibepiriga tera yoguëro arota quero iqui pairiraca. Oparintanaca jonoquë, otisaraanaca irooti osobi. Aitosati posebatanaca quibatsi, moque moque moque, piquëtareaguetanë oquibe mopë. ⁵² Yasirecotanaca camatsiri, icaniatanai tojai quemisantatsiri. ⁵³ Aique cara icaniatanai Jesus icabiritanaca iáiguë camabetachari cara Jerosarënuquë. Iniaigapairi matsiguenga tojai. ⁵⁴ Aro ira capitán aisati isorarote inetsaigaseguiri Jesus, cara iquemaignabaquero posebatanaca quibatsi, iniaiguëro cara otsitinitanë, iniaiguëri igamaga cara icabiritanaca, iquenganeintasantaca icantaiguë:

—Aisonori, Iriro Itomi Tosorinti.

⁵⁵ Ainta jaqueronta tsinanepague onetsaiguëri Jesus aisati. Opaniaca Garireaquë. Coshoni poguiataiguëri Jesus opapinintaiguëri tojai omitocotaiguëri. ⁵⁶ Ainta María Magararasato aitosati basini María iniro José aisati Santiago, aisati iniro piteni itomi Sebereo, aisati basini tsinane. Oniaiguëri Jesus cara icamaque.

Yomianquengani Jesus omoroquë.

(Mr 15.42-47; Ir 23.50-56; Jn 19.38-42)

⁵⁷ Cara ochapinitanë ipocasiqueri Pirato poro Arimateasati jitacha José. Iriro irogomere Jesus aisati, iquemisanqueri. ⁵⁸ Yamanopëri Pirato:

—Camaque Jesus. Nocoguini pinintacaguina náganëri nomianqueri omoroquë.

Aro igáqueri isorarote:

—Pinintacaguiri ica iráganëri igamaga Jesus.

⁵⁹ Aique iáque, yáganëri igamaga iponatancari tocoya irorai. ⁶⁰ Yoguëri omoroquë cara iroraique yomoroque José. Iútiuguëro mopë omoroquë, yasitocoontacari. Aro iátaji. ⁶¹ Ainta pirobiaque María Magararasato aisati basini María, oniaiguëri cara yomianqueri.

Iáque soraro yomisantaigabitacaró omoro cara ini Jesus.

⁶² Pabisanaque cataguiteri ora jitacha Pásicoa cara ipëicoiguëri Jesus. Oquëtagueatamanë iátasitaiguëri Pirato ira itingomipague saseriroti aisati bariseopague. ⁶³ Icantagapëri:

—Nogobeingarite, naquengagairo cara icanque cani ira matobiantatsiri: “Nangamaque, aique ongaraque maba cataguiteri, nanganiatanae”. ⁶⁴ Yamai nocogaiguë pigátinari soraropague iromisantiro omoro cara yoguëri igamaga. Iranetsasantiro maba cataguiteri arota quero iátasitiri irogomere yágairi igamaga inganque: “Icabiritanaa icaniatanai”. Jirai tojai yamatobianti; yamai aroca iráganëri irogomere, iromatobitasantaiguëri matsiguenga.

⁶⁵ Aro Pirato igáqueri isorarote:

—Atsi pijáique, pomisantanoiguero omoro.

⁶⁶ Aro iáiguë yasitocotasantëri, itsinetëgotëri yomisantasantëro omoro soraro.

28

Cara icabiritanaa Jesus icaniatanai.

(Mr 16.1-8; Ir 24.1-12; Jn 20.1-18)

¹ Pabisanaque cataguiteri comagoriantague. Oquëtagueatana, iroonti tominco, tsitini-querai piáque María Magararasato aisati basini María otsipa piátasiquero omoro cara yoguëri Jesus. ² Iroguito posebatanaca quibatsi aisati. Ainta ironomire Tosorinti irisaanganetsite yamasobingopë canta Jonogaguítequënta irooti quibatsiquë, ititigapëro mopë ora yasitocoontabitacari, isobigopëro. ³ Tojai yobariaguiteti aisa ocanta moretatsiri. Oquëtatanotanë catarisonoriguinte iguitsagare. ⁴ Iniaigabaqueri soraropague, itsorogasantagabaqueri. Imogomogatanaca icanaca ingamanëni. ⁵ Icampëro tsinane ironomire:

—Quero pitsorogaigu. Nigóque pipocasitabecari Jesus, Ira ipëicotaiguë corosiquë. ⁶ Teni irinaje yaca. Aroque icaniatanai cara icanque. Jooque, pinetse cara yogabitacari. ⁷ Pijáique omanapague pingomantaigapëri irogomere, “Icamabeca Atíngomi, yamai aroque icaniatanai. Irobataiguëmi canta Garireaquë. Aro piniaigairi canta”. Aroque nocomantaiguëmi.

⁸ Oquenganeintasantaca tsinane aisati ocaninatasantaiguë. Piáiguë pisigasitaiganacari irogomere arota ongomantaigapëri. ⁹ Cara abatsiquë, iriguito yoniagaparo Jesus, ibetsa- taigaparo. Piátasiqueri pobaticagueritotasipari opogopëri iguitiquë. ¹⁰ Icampëro Jesus:

—Quero pitsorogaigu. Pijáique pingomantaigueri nogomere iriáique canta Garireaquë. Aro iraniaigaina canta.

Jjitasitaigaca joríojegui yáganairi Jesus irogomere.

¹¹ Cara piátaigai tsinane, aisati iátagarantai soraro omisantëro omoro. Iáque poeborokuë icomantaigapëri itingomipague saseriroti ora iniaiguë. ¹² Yapatotaiguëri aisati antiasipari, yosamitobaca:

—¿Pairo anganque yamai cara quero icomantëgotiri?

Aro icaimaiguëri soraro, icantaiguëri:

—Jerica quirequi nomaiguëmi. ¹³ Pingantasitimari matsiguenga: “Cara nisamaigasegui aganguite ipocaiguë irogomere Jesus yáganairi igamaga”. ¹⁴ Aroca inguemocotaiguëmi ogobeingarite, pingantiri: “Nisamë”. Nongomantëri naro: “Quero piguisiri soraropague. Teni irisome. Naro cantëri: ‘Pintsoiguema’ ”.

¹⁵ Aro yágaiguëri quirequi soraro, icomantasitari matsiguenga carari itsoigani: “Nisamaiguë. Aique ipocaiguë irogomere Jesus yáganairi”. Aro icantobagaiga jorío negaca irooti yamai.

Iniaigairi Jesus irogomere canta Garireaquë.

(Mr 16.14-18; Ir 24.36-49; Jn 20.19-23)

¹⁶ Aro iáiguë irogomere Jesus cara Garireaquë. Icarati 11, panibani Joras. Iáiguë cara oguitojaquë ora icomantëri Jesus jirai. ¹⁷ Cara iniaigapairi yobaticagueritotasipari, carari ainta porocague ira tsoenguëri. ¹⁸ Aro ipocasitaigapëri Jesus, icampëri:

—Jirai icanquina Pabati: “Pobatacagasanotiri omagaro Jonogaguitesati pingingomibintasanoiguëri, aisati pobatacagasanoguëri antagaisati quibatsisati”. ¹⁹ Yamai pijátagueque omagaro poeboropaguequë, pinguemisantacagaiguëri matsiguengajegui, potsatiancagaiguëri imegaiguëma nogomerejegui. Aroca inguemisanquina Naro, pomaotisaiguëri. Ora icocaqueri Pabati imaotisabiritimari Iriro aisati Naro aisati Isëre Tosorintsi. ²⁰ Pogometaguëri ingantaigue antagaisati ora nocomantaiguëmi Naro. Atiraca pijáte nantsibataiguëmi Naro, coshoni nogaiiguëmi përosati irooti cara nopocaje nobatacagantapë.

Aro ocarati ora nasanguenague. *Mateo*

IRA MARICOS ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

Ipcasique Joan, ibaotisantagueque.

(Mt 3.1-12; Ir 3.1-18; Jn 1.19-28)

¹ Yamai nongomantëgotëri Jesoquirisito. Iriro Agabisaicoontatsiri, Itomi Tosorintsi. Iroonti Caninaro Nibarintsi ora nongomantëmi.

² Jirai isanguenaque comantantatsiri jitacha Isaías:

Icanë Tosorintsi: “Notomi, nagáqueri nomeraro irobaquemi irobetsicoboguitëmiro pabo. Ingantaiguëri matsiguenga: ‘Pigamaiguemari págacatinatobëri Ira Agabisaicoontatsiri, pinguemisantiri’. ³ Inguenguitsatacagaiguërimi matsiguenga canta tenta ontimingani, ingomantëgotëmi: ‘Coraque Atingomi. Piganinatiro paneingomento pibega cara pobetsicoboguitineri irabo itingomisonori pigatingatiro’ ”.

⁴ Aroque omoncaraca ora icanque Tosorintsi, aisati ora isanguenaque Isaías jirai. Iconijapë Joan baotisantantsiri canta tenta ontimingani. Icomantaigapëri imatsiguenga, ibaotisataguëri. Iquenguitsatacagaiguëri:

—Pingantaigaima yacaqueroca, pijocajiro ora picantaguetabeca te onganinate, pomasiniatitaje, quero picantaja pibega jirai. Pomaotisatima. Aro irojocajimiro Tosorintsi ora picantaguëti te onganinate, iromaguisanquero, quero iguisaneintajimi. Aisati irogóguë matsiguenga cara icábintsëmi Tosorintsi.

⁵ Aro iátasitaiguëri Joan tojai matsiguenga, Joreasati aisati Jerosaresati, iquemisantaiguëri. Icomantaigapë:

—Aiti nacantaguetiro ora te onganinate. Nocoguini ingábintsena Tosorintsi iragabisaicotajina.

Aique ibaotisatagabaqueri Joan cara nijaaquë jitacha Jorirán. ⁶ Ora iguitsagare Joan irianti cameyopiti, imatsaguitari imasitsa. Irianti yaagui ira tsguëriquipague. Aisati itsimi pitsia. ⁷ Icomantaiguëri imatsiguenga:

—Aique iribocapë sërari te aisa ingantina nibega naro. Ibaquina Irironta Natingomisonori, nitsoingaa naati naronta cantaca iromeraro Iriro. ⁸ Naro baotisantanguëmiro nija. Irari bocapënguitsine aiquenta irogopëmiro Caninaro Isëre Tosorintsi inasërequimi cara pinguemisantobëri.

Ibaotisatatac Jesos.

(Mt 3.13-17; Ir 3.21-22; Jn 1.31-34)

⁹ Cara yarepa Jesos. Ipaniapa poeboroquë jitacha Nasaret cara Garireaquë, iátasipëri Joan. Ibaotisatobëri Joriránque. ¹⁰ Cara iconatianai Jesos nijaaquë, aito cara iniobero pasirianaca Jonogaguete pamasobingopëri Caninaro Isëre Tosorintsi ocampari sompaguiti.

¹¹ Aisati oquemobëngani Irinibare Tosorintsi jonoquë icanque:

—Obiro Notomi, nanintasanotanë. Tojai nacaninabentasanotëmi.

ICogabeca camagari irantacaquerime Jesos ora te onganinate.

(Mt 4.1-11; Ir 4.1-13)

¹² Aique ora Isëre Tosorintsi páganëri Jesos cara tera ontimingani. ¹³ Cara, itimaque 40 cataguëri. Ipcasipëri Satanás icogabeca irantacaguirime Jesos ora te onganinate carari te ingantiro. Aisati ainta cobeingaripague, te iratsiquiri. Aique ipocasitaiguëri ironomirepague Tosorintsi imitocotaigapëri Ira Jesos.

Iparintaca iquenguitsaque Jesos.

(Mt 4.12-17; Ir 3.18-20; 4.14-15)

¹⁴ Cara yomianquengani Joan, aique iáque Jesos Garireaquë. Iquenguitsapëro Caninaro Irinibare Tosorintsi. ¹⁵ Icanque:

—Aroque omoncaraguitepa. Pëmbaque orequima iragáantane Tosorintsi cara intingomibintaiguëmi. Pingantaigaima yacaqueroca, pijocajiro ora picantaguetira te onganinate, pinguemisantiro ora Caninaro Nibarintsi.

Cara icoigaiguëri irogomere Jesos.

(Mt 4.18-22; Ir 5.1-11; Jn 1.35-51)

¹⁶ Cara ipanomiatanëro Jesos cara onamijaquë angaare jitacha Garirea, iniopeëri Simón aisati ireinti, Antiris. Isiriataigasegui simaguitinta ini. ¹⁷ Icampëri Jesos:

—Intsome, piguiatanëna. Jirai pitarobacaati pisiriataiguëri sima carari yamaica nomëmiro irorai pitarobacaare; pinguemisantacaguinari matsiguenga.

¹⁸Aito cara ijocanëro isiritite, yoguiataiganaqueri. ¹⁹Yogagaiganaca canta queronta cara iniopëri Jesos pite basini, Santiago aisati ireinti jitacha Joan. Iririo pitirooti itomi Sebereo. Yobetsicaigaseguiro irisiriamiento cara pitotsiquë. ²⁰Aisati icaimaigapëri Jesos. Aito cara ijocaiiganaqueri Sebereo aisati iromeraro cara ibitoquë yoguiataiganaqueri.

Icanaque Jesos cara yapatotaiga jorio.

(Ir 4.31-37)

²¹Aro yaretaigacar poeboro jitacha Caperinao. Cara cataguiteriquë comagoriantague, iroonti sábaro, icanaque Jesos pongotsiquë cara yapatotaiga joriojegui, yogometaigapëri matsiguenga. ²²Iquemaigabaqueri iquenganeintasantaiganaca yogometaiguërinta aisa icantari ibega itingomi ogótasantsiri; Ira Jesos cagari aisa icanta ira ogameantiro isanguenare Moisés. ²³Cara yapatotaiga jorio, ainta inasegui sërari inancari camagari. Catsigue icaimasantëri Ira Jesos:

²⁴—¡Ongainta! Quero picantaiguina, Jesos Nasaresati. ¿Naroco pipocasi que yamai pitsipiriacagaiguëna? Nigóquimi Obiro, Ira Caninari Itomi Tosorinti.

²⁵Isintsitsaqueri Jesos ira camagari, icanqueri:

—Pomairete. Pijátopitiri ica sërarica.

²⁶Aro ira camagari yoguimogomogootanëri, icaimanë catsiguesonori iátopitëri.

²⁷Iniaiguëri joriojegui, iquenganeintasanoiganaca, inibatoba icantaiguë:

—¿Pairo ojita oca? Iroonti iroraisonori ogameantagantsi. Ica patiro inibatëri ira camagari, aito cara iquemisanqueri iátaji. Tojai itingomintasanti.

²⁸Aique omanapague iquemocotaiguëri Jesos omagaro Garireasati aisati antagaisati ira timaigatsi jaquerora.

Jesos yogaguibegajiro iraguero Peroro.

(Mt 8.14-15; Ir 4.38-39)

²⁹Cara isotocaiganaji Jesos aisati irogomere cara pongotsiquë cara yapatotaiga jorio, icaignaque ibangoquë Simón aisati irasi Antiris. Itsibatancari Santiago aisati Joan. ³⁰Ainta ojanaisigui iraguero Simón, pinariasega osamamentoquë. Icomantëgotëro, icomantaigabaqueri Jesos:

—Ocatsiringaeguisigui iraguero Simón. Pigaguibegajiro.

³¹Aro yotsitiparo Jesos, yágobagotëro, yogaratingopëro. Aito cara pabisanajiro ogatsingaequire, pibeganaa, opaguetaguëri iraperi.

Cara sábaroquë yogaguibegajiri tojai janaitaguetatsiri.

(Mt 8.16-17; Ir 4.40-41)

³²Cara ochapitanë, icanaque paba, yamaguepëneri tojai janaitaguetatsiri cara Jesosiquë, aisati ira inantagueca camagari. ³³Pënibaque omagaro Caperinaosati yapatotaigaca cara omoroquë ibango Simón cara inasegui Jesos. ³⁴Tojai yogaguibegaguetajiri ira janaitaguetatsi. Aisati igátaiguëri tojai camagari yomisotocajiri, te iranintacaguiri camagari irinibatocotiri igótirinta.

Iquenguistsatagueque Jesos Garireaquë.

(Mt 4.23; Ir 4.42-44)

³⁵Oquëtaguetanë icabiritamananaca Jesos tsitiniquerai. Iáque paniro cara tera ontimigani yamanocopëri Iriri. ³⁶Aique icabiritanaca irogomere icogaigabitacari Simón aisati itsipa, iáiganaque, ³⁷iniaigairi, icanqueri:

—Icogaiguimini antagaisati matsiguenga.

³⁸Yotabitanëri Jesos:

—Intsome basinipaguequë poeboro aronisati. Naninti nongomantagueiguëri aisati iroronta nipocasi que.

³⁹Aro iátagueque iquenguistsatomataguequeri matsiguenga cara yapatotaiga jorio yotsatengaguetanëro omagaro poeboropague cara Garireaquë. Aisati ijocagaineri matsiguenga igamagarite.

Jesos yogaguibegajiri iribatsasetaga.

(Mt 8.1-4; Ir 5.12-16)

⁴⁰Aro ainta iribatsasetaga iátasiqueri Jesos yobaticagueritotasipari yamanopëri icanque: —Pinintica, piguëtetainaro nobatsagoro, pigaguibegajina.

⁴¹Aro icantaneintëgotanëri Jesos itimagonaguitanaca ibaco, yotsagaqueri icanqueri:

—Nocogui yamai; nagabisaicotajimi.

⁴²Aito cara opeganaa ora iribatsagoro, iquëtetanai. ⁴³⁻⁴⁴Aro igáqueri Jesos:

—Quero pairi picomantëmati. Pijáte saserirotiquë, poniaguimari irogotëmi cara aroque pabisëgotai. Pingantiro ora icanque Moisés; páganëneri saseriroti pobira, iritaquneri Tosorintsi. Aro irogótocotaiguëmi matsiguenga aroque pabisëgotai piquëtëtanai.

⁴⁵ Carari aiqero piätanëtigue cara icomantëgotëri Jesus. Ipocasitaiguërinta tojaisonoru matsiguenga yoticaiguëri Ira Jesus arota quero iqui poeboroquë, caraanti inai cara tera ontimngani. Përosati ipocasitaiguëri matsiguenga ira paniaguitacha poeboropaguequë jaanta.

2

Yogaguibegajiri emëngari Jesus.

(Mt 9.1-8; Ir 5.17-26)

¹ Aiquenta ipiganaja Jesus cara Caperinaoquë. Aro iquemocotobairi cara ainta pongotsiquë. ² Aro yapatobiritaigacari tojaisonoru matsiguenga, iaguicaro pongotsi. Aisati sotoquë ishapiicaro omoro arota quero iqui basini. Jesus icomantaguequeri matsiguenga icomantëgotëro Irinibare Tosorintsi ³ cara yaretaigapa itsibasati sërari yanatocoigapëri sërari emëngari, ira te iranëibintsate. ⁴ Icogaigabitaca iráganëri tsoماغui cara inasegui Jesus carari tiguëti inguenaque cara ingaaganëri iacaronta pongotsi matsiguenga. Aro itaganëri jonoquë pongotsi yomoroganëro yoguëantaigacari jatasintsi aisati sogatsa catingasatiquë Jesus. ⁵ Jesus igótaiguëri cara iquemisantaiguëri yoguiaqueri cara iroguibegajiri ira emëngari, icabëri:

—Yamai nomatsiguenga, nojocajimiro ora picantaguëti te onganinate; quero iguisëgotaimiro Tosorintsi, quero iquengaimiro.

⁶ Ainta isobicaigasegui irapague ogomeantiro isanguenare Moisés, iquenganeintaca iriatigui: ⁷ “¿Pairo icantobique negaca ica sërarica? Icantocotaguëtasitari Tosorintsi. Quero pairi jocaguëtirone ora te onganinate, paniro Tosorintsi icantiro”.

⁸ Igónjintasica Jesus ora iquenganeintaiga; yotabitaiganaqueri:

—¿Pairo piquenganeintobitaiga cara najitosorintsitasitaca? ⁹ Te ongomëtate nanganqueri: “Nojocajimiro ora picantaguëti te onganinate, nomaguisantocotimiro”, carari comëtaru nanganqueri: “Pingabiritima, págairo pijatasi panëitanæ”. Aroca nanganque: “Pingabiritima panëitanë”, queroca yanëiti, pisërontobitaiguëna. ¿Aisonorico? ¹⁰ Yamai noguibegajiri janaitatsiri arota nogótacagaiguëmimo cara icanquina Pabati: “Pijocajineri ira cantaguëtiro te onganinate, arota eiro quero aguisëgotëtajari”. Nagabeiro Naronta paniacha Jonogaguëtequë nomatsiguengatapë yaca quibatsica.

Aro icanqueri emëngari:

¹¹ —Atsi pingabiritima, págairo pijatasi, pijáte pobangoquë.

¹² Cara inetsaigaseguiri, icabiritanaca yágairo iatasi isotocanë. Iquenganeintasan-taiganaca omagaro botoitachari, icantaiguë:

—Caninarisonori Tosorintsi. Yamai aniaiguëro ora te oneingani jirai.

Jesus icaimëri ira Irebí (aisati ijita Mateo).

(Mt 9.9-13; Ir 5.27-32)

¹³ Aro iátaji Jesus cara onamijaquë angaare cara yapatobiripari tojai matsiguenga. Yogometaigabaqueri. ¹⁴ Aro yabisëmatanë iniopëri Irebí itomi Arijeo. Irebí irianti coigotaguë-tiri iguirequite imatsiguenga ipagantineri igobeingarite canta Iromaquënta. Icampëri Jesus:

—Intsome, piguiatanëna.

Aro yaringanë Irebí, yoguiatanëri. ¹⁵ Aique iáque Irebí ibangoquë yapaaguëri Jesus aisati irogomere aisati tojai aguiataiguëri Jesus. Aisati icaimaiguëri tojai coigotantatsiri aisati ira cantaguëtiro te onganinate. ¹⁶ Ainta bariseopague ira ogomeantiro isanguenare Moisés iniaiguëri Ira Jesus cara yapëgotaguëri coigotantatsiri aisati cantaguëtasiri ora te onganinate. Icantaguëri irogomere Jesus:

—Te ingomeite Ogometimiri. Yapëgotaguëri coigotantatsiri aisati ira cantaguëtiro te onganinate. ¿Pairo icantobica negaca? Icantaguëtiro Iriro te onganinate.

¹⁷ Cara iquemaigabaqueri Jesus, icantaiguëri:

—Ira cajigatatsi te ingoquiri jompiantatsiri carari ira janaitatsi iriro coguiri. Te iroro nopocasite nangaimaguequeri caninatatsiri, irianti nangaimagueque ira cantaguëtiro te onganinate.

Icomantë Jesus paio ora te iritibiritima irogomere.

(Mt 9.14-17; Ir 5.33-39)

¹⁸ Cara itutopiantaiga irogomere Joan baotisantatsiri aisati irogomere bariseo, ipocasitaigapëri Ira Jesus matsiguenga, yosamitapëri:

—Ititopiantaiga irogomere Joan aisati irasi bariseo. Ititaiga, yamanocotaiguëri Tosorintsi. Carari pasi pogomere yapaigui aisati yógaiga. ¿Pairo te iritibiritima?

¹⁹Yotabitaigabaqueri Jesus:

—Pigóiguë ora ametaiga cara iráque iina sérari. Ingaimaiguëri imatsiguenga, irapajaqueri, inganinataiganaque omagaro. Cara iraretaiguëma, ¿Aroco irititaigapëma? Quero itita iroontita itsibatarí ira ágantatsi. ²⁰Carari cara iriatê jaanta ira águërone iina, aro irititaiguëma igaimane. ²¹Te ongemeite pinguemisantagarantiro ora yogometaiguimi bariseoegui aisati pingonaguëro nasi nogomeantane. Pigóiguë cara pigabitëro inaga piguitsagare, páguëro inagaside manchaguintsisite. Aroca pigabitantimaro iroraisite, cara ámanaquima ontisaraanaima oquibe ora inagaside piguitsagare. ²²Aisati pigóiguë ametaiga eiro oguëro irorai oja oba cara iriraimasiquë oisha. Cara onguëchotanë obaa iritopiganëma imasi, quero paparata. Quero pairi ogantarone oja oba irinagamasiquë. Igóque cara onguëchotanë oja oba intonganë irinagamasi, oparaatëma obaa, aisati iraparaquima imasi.

Yogometocoquero sábaro Jesus.

(Mt 12.1-8; Ir 6.1-5)

²³Cara sábaroquë iquenaiguë Jesus aisati irogomerejegui cara panguirintsisiquë. Ira irogomere yágaiguëro oguitsoterei tirigo. ²⁴Iniaiguëri bariseo, icantaiguëri Ira Jesus:

—Pinetseri pogomere. Jirai isanguenaque Moisés cara quero atarobacaati cara cataguitëriquë comagoriantague. ¿Pairo te inguemisantobitaiguëri pogomere? ¿Pairo yobiguibiri-quero tirigo yamai sábaroquë?

²⁵Yotabitaiganaqueri Jesus:

—¿Teco pinibatapinintiro Sanguenari ora comantëgotaguëri David aisati ira itsibata cara jirai págaiguëri itasegane? ²⁶Aiti pan cara ibangoquë Tosorintsi, ora yobetsiquineri Tosorintsi poguëngani catingasatiquë Irro. Ora pan iroonti iraperi saseriroti, te iranintacaguiri basini iraperi. Carari icanaque David cara ibangoquë Tosorintsi cara inasegui itingimi saseriroti jitacha Abiatar. Ira saseriroti ipabaqueri ira David pan, yapëro David aisati ipaiguëri ira icarataiguira, yapaiguëro aisati iriro. ²⁷Pinetse, iritsita yobetsiquë Tosorintsi ira matsiguenga. Aique yobetsiquëneri ora cataguitëri comagoriantague. Te irobot-siquëngani matsiguenga asi sábaro. ²⁸Nopaniaca Naro Jonogaguitequë, nomatsiguengatapë cara niboguë yaca quibatsica. Iroro nocomantëgotaguëquero sábaro pairoraca anganque cara sábaroquë.

3

Cara sábaroquë Jesus yogaguibegajiri ira camabocori.

(Mt 12.9-14; Ir 6.6-11)

¹Icanaji Jesus aisati pongotsiquë cara yapatotaiga joríojegui. Tsomagui, ainta sérari camabocori poro ibaco. ²Ainta matsiguenga inetsaiguëri ira Jesus aroca iragaguibegajiri sábaroquë. Icoagaiguë ingantocotaiguëri: “Itarobacaaque Jesus sábaroquë. Te inguemisantiro isanguenare Moisés. Te ingemeite”. ³Aro Jesus icanqueri ira sérari camabocori:

—Atsi paratingue yaca aganguisatiquë cara iraniaiguëmi omagaro.

⁴Aique icantaiguëri ira matsiguenga:

—Yamai nosamitaiguëmi: ¿Pairo isanguenaque Moisés paio caninatatsi anganque sábaroquë? ¿Caninataqueco angantiro ora caninaro, oraco angantiro ora te ongemeite? ¿Aganiatiri matsiguenga oraco agamaguëri?

Imairetaiganaque. ⁵Aro inetsaguetaiguëri Jesus, iguisasërequeri aisati yogasëreca tenta iraninte inguemisantiri. Aro icanqueri sérari ira camabocori:

—Pintimagonaguitima pobaco.

Aro itimagonaguitanaca. Aito cara ibeganaa ocaninatanai ibaco. ⁶Aro isotocaiganaque bariseo cara pongotsiquë cara yapatotaiga joríojegui. Iátasitaiguëri iratirite Eroris, yosamitobaca:

—¿Pairoroco anganqueri Jesus, agamaguëri?

Cara iquenguitsatomonti Jesus aisati yoguibeganti cara angaarequë.

(Mt 4.23-25; 12.15-21; Ir 6.17-19)

⁷Aro iáiganaque Jesus aisati irogomerejegui cara onamijaquë angaare, aisati yogu-iatagaiguëri tojai Garireasati, aisati tojai Joreasati, ⁸aisati tojai Jerosaresati, tojai Iromesati, aisati tojai antatiquerosati, aisati tojai Tirosati aisa Sirósati. Cara iquemocotaiguëri Jesus cara itasanganti, iroro ipocasitobitaigapëri tojai matsiguenga. ⁹Jesus icanqueri irogomere:

—Pomapënaró pitotsi, notetimaro arota quero itsinaquina tojai matsiguenga.

¹⁰ Aroquenta yoguibiaguequeri tojai matsiguenga, itsinatsinaitobaca janaitatsiripague, icogaiguè irotsagatiri Ira Jesus. ¹¹ Ira matsiguenga inantagueca camagari, cara iniaiguèri Jesus yobaticageritotasipari. Icaimaiguè camagari:

—Jesus, Obiro Itomi Tosorintsi.

¹² Aro icantasantaiguèri camagari Jesus:

—¿Pairo picomantècobiriquina? Pomairetaigue, quero picomantègotina.

Icoigaiguèri irogomere Jesus.

(Mt 10.1-4; Ir 6.12-16)

¹³ Aique iáque Jesus cara oguitojaquè, icaimaiguèri irogomere ira icoigaiguè, aro iátasiguèri. ¹⁴ Icoigaiguè icarati 12, icantaiguèri:

—Piguiataiguena, pintsibataiguena. Najitaiguèmi nagátane. Aiquenta nagátaguequemi pinguenguitsatomotagueantè. ¹⁵ Aisati nagabiauquemi arota pigátaiiguèri camagari pijocaiguèri.

¹⁶ Icoigaiguèri 12: Simón aisati ijiqueri Peroro; ¹⁷ aisati Santiago itomi Sebereo, aisa Joan ireinti Santiago; ijitaiguèri ira pitirooti Boaneriiji ora cantatsi yosiacaró omanarontsi; ¹⁸ aisati Antiris, Jeripe, Baritoromé, Mateo, Tomás, aisati Santiago itomi Arijeo, Tareo, Simón ira nintasantiro ibaísite; ¹⁹ aisati Joras Cariotisati ira ágagantèri Jesus.

Ora ijitocotaiguèri Jesus matsiguenga.

(Mt 12.22-24; Ir 11.14-15)

²⁰ Ipgaigapaa pongotsiquè Jesus aisati irogomere. Aitosati yapatobiritaigapari tojai matsiguenga irooti cara te irapabintae Jesus teatisati irogomere. ²¹ Cara iquemocoqueri imatsiguenga Jesus, iátasitaigabitaari iráganairime ibangosonoriquè. Icantobaca:

—Te iraneicotajima Jesus; intsome áganairi.

²² Aisati ipocasitaigapèri Jerosaresati irianti ogomeantiro isanguenare Moisés, icantocotasitaigapari:

—Ica sèrrica inancari Berisebó aisati ijita Satanás itingomi camagari. Iroro ijogan-taguètari camagari.

Yotabitaiguèri bariseo Jesus.

(Mt 12.25-32; Ir 11.16-23; 12.10)

²³ Aro Jesus icaimaiguèri matsiguenga. Cara ipocaigapè, icantaigabaqueri quingabaguirentsiquè:

—¿Ati-roco ingantima Satanás irojocajima iriati? Quero icantiro. ²⁴ Aroca irógobaguima matsiguenga timaigatsi quibatsiquè, ¿Queroco itsongabacaga? ²⁵ Aisa icanta matsiguenga pongotsiquè, queroca iquengaiga, querootisati itiomotobaga caninasati. ²⁶ Tesonori iromi-tocotina Satanás cara nojoguètiri camagari. Ipègatina. Arome Satanás inguisaiguèrime igamagarite, ¿Ati-roco ingantima itingomibintaiguèmarime camagarijegui? Querome iquengaiga querome pini iragáantane Satanás. ²⁷ Ira Satanás aisati icantari ibega sèrari sintisiri. Aiti ibiane, ichaapite, itongomento, omagaro ora yomisantantaro ibango querota icositiri pairoraca irasi. Carari iribocapèca basini sèrari sintsirisonori, irabisapèri isintsire, iragabiapèri, iraguèshotapèri, irágopitapèri irógomento ora yabentabeca, irágopitapèri pairoraca icogui. Carari queroca yoguèshotiquiri quero yágui pairoraca. ²⁸ Aisonori nangantasantaiguèmi cara Tosorintsi irojocaguetajineri matsiguengajegui ora icantaguèti te onganinate aisati ora icantasitagueta, quero iguísasèretajiri, ²⁹ carari quero icábintsiri ira cantègotaguetasitaro Isère Caninaro. Iriátè Sharincabeniquè.

³⁰ Icanqueri Jesus negaca aroquenta icantocotaguètasitari matsiguenga cara inancari Jesus camagari.

Icomantè Jesus pairi imatsiguengasonori.

(Mt 12.46-50; Ir 8.19-21)

³¹ Piátasiqueri iniro Jesus aisati ireinti. Yaratingaigapè sotoquè, icaimagantaiguèri Jesus. ³² Tsomagui, isobiaque Jesus yogometaigaseguiri arosaronori matsiguenga sobicaigatsi ishongaigacari. Aro icomantaiguèri:

—Parepa piniro aisati pirentijegui. Ainta sotoquè; icogaiguini irinibataigapèmi.

³³ Yotabitaiganaqueri Jesus:

—¿Pairoroco inato? ¿Pairoroco igueegui?

³⁴ Aro inetsaguequeri ira sobicomotaigaseguiri icantaiguèri:

—Ocaegui iro-ro inato, icaegui iro-ro igueegui. ³⁵ Pairiraca cantatsi ora icocaqueri Tosorintsi, irianti nomatsiguengasonori: najitaiguèri igue, aisati tsio, aisati inato.

4

Jesos icomantëgotiri ira panguitatsiri.

(Mt 13.1-9; Ir 8.4-8)

¹ Aitosati yoniagantaji Jesos cara onamijaquë angaare. Yapatoibiripari tojaisonori matsiguenga irooti yoteantanaca cara pitotsiquë isobiaque. Përo cara inaiguë matsiguenga cara onamijaquë. ² Tojai yogometaguequeri, yogomeantacaro quingabaguirentsipague. Aro icantaguequeri:

³—Pinguemaigue: ainta panguitatsiri iáque imiongaguitaguequero oguitsopague tirigo. ⁴ Opariguitagarantapë arosata oguitso onamiquë abatsi. Ipocaigapë tsmiripague ya-paigapëro oguitso. ⁵ Basini tirigoguitso opariguitagarantapë mopësiquë. Te ine tojai quibatsi, aropirigasata arosonorinta mopë osobibatsaquero. Omanaanti piabitanaca; ⁶ cara ijonogatapë paba yogasiguiricapëro tenta ine oparipague. ⁷ Basini opariguitë cara totseisiquë; aro piabitanaca tirigo carari ora totsei pogamaguëro tirigo. Te ine oguitso. ⁸ Aiti basini tirigoguitso pariaquenguitsi caninabatsariquë quibatsi, pianë, piqubianë caninasati, oguitsotasantane. Aiti panguirintsi oguitsotanë ocarati 30, aisati basini ocarati 60, aisati basini ocarati 100 oguitso. ⁹ Aitica piguemitara ora piquemanta, pinguemisantiro ora nacantaiguëmi.

Paio yogomebirique Jesos quingabaguirentsiquë.

(Mt 13.10-17; Ir 8.9-10)

¹⁰ Cara iáiganaque matsiguengajegui, ainta Jesos paniro aisati itsibataigari ira aguiataiguëri aisati irogomere icarati 12. Yosamitaiguëri:

—¿Paio ocanti ora posiacagantacái carani?

¹¹ Icantaguëri Jesos:

—Nocogui pigóigue ati icanta Tosorintsi cara igáanti, ora te ogótingani jirai, carari ira matsiguengapague nogomeantacari quingabaguirentsipague nosiacagantineri tenta iraninte irogóigue. ¹² Inetsabetaigaca carari te iranee, iquemaigabitaca carari te inguemaigue, te irogótaigabaquero ora nacantaigabitacari arota quero ipasiniatitaji querootisati ijocajiro ora icantaguëti te onganinate. Iroro quero icábintsaguëtiri Torosintsi.

Igótacaiguëri irogomere ora ocanti quingabaguirentsi.

(Mt 13.18-23; Ir 8.11-15)

¹³ Aisati icantaguëri Jesos:

—¿Teco pinguemaigabaquero oca quingabaguirentsi? ¿Atiroco pingantaiguëma pinguemaiguëro basinipague quingabaguirentsi? ¹⁴ Aro noniaguëmi ati ocanta iguengabaguire panguitatsiri. Ora oguitso aisati ocantara Irinibare Tosorintsi. ¹⁵ Ora pariaquenguitsi abatsiquë ocantari ibega matsiguenga iquemaigabitacaro Irinibare, carari omanapague ipocasiqueri Satanás yágabitsaqueri ora iquemabeca, yomagusantacaqueri. ¹⁶ Ora pariaquenguitsi mopësiquë aisa ocantari matsiguenga quemaigabitacaro nanibare. Icaninabentabecaro carari iquemisantabecaro arosata. ¹⁷ Yosigarora panguirintsi ora te ine opari omanapague ocamaque. Cara iguisaneintobiqueru imatsiguenga, te përo inguemisantiro nanibare, opomirintsitomotanacari, aro ijocajiro yomagusantajiro cara iquemisantabeca tenta irogótasantiro. ¹⁸ Ora pariaquenguitsi totseisiquë aisati ocantari matsiguenga quemaigabitacaro nogomeantane, ¹⁹ carari iquemisantabecaro arosata. Carari cara iquengasantanëro pairoraca inaguetatsi yaca quibatsica, iquengasantanëri iguireguita inintasantiri, iquengasantanëro inganinabentiro pairoraca icogui inganque, aro yomagusasantanëro Irinibare Tosorintsi, te inguemisantanaïro. Te ine oguitso, te ingante ora caninara. ²⁰ Ora oguitso pariaquenguitsi caninabatsariquë quibatsi, otojaiganaque, aisati ocaantagari matsiguenga porocague iraequi quemisantantobëro ora nogometiri. Përosati iquemisantane, icogui inganque omagaro ora icocaqueri Tosorintsi. Aisa icantaro pibega panguirintsi otojaiganaque openguitereï ora inatsi oguitso ocarati 100, aiti basini cara pinë 60, aisati basini cara ocarati 30 oguitso.

Jesos yosiicagantineri irogomere michero.

(Ir 8.16-18)

²¹ Aisati icantaguëri Jesos:

—Oboqueroca michero, quero oguiro osobiquë cobiti. Querootisati oguiro osobira somamintotsi. Carari oguëroca jonoquë aro ongonijaque pairoraca. ²² Aitica ománocotaga yamai aro ongonijaque aiquenta. Ora te ogótingani yamai ogóquengani aiquenta. ²³ Aitica piguemitara ora piquemanta, pinguemisantiro ora nacantaiguëmi.

²⁴ Aisati icantaguëri basini:

—Yamai pinguengasantiro ora piquemaque. Aroca pigótobëro arosantaanti ora nongomantëmi, aisati pingomantiri basini matsiguenga nogomeantane; aroca pigabisëneri ora

pigóque, aro tojai nogótacagasantanēmi obiro aisati. ²⁵ Pigóiguē arosata yamai, carari aroca pinguemisantanēna nogótacagasantaiguēmīro nogomeantane. Irari basinipague te ingogue inguemisantina, quero iquemaiguina. Nágabitsaqueri ora iquemabeca, iromaguisanquero.

Jesos yosiacagantineri ora oguitso pianē piquibianē.

²⁶ Aisati icanē Jesos:

—Cara igáanti Tosorintsi ocantari ibega sērari ipanguitēro oguitso imiongaguitiro cara quibatsiquē. ²⁷ Cara isamapē, icabirica pabisanaque tojai cataguiteri. Aro pianē oguitso piquibianē, carari te irogóte casintaro átiraca ocanaca. ²⁸ Irotsita contepatsine otsoba cara quibatsiquē, aique osi, aique oquibianē opoa, aique onteगतanē onguitsotanē. ²⁹ Cara osamatanē oguitso, aro irobibinguiquero.

Jesos yosiacagantēneri mositasa.

(Mt 13.31-32; Ir 13.18-19)

³⁰ Aisati icanque Jesos, yosamitaiguēri irogomere:

—¿Yamai ati icanta Tosorintsi cara itingomibintiri matsiguenga? ¿Pairo nanganquero nosiacagantiro iragáantane? ³¹ Aisati ocantaro pibega oguitso mositasa, iroonti quiripiquirosonori. ³² Carari omanguitēnganica oquibianē, abisēro basinipague panguirintsi. Piquibianē otseगopague, aro pamamegagueta aro ipocasitaiguēro tsimiripague, yogaiquēro imagospague.

³³ Aro tojai Jesos yogomeantaro quingabaguirentsipague, yosiacagantēneri matsiguenga Irinibare Tosorintsi. Aroca iquemobēro arosata, aro arosata yogomequeri. ³⁴ Yameca Jesos yogomeantaigari quingabaguirentsi ira botoibiritaigapari. Iroonti quingabaguirentsi inibatantari. Carari icomantasantaiguēri irogomere casiriconiati ora ocanti quingabaguirentsi.

Jesos yoguimairenquero sintsiri coguentima.

(Mt 8.23-27; Ir 8.22-25)

³⁵ Irooti cataguiteri cara otsitinanē, Jesos icantaiguēri irogomere:

—Intsome antatinta angaare.

³⁶ Aisati icantaiguēri matsiguenga ira botoibiritaigari onamijaquē:

—Yamai atsi pijáigue pobangoquē.

Ainta Jesos pitotsiquē. Aro yotetaiganaca irogomere iátocoiguē aiquero antatinta. Aisati yoguiatēgotaiquaneri basiniquē pitotsipague. ³⁷ Aro ocoguentimapē sintsirisonori, omotoncaatanē nija, potiatanaca pitotsiquē. Pēnibaqueme ojaganēmame nija.

³⁸ Ainta Jesos cara otsitiquē pitotsi isamasigui yonaguitosigaro manchaguintsi. Iátasiqueri irogomere, icabocapēri, icantaiguēri:

—¡Ogometinaril! ¿Pairo te pintsorogobite? ¡Pigabisaicotái! ¡Pēnibaque atsiticoiguē!

³⁹ Icabiritanaca Jesos, icanque:

—Omairiatanaeta angaare, osantocotanaeta coguentima.

Aito cara osantocotana coguentima, omairiatasantana angaare. ⁴⁰ Aique icanqueri irogomere Jesos:

—¿Pairo pitsorogobitaiguē? ¿Pairo terai pinguemisantobitina?

⁴¹ Itsorogasantaiquanaque irogomere, iquenganeintasantaigaca, icantobaca:

—¿Pari Ica? Inibatē, oquemisantasantanēri coguentima aisati angaare. Yoguimairenquero.

5

Jesos yogabisaicoqueri sērari inancari camagari.

(Mt 8.28-34; Ir 8.26-39)

¹ Aro yaretocoiganaca antatinta cara itimaigui Gararasati. ² Yaguētanē Jesos cara pitotsiquē. Aro cara itia camatsirini ipaniaca sērari inancari camagari. ³ Itimi cara itia camatsirini. Te pairi aguēshotantimarine ora coshotsari sogatsa. ⁴ Aroque tojaitaque yoguēshotapinintaigabitacari imatsiguenga cara iguitiquē aisati ibacoquē carari itimishairo yobēshopiantairo yoguiripijitajiro. Te pairi agabeirine. ⁵ Pērosati tsitimiriquē aisati cataguiteri quē iátopiantē cara itia camatsirini aisati oguitojapaguequē. Pēro cara icaibainteti aisati itobaguecaro mopē. ⁶ Inioberē jaanta Ira Jesos, isigasipari yobaticagueritotasipari, ⁷ icaimapē icampē catsigue:

—¿Pairo picantobipēna naro, Jesos Itomi Tosorintsi jonoquēnintaberi? Iniaquinanta Tosorintsi, nomanaquemini cara quero pitsipiriaguina.

⁸ Inibatē negaca aroquenta Jesos igáqueri:

—Obiro camagari quimingari, pijátopitairi ica sērarica.

⁹ Aisati yosamitēri Jesos:

—¿Pairo pijita?

Yotabitanëri:

—Tojai najitaiga arosonorinta ninaigui. ¹⁰ Quero pigátaiguina jaanta.

Tojai yamanasantobëri Ira Jesus. ¹¹ Ainta inaigasegui arosonori chanco yapaigasegui cara tongagariquë. ¹² Aro ira camagari yamanaiguëri Jesus:

—Aroca pijocaiguëna, pigátaiguëna cara chancoheguiquë ninampëmari iriro.

¹³ Yotabitanëri Jesus:

—¡Atsi pijáiguel!

Aro isotocaiganajiri sërari camagari, inantaigapari ira chancohegui. Aro isigaiganaca chanco cara taranguë, imatsematseiganaque angaarequë tobotn tobotn. It-siticaiganaque ijogataiganaca omagaro chanco icarati 2,000. ¹⁴ Aro ira omisantaigu-iri chanco isigaiganaca icomantagueigapëri imatsiguenga cara poeboroquë aisati togantsipaguequë. Aique iátasitaiguëri Jesus tojai Gararasati iraniaiguëro omagaro atiraca ocanta. ¹⁵ Iniaigapëri Ira Jesus aisati ira inabitaca camagari. Ainta isobiaque iguitiquë Jesus, iquitsagasiga, iquengaa caninasati, aisati inibatai caninasati. Aro itsorogaigapë matsiguenga. ¹⁶ Ira niaiguëro antagaisati icomantasantaigabaqueri basini ati icanta Jesus yogabisaicoqueri ira inabitaca camagari aisati icomantëgotaiiguiri chancohegui. ¹⁷ Aique iraugui Gararasati yamanaiguëri Ira Jesus:

—Atsi pijátaje yamai, quero pipocaji yaca aisati.

¹⁸ Aro yotetanaa Jesus pitotsiquë. Yamanabecari ira inabitaca camagari:

—Nocoguini naguiatanëmi.

¹⁹ Carari te iranintacaguii Jesus. Icanqueri:

—Quero poguiatina, pinëni. Pijátasitiri pomatsiguenga cara pobangoquë, pingomantiri ora icanquemí Tosorintsi tojai icábintsëmi.

²⁰ Aique iáque sërari icomantaguepëri Gararasati antagaisati Tecaporisiquë cara ocarati 10 poeboro ati ocanta cara yogabisaicoqueri Jesus. Iquenganeintasantacari omagaro quemaiguëri.

Jesús yoguibegajiro araasetatsiri; aisati yoganiatairo irisinto Jairo.

(Mt 9.18-26; Jr 8.40-56)

²¹ Aique imontëcotanaa Jesus. Cara yaretaja onamijaquë antatinta, yapatoibiritaigapari onamijaquë tojai matsiguenga. ²² Yarepari sërari jitacha Jairo. Iriro obatacaguii jorío cara pongotsiquë cara yapatotaiga. Cara iniopëri Jesus yobaticagueritotasipari, ²³ tojai yamanasantapëri:

—Pënihaque ongamaque nasinto. Popogopë Obiro pogapënero pobaco arota obeganaima.

²⁴ Aro iátacaqueri Ira Jesus. ²⁵ Ainta tsinane piraaseti cosamani ocarati 12 osarini, tojai otsipiriaque. ²⁶ Pipënantaguetabecari jompiantatsiri omagaro ora pasinta, te arpei te iromitocotëmatiro. ²⁷ Oquemocotobëri Jesus, aro piátasiqueri itisitaquë Jesus, oquenopë antagaisatiquë matsiguenga, potsagaqueri Jesus cara ocarati iguitsagare, ²⁸ oquianca: “Aroca iroonti notsagaitëri onamiquë iguitsagare aroje iragaguibegajina”. ²⁹ Potsagaqueri, aito cara pibeganaa, aro ocaratanai oraa. ³⁰ Aro igónijninca Jesus cara yogaguibegajiro poro itasorintsiquë. Yapisitaca, yosamitaiguëri matsiguenga:

—¿Pairi otsagaitënaró naguitsagare?

³¹ Yotabitaiganaqueri irogomere:

—Ishongaiguëmi tojai matsiguenga itsinatsinataiguëmi. ¿Pairi posamitobiquena: “¿Pairi otsagaitënaró naguitsagare?”

³² Përosati inetsaguetaiguëri matsiguenga arota iraniaqueri pairiraca otsagaqueri. ³³ Aro otsoroganë tsinane omogomogoatanaca. Pigóque tiguëti ongantima ománanëma, cara igóquero Jesus, aro parepari pobaticagueritotasipari, ocomantëri antagaisati. ³⁴ Icanquero Jesus:

—Nomatsiguenga, aroquenta piquemisanquina nogaguibegajimi. Yamai pijáte pingaigasëretanae, pomagoriasëretanë.

³⁵ Cara inibasigui Jesus, yarepa iratirite Jairo ipaniaca ibangoquë, icomantapëri:

—Aroque ocamaque pisinto. Pitsipiriasica yamai páganëri Ira Ogameantatsira.

³⁶ Iquemobëri Jesus, yotabitanëri ira obatacaguii jorío:

—Jairo, quero pitsorogui. Patiro pinguemisantina.

³⁷ Te iranintacaguii quero pairi aguaitirine, irianti ira Peroro, aisati Santiago, aisati Joan ireinti Santiago. ³⁸ Yaretaiganaca ibangoquë Jairo. Iniaigapëri tojai matsiguenga iraicotaiguëro catsiguesonorí irisinto Jairo aisati yogasëretocotaigacaro. ³⁹ Aro icanaque Jesus tsomagui, icantaigapëri:

—¿Pairi picaiabiririti? ¿Pairi piraicobiritaiguëro? Teni ongame janequi, pisamini.

⁴⁰ Icabíntsátaigabaqueri; aro igátaiguèri antagaisati irisotocaigue sotoquè. Aro yáganèri iri janequi, aisati oniro, aisati irogomere icarati maba, icaiganaque tsomagui cara pinasegui ogamaga irisinto Jairo. ⁴¹ Yágogotapèro obaco Jesus, icanquero:

—Tarita, comi.

Ocanti: “Janequi, nanganquemi pingabiritima”.

⁴² Aito cara ocianitanai, pipigapaa osère, ocabiritanaa, oparintanaa panèitanai aro-quentá pogabisè 12 osarini. Iniaiguèro ira inasegatsi tsomagui, iquenganeintasan- taiganaca. ⁴³ Aro icantasantaiguèri Jesus:

—Quero picomantèmatiri pairiraca. Pomeró operi.

6

Ipiganaja Jesus Nasarequè.

(Mt 13.53-58; Ir 4.16-30)

¹ Aique iáque Jesus, ipiganaja yaretanaa iguebatsitequè. Yoguiataiganajiri irogomere. ²⁻³ Cara cataguteriquè ora camagoriantague, icanaque pongotsiquè cara yapatotaiga jorío, yogomeantapè. Iquemaigabaqueri tojai matsiguenga, iquenganeintasan- taigacari icantaiganaque:

—Ica sèrarica, irianti nomatsiguengasonori. ¿Nega opaniaca oca yogomeanti? ¿Nega opaniaca itasorintsite ora itasonganta? ¿Cagarico ira caripintero obetsiquiro mesa, sobi- cementotsi, ira otomi María, ireinti Santiago, aisa José, aisati Joras, aisati Simón? ¿Aintasati iritsiroegui otimi yaca poebroica?

Aro itsoingaguèri, icomètaigacari, iguisaneintaiguèri. ⁴ Icanèri Jesus:

—Ainta quemisantaiguèri ira quinguitsatiro Irinibare Tosorintsi, carari itsoingaguèri imatsiguengasonori.

⁵ Tenta inguemisantaiguèri cara Nasarequè te tojai iritosongantagueté Jesus cara. Porocagueanti yoguèro ibaco cara janaitatsiriquè, yoguibegajiri. ⁶ Iquenganeintasan- tanèri imatsiguenga Jesus tenta inguemisantaiguèri.

Jesus igátaiguèri irogomere inguenguitsataguetomotiri matsiguenga.

(Mt 10.1-15; Ir 9.1-6)

Iquenagueque Jesus poeboropaguequè. ⁷ Aro yapatotaiguèri irogomere caratatsi 12, igátaguequeri pitenaque, yagobiacagaiguèri irojogantaguequimari camagari. ⁸ Icantasantaiguèri:

—Nagátaiguèmi yamai, carari quero páganèro pairoraca. Iroonti páganè pigotiqui. Quero páganèro poperi, querootisati pitsaguine, querootisati quirequi. ⁹ Aisati pisapatote poganèma carari quero páganèro pite piguitsagare.

¹⁰ Aisati icanqueri:

—Atiraca pijáguè, pingapè ibangoquè ira cajemobèmine. Pintiomotiri irooti cara pigaganèma. ¹¹ Aitica poeboro cara te iranintaigue irágacananataigabaquemí te inguemisantaiga- baquemí, popotetanèneri quibatsipane pisapatotequè, aro pigaganèma. Pingantiri: “Tenta pinguemisantobèna, aiquenta iratsipiriacaquemí Tosorintsi”.

¹² Aique iquenaguetaiganaque, iquenguitsataguetomotaiguèri matsiguenga:

—Pingantaigaima yacaqueroca obirojegui, pijocajiro ora picantaguetira te onganinate.

¹³ Tojai igátaiguèri camagari jaara. Aisati itúriantari oguei asaitona tojai ira janaitague- tatsi, yogaguibegajiri.

Eroris yógagantèri ira Joan.

(Mt 14.1-12; Ir 9.7-9)

¹⁴ Tojai matsiguenga iquemocotaiguèri Jesus, aisati iquemocoqueri Eroris cobeingari cara Garireaquè. Icanè:

—Irirojengari Joan baotisantantatsiri, ira camènguitsi caniatanaatsi. Iroro itasongan- taguèti.

¹⁵ Carari icanque basini:

—Irianti Erías.

Basini icantocotaiguèri Jesus:

—Irianti comantantatsiri cantaca ira comantantatsi jirai.

¹⁶ Carari Eroris iquemocoqueri omagaro, icanque:

—Irirojengari Joan, ira nibatèacagantabitaca, caniatanaatsi.

¹⁷⁻¹⁹ Aro jirai Eroris yágabitsaqueri iina ireinti jitacha Jeripe. Iina jitacha Erorías. Icantopi- antèri Eroris Joan:

—Te ongomeite págabitsatiri iina pirenti. Ocanti isanguenare Moisés: “Quero pinebetaro iina basinipague”.

Oguisaneinqui Joan Erorías, ocogasantabitaca ógagantirime carari te ongantiro tenta iranintacaguiro Eroris ira ojimentaa. ²⁰ Eroris iniacaninatèri ira Joan. Igóqueri Joan caninari, iquemisanqueri Tosorintsi. Te iranintacaguiro Erorías cara ógagantiri. Iquenganeintabitanacari Joan Eroris iquemisantabecari; icogasanti inguemiri carari te inguemisantiri. ²¹ Aro omoncarapaa cataguitèri cara iquianca Eroris cara inè jirai. Icaimaganaitaiguèri tojai itingomipague aisati itingomipague soraro aisati basini ira obatacagaiguèri Garirreasati. Yapaagaiguèri. ²² Aro ocanaque osinto Erorías, obairapè. Pogaininataiguèri Eroris aisati igaimane. Icantasanotèro Eroris:

—Pomanina pairoraca ora pininti. Aro nomèmiro. ²³ Cara aisonori iniaquina Tosorintsi, igóque quero namatobitimi, nangantasanotèmi, pairoraca pomanaguetina, aro nomèmiro. Pingoicoquinaca aganguisati nagáantane, aro nomèmiro.

²⁴ Pisotocanai iroro, ocomantèro oniro, ocanquero:

—¿Ina, paio nomanakeri?

Potabitanèro:

—Pomaniri ora iguito Joan baotisantantsiri.

²⁵ Ocanaji omanapague, ocanqueri Eroris:

—Nocoguini yamaica pógagantiri Joan baotisantantsiri, aique pomabaquinaro tsi-betaquè iguito Joan.

²⁶ Aro tojai yogasèretasantaca cobeingari cara icantasanotèro quero yamatobitiro, aisati aroquenta iquemaiguèri antagaisati igaimane ora icantasanotèro irisintotsari. ²⁷ Aro Eroris igáqueri poro soraro ógantantsiri iriáte omanapague iráquintiro iguito Joan. Iáque cara iromingamentoquè yobatèaqueri ira Joan. ²⁸ Aique yamapènero tsibetaquè iguito Joan, ipèro irisintotsari Eroris. Iroroque opèro oniro. ²⁹ Cara iquemaiguè irogomere Joan, iátasiqueri, yágaiganakeri igamaga Joan itiajiri.

Itasonguèro pan Jesus, yomitojaiguèro.

(Mt 14.13-21; Ir 9.10-17; Jn 6.1-15)

³⁰ Ipiagaipaa irogomere Jesus. Yapatotaigapa icomantaigapèri antagaisati ora icantaiguè aisati omagaro yogometaiguè. ³¹ Ainta tojai matsiguenga ira bocasitaigapèri Jesus, aintasati ira pigaiganajacha. Tigueti ingantima irape Jesus aisati irogomere. Aro icantaigabaqueri Jesus:

—Intsome casiriconiati arota pomagoriaigue arosata.

³² Aro yotetaiganaja pitotsiquè iátocotaiguè cara tera ontimingani. ³³ Carari iniaigabaqueri matsiguenga cara iáiguè, igótaigabaqueri negaraca iriáiguè. Aro ipaniaigaca poeboropaguequè, isigaiganaca cara onamijaquè, ibataiguèri Jesus aisa irogomere, yaretaigaca teraiquerai iragatocopè Jesus, yoguaigapèri. ³⁴ Cara yaguètanè Jesus cara pitotsiquè, iniopèri tojaisonori matsiguenga yapatobibiricari, icantaneintègotagapèri inaisiguinta icantaigasega oisha ira te irine ira omisantiri. Aro tojai yogometaigapèri pairoraca.

³⁵ Cara ochapinitanè icantaigapèri irogomere:

—Yaca teca ontimingani, aroque ochapinitanè. ³⁶ Yamai pigátaiguèri icaegui matsiguenga iriátaguetaje poeboropaguequè aisati togantsipaguequè iromananteta iraperi, tenta ine yaca.

³⁷ Yotabitaiganakeri Jesus:

—Pomaiguèri obirojegui ora irapaiguè.

Icantaiguèri irogomere:

—¿Pairo nangantaiguè? ¿Picogui najáte nomanantè pan ingaraque 200 tenario, nomague-taiguèri? Querojengari cotonguiboro aguireguite.

³⁸ Yosamitaiguèri Jesus:

—¿Ati ocarati inatsi pasiatiegui pan? Atsi pijáte, pinetsero.

Cara igóquero irirojegui, icanqueri:

—Aiti pabocorooti pan, aisati ainta pite sima.

³⁹ Icantaguèri irogomere Jesus:

—Pigasobicaiguèri antagaisati irisobicagueigue arosatapague cara tobarisiquè.

⁴⁰ Aro isobicagueiguè. Ainta ira caraquenguitsi 100, aisati basini icarataiguè 50, aisati icantaigaca basinipague. ⁴¹ Aique yáguèro Jesus ora pabocorooti pan aisati pite sima, inetsanaque jonoquè, icanqueri Iriri:

—Pabati, nacarasiatocoquemiro oca noperijeguica popaiguèna.

Aro itibatsaaguequero pan Jesus, yotsatengaiguèri irogomere arota imaiiguèri matsiguengajegui. Aisati yotsatengaigacari sima. ⁴² Yapaiguè antagaisati, iquemaigaca.

⁴³ Aique yobiitaguetajiro irogomere ora irangarataneegui, iagajiro 12 cantiri.

⁴⁴ Yapaiguèro pan tojai sèrari icarati 5,000.

Yanëiatanë Jesos jonoicaa nija.

(Mt 14.22-33; Jn 6.16-21)

⁴⁵ Aique icanque Jesos:

—Nogomere, potetaiguema pitotsiquë. Pomontiaiganajima, pobatina antatinta cara Betsairaquë. Yamai nagâtaiguëri ira botoibiritaiguina iriâique ibangopaguequë.

⁴⁶ Aro igâtaiguëri yobetsaitaiganajari. Aique iâque Jesos oguitojaquë yamanopë, inibataqueri Iriri. ⁴⁷ Ainta Jesos paniro inë cara otsitinitanë. Ora pitotsi pinë aganguijaquë. ⁴⁸ Iniaiguëri irogomerejegui icomatabitacaro pitotsi, carari poguipigapigatocoqueri sintisiri coguentima. Aro igogaraaque iâque Jesos aiqero pitotsiquë, yanëiaapë jonoicaa angaarequë, te iritsitigüe. Irabisanaquerime, ⁴⁹ carari iniaigabaqueri yanëiaapë jonoicaa nija, icaibaitaiguë icantobaca:

—¡Eeel ¡Coraque camagari cara irâganacâil

⁵⁰ Antagaisati iniaigabaqueri, itsorogasantaignaqueri. Aro yotabitaigapëri Jesos:

—Quero pitsorogui. Naanti bocapaatsi, pinganinasëretanëtigüe.

⁵¹ Aro yotepa Jesos pitotsiquë, itsibataigaari. Aito cara osantocotanai coguentima; iniaiguëro irogomere iquenganeintasantaignanaca. ⁵² Aisati icanta iniaigabitacaro pan cara itasonguëro Jesos carari te inguengairo. Aisati iniaigabitacari Jesos cara yanëiaquero nija, carari terainta irogõtiri Irironta Itomi Tosorintsi.

Jesos yogaguibegajiri janaitaguetatsiri cara Jenesarequë.

(Mt 14.34-36)

⁵³ Aro imontiaiganaja. Yaretaiganaja Jenesarequë. Yoguëshotëgotaiigapëro ibito. ⁵⁴ Cara yaguëtaiganaque, igõtobëri Jesos matsiguenga. ⁵⁵ Cara igõiguë ainta Jesos aro isigaiganaca icomantobaguetanaca matsiguengajegui poeboropaguequë, yamaigapëri janaitaguetatsiri yamantaguepari jatasintsi. ⁵⁶ Iquenagueque Jesos poeboropaguequë aisati togantsipaguequë. Negaraca iâque, yamapëri janaitatsiri, yoguëquineri iranganguitërequë cara iniobëri Jesos yamanaiguëri:

—Pinintaguina notsagaitimiro piguitsagare cara ocarati.

Aro yogaguibegajiri antagaisati ira otsagaqueri.

7

Ora yametaiga jorio.

(Mt 15.1-9)

¹ Aro yapatobiritaigapari Jesos ira bariseopague aisati ira ogomeantiro isanguenare Moisés. Ipaniaigaca Jerosarënuë. ² Iniaigapëri irogomere Jesos cara yapaigui; te inguibocotima. Icantaguë bariseo:

—Caninataque inguibocotaiguema queroquerai yapi arota iraganinasëretima. Cara te inguibocotima, iroonti quimingari ibaco.

³ Yametaiga bariseoegui aisati omagaro joriojegui queroca iquibocotasanta, quero yapi, cara yametaiga jirainisati aisati yogometaiguëri ira jorio. ⁴ Cara iripigaima cara poeboroquë cara yapatotaiga matsiguenga ipimantagueti pairoraca, queroca iquibocota jorio, quero yapi. Aisati yametaiga inguibopiantiro pairoraca basini: pojo, pachaca, oya, omagaro. ⁵ Aro ira bariseo aisati ogomeantiro Sanguenari yosamitaiguëri Ira Jesos:

—¿Pairo te irometaigabiritimaro pogomere ora yametaiga omatsiguenga jirai? Yapan-taigacaro ibaco quimingari. Icantagueti ora te onganinate.

⁶ Yotabitaiganaqueri Jesos:

—Obirojegui matobiantatsiri cara aisonori icomantëgotaiiguëmi Isaías cara isanguenague jirai:

Icanë Tosorintsi: “Ica matsiguengaca inibatasitëgotina ora caninaro, carari te inguenganeintina. ⁷ Yamanocotasitina carari yapatotasitaiga; iroonti yogomeantaigui irasi matsiguenga”.

⁸ Aisati icantaiguëri Jesos:

—Teni pinguemisantiro ora icanquemi Tosorintsi, pijocasicaro; iroonti piquemisantisa ora yogomeantiro matsiguenga. ⁹ Cara pametaigaro iroonti irasi pomatsiguenga, pitsoingauguëro ora icanque Tosorintsi. ¹⁰ Isanguenague Moisés:

Pinguemisantiri piri aisati piniro. Ingameta ira cantëgotaguetasitari Iriri aisati iniro.

¹¹ Carari obirojegui, pogometaiguëri pomatsiguenga: “Pingantiri ira asintimi: ‘Quero nomitocotimi. Nomëmime quirequi, nangantaneintëgotëmime carari aroque natsita nacanqueri Tosorintsi nopëri Iriri naguireguite’ ”. ¹² Cara picanque negaca, te pinintaguiri ingâbintsairi iriri aisati iniro, ¹³ te pogomeantiro Irinibare Tosorintsi, teatisati pinguemisantiro. Iroonti piquemisantaiguëro ora yametaiga pomatsiguenga jirai aisati pogaganëneri basini. Aitosati aiti tojai ora picanque cantacha nega.

Jesos yogometocoquero pairoraca aguimingasëretiri matsiguenga.

(Mt 15.10-20)

¹⁴ Aique Jesos icaimaiguëri ira botobiritaigari, icantaiguëri:

—Pinguemina, obirojegui, pigótiro oca nocomantaiguëmica: ¹⁵ caninataque opaiguero pairoraca queronta poguimingatiro asëre. Orari ora inibatasisagueta iroso aguimingasëretacá cara aquianquero quimingaro. ¹⁶ Aitica piguemita ora piquemanta, pinguemisantiro ora nacantaiguëmi.

¹⁷ Aro ijocaiganaqueri matsiguenga botoitacha sotoquë, icanaji Jesos pongotsiquë cara yosamitëri irogomerejegui:

—Teni nanguemimi; pingomantina ora ocanti picantaiguëri matsiguenga yamai.

¹⁸⁻¹⁹ Yotabitanëri Jesos:

—¿Teraico pigóte obirojegui aisati? ¿Teco pigóte pairoraca opë ojáque asegotoquë aique agabisairo? Te ongantiro pairoraca asërequë.

Iroso yogomeantaguëque cara antagaisati perintsi caninaro opëro. ²⁰ Aisati icanque:

—Ora paniacha iraneingomentoquë matsiguenga, ora iquengagueta, iroso aguimingatëri. ²¹ Ora iquenga matsiguenga opaniaca tsomagui. Iquenguro quimingari, aique icanquero te onganinate. Cara intaguetiro tsinane cagaro iina aisati cara tsinane ontague-tiri sërari cagari ojime; cara icositanti; cara yóganti; ²² cara inebetaro ora irasi basini; cara icantagueti pairoraca te ongomeite; cara yamatobianti; cara inintasanotëtiri ora yasinta basini; cara icantocotaguetasitari basinipague matsiguenga; cara iquengasita caninari iriati; cara te inguengueri Tosorintsi; ²³ antagaisati ocapague paniacha cara iraneingomentoquë matsiguenga. Iroso oca aguimingataguetiri; carari Tosorintsi iniaqueri matsiguenga cara icantaguetiro quimingari.

Oquemisanqueri Jesos tsinane cagaro jorío.

(Mt 15.21-28)

²⁴ Aique iáque Jesos aronisatiquë Tiro. Icanaque pongotsiquë, te iraninte irogótirime matsiguenga, carari tigueti ingantima irománima. ²⁵ Ainta tsinane, ora osinto inancaro camagari. Cara oquemocoqueri Jesos, piátasiqueri pobaticagueritotasipari iguitiquë Jesos.

²⁶ Iroso cagaro jorío, opaniaca cara Sirojenisiaquë. Pamanopëri Jesos:

—Inancaro nasinto camagari. Pigátajinero.

²⁷ Icanquero Jesos:

—Nipocasique naguibatëri nomatsiguengasonori nomitocoqueri iriro. Caninataque irapeta iritsita janequi. Te ongomeite ágabitsatiri pan janequi arota omionguëneri otsiti itiomijani.

²⁸ Carari potabitanëri:

—Aisonori ora picanque, Natingomi, carari yapiro otsiti opetoqui ora yobariaguetaigui janequi.

²⁹ Icanquero Jesos:

—Caninataque piquemisanquena. Yamai pijátaje. Ira camagari aroque isotocanairo pisinto.

³⁰ Aro pipiganaja obangoquë, oniopairo osinto pinariasega osamamentoquë. Aroque isotocanairo camagari.

Jesos yoguibegajiri sërari maguemitari.

³¹ Aique yogaganaca Jesos, iquenaque Tiroquë, Sirónquë, aisati Tecaporisiquë cara pini 10 poeboro. Yaretaja angaarequë jitacha Garirea. ³² Yamaigapëri poro sërari maguemitari aisati te irinibatasante. Yamanaiguëri Ira Jesos iroguineri ibaco iragaguibegajiri.

³³ Ainta tojai matsiguenga. Aro Jesos yáganëri casiriconiati, yomianquineri ibatsapaco cara iguemitaquë. Ijobabococa, yotsaganinequeri ira te irinibate cara ininequë. ³⁴ Aique Jesos inetsanaque cara Jonogaguítequë, yaneingasantanë, icanque:

—Epeta.

Epeta ocanti pishapiriaguemitatanaima. ³⁵ Aro ishapiriaguemitatanaa, iquemasantanai. Aisati posebatanaa inine, inibatasantanai. ³⁶ Aro icantasantaiguëri Jesos:

—Quero picomantëmatiri basinipague matsiguenga.

Carari te inguemisantaigueri, aiquero icomantëgotanëri. ³⁷ Ira matsiguenga iquen-ganeintasantëri Jesos, icantaiguë:

—Antagaisati icanque caninari. Iquemacaguiru maguemitari aisati inibatagairi ira te irinibate caninasati.

8

Yogatsitairo Jesos yomitojaiganaquero pan.

(Mt 15.32-38)

¹ Basiniquë cataguiteri aisati yapatotaigaa tojai matsiguenga. Te inëmate iraperi. Jesos icaimaiguëri irogomere, icantaiguëri:

²—Tojai nacantaneintëgotaguëri icaegui botobiritaiguënaca. Ocarati maba cataguiteri it-sibataiguëna, yamai te inae iraperi. Itasegasantaiguëni. ³ Yamai aroca nagátaiguëri iriáigae, iromagotasantanë queronta yapí, quero yaretaigaa ibangopaguequë. Ainta paniacha jaanta.

⁴ Yotabitaiganaqueri irogomere:

—Pinetse, yaca teca ontimingani. ¿Nega nágaiguineri pan ora irapaiguë? Tojaini ini.

⁵ Yosamitaiguëri Jesos:

—¿Ati ocarati pan inatsi?

Icantaiguëri irogomere:

Siete ocarati.

⁶ Aro icantaiguëri matsiguenga Jesos:

—Pisobicaigue quibatsiquë.

Aique yáguëro pan ocarati 7, icanqueri Iriri:

—Aro nega, Pabati, nacarasiaquemiro popabaquinaro oca perintsica.

Aique itibatsaaguequero yotsatengaiguëri irogomerejegu arota irotsatenguimaro ira bototaigacha. ⁷ Aintasati arosata isibaite. Icarasiatocoqueri, icantaiguëri irogomere:

—Pomaguetaiguëri sima aisati.

⁸ Yapaiguë antagaisati, iquemaigaca. Aique yobiitaguëtajiro ongarataga, iagajiro cantiri oquibe ocarati 7. ⁹ Ainta icarati 4,000 matsiguenga ira paiguënguitsi. Aique igátaigairi yobetsaiganajari Jesos:

—Yamai pijáigae pobangopaguequë.

Icogabeca bariseo iritosongueme Jesos.

(Mt 15.39–16.4; Ir 12.54–56)

¹⁰ Aique yotetaiganaja Jesos aisati irogomere pitotsiquë, imontiaiganaca irooti cara quibatsiquë jitacha Tarimanota. ¹¹ Ipcasitaigapëri bariseopague. Isintsitsapëri, icampëri: —Atsi yamai nocogaiguini nanetsemi cara pitasanganti arota nogótimi aroca popaniaca Jonagaguetequë.

¹² Aro yaneingasantanë Jesos, icantaiguëri:

—¿Pairo yamanobitina icaegui matsiguengaca cara natasonganque? Aisonori nangan-tasantaiguëmi cara quero noniaguëmatiri, quero nitasonganti.

¹³ Aique iáque ijocaiganaqueri bariseo, yotetaja aisati pitotsiquë iátocotaji antatinta.

Ora piponganta pan irasi bariseo iroonti irogomeantane.

(Mt 16.5–12)

¹⁴ Yomaguisantanë irogomere iráganëro pan. Patiro yáganë. ¹⁵ Icantaiguëri Jesos:

—Pigamaiguemaro ora piponganta pan irasi bariseoegui aisati irasi iratirite Eroris.

¹⁶ Aique yosamitobagaigaca irogomere:

—¿Pairo icantobicái: “Pigamema ora piponganta pan irasi bariseo”? Tentajengari nomapëro pan.

¹⁷ Igótcotaiguëri Jesos, icanqueri:

—¿Pairo pijibiritaiguë nacantocoquemiro pan? ¿Terai pingueme teraisati pigóte ora nacantaiguëmi? ¿Teco pinguengauguena? ¹⁸ Aiti piroqui, ¿Pairo te piniantobitimaro? Aiti piguëmita, ¿Pairo te pinguemantobitimaro? ¿Teco pinguengairo? Cara natibatsaaguequero pabocorooti pan napaaguëri 5,000 sërari, ¿Ati ocarati cantiri piagaji ora ongarataga?

¹⁹ Yotabitaiganaqueri:

—Aro ocarati 12.

²⁰ Përosati icantaiguëri Jesos:

—Aisati aique ocarati 7 pan, aisati nopaguetaiguëri pan matsiguenga icarati 4,000. ¿Ati ocarati pobiitaguëtajari cantiriquë oquibe?

Icantaiguëri:

—Ocarati 7 cantiri.

²¹ Aro icantaiguëri Jesos:

—¿Terai pigóigue cara te nangantocotaiguëmiro pan? Nacantocotaiguëmiro irogomeantane bariseo.

Jesos yoguibegajiri comarajari cara Betsairaquë.

²² Aisati yaretaigaa Jesos aisati irogomere Betsairaquë. Yamaigapëneri comarajari, icantaigapëri:

—Potsagatiri piniacagajiri.

²³ Aique Jesus yáganëri comarajari ibacoquë icatsatanëri sotoquë poeboro casiriconiati. Ijobaoiqueri iroquiquë, yoguëneri ibaco Jesus cara comarajariquë. Yosamitëri:

—¿Ainta pinei arosata?

²⁴ Inetsë, yotabitanëri:

—Jee, naniabecari sëraripague carari te ingonijataigue caninasati, icantaigacaro pibega anchato, carari yanëitaguini.

²⁵ Aitosati Jesus yogaineri comarajari ibaco. Aique inetsai, ibeganaa, iniasantai caninasati. ²⁶ Aro igáqueri Jesus:

—Quero piáti poeboroquë, quero picomantiri basini, aroonti pijátaje pobangoquë.

Igóti Peroro cara Jesus Irianti Agabisaicoontatsiri.

(Mt 16.13-20; Ir 9.18-22)

²⁷ Aique iáque Jesus, itsibataiganacari irogomere aiqero poeboroquë jitacha Sesária Jeripo. Cara aganguipoqui abatsi Jesus yosamitaiguëri irogomere:

—¿Pairo ijitaiguina matsiguenga Naro?

²⁸ Yotabitaiganaqueri:

—Aintapague ijitaiguëmi Obiro Joan baotisantantsiri. Ainta basini icantaiguë: “Ira Jesus Irianti Erias, ipocaji”. Aintasati ijitaiguëmi Obiro comantantsiri jirai ipigapaa.

²⁹ Aro yosamitaiguëri:

—¿Pairo picantaigui obirojegui?

Yotabitanëri Peroro:

—Obiro Quirisito Agabisaicoontatsiri.

³⁰ Jesus icantasantaiguëri:

—Aisonori picanti, carari quero picomantaguetiri matsiguenga cara Naro Quirisito.

Jesús icomantaiguëri irogomere cara ingamaque.

(Mt 16.21-23; Ir 9.22)

³¹ Aique iparintaca Jesus yogometaiguëri irogomere icantaiguëri:

—Pigóiguë nopaniaca Jonogaguitequë, nomatsiguengatapë cara niboguë yaca quibatsica. Yamai pënibaque najáque Jerosarénquë. Cara, iratsipiriacaigabaquina antiasipari aisati itingomiegui saseriroti aisati ira ogomeantiro isanguenare Moisés. Aisati irogaiguëna, carari ongaraque maba cataguiteri, nanganiatanae aisati.

Ocari oca icantabecari catingasati. ³² Aro yáganëri Peroro casiriconiati ipëgatsacari:

—Natingomi, te onganinate oca picanqueca. Querota picami.

³³ Yapisitasicari Jesus, inetsaiguëri irogomere, isintsisaqueri Peroro:

—Pijáte, picanquina aisati picantari ibega Satanás. Quero pintaguinaro ora te onganinate. Te pigóte ora icocaquina Tosorintsi, iroonti pigóque ora icogui matsiguenga.

Ora inganque ira quemisantasantiri Jesús.

(Mt 10.38-39; 16.24-28; Ir 9.23-27; 14.27)

³⁴ Aique Jesus icaimaiguëri ira botoibiritaigari aisati irogomere, icantaiguëri:

—Iranintasantëca pairiraca iraguianatëna inguemisantasantina, iranatanëro igorosite, quero icantanonta iriati, iroonti përosati iromomirintsibenquinario pairoraca nongocakeri Naro. ³⁵ Ira cogabitacha ingábintsëma yaca quibatsica, tenta iraninte iratsipiriero, aikuenta iratsipiriasantë. Irari quemisantasantëne yaca quibatsica quero ipasiquitina querootisati ipasiquitiro Caninaro Nibarintsi, irooti cara ingamobiquina Naro, aikuenta intiomoquina përosati Jonogaguitequë, intimasantanë caninasati. ³⁶ Aintaca sërari irasintaguetimaro antagaisati ora inatsi yaca quibatsica, aique ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro? ³⁷ Aroca iriátë Sharincabeniquë, tiguëtisonori ine pairoraca ingantima iriátëme Jonogaguitequë, inganiatanaeme. ³⁸ Pairiraca pasiguitëgotina Naro aisati ipasiquitocotiro nanibare yaca quibatsica cara itimaigui tojai tsoengatsiri cantagueantatsiri te onganinate, aisati nopasiquitocoqueri iriro cara nopigaima. Nopigaima nongobeingatasantapë nosanguëguiteasantapë aisati icanta Pabati icobeingatasanti yosanguëguiteasantí, intsibataigapëna ironomireegui Pabati irisaanganetsite caninari.

9

Ipasiniatitanë Jesús.

(Mt 17.1-13; Ir 9.28-36)

¹ Aisati icantaiguëri Jesús:

—Aisonori nangantasantaguëmi, nogomerejegui, aintapague obiroquë queroquerai cara picami irooti cara pinaigabaquina nopocaje Naro iragáantanequë Tosorintsi.

² Aro pabisanaque 6 cataguiteri cara Jesus itonganaque oquibequë oguitoja. Yágaiganaqueri casiriconiati ira Peroro aisati Santiago aisati Joan. Aro ipasiniatitomoqueri Jesus. ³ Oquetatasanotanë iguitsagare. Teni irine yaca quibatsica inguibiroca quitsagarinti catarosonori aisa pibega oca. ⁴ Aisati iconijatompëri Moisés aisati Erías inibatagaiguëri Jesus. ⁵ Aro icanqueri Peroro:

—Ogometinari, caninataque inaigae yaca. Intsome obetsique yaca maba pongotsi otiomijani, patiro pasi, patiro irasi Moisés, aisati basini irasi Erías.

⁶ Te irogóte Peroro pairoraca inganque, inibatasita itsorogasantaganaquenta ira maba.

⁷ Aito cara omabocapari mingori paguëtaguëpëri, poganguibotaiganaqueri. Aro ique-maiguëro Irinibare Tosorintsi cara mingoriquë, icanque:

—Ica Notomi nanintasantiri. Pinguemisantaiguëri Iriroro.

⁸ Iroguito, inetsabetanaa. Te iraniajiri Erías, teatisati Moisés; panibani Jesus inanai.

⁹ Aique cara yanongaiganaja, icantasantëri irogomere Jesus icantaiguëri:

—Quero picomantëgotiro oca piniaiguëca. Aiquenta cara nangamaque aisati nangani-atanae, aro pingomantaiguëri basini matsiguenga. Pingomantëgotina Naro omagaro ora pigótoconoquin aisati cara nopaniaca Jonogaguitequë aisati nomatsiguengatapë.

¹⁰ Aro te ingomantëgotiri, patiro iquengasitanaca, yosaminatobaganaca iriati:

—¿Pairo icomanti Jesus cara icanque ingamaque aisati inganiatanae?

¹¹ Aro yosamitaiguëri Ira Jesus:

—Ira ogomeantiro Sanguenari cantatsi: “Iribocapae iritsita Erías queroquerai ipoqui Quirisito Ira Agabisaicoontatsi”. ¿Pairo yogomebirique oca? ¿Pairo te iribocobipë Erías?

¹² Yotabitaiganaqueri Jesus:

—Aisonori icantaiguë: “Ingonijapae Erías, irobetsicaigapëri omagaro”. Carari pinguenguero oca: ¿Pairo isanguenatocobiriquina Naro matsiguengatapënguistsine, natsipiriaquero, aisati iromaintaigabaquina matsiguenga? ¹³ Yamai nongomantaiguëmi cara aroque ipocaji Erías carari te irágacaninataigabaqueri matsiguenga, icantaiguëri pairoraca ora inintaiguë, itsipiriacaigaigabaqueri, yógaiguëri aisa ocanta cara isanguenatococa Sanguenariquë.

Jesus yoguibegajiri janequi tingaraachari.

(Mt 17.14-21; Ir 9.37-43)

¹⁴ Cara yanongopaa Jesus, iniaigapëri arosonori matsiguenga. Aintasati irapague ogomeantiro isanguenare Moisés inibataigaseguiri irogomerejegui Jesus icarati 9. ¹⁵ Aro iniaigabaqueri Ira Jesus, iquenganeintasantaigabacari. Isigasigaitasipari matsiguengajegui, yobetsataigabacari. ¹⁶ Yosamitaigapëri matsiguenga Jesus:

—¿Pairo pinibabiritaiguëri nogomere?

¹⁷ Yotabitanëri poro sérari:

—Ogomeantatsiri, namabitapari notomi inancari camagari. Yomasontiaqueri. ¹⁸ Cara iráquerica camagari intingaraacaquimari, irobariaqueri quibatsiquë, irisimaresetaganëri ibagantequë; iratsitsiaquitetanë, ingantsironngatanë. Namanabecari pogomere iragátajineri igamagarite carari te iragabeiri.

¹⁹ Yotabitaiganaqueri Jesus, icantaiguëri:

—¡Te pigóiguero Irinibare Tosorintsi! ¡Terai pinguemisantaiguero obirojegui, terai pinganinataigüe! ¿Ati ongantima nantsibataiguëmi natsipiriasita cara nogometsitaiguëmi? Tojai pitsoingaiquëna. Atsi pomapënarí pitomi.

²⁰ Cara yamapëri janequi, itingaraacaganacari camagari, imogomogootaganacari, yotëanëri janequi quibatsiquë, ititigabaguetacaganacari, yosimaresetanëri aisati. ²¹ Jesus yosamitëri iriri:

—¿Ati ocanta iparintaca cara icanca nega?

Yotabitanëri iriri:

—Irinaga jirai cara itiomijaniquerai. ²² Tojai yobarigopiantiri camagari cara tsitsiquë aisati nijaquë, icogabeca iragamaguerime. Aroca pigabeiro pinganquero pairoraca, aro pingantiro yamaica. Pingantaneintëgotaganaquina, pomitocotaiguena naro aisati notomi.

²³ Icanqueri Jesus:

—¿Pairo picantobiquina: aroca nagabeiro? Atsi obiro. Aroca pinguemisanqueri Tosorintsi, aro inganquimiro pairoraca.

²⁴ Aro icaimanë iriri janequi:

—¡Naguemisantabetimi! ¡Nocoguini pinguemisantacagasantina!

²⁵ Iniaque Jesus cara yotsititaigapari tojai matsiguenga, aro isintsitsaqueri camagari, igáqueri:

—Obiro camagari mosontitagantatsi aisati maguemitatacagantatsi pisotocanairi, quero pinantajari ica janequica aisati.

²⁶ Aro icaimanê camagari, imogomogoataganacari ira janequi, isotocanai. Iriroque janequi icanacari ibega igamaga. Icantaiquê tojai matsiguenga:

—Aroque icamaque.

²⁷ Carari Jesus yágbogotêri ibacoquê janequi icabiritajiri, yogaratingajiri, ibeganaa.
²⁸ Aique icaiganaque pongotsiquê Jesus aisati irogomerejegui, yosamitaiguêri casirico-niati:

—¿Pairo te nagabiobitiri nagátiri ira camagari?

²⁹ Yotabitaiganaqueri Jesus:

—Ica irianti basiniati camagari, sintsiri ini. Patiro iriátê aroca pomanocotasantiri Tosorinti aisati aroca pititima, aro iragabiaquemiri pigátiri jaara.

Yogatsitai Jesus icomantaigairi irogomere, icanqueri: “Pênibaque nanagamaque”.
(Mt 17.22-23; Ir 9.44-45)

³⁰ Aique íaiganaque Jesus aisati irogomere, iquenagueque Garireaquê. Te iraninte Jesus irogóte pairiraca negaraca ini Iriro ³¹ yogometaiguirininta irogomere. Icantaiquêri:

—Nopaniaca Jonogaguitequê, nomatsiguengatapê cara niboguê yaca quibatsica. Carari irácagantaiguêna matsiguenga, irógaiguêna. Ongaraque maba cataguiteri, aro nangani-atane.

³² Ira irogomere te inguemaigabaquero irogomeantane Jesus, icomêtaigabacaro. Aisati itsorogaiguê irosomitiri pairoraca icanti.

Icomantê Jesus pairi obaquenguitsine cara itingombintanti Tosorinti.
(Mt 18.1-7; Ir 9.46-48)

³³ Yaretaiganaca Caperinaoquê, icaiganaque pongotsiquê. Jesus yosamitaiguêri irogomere:

—¿Pairo pinibatobagopa abatsiquê?

³⁴ Te irotopitaiguêri, imairetaiganaque aroquenta cara abatsiquê inibatobagopa iriati pairi obaquenguitsine irirojeguiquê. ³⁵ Isobigopê Jesus, icaimaiguêri irogomere icarati 12, icanqueri:

—Pairiraca nintatsi irobate, caninataque ingarantane, iromitocotaiguêri antagaisati basini aisa inganquima iromeraro.

³⁶ Icaimêri poro janequi Jesus. Yogaratianqueri aganguisatiquê irogomerejegui, yabitsi-nacobêri. Icantaiquêri:

³⁷ —Pairiraca ágacananatêrine poro janequi cantacha ica iquemisanquinanta, aisati irágacananatina Naro. Pairiraca ágacananatenane, aisati irágacananatiri Ira agáquina.

Quero pometopitari basini quemisantatsiri.
(Ir 9.49-50)

³⁸ Icanqueri Joan:

—Ogometinari, naniaiguêri sêrari igáqueri camagari iriátopitiri matsiguenga. Icantabequina cara iquemisanquemi inibatantaro popairo, iroro igáantantari camagari. Tenta intsibataiguena naroequí, nacantaiguêri: “Quero pigáantantaro iripajiro Jesus cagaribinta obiro nasiegui”.

³⁹ Yotabitanêri Jesus:

—Quero pometopitari. Queroca iguisasitái, iromitococái. Quero icantocotaguetasitina.
⁴⁰ Queroca ipégatái, aisa icancái ibega eiro.

Icanque Jesus: “Pingábintsabacaquima”.
(Mt 5.29-30; 10.42; 18.6-9; Ir 17.1-2)

⁴¹ Aisati icanqueri Jesus:

—Pairiraca pëcoquimine pomire piquemisanquinanta, nangantasantêmi iraniaqueri Tosorinti imêri iriro aroquenta icábintsabaquemi obiro. ⁴² Aisati pairiraca antaquerine janequi quemisanquina ora te onganinate, natsipiriacaqueri. Caninataqueme ingamaque queroquerai intaguiri ora te onganinate, aisa onganquimame iraguêshotêgotanquimari oquibe mopê itsonoquê, irojoqueri angaarequê ingamaque. ⁴³ Nosiacagantêmiro. Aroca ontaquimi pobaco ora te onganinate, pijocajiro ora picantagueti quimingari. Pobetsiquiro pisêre aisatime ongantima pitotirome pobaco pijiquerome. Caninataque pine pabonirobi cara Jonogaguitequê, arota quero piátacaguiro pite pobaco cara Sharincabeniqué cara pini tsitsi ora te otsibacanete, ⁴⁴ aisati cara te ingame oguentiniropague aitosati cara tera otsibacanete tsitsi. ⁴⁵ Aisati aroca ontaquimi piguiti ora te onganinate pijocajiro ora picantagueti quimingari. Pobetsiquiro pisêre aisatime ongantima pitotirome piguiti pijiquerome. Caninataque pine paguitinirobi cara Jonogaguitequê, arota quero piátacaguiro pitirooti piguiti Sharincabeniqué ⁴⁶ cara te ingame oguentiniropague aitosati cara te otsibacanete tsitsi. ⁴⁷ Aisatica ontaquimi piroquí ora te onganinate pijocajiro ora

quimingari. Pobetsiquiro pisëre aisatime ongantima págurome pijoquerome piroqui. Caninataque pijáte paquinirobi cara Jonogaguitequë, querota piátacaguero pitirooti piroqui cara Sharincabeniquë ⁴⁸ cara te ingame oguentiniropague aitosati cara te otsibacanete tsitsi. ⁴⁹ Antagaisati matsiguenga iratsipiriaque yaca quibatsica. Ora atspiriagantsipague ongatsitëri quemisantsitëri onganquimaro pibega tsitsi, carari aisa oganinatëri osigaro onganinataganëro patiari ora ibatsa cara itaquineri Tosorintsi. ⁵⁰ Ocaninati patiari, carari omeganëmaca ora cochotacaguero, ¿Païro aguipigapairone ora cochotacaguero? Aisati obiroyegui pingantimaro patiari; aroca págacananatobaganëma, pintiomotobaguima caninasati, pinguengasëretima caninasati, aro pinguemisantacagaigueri basinipague matsiguenga. Caninataque piniacananatobaganëma págacananatobaganëma, pintiomotobaganëma, piganinataguetiri ira basinipague.

10

Iáque Jesos antatinta Joriránquë.

(Mt 19.1-2)

¹ Aique iáguë Jesos aisati irogomere, yaretaigapa Joreaquë, imontiaiganacaro ora nija jitacha Jorirán. Aique yapatobiritaigacari tojai matsiguenga. Cara yameta Jesos, yogometaguëri.

Jesos yogometocoqueri ira joquërone iina.

(Mt 19.3-12; Ir 16.18)

² Iátasitaiguëri Jesos bariseopague; icogabeca iraniantëmari irantacaquerime te onganinate. Yosamitaigapëri:

—¿Caninataqueco irojocajiro iina sërari?

³ Yotabitaigabaqueri Jesos:

—¿Païro isanguenataiguëmi Moisés jirai?

⁴ Icantaguëri bariseopague:

—Icanque Moisés: “Aroca iritsirishanëmaro iina sërari, irisanguenatënero, ingomantëro: ‘Nocoguini nojocajimi; pijátaje’. Imëro sanguenari ora irojogantëmaro”.

⁵ Icantaguëri Jesos:

—Icanque Moisés cara caninataque pijocajiro pijina tenta pinganinataigue. ⁶ Carari cara pobetsiquengani antagaisati jirai,

Tosorintsi yobetsiquëri ira sërari aisati tsinane. ⁷ Iroro cara iráquero iina sërari, irojocanëri iriri aisati iniro, ⁸ irágasantëro iina, intimacaquero casiriconiati. Coshoni iroquimaro, ingantajima paniro ibatsa.

Jirai inabitaca sërari aisati iina; yamai coshoni irogobaguima, intimaiguë inganguima paniro. Iniaiguëri Tosorintsi irianti paniro ibatsa. Ipanirootitaiguëri. ⁹ Iroro te onganinataguëte irojocobagajima. Querootisati ijocaguiri basini matsiguenga.

¹⁰ Cara ipigapa Jesos pongotsiquë, yosamitaiguëri irogomere paio icanti. ¹¹ Icantaguëri Jesos:

—Aintaca sërari irojocajiro iina, iráque basini tsinane, aroque yaguimintacaro iinasonori ora ijoque jirai. Te inguemisantiro ora icanti Tosorintsi: “Quero pintantopitiro pijinasonori”. ¹² Aitosati pairoraca joquërine ojime páguëri basini sërari aisati paguimintari ojimesonori, te onguemisantiri Tosorintsi ora icanque: “Quero pintantopitiri pijimesonori”.

Jesos yoguëneri janequipague ibaco.

(Mt 19.13-15; Ir 18.15-17)

¹³ Aique yamapëngani itiomijani janequipague cara Jesosiquë, icogaiguë cara irogaguëtinero ibaco Jesos iguitopaguequë janequi iromanocotiri ingábintseri Tosorintsi. Carari iniaigabaqueri irogomere, imetaigacari Ira Jesos, icantaigabaqueri, isintsitsaqueri:

—Quero paseriguiri Atingomi.

¹⁴ Iniaiguëri Jesos iguisatsataiguëri irogomere, icantaiguëri:

—Quero picantiri. Nocogui iribocasitaigapëna janequijegui. Igóiguë iriro intingomintina. Antagaisati icantaigari ibega ica intiomoquina cara itingomibintanti Tosorintsi. ¹⁵ Aisonori nangantaiguëmi: icaegui janequi inintaiguë intingomintimari Tosorintsi; pairiraca te intingomintimari aisati ingantima ibega janequi, quero yareta cara igáanti Tosorintsi.

¹⁶ Aique yágobëri janequipague Jesos itsomaguëtoberri panirootipague, yoguëneri ibaco iguitoquë yamanocotaiguëri:

—Iromitocotimita caninasati Tosorintsi, ingábintsemita.

Jesos icamanaaqueri ira sērari casintasantachari.

(Mt 19.16-26; Ir 18.18-27)

¹⁷ Cara iáque Jesos abatsiquê, isigopa poro sērari yobaticagueritotaguêpari Jesos, yosamitêri:

—Caninari Ogomeantatsiri, ¿Pairo nanganque arota pērosati nantimanê canta Jonogaguitequê?

¹⁸ Yotabitanêri Jesos:

—¿Pairo picantobiquina Naro caninari? Paniro ini caninari, Irianti Tosorintsi. ¹⁹ Aroque pigóque ora icanque Tosorintsi cara isanguenaquero Moisés:

Quero póganti; quero pintantopitiro pijina; quero picositanti; quero pitsoiguêgotaguetari ira hasinipague; quero pamatobianti; pinguemisantiri piri aisati piniro, quero pipêgatsatêmatari.

²⁰ Icanqueri sērari:

—Ogometinari, aroque naquemisanquero omagaro oca cara ninê janequi irooti yamai.

²¹ Inetsêri Jesos, ininqueri, icanqueri:

—Panibati. Pinintica iraniacaninatimi Tosorintsi, atsi pijáte, pomimantiro antagaisati ora pasinta, pomaguetiri coguitiaguetachari omagaro opênataga; aique imêmi Tosorintsi ora caninaro cara Jonogaguitequê. Cara pomimantêroca antagaisati atsi piguiatapêna Naro.

²² Cara iquemobêro oca icanqueri Jesos yogasêretasantanaca, icomêtanaca iboroquê irironta casintaguetasantacha, aique iátaji tenta iraninte imimantiro ora yasinta.

²³ Inetsagueiguêri irogomere Jesos, icantaiguêri:

—¿Opomirintsitomocari casintaguetachari iriatê canta itingomibintanti Tosorintsi!

²⁴ Iquenganeintasantanacaro irogomere ora icanque Jesos. Carari yogatsitairo Jesos icanque:

—Obirojegui aisa picantari notomijegui; opomirintsitomocari inganaque pairiraca cara iragáantanequê Tosorintsi. ²⁵ Nanganquemi: opomirintsitomocari cameyo ingue otomijanique omoro quitsapi, carari omomirintsitomotasantêmaro casintachari iriatê cara igáanti Tosorintsi.

²⁶ Ocaro oca iquemaigabaque irogomere, iquenganeintasantanaca, yosaminatobaganaca:

—¿Aisonorico? ¿Pairo inganquima matsiguenga iragabisaicoontima?

²⁷ Jesos inetsaiguêri irogomerejegui, icantaiguêri:

—Quero icantiro matsiguenga, quero paniro yogabisaicota, carari Irianti Tosorintsi inganquero antagaisati. Te omomirintsitomotimari Iriro.

Ora imaignêri Tosorintsi iraequi aguiatêri Jesos.

(Mt 19.27-30; Ir 18.28-30)

²⁸ Aique icanqueri Peroro:

—Ogometinari, pinguengaiguena naroequi. Nojocaiganaquero omagaro nasintaigabita, noguiataiganaquemi.

²⁹ Yotabitanêri Jesos:

—Aisonori nangantaiguêmi: quero pitsipiriario. Aroca pintangomintina Naro aisati pijocaiganaquero pobango, pirentipague, pitsiropague, piniro, piri, pitomipague, pitoganepague, pijocanêro aronta pinintaiguina Naro piguiatêna aisati piqenguitsatironta nanibare, aro ingantocobentaiguêmi Tosorintsi. ³⁰ Aroca pijocopitênarosata arosata cara piguiatêna, imaignêmi Tosorintsi tojai. Págobêro yamai tojai basini pongotsi, tojai pirenti, tojai pitsiro, tojai piniro, pitomi, aisati pitogane; aisati inguisaneintêntimi basiniati matsiguenga. Carari pintiomoquina pērosati canta Jonogaguitequê. ³¹ Ainta yamai tojai itingomipague yaca quibatsica, carari quero igáanti cara Jonogaguitequê cara panironta Atingomi. Aintasati tojai itsipiriaiguê yaca yamai, imaintaiguêri matsiguenga carari aiquenta imaignêri Atingomi iromitocoiguêri cara igáanti Iriro. Icarantê yamai carari aiquenta irobotataje.

Aisati yogatsitairi icomantairi irogomere Jesos cara ingamaque.

(Mt 20.17-19; Ir 18.31-34)

³² Iáiganaque Jesos aisati irogomere aiquero Jerosarénquê, itongaiganaque. Jesos ibataiguêri irogomere abatsiquê. Yoguiataiganaqueri, iquenganeintasantaiganaca, aisati itsorogaiganaque. Jesos yáganêri irogomere casiriconiati, icomantaiguêri atiraca inganquengani Jerosarénquê. Icanqueri:

³³ —Pinguemina. Yamai ajáiguê Jerosarénquê. Naro paniacha Jonogaguitequê, no-matsiguengatapê cara niboguê yaca quibatsica. Iroco cantênguicha cara Jerosarénquê

irágaiguëna itingomipague saseriroti aisati iraegui ogomeantiro isanguenare Moisés. Ingantaiguëri ira Iromasati: “Páguiri Jesus, póguiri tenta ingomeite”.³⁴ Irisërontaiguëna, iripasataiguëna, iriobataiguëna, aique irógaiguëna. Carari ongaraque maba cataguiteri nanganiatanae aisati.

Santiago aisati Joan cogatsi irobate.

(Mt 20.20-28)

³⁵ Aique yotsitipari Jesus Santiago aisati ireinti Joan, pitirooti itomi Sebereo, icantaiguëri: —Ogometinari, nanintaiguini pingantina ora nomanaquimira.

³⁶ Yotabitanëri Jesus:

—¿Pairo pininti nanganquemi?

³⁷ Icantaiguëri:

—Aiquenta cara pigáantanequë, nocoguini pinintacaguina poro naro nosobiaque pobacoroniquë, ica igueca irisobiaque pomatepacoquë.

³⁸ Yotabitaiganaqueri Jesus:

—Te pigóigue ora pamaquena. Aiquenta natsipiriaque tojai. ¿Teco pintsorogue ca pitsipiriaquë obiro?

³⁹ Icantaiguëri pitirooti:

—Te nontsorogue, nangantaiguëro naro natsipiriobiquimi.

Icanqueri Jesus:

—Jee, aisonori, aiquenta pigasëretocoquina aisati pitsipiriobiquina.⁴⁰ Carari quero Naro pimirone cara pisobicomoquina aiquenta. Paniro Pabati përine pairiraca tsipaquinane Naro cara nagáantë.

⁴¹ Iquemaiguëri basini irogomere icarati 10. Iguisaneintobiqueri ira Santiago aisati Joan, aroquenta icogabeca pitirooti iraguibatimame.⁴² Aro icaimaiguëri irogomerejegi, icantaiguëri:

—Pigóiguë ira itingomipague basiniati matsiguenga cagari jorío yametaiga imerataigari imatsiguenga. Aisati ira obatacagantatsiri imerataigari imatsiguenga.⁴³ Carari quero aisati picantaigari ibegaiga iriro. Pinintaiguëca piguibatima obiati, pomitocotaigueri pomatsiguenga pingábintsaguetaigueri, quero pimeratari.⁴⁴ Pinintica piguibatima, pomitocotaigueri pomatsiguenga pairoraca ininti. Pingantimari ibega iromeraro.⁴⁵ Nopaniaca Jonogaguetequë, nomatsiguengatapë arota nomitocotaigueri matsiguenga, quero nimeratari. Aisati nipocasique nangamobitaiguëri antagaisati matsiguenga arota iragabisaicotajiri Tosorintsi cara inguemisantaiguëna Naro.

Jesus yogaguibegajiri Baritimeo, comarajari.

(Mt 20.29-34; Ir 18.35-43)

⁴⁶ Aro yaretaigaca Jericóquë Jesus aisati irogomere. Cara yogagaiganaca, yoguiataiganacueri abatsiquë tojai matsiguenga. Ainta isobiaque onamiquë abatsi Baritimeo comarajari, itomi Timeo. Ira Baritimeo yamananteanti quirequi imëri matsiguenga.⁴⁷ Cara iquemobëri Jesus Nasaresati, icaimanë icanque:

—¡Jesus, imatsiguenga David, pingantaneintëgotina!

⁴⁸ Aro iguisatsataigabitacari ira botoitaigacha, icantaiguëri:

—¡Pomairete!

Aiquero iátanëtigue icaimasantanë:

—¡Natingomi, pingantaneintëgotina Obironta imatsiguenga David!

⁴⁹ Yaratingopë Jesus, icaimagantëri, icanque:

—Pingaimiri.

Aro icaimaiguëri, icantaiguëri:

—Pinganinatanë, pingabiritima, icaimimini.

⁵⁰ Aro ijocanëro iguitsagare icabiritanaca omanapague ipocasiqueri Jesus.⁵¹ Icabëri Jesus:

—¿Pairo picogui nanganquemi?

Yotabitanëri comarajari icampëri:

—Natingomi, nanintini piniacagajina.

⁵² Icanqueri Jesus:

—Atsi pijátaje. Piniaje yamaica. Aroquenta piquemisanquina cara nagobiajiro piniaje, aro naniacagajimi nogabisaicotajimi.

Aito cara iniaana, yoguiatëri Jesus.

11

Icanaque Jesus Jerosarénquë.

(Mt 21.1-11; Ir 19.28-40; Jn 12.12-19)

¹ Cara pënibaque iraretaiguëma Jerosarénquë, aitisati pite poeboro otiomijani jitacha Betajajé aisati Betania aronisatiquë oguitoja jitacha Olibos, igáqueri Jesus pite irogomere ²icanqueri:

—Pobate, pijáigue catingasati poeboroquë irooti cara piniaqueri itiomijani boro it-satocotaga. Irro teraiquerai ingueicotingani. Pintsaicotiri, pomapëri yaca. ³Aintaca matsiguenga irosomitobëmica: “¿Pairo pitsaicobiritiri boro?” aro pinganëri: “Icoguirini Atingomi; aiqenta iraguipigairi”.

⁴Aique iáiguë irogomere, iniaigapëri boro itsatocotaga omoroquë pongotsi yaratianque cara págaboquiobaga abatsi. Itsaicotanëri. ⁵Ainta inasegui matsiguenga, yosamitaigaba-queri:

—¿Pairo pitsaicobiritanëri itiomijani boro?

⁶Aro yotabitanëri pitirooti ora icabëri naaraiquerai Jesus. Aro inintacagaiguëri matsiguenga iráganëri. ⁷Icatsatanëneri Jesus, yoguëneri iguitsagarepague imiticaraqüë boro itiomijani aro iqueicotanacari Jesus. ⁸Ainta inaigasegui tojai matsiguenga yoguiaiguëri Ira Jesus. Yogaguetaiguëneri iguitsagarepague cara abatsiquë arota iragaticanëro boro. Aisati yogaguetaiguëneri otiomijani otsego anchato aisa icanta icantaigabaquineri itingomi. ⁹Ibataiganaqueri tojai matsiguenga aisati yoguiataiganaqueri tojai. Icaimaiganaque:

—Tojai icaninatasanti Tosorintsi. Ainta Agabisaicoontatsiri. Igáqueri Tosorintsi aro-quentá iniacaninatëri Irro, icábintsëri. ¹⁰Irianti imatsiguenga David atingomi jirai. Intsome antingomintobëmarí, intsome aniacaninatobëri Irirai Atingomi. Caninari Tosorintsi jonoquëñintaberi.

¹¹Cara yarepaa Jesus Jerosarénquë, icanaque oquibequë pongotsi irasi Tosorintsi cara yapatotaiga joriogejui, inetsagueque antagaisati. Aroquentá ochapinitanë isotocanai iáque Betaniaquë. Itsibataigacari irogomere caratatsi 12.

*Jesos icogabecaro ojito igueraquë, te ine ojito.
(Mt 21.18-19)*

¹²Cara oquëtaguetanai ipigaigaa Jesus aisati irogomere aiqero Jerosarénquë. Itaseguë Jesus cara abatsiquë. ¹³Iniopëro panguirintsi jitacha iguera. Inatsi tojai osi. Iátasiquero, icogabeca ojito, carari te ine. Patiro pinë osi terainta omoncaratima ora oguitsonta iguera. ¹⁴Icanquero Jesus:

—Yamai quero pinai basini ojito oca igueraca. Quero otsimagani ojito aisati. Iquemaiguëri irogomere.

*Jesos ijocaigapairi ira pimantaguetatsiri cara oquibequë pongotsi irasi Tosorintsi.
(Mt 21.12-17; Ir 19.45-48; Jn 2.13-22)*

¹⁵Cara yaretaigapaa Jerosarénquë, icanaji Jesus oquibequë ibango Tosorintsi, iniaigapëri iraegui pimantaguetatsiri aisati manantatsiri, iguisaigapëri, ijocaiguëri sotoquë. Aisati ijoqueri ira campiatobagari iguirequite aisati ira pimanqueri paroma; yotëatapëri ime-sanepague aisati irisobigomentopague. ¹⁶Te iranintacaguri matsiguenga iráguë pairoraca oquibequë pongotsi. ¹⁷Aique Jesus yogometaguëri ira matsiguenga:

—Ocanti Sanguenari:

Icanque Tosorintsi: “Nocogasanti iromanocotaiguena omagaro matsiguengapague yaca nobangoca”.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

¹⁸Iquemocoqueri Jesus itingomipague saseriroti aisati ira ogomeantiro isanguenare Moisés. Aro icogabeca iróquerime carari itsorogaiguërinta matsiguenga aroquentá iquen-ganeintasantaigacari Jesus ora irogomeantane. ¹⁹Cara otsitinengatanë, iáiguë sotoquë Jerosarénquë Jesus aisati irogomere.

*Iniaiguëro iguera, pisiguiricanë.
(Mt 21.20-22)*

²⁰Oquëtaguetanai, cara ipigaigaa, iniaigapairo iguera ora icanë chopiquerai aroque ocamaque irooti opariquë. ²¹Iquianquero Perero, icanqueri:

—Ogometinari, ¡Pinetsero! Ora panguirintsi aroque pisiguiricanë ora picanë chopi, “Quero otsimagani ojito aisati oca igueraca”.

²²Yotabitaiganaqueri Jesus:

—Pinguemisantiri Tosorintsi, pisëretimari. ²³Aisonori nangantasantaiguëmi: aroca pinganqueri Pabati: “Pigaganënaró oca oguitojaca, pijoquero cara angaarequë”, aisati queroca pitsoingui, piguiaqueri inganquero, aro inganquimiro. ²⁴Iroto nangan-taguëquemí: pairoraca pomanacheri Tosorintsi pinguemisantiri, piguiaqueri imëmiro,

aro inganquemiro. ²⁵ Cara pomanocoquerica Tosorintsi, piguibate pingábintseri pomatsiguenga, pijocajineri ora icantaguetomotimi te onganinate, arota Ira Piri jonoquëñintaberi irojocajimiro ora picantaguetomotiri obiro te ongomeite. ²⁶ Carari queroca pijocajineri pomatsiguenga ora icanquimi te onganinate, querootisati ijocajimiro Piri ora picantagueti obiro cagaro caninatatsi.

Yosamitëri Jesus joríojegui: “¿Pai agáquemi?”

(Mt 21.23-27; Ir 20.1-8)

²⁷ Yaretaigapaa Jerosarenquë. Yanëisigui Jesus oquibequë pongotsi irasi Tosorintsi cara yapatotaiga joríojegui. Aro ipocasitaigapëri itingomiegui saseriroti aisati ira ogomeantiro isanguenare Moisés aisati antiasipari. ²⁸ Yosamitaigapëri:

—¿Pai agáquemi cara pijocaiguëri pimantatsiri? ¿Pai oguëmi cara pijica itingomi?

²⁹ Yotabitaiganaqueri Jesus:

—Aisati naro, patiro nosamitaiguëmi; aroca potabitaiguëna, aisati nongomantaiguëmi pai agáquena Naro. ³⁰ ¿Pai agáqueri Joan cara ibaotisatiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga? Pingomantina.

³¹ Icantobagaiganaca jorío:

—Anganquerica: “Igáqueri Tosorintsi”, aro ingancái: “¿Pairo te pinguemisantobitaigueri Joan?” ³² Carari aroca anganqueri: “Igáqueri matsiguenga”, aro inguisaigacái omatsiguen-gapague ijitaiguënta cara igáqueri Joan Tosorintsi ingomantaguate.

³³ Aro yotabitaiguëri:

—Teni nogóigue pai agáqueri.

Icantaiguëri Jesus:

—Aisati Naro, quero nocomantimi pairiraca agáquina nangantaguate ocapague pini-aiguë.

12

Jesus icomantëgotëri ira omisantiro obasi.

(Mt 21.33-46; Ir 20.9-19)

¹ Aisati iparintaca Jesus iquenguitsataiguëri matsiguenga quingabaguirentsiquë. Yosi-acagantineri icantaiguëri:

—Ainta sërari ipanguiaque obasi, itantotëro, iquiaque omoro cara iragaticaguitëro oguitso aisati ora irágantëmaro oja. Aisati yobetsiquëro pongotsi oquibiantsa jonoquë ora iranetsantimaro. Aique yogaiquëri omisantineri irobasite. Iquengaigaca cara onguitsotanëca, ira omisantineri iráquero aganguisati oba, aganguisati imagantëneri casintaro. Aique iáque jaanta intimaque cosamani. ² Cara omoncaraca cara oracanë oguitso oba, igátabecari iromeraro icanqueri: “Pijáte pingampëri ira omasantinaro nobasite imagantaiguenaro nasiati”. ³ Carari ira omisantiro yágaigabaqueri ipasataigabaqueri. Yoguiquëri, te imëmatobëri oba. ⁴ Aique igátabecari basini iromeraro. Iriro aisati ipasataigabaqueri iguito-quë, icabegobëri. ⁵ Aisati igátabecari basini ira yogamagaigabaque. Ira casintaro igátabecari basini iromeraro tojai. Ainta ipasataigabaque; ainta basini yogamagaigabaque. ⁶ Panibani itomi, ira inintasanti. “Irirojengari iraniacaninataigabaque”, icanque. Aro igáqueri itomi. ⁷ Irari omisantineri irobasite iniaigabaqueri itomi, inibatobaca: “Irironta itomi casintaro. Cara ingamaquenica iriri, iriroqueraí áganairone obasi. Intsome ógaigabaqueri, águero obasi asintaiguemaro eiroqueraí”. ⁸ Aro yágaigabaqueri, yogamagaigabaqueri, ijocaiguëro igamaga sotoquë obasiquë. ⁹ ¿Pairo piquengaiga? Cara iribocapë ira casintaro obasi, ¿Pairo inganqueri iraequi catsimari ira omisantaiguineri? Cara iribocapë, irágaigapëri ira catsimari omisantatsiri, iripoguiriaigapëri. Aique irogaiguëri basini omisantainerine irobasite, irianti caninari. ¹⁰ ¿Teco pinibataiguero ora Sanguenari? Ocanti:

Jirai itsoingaiquëro mopë ira obetsiquirori mopëpongo, ijoquero tenta irogóiguero cara icoiguëro Tosorintsi iroonti otingomi mopë, otingomi pongotsi, cantaca otin-gomipoa. Carari yágauro ora mopë itingomiantaaro pongotsi. ¹¹ Icaninabenquero Atingomi, iniacaninatëro, icantacagajiri matsiguenga cara irogajiro otingomi mopë. Aisati naquenganeintasantëro naroequi.

¹² Aro igóiguë itingomi saseriroti aisati ira ogomeantiro Sanguenari aisati antiasipari cara Jesus iquenguitsatocotaiguiri irirojegui. Iguisaneintaigabitacari icogaigabitaca irácagantërimë, carari yomitsorogaiguëri matsiguenga igóiguënta matsiguenga cara aisonori Jesus icomantëgotëri Tosorintsi. Aique iátaji joríojegui, ijocaiganaqueri Ira Jesus.

Yogomequeri bariseo Jesus cara inganquineri itingomi ora icoicoqueri.

(Mt 22.15-22; Ir 20.20-26)

¹³ Ira itingomiegui igátaiguëri Jesosiquë bariseopague aisati iratirite Eroris. Ico gabeca iramasitacaguirime irinibare arota inguseri itingomi cobeingari. ¹⁴ Iátasitaiguëri Jesus, icampëri:

—Ogometinari, nigóiguë aisonori pogomeantiro Irinibare Tosorintsi, aisati poniagantiro catingasati atraca ongantima aretaiguëmari Tosorintsi. Te pintsorogui pairiraca. Yamai pingomantina ora piqianca Obiro: ¿Caninataque omëri Sésar aguireguita? ¿Teco onganinate omagantëri cobeingari cara Iromaquë?

¹⁵ Igóque Jesus cara icogaigabitaca irantacaguirime ora te ongomeite. Yosamitaigabaqueri:

—¿Pairo picogobiti pomatobitina? ¿Pairo picogobiti pamasitacaguinaro nanibare? Te pinganinate. Poniaguinari quirequi ira pipënantari ogobeingarite Iromasati.

¹⁶ Aro yamaigapëneri quirequi ira jitacha tenario. Yosamitëri Jesus:

—¿Pari casintaro oca irosiacagomentoca? ¿Pari ijita sanguenatëgotënguicha yaca tenarica, iroonti iripajiro?

Yotabitaiganaqueri:

—Iroonti irasi Sésar nogobeingarite.

¹⁷ Aro icantaiguëri Jesus:

—Aro pomaiguëri Sésar iraisati, pingantineri ora icocagaiguëmi, pinguemisantiri. Aisati pinguemisantiri Tosorintsi pomaiguëri ora iraisati ora icocagaiguëmi Irro.

Iquemaiguëri, iquenganeintasantaiganaca.

Aisonori inganiantanae igamaga.

(Mt 22.23-33; Ir 20.27-40)

¹⁸ Aisati iátasitaiguëri Jesus saroseopague, ira ijitasaitaiga cara quero icabiritaja igamaga, quero icaniantana. Icantaigapëri:

¹⁹ —Ogomeantatsiri, jirai isanguenataiguëna Moisés:

Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaque itomi, irianti irosiguëmari itomi ireintitomaco.

²⁰ Jirai ainta sërari aisati ireinti icarati 6. Ira obatsati yágabita iina, carari te irine itomi. Aique icamaque iriro. ²¹⁻²² Aro iina yágairo ireinti. Aisati icamaque iriro, te irine itomi. Aisati icantaiga ireintiegui yágaigabitaaro tsinane, icamaiguë omagaro, te irinëmate itomi. Aique ocaque tsinane aisati, aro ocaque. ²³ Cara ingabiritaiguëma, ¿Pari ágairone? Pinetse, ijinantaigabitaro antagaisati ireintiegui.

²⁴ Yotabitaiganaqueri Jesus:

—Tojai pamatobitaiga obiatiegui tenta pigóiguero Sanguenari, teatisati pigóiguero itasorintsite Tosorintsi. ²⁵ Aisonori, cara angabiritajima, antimaigae, quero águiro ajina. Antagaisati cabiritachane ingantaiguëmari ibega ironomire Tosorintsi: quero yágai iina.

²⁶ Ingabiritaiguëma omagaro camaigatsiri. ¿Teco pinibatiro ora icanti Tosorintsi jirai, isanguenaquero Moisés? Tosorintsi icanqueri Moisés cara anchatoguë pamasigatsi:

Naro Tosorintsi. Iquemisantina Abaram. Iquemisantina Isac. Iquemisantina Jacob.

²⁷ Te ingante: “Iquemisantabequina”. Aroca iquemisanqueri Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi. Obirojegui yamai picomëtacani.

Icomantëgotëro Jesus ora obatsi ora icocaque Tosorintsi.

(Mt 22.34-40; Ir 10.25-28)

²⁸ Ainta poro ogomeantiro isanguenare Moisés, iquemaiguëri bariseo aisati saroseo cara yosamitaigapëri Ira Jesus. Aisati iquemaqueri Jesus cara yotabitanëri caninasati. Aro yosamitëri Jesus iriro:

—Aiti tojai pogometaguequina Sanguenari. ¿Pairo obatsi ora anguemisanque?

²⁹ Yotabitanëri Jesus:

—Iroo oca obatsi:

Isirael, pingumaigue obirojegui. Pinguemisantiri Atingomi Irianti Pitosorintsite. Irro paniro Irirosonori tenta irine basini Tosorintsi. ³⁰ Pinintasantiri Tosorintsi Atingomi, pomasëretasantimari obiati, përosati pinguenqueri, pinguemisantantiri, pingantineri antagaisati ora icocaquimi Ira casintimi.

³¹ Ora otsibatara ocantaro pibega basini, ocanti:

Pinintiri pitimanamitane pibega cara pininta obiati.

Oca pite iragáantane Tosorintsi iroro obataigatsi. Te ine basini obataiguerone.

³² Ira ogomeantiro Sanguenari icanqueri Jesus:

—Jee, aisonori, Ogomeantatsiri, ora picanque. Paniro ini Tosorintsi; teni irine basini.

³³ Aisati caninataque anintasantiri, omasëretimari eati, përosati anguenqueri, anguemisantiri, angantineri omagaro ora icocacái. Aisati ocanta caninataque anintiri atimanamitane

ibega cara aninta eati. Aisonori oca iroro obatatsi, pabisëro cara omëri Tosorintsi oisha. Te ingogasante Iriro ataquineri oisha.

³⁴ Jesus iquemaqueri, igótocoqueri ira ogomeantiro Sanguenari cara yotabitanë caninasati, icanqueri:

—Pënibaque pintingomintimari Tosorintsi, pënibaque intingomibintëmi obiro.

Aique itsorogaiguëri matsiguenga; te aikuero irosomitaigairi aisati Ira Jesus.

Quirisito imatsiguenga David.

(Mt 22.41-46; 23.1-36; Ir 20.41-47)

³⁵ Cara yogomeantasegui Jesus oquibequë pongotsi cara yapatotaiga joríojegui, yosamitaiguëri:

—¿Pairo icanbitaiguë ira ogomeantiro isanguenare Moisés cara “Ira Quirisito imatsiguengasonori David?” ³⁶ Jirai Isëre Tosorintsi osanguenatacaqueri ira David. Isanguenague nega:

Ira Tosorintsi icanqueri Natingomi: “Pisobigue yaca nobacosonorica. Pintsibatina yaca nagáantomentoquëca irooti cara nagabeiri antagaisati ira quisaiguëmi, irajitaiguëmi Itingomi”.

³⁷ Aisati David ijitiri Itingomi. ¿Ati ingantima David intingomintobitimari imatsiguengasonori ira boquënguitsine aikuenta? Iriroca Itingomi David, ¿Pairo te pijitobitaigueri Pitingomi obirojegui aisati?

Iquemaigabaqueri tojai matsiguenga botoibiritaigairi Jesus, icaninabentaigabaqueri.

³⁸ Përosati yogometaguëri matsiguenga Jesus:

—Pigamaiguemari iraugui ogomeantiro isanguenare Moisés. Quero picantaigairi ibega iriro. Icgasantaiguë iriro iranëitagueantëmaro imanchaqui caninarosonori aisati oquibeintsa. Aisati icogasantaiguë iriáiguë cara opimantagani pairoraca arota iraniacaninataigueri matsiguenga irobetsatobëmari. ³⁹ Aisati icogaiguë iragasobicaigueri caninaroquë sobigomentotsi cara yapatotaiga jorío. Cara irapatoitima imatsiguenga irapaiguë, icogaiguë irisobicaigue aganguisati intsibataiguëmari itingomipague. ⁴⁰ Aisati yágabitsaquero obango ogamaimentaga iroontita cosamani yamanocotasitari Tosorintsi arota iraniacaninataigueri matsiguenga. Carari nongomantaiguëmi ira cantatsi negaca iratsipiriasantaiguë irabisaiguëri basini matsiguenga, tojai ingasitigatëri Tosorintsi.

Ora tsinane opëri Tosorintsi omagaro oguireguita.

(Ir 21.1-4)

⁴¹ Ainta Jesus isobiaque oquibequë pongotsi irasi Tosorintsi. Inetsaiguëri matsiguenga cara yomingaiguëri iguireguita yogantaririquë quirequi ira ipiri Tosorintsi. Ainta casintaguetchari yomingaiguëri tojai quirequi. ⁴² Aisati iniobëro tsinane ogamaimentaga pomianqueri pite itiomijani iguitso quirequi ira te iripënatima. ⁴³ Icaimaiguëri irogomere Jesus, icantaiguëri:

—Nangantaiguëmi, aisonori ora ogamaimentaga te aisa ongantaiguemari basini ira paiguëri Tosorintsi iguireguita. Arosataanti quirequi opëri iroro, carari Tosorintsi iniacanatëro pabisaiiguëri basini. ⁴⁴ Iraegui basini paiguëri Tosorintsi arosata ira inomotaiguiri, ainta tojai yonantotaiga. Carari cara opabacari Tosorintsi aisati opëri antagaisati pasinta inomotiro, teni irinaje basini omanantajima operi.

13

Icanque Jesus ogomeriguetëngani ibango Tosorintsi.

(Mt 24.1-2; Ir 21.5-6)

¹ Cara isotocanë Jesus oquibequë pongotsi cara yapatotaiga joríojegui, poro irogomere icanqueri:

—Ogometinari, pinetsero mopëpague ora yobetsicantaro pongotsipague. ¡Oquibeguinte, caninaro!

² Yotabitanëri Jesus:

—¿Pinaiaigabitacarora pongotsipague? Aisonori nongomantëmi oca: aikuenta irogomeriguetaiguëro antagaisati. Quero pini yaca pite mopë otsibatobagaa.

Ati ongantima irogomeriguetëro ibango Tosorintsi.

(Mt 24.3; Ir 21.7)

³ Aique iáque Jesus isobigopë oguitojaquë jitacha Olibos. Catingasati pinë ibango Tosorintsi. Aro casiriconiati yosamitaiguëri itsibasati irogomere: Peroro aisati Santiago aisati Joan aisati Antiris:

⁴—Pingomantaiguena: ¿Ati ongantima cara irogomeriguetëro orapague pongotsi? ¿Pairo ogótacaquinane cara omoncaraquima antagaisati oca picantaiguënaca?

Icomantaiguëri *Jesos*: “*Aiqueta iratsipiriaiguë matsiguengajegui*”.

(*Mt 24.4-8; Ir 21.8-11*)

⁵ *Icantaiguëri* *Jesos*:

—*Pigamaiguema* arota quero yamatobitaigapëmi pairiraca. ⁶ *Iribocaiguë* tojai matsiguenga ingantaigapëmi: “*Naro Quirisito*”. *Iromatobitaigapëri* tojai matsiguenga. ⁷ *Pinguemocotaiguëro* omanátobagachari; ingantaiguëmi: “*Yomanátobacani canta jaanta*”. *Ira* basini irojocaiguëri itingomipague irogaiguëri irirai. Quero iquengaiganaja matsiguengajegui, carari quero pitsorogaigu. *Aiqueta* onganquima tojai inguisabacaquima, carari queroquerai omoncarata omagaro ora nacantaiganaquemi. ⁸ *Aiqueta* inguisaiganaqueri basiniati matsiguenga, inguisëgotobaganëma irógobaquima. *Aisati* tojai osebataguetanëma quibatsiquë. *Aitosati* iritasegaiguë tojaisonori matsiguenga omagaroguitequë. *Antagaisati* oca iroonti omarintanëma, iroso cantënguicha queroquerai yobomirintsitasantiri matsiguengajegui. *Aiqueta* coraque agabenisonori atsipiriagantsi.

Tojai inguisaguetaiguëri ira quemisantatsiri.

(*Mt 10.19-22; 24.9-14; Ir 21.12-19*)

⁹ *Përosati icomantëri* *Jesos*:

—*Pigamaiguema* obirojogui. *Cara* irogóiguë matsiguenga piquemisantaiguina irágaiganaquemi cara yapatotaiga, iripasaiguëmi. *Aisati* irágaiganaquemi catingasatiquë itingomipague aisati cobeingaripague. *Pitsipiriaquero* oca aroquenta piquemisantaigëna *Naro*. *Pingomantaguetiri* iraequi quisaiguëmi. *Pingomantëgotina*. ¹⁰ *Nocogui* cara queroquerai pabisi omagaro oca atsipiriagantsica, ingomantëgotaguequero *Caninaro Nibarinti* antagaisati matsiguengapaguequë ati ongantima nagabisaicotajiri cara inguemisanquina. ¹¹ *Cara* irágaiganaquemica cara yapatotaiga itingomipague, quero pitsorogui, quero piquenga: “¿*Pairoraca nanganqueri?*” *Ogösëretacaquemi* *Isëre* *Tosorinti* ora pinganque, onibataquëmi. ¹² *Aiqueta* ira sërari irácagantëri ireinti, irócagantëri. *Aisati* irácagantëri ira itomi. *Ira* janequipague irácagantëri ira casintari irócagantëri. ¹³ *Piquemisantaiguënanta*, inguisaiguëmi matsiguengajegui. *Carari* nagabisaicotajiri antagaisati ira abequerone, ira quemisantaiganaquina përosati.

Icanque *Jesos*: “*Aisati irobomirintsitaiguëri Joreasati. Aisati tojai iratsipiriaiguë antagaisati timaiganaquenguitsine*”.

(*Mt 24.15-28; Ir 17.22-24; 21.20-24*)

¹⁴ *Aisati icomantë* *Jesos*:

—*Jirai* isanguenaque comantantatsiri jitacha *Daniel*:

Aiqueta ingapë cara ibangoquë *Tosorinti* ira quimingarisonori cantaguetasantatsi ora te ongemeite, iraguimingatëro antagaisati.

Pigóiguëro *Sanguenari*. *Cara* piniaiguërica ira nocomantëgoti yamaica inganaque ibangoquë *Tosorinti* cara quero iqui pairiraca, aroca pitimi *Joreaquë* pisigaiganaquima otisipaguequë. ¹⁵ *Aintabica* obiro sotoquë pobangoquë, quero picapanaanti tsmagui págapanaantiro ora pasinta; iroontita pisigasantanëma. ¹⁶ *Aroca* pinë pitoganequë, quero pipigasitapanaaantaro basini piguitsagare. ¹⁷ *Tojai* otsipiriaiganaquero tsinane ora pëniatatsira aisati ora tsotagatsi ojaniquite queronta pisigasantanaca. ¹⁸ *Pomanocotiri* *Tosorinti* arota quero pisigaiga cataguitëriquë omarigantëtica angani.

¹⁹ *Aitosati* *icanë* *Jesos*:

—*Aique* tojai iratsipiriasantaiguë matsiguenga. *Iratsipiriasanoiguë* abisërone ora it-sipiriaiguë matsiguenga jiraisonori irooti yamaica, aisati abisërone omagaro inanënguitsine aiqueta. ²⁰ *Aroca* ongosamanitanëma cara iratsipiriasanoiguë, opoguiriaguëri omagaro matsiguenga ingamaque, carari *Tosorinti* ingábintsaiguëri antagaisati quemisanqueri iraequi icoiguë, arota quero ocosamaniti atsipiriagantsi. ²¹ *Aintaca* poro cantatsi: “*Irro Quirisito Ica*”, quero piquemisantiri. *Aisati* inganquemica: “*Intsome* canta *Quirisitoquë*”, quero poguati. ²² *Coraque* iribocapë tojai matobiantatsiri ingampëmi: “*Naro Quirisito*”. *Aisati* iribocapë basini inganque: “*Naro* comantëgotëmirine *Tosorinti*”. *Tojai* iritsongantë, ingoque iromatobitaiguëri tojai matsiguenga, carari quero yamatobitiri ira quemisantasantatsi ira icoiguë *Tosorinti*. ²³ *Pigamaiguema!* *Aroque* nocomantaiguëmi atiraca ongantima aiqueta queroquerai omoncarata.

Atiraca ongantima cara iribocapae *Jesos aiqueta.*

(*Mt 24.29-31; Ir 21.25-28*)

²⁴ *Aisati icomantaiguëri* irogomere *Jesos*:

—*Cara* abisanaqueca oca atsipiriagantsica, aique itsitinique paba, *aitosati* quero yobariaguitetanaí manchacorí, ²⁵ *imariaguëpë* jonogatsi, *aisati* osebatanëma omagaro

jonoquë. ²⁶ Aique iraniaigabaquena Naro, Naati nopaniaca jirai Jonogaguitequë nomatsiguengatapë, nopogopë mingoriquë, nongobeingatasanotapë nosangueguitetasanotapë, nantingomibintasantaiquëri omagaro, nagabeiri antagaisati. ²⁷ Aisati nagátaigapëri nonamireegui irapatotaiguëri antagaisati quemisantaiguëna iraugui igoigane Tosorintsi atiraca itimagueti quibatsiquë.

Yosiacagantaiguëneri iguera Jesus.

(Mt 24.32-35; Ir 21.29-33)

²⁸ Aisati yoniagaiguëri irogomere Jesus:

—Yamai nosiacagantaiguëmiro anchato jitacha iguera: pinguengasantiro. Cara iroraini otsego, ositane osi, aro pigóiguë pënibaque osariganaje. ²⁹ Aisa ocanta, cara piniagabaquero oca nacantaiguëmica yamai, pigóiguë pënibaque orequima cataguiteriquë cara nopogopae. ³⁰ Nangantasantaiguëmiro oca: queroquerai icamaigui joríojegui tsoengatsiri queroquerai omoncarata oca nocomantaiguëmica. ³¹ Omeganëma omagaro ora inatsi jonoquë aisati omeganëma oca quibatsica, carari quero opega nasi nanibare. Omoncaraquima omagaro ora nacantaiguëmi.

Te ogótgani atiraca ongantima cara iribocapae Jesus.

(Mt 24.36-51; Ir 12.41-48)

³² Aisati icanque Jesus:

—Te irogóte pairiraca atiraca ongantima nopocaje Naro. Te irogóigue ironomireegui Tosorintsi. Nipoque, nomatsiguengatapë carari teatisati nogóte Naro. Paniro igótiro Pabati. ³³ Pigamematasha, aisati piguiaiguena tenta pigóigue atiraguiteca cara nopigapaima. ³⁴ Nosiacari sërari játatsi canta jaanta. Queroquerai iáti, ingaimëri antagaisati iromeraro, ingomantaguetanëri paniropague pairoraca inganquineri. Aisati iroganëri omisantineri omoro ibango. Inganqueri: “Pigamema, pinetsero”. ³⁵ Arotasha pinaigue obiroyegui nogomere tenta pigóigue atiraca ongantima iraretajima casintaro pongotsi. Te pigóigue iribocapaeca chopiniquë, queroca aganguitequë, queroca coniamaniaquë cara ingaimanë tiapa sërari, queroca naramaniquë. ³⁶ Pigamabentimatasha cara iriguito irarepaima casintaro, caquitatsibi iraniopaimi. ³⁷ Ora yamai nanganquimira aitosati nanganqueri antagaisati: “Pigamematasha”.

14

Icoque itingomipague jorío irácagantëri Ira Jesus.

(Mt 26.1-5; Ir 22.1-2; Jn 11.45-53)

¹ Aro pitenibati cataguiteri orequima jiesita jitacha Pásicoa cara yapaiguiro joríojegui ora pan te ine pipnganta, aisati iquengaigaca cara isotocaiguë Ejípitoquë jiraisonori. Aro yapatotaigaca itingomipague saseriroti aisati ira ogomeantiro Esanguenare Moisés icogaigabitaca iromatobitaiguëri Jesus arota iráqueri aisati iróguiri. ² Icantobagaigaca irirojegui:

—Quero águiri jiesitaquë. Iriro iniacandinataigui matsiguenga. Aroca águëri inguisaigacái eiroegui.

Oshaguëantacari casangajengaro Jesus Betaniasato.

(Mt 26.6-13; Jn 12.1-8)

³ Aique yogaganaca Jesus canta Betaniaquë. Cara, ainta Iriro ibangoquë Simón ira iribatsasetabitaga jirai. Yapasigui Jesus cara pipocasipëri tsinane. Pamëgotasitapëri asaiti casangajengaro jitacha náriro ora tojai pipënata. Ora pinanta pobetsicagani mopë sibirato jitacha aribásitoro. Pisataicoquero, oshaguëguitontapari Jesus iguitoquë. ⁴ Aintasati basini matsiguenga iguisëgotaignacaro casangajengaro. Icantobaganaca:

—¿Pairo paparaabiriquero casangajengaro? ⁵ Caninataqueme omimantërome casangajengaro águëri tojai quirequi 300 tenario omëri tojai ira coguitiacha omitocotaiguëri.

Iguisaneintaiganaquero tsinane. ⁶ Icantaiquëri Jesus:

—Ineta iroro. ¿Pairo picantobiquero oca tsinaneca? Patiro ocanquinaro caninaro. ⁷ Përo cara irinaque obiroyeguiquë ira coguitiachari te irine iguireguite; cara pinintica pomitocotaiguëri iriro. Carari quero nini Naro përosati. ⁸ Ocanquinaro caninasati. Oshaguëantobënarero queroquerai iteina. ⁹ Aisonori nangantaiguëmi: aiquenta pinguengagueque omagaroquë quibatsi, pinguenguitsatomotaguetaiguëri matsiguenga Caninaro Nibarintsi. Aisati pingomantëgotiro oca tsinaneca arota irogótcotiro matsiguengajegui.

Joras iquianca irácagantëri Jesus.

(Mt 26.14-16; Ir 22.3-6)

¹⁰ Aique íáque paniro irogomere Jesus, ijita Joras Cariotisati. Íátasitaiguèri itingomipague saseriroroti, inibatagaigapèri cara irácagantèri Jesus. ¹¹ Iquemaigabaqueri saseriroti, icaninataiganaque iquengaigaca imèri Joras quirequi. Aique ipigapaa Joras, inetsasantèri Jesus arota irogóontèmarì atiraca ongantima cara irácagantèri.

Yobetsiquèri Jesus irogomere cara icarantacaro yapè.

(Mt 26.17-19; Ir 22.7-13)

¹² Pareca Pásicoa cara yametaiga joríojegui yapaigui pan te ingonaguero ora piponganta, aisati cara yóguiri oboina oisha aisa icanta cara icantaigaca jorio jiraisonori Ejípitoquè. Yosamitaiguèri Jesus irogomere:

—Natingomi, ¿Nega pininti nobetsiquèmiro cara popè Pásicoaquè?

¹³ Jesus igáqueri pite irogomere:

—Atsi pijáte poeboroquè. Cara pitonguibotobèmarica sèrari iromègotapè nija chomoquè, piguiatanèri. ¹⁴ Cara ingapè iriro, pinganqueri casintaro pongotsi: “Ícanque Ogometaguinarì: ‘Cara pobangoquè, ¿Nega pini cara nopaiguè Pásicoa Naro aisati nogomerejegui?’ ”

¹⁵ Ironijagaiguèmiro oquibe coarito jonoquè; aito pobetsiquèro perintsi asi Pásicoa.

¹⁶ Aique íáiguè pite cara poeboroquè, iniaigapèri sèrari aisa ocanca omagaro cara ican-taiguèri Jesus. Aro yobetsicaiguèro Pásicoa.

Jesus icomantègotèri ira ágagantèrine.

(Mt 26.20-25; Ir 22.21-23; Jn 13.18-30)

¹⁷ Cara otsitiniguitanè, yaretaigapa Jesus aisati irogomere. ¹⁸ Cara yapaigasegui mesaquè, icantaiguèri Jesus:

—Aisonori nangantaiguèmi, ainta paniro yapègotèna yaca ira ágagantènane.

¹⁹ Aro yogasèretaigaca antagaisati, paniropague yosamitèri:

—Natingomi, ¿Naroco ágagantèmine?

²⁰ Icantaguèri Jesus:

—Irianti paniro obirojegui picarati 12. Irianti pècosiguina cara napè noberatotequè.

²¹ Nopaniaca Naro Jonogaguetequè, nomatsiguengatapè yaca quibatsica. Jirai isanguenatocoquina Sanguenariquè, aroque nomoncaraquero omagaro. Irari atsipiriasantèrone ira ágagantènane, ¡Caninataqueme querome ini iriro! ¡Querome itsipireiro!

Yogomeantè Jesus irapapinintobiqueri quemisantatsiri aisati irógobitaiguèmarì.

(Mt 26.26-29; Ir 22.14-20; 1 Co 11.23-26)

²² Cara yapaigasegui, Jesus yáguè pan, icarasiaqueri Tosorintsi, itibatsaaguequero, yotsatengaiguèri irogomerejegui. Icantaguèri:

—Jeroa pan osigaro nobatsa. Popaiguero. ¿Teco nangamobitaiguemi?

²³ Aique yáguè irógomero, icarasiaqueri Tosorintsi, ipaguitaiguèri. Antagaisati yógaigacaro.

²⁴ Icantaguèri:

—Iroo osigaro naraa, ora naraatobitanèneri omagaro matsiguenga cara nangamobitaiguèri. Yamai naraa ocanti irorai Nibarintsi; iroro ingábintsantaiguèmarì Tosorintsi. Cara irabentaiguèna, Tosorintsi irojocajineri matsiguenga ora icantaguèti te onganinate, quero iquengaineri aitosati. Nacantaiguèmi yamai arota pigóigue atiraca ongantima iragabisaicotajiri Tosorintsi antagaisati quemisanquinane. ²⁵ Yamaica quero nógaaro oja oba aisati irooti cara nantsibataiguèmi cara iragáantanequè Pabati. Cara igáantè Irro omagaro omasinatitanè. Aique nóguèmaro iroraia aisati obirojegui.

Icantaguèri irogomere Jesus: “Yamai pijocaiganaquina”.

(Mt 26.30-35; Ir 22.31-38; Jn 13.36-38)

²⁶ Aroque yapaiguè. Aique icántataiguè Jesus aisati irogomere, íáiguè cara oguitojaquè jitacha Olibos. ²⁷ Icantaguèri irogomere Jesus:

—Yamai pijocaiganaquina pisigaguètanèma, cara ocanti Sanguenari:

Nóguèri ira omisantirine oisha, aro irisigaiganaquima iroishate, inguenagueque porocague.

²⁸ Carari nanganiatanae, nobataiguèmi canta Garireaquè.

²⁹ Irro cantènguicha Peroro icanqueri:

—Aroca irojocanèmi antagaisati basini icaegui, quero nojoquimi naro.

³⁰ Yotabitanèri Jesus:

—Aisonori nongomantèmi, Peroro. Yamaica tsitinirica queroquerai icaimanai tiapa sèrari, ongaraque maba pinganque: “Teni nogótiri Ira Jesus”.

³¹ Aisati icanatasantè Peroro:

—Aroca nantsibatèmi nangamobiquemi, quero nacanti: “Teni nogótiri Ira Jesus”.

Aisa icantaiguè antagaisati irogomere.

Jesús yamanaqueri Iriri cara panguirintsisiquë jítacha Jetsemaní.

(Mt 26.36-46; Ir 22.39-46)

³² Aique íáiguë yaretaigaca Jetsemaníquë. Jesús icantaigapëri irogomere:

—Pisobicaigue yaca; najáque Naro cara, nomanocoqueri Pabati.

³³ Aro maba yáganë casiriconiati: Peroro aisati Santiago aisati Joan. Iparintaca Jesús tojai yogasëretasantaca aisati iquenganeintasantaca. ³⁴ Icanqueri:

—Tojai nogasëretasantaca agabenisonori. Pënihaque nangamaque. Pisobicaigue yaca, pingaguíte.

³⁵⁻³⁶ Aique yogaganaca cara querora, yaquitomopa quibatsiquë. Yamanocopëri Iriri:

—Apa, Pabati, Obiro pinganque omagaro; caninataque pigabisainaro ora bocatsi; teni naninte natsipirie, carari quero nacantiro ora nocogabeca Naro, iroonti nanganque ora picocaquina Obiro.

³⁷ Aique Jesús ipigapaa irogomerequë. Iniopairi isamaigasegui. Yosamitëri ira Peroro:

—Simón, ¿Pairo pisamabirique? ¿Teco pabebintsatiro pobotsiquine, te pabeteri pingaguitimate arosata? ³⁸ Pingaguíte, pomaniri Tosorintsi arota iromitocotaiguemi quero picantaguetiro ora te ongemeite. Picogabeta pingantirome ora nococaquemira, carari te pingantiro.

³⁹ Aisati íátaji Jesús. Yamanocotajiri Iriri. Irootisati yogatsitairi ora icanqueri naaraiquerai. ⁴⁰ Ipigapaa aisati iniopairi irogomere aitosati isamaigasegui, tojainta ipotsiquitasantë. Te irogóiguë irotopitanairi. ⁴¹ Aisati íátaji yamanopai maba. Aro ipiganaja Jesús, icantaiguëri irogomere:

—¿Somaigatsibico? Atsi pisamaigue yamai. Jirai nopaniaca Jonogaguítequë nomatsiguengatapé. Carari aroque omoncaraca yamai cara irácagantëna ira cagari caninataigatsi.

⁴² Pingabiritaiguema, intsome ajáte. Coraguitaque ira ágagantënane.

Yáguëngani Jesús.

(Mt 26.47-56; Ir 22.47-53; Jn 18.2-11)

⁴³ Cara inibatasegui Jesús, yarepa Joras ira yogometabeta Jesús. Icarataigapëri tojai matsiguenga. Yamaigapë isabirite aisati anchaqui. Aroque igátaiguëri itingomipague saseriroti aisati ira ogomeantiro isanguenare Moisés aisati antiasiparipague. ⁴⁴ Aroque icomantaiguëri Joras icanque:

—Ira nasarapëma ora pigóontanëmari Iriro Jesús. Páganëri.

⁴⁵ Aique íatasipëri Jesús Joras, yasarapari, icanque:

—¿Aintabi, Ogometinari?

⁴⁶ Aique ipocasitaigapëri antagaisati ira itsibataigapa Joras, yágaiganaqueri Ira Jesús.

⁴⁷ Aro paniro irogomere yáguë isabirite, itoguimitatëri iromeraro itingomi saseriroti.

⁴⁸ Aro icantaiguëri Jesús:

—¿Pairo pamasibiriquinaro pisabirite aisati anchaqui págantänënaró? ¿Pijitaiguëco Naro cosirintsi? ⁴⁹ Tojai piniaigabitina cara nogometaguimi cara ibangoquë Tosorintsi, te págaiguena carari aroquenta omoncaraca ora ocomantëgotina Sanguenari.

⁵⁰ Aique ijocaiganaqueri Jesús antagaisati irogomere, isigaguetaiganaca. ⁵¹ Ainta poro oboina sërari yoguiatanëri Jesús. Te inguitsagatema, patiro icanaquero tocoya. Yágaigabitacari iriro matsiguenga ⁵² carari ijocanëro tocoya, isigaganatanaca saacanari.

Yágaiganaqueri Jesús catingsatiquë itingomipague joríojegui icarati 71.

(Mt 26.57-68; Ir 22.54-65; Jn 18.12-14, 19-24)

⁵³ Aique yágaiganaqueri Ira Jesús ibangoquë itingomisonori saseriroti cara yapatobiritaigacari basini itingomipague saseriroti aisati antiasipari aisati ira ogomeantiro ora isanguenare Moisés. ⁵⁴ Yoguiataiguëri Peroro icarantanë. Icapë tantotsiquë tsomaguí itsibataigacari sorarojegui cara votataiguë tsitsiquë. ⁵⁵ Aro ira itingomipague saseriroti, aisati antiasipari, aisati omagaro itingomipague jorío icarati 71 icogaigabitaca matsiguenga ingomantëgotëri Jesús ora te onganinate arota irógaiguëri. ⁵⁶ Ainta tojai itsoiguëgotaiigabitacari Jesús carari te inguenguema. ⁵⁷ Ainta basini tsoiguëgotantachari icantaiguë:

⁵⁸ —Caní jirai naquemaiguëri naroeuguí cara icanë Jesús: “Nogomeriguëtairo oca ibangoca Tosorintsi ora yobetsicaiguë matsiguenga. Ongaraque maba cataguiteri, nangabiritajiro basini irorai ora te irobetsiquiro matsiguenga”.

⁵⁹ Carari teatisati onguenguema irinibare ira comantëgotaiiguëri. ⁶⁰ Aro icabiritanaca itingomi saserirotipague, yosamitëri Ira Jesús:

—¿Pairó te potapibiritiri? ¿Pairó ojita oca icantocotaiguëmica?

⁶¹ Përo cara imairetopitëri Jesús, te irotopitëmatiri. Aisati yosamitairi itingomi saseriroti:

—¿Obiroco Quirisito Itomi Tosorintsi caninarisonoriguente?

⁶² Icanque Jesús:

—Jee, Naro. Nopaniaca Jonogaguitequë, nomatsiguengatapë. Aiquenta piniaigaina nosobigopë ibacasonoriquë Tosorintsi sintsirisonoriguinte, aisati piniajina cara popoque mingoriquë, nopigapaima yaca quibatsica.

⁶³ Aito cara iguisanaca itingomi saseriroti itisaraanëro imanchaqui, icanque:

—Piquemaigabaqueri. ¿Pairo ongogobique basini comantëgotërine?

⁶⁴ Icantocotaguetasitari Tosorintsi. ¿Pairo piquengaiga obirojegui? ¿Pairo anganqueri?

Yotabitaiguëri joríojegui; iquengaigaca antagaisati:

—Caninataque ingamaque.

⁶⁵ Aique ijobaboroqueri iboroquë, ibasioquiqueri iroquiquë incho tangaborotëri. Ican-taiguëri:

—Jaa, pingomantina. ¿Pairi capojëmi?

Aisati iromeraroegui itingomi saseriroti incho tangaborotëri.

Icanque Peroro: “Teni nogótiri Jesus”.

(Mt 26.69-75; Ir 22.54-62; Jn 18.15-18, 25-27)

⁶⁶ Aintaquerai isobiaque Peroro saaguiteroquë. Pipoque tsinane ironomire itingomi saseriroti. ⁶⁷ Oniopëri cara yotasigui tsitsiquë. Onetsasantëri ocanqueri:

—Aisati obiro aguiatiri Jesus, Ira Nasaresati.

⁶⁸ Carari itsoiganaca Peroro:

—¡Teni nogótiri! ¡Teni nanguemimi pairoraca picantina!

Aro iátabeca Peroro cara icabitapa. Aito cara icaimanë tiapa sërari. ⁶⁹ Iroeroquerai tsinane onetsiri Peroro aisati. Ocantaiguëri iraugui inaigasegatsi:

—Ica sërarica aguiatëri Jesus aisati irogomere.

⁷⁰ Yotabitanai Peroro:

—¡Teni nogótiri!

Caraca arosata, ira inaigasegatsi icantaiguëri ira Peroro:

—Aisonori obiro tsipataigari irogomere Jesus obironta Garireasati; pinibatinta pican-taigari ibegaiga Garireasati.

⁷¹ Icantasanti Peroro:

—Te sonori nogótiri sërari ira picantocoquina. Igóque Tosorintsi aisonori nacanquemi. Queroca ninibatimi catinasati, nocogui ingasitígatina Tosorintsi.

⁷² Aito cara yogatsitanaí icaimanai tiapa sërari. Aro iquanquero Peroro cara icomantëri Jesus: “Queroquerai icaimanai tiapa sërari, maba pinganque: ‘Teni nogótiri Jesus’”. Cara iquengairo ora icanqueri Jesus, iragasantanaca Peroro.

15

Yágaiganaqueri Jesus catinasatiquë Pirato.

(Mt 27.1-26; Ir 22.66-23.25; Jn 18.28-40)

¹ Oquëtaguetamananaque, yapatotaigaca itingomiegui saseriroti aisati antiasiparipague aisati iraugui ogomeantiro isanguenare Moisés. Aisati yapatotaigaca basini obatacagan-tatsiri icarati 71. Iquengaigaca, yoguëshotaiguëri Ira Jesus, yágaiganaqueri cara Piratoquë, ipaigapëri Pirato ira cobeingari. ² Yosamitobëri Jesus Pirato:

—¿Obiroco Itingomi joríojegui?

Yotabitanëri Jesus:

—Jee. Naro aisonori ora picanque.

³ Icantocotaguetasicari Jesus itingomiegui saseriroti, icantaiguë:

—Tojai icantagueque ora te ongomeite. Te inganinate Irro.

⁴ Aisati yosamitairi Pirato icanqueri Ira Jesus:

—¿Pairo te potabitëmatobitiri? Tojai icomantëgotaiguëmi cara picantaguetiro te ongomeite.

⁵ Carari te irotopitëmatiri Jesus irooti cara iquenganeintasanacari Pirato. ⁶ Aro anta-gaisati osarini omoncaraca jiesita cara iquengaigaca joríojegui jiraisonori cara yabisoben-queri ironomire Tosorintsi cara Ejípitoquë. Cara jiesitaquë yameta Pirato iromisotocajiri paniro ira yomingui iromingamentoquë, ira icoigaiguë jorío. ⁷ Ainta iromingane ijita Barabás. Yomianqueri irironta ógueri aisati icantaiguëri imatsiguenga: “Intsome ojocajiri Iromasati ogobeingarite”. ⁸ Aro yapatotaigaca joríojegui, icocagaiguëri ira Pirato:

—Yamaica nocogaiguini pingantinaro ora pameta: pomisotocajiri paniro iromingaga.

⁹ Yotabitaigabaqueri Pirato yosamitaiguëri:

—¿Picogaiguico cara nomisotocajimiri Ira Itingomi joríojegui?

¹⁰ Icanque negaca Pirato aroquenta igóque cara iguisaneintasicari Jesus itingomiegui saseriroti tenta iraninte inguemisantiri Jesus matsiguenga. ¹¹ Carari itingomiegui saseriroti icantacagaiguëri joríojegui:

—Nocogaiguini pomisotogajiri ira Barabás.

¹² Aique yosamitaiguëri Pirato:

—¿Pairo nanganqueri Ira Jesus Ira pijitaiguë Itingomi joríojegui?

¹³ Icantaiguëri catsigue joríojegui:

—¡Popëicotiri corosiquë!

¹⁴ Yotabitaiguëri Pirato:

—¿Pairo icanque quimingari ora nopëicobiriqueri?

Icaimaiganaque jorio catsigue:

—¡Popëicotiri!

¹⁵ Icogasanti Pirato iraganinataiguëri matsiguenga. Aro yomisotocajiri Barabás, ipaiguëri joríojegui. Aisati igáqueri soraro iripasataiguëri Jesus aisati iribëquëgotëri.

Isërontaigacari Jesus soraropague itsipiriacaqueri.

(Mt 27.27-31; Jn 19.1-3)

¹⁶ Aique yágaiganaqueri Ira Jesus cara ibangoquë cobeingari, tsomagui, ora jitacha pectorio. Yapatotaiguëri omagaro basini irapisorarote. ¹⁷ Aro icaagaigabaqueri Jesus manchaguíntsi quiraaguisaamagori. Aisati yobetsiquëneri imatseiro iroonti totsei, imatseiqueri.

¹⁸ Aique isërontaigacari, yobetsatomemegaigacari:

—¡Obiro Natingomi! ¡Intimeta Itingomi joríojegui!

¹⁹ Yágaiguë anchaqui ipasatantaigacari iguitoquë, ijobatopiantaiguëri, yobaticagueritotomemegasitacari, itingomintomemegacari. ²⁰ Cara itsongaiguë icabíntsaítaiguëri isërontaigacari, yágabitsaqueri manchaguíntsi quiraaguisaamagori, icaagobairi iraisati imanchaqui.

Ipëicotaiguëri Jesus cara corosiquë.

(Mt 27.32-44; Ir 23.26-43; Jn 19.16-27)

Aique yágaiganaqueri cara iribëquëcoiguëri. ²¹ Itonguibocari sërari Sirenesati, ijita Simón. Iriri iriri Arijantoro aisati Irojo. Ipaniaca parígoti, iáque Jerosarénquë. Imeratobacari soraro, igáqueri:

—Páganëneri igorosite.

Aro yáganëneri irooti cara ²² yaretaigaca Górogotaquë ora ocanti osigaro iguito igamaga. ²³ Aro ipabitacari Jesus oja oba ogonoataga casangajengaro jitacha mira, carari te iróguimaro Jesus. ²⁴ Aro ira soraropague ipëicotaiguëri Jesus cara corosiquë, aique imaguimpibintëqueri imanchaqui Jesus ipabacaguecaro yotsatiancaro. ²⁵ Terai irionogatasante paba cara ipëicoqueri. ²⁶ Isanguenaquero pairoraca ipëicobiriqueri. Ocanque: “Ica Iriri Itingomi joríojegui”. ²⁷ Aisati ipëicoqueri pite cosirinti itsibatacari Jesus. Ainta paniro ibacosonoriquë Jesus, basini imatepacoquë. ²⁸ Aro omoncaraca Sanguenari ora ocanti negaca:

Itsibatacari ira cantaguetiro te onganinate.

²⁹ Ainta abisanaqueri abatsiquë iniopëri Jesus, icabegaiguëri, ipoteguitotagapa, ³⁰ icantaiguëri:

—Obiro ogomeriguetirone ibango Tosorintsi, aisati ongaraque maba cataguiteri, pobetsicaíro. Atsi yamai pigabisaicotajima Obiati. Cagarimica matobiantatsiri, piguëtajima corosiquë.

³¹ Aisati isërontaigacari itingomiegui saseriroti aisati iraugui ogomeantiro isanguenare Moisés icantobaca:

—Yogabisaicotaiguëri imatsiguenga carari te iragabisaicotima Iriati. ³² Iriroca Itingomi joríojegui, Agabisaicootatsiri, iraguëtajimata Iriati corosiquë. Nanetsaiguëri, aro nanguemisantaiguëri.

Aisa icanca ira cosirinti itsibatancari ipëicoqueri icantocotaguetasicari Ira Jesus, icabegaiguëri aisati.

Cara Icaaque Jesus.

(Mt 27.45-56; Ir 23.44-49; Jn 19.28-37)

³³ Cara catinga paba otsitiniguitetanë antagaisati quibatsi irooti cara inëmatanë paba ochapinitanë. ³⁴ Cara ochapinitanë icabitanë Jesus.

—Eroi, Eroi, ¿Irama sabacatani?

Ora ocanti: “Pabati, Notosorintsite, ¿Pairo pijocobitanëna?” ³⁵ Ainta matsiguenga cara, iquemaiguëri icantaiguë:

—Pinguemobëri. Icaimëri Eriás comantantatsiri.

³⁶ Aro isiganaca poro, yáguë ichomicantaro, yoaquero obaaquë chochoari. Yoguëneri chocopiquë itimagonaguitanaca ipabitacari Jesus, icanque:

—Irinita. Atsi anetseri aroca iribocasitapëri Eriás iraguëpëri iragabisaicoqueri.

³⁷ Aro icaimasantanë Jesos, irooti icamantaca. ³⁸ Cara icamaque Jesos, aito cara otis-
araanaca aganguisati ora yotigantaro ibango Tosorintsi. Irooti oquibepiriga tera yoguëro
arota quero iqui pairiraca. Oparintaca jonoquë, otisaraaca irooti osobi. ³⁹ Aro ira capitán
inetsaseguiri Jesos, ati icanta cara icabatanë aisati icamaque. Icanque:

—Aisonori Ica sërarica Iriro Itomi Tosorintsi.

⁴⁰ Aintasati cantiqueronta tsinanepague onetsaiguëri Jesos. Ainta María Magararasato,
aitosati basini María iniro Santiago carantatsi aisati iniro José, aisati Saromé. ⁴¹ Ocapague
tsinane poguiataiguëri Ira Jesos cara Garireaquë, opaiguëri iraperi, tojai omitocoiguëri.
Aisati ainta basini tsinanepague aguiataigapëri irooti Jerosarénquë.

Itiaiguëri igamaga Jesos omoroquë.

(Mt 27.57-61; Ir 23.50-56; Jn 19.38-42)

⁴² Aroque ochapinitanë. Iroro cataguiteri cara yobetsicaiguë jiesita queroquerai pareta
sábaro cara imagoriaigui. ⁴³ Aro ipocasiqueri Pirato poro Arimateasati jítacha José. Iriro
icarataigui basini obatacagantatsiri icarati 71 cara yapatotaigaca. Iriro iniacaninataiguë
matsiguenga aisati yoguiaquero iragáantane Tosorintsi cara intingombintaiguëri anta-
gaisati matsiguenga. Te intsoroguiiri ira cobeingari; ipocasipëri yamanopëri:

—Camaque Jesos. Nocogui pinintacaguina náganëri igamaga nomianqueri omoroquë.

⁴⁴ Imabocaca Pirato cara aroque icamaque Jesos. Icaimagantëri igapitante soraro,
yosamitobëri:

—¿Aisonori camaque Jesos?

⁴⁵ Cara icomantëri capitán Pirato cara aisonori icamaque, ipëri José igamaga Jesos.

⁴⁶ Aique iáque José yamanantëro tocoya caninaro irorai, yoguëpëri igamaga Jesos, iponatan-
cari tocuya, yomianqueri omoroquë ora yomoroquera jirai cara mopëquë, ititiguëro mopë
yasitocoontobacari. ⁴⁷ Cara yomianqueri igamaga Jesos tsmagui onetsaiguëri María
Magararasato aisati basini María iniro José.

16

Cara icabiritanaa Jesos icaniantanai.

(Mt 28.1-10; Ir 24.1-12; Jn 20.1-10)

¹ Pabisanaque cataguiteri comagoriantague aique piáiguë maba tsinane, María Mag-
ararasato, María iniro Santiago aisati Saromé. Piáiguë pamanantaiguë casangajengaro
arota otiritaigerime Jesos. ² Oquëtaguetanai, irooti tominco, cara iriraique contepatsi
paba, paretaigaca tsinane omoroquë. ³ Posamitobaca:

—¿Pairiraca titigaigacáirone ora mopë yasiantacaro omoro?

⁴ Ocantaiguë negaca oquibeguintenta mopë. Cara onetsaigapëro oquibe mopë, aroque
osiringaja. ⁵ Aro ocaiganaque tsmagui omoroquë oniopëri oboina sërari isobigasegui
obacasonoriquë. Iquitsagata manchaguinsi catarisonori. Oniaigapëri oquenganeintas-
antaigapa otsorogaiganaque. ⁶ Icantagabaquero:

—Quero pitorogaigui. Nigóque picogaigabitarini Jesos Nasaresati Ira ipëicoiguë
corosiquë. Teni irinaje yaca; aroque icaniantanai, icabiritanaa. Pinetse yaca cara yoguëri.

⁷ Yamai pijáigue pingomantaigapëri irogomerejegui aisati Peroro: “Aique iriátë Jesos cara
Garireaquë cara icantaiguëmi jirai, irobataiganaquemi”.

⁸ Aique pisotogaiganaji maba tsinane omoroquë, pisigaiganaca. Oquenganeintasan-
tanaca, omogomogoataganaca otsorogaiganaque. Te ongomantëmatiri pairiraca otsoro-
gasantaiguënta.

Jesos yoniagapaaro María Magararasato.

(Mt 28.9-10; Jn 20.11-18)

⁹ Cara icaniantanai Jesos tomincoquë, irotsita yoniagapaa María Magararasato ora ijo-
quine ogamagarite icarati 7 jirai cara inantabecaro. ¹⁰ Aique piáque ocomantapëri iraugui
itsibataiga Jesos cara aroque icabiritaja. Yogasëretaigasega aisati iragaigasega ¹¹ cara
ocomantaigabitapari:

—Caniatanai Jesos Atingomi, naniajiri.

Carari te irajitaigabaquero.

Jesos yoniagapaari pite irogomere.

(Ir 24.13-35)

¹² Aique ipasiniatitanë Jesos cara yoniagapaari pite irogomere yanëitaigasegui abatsiquë
iáiguë iritoganequë. ¹³ Iriro pite ipigaigaa icomantaigapëri ira basini irogomere Jesos.
Teatisati irajitaigabaqueri iriro.

Yoniagaigapaari irogomere icarati 11.

(Mt 28.16-20; Ir 24.36-49; Jn 20.19-23)

¹⁴ Aiquenta yoniagaigapaari irogomere icarati 11 cara yapaisgui. Isintsitsataigapëri icanque:

—¿Teco nongomantaiguemi nangabiritajima? ¿Pairo te pijitobitina? Picantaigaca te ine pisëre. ¿Pairo te pijitobitaiguëri ira niaigaina Naro?

¹⁵ Aisati Jesus icantaiguëri irogomere:

—Pijáigue antagaisatiquë quibatsi, pingomantëgotaguëtinaro omagaro matsiguëngajeguiquë oca Caninaroca Nibarintsi cara nacamobiquëri, nacaniatanai. ¹⁶ Pairiraca quemisanquerone oca Caninaroca Nibarintsi aisati imaotisatëma, iragabisaicotajiri Tosorintsi. Ira quero iquemisantiri, Tosorintsi iratsipiriacaqueri iriro Sharincabeniquë. ¹⁷ Ira quemisanquerine, Tosorintsi oniagaiguëmari itasorintsite. Iragántantaiguëmaro nopairo camagaripague. Irinibaquero irorai nibarintsi. Cara iraniaiguëri imatsiguënga irogóntimaro aisonori ora icomantaiguë. ¹⁸ Aisati imogotirica marangue, aroca iratsiquëri, quero icami. Aroca iróguimaro pigantatsiri, querootisati icami. Iroquinerica ibaco janaitatsiri, aro iragaguibegajiri.

Itsonquero Maricos isanguenare.

(Ir 24.50-53; Irag 1.7-11)

¹⁹ Iroro oca icantaiguëri irogomere Atingomi Jesus, aique iáque jonoquë. Yogainocanaa isobiaque ibacosonoriquë Tosorintsi, itsibatari Iriri cara itingomibintanti. ²⁰ Aique iátagueque irogomere iquenagueque icomantaguëtaiguëri antagaisati matsiguënga aisati icanta Atingomi Jesus. Coshoni yogaiguëri Jesus imitocoiguëri cara itasongagueanti arota irogóte matsiguënga cara aisonori ora icomantagueanti.

Aro ocarati ora nasanguenague. *Maricos*

IRA IROCAS ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

Ibetsatari Tiójiro.

¹⁻⁴ ¿Aintabi Tiójiro? Yamai naninti nongomantëgotëmiri Jesoquirisito. Ainta tojai aroque isanguenatocoqueri, icomantëgotëro ora icantagueque Iriro. Iniaiguëri aisati iquemaiguëri, iroro isanguenatocotaguëqueri Quirisito, iquenguitsatocoqueri. Ninibatëro isanguenare aisati nosamitasantaguequeri arota nogótocotasantiri Jesus cara iparintaca irooti yamai. Aroque nigóquero antagaisati. Yamai nagáquemiro, nocoguini pigóte catin-gasati obiro ora icantagueque Jesus, pigóte teni iromatobitaiguemi ira comantaiguëmi aisati ira sanguenataiguëmiro.

Ira ironomire Tosorintsi icomantëri Sacarías cara aiquenta irinaque itomi.

⁵ Jirai, cara itingomibintanti Eroris cara Joreaque, ainta saseriroti ijita Sacarías. Iriro imatsiguenga Abías. Icanquineri Tosorintsi cara oquibeque ibango. Ainta iina Sacarías ojita Isabel, aisati imatsiguenga Aarón. ⁶ Iquemisanti Sacarías, aisati iina. Icantague- quineri Tosorintsi omagaro ora icocaqueri, aisati imatsiguenga iniacaninataiguëri piti- rooti. ⁷ Te irine itomi, sirabaronta iina. Aisati intiasiparitanë pitirooti.

⁸ Aro omoncaraca cataguiteri cara icantaiguëneri Tosorintsi imatsiguenga Abías. Yametaigaro irirojegui iragáqueri paniro saseriroti iritaguëneri Tosorintsi casangajengaro. ⁹ Icanqueri Sacarías irapisaserirotite:

—Yamai atsi obiro pitaguineri Atingomi casangajengaro.

¹⁰ Aro icapë oquibeque ibango Tosorintsi cara Jerosarénquë. Sotoquë ainta inaignasegui tojai bototaigachari yamanaigasegui cara itaquero casangajengaro tomagui. ¹¹ Iriguito iconijatomopëri ironomire Tosorintsi irisaanganetsite yaringinopë cara pitagani casanga- jengaro. Yaratianque imatepacuquë Sacarías. ¹² Cara iniobëri Sacarías, iquenganeintasan- tobacari itsorogobëri, ¹³ carari icampëri:

—Sacarías, quero pitsorogui. Tojai pamanopiantëri Tosorintsi. Aroque iquemaquemi: aiquenta ontsomaaqueri otomi pijina. Pijitobëri Joan. ¹⁴ Tojai pinganinabenqueri obiro, aisati inganinabentaiguëri tojai pomatsiguenga. ¹⁵ Iraniacaninatëri iriro Tosorintsi iraguibatëri. Quero yóga obaa querootisati pairoraca cochoari. Coshoni ogasantëri Isëre Tosorintsi; cara queroquerai ini coshoni oguëri, inantasantëmari. Përosati ogamequeri. ¹⁶ Inguemisantacagaiguëri tojai jorío imatsiguenga arota intingomintaiguëmari Tosorintsi, casintari antagaisati. ¹⁷ Aisati inganquimari ibega Eriás, tojainta ogamequeri Isëre Tosor- intsi, aisati onganqueri iritosongantë tojai. Irobaqueri Atingomi, ingomantaiguëri imat- siguenga iraguiaigabaqueri, inguemisantaigabaqueri Ira bocatsi aisa icanta imatsiguenga jirai iquemisantaiguëri Tosorintsi. Inganqueri sërarpague inguengasëretaguimari itomi. Irogometaiguëri tsoengatsiripague inguemisantiri Atingomi, inganquero ora caninari. Irobetsicaiguëri imatsiguenga irágacanineitaigabaqueri Atingomi.

¹⁸ Yosamitobëri Sacarías:

—¿Aisonori? ¿Ati nangantima nogótasantë aisonorica oca picomantënaca? Aroque nanti- asiparitanë naro, aisati ontiasiporotanë najina.

¹⁹ Aro yotabitanairi irisaanganetsite Tosorintsi:

—Naro Gabiriel, coshoni noguëri Tosorintsi. Igáquina nongomantëmiro oca Nibarintsica caninatatsiri. ²⁰ Aiquenta omoncaraquima omagaro oca nocomantëmica, carari aroquenta pitsoinguëna, yamai nogótacaquimiro pomasantitanë, quero pinibatai irooti cara irinaque pitomi.

²¹ Cara sotoquë, iquenganeintaigaca tojai jorío, yoguiaigabitacarai Sacarías, icantobaca:

—Cosamani inasegui tomagui. ¿Pairo te irisotocobite?

²² Aique isotocopai ibangoquë Tosorintsi. Te irinibataje, ijicoguitetasipaa. Aro igóiguë jorío, icantaiguë:

—Ainta ira iniaque tomagui.

Sacarías mosontisonori. ²³ Poro tominco intëneri Tosorintsi cara oquibeque ibango. Aique ipiganaja Sacarías irasiquë ibango. ²⁴ Aique opëñibatanë iina, pimánaca obangoquë. Icarati pabocorooti manchacori te osotocaje. ²⁵ Oquianca ocanque:

—Jirai nipasiquique tenta irine notomi, carari quero nipasiquti aisati. Icábintsëna Natingomi. Iriro caninarisonori.

Gabiriel icomantëro Maria cara irinaque Otomi.

²⁶ Aroque pogabisé 6 manchacori cara poguè Isabel iina Sacarías. Aro aisati igáqueri Gabriel Tosorintsi:

—Pijáte poeboroquè jítacha Nasaret cara Garireaquè. ²⁷ Pingantiro María, iinatsari José. Irro imatsiguenga David. Te oniobintiri sèrari carari ocogui águiri José.

²⁸ Aro iátasiquero. Yoniagaparo icampèro:

—¿Aintabi, María? Naro bocatsi, naniaquemini. Nongomantèmini cara tojai inintasantimi Tosorintsi, tojai icábintsasantèmi, iniacaninatèmi, coshoni yoguèmi. Pobataiguèro antagaisati basini tsinane.

²⁹ Otsorogobèri María cara inibatapèro negaca. Oquianca: “¿Pairoraca ocanti oca?”

³⁰ Aro icampèro aisati:

—María, quero pitsorogui. Aisonori icábintsasantèmi Tosorintsi. ³¹ Iroro poguèque. Aiquenta cara iriboganaque Pitomi, pijitiri Jesus. ³² Irro obaquenguitsine Itingomisonorinta. Aisati Irro Itomi Tosorintsi jonoquèntaberi. Tosorintsi inganqueri Igobeingarite jorío, imèrini iragáantomento David icharine jirai. ³³ Inganqueri Tosorintsi: “Notomi, pèrosati pintingombintaiguèri omagaro joríojegui paniaiguènguicha Jacoboquè”. Pèrosati iragáantè, quero pitsonga iragáantane cara intingomibintaiguèri.

³⁴ Aro María posamitobèri irisaanganetsite:

—¿Ati ongantima oca picanquenaca, terainta naniobintiri sèrari?

³⁵ Yotabitanèro:

—Inapèmi Isère Caninaro Tosorintsi. Aisati iritsonquimi Tosorintsi jonoquèntaberi, inapèmi isintsire aisa ocantaro pibega mingori. Iroro ora iribogaguèque Pijaniqueite, Irro caninarisonori Itomi Tosorintsi. Ingantocoqueri: “Icaninatasanti Irro. Te ingantaguetèmate ora te onganinate Irironta Itomi Tosorintsi”. ³⁶ Aisati pomatsiguenga Isabel antiasiporo, te ogue jirai, yamai opèñibatirini otomi aroque 6 manchacori ³⁷ tenta ine ora comètomotimarine Tosorintsi.

³⁸ Aro ocanè María:

—Irro Natingomi. Ongonijatomotinata pairoraca icocaquina. Ingocaquinaca nontsoaqueri Notomi cara picomantèna, aro caninataque.

Irooti isaanganai ironomire Tosorintsi iátaji, te oniobairi aisati.

María piátasiquero Isabel omatsiguenga.

³⁹ Aro pobetsicaca María. Oquètaguetanè piáque omanapague aiqvero cara Joreaquè. Pitonganaque ⁴⁰ piátasiquero Isabel. Pareca ibangoquè Sacarías. Ocapè oniopèro Isabel, ocampèro:

—¿Aintabi? Naniaquemini.

⁴¹ Oquemobèro María Isabel cara pobetsataparo, aro yosebatanaca otomi Isabel tso-maguí, pinantasantaronta Isère Tosorintsi, pogomequero. ⁴² Iroro ora ocantaguetanè, ocanque:

—¡cantaneintègotacá Tosorintsi! Icábintsaguèro omagaro tsinane, carari obi-ro icábintsasantèmi, pobataiguèro antagaisati tsinane. Aisati icábintsasantèri Pijaniqueite. ⁴³ Obiro iniro Natingomi, Ira Pijaniqueite. ¿Pairoroco pipocasibiriquina naró tenta nobatèmate? ⁴⁴ Naquemobèmi cara pibetsatapèna; aito cara icaninatanè najaniqueite yosebatanaca tso-maguí natsaguiquè. ⁴⁵ Aisati picaninatanè obiro aroquenta piquemisantobèro ora icomantagantèmira Atingomi. Iromoncaraquemiro Irinibare.

⁴⁶ Aro ocanque María:

—Nacantasèretè: “Caninarisonoriguinte Natingomi”. ⁴⁷ Tojai nacaninabentasantèri Irironta Notosorintsite, Nagabisaicoontatsirite. ⁴⁸ ¿Pairó icábintsabiriquina naró? Te nobate, teatisati nogóte, carari iniaquina icábintsasantèna. Iroro irinibatocotaguèquina omagaro matsiguenga yaca quibatsica cara nacaninabentasantèri Tosorintsi. ⁴⁹ Tojai itasongobenquina Irironta sintsirisonoriguinte. Itasorintsitanotè, icaninatanoti; te ingantaguetèmate quimingari. ⁵⁰ Pèrosati icantaneintègotaguèri antagaisati ira quemisantiri, ira tingomincari; icantaneintègotaguèri omatsiguenga jiraisonori irooti yamai icantaneintègotaguèna. ⁵¹ Tojai itasongagueanti. Yoguipasi-guitèri aguibataigachari ira jitaigacha iriati caninari. ⁵² Yágabitsataguèri cobeingaripague ira tingomintaigabitachari. Carari yoguibataiguèri ira te irajicaninatima iriati, inganqueri cobeingari iriro. ⁵³ Yoguemagaiguèri ira tasegabetacha, iroro cantènguicha yágabitsaqueri casintaguetachari ora inomotiri. ⁵⁴ Pèrosati Tosorintsi imitocotaiguèri antagaisati omatsiguenga quemisanqueri, pèrosati iquengaguèri, icantaneintègotaguèri. ⁵⁵ Aroque omoncaraca Irinibare, icanquero antagaisati ora icantaiguèri Abaram jirai. Aisati icanquero omagaro ora icantaiguèri imatsiguenga Abaram aisati inganquero pèrosati.

⁵⁶Ocari oca ocanque María. Aro otio moquero Isabel maba manchacori, aique pipiganaja asiquê obango cara opaniaca.

Cara inê Joan baotisantantsiri.

⁵⁷Aro omoncaraca cataguiteri cara otsomaaquero otomi Isabel. ⁵⁸Ocaninatasantanê. Iquemocotaiguêro omatsiguengajegui, icaninabentaiguêro. Icantaiguê:

—Icantaneintêgotasantêro Atingomi.

⁵⁹Pabisanaque 7 cataguiteri. Oquêtaguetana ipocasitaigapêri janequi arota iritotêqueri arosata omasiquê itegui cara yametaiga joríojegui. Aisati icantaigapê itimanamitane:

—Caninataque irajitima Sacarías irágapairotajiri iriri.

⁶⁰Orari iniro ocontaigabaquero:

—Quero ijita Sacarías; iroonti irajiquima Joan.

⁶¹Yotabitaiganaquero:

—¿Pairo pinintobique pijitiri Joan? Teni irine Joan pomatsiguengaquê.

⁶²Aro ijigotaquero Sacarías yosamitêri:

—Obiro, ¿Pairo pininti obiro irajitima pitomi?

⁶³Yacotaquero iromapêneri paperi, isanguenataiguêneri: “Aroque ijica Joan”. Aro iquenganeintaigaca imatsiguenga. ⁶⁴Aito cara inibatagajiri Sacarías Tosorintsi inibatai aisati. Icanque:

—Icaninatasanti Tosorintsi.

⁶⁵Aro iquenganeintasanotaigacari matsiguenga. Antagaisati timaigatsi tongagari-paguequê cara Joreaquê iquemocotaiguêri Joan itomi Sacarías. ⁶⁶Iraegui quemocotaiguêri Joan iquengasêretai ganacari yosamitobaca:

—¿Ati icanta ira janequeira? ¿Pairo inganque aiquenta?

Igôiguê cara icábintêri Joan Tosorintsi. ⁶⁷Aique Isêre Tosorintsi pinantasantacari Sacarías, pogomequeri, aro icanque:

⁶⁸—Caninataque omagaro matsiguenga iraniacaninatiri Atingomi Otosorintstite omagaro eiro jorio icharineegui Isirael. Itasongobentaigacái. Ipcasitaigacái cara iragabisaicotajái. ⁶⁹Jirai David icanquineri Tosorintsi ora icocaquero. Yamai Tosorintsi igáqueri imatsiguenga David, itasorintsitobianti aisati yogabisaicoonti. ⁷⁰Icanque cara icomantêgotêri jirai comantantatsiripague: ⁷¹“Icanê Tosorintsi: ‘Nagáquemiri Ira agabisaicotaiguêmine, aisati iragabeiri ira quisaiquêmine, irojocaiquêmiri. ⁷²Nangantaneintêgotaiquêri omagaro imatsiguenga Abaram. Quero nopeicotaro ora nacantasantaiguêri. ⁷³Jirai nacanquero picharineegui Abaram: ⁷⁴“Aiquenta irinaiguê tojai quisai gabitêmine, carari nagabisaicotaigaimi. Quero pitsorogaigui pinguemisantaigaina; pinganinabentaiguêna. ⁷⁵Noganinasêretaiquêmi querota picantagueti te onganinate. Naniacaninataiguêmi, përosati pingantaiguê ora nococaquemiri irooti cara pingamaiguê” ’ ”. Ocari oca icantasantê Tosorintsi jirai. ⁷⁶Yamai, notomi, irogótocoquemiri matsiguenga obiro comantêgotêrine Tosorintsi jonoquênintaberi. Pobetsiquineri Atingomi arota irágacaninataigabaquero matsiguenga. Pobaquero Atingomi obiro, pingomantaiguêri pomatsiguenga irobetsicaiganaquema, iraganinasêretaiquema, iragueiri Atingomi boquênguitsine, irágacaninataigabaquero. ⁷⁷Aisati pogometaiquêri pomatsiguenga irogóigue ati ingantima iragabisaicotaigacái eiro cantaguetatsi te onganinate, iragabisaicocái arota anganinabentaiguero antimaigue caninasati. Quero otsorogajiro agamane.

Aroque icanquero oca Sacarías.

⁸⁰Aro yogabisê tojai irosarinite Joan, iquibianê. Aiquero iquemisantanêri Tosorintsi. Ijocanêri imatsiguenga itimaque cara tera ontimingani irooti cara cataguitერიquê cara iparintaca iquenguitsatomotaiganaquero imatsiguenga.

2

Cara inê Jesus.

(Mt 1.18-25)

¹Cara aroque inê Joan, ainta cobeingari Iromasati ijita Sésar Agósito. Itingomibintaiguêri omagaro quibatsisati. Icanque cara irisanguenatêgotaguequima antagaisati matsiguenga arota iripênabintiri quirequi imposito. ²Te irisanguenatêgotima jirai. Icanquero cara Quirinio itingomi cara Siriaquê. ³Aique iáiguê omagaro cara i boeborotequê imatsiguenga

jirai, isanguenatocotaigaca. ⁴Itimi José canta poeboroquë jitacha Nasaret cara quibatsiquë jítacha Garirea. Aique iáque itonganaque cara Berénquë cara itimaque David imatsiguenga jirai. Berén pini cara Joreaquë. ⁵Yáganëro María iina itsibatanacaro pënibaque ontsomaaque. ⁶Cara pinasegui Berénquë, aroque omoncaraca cataguiteri cara ontsomaaque. ⁷Icogabepa José pongotsi, carari tojai matsiguenga iagaigaparo pongotsipague. Aro icanaque cara ibangoquë ibiraegui, cara otsomaaqueri María Ira oguibare Otomi. Oponatancari manchaguintsisite, poguinaiaqueri cara cajónquë ora yapantaiga ibiraegui.

⁸Ainta inaigasegui aronisatiquë Berén ira omisantaiguiri iroishate tsitiniriquë cara yapaitiro tobarisi. ⁹Iroguito poguëtaguetocotasantaiguëri irosangueguitere Tosorintsi. Aisati yoniagaigapari ironomire Atingomi. Itsorogasantaignaque ira omisantatsiri. ¹⁰Icampëri irisaanganetsite Tosorintsi:

—Quero pitsorogaigui. Nipocasique nongomantaigapëmi Caninaro Nibarintsi ora pinganinasëretantima aisa inganinasëretaiquë omagaro matsiguenga cara inguemaigabaquero. ¹¹Yamai iboguë cara iboeborotequë David Ira agabisaicotaigaimine. Irianti Quirisito Atingomi. ¹²Iroto pigóontëmari Janequi: cara pijáiguë piniaigapëri oponatancari manchaguintsisite, inariaca cara yapantariquë ibiraegui.

¹³Iriguito yoniagaigapari itsibataigapari arosónori basini ironomire Tosorintsi, ipaniagaca Jonogaguítequë, icantaigapë:

—Icaninatanotsi Tosorintsi ¹⁴Ira timatsi Jonogaguítequë. Intsome aniaiguiri caninarisonoriguinte. Yaca quibatsica Tosorintsi ingábintsaiquëri iromagoriasëretagaiguëri antagaisati matsiguenga cantaiguëro ora icocagaiguëri, inganqueri intimacagobguima caninasati.

¹⁵Aique cara iáigai irisaanganetsite Tosorintsi Jonogaguítequë aisati, icantobaca ira omisantaiguiri iroishate:

—Intsome cara Berénquë anetsaiguiri Ira Agabisaicoontatsiri icomantagantëgotacái Atingomi.

¹⁶Aito cara iáiganaque omanapague iniaigapëri José aisati María aisati Otomi inariaca cara yapantariquë ibiraegui. ¹⁷Cara iniaigapëri icomantëgotëri Janequi omagaro icantaiguëri irisaanganetsite Tosorintsi. ¹⁸Aro iquenganeintasantaigabacari antagaisati quemaigabaqueri. ¹⁹Ora María tojai oquengasëretapininquero ora icomantaigapë, te omaguasantiro. ²⁰Aique ipigaigaca omisantiri iroishate, icantaiguë:

—Aisonori icaninatanotsi Tosorintsi. Ocaninati omagaro ora icomantacái; pabisanaque irooti cara yoniagaigacái. Caninari ini Tosorintsi.

Itoquengani Jesus.

²¹Cara yogabánë Jesus 7 cataguiteri, oquëtaguetanai itoquengani cara yametaiga joríojequi. Aisati ijitaiguëri Jesus, cara icanquero María irisaanganetsite Tosorintsi jirai.

Yáganëri Jesus oquibequë ibango Tosorintsi.

²²Jirai Tosorintsi isanguenatacaqueri Moisés cara ontsomaaquericata sinane otomi, 40 cataguiteri ontimaque obangoquë; quero piáti oconoitari quemisantatsiri. Aro imoncaraquero José isanguenare Moisés: cara omoncaraca 40 cataguiteri, yágaiganaqueri Jesus cara Jerosarénquë arota imëri Tosorintsi cara oquibequë ibango, icanque:

—Jerica notomi obatatsi. Pairoraca pingocaqueri, nocogui ingantimiro.

²³Ocari oca icanque Tosorintsi isanguenatacaqueri Moisés:

Ira obatatsi otomi tsinane irianti irasi Atingomi, intomintëmari.

²⁴Aisati piáque María omëri Tosorintsi ira icoicoque Iroto Sanguenariquë: pite sompaguiti queroca pite paroma. Omoncaraca omagaro ora ocanque Sanguenari.

²⁵Ainta itimi Jerosarénquë sërari ijita Simeón. Iquemisantasantëri Tosorintsi aisati itimi caninasati aisati yoguiauqueri Ira Agabisaicoontatsiri, Ira aganinasëretaiquërine antagaisati joríojequi imatsiguenga. Pinancari Simeón Isère Caninaro Tosorintsi, iquemisantasantëro. ²⁶Aroque poniaguëri Isère Caninaro cara quero icami irooti cara iraniobëri Quirisito, Ira iragáque Atingomi. ²⁷Piátacaqueri Simeón Isère cara ibangoquë Tosorintsi. Ainta, cara icanaque José aisati María inganqueri Jesus ora icoicoque Tosorintsi Sanguenariquë. ²⁸Inioberü Jesus Simeón, iátasiqueri, itsomaabëri, icanqueri Tosorintsi:

²⁹⁻³⁰—Picaninatanotsi, Natingomi, casintina. Yamai naniaqueri Ira Agabisaicoontatsiri Ira picantocoquina. Aroque yamai; te naninte nantime yaca aisati. Yamai caninataque najáque Obiroquë. ³¹Aisonori, pigáqueri iragabisaicotaigairi omagaro matsiguengapague. ³²Irosangueguitetocotaiguëri iraequi cagari jorio, irogótacaqueri ora aisonori; aisati iraganinataiguëri joríojequi ira quemisantaiguëri.

³³José aisati María iniro Jesus iquemaiquëro ora icantocoqueri Jesus Simeón, iquen-ganeintasantaiganaca. ³⁴⁻³⁵Icantocobentaiguëri pitirrooti:

—Nocogui ingábintsaiquemi Tosorintsi.

Aisati icanquero María:

—Ica Pitomi igáque Tosorintsi iragabisaicotaiguèri tojai jorío quemisanquerine, carari ainta tojai inguisaneintaiguèri iritsoenguiri; iratsipiriacagaiguèri Iríro. Ipcasique iragabisaicotaiguèri omagaro, carari ingonagaiguèma matsiguenga. Ainta inganinabentaigabaqueri, ira basini iripègatsataigabaquimari: Iríro ogonijatomoquerine ora iquengaiga matsiguenga. Aiquenta tojai piraicoqueri Pitomi.

³⁶ Aisati ainta cara tsinane comantantsiri ojita Ana. Iroro irisinto Panoel imatsiguenga Aser itomi Jacob jirai. Ontiasiporotasantanè; otimacaqueri ojime 7 osarini cara icamaque; ³⁷ yamai pinasitaa ora ogamaimentaga 84 osarini basini. Pèrosati pamanocotiri Tosorintsi cara ibangoquè. Tojai ocaninabenqueri cataguitèriquè aisati tsitiniriquè. Te onguengero operi.

³⁸ Aique pipoque Ana, oniopèri Jesus, ocarasiatocoqueri Tosorintsi. Aisati ocantocoqueri omatsiguenga Jerosaresati aguaiguèri Agabisaicoontatsiri. ³⁹ Cara imoncarataiguè José aisati María ora icanque Atingomi Sanguenariquè, ipigaiganaja Garireaqueè cara poeboroquè jitacha Nasaret.

Ipiganaja Jesus oquibequè ibango Tosorintsi.

⁴⁰ Aro iquibianè Jesus, isintsitanè, aikuero iátanètigue igótasantanè, yabisaiguèri basini irapijaneguite. Aisati tojai icábintsasanoqueri Tosorintsi. ⁴¹ Yametaiga José aisati María iátopiantaiguè omagaro osarini cara Jerosarénquè, imoncaraquero cataguitèri Pásicoa cara jirai yabisanaque jonoquè ironomire Tosorintsi, yogabisaicotaiguèri jorío cara Ejípitoquè. ⁴² Cara yogabisè Jesus 12 osarini, itsibatari casintari Jerosarénquè cara yametaiga jorío. ⁴³ Aique cara pabisanaque jiesita, ora Pásicoa, ipigaiganaja tojai imatsiguenga carari pèrosati inè Jesus cara Jerosarénquè. Te irogóte casintari; ⁴⁴ ijitaigabitaca itsibataigaari basini imatsiguenga. Patiro cataguitèri yanèiguè. Cara ochapinitané icogaigabitacari. ⁴⁵ te iraneiri. Oquètaguetané ipigaiganaja Jerosarénquè icogaigabitacari. ⁴⁶ Maba cataguitèri te iranajirí Jesus, aique iniaigairi isobiaque oquibequè ibango Tosorintsi. Itsibataigari ira ogomeantiro isanguenare Moisés, iquemisantaiguèri cara yogomeantagueti, aisati yosamitaiguèri pairoraca. ⁴⁷ Antagaisati ira quemaiguèri iquenganeintasantaigacarí tojainta igótasanti aisati caninasati yotabitaiganaqueri ogomeantantsiri ora comètaro.

⁴⁸ Cara iniaigapèri José aisati iniro, iquenganeintasantacari. Ocanqueri iniro:

—Notomí, ¿Pairo picantobitaiguèna negaca? Nocogaigabitèmi naro aisati piri nogasèretocoquemi.

⁴⁹ Yotabitanèro Jesus:

—¿Pairo picogobiquina? ¿Teco pigóte caninataque nantineri Pabati yaca ibangoquèca ora icocaquina Iríro?

⁵⁰ Carari te inguemaigue ora icantabecari. ⁵¹ Aique iátaji itsibataiganajari cara Nasarequè. Pèrosati iquemisanqueri iriri aisati iniro, te iripègatsatèmatimari. Ora iniro oquengasèretègotacari Otomi antagaisati pigótoocoqueri. ⁵² Aiquero iátanètigue Jesus igótasantanè, iquibianè. Tosorintsi icábintsasantèri icaninabenqueri, aisati icaninabentaiguèri matsiguengajegui.

3

Iparintaca iquenguitsatomotagueantè Joan baotisantantsiri.

(Mt 3.1-6; Mr 1.1-8; Jn 1.19-28)

¹ Jirai ainta cobeingari jitacha Tiberio Sésar ocarati 15 osarini icobeingabintaiguèri Iromasatijegui; igáantèri basini itingomipague: ainta Pontsio Pirato itingomi Joreasati; Eroris itingomi Garireasati; Jeripe, ireinti Eroris, itingomi Itoreasati aisati Taraconitesati; Irisania itingomi Abirenesati; ² ainta itingomi saserirotijegui Anás aisati Caijás. Ainta icaeugu itingomi, cara inibatè Tosorintsi icanqueri Joan itomi Sacarías:

—Pijáte pinguenguitsatomotaiguèri pomatsiguenga.

³ Aro iquemisanqueri Joan, iquenagueque cara Joríránquè aisati aronisati, yotsatengaiguèri imatsiguenga icantaiguèri:

—Pingantaigaima yacaqueroca, pijocajiro ora picantaguetabeca te onganinate, pomasiniatitaje, quero picantaja pibega jirai. Pomaotisitama. Aro irojocajimiro Tosorintsi ora picantagueti te onganinate, iromaguisanquero, quero iguisaneintajimi.

⁴ Imoncaraquero Joan ora jirai isanguenatoocoqueri Isaías comantantsiri:

Ainta ira cajemaquenguitsine cara te ontimingani, inganque: “Coraguetaque Atingomi, págacananatobèri; pinguemisasantobèri, piganinatiro paneingomento pibega cara pobetsicoboguitineri irabo itingomi, pigatingatiro. ⁵ Pijaguero otininapague; quero pimánantaro pairoraca. Pinguiguero tongagaripague. Pigatingatajiro cara pitugonitigoboguiti abatsi. Pobetsicaineri Atingomi caninasati. Pijocajiro ora picantagueti

quimingaro, pobetsicasëretima caninasati arota inganinatapë. ⁶ Aique omagaro matsiguenga iraniaigabaqueri Agabisaicoontatsiri Ira igáque Tosorintsi".
Aro negaca isanguenaque Isaías.

Iquenguïsatagueque Joan.
(Mt 3.7-12; Mr 1.7-8)

⁷ Aique iátsaitaiguëri Joan tojai matsiguenga imaotísaitaiguëmame. Carari icanque Joan:
—Te pinganinataigue, obirojegui aisa picantaigacari marangue. ¿Pairi comantaiguëmi pisigopitanëmaro cara iratsipiriacagaiguëmi Tosorintsi cantaca maranguepague cara isigopitaigacaro pamari? ¿Pijitasitimame aroca nomaotísaitaiguimime quero iguisaiguimi Tosorintsi? ⁸ Pinintica nomaotísaitaiguëmi, aro caninataque pingantague te caninasati, pintimaigue caninasati, arota nogótimi pijocasantëroca ora te ongomeite, piquemisantasantiri Tosorintsi. Pinetsaigueri iraugui matsiguenga cagari jorío. Iranintiroca Tosorintsi, imiaguëtiri imatsiguenga Abaram, carari quero yabisaicoanta irironta imatsiguenga Abaram. Querootisati pabisaicoanta obiatinta imatsiguenga; quero iroro iniacaninataguëtaiguimi. ⁹ Carari yamai pënibaque inguisaiguëmi Tosorintsi. Picantaigacaro pibega anchato te ine oguitso; iritotëro casintaro, irojoquero tsitsiquë. Aisa picanta obiro te pinguemisantiri Tosorintsi, te pingantineri, irojocaiguëmi Sharincabeniquë.

¹⁰ Aro yosamitapinintaiguëri iraugui quemaguëri:

—¿Pairoraca picogui nangantaigue narogui?

¹¹ Yotabitaiguëri Joan:

—Aitica pite piguitsagare, pomagarantiri cogutiachari patiro. Aitica tojai poperi, pomagarantiri aisati coguitiaro. Pingábintseri.

¹² Aisati iátsaitaiguëri Joan coigotantatsiri iguirequite imatsiguenga ipagantiri igobeingarite (Sésar) canta Iromaquë. Ipocasiague imaotísaitaiguëma, icantaigapëri ira Joan:

—Ogomeantatsiri, ¿Pairoraca nangantaiguë naró?

¹³ Yotabitaigabaqueri Joan:

—Quero picocotasitari iguirequite pomatsiguenga, irianti páguiri pomoncaratiro ora icanquemi Iromasati.

¹⁴ Aisati yosamitaigapëri soraropague icantaiguëri:

—Narogui, ¿Pairoraca nanganque naró?

Yotabitaiguëri Joan:

—Quero págabitsatiri pairoraca yasinta basini aisati quero picantiri: “Queroca popabaquinaro, nanguisëmi”. Quero pinebetari quirequi, quero picantocotaguetasitari matsiguenga arota pomitsorogüiri imëmiri quirequi. Ira quirequi ipënabintimi pitingomi, antagaini; quero picogui basini.

¹⁵ Yoguiaiguëri Quirisito matsiguenga botoibiritagari Joan, yosamitobaca:

—¿Iriroco Joan Agabisaicoontatsiri?

¹⁶ Iriro cantënguicha Joan icantaiguëri:

—Naro nobaotísaitaiguëmi nijaaquë, carari pënibaque iribocapë basini teni aisa ingantina nibega naró. Ibaquina Irironta Natingomisonori, nitsoingaa naronta cantaca iromeraro Iriro. Cara iribocapë Iriro irogaiguëmiro Caninaro Isëre inasërequimi oganinasëretëmi; carari ainta obirojeguiquë tsoengatsiri iragátaiguëri Sharincabeniquë. ¹⁷ Cara iribocapë Quirisito irapatoitaiguëri quemisantatsirijegui aisati ingasiriconiatiqueri. Ingantaiguëri cantaca casintaro arosa osamataga inganquero. Irapatontëmaro oguitso intianquero, iriboteguitëro, irojoquero omasiqui iritaguëro, iroonti oguitso iroquero cara yogantaroriquë. Aisa icanta Quirisito, iráganëri quemisantatsiri Jonogaguitequë, carari iragáqueri tsoengatsiri iritaguëma përosati Sharincabeniquë, iratsipiriaque përosati cara pini tsitsi pamari ora te otsibacanete.

Yomianqueri Joan Eroris.
(Mt 14.3; Mr 1.18-20; 6.17)

¹⁸ Aro tojai Joan icomantapinintaiguëri matsiguenga ora Caninaro Nibarintsi atiraca ongantima iragabisaicoqueri Tosorintsi. ¹⁹ Aisati Joan icamanaaqueri Eroris itingomi, icanqueri cara icantaguëtiro te onganinate cara yágabitsaqueri ireinti ina jitacha Erorías. Aisati isintsitsaqueri cara icantaguëtiro tojai basini ora te onganinate. ²⁰ Aique iguisaneintanëri Eroris yágagantëri Joan yomianqueri, aiquero iátanëtigue icantaguëtanë quimingaro.

Ibaotísataca Jesus.
(Mt 3.13-17; Mr 1.9-11; Jn 1.31-34)

²¹ Teraiquerai irominguengani Joan, cara ibaotísaitaiguëri tojai matsiguenga, ibaotísatëri Ira Jesus aisati. Iroontita yamanasegui Jesus, pasirianaca Jonogaguite ²² pamasobingopëri

Caninaro Isère Tosorintsi paguëpëri ocampari ibega sompaguiti, pinampari Jesus. Aisati oquemanguani Irinibare Tosorintsi jonoquë icanque:

—Obiro Notomi, nanintasanotëmini. Tojai nacaninabentasanotëmi.

Ora iripajiropague imatsiguenga Jesus.

²³ Aroque yogabisë Jesus 30 osarini cara iparintaca iquenguissatomotaiguëri imatsiguenga. Ijitaigabitari itomi José carari Irianti itomitsari José. Jesus imatsiguenga Eri. ²⁴ Eri itomi Matat. Matat itomi Irebí. Irebí itomi Mériqui. Mériqui itomi Jana. Jana itomi José. ²⁵ José itomi Matatías. Matatías itomi Amós. Amós itomi Naom. Naom itomi Esiri. Esiri itomi Nagai. ²⁶ Nagai itomi Maat. Maat itomi Matatías. Matatías itomi Semei. Semei itomi José. José itomi Jorá. ²⁷ Jorá itomi Joanán. Joanán itomi Iresa. Iresa itomi Sorobabé. Sorobabé itomi Saratieri. Saratieri itomi Neri. ²⁸ Neri itomi Mériqui. Mériqui itomi Ari. Ari itomi Cosam. Cosam itomi Erimaram. Erimaram itomi Er. ²⁹ Er itomi Josoé. Josoé itomi Erieseri. Erieseri itomi Jorim. Jorim itomi Matat. Matat itomi Irebí. ³⁰ Irebí itomi Simeón. Simeón itomi Jorá. Jorá itomi José. José itomi Jonam. Jonam itomi Eriaquim. ³¹ Eriaquim itomi Merea. Merea itomi Mena. Mena itomi Matata. Matata itomi Natán. Natán itomi David. ³² David itomi Isaí. Isaí itomi Oberi. Oberi itomi Bos. Bos itomi Saramón. Saramón itomi Nasón. ³³ Nasón itomi Aminarab. Aminarab itomi Aram. Aram itomi Arani. Arani itomi Esiromo. Esiromo itomi Baris. Baris itomi Jorá. ³⁴ Jorá itomi Jacob. Jacob itomi Isac. Isac itomi Abaram. Abaram itomi Taré. Taré itomi Nacoro. ³⁵ Nacoro itomi Seroco. Seroco itomi Iragao. Iragao itomi Parec. Parec itomi Eberi. Eberi itomi Sara. ³⁶ Sara itomi Cainán. Cainán itomi Arapasat. Arapasat itomi Sem. Sem itomi Noé. Noé itomi Iramec. ³⁷ Iramec itomi Matosará. Matosará itomi Enoc. Enoc itomi Jaret. Jaret itomi Marereri. Marereri itomi Cainán. ³⁸ Cainán itomi Enós. Enós itomi Set. Set itomi Arán. Tosorintsi yobetsiquëri ira Arán jiraisonori.

4

Icogabeca camagari irantacaquerime Jesus ora te onganinate.

(Mt 4.1-11; Mr 1.12-13)

¹ Cara ibaotisataca Jesus, pipocasiqueri Isère Tosorintsi pinantasantapari. Aro ipaniaca nijaaguë Jorirán piátacaqueri Isère cara tera ontimingani. ² Ocarati 40 cataguiteri itimaque cara, te irapëmate. Páguëri oquibe itasegane. Aro ipocasipëri camagari icogabeca irantacaquerime Ira Jesus ora te onganinate. ³ Icampëri:

—Obiersonorica Itomi Tosorintsi, pomeguiro oca mopëca pan, popero.

⁴ Yotabitanëri Jesus:

—Quero nacantiro. Ocanti Sanguenari jirai isanguenaquero comantantatsiri:

Te patiro intimantimaro pan matsiguenga, carari aisati intimantëmaro cara inguemisanquero omagaro Irinibare ora icanque Tosorintsi.

⁵ Aique yáganëri Jesus camagari jonoquë oquibequë oguitoja. Ijigotëneri omagaro quibatsi cara igáanti itingomipague, icantabecari:

⁶—Pinetsero intapague, omagaro nasi. Pinintiroca, nangantaiguëri antagaisati quibatsisati intingomintimi irágacananatëmi. Irironta nasiati, nomëri pairiraca naninti. ⁷ Aroca pobaticagueritotasiquina, pintingominquina naro, aro nanganqueri intingomintaiguëmi Obiro omagaro intaegui. Antagiasati irianti pasi.

⁸ Yotabitanëri Jesus icanqueri ira camagari:

—Ocanti Sanguenari:

Pintingomintimari paniro Atingomi Irironta Pitosorintsite. Paniro Iriro pomanocoqueri pinguemisantiri.

⁹ Aique yáganëri camagari Jerosarenquë, yoguëri jonoquë oquibe pongotsi irasi Tosorintsi. Icanqueri:

—Obiroca Itomi Tosorintsi, atsi pomatsecanë osobinta quibatsiquë. ¹⁰ Pinguenguero ocanti Sanguenari:

Tosorintsi iragáquemiri irisaanganetsitepague iromisanquemi. ¹¹ Irágaigabaquemi arota quero poparigui mopëquë.

¹² Aisati yotabitanëri camagari Jesus, icanqueri:

—Quero picantiri Tosorintsi ora inganque; posamitiri ora icogui inganque. Ocanti Sanguenari:

Quero piniantari Pitingomi Irianti Pitosorintsite.

¹³ Cara itsonque camagari irantacaquerime Jesus ora te ongomeite, igóque tiguëti ingantiri, ijocanëri iátaji. Carari iripigaima aiquenta, iragatsitairo.

Ipiganaja Jesus Garireaquë.

(Mt 4.12-17; Mr 1.14-15)

¹⁴ Aro ipiganaja Jesos Garireaque, pinancari Isère Tosorintsi, piátacaqueri. Omanapague iqemocotaiguèri iraugui timaigatsi canta. ¹⁵ Yogomeantapè pongotsipaguequè cara yapatoitaiga joríojegui. Icaninabentaigabaqueri.

Te iranintaiguèri Jesos Nasaresati.
(Mt 13.53-58; Mr 6.1-6)

¹⁶ Aique iáque Jesos Nasarequè, iboeborotequè cara iquibiaque jirai. Cara yameta, cara sábaroque icanaque pongotsiquè cara yapatotaiga jorío, yaratianque arota irinibaquineri matsiguenga Irinibare Tosorintsi. ¹⁷ Ipèri isanguenare Isaiás comantantatsiri. Yaquipariaquero, iniaquero cara isanguenaque:

¹⁸ Pinanquina Isère Tosorintsi, ipasitênaro. Pigáquina nongomantaguetiri coguitiachari atiraca ongantima iragabisaicotaiguèri Tosorintsi. Aisati pigáquina Isère Tosorintsi nangantocobintairi antagaisati irasi camagari nagabisaicotajiri, quero intaguii quimingari aisati. Aisati pagobiacaquina naganinasèretaguèri iraugui agasèretachari. Aisati pigáquina pagobiacaquina naniacagaigairi comarajari. Aisati nagabisaicotajiri iraugui atsipiriaigatsi. ¹⁹ Aisati pigáquina nongomantaguetiri matsiguenga ingábintsaiguèri Atingomi.

²⁰ Aro itsonquero Jesos yapinaguiquèro Sanguenari, yoguipigairi ipèri, isobiaque. Inetsaiguèri omagaro botoitachari. ²¹ Jesos icantaiguèri:

—Yamai nomoncaraquero oca Sanguenarica piquemaiguèca.

²² Iniacaninataiguèri ira quemaiquèri, iquenganeintacaro ora caninatsaro irinibare. Yosamitobaca:

—¿Teco iriro itomi José?

²³ Aisati icantaigairi Jesos:

—Aiquenta pingantaiguèna: “Agaguibegantatsiri, pigaguibegajima Obiro aisati pomatsiguengasonori. Poguibegaigairi matsiguenga cara Caperinaoque. Atsi yamai pitasongante aisati yaca poboeborotequèca”.

²⁴ Pèrosati icanqueri Jesos:

—Aisonori nangantaiguèmi pitsoingauguii pomatsiguengasonori quinguisatimiro Irinibare Tosorintsi, carari ira timaigatsi parigotiquè pinganinabentaigabaqueri. Naro nacantari Eriás jirai. ²⁵ Pigóiguè ainta pinasegui tojai ogamaimentaga jorio aguebatsitequè cara icomantanque Eriás comantantatsiri jirai, cara yamanaque cara quero oparigui angani maba osarini aisati basini aganguisati, cara itasegaiguè matsiguengajegui, ²⁶ carari te iragátangani Eriás iromitocotaiguero tsinane jorio ogamaimentaga, iroonti igáqueri Tosorintsi cara poboeroquè jitacha Sarépita cara Sirónque imitocoquero tsinane inabitacha canta, cagaro omatsiguenga. ²⁷ Aisa nacantari Eriseo comantantatsiri. Cara itimi iriro ainta tojai jorío iribatsasetaga, carari te iragaguibegajiri iriro Eriseo. Paniro yogaguibegajiri Siriasati jitacha Naamán, basiniati matsiguenga cagari jorío.

²⁸ Ocaro oca iqemaiquè botoitacharijegui, iguisasitaigacari Jesos, icantaiguèri:

—¿Picanti cara Tosorintsi te iraninte iromitocotaiguena?

²⁹ Icabiritaigaca, yágaiguèri Jesos, yágaiganaqueri sotoquè Nasaret cara otserabatsaque cara pini iboeborote, icogaigabitaca iromiongaiquèrime osobinta. ³⁰ Carari tiguèti ingantima irotsagatajiri basini; aro iquenaque aganguisatiquè irirojegui, iátaji.

Ipiganaja Jesos Caperinaoque.
(Mr 1.21-28)

³¹ Aique ipiganaja Jesos Caperinaoque, cara Garireaque. Cara sábaroque yogometaiquèri matsiguenga. ³² Iquemaiigabaqueri iquenganeintasantacari yogometaiquèrinta aisa icantari ibega itingomi ogótasantatsiri. ³³ Cara yapatoitaiga jorío ainta inasegui sèrari incanari camagari quimingari. Catsigue icaimasantèri Ira Jesos:

³⁴ —¡Ongainta! Quero picantaiguena, Jesos Nasaresati. ¿Aroco pipocasi que yamai pitsipiri-acagaiguèna? Nigóquimi Obiro, Ira caninari Itomi Tosorintsi.

³⁵ Isintsitsaqueri Jesos, icanqueri:

—Pomairete. Pijátopotairi sèrarica.

Aro yotèanèri sèrari quibatsiquè aganguisatiquè botoitachari, isotogopitanèri, te paio ingantèmatiri. ³⁶ Antagaisati itsorogasantè iquenganeintasantacari, inibatobaca, icantaiguè:

—¿Paio ojita oca? Patiro inibatèri camagari iquemisanqueri iátaji. Tojai itingomitasanti, tojai itasonganti.

³⁷ Aro omagaro timaigatsi cara Garireaque iqemocotaiguèri Jesos.

Jesos yoguibegajiro iraguiro Peroro.
(Mt 8.14-15; Mr 1.29-31)

³⁸ Aique isotocanë Jesos pongotsiquë cara yapatoitaiga jorío, icanaque ibangoquë Simón. Ojanaitë iraguiro Simón, ocatsiringaeguisigui. Yamañaigabaqueri:

—Pigaguibeganairo.

³⁹ Yotsitiparo Jesos, icanque:

—Aro omeganaimata ogatsingaeguire.

Aito cara pibeganaa, ocabiritanaa opaguetaiguëri iraperi.

Yoguibegaigairi arosonori janaitatsiri.

(Mt 8.16-17; Mr 1.32-34)

⁴⁰ Cara icanaque paba, yamaigapëneri Jesos tojai janaitatsiripague, pairoraca óguëri. Aro yoguëneri ibaco iguitoquë paniropague, yogaguibegajiri. ⁴¹ Aisati ainta inantaigacari camagari. Cara yomisotocajiri icaimaiguëri camagari igótinta Iriro Agabisaicoontatsiri icantaiguë:

—Obiro Itomi Tosorintsi.

Carari Jesos yomisotocagairi camagari, yoguimairentaiguëri tenta iraninte ingomantëgotiri.

Yogaganaca Jesos cara Joreaquë.

(Mt 4.23; Mr 1.35-39)

⁴² Oquëtaguetanë iáque Jesos cara tera ontimingani. Aique icogaiguëri matsiguenga, iniaigairi, icantaiguëri;

—Quero piáti. Pintime yaca naroeiguica.

⁴³ Carari icantaiguëri Jesos:

—Quero nini yaca. Caninataque najáte. Igáquina Tosorintsi nongomantaguetiri matsiguenga poeboropaguequë cara intingomintaiguemari Tosorintsi pënibaquenta orequima iragáantane.

⁴⁴ Aro iátagueque Jesos iquenguitsataguetanëro Caninero Nibarintsi pongotsipaguequë cara yapatoitaiga joríojegui cara Joreaquë.

5

Yágaiguëri tojai sima.

(Mt 4.18-22; Mr 1.16-20)

¹ Basiniquë cataguiteri Jesos iquenguitsatomotaiguëri matsiguenga cara onamijaquë angaare jitacha Jenesaret (aisati ojita Garirea). Arosonorinta matsiguenga itsinatsinaitobaca, aisati itsinatsinataiguëri Ira Jesos. ² Iniaque Jesos pite pitotsi cara onamijaquë angaare, carari yaguëtaiganaque casintaro ira siriatatsiri iquibaigairo isiritite. ³ Aro yotecaro Jesos ibito Simón, icanqueri ingomate arosata. Aro isobiaque pitotsiquë cara angaarequë, yogometaiguëri botoibiritaigabacari onamijaquë. ⁴ Cara itsonquero Jesos irogomeantane, icanqueri Simón:

—Intsome cara aganguijaquë pisiriate.

⁵ Yotabitanëri Simón:

—Ogometinari, nasiriataigabitaca omagaro naraningui, te náguëmate sima, carari Obironta cantëna, naniantaimaro aisati.

⁶ Aro imiongaigairo irisiriamiento yágasantaigairi sima inosiquëgotaiguëri tojaisonorri. Iacaro isiritite pënibaque iribëshëgotanë. ⁷ Icaimaiguëri basini pitotsiberi yacotaiguëri arota iribocaigapë iromitocotaiguëri. Yaretocotaigapa, yotetaiguëri sima pite pitotsiquë, jagaca, pënibaque otsitiganë. ⁸ Ocaro oca iniaque Simón Peroro, iquenganeintasantaca, yobaticagueritotasicari Jesos, icanqueri:

—Natingomi, caninataque pijátaje. Te nanganinate naro, nancantagueti te ongomeite; teni onganinate pintsiabatina.

⁹ Itsorogasantaiguë Peroro aisati omagaro itsipa cara iniaiguëri tojai sima yágaiguë. ¹⁰ Aisati itsorogaiguë Santiago aisati Joan, itomi Sebereo, itarobacaatacaqueri Simón. Aique icanqueri Simón Jesos:

—Quero pitsorogui. Aisa pinganquima cara pisiriatiri sima, nocogui yamai pinguemisantacagaiguenari basini matsiguenga, Naronta agabiaquemine.

¹¹ Aro yaretocotaigaa onamijaquë, ijocaiganaquero ibito, irisiriamiento, omagaro, yogu-iataiganaquero Jesos.

Jesos yogaguibegajiri iribatsasetaga.

(Mt 8.1-4; Mr 1.40-45)

¹² Cara icanaque Jesos poeboroquë, inioberri sërari iribatsasetasantaga. Ibatsaguetanë omagaro, pitsonqueri. Aro yobaticagueritotasipari, yamanopëri icanque:

—Natingomi, pinintica, piguëtainaro nobatsagoro pigaguibegajina.

¹³ Aro itimagonaguitanaca ibaco Jesus yotsagaqueri, icanqueri:

—Nocogui yamai; nagabisaicotajimi.

Aito cara opeganaa ora iribatsagoro, iquëtetanaí. ¹⁴ Igáqueri Jesus:

—Quero pairi picomantëmati. Pijáte saserirotiquë, poniaguimari irogóontëmi cara pabisëgotai. Pingantiro ora icanque Moisés: páganëneri saseriroti pobira, iritaguineri Tosorintsi. Aro irogócotogaüemi matsiguenga aroque pabisëgotai piquëtetanaí.

¹⁵ Carari aiquero piátanëtigue cara icomantëgotaguiri Jesus. Ipocasaiguëri tojaisonori matsiguenga inguemisanquero irogomeantane Jesus aisati arota iragaguibegaigairi janaitatsiripague. ¹⁶ Aro iáque Jesus canta tenta ontimingani, yamanaqueri Iriri inibatëri.

Yoguibegajiri emëngari Jesus.

(Mt 9.1-8; Mr 2.1-12)

¹⁷ Basiniquë cataguiteri iroontita yogomeanti Jesus pongotsiquë, ainta isobicaiguë iquemaiguëri bariseopague aisati ira ogomeantiro isanguenare Moisés ipaniaguetaigaca Garirreaquë, Joreaquë, aisati Jerosarënuquë. Aisati Jesus yogaguibegaigairi janaitaguetatsiri itasorintsiquë, yagobiaquerinta Tosorintsi. ¹⁸ Aique ipocaguë séraripague yanatocoigapëri sérari emëngari te iranëibintsataje. Icoagaigabitaca iráganëri tsomagui cara inasegui Jesus. ¹⁹ Tigueti inguenacaqueri cara ingaaganëri iacaronta pongotsi matsiguenga. Aro itaganëri jonoica pongotsi yomoroganëro yoguëantaigacari jatasintsi aisati sogatsa catingsatiquë cara inasegui Jesus. ²⁰ Jesus igótaiguëri cara yoguiaiguëri iragaguibegajiri emëngari, icabëri:

—Yamaica, nomatsiguenga, nasetajimiro ora picantaguëti te onganinate; quero iguisëgotaimiro Tosorintsi, quero iquengaimiro.

²¹ Ira ogomeantiro isanguenare Moisés aisati bariseo iquenganeintaigaca icantobaganaca:

—¿Pairo ijica Iriati Ica icantocotaguetasitari Tosorintsi negaca? Quero pairi setague-tirone ora te onganinate, paniro Tosorintsi. Ijitosorintsitasitaca Ica.

²² Igónijinca Jesus ora iquenganeintaigaca; yotabitaiganaqueri:

²³ —¿Pairo piquenganeintobitaiga najitosorintsitasitaca? Te ongomëtate nanganqueri: “Nojocajimiro ora picantaguëti te onganinate, nomaguisantocotimiro”, carari comëtaró nanganqueri: “Pingabiritima, págairo pijatasi panëitanae”. Aroca nanganque: “Pingabiritima panëitanae”, quero ca yanëiti, pisërontobitaiguëna. ¿Aisonorico? ²⁴ Yamai nogaguibegajiri janaitatsiri arota nogótagaiguemiro cara icanquena Pabati: “Pijocajineri ira cantaguetiro te onganinate; aique quero aguisëgotëtajari”. Nagabeiro Naronta paniacha Jonogaguitequë nomatsiguengatapë cara niboguë yaca quibatsica.

Aro icanqueri emëngari:

—Atsi pingabiritima, págairo pijatasi, pijátaje pobangoquë.

²⁵ Aito cara iniaiguëri icabiritanaca, yágairo iátasi, iátaji ibangoquë, icanque:

—Aisonori, icaninatasanoti Tosorintsi.

²⁶ Iquenganeintasantaiganaca omagaro botoitachari, itsorogasantaganaque aisati, icantaiguë:

—Caninarisonori Tosorintsi. Yamai aniaiguëro ora te oneingani jirai.

Irebí (aisati ijita Mateo) yoguiatëri Jesus.

(Mt 9.9-13; Mr 2.13-17)

²⁷ Cara isotocaji Jesus pongotsiquë, iniopëri Irebí, icoicotaguetiri imatsiguenga iguireguite, ipagantiri cobeingari Iromaquë. Icampëri:

—Intsome, piguiatanëna.

²⁸ Aro yapabaquëanëro cara isanguenatocotaguequeri quirequi, icabiritanaca, yoguiatanëri Jesus. ²⁹ Aique iáque Irebí ibangoquë yapaaguëri Jesus. Aisati icaimaiguëri tojai coigotantatsiripague aisati basini imatsiguenga. Yapaaguëri antagaisati. ³⁰ Aro ini-aigapëri bariseopague aisati ira ogomeantiro isanguenare Moisés, yabentaigaca, yosamitaigapëri irogomere Jesus:

—¿Pairo pitsipabiritigaicari coigotantatsiripague aisati cantagueantatsiripague? ¿Pairo papaagobiqueri aisati paio pógagobitaigacari?

³¹ Yotabitaiganaqueri Jesus:

—Ira cajigatatsi te ingoguiri jompiantatsi, carari ira janaitatsi iriro coguiri. ³² Te iroso nopocasite nangaimaguëti caninatatsiri, irianti nangaimagueque ira cantaguetiro te onganinate arota irojocajiro, ingantaigaima yacaqueroca.

Icomantë Jesus paio te iritibiritima irogomere.

(Mt 9.14-17; Mr 2.18-22)

³³ Icantagapëri Ira Jesus:

—Ititopiantaiga irogomere Joan aisati irasi bariseo. Ititaiga, yamanocotaiguëri Tosorintsi. Carari pasi pogomere yapaigui aisati yógaiga. ¿Pairo te iritibiritima?

³⁴Yotabitaigabaqueri Jesus:

—Pigóiguë ora ametaiga cara iráque iina sërari: ingaimaiguëri imatsiguenga inganinataiganaque omagaro. Cara iraretaiguëma, ¿Aroco irititaigapëma? Quero itita iroontita intsibatëmarí ira ágantatsi. ³⁵ Carari cara iriátë jaanta ira águërone iina, aisati iriáiguë igaimane, aro iragasërequima, irititaiguëma. Aisati Naro, iroontita natsibataigari nogomere, ¿Pairo natitacagobiquimari? Carari cara nangamaquenica, nojocanëri nogomere, aro iragasëretocoquina, irititaiguëma.

³⁶ Aique yosiacagantancari Jesos quingabaguientsi ora paniacha ora yametaiga matsiguenga carari pogomeque basiniati aisati:

—Te ongomeite pinguemisantarantiro ora yogometaiguimi bariseogui aque pingonaguëri nasi nogomeantane. Pigóiguë cara pigabitëro inaga piguitsagare, páguëro inagasite manchaguitsite. Aroca pigabitantimaro iroraisite, cara ámanaguima ontsaranairo oquibe ora inagasite piguitsagare. ³⁷⁻³⁸ Aisati pigóiguë ametaiga eiro oguëro irorai oja oba cara iriraimasiquë oisha. Cara onguëchotanë obaa iritopiganëma imasi, quero pparaata. Quero páiri ogantarone oja oba irinagamasiquë. Igóque cara onguëchotanë oja oba intonganë irinagamasi, oparaatëma obaa, aisati iraparaquima imasi. ³⁹ Aisati pairiraca óguëmarone obaa inagaa quero icogui yógaro iroraia. Inganque: “Ora inagaa caninajaro, pabisiro ora iroraia”. Aisa ocanta quero piconaguiri nogomeantane aisa irasi jirainisati. Nogometaiguëmi ora irorai carari ainta te iranintobëro, icanque: “Nameitacari irogomeantane omatsiguenga jirai, iroonti caninaro”.

6

Yogometocoquero sábaro Jesus.

(Mt 12.1-8; Mr 2.23-28)

¹ Aro basiniquë sábaro iáiguë Jesos aisati irogomerejegui cara panguirintsiquë. Ira irogomere yágaiguëro oguitsoterei tirigo imitoquero ibacoquë yapaiguëro oguitso.

² Iniaiguëri bariseopague, icantaiguëri ira irogomere:

—¿Pairo picantobitaiguëro yamai ora te onganinate? Teni ongomeite pobiguitantimaro sábaro.

³ Yotabitanëri Jesus:

—¿Teco pinibatapinintiro Sanguenari ora comantëgotaguëri David aisati itsibatari cara págaiguëri itasegane? ⁴ Aiti pan cara ibangoquë Tosorintsi, ora yobetsiquineri Tosorintsi oguëngani catingatsiquë Irro. Ora pan iroonti iraperi saseriroti, te iranintacaguiri basini irapero. Carari icanaque David cara ibangoquë Tosorintsi, yáguëro ora pan ipëri saseriroti, yapëro iriro aisati ipaiguëri ira icarataiguira, yapaiguëro. ⁵ Nopaniaca Naro Jonogaguitequë, nomatsiguengatapë cara niboguë yaca quibatsica. Iroro nocomantëgotaguëquero pairoraca anganque sábaroquë.

Cara sábaroquë Jesos yogaguibegajiri ira camabocori.

(Mt 12.9-14; Mr 3.1-6)

⁶ Basiniquë sábaro, icanaque Jesos cara pongotsiquë cara yapatotaiga jorío, yogomeantapë. Ainta inasegui sërari camabocori ibacosonori, te osebatima. ⁷ Aintasati bariseopague aisati ira ogomeantiro isanguenare Moisés, inetsaiguëri Ira Jesos aroca iragaguibegajiri sábaroquë. Icogaiguë ingantocotaiguëri Jesos: “Itarobacaaque Jesos sábaroquë, te inganinate”. ⁸ Igóque Jesos ora iquengaigaca bariseopague. Aro icanqueri ira camabocori:

—Atsi paratingue yaca aganguisaticuë cara iranaiaguëmi omagaro.

Aro icabiritanaca, yaratianque. ⁹ Icantaguëri Jesos:

—Yamai nosamitaiguëmi: ¿Pairo isanguenaque Moisés caninatatsi angante sábaroquë? ¿Teco pininte pingantiro ora caninaro oraco te ongomeite? ¿Teco pininte pigaguibegajiri janaitatsiri, pinintinico ingame?

¹⁰ Inetsaiguëri omagaro Jesos. Aique icanqueri sërari:

—Pintimagonaguitima.

Aro itimagonaguitaca. Aito cara pibeganaa ibaco. ¹¹ Iraegui ogomeantiro Sanguenari aisati bariseogui iguisasantaiganaca, yosamitobaca:

—¿Pairo anganqueri Jesos, agamaguëri?

Icoigaiguëri irogomere Jesus.

(Mt 10.1-4; Mr 3.13-19)

¹² Basiniquë cataguiteri iáque oguitojaquë irinibaqueri Tosorintsi. Omagaro tsitiniri yamanasegui. ¹³ Iquëtaguetëgotë, icaimaiguëri ira aguiataiguiri, icoigaiguëri irogomere icarati 12, aisati ijitaiguëri iragátane. ¹⁴ Ijitaiga: Simón (aisati ijiqueri Peroro); aisati

Antiris ireinti Peroro; Santiago; Joan; Jeripe; Baritoromé; ¹⁵ Mateo; Tomás; Santiago itomi Arijeo; Simón ira nintasantiro ibáisite; ¹⁶ Joras itomi Santiago; aisati Joras Cariotisati ira ágagantërine Jesus.

Yogomeanti Jesus aisati yoguibeganti.

(Mt 4.23-25; 12.15-21; Mr 3.7-12)

¹⁷ Yanongopaa, yaratingopë cara caninaguiteroquë. Ainta itsibataigari tojai irogomere aisati aronori matsiguenga Joreasati, Jerosaresati, aisati ira paniaigacha Tiroquë aisati Sirónquë cara onamijaquë oquibe angaare. ¹⁸ Ipocasitaiguëri inguemisantaigabaqueri aisati icogaiguë iragaguibegajiri janaitatsiripague. Yoguibegaigairi. Aisati yomisotocaigairi camagaripague yapabaquëacagaigairi tojai matsiguenga. ¹⁹ Antagaisati cogaigatsi irotsagatiri Ira Jesus iniaiguërinta yagobeiro yogaguibegajiri omagaro janaitaguetatsiri.

Jesos icomantëgotaguëri ira iraganinasëretaiquë Tosorintsi.

(Mt 5.1-12)

²⁰ Aro inetsaiguëri irogomere, icantaiguëri:

—Iraganinasëretaiquëmi Tosorintsi obiro te pasintima pigóiguinta te pigabisaicotajima obiati. Pintingomintaiguemarca, aro intingombintaiguëmi obiro. ²¹ Cara pitasegaiguë yamai, pinganinatë cara popë pinguemaquema aiquenta. Aisa pingantima, picogasantaiquëca pingantaigue caninasati, iraganinasëretaiquëmi, iragabiaguëmi cara pintimaiguë caninasati, iromitocoiguëmi, inguemasëretacaquimi. Iraganinasëretaiquëmi Tosorintsi obiro aragaigacha yamai aroquenta pogasëretaiquë. Picabaiguë aiquenta. ²² Iraganinasëretaiquëmi Tosorintsi cara inguisëgotaiquëmi matsiguenga, cara irojocaiquëmi cara yapatotaiga, cara ingantocotaguetasitëmi, cara iromaintaiquëmi aroquenta piquemisantaiguëna Naro, Naronta paniacha Jonogaguitequë nomatsiguengatapë cara niboguë yaca quibatsica. ²³ Jee, pinganinasëretasantaiguë: imaiquëmi Tosorintsi ora caninaro cara Jonogaguitequë, iraganinasëretëmi aisa icanta yoganinasëretaiquëri comandantatsiri jirai cara iguisaiguëri imatsiguenga, ipaiguëri iriro Tosorintsi.

Icomantëgotëri ira atsipiriaiguënguistsine.

²⁴ Aisati icantaiguëri Jesus:

—Carari obirojegui casintaguetasantacha, pitsipiriaiguë, aroque páguëro pasiat: picaninabentiro pasinta yamai. Carari aiquenta quero ipimiro pairoraca Tosorintsi, pitsipiriaiganaque. ²⁵ Aisati pitsipiriaiganaque obiro piquemaigaca yamai; aiquenta pitasegaiguë. Yamai pijique: “Te nongoguitemaro pairoraca”. Aiquenta pingoque ingábintsaiguëmi Tosorintsi carari quero imitocotimi. Yamai pitsipiriasitaiga cara picabataigui picaninabentaiguëro ora inatsi quibatsica. Yamai picabataiguë; aiquenta piragaiguëma cara iratsipiriacaiguëmi Tosorintsi. ²⁶ Aroca iraniacaninataiguëmi omagaro matsiguenga yamai, pitsipiriaiguë aiquenta. Aisa icanta iniacaninataiguëri jirai iraugui comandantatsiri matobiantatsiri.

“Pinintaiguëri iraugui quisaiguëmi”.

(Mt 5.38-48; 7.12)

²⁷ Aisati icantaiguëri Jesus:

—Carari nangantaiguëmi obiro quemisantaiguënari: pinintaiguëri iraugui quisaiguëmi, pingantaiguëri caninasati ira quisaneintaiguëmine, ²⁸ potabitanëri caninasati ira cantëgotaguetasiquimi, pomanocotaiguëri arota ingábintseri Tosorintsi. ²⁹ Aroca iripasaboroquimi poboroquë, quero pipëgatari pinintacaguiri iripasaborotimi cara querora aisati. Aroca irágotipëtiro pobasitoro, quero piguisiri, pinintacaguiri iráganëro piguit-sagare aisati. ³⁰ Aroca iromanaquëmi pairoraca, aro pomeri. Aroca irágotipëtiro ora pasinta, quero picocotiri aisati. ³¹ Aroca pingoque ingábintsaiguëmi matsiguenga, aro pingábintsaiguëri iriro. ³² Aroca pingábintseri paniro ira cábintseri, ¿Pijiqueco iraniacani-natëmi Tosorintsi, ingantocobentëmi? Quero. Igóque cara tsoengatsiri te inguemisante inintaiguëri aisati ira nintiri iriro. ³³ Aroca pinganquëri caninasati ira cantëmi caninasati, ¿Pijiqueco ingábintseri? Quero. Aisa icanta icanquero cantagueantatsiri. ³⁴ Aroca picogui iraguipigaimiro ora popirisitaqueri basini, ¿Pijiqueco imëmiro pairoraca Tosorintsi? Quero. Aisa icanta icantaiguë tsoengatsiri: ipirisitaqueri ira aguipigairine aisati. ³⁵ Carari obirojegui, pinintiri ira quisaneintaiguëmi; pingantiri caninasati; pomirisitatri coguitiachari quero pogueiri iraguipigaimiro; aro iraniacaniatëmi Tosorintsi jonoquërintaberi, imasantëmiro ora caninaro, intomintaiguëmi, aisati pingantaiguëmari Ira timatsi jonoquë, icábintsaiguëri iraugui te ingarasiatiri aisati iraugui te ingomeite. ³⁶ Pingantaneintëgotaguetiri basini aisa icanta Pabati Tosorintsi icantaneintëgotaguetiri.

Obitsita comantëgotënguichane.

(Mt 7.1-6)

Përosati yogomeantë Jesus:

³⁷—Quero picantari joes. Quero picomantëgotiri pomatsiguenga: “¿Pairo icantobiquero negaca? Icantaguetiro ora te onganinate”. Queroca pinibatëgotiri negaca, quero icomantëgotimi Tosorintsi: “Aiti picantagueti obiro”. Quero picantocotaguetasitari basini; aro quero icantocotaguetasitimi obiro. Pijocajineri ora icantaguetimi, pomaguisantineri, aro irojocajimiro obiro Tosorintsi ora picantaguetomotiri Iriro iromaguisantimiro. ³⁸ Pomeri coguitiachari, aro imëmi Tosorintsi ora coguitiomotimi. Quero imichati Iriro, imagantasanotëmi. Aroca arosata pingábintsëri basini, pomabaqueri arosata, aisati arosata ingábintsëmi obiro. Carari aroca tojai pingábintsasantëri basini, aro tojai ingábintsasantëmi obiro.

³⁹ Përosati yogomeantë Jesus. Inibatantaro quingabaguirentsi:

—¿Aroca ingatsatanëri comarajari ira basini comarajari? Quero. ¿Queroco iparigaigui omoroquë pitirooti? ⁴⁰ Aisati icanta, ira irogomere te irobatiri ira ogometiri, te irabisiri. Aroca irogótasananë tojai aisati inganquimari ibega ira ogometiri. ⁴¹ Nosiacagantëmiro: aítica pairoraca otiomijani iroquiquë pomatsiguenga, aitisati oquibe pasi piroquiquë, ¿Pairo piniobiquero irasi cara te pigótima aiti oquibe pasi piroquiquë? ¿Pairo piguisëcobiritari pomatsiguenga cara icantagueti, carari te pigóte pabisiri obiro picantaguetasanti? ⁴² ¿Pairo picantobitiri: “Majire pine náguëtajimirota ora piroquiquëti”, carari quero pineiro aitinta anchapoa pasiquë piroqui? ¡Pamatobiantë! Pijitabeca picaninatasanti pabisirime pomatsiguenga. Obitsita obetsiquenguichane, pijocajiro anchato ocomarajat-acaquemi, aique piniasantanë cara páguëtajineri basini arosata ora iroquiquëti.

Ora anchato caninaro aisati ira matsiguenga caninari.

(Mt 7.15-23; 12.33-37)

⁴³ Aiti basini yosiacagantaiguëneri matsiguenga Jesus, icanque:

—Ora caninaro anchato tiguëti ongantima onguimingatë oguitso. Aisati ora anchato te ongomeite tiguëti ongantima onganinatë oguitso. ⁴⁴ Antagaisati anchato oniantagani oguitso. Aroca aneiro oguitso anchato aro ogóquero ati ocanta anchato aroca caninari. ¿Aroca picogui pamaqui, aroco pijáque porontsiquë? Quero piáti pigóquenta te ine oguitso porontsi. Querootisati pobiguitiro oba cara jirinaquë. Ora anchato onguitsotanë asi pogu-iro. ⁴⁵ Aisa icanta, ira caninari sërari iquengasëretapinintiro caninaro, iroro icantaguetiro ora caninaro. Ira te ingomeite iquengasëretapinintiro ora te onganinate; iroro icantaguetiro ora te onganinate. Pairoraca iquengasëretaca matsiguenga, irootisati irinibaque. ⁴⁶ ¿Pairo picantasibiriquina “Natingomi, Natingomi” carari te pinguemisantiro ora nacantaiguëmi?

Icantocoqueri Jesus ira quemisantasantiri.

(Mt 7.24-29)

⁴⁷ Aisati icantaiguëri Jesus:

—Yamai nosiacagantëmiro ati icanta quemisantinari. Iquemaquero nanibare, icanquero ora nacanqueri nogomequeri. ⁴⁸ Aisati icantari ibega sërari obetsiquiro ibango. Iquigasisquero tsmagui coshobatsariquë irooti cara yarecaro oquibe mopë osobi. Aro yáguero pongotsipoa yobatiaquero, yomianquero mopëquë yoguëshotancaro. Aro opari-aque angani, pipoque jarini omotoncaatapa, posibitasantëro pongotsi, carari te áganëro coshorinta pongotsi. ⁴⁹ Ira quemëro nanibare carari te inguemisantinano aisati icancari ibega sërari obetsiquëro ibango sibatibatsariquë, te iritijasantiro pongotsipoa tsmagui. Pipoque jarini omotoncaatapa, posibitasantëro pongotsi, potëanëro páganëro te iraniajiro ibango.

7

Jesus yoguibegajiri ironomire capitán.

(Mt 8.5-13)

¹ Itsonque Jesus iquenguitsatomotaiguëri matsiguenga, aique iáque Caperinaoquë. ² Aro ainta soraro Iromasati cagari jorío. Iriro capitán, itingomi 100 soraro. ¡Janaitasantë ironomire ira ininti capitán, pënibaque ingamaque. ³ Cara iquemocoqueri Jesus capitán, igátaiguëri obatacaguri joriópague iriátasitaiguëri Jesus iromanocotiri ironomire iragaguibegajiri. ⁴ Yaretaigaca jorío yamanopiantaigapëri Jesus:

—Caninataque pijátasitiri capitán irironta caninari. Piguibegajineri ironomire. ⁵ Inintaigacái eiro jorío; yobetsicacái obango cara apatoitaiga.

⁶ Aique iáque Jesus yoguiataiganaqueri. Pënibaque irarequima cara itonguibocari basini iragátane capitán. Icomantapëri:

—Icanque nagapitante: “Natingomi, quero pitsipiriobitina popoque yaca nobangoquë. Nitsoingaa naro, tenta aisa nangantimi pibega Obiro. Obiro caninari, naro te. ⁷ Iroto te najátasitaguëtimi. Nocogui pinibatë, irooti piguibegantaimari nonamire. ⁸ Aintasati

agátinari, aisati ainta soraro ira nagátaiguè naro. Aroca nagáqueri nosorarote: ‘Pijáte’, aro iriatè. Aroca nanganqueri basini: ‘Popoque’, aro iribocapè. Aisatica nagáqueri nomeraro: ‘Pingantiro oca’, aro inganquero. Aisa picanta pibega Obiro. Omoncaraquima pairoraca pinibatè.”

⁹ Iquemobèri Jesos, iquenganeintacari, icantaiguèri iraequi aguaitaiguèri:

—Nangantasantaiguèmi: tojai iquemisantasantè capitán, yabisaiganaqueri antagaisati joriójequi quemisantatsi.

¹⁰ Aique ipigaiganaja iragátane capitán. Cara yaretaiganajaro pongotsi, iniaigapairi ironomire aroqueque ibeganaa, tegotsitatsi.

Jesos yoganiatairi otomi ogamaimentaga.

¹¹ Aique basiniquè cataguiteri iáque Jesos cara poeboroquè jitacha Naín, aisati yoguaitaiguèri irogomere aisati basini tojai matsiguenga. ¹² Cara yaretaigaca aitioniati, itonguibocari matsiguenga yanatocotaigapèri igamaga iritijérinime. Irianti otomi paniro ogamaimentaga. Itsibataiganacaro tojaisonorí otimanamitane icantaneintègotagacaró. ¹³ Iniopéro Jesos Atingomi, icantaneintègotéro aisati icampéro:

—Quero piraga.

¹⁴ Yotsitiparo ora págantancari yotsagaquero. Aro yaratingaiguè ira ágaiganaqueri. Icanque Jesos:

—Oboina, nanganquimini, pingabiritima.

¹⁵ Aro icabiritanaa isobiaque ira camabitènguicha, inibatè. Aro icanquero iniro Jesos:

—Jerica pitomi, caniari.

¹⁶ Iniaigabaqueri matsiguenga, itorogasantaganaque, icaninabentaiguèri Tosorintsi, icantaiguè:

—Icaninatasanti Tosorintsi. Igácairi comantantatsiri irogomecái Irinibare. Aisonori itasongobencái Tosorintsi, icábintsaigacái cara aquemisantaiguèri.

¹⁷ Aique omagaro timaigatsi Joreaquè aisati omagaro Garireasati iquemocotaiguèri Jesos.

Ira Joan baotisantatsiri igátaiguèri irogomere irosomipèri Jesos.

(Mt 11.2-6)

¹⁸ Aisati irogomere Joan icomantègotaguèri Jesos ora itasonganque aisati yogomeantè. Aro Joan icaimaiguèri pite irogomere, ¹⁹ igáqueri Atingomiquè icanqueri:

—Pijátasitiri Jesos, posamitapèri: “¿Obiroco Agabisaicoontatsiri Ira boquènguistsine, basinatico naguiaiguè?”

²⁰ Aro iáiguè irogomere Joan, icantaigapèri Ira Jesos:

—Igátaiguèna Joan baotisantatsiri nosamitèmi: “¿Obiroco Quirisito Agabisaicoontatsiri Ira nagamaca iriboquè, basinico naguiaque?”

²¹ Aito cara irooti cataguiteri Jesos yogaguibegaiguèri tojai janaitaguetatsiri; ijocaiguineri ira inancari camagari yogabisaicotajiri; aisati iniacagajiri tojai comarajatabetachari.

²² Aique yotabitaigabaqueri Jesos:

—Popiganajima, pingomantaiguèri Joan omagaro oca piniaque nacanque aisati ora piquemaquena. Pingantiri cara iniaanaí comarajatabetachari; yanèitanai carancaratatsi; ibeganaa iribatsasetaga iquètetanai; iquemaiganaji maguemitari; icaniatanai cambitachari; iquemisantaigabaquero Caninaro Nibarintsi iraequi te irasintima, yogabisaicotaigairi Tosorintsi. ²³ Yoganinasèretaguèri Tosorintsi iraequi quemisantaiganaquina, te ingomètina te iritsoenguina.

Jesos icantocoqueri Joan: “Icaninatasanti”.

(Mt 11.7-15)

²⁴ Cara ipiganaja irogomere Joan, aque Jesos inibatègotèri iriro. Icantaguèri matsiguen-gajegui quemaiguèri:

—Caní piátaiguè cara tera ontimingani, piquemisantaiguèri Joan baotisantatsiri. ¿Pairo piábiritaguè? ¿Pigóiguèrintaco iriro caninari sèrari, iquemisantasantèrinta Tosorintsi? Isintsisèretè. Cagari iriro cantaro choco cara posebatiro coguentima aikuero yaca aikuero cara. ²⁵ ¿Pairo piátasitaiguè? ¿Pinaiquerico iquitsagaca caninasati? Teni. Pigóiguè cara ira quitsagatacha iguitsagare caninaro sibitaro itimaigui cara ibangoquè itingomi. ²⁶ ¿Pairo piábiritaguè? ¿Teco pigóiguèri iriro comantanquero Irinibare Tosorintsi? Aisonori nangantaiguèmi ibataiguèri basiniegui igomantantatsirite Tosorintsi. ²⁷ Irirori sanguenatègotènguicha jirai cara icantocopèna Naro:

Icanè Tosorintsi: “Notomi, aikuenta nagáqueri ira obatacaquemine, ingomantaigapèri imatsiguenga: ‘Aique naro, coraque Atingomi. Piganinataiguèneri paneingomento’”.

²⁸ Nangantasantaiguëmi ora aisonori, ainta tojaisonorini comantantsiri, carari noguibatëri Joan. Irirota ogótasantëri Tosorintsi, ibataiguëri basini matsiguenga. Carari antagaisati imaiguëmari Tosorintsi, intingomintasantaiguëmari, irobataiguëri ira Joan, irogótasantãneri Tosorintsi.

Caninasati inibatëgotëri Joan Jesos.

(Mt 11.16-19)

²⁹ Aisati icanque Jesos:

—Antagaisati quemisantaiguëri Joan aisati iraegui coigotantatsiri ibaotisatagaca ican-taiguë: “Aisonori, icaninatasanti Tosorintsi cara icocagaiguëna nojocajiro ora nacantague-taiguë te ongomeite, nomaotisataguëma”. ³⁰ Carari irianti bariseoegui aisati iraegui ogomeantiro isanguenare Moisés te iranintaigue ingantineri Tosorintsi ora icocagaiguëri. Teatisati iriãtasitaiguëri Joan imaotisataguëri. ³¹ ¿Pairoraca noslacagantanquemi? ¿Ati picanta obirojegui? ³² Aisati picantaigari janequipague imaguimpitaigui saateriquë ican-queri basini: “Natamporatabeca carari te piguiataguëna; nosoncatabitaca carari teatisati piguiatina; nomaninquetabeca carari te pijáigue. Nacãntatabitaca nogasëretomemegabitaca, carari teatisati piragasëretaguëma”. ³³ Pinetse. Picogaigabitaca ingantaiguërome po-matsiguenga pairoraca picocageri. Piniagabaqueri Joan baotisantantsiri itica aisati te iróguima piari, aro picantocotaguetasitaigari: “Oo, inancari Joan camagari, iro-ro ititaguëca”. ³⁴ Aro nopaniaca Naro Jonogaguitequë, nomatsiguengatapë; te natitima, aisati nógacaro piari. Aro picantocoiguëna: “Tojai yapasanti Iriro, aisati Iriro singuitachari, imat-siguengatacari ira coigotantatsi naguireguite aisati itsibataigari ira cantaguetaigatsi ora te onganinate”. ³⁵ Carari igóque Tosorintsi cara icanque Joan caninasati aisati nacanque Naro caninasati antagaisati icocaquena; aisati omagaro quemisanquenane, irogóiguë caninara ora icocaquena Pabati.

Ora tsinane pitiriqueri iguitiquë Jesos cara ibangoquë Simón.

³⁶ Ainta bariseo jitacha Simón, icaimëri Ira Jesos iribocapë ibangoquë, irapajaqueri. Aro icanaque, yogasobicobëri mesaquë, yapaiguë. ³⁷ Aintasati tsinane antagueantatsiri cara poeboroquë. Oquemocoqueri Jesos cara yapi ibangoquë bariseo, piãtasiqueri, páigotanëneri casangajengaro. Ora pinanta pobetsicagani aribásitoro. ³⁸ Paratingopë itapiiquë Jesos. Pi-ragasantaca, oparintaca oquibantacari ora osengaja oroqui iguitiquë, aro oseguitiantacari oguisi. Pasaraguititanacari aisati pitiriantacari casangajengaro iguitiquë.

³⁹ Inioberô bariseo, ira pajaqueri Jesos, iquianca: “Irirome comantantsiri iragátane Tosorintsi, irogótobëro oca tsinaneca iroonti antagueantatsiri quimingaro, poguimingatëri cara potsagaqueri”. ⁴⁰ Aro icanqueri bariseo Jesos:

—Simón, aiti ora nanganquemi.

Yotabitanëri bariseo:

—Atsi pinibate, Ogometinari.

⁴¹ Icanqueri Jesos:

—Nosiacagantëmiro. Ainta sërari ipirisitataguetiri matsiguenga quirequi. Ainta paniro irebetëri 500 tenario; basini irebetëri 50 tenario. ⁴² Cara te irinaje iguireguite iripënabentairi ibatorote, aro isetaigaineri pitirooti ora irebetaigui. Yamai nosamitëmi: ¿Pairiraca nintasan-tiri ibatorote, yabisëri basini?

⁴³ Yotabitanëri Simón:

—Irirojengari irebetabitacari tojai.

Icanque Jesos:

—Aisonori. Caninasati potabitanëna.

⁴⁴ Aro yapisitanaca Jesos inetsëro tsinane, carari përosati inibatëri Simón:

—Carani nacapë yaca pobangoquëca, te págacananatobëna. Te pomabaquinaro nija nanguibantëmaro naguiti. Piniagaro oca tsinaneca. Oquibantënarô osengaja oroqui naguiti, oseguitiantënarô oguisi. ⁴⁵ Te pasaraborotina cara nametaiga naroeugui jorío, carari oca pasarapiantacaro naguiti cara narepa irooti yamaica. ⁴⁶ Te pishaguëantinaro asaiti naguitoquë, arori oshaguëantëna naguitiquë casangajengaro. ⁴⁷ Iro-ro ora nongoman-taguëquemi: aroquenta onintasantëna, poniagaca cara aroque isetajinero Tosorintsi ora ocantaguetasanti tojai te onganinate. Carari basini cantatsi: “Te nangantaguetete tojai”. Iro-ro te iranintaguëtina tojai.

⁴⁸ Aiquero icanquero tsinane Jesos:

—Aroque nojocajimiro ora picantagueti te onganinate, yomaguisanquemiro Tosorintsi.

⁴⁹ Aro ira igaimanejegui iparintaigaca yosaminatobaca:

—¿Pairiraca ijica Ica cara icanque: “Nojocajimiro ora picantagueti te onganinate, yomaguisanquemiro Tosorintsi”? ¿Iriroco jitacha Tosorintsi?

⁵⁰ Jesos icanquero tsinane:

—Aroquenta piquemisanquina, yogabisaicotajimi Tosorintsi. Yamai pijáte pingani-nasëretanë pomagoriasëretanë.

8

Poguiataiguëri Jesus tsinane omitocotopiantaiguëri.

¹ Aique iquenaquenaiguë Jesus aisati irogomere poeboropaguequë. Iquenguitsatomaiguëri matsiguenga ora Caninaro Nibarintsi, icomantëgotëro ati ocanta cara igáanti Tosorintsi. ² Aisati poguiataiguëri tsinanepague ora ijocajine ogamagarite aisati yogaguibegajiro cara ojanaitague. Ainta María aisati ojita Magararasato, inabitacaró ogamagarite icarati 7; ³ aintasati Sosana aisati Joana iina Cosa. Ira Cosa imitocoqueri Eroris cobeingari, yomisantinëri iguirequite aisati iromeraro aisati ibango. Aintasati basini tsinane poguiataiguëri Jesus. Aintanta oguirequite, omitocotaiguëri Jesus aisati irogomere; opaiguëri ora icogaiga.

Jesus icomantëgotëri panguitatsi tirigo.

(Mt 13.1-9; Mr 4.1-9)

⁴ Yapatoibiritaiganacari Jesus tojai matsiguenga paniaigacha poeboropaguequë. Aro yosiacagantaiguëneri quingabaguirentsiquë, icanque:

⁵ —Iáque panguitatsiri imiongaguitaguequero oguitsopague tirigo iritoganequë. Opariguitapë arosata oguito onamiquë abatsi. Yagatiquëro matsiguengapague, aisati ipocai gapë tsmiripague, yapaigapëro oguito. ⁶ Basini tirigoguito opariguitë cara mopësiquë, piabitanaca; aique pisiguiricanë tenta ine nija, ocamaque. ⁷ Aiti basini opariguitapë cara totseisiquë. Piabitanaca tirigo aisati totsei, carari ora totsei pogamaguëro tirigo. ⁸ Basini opariguitapë caninabatsariquë quibatsi, pianë, piquibianë caninasati, oguitsotasantanë. Aiti 100 oguito patiro panguirintsiquë.

Cara itsonquero quingabaguirentsi, icanque Jesus catsigue:

—Aítica piguëmita ora piquemanta, pinguemisantiro ora nacantaiguëmi.

Païro yogomebirique Jesus quingabaguirentsiquë.

(Mt 13.10-17; Mr 4.10-12)

⁹ Aique yosamitaiguëri irogomere:

—¿Païro ocanti ora posiacagantacái carani?

¹⁰ Yotabitaiganaqueri Jesus:

—Nocogui pigóigue ati icanta Tosorintsi cara igáanti, ora te ogotingani jirai, carari ira matsiguengapague quero nocogui igóigui. Iroro nogomeantacari quingabaguirentsiquë nosiacagantëneri tenta iraninte irogóigue. Inetsabetaigaca carari te iranee, iquemaigabitaca carari te inguemaigue, te irogótaigabaquero ora nacantaigabitari.

Igótacagaiguëri irogomere ora ocanti quingabaguirentsi.

(Mt 13.18-23; Mr 4.13-20)

¹¹ Aique icantaiguëri irogomere Jesus:

—Yamai noniagaiuëmi ati ocanti quingabaguirentsi irasi panguitatsiri. Ora oguito aisati ocantaro Irinibare Tosorintsi. ¹² Ora pariaquenguitsi abatsiquë ocantari ibega matsiguenga iquemaigabitacaró Irinibare, carari omanapague ipocasitaiguëri camagari yágabitsaqueri ora iquemabeca, yomagusantacaqueri. ¹³ Ora pariaquenguitsi mopësiquë aisati ocantari matsiguenga quemaigabitari Nanibare. Icaninabentabecaro carari iquemisantabecaro arosata. Cara icogui camagari irantacaguiri ora te ongomeite, opomirintsitomocari Nibarintsi, ijocajiro. ¹⁴ Ora pariaquenguitsi totseisiquë aisati ocantari matsiguenga quemaigabitari Nanibare, iquemisantabecaro arosata. Carari cara iquengasantanëro pairoraca inaguetatsi yaca quibatsica, iquengasantanëri iguirequite inintasantiri, iquengasantanëro inganinabentiro pairoraca icogui inganque, aro yomagusantanaïro Irinibare Tosorintsi, te inguemisantanairo. Te ine oguito; te ingante caninasati. ¹⁵ Ora pariaquenguitsi caninabatsaroquë quibatsi, otojaiganaque, iroonti aisati ocantaigari matsiguenga iraequi quemisantasantobëro ora nogometiri. Përosati iquemisantanána, icogui inganquero omagaro ora icocaqueri Tosorintsi. Icantaiguëro pairoraca caninaro, icaninabentaiguëri Tosorintsi. Iriró cantaca panguirintsi cara pinë openguitereï ora inatsi tojai oguito.

Pingomantagueantiro Caninaro Nibarintsi.

(Mt 5.15-16; 10.26; 13.12; Mr 4.21-25)

¹⁶ Aisati yogomeque Jesus:

—Aroca oboquero michero anetsantaiguëmaro, quero oguiro osobiquë cobiti. Querootisa oguiro osobiquë somamintotsi. Oguëroti jonoica arota ongonijatagueque pairoraca. Irootisati nanganque Naro; nocoguini pigótasantiro Nanibare. ¹⁷ Pairoraca ománocotaga

yamai, ongonijaque aikuenta. Ora te ogótingani jirai, ogóquengani aikuenta; quero pairo pimánemataja. Pingomantëgotaguetiro Caninaro Nibarintsi ati ocanta iragáantane Tosorintsi cara inguemisanqueri matsiguenga. ¹⁸ Iroro yamai pinguemasantiro ora nogometaiguëmi, pinguengumaro arota pigótasantaiguero. Pigóiguë arosata yamai, carari aroca pinguemisantanëna, nogótasantacagaiguëmiro nogomeantane. Irari basinipague te ingogwe inguemisantina, quero iquemaiguina. Nágabisaqueri ora iquemabeca, iromaguisanquero, ingomëtobëmaro, quero igótëmatiro.

Icomantë Jesus pairi imatsiguengasonori.

(Mt 12.46-50; Mr 3.31-35)

¹⁹ Aique piátasiqueri iniro Jesus, aisati yoguiataiguëro ireintiegui. Yaretaigapa carari tiguëti ingantaiguema irinibataigapëri yoticaigabaquerinta arosonori matsiguenga.

²⁰ Icomantëri matsiguenga:

—Aropa piniro, aisati pirementjegui. Ainta sotoquë; icogaiguini irinibataigapëmi.

²¹ Yotabitaiganaqueri Jesus:

—Inato aisati igue iriantiegui quemaigabaquero Irinibare Tosorintsi, iquemisan-taiguëro. Icaegui irianti quemisantatsiri nomatsiguengatacari.

Jesus yoguimairenquero sintisiri coguentima.

(Mt 8.23-27; Mr 4.35-41)

²² Basiniquë cataguiteri yotetaigacaro pitotsi Jesus aisati irogomere, icantaiguëri:

—Intsome omontiaiganaquima antatinta angaare.

Aro iátocotaiguë, ²³ páigotanëri coguentima. Inariaca Jesus isamasegui. Omana-pague pipoque oquibeguinte coguentima, omotoncaatanë nija, potiatanaca pitotsiquë, pëñibaqueme iritsiticoiganaque. ²⁴ Iátasiqueri Jesus, icabocapëri, icantaiguëri:

—¡Ogometinari! ¡Ogometinari! ¡Atsiticoiguëni! ¡Pigabisaicotái!

Icaguitë Jesus, icanque:

—Omairiatanaeta angaare, osantocotanaeta coguentima.

Aito cara omairiatasantanai angaare, osantocotanaei coguentima. ²⁵ Icantaguëri irogomere Jesus:

—¿Pairo te pinguemisantobitina?

Itsorogasantaignaque irogomere, iquenganeintasantaigacari icantobaca:

—¿Paire Ica? Inibatë, aro oquemisantasantanëri coguentima aisati angaare. Yogu-imairenquero.

Jesus yogabisaicoqueri sërari inancari camagari.

(Mt 8.28-34; Mr 5.1-20)

²⁶ Ipaniaigaca Garireaquë Jesus aisati irogomere, yaretocotaigapa antatinta Gararaquë.

²⁷ Cara yagatanë, yaguëtanë Jesus, inioberri Gararasati inancari camagari. Cosamani te inguitsagatima iguitsagare, te intime pongotsiquë, carari itimi cara itia camatsirini. ²⁸ Cara inioberri Ira Jesus, yobaticagueritotasitobacari, icaimapëri icampë:

—¿Pairo pinganquena? Nigóquimi, Jesus, Obiro Itomi Tosorintsi jonoquëñintaberi. Quero pitsipiriacaiguina.

²⁹ Icaimë negaca aroquenta igáqueri Jesus iriátabitsatiri sërari. Igóque camagari cara irojoqueri Jesus. Tojai yágapininqueri camagari ira sërari. Aisati tojai yugëshotapininaitagabitacari imatsiguenga sogatsaquë coshori cara ibacoquë aisati iguitiquë, carari itimishairo yobëshopiantairo te iragabiaigueri. Ira camagari yáganëri cara tera ontimingani. ³⁰ Yosamitëri sërari Jesus:

—¿Pairo pijita?

Yotabitanëri sërari:

—Tojai najita.

Icanque tojai aroquenta inantaigacari arosonori camagari. ³¹ Yamanaiguëri cara quero igátaiguiri iriáiguë omoroquë játaque tsomaguisonori. ³² Ainta inaigasegui arosonori chanco yapaigasegui cara tongagariquë. Aro yamanaiguëri Jesus camagari:

—Aroca pijocaiguëna, pigátaiguena cara chancoeguiquë ninampëmari iriro.

Yotabitanëri Jesus:

—¡Atsi pijáiguë!

³³ Aro iátopitaiguëri sërari camagari, inantaigapari ira chancoegui. Aro isigaiganaca chanco cara taranguë, imatsematseiganaque angaarequë tobotn tobotn. Itsiti-caiganaque ijogataiganaca omagaro chanco.

³⁴ Aro ira omisantaiguiri chanco isigaiganaca icomantagueigapëri imatsiguenga cara poeboroquë aisati togantsiquë. ³⁵ Aique iátasitaiguëri Jesus tojai Gararasati iraniaiguëro omagaro ati ocanta. Iniaigapëri Jesus aisati ira inantabeca camagari. Ainta isobiaque

iguitiquë Jesús, iquitsagata, iquengaa inibatë caninasati. Itsorogaigapë matsiguenga. ³⁶ Ira netsaiguëro antagaisati icomantasantaigabaqueri basini ati icanta Jesús yogabisaicoqueri ira inantabeca camagari. ³⁷ Aro omagaro Gararasati itsorogaiguëri Jesús, yamanaiguëri:

—Atsi pijátaje yamai, quero pipocaji yaca aisati.

Aro yotetanaa Jesús pitotsiquë, pënibaque iriátëgotë, ³⁸ ira inantabeca camagari yamanabecari Ira Jesús:

—Nocoguini naguiatanëmi.

Carari te iranintacaguiri Jesús, icanqueri:

³⁹ —Quero pipoqui. Pijátasitiri pomatsiguenga cara pobangoquë, pingomantiri ora icanquemi Tosorintsi tojai icábintsëmi.

Aique iáque sërari icomantagueantapë omagaro Gararasati ati ocanta cara yogabisaicoqueri Jesús.

Jesús yoguibegajiro araasetatsiri; aisati yoganiatairo irisinto Jairo.

(Mt 9.18-26; Mr 5.21-43)

⁴⁰ Aique imontiaigapaa Jesús aisati irogomere. Yoguiaigabaqueri tojai matsiguenga, yágacaninataigabaqueri. ⁴¹ Itonguibocari sërari jitacha Jairo. Iriro obatacaguiri jorio cara pongotsiquë cara yapatotaiga. Yobaticagueritotasipari iguitiquë Jesús, yamanopëri icanqueri:

—Intsome nobangoquë. ⁴² Pënibaque ongamaque nasinto.

Ainta paniro irisinto, ocarati osarinite 12. Cara iáagegü, itsinatsinataiganaqueri matsiguenga tojai. ⁴³ Ainta tsinane piraaseque cosamani ocarati 12 osarini. Pipënbentaguetabecari jompiantatsiri omagaro ora pasinta, te aropei ongantima, te iromitocotëmatiro. ⁴⁴ Aro piátasiqueri itisitaquë Jesús potsagaqueri cara ocarati iguitsagare. Aito cara pibeganaa, ocaratanai oraa.

⁴⁵ Aro Jesús yosamité icanque:

—¿Pairi otsagaitënaró naguitsagare?

Yotabitaiguëri antagaisati:

—Teni pairi otsagatimine.

Aique icanqueri Peroro aisati basini tsipacari:

—Ogometinari, ishongaiguëmi tojai matsiguenga itsinatsinataiguëmi.

⁴⁶ Carari icanqueri Jesús:

—Ainta otsagaquina. Nigónijnca cara pogaguibegajiro natasorintsite.

⁴⁷ Aro pigóque tsinane cara igóquero Jesús, aro parepari omogomogoatapa, pobaticagueritotasipari ocomantapëri:

—Naro otsagaquero piguitsagare; irooro nibegantanaa cara niraaseinteque.

⁴⁸ Yotabitanëro Jesús:

—Nomatsiguenga, aroquenta piquemisanquina nogaguibegajimi. Yamai pijaté pin-gaigasëretané, pomagoriasëretané.

⁴⁹ Cara inibasigui Jesús, yaretasipari matsiguenga ipaniaca ibangoquë Jairo, icomantapëri:

—Aroque ocamaque pisinto. Pitsipirasiquima yamai cara páganëri Ira Ogomeantatsira.

⁵⁰ Iquemobëri Jesús, yotabitanëri:

—Quero pitsorogui. Patiro pinguemisantina, aro obeganaima pisinto.

⁵¹ Yaretaiganaca pongotsiquë. Icanque Jesús:

—Quero picaigui omagaro: irianti Peroro, Joan, Santiago, Jairo aisati oniro ora janaitatsi intsibataiganaquina tsomagui.

⁵² Iniaiguëri omagaro iraicotaiguëro yogasëretocotaigacaro. Icampëri Jesús:

—Quero piraicotiro, teni ongameni, pisamini.

⁵³ Icabintsátaigabaqueri, igóiguënta cara ocamasantë. ⁵⁴ Yágobagotapëro obacoquë Jesús, icaimëro catsigue icanquero:

—Janequi, pingabiritima.

⁵⁵ Aito cara ocaniatanai, pipigaa osëre, ocabiritanaa. Icanque Jesús:

—Pomero operi.

⁵⁶ Iquenganeintasantanaca casintaro janequi ora camabitacha, carari igáqueri Jesús cara quero icomantaguetiri pairiraca ora cantënguicha.

9

Jesús igátaiguëri irogomere inguenguitsatomotaguetiri matsiguenga.

(Mt 9.35-38; 10.5-15; Mr 6.7-13)

¹ Aique Jesús yapatotaiguëri irogomere icarati 12, yagobiacagaiguëri irojogantague-quimari camagari aisati iragaguibegajiri janaitaguetatsiri. ² Igátaiguëri:

—Pijátaguete pinguenguitsatomotaguetiri matsiguenga ati icanta Tosorintsi cara igáanti aisati piguibegaguetajiri janaitatsiripague.

³ Aisati icantaiguëri:

—Quero páganë pairoraca abatsiquë: quero páganë pigotiqui, quero pitsaguine, quero páganë pan, querootisati piguireguite, quero pite piguitsagare. ⁴ Atiraca pijáiguë, pingapë ibangoquë ira cajemobëmine. Pintiomotiri irooti cara pigaganëma basiniquë poeboro. ⁵ Aitica poeboro cara te iranintaigue irágacaninataigabaquemi, te inguemisantaigabaquemi, popotetaineri quibatsipane pisapatotequë, aro pigaganëma. Pingantaigueri: “Tenta pinguemisantobëna, aiquenta iratsipiriacaiguëmi Tosorintsi”.

⁶ Aro iátagueque, iquenaguetaiganaque poeboropaguequë, icomantaguetaigapëri imat-siguenga ora Caninaro Nibarintsi atiraca ingantaiguëma iragabisaicotajiri Tosorintsi. Aisati yogaguibegaguetajiri janaitatsiripague.

Eroris icogui iraneiri Jesus.

(Mt 14.1-12; Mr 6.14-16)

⁷ Aique ira cobeingari Eroris cara Garireaque iquemocoqueri Jesus aisati irogomere, omagaro icantaiguë itasongaguetaiguë. Te irogóte pairoraca inguenguema aintanta cantatsi Jesus Irianti Joan ira yogamaguë Eroris. ⁸ Ainta basini icanque Irianti Eriás iconijapai. Basini icantocotaiguëri Irianti comantantatsiri jirai, caniatajatsi. ⁹ Icanque Eroris:

—Ira Joan nibatëacagantabitacari naati, carari ¿Pairi Ica naquemocoque itasorintsitantsi? Icoabeca Eroris iraneirime Jesus.

Yomitojaiguëro pan Jesus cara itasonguëro.

(Mt 14.13-21; Mr 6.30-44; Jn 6.1-15)

¹⁰ Aro ipigaigapaa iragátane Jesus, icomantaigapëri antagaisati icantaiguë. Aique Jesus yágaiganaqueri casiriconiati aronisatiquë Betsaira, ¹¹ carari igóiguëro matsiguenga, yoguátaiganaqueri tojai. Yágacaninataigabaqueri Jesus, iquenguitsatomotaiguëri ati oanta iragáantanequë Tosorintsi. Aisati yoguibegajiri janaitaguetatsiri. ¹² Aro ochapinitanë ipocasitaiguëri irogomere Jesus icarati 12, icantaigabitacari:

—Yamai pigátaigueri icaegui matsiguengaca iriátage poeboropaguequë iromananteta iraperi aisati irisomaigapë. Teni ine perintsi yaca tenta ontimingani.

¹³ Yotabitaiganaqueri Jesus:

—Pomaigueri obirojegui.

Icantaiguëri irogomere:

—Iroonti inatsi pan pabocorooti aisati pite sima. Tigueti angantima omaigueri iraperi querooca iáti amanantaiguineri.

¹⁴ Aintanta tojai matsiguenga, sërari icarati 5,000. Icanqueri irogomere Jesus:

—Pigasobicaigueri antagaisati, 50 yaca, 50 cara, 50 canta, aisa icanca omagaro.

¹⁵ Aro yogasobicaiguëri omagaro. ¹⁶ Aique yáguëro Jesus ora pan aisati sima. Inetsë jonoquë, icanqueri Iriri:

—Pabati, nacarasiatocoquimiro oca noperijeguica popaiguinaca.

Aro itibatsaaguequero pan Jesus, yotsatengaiguëri irogomere arota imauguiri matsiguengajegui. ¹⁷ Yapaiguë antagaisati, iquemaigaca. Aique yobiitaguetajiro irogomere ora irangarataneegui, iagajiro 12 cantiri.

Icanque Peroro: “Obiro Quirisito Agabisaicoontatsiri”.

(Mt 16.13-23; Mr 8.27-33)

¹⁸ Basiniquë cataguiteri iáque casiriconiati Jesus, yamanaseguiri Iriri. Itsibataigari irogomere. Aro yosamitaiguëri:

—¿Pairi ijitaiguëna matsiguenga?

¹⁹ Yotabitaiganaqueri irogomere:

—Aintapague ijitaiguëmi Obiro Joan baotisantantsiri. Ainta basini icantaiguë: “Ira Jesus Irianti Eriás, ipocaji”. Aintasati ijitaiguëmi comantantatsiri jirai ipigapaa.

²⁰ Aro yosamitaiguëri:

—¿Pairi pijitaiguëna obirojegui?

Yotabitanëri Peroro:

—Obiro Quirisito Agabisaicoontatsiri igáque Tosorintsi.

²¹ Aique icanqueri Jesus:

—Queroquerai picomantaguetiri pomatsiguenga. ²² Pigóiguë nopaniaca Naro Jonogaguitequë, nomatsiguengatapë cara niboguë yaca quibatsica. Yamai pënibaque najáque Jerosarënuë. Iratsipiriacaigabaquina antiasipari aisati itingomiegui saseriroti aisati ira ogomeantiro isanguenare Moisés. Aisati irógaiguëna, carari ongaraque maba cataguiteri, nanganiatanae aisati.

Ora inganque ira quemisantantiri Jesus.

(Mt 10.38-39; 16.24-28; Mr 8.34-38; 9.1; Ir 14.27)

²³ Aro icantaiguëri Jesus:

—Iranintasantëca pairiraca aguiatanëname inguemisantantina, iranatanëro igorosite, quero icantanonta iriati, iroontita përosati imomirintsibenquinaro pairoraca nongocacueri Naro. ²⁴ Ira cogabitacha ingábintsëma yaca quibatsica, tenta iraninte iratsipiriero, aiquenta iratsipiriasantëma. Irari quemisantantëname yaca quibatsica, irooti cara ingamobiquina Naro, aiquenta intiomoquina Jonogaguitequë, intimasantapë caninasati. ²⁵ Aintaca sërari irasintaguetimaro antagaisati ora inatsi yaca quibatsica, aiqne ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro? ²⁶ Quero pipasiquitina, querootisati pipasiquitocotinaro nanibare. Nopaniaca Jonogaguitequë, nomatsiguengatapë cara niboguë yaca quibatsica. Aiquenta najátaje jonoquë. Cara nopigaima, nongobeingatasantapë nosanguéguitetasantapë aisati icanta Pabati icobeingatasanti yosanguéguitetasanti; intsibataigapëna ironomirepague Pabati irisaanganetsite caninari. Cara nopigaima naguipasiguitaiguëri iragui pasiguitobitaiguina Naro yamai. ²⁷ Aisonori nangantasantaiguëmi, nogomerejegui, aintapague obiroquë queroquerai cara picami irooti cara piniagabaquina nopocaje Naro iragáantanequë Tosorinti.

Ipasiniatitanë Jesus.

(Mt 17.1-13; Mr 9.2-13)

²⁸ Aro pabisañaque 8 cataguteri, iáque Jesus. Yágaiganaqueri Peroro aisati Joan aisati Santiago, itongaiganaque tongagariquë. ²⁹ Cara yamanasegui Jesus, ipasiniatitanë. Yosanguëborotanë porirere, aisati oquëtatasanotanë iguitsagare. ³⁰ Aisati iconijatompëri pite sërari inibatagaiguëri Jesus, irianti Moisés aisati Eriás. ³¹ Aisati yosanguëborotapë porirere iriro pite aisati. Inibatëgotapëro cara ingamaque Jesus aiquenta cara Jerosarënuquë. ³² Ipotsiquitasantaiguë Peroro aisati itsipa, carari icaguitasantanë iniaquero irosanguëguiteri Jesus aisati iniaigabaqueri basini pite sërari itsibatapari yaratingopë. ³³ Cara pënibaque iriáigae pitirooti, icanqueri Jesus Peroro:

—¡Ogometinari, caninataque inaique yaca! Intsome obetsique yaca maba pongotsi otiomijani, patiro pasi, patiro irasi Moisés, aisati basini irasi Eriás.

Carari te irogóte Peroro ora icanque; inibatasita. ³⁴ Cara inibatasegui, omabocapari mingori paguëtaguepëri. Cara poganguibotaigapëri mingori, itSOROGAIGANAQUE IROGOMERE JESUS. ³⁵ Aro iquemaiguëro Irinibare Tosorinti cara mingoriquë, icantaiguëri:

—¡Iriro Ica Notomi nigáqueri nacaninabentasantëri! ¡Pinguemisantaiguëri!

³⁶ Cara itsonque inibatë, inetsaigabitaca, te irine Eriás teatisati Moisés, Irianti Jesus iniaque. Aro imánaiguëro, te ingomantëmatiri pairiraca; aiquenta ingomantëgotëro.

Jesus yoguibegajiri janequi tingaraachari.

(Mt 17.14-21; Mr 9.14-29)

³⁷ Oquëtaguetanë yanongopaa, itonguibotaigabacari arosonori matsiguenga. ³⁸ Ainta paniro icaimapëri Jesus, icanqueri catsigue:

—Ogomeantatsiri, pinetseri ica notomica, pingantaneintëgotiri. Irianti notomi paniro, ³⁹ inancari camagari. Icaimapinintacaqueri, itingaraacacari, yosimaresetëri ibagantequë, itsipiriasantacaqueri teraiquerai irapabaquëajiri. ⁴⁰ Aroque namanaigabitacari pogomere irojocajinerime notomi igamagarite, carari tiguëti ingantima iragabeiri irojocajiri.

⁴¹ Yotabitanëri Jesus:

—¡Te pigóiguero Irinibare Tosorinti! ¡Terai pinguemisantaiguero obirojegui, terai pinganinataigüe! ¿Ati ongantima nantsibataiguëmi nabetaiguëmi natsipiriasita cara nogometasitaiguëmi? Tojai pitsoingaiquëna. Atsi pomapënari pitomi.

⁴² Cara yamapëri itomi, imogomogoataganacari camagari, yotëanëri janequi quibatsiquë, itingaraacaganacari. Jesus isintsitsaqueri camagari, igáqueri ijoquineri janequi, yogaguibegasantairi, ipëri iriri. ⁴³ Iquenganeintasantanacari omagaro matsiguenga iniaguëro. Icantaguë:

—¿Teco itasorintasanoti Tosorinti, yagobeiri antagaisati? ¡Iriro cobeingari!

Aisati icomantaigairi irogomere Jesus cara ingamaque.

(Mt 17.22-23; Mr 9.30-32)

Cara iquenganeintasantasiigari matsiguenga, icantaiguëri irogomere Jesus:

⁴⁴ —Pinguengasantiro oca nongomantaiguëmica, quero pomaguisantiro. Nopaniaca Naro Jonogaguitequë, nomatsiguengatapë cara niboguë yaca quibatsica carari irácagantaiguëna matsiguenga irógaiguëna.

⁴⁵ Carari te inguemaigabaquero ora icantabecari Jesus, icomëtaigabacaro tenta iranintacaguiri inguëmiro. Aisati itSOROGAIGUË IROSOMITIRI JESUS: “¿Pairo picanti?”

Icomantë Jesos pairi obaquenguitsine cara itingomibintanti Tosorintsi.

(Mt 18.1-7; 20.25-28; Mr 9.33-37; 10.42-45; Ir 22.24-30)

⁴⁶ Aique inibatobaganaca icantobaganaca irogomere Jesos pairiraca obaquenguitsine irirojeguiquë. ⁴⁷ Igóque Jesos ora iquengaigaca. Yáguëri janequi, yogaratianqueri aganguisatiquë, ⁴⁸ icantaiguëri ira irogomere:

—Pairiraca ágacananatêrine ica janequica iquemisanquinanta, aisati irágacananatêna Naro. Pairiraca ágacananatênane, aisati irágacananatiri Ira agáquina. Carari págacananatêrica ira cantacha janequi, pomitocotirica, pingábintsêrica, aro Tosorintsi iraniacananatêmi, iraguibatêmi.

Quero pometopitari basini quemisantatsiri.

(Mr 9.38-40)

⁴⁹ Aique icanqueri Joan:

—Ogometinari, cani naniaiguëri sêrari igáqueri camagari iriátópitêri matsiguenga. Icantabequina iquemisanquemi, inibatantaro popairo, iroro igáantantari camagari. Tenta intsibataiguena naroequi, nacantaiguëri: “Quero pigáantantaro iripajiro Jesos cagaribinta obiro nasiegui”.

⁵⁰ Yotabitanêri Jesos:

—Quero pometopitari. Queroca iguisasitái, iromitococái ingancái ibega eiro.

Te irágacananataigabaqueri Jesos Samariasati.

⁵¹ Aronibati cataguiteri cara iriátæ Jesos jonoquë. Aro ipintsatanaca iriátê Jerosarénquë.

⁵² Igáqueri irogomere:

—Pobate cara Samariaquë, pobetsiquinano cara nasampê.

⁵³ Aro iátabeca, carari igóiguë Samariasati iriátê Jesos Jerosarénquë, quero yoguibegui janaitatsiri Samariaquë, iroro te iranintaguëte irágacananatobêri, te imeri pongotsi cara irisomapê. ⁵⁴ Aro ipiganaja irogomere icomantapêri Ira Jesos:

—Teni iranintacagái asame Samariasati.

Aique pite irogomere, Santiago aisati Joan, yosamitêri:

Atingomi, ¿Picogui nomanocotiri Tosorintsi irágaquineri pamari omaniêma Jonogaguitequë, otagopêri Samariasati opoguiriaiguëri?

⁵⁵ Inetsaiguëri pitirooti Jesos, isintsitsaqueri, icanqueri:

—Teni onganinate anguiseri. Teni pigóigue ati picanta; teni pinganinasêrete.

⁵⁶ Nopaniaca Naro Jonogaguitequë, nomatsiguengatapê yaca quibatsica arota nagabisaicotaigueri matsiguenga. Teri iroro nopocasite nagamagaiguëri.

Aique yogagaiganaca basiniatiquë poeboro.

Ainta ira cogabitacha iraguiatirime Jesos.

(Mt 8.18-22)

⁵⁷ Cara iáigasegui, ipocasipêri Jesos sêrari, icampêri:

—Ogomeantatsiri, naguiatanêmini negaraca pijáque.

⁵⁸ Yotabitanêri Jesos:

—Aiti imoro somani cara isami, aisati imagosi tsimiripague cara isami, carari te ine nasi nobango cara nanareima Naro caranta nopaniaca Jonogaguitequë, nomatsiguengatapê yaca quibatsica.

⁵⁹ Aro Jesos icanqueri basini sêrari:

—Obiro, intsome, piguiatanêna.

Yotabitanêri sêrari:

—Natingoni, nocoguini naguiatanêmi, carari cara ingamaqueni apati. Pinintacaguina natianêri; aique coshoni naguiatanêmi.

⁶⁰ Yotabitanêri Jesos:

—Piguiatina obiro. Ainta tsoengatsiri, ira te inguemisantiri Tosorintsi; iritijirita piri. Pijáte obiro, pingomantaguetiri matsiguenga ati ocanta iragáantane Tosorintsi.

⁶¹ Aintasati basini icanqueri:

—Natingomi, aisati naro nocoguini naguiatanêmi, carari arotsita najápanaantê nobangoquë nobetsataigapanaantimari nomatsiguengasonori.

⁶² Icanqueri Jesos:

—Cara irisiabaguitêgotiro isinguine sêrari sabiriquë, inetsê cara iricaraque; queroca inetsi iricaraquero ibanguire. Aisa icanta, pairiraca parintachane iraguiatêna Naro, quero iquengaguetajiro ora icantaguetabeca jirai. Queroca yoguiatina pêrosati, queroca coshoni yogasantina, quero icomeiti iragáantanequë Tosorintsi.

10

Jesos igátaquequeri irogomere icarati 70.

¹ Aique Atingomi icolgaiguèri basini irogomere icarati 70, igátaiguèri pitenaque iro-bataiguèri Iriro cara poeboropaguequè cara iriátè Jesos aiquenta. ² Icantaigabaqueri:

—Ainta tojai matsiguenga icogasanti irabisaicotaigue, carari teni irine tojai comantaiguèrine Caninano Nibarintsi iragabisaicoontaiguè mari Tosorintsi. Aisati icantaigaro tojai oguitso panguirintsi, carari teni irine tojai ira obigitirone. Pomanocotiri Tosorintsi iragátaiguèri comantantatsiri iriáiguè inguemisantacagaiguèri matsiguenga. ³ Yamai nagátaiguèmi, carari picantari itiomijani oisha ira nagáque cara cobeingariquè. Tojai iratsipiriacaquemi tsoengatsiri carari nomisantaiguèmi. ⁴ Quero páganè quirequi, querootisati pitsaguine, quero páganè basini pisapatote; quero pobetsatobacari ira tonguibotaiguèmine; pabisanaquitiguiri. Pintsatimataiguè cara nigátaiguèmi. ⁵ Atiraca ingaimaigabaquemi pisamapè ibangoquè, pingapè tsomagui, aro pobetsatapè mari: “Nocoguini ingábintsaguemi Tosorintsi, iromagoriasèretagaiguèmi”. ⁶ Aroca icogui ingábintseri Tosorintsi, iraniacaninataigabaquemi, aro ingábintsaguèri Tosorintsi iromagoriasèretacaqueri. Carari queroca ininti iquemisanti, quero imagoriasèretaguiri Tosorintsi; paniro obiro ingábintsaguèmi. ⁷ Aroca irágacananatobèmi, pèrosati pisame ibangoquè irooti cara pijátaje, quero pogagueta pongotsipaguequè. Popero aisati pógumaro ora imabaquemi, caninataquenta iripénabentèngani tarobacaatatsiri. ⁸ Atiraca pijátaiguè, aroca irágacananataigabaquemi, popaiguero pairoraca imaiguèmi, ⁹ pigaguibegajiri janaitaguetatsiri, pingomantiri: “Pèni baque intingomibintaigapèmi Tosorintsi”. ¹⁰ Atiraca pijáiguè, queroca yágacananatobèmi, pijáte abatsiquè, pingomantiri: ¹¹ “Pinguemaiguena: nopoteguitaitaiganaquema pojongamamori arota pigóigue cara icogabeca Tosorintsi intingomibintaiguemi, carari te pinintiri obirojegui. Tenta págacananataigabaquena, aisa ocanta, te irágacananatimi Tosorintsi. Carari nogótacagaiguèmi pèni baque intingomibintaigapè mari quemisantiriri Ira igáque Tosorintsi”. ¹² Pigóiguè jirai Tosorintsi iguisaiguèri Soromasati, itagaiguèri, ipoguiriaiguèri itsipiriacaiguèri. Yamaica nangantaiguèmi aiquenta cara ingomantègotaiguèri matsiguenga, inguisasantaiguèri, iratsipiriasantacagaiguèri ira te inguemisantaigabaquemi; pabisanaquero cara iratsipiriacaiguèri Soromasati.

Inguisaiguèri Tosorintsi ira te inguemisante.
(Mt 11.20-24)

¹³ Aisati icanè Jesos:

—¡Tojai pitsipiriaguè obirojegui Coraseisati! ¡Tojai pitsipiriaguè obirojegui Betsairasati! Tojai piniagabitèna cara nitasonagueanti, carari te pingantèmatima yacaqueroca, te pinguemisantina. Carari iraniaquene cara nitasonagueanti Tirosati aisati Sirósati, inguengasèretaguemame iriro, irojocaguèrome ora icantagueti te onganinate, inguemisantaiguèname, inganaqueme oquibepiriga manchaguintsi tsitaro quipiro aisati irisobicaiguème somamoquè arota ironijagaiguemari imatsiguenga cara yogasèretagaca, ican-taigaa yacaqueroca. ¹⁴ Aiquenta cara Tosorintsi ingomantègotaiguèri, iratsipiriacaiguèri ira Tirosati aisati ira Sirósati tojainta te inganinataigue. Carari iratsipiriasantacagaiguèmi obirojegui Coraseisati aisati Betsairasati aroquenta piniagabitobèna cara te onganinate, inguemisantaiguèname, inganaqueme oquibepiriga manchaguintsi tsitaro quipiro aisati irisobicaiguème s nitasonganti, carari te pinguemisantina. ¹⁵ Aisati obirojegui Caperinaosati, pijitasitaigabitaca pijáiguè Jonogaguetequè, carari pamatobitaigaca obiati pèrosatinta pitsoingaguèna. Iroro pijátaguèque osobinta. ¹⁶ Aisati nangantaiguèmi, nogomerejegui, pairarica quemisantaigabaquemine obirojegui, aisati Naro inguemisantaiguèna. Iraegui tsoengaigabaquemine obiro, aisati iritsoengaiguèna Naro. Ira tsoengue-nane Naro, aisati iritsoenguèri Ira agáquina, te inguemisantiri. Yamai, pijátague.

Cara ipigaigapaa iragátane Jesos iquenguitsatomonti.

¹⁷ Aique ipigaigapaa ira iragátane Jesos icarati 70, icaninataigapè, icantaigapèri:

—Natingomi, nojogantaigacari popairo camagaripague, isotocaiganaque.

¹⁸ Icantaiguèri Iriro:

—Jee, aisonori. Naniaqueri Satanás itingomi camagarijegui cara ijoquengani jonoguè. Nagobiaqueri Naro. ¹⁹ Iroro nopaguètaiguèmi nagabiomento. Aisa ocanta cara pigatiquèrica marangue aisati quitoniro carari quero icantèmatimi, aisati pigabiaiguèri camagaripague, inguisaigabitèmi quero icantimi atiraca. ²⁰ Aisonori pigátaiguèri camagari, carari quero picaninataigui aroquenta iquemisantaiguèmi camagaripague, pinganinatasantaiganaque aroquenta pijáiguè Jonogaguetequè cara osanguenatocotaigaca popairo.

Jesos icaninabenqueri Tosorintsi Iriri.

(Mt 11.25-27; 13.16-17)

²¹ Aique poganinatasantëri Jesos Caninaro Isëre Tosorintsi, icanqueri Iriri:

—Pabati, picaninatasanoti; nacaninabentasantimini Obironta Itingomi antagaisati Jonogaguitesati aisati omagaro quibatsisati. Ainta cantasitacha: “Nigótasanti naro”, carari pimánopitaiguëri ati picanta Obiro aisati ati ongantima pigabaisaicotaiguëri. Irianti pigótacagaiguë ira quemisanquena ira te inguengasitima irogótasantëmi iriro. Caninataque piginanataiguëri iriro, picoquenta pigótacagaiguëri.

²² Aique Jesos icantaiguëri omagaro:

—Ira Pabati ipëna antagaisati igótacaquina omagaro. Paniro igótasanotaquina Naronta Itomi; te irogótocotina basini matsiguenga. Teatisati pairi ogótirine Iriro. Paniro nigótiri Naro, Naronta Itomi. Aisati irianti nogometaguë, nigótasantacagaiguëri Tosorintsi iriro.

²³ Aique yapisitaanaca Jesos inetsaiguëri irogomere, icantaiguëri casiriconiati:

—Icábintsaiguëmi Tosorintsi, yoganinasëretaguëmi aroquenta piniasantaiguëro ora non-iaiguëmira. ²⁴ Nangantaiguëmi: icogaigabitaca jirai comantansirijegui aisati cobeingaripague iraniaiguërome oca piniaqueca obiro. Icoagaigabitaca inguemaiguërome oca piquemaiguëca yamai, carari te iraneina teatisati inguemaiguëna.

Icogasanti Tosorintsi anítiri Iriro, aisati anítiri omatsiguenga.

(Mt 22.34-40; Mr 12.28-34)

²⁵ Aro yaratianque ogomeantiro isanguenare Moisés, icogabeca ingomëtaguimarime Jesos. Yosamitëri:

—Ogomeantatsiri, ¿Pairo nanganque arota najáte Jonogaguítequë, nantimasantapë përosati, quero nacami?

²⁶ Icanqueri Jesos:

—¿Pairo ocanti ora isanguenatacaqueri Moisés Tosorintsi? ¿Pairo pinibati?

²⁷ Yotabitanëri:

—Pinintasantiri Tosorintsi Atingomi, pomasëretasantimari obiati, përosati pinguenguëri, pinguemisasantantiri. Aisati pinintiri pitimanamitane pibega cara pininta obiati.

²⁸ Icanqueri Jesos:

—Caninataque pinibatë. Aroca pingantiro cantacha nega, aro pintimasantapë Jonogaguítequë përosati.

²⁹ Carari ira ogomeantiro isanguenare Moisés icoque iraniacatinatirime Jesos. Iroso yosamitagüëqueri:

—¿Pairiraca natimanamitane?

Ira Samariasati icábintsëri jorío.

³⁰ Aro yotabitanëri Jesos:

—Nosiacagantëmiro quingabagüirentsi. Ainta paniro jorío ipaniaca Jerosarénquë yanonaganaca iátabeca aiqero poeboroquë jitacha Jericó. Carari aganguisati abatsiquë imabocacari cosirintipague, yágaigabaqueri icositaiguëri omagaro, yágabitsaqueri iguitsagare, ipasataiguëri. Aique ijocaiganaqueri abatsiquë, pënibaque ingamaque. ³¹ Aro aique iquenopë paniro saseriroti, jorío aisati. Iniopëri ira sërari iramasitaga, aito cara yanamitanëri, te ingantaneintëgotiri. ³² Aisati ipoque basini jorío, imatsiguenga Irebí, iniopëri, yotsitipari, yanamitanëri, teatisati ingantaneintëgotiri. ³³ Carari ainta Samariasati iquenopë, yarepari, inetsapëri, icantaneintëgotëri. ³⁴ Iátasiqueri ijampitancari asaiti aisati obaa cochoari, iponataguequeri. Aique iqueicotacacari imoranequë Samariasati, yáganëri pongotsiquë cara isamaigui quenaigatsiri, yomisantëri. ³⁵ Oquëtaguetanai, icoque iriátë Samariasati, yáguëri iguireganite pite tenario, ipëri casintaro pongotsi, icanqueri: “Jerica quirequi. Pomisantiri ica janaitatsirica. Yamai najáqueni. Queroca cotonguiboro quirequi, cara nopigaima nopënenbenquimiri antagaisati”. Aique iáque. ³⁶ Yamai, pinguenguëri maba sërari iniaigapëri ira iramasitaga. ¿Pairi itimanamitane ira itaiguë cosirinti?

³⁷ Yotabitanëri ogomeantiro Sanguenari:

—Ira cantaneintëgotapëri.

Icanqueri Jesos:

—Atsi pijáte yamaica, pingantiro obiati negaca.

Icanaque Jesos obangoquë Márita aisati María.

³⁸ Aique iquenaque Jesos abatsiquë, yarecaro poeboro cara otimi tsinane ojita Márita. Ocaimobëri obangoquë. ³⁹ Aintasati irento Márita, ojita María, ora sobicomoqueri iguitiquë Jesos, oquemisanquero irinibare. ⁴⁰ Carari opomirica Márita pobetsicaguequineri Jesos pairorapagueraca. Piátasiqueri, ocanqueri:

—Natingomi, pinetse paniro naro nobetsiquemiro poperi. Te omitocotina nirento. Atsi pingantiro omitocotina.

⁴¹ Yotabitanëro Jesus:

—Márta, Márta, pogasëretagueca, popomirintsitaguecaro tojaipague. Ocaninataguetabeca, carari aiti patiro ocaninatasanti, ⁴² ora ocoque pirento, oquemisanquina Naro. Quero pairi ágabitsatiro cara otsibatëna Naro.

11

Jesos yogometaiguëri irogomere cara iromanocotaiguëri Tosorintsi.

(Mt 6.9-13)

¹ Basiniquë cataguiteri íaque Jesus casiriconiati yamanaqueri Iriri. Cara itsonque, icanqueri paniro irogomere:

—Natingomi, ira Joan yogometaiguëri irogomere cara iromanocotaiguëri Tosorintsi. Yamai nocogui aisa pinganquima Obiro, pogometaiguena nomanocotiri aisati.

² Icantaguëri Jesus:

—Cara pomanaguëri Tosorintsi, pingantaiguëri negaca: “Pabati nasiatiegui, ainta Obiro Jonogaguítequë; nocogaiguë cara iraniacaninataiguëmi omagaro matsiguenga Obironta Atingomisonori. Nocogaiguë pintingombintaiganaquena antagaisati. Aisati nocogui inganque omagaro matsiguengajegui ora picocagaiguëri aisati inganquimari iraugui timaigatsi Jonocaguítequë icantaigasegui omagaro picocagaiguëri. ³ Pomapinintaiguena noperi antagaisati cataguiteri. ⁴ Pijocagainaro ora nacantaguetomoquimi te onganinate, pomaguisantinaro, quero piquengainaro. Pingábintsasantaiguena. Aisa nacanta nacábintsëri ira cantaguëna ora te ongoemeite, te nanguisaneintajiri. Quero pinintacaguëri camagari irantacaguina ora te onganinate”.

Cara pomanocoqueri Tosorintsi ora coguitiomoquimi, aro imëmiro.

(Mt 7.7-11)

⁵ Aisati icantaiguëri Jesus:

—Pinetse, nosiacagantëmiro aisati. Aisati oanta aroca pijátasiqueri pomatsiguenga aganguite pomaniri pan. Pingampëri: “Nomatsiguenga, pomenaro maba pan. ⁶ Yamaicasonori yarequina nomatsiguenga, carari te inëmate ora nomëri”. ⁷ Aique irotopiquimi cara tsomagui, inganque: “Quero paseriguina. Aroque nasiquero sitëcori, nisamaiguini naro, najina, najaniquitepague. Quero nacanta nacabirita yamai cara nomabaquemiro pan”. ⁸ Nacanquemi: queroca icabiritaja ipimiro irironta pamigote, ingabiritajima imëmiro ora pamanopiantëri arota quero paserigairi basini. ⁹ Nangantaiguëmi aisa oanta: pomanopiantiri Tosorintsi pairoraca coguitomotimi, aro imëmiro; pingogopiantiro pairoraca, aro piniaquero; pingaimapininqueri, aro inguemaquemi, irasirëgotëmi. ¹⁰ Ira manántatsi imëngani; ira cogatsi iraniaquero; ira cajematsi inguemaquengani imëngani. Iromitococái cara omanaqueri; cara ongooqueri ironijagajái. ¹¹ Pinetse, aroca iromanaquemi pitomi inganquemi: “Apati, pomena pan”, querosonori popiri mopë. Iromanaquémica: “Pomena sima najaguëri”, quero popiri marangue. ¹² Iromanaquémica: “Pomena iguitso tiapa”, quero popiri quitoniro. Quero popiri, iroonti pomasantiri ora icoguitiaca. ¹³ Pinetsaigue. Te pinganinatasantaigue obiro, carari pigóiguë pingábintsaguëri pitomi, pomabaqueri ora icoguitiaca. Icaninatasanoti Piri Tosorintsi, Ira timatsi Jonogaguítequë, igótasanti icábintsaguëri iraisati, imauguëri Caninaro Isëre ira manëgotaguëri.

Icantocotasicari Ira Jesus: “Imitocoqueri itingomi camagari”.

(Mt 12.22-32, 43-45; Mr 3.20-30)

¹⁴ Basiniquë cataguiteri Jesus iniaqueri poro sërari inancari camagari imasantitacaqueri. Ijoquineri camagari, itasongobenqueri sërari, inibatagajiri caninasati. Iniaiguëri matsiguengajegui iquenganeintasantaigacari, ¹⁵ carari aintapague icantasitaigacari:

—Iroonti ijogantari camagari iragabiomento Berisebó itingomi camagarijegui, imitocoqueri Berisebó.

¹⁶ Ainta basini tsoenguëri Jesus icanqueri:

—Ogomeantatsiri, nocogaiguëni nanetsemi pitasonguinaro pairoraca ora nogóontëmi Obiroca Quirisito.

¹⁷ Carari igóque Jesus ora iquengaigaca. Icantaguëri:

—Aroca irógobaguima matsiguenga timaigatsi quibatsiquë, ¿Teco iripoguiribaguima? Aisa icanta matsiguenga pongotsiquë; queroca iquengaiga, querootisati itiomotobaga përosati. ¹⁸ Tesonori iromitocotina Satanás. Ipëgatina. Picanque cara imitocoquina Berisebó cara nojogantari camagari. Arome Satanás inguisaiguërimo igamagarite, ¿Atiroco ingantima intingomibintaiguërimo camagarijegui? ¹⁹ Irirome omitocoquinane arota nojoquiri camagari, ¿Iriatisatico camagari omitocotaiguëri pomatsiguenga cara ijoqueri

camagari iriro? Iriro ogótacagaiguêmine pomatsiguenga cara pematobita obiati, picantocotaguetasitaiguina. ²⁰ Carari yagobiacaquina Tosorintsi, iroro nojogantaigari camagari-pague ora pigóontêma aroque parequimi yaca obiroduê iragáantane Tosorintsi, icogabeta intingombintaiguemime. ²¹ Ira camagari aisati icantari ibega sêrari sintsi, aiti ibiane, ichaapite, itongemento, omagaro ora yomisantano ibango querota icositiri pairoraca irasi. ²² Carari iriboqueca basini sêrari sintsi, irabisêpêri isintsire, iragabeiri, irágopitapêri irógomento ora yabentabeca, imaguetaigapêri imatsiguenga pairoraca ingogue. ²³ Ira te inguemisantina, te iraguiatina, iguisaquina, iriantinta iquemisanti Satanás. Aisati ira te iromitocotina, te inguemisantacaguinari matsiguenga, iquemisantacaqueri camagari. ²⁴ Obirojegui jorío picantaigari ibega sêrari inancari camagari quimingari. Isotocasitanaari camagari sêrari; aro iátagueque igamagarite cara piriaguiteroquê quibatsi. Iogabeca iromagorie carari tiguete ingantiro. Aique iquianca: “Nopiganajima nobangoguê, cara sêrariquê cara nopaniaca”. ²⁵ Cara ipigapaa iniopêro pongotsi otarogaga, obetsicaga, esitaga. ²⁶ Aique iáque, icaimaiguêri basini camagari quimigaronori icarati 7. Aique yagobiaiguêri sêrari icasêretaigapari, inantasantaigapari. Yogatsitasantêri sêrari, itsipiriasantacagaiguêri.

Icaninasêretaique quemisantsiri.

²⁷ Ainta arosónori matsiguenga iquemaiguêri Ira Jesus. Ocaimê paniro tsinane, catsigue ocanqueri Jesus:

—Tojai Tosorintsi icábintsasantêro piniro ora tominquemi jirai tsotaquemi.

²⁸ Carari icanquero Jesus:

—Aisonori, carari icábintsasantaiguêri yoganinasêretaique antagaisati ira quemaigabaquero Irinibare Tosorintsi, iquengasêretêro, iquemisantasantêro.

Jesus icamanaaqueri iragui botoibiricarira.

(Mt 12.38-42; Mr 8.12)

²⁹ Yapatobiritaigapari Jesus tojai basini matsiguenga. Aique yogometaigabaqueri Jesus, iparintaca icantaiguêri:

—Te pinganinatuque tojainta pitsoingaiquêri Tosorintsi; iroro piniantêna: picogaigui natasongomotaiguemi; carari quero nacantajimiro aisati. Pinguengasêretiro ora icanque Jonás cara yosiguina nibega Naro, aro pinguemisantina. ³⁰ Piquemocotaiguêri Jonás jirai, iniguêri omaganiro canianiro iguibeguente sima. Maba cataguiteri inê tsoماغui, aro icomarangairi onamijaquê ora irogóntaigabaquimari Nínebesati cara igáqueri Jonás Tosorintsi. Aisa nacanta Naro: aiquenta pigóntaiguêna cara igáquina Tosorintsi; nanga-maque, ongaraque maba cataguiteri nanganiatanae Naronta paniacha Jonogaguetequê, nomatsiguengatapê cara niboguê yaca quibatsica. ³¹ Aisati jirai ainta tsinane itingomi omatsiguenga Sebasati. Cara opaniaca parigoti, quemocoqueri Saromón tojai igóque iriro, aro piátasiqueri jaanta onlopêri oquemisampêri. Yamai ainta Naro obirojeguiquê, nobaqueri Saromón carari te pinguemisantaiguena. Aiquenta, cara Tosorintsi ingomantêgotaiguêri antagaisati matsiguenga, ongabiritanêma ora tsinane Sebasato ongantocotaiguêmi: “Picantasantaguetaiguê obirojegui ora te onganinate, te pinguemisantaigabaqueri Ira Agabisaicoontsiri, carari te pinguemisantaigabaqueri. Inguisasantaguêmi Tosorintsi”. ³² Aisati ingabiritaiguêma Nínebesati ingantocotaiguêmi: “Naquemisantaigabaqueri Jonás, nacantaigaa yacaqueroca nojocaigairo ora nacantaguetaiguê te onganinate, carari picantasantaguetaiguê obirojegui ora te onganinate, te pinguemisantaigabaqueri Agabisaicoontsiri Ira obaqueri Jonás. Inguisasantaguêmi Tosorintsi”.

Ira quemisantsiri cantaca michero.

(Mt 5.15-16; 6.22-23; Mr 4.21-22; Ir 8.16)

³³ Aisati icantaiguêri jorío Jesus:

—Aintaca paniro matsiguenga oboquero michero iranetsantêmaro, te iromániro, te iroguiro osobiquê cantiri paquitomosiga, carari iroquero jonoquê arota ongonijaguitetocotiri omagaro timatsi pongotsiquê. ³⁴ Ira cogasantiro ingante pairoraca icocaqueri Tosorintsi, irojocajiro ora quimingari, irogótasantanêro ora icogui Tosorintsi, ingantasantêro. Aisati ingantimari ibega sêrari cara iniasanti, te irantibatima pogonijatinerinta omagaro. Carari ira te iranintiro ingante ora icocaqueri Tosorintsi, te irojocajiro ora icantaguete te onganinate, te inguemisante, pèrosati cara itimi tsitiniriquê. Aisa ingantimari ira te iranee; irantibatana tenta ongonijatomotiri pairoraca. ³⁵ Caninataque pigónijintima piquemisanquerica Tosorintsi. ³⁶ Aroca piquemisantasantêri, aro pigótasantanêri, quero pitsoinguemati, pintimaque cataguiteriquê. Pinganquimaro michero cara pogani jonoquê pogonijaguitetocotiri antagaisati matsiguenga inatsi pongotsiquê.

Jesos iguisaneintaiguëri bariseo aisati ira ogomeantiro Sanguenari.

(Mt 23.1-36; Mr 12.38-40; Ir 20.45-47)

³⁷ Cara inibatasegui Jesos, icanqueri bariseo:

—Intsome ajáte nobangoquë nopaaguëmini.

Aro yoguiatëri, yapaaguëri. ³⁸ Te inguibocotima Jesos; iroro iquenganeintaguëca bariseo.

³⁹ Aro icanqueri Atingomi:

—Aisonori obirojegui bariseo pametaiga piquibopiantiro pitasane otisitaquë aisati poberatote, carari te pinguibiro quimingaro cara otequë. Ongantaiguëmi pibega obirojegui: piquibococa pobacoquë, carari tso magui përosati pamatobitaiguëri matsiguenga, picositaiguëri, picantagueti tojai quimingaro. ⁴⁰ ¡Te pigóigue obirojegui! Pigóiguë Tosorintsi yobetsiquëmiro pobaco; ¿Teco pigóigue aisati yobetsiquëmiro pisëre ora piquengasëretanta?

⁴¹ Pametaiga popasitabitacari ira coguitiachari. Obitsita pobetsiquima pisërequë, aique pingantaneintasantëgotaguëri coguitiachari, pomasitasantimari, aro pingábintasantiri. Aisati iraniacanineitaiguëmi Tosorintsi. ⁴² ¡Obirojegui bariseo, iratsipiriacagaiguëmi Tosorintsi! Aisonori popagarantiri arosata pasiati. Aroca páguë quirequi 10, aro pomagaranqueri paniro irasi Tosorintsi. Aroca páguë 10 osi pobanguirepague, aro pomagaranqueri patiro irasi Tosorintsi. Ocapague caninataque, carari te pinguengaiguero ora icogagasantaigatëmi Tosorintsi: icogabeca pintimeme caninasati, icogabeca pinguemisantirime Tosorintsi aisati pintinerime. ⁴³ ¡Obirojegui bariseo, iratsipiriacagaiguëmi Tosorintsi! Pico-gasantaiguë imaignemi sobicomentotsi caninaro cara yapatotaiga jorío. Aisati picogasantaiguë irobetsataiguëmi matsiguenga cara opimantagani pairoraca, irobetsataiguëmi: “Ogometinari”. ⁴⁴ ¡Iratsipiriacagaiguëmi Tosorintsi! Obirojegui aisa picantaro ora yogantari camatsirini, te ine pairoraca ora irogóontëmaro matsiguenga. Yanëitaiganaque matsiguenga jonoica, yoguimingataigaca.

⁴⁵ Aintasati paniro ogomeantiro isanguenare Moisés, icanqueri:

—Ogomeantatsiri, cara pinibatëgotëri bariseo negaca, picantocotaguetasitaiguëna aisati naroequi ogomeantiro isanguenare Moisés.

⁴⁶ Yotabitanëri Jesos:

—Aisati Tosorinti iratsipiriacagaiguëmi obirojegui ogomeantiro isanguenare Moisés. Pobomirintsitaiguëri matsiguenga cara pogometaguetiri tojai, carari te pomitocotëmatiri tenta pinguemisantaiguero pasi pogomeantane. ⁴⁷ Iratsipiriacagaiguëmi Tosorintsi pobetsicaiguërotinta pongotsipague pinguengantimari comantantatsiri ira yogamagaiguë pomatsiguenga jirai. ⁴⁸ Obirojegui ógaiguëri. Arome pintimaigueme jirai pigamagaiguërimo obiro. Pitsipiriasitaigaca yamai cara pobetsicaiguëro pongotsi pinguengantëmari tenta pinguemisantaiguëri. ⁴⁹ Iroro igótocotaiguëmi Tosorintsi canque: “Nagáquemiri comantantatsiri aisati nagátane. Nigóque pógarantaigabaqueri aisati basini pinguisaiguëri catsimari. ⁵⁰ Aiti picantagueti picogaiguinta pigamagaiguëri omagaro comantantatsiri: pasi poguero póganti, obiro aisati pomatsiguenga jirai. Naguibitacaguëmiri cara pógaiguëri antagaisati comantantatsiripague cara iroraini nobetsiquë quibatsi rooti yamai; pógaiguëri obirojegui aisati pomatsiguenga jirainisati. Pintimaigueme jirai, pógaiguërimo aisati. ⁵¹ Naguibitacaguëmiri obirojegui cara pógaiguëri Abel aisati basini tojai. Aisati pogamaguëri Sacarias ira pógaiguë nobangoquë aronisati itagantariquë”. ⁵² Aisonori iratsipiriacagaiguëmi Tosorintsi, obirojegui ogomeantaiguëro isanguenare Moisés. Pigótaigabitaro Irinibare Tosorintsi. Iroro pogometaguëtaigabitacari pomatsiguenga, pamatobitaiguëri. Te pingogaigue obirojegui pigótiri Tosorintsi, teatisati pinintacagaiguëri irogóiguëri Iriro pomatsiguenga ira cogasantabitacari iragabisaicotaiguëri Tosorintsi. Poticaiguëri.

⁵³⁻⁵⁴ Aro itsonquero Jesos inibataiguëri. Cara isotocaiganaque antagaisati, iguisaneintaigacari Ira Jesos bariseoegui aisati ira ogomeantiro Sanguenari. Yosamitaigabitacari pairoraca; icogabeca irinibatacaquerime Ira Jesos te ongomeite. Icantobaca:

—¿Pairoraca anganqueri Ira Jesos aniantëmari? Aroca anibataqueri ora te onganinate, aro anguisasantëri agamaguëri.

12

Icanqueri irogomere Jesos: “Quero picantaigari bariseo”.

(Mt 10.26-33; 12.32; 10.19-20)

¹ Aro yapatobiritaigacari Jesos arosónori matsiguenga, yagaticobacaigaca. Iparintaca Jesos icantaiguëri irogomere:

—Quero picantaigari bariseoegui, pigamaiguemari iromatobitaiguëmi. Inibati caninasati carari icanquero basiniati, yamatobianti, yoguimingataiganaqueri matsiguenga ira quemisanqueri, icantacaqueri ora te onganinate aisa oanta ora piponganta pan potsatianquero omagaro pan. ² Pairoraca ománocotaga yamai, ongonijaque aiquenta. Ora

te ogótingani jirai, ogótanèngani aikuenta irogóguè antagaisati matsiguenga cara yamatobianti bariseo. Quero paioo mánèmatacha. ³ Aisati obirojegui, pairoraca pinibatè yamai pimánabecaro, aikuenta inguemaiguèro matsiguenga. Pairoraca pinibatèri pomatsiguenga casiriconiati tsoomagui pobango, aikuenta ongonijatsatae cara yapatotaiga matsiguenga. ⁴ Yamai nongomantaiguèmi, nomatsiguenga, quero pitsorogui iri cogatsi iróguimi. Aroca iróquemi, iroonti pobatsa iróoque; tigueti ingantimi pisèrequè. ⁵ Nangantaiguèmi, pomingui Tosorintsi, pomingatsatiri. Ingoqueca, iróquemi; carari aisati ingoqueca, iragáquemi Sharincabeniquè. Jee, aisonori pintsorogui iri. ⁶ ¿Teco pigóguè ipimantagani tsimiri iraagueri matsiguenga, te iripénatasantima? Carari igóguèri Tosorintsi, te iromaguisantiri tsimiri. ⁷ Aisa ocanta igótasantèmi: igóti atiraca ocarati piguisi. Aroca yomisantaiguèri tsimiripague Tosorintsi, iromisantasantaiguèmi obirojegui. Quero pitsorogui. Pinganinabentiri Tosorintsi. ⁸ Nangantaiguèmi: pairiraca inganqueri imatsiguenga: “Ira Jesoquirisito Natingomi”, aique cara Jonogaguetequè inguemaiguèna ironomire Tosorintsi cara nanganqueri Pabati: “Itingominuena iriro, nomatsiguengatacari Naro”, Naanti paniacha Jonogaguetequè nomatsiguengatapè cara niboguè yaca quibatsica. ⁹ Carari inganquerica matsiguenga: “Cagari Jesus Natingomi”, aisati nanganqueri Pabati: “Tenta intingomintina iriro, iroro te nogótaguètiri iriro Naro; cagari nasi”. Inguemaiguèna irisaanangetsite Tosorintsi. ¹⁰ Nopaniaca Naro Jonogaguetequè, nomatsiguengatapè. Carari pairiraca cantègotaguetasiquinane, aroca inganquima yacaqueroca, iragabiaqueri Tosorintsi ingábintsèri, irojocajineri iromaguisantairi ora icantaguete te onganinate. Carari quero icábintsiri ira cantègotaguetasitarone Isère Caninaro, quero yomaguisantineri, quero ijocajineri pèrosati queronta oquemisantacagajiri Isère aroquenta imaintèro. ¹¹ Cara irágaiganaquemica cara yapatotaiga jorío, aisati iráganèmi catingasatiquè joes aisati itingomi, quero pitsorogaigui, quero pogasèretaiga cara potabitanèri ¹² ogamequeminta Isère Tosorintsi ora pinibataiguè. Onibataquemi Caninaro Isère.

“Pigamema, quero picogui pasintagueta.”

¹³ Cara yapatotaiga matsiguenga, ainta paniro sèrari icanqueri Ira Jesus:

—Ogameantatsiri, nisi pingantiri igue imagarantinaro ora ijocagianaquena apati cara icamaque. Imeitènarone asi igue.

¹⁴ Yotabitanèri Jesus:

—Quero nacentiri cagarinanta joes, ira cantèrine caninasati imagaranquemiro.

¹⁵ Aique icantaiguèri antagaisati Jesus:

—Pigamema, quero picogaigui pasintagueta. Quero pinebetaro ora yasinta basini. Quero ocaninataguimi cara pasintaguequima.

¹⁶ Aique yosiacagantèneri quingabaguirentsi:

—Ainta sèrari casintaguetchari. Cara iritoganequè ipanguitèro tirigo, otojaigasantanè. Yobiguitèro tojai tirigoguitso. ¹⁷ Aro iparintaca iquianca: “Teni cotonguiboro nobango asi tirigoguitso jagasantaca. Aiti tojaiquerai. ¿Pairoroco nanganque yamai? ¿Negaraca noguèro nomisantèro? ¹⁸ Ajaa, naquianca. Nogomeriguetèro obangopague tirigo, nobetsiquèro iroraipague oquibeguente, aro noguèro antagaisati natirigote aisati omagaro nasintagueta. ¹⁹ Nanganque: ‘Inomoquina tojai, quero nitsonguiro tojai osarini. Yamaica nomagoreaque, nopasantè, nasinguitapininquimaro’”. ²⁰ Carari icanqueri Tosorintsi: “Te pineicotima obiro oshoincoquiminta. Yamaica tsitiniri pingamaque. Aique, ¿Pari casintaguetajimarone antagaisati ocapague inomoquimi ora picaninabentabeca?” ²¹ Aisati icanta antagaisati matsiguenga cogatsi irasintasantèma tojai, carari te iraninte ingábintseri Tosorintsi. Caninataque pobetsiquima pintiomoqueri Tosorintsi Jonogaguetequè.

Tosorintsi yomisantèri ira quemisanqueri; ipèri pairoraca ora icoguita.
(Mt 6.25-34, 19-21)

²² Aique icantaiguèri irogomere Jesus:

—Nangantaiguèmi: quero pogasèretocotaro poperi, piguitsagare, atiraca páguèro. ²³ Itimacaquimi Tosorintsi; ¿Queroco ipaiguimi poperi, piguitsagare aisati? ²⁴ Pinetsaigueri ira tsimiripague. Teni imanguite, teatisati iráguero ibanguire iroquero pongotsiquè cara irágotiantaiguèro aikuenta irapapiantèro. Carari ipagueiguèri Tosorintsi iraperi antagaisati cataguiteri. Aroca iromisantaiguèri tsimiripague, aisati obirojegui iromisantasantaiguèmi pabisaguèrinta tsimiripague. ²⁵ Aroca pigasèretima, ¿Aroco pomitojaiguèro posarinite? Quero. Pitsipiriasita cara pogasèreta. ²⁶ Tiguetinta pingantima arosata, ¿Pairo pogasèretocobiritaro basinipague oquibe? ²⁷ Pinetsaiguero otegapague tobari atiraca oquibianè. Te onguengue. Te onguirique, teatisati ontèmate, carari iroro caninarosonori. Jirai itimi Saromón itingomi joríojegui. Iquitsagata caninasati yoganinata carari te aisati

ingantimaro pibega orapague otega. Pabisanaqueri. ²⁸ Tosorintsi yoganinatêro otegapague tobari ora quero ocosamaniti aronta omanapague osiguiricanê, iritaguêro matsiguenga. Cara yoganinatêro otegapague Tosorintsi, ¿Teco iromisantaiguêmi obi ro aisati; inguitsagatacagaiguêmi? ¿Pairo pitsoingobitaiguêri? ²⁹ Iro ro quero piquengasêretaguêta, quero posamita: “¿Pairo nopê? ¿Pairo nóguêma?” ³⁰ Aisati icogaiguêro ocapague ira te inguemisante. Quero posigari irirojegu, aroquenta igóquero Pabati Tosorintsi cara Jonogaguetequê ora picoguitaiga obi ro. Iromisanquemi. ³¹ Iro ro pingogasantaguêque intingombintaiguemi, aro imaiguêmi omagaro ora coguitiomoquimine. ³² Quero pitsorogaigu. Obirojegu picantaigari noishate, Naronta omisantantatsiri. Te pintojaigue, carari inintaiguêmi Pabati Tosorintsi, icaninabentaiguêmi, icogasanti pintingomintaiguemari. ³³ Pomimantiro ora pasintagueta, pomagueteri coguitiaguetchari omagaro opênataga; aique imêmi Tosorintsi ora caninaro cara Jonogaguetequê cara quero yapiro cajiro, quero piraaga, querootisati icositimiro, quero pitsonga. ³⁴ Aítica ora pasintagueta yaca quibatsica, pinguengasêretapinintiro ora inatsi yaca quibatsica; carari aítica pasi Jonogaguetequêta, pinguengasêretapinintiri Tosorintsi.

Pobetsiquima tenta pigóte atiraca ongantima iripigaima Atingomi.
(Mt 24.45-51; 25.1-13; Mr 13.33-35)

³⁵ Aisati icantaiguêri irogomere Jesus:

—Pigamaiguemari Pitingomi, pobetsicasantaiguema. ³⁶ Obirojegu, nogomere, aisati picantaigari iromeraro casintaro pongotsi. Iáque casintaro iraniaqueri imatsiguenga cara iráquero iina. Ainta iromeraro yomisantêneri casintaro pongotsi, yobotaiguêro micheropague, icaguitaiguê. Yoguiaiguêri irooti cara irarepêma, aito cara irasirêgotapairi. ³⁷ Aro inganinatasantaiguê iromeraro igaguitaga cara irarepêma casintari. Nangan-taiguêmi: iriati agasobicaigapêri iromeraro, irapajagaigapêri. ³⁸ Aroca iribocapae aganguite, quero ca coniamaniquê, jemita: iromeraro igaguitaga inganinabentasantaigaba-queri. ³⁹ Aiti basini nongomantêmi: ainta basiniati casintaro pongotsi: aroca irogóque atiraca ongantima iribocapê cosirinti, ingaguitê, iromisantasantêro ibango, quero inintacaguiri icositiri pairoraca. Cara te irogóte atiraca ongantima iriboque cosirinti. ⁴⁰ Aisati nacantabecari cosirinti, te nongomante atiraca ongantima cara nopocaje. Jirai nopaniaca Jonogaguetequê, nomatsiguengatapê yaca quibatsica. Pênibaque najáque. Aiquenta nopi-gaima. Aro pinguengaiguena, pobetsiquima, pigamaiguena arota quero nomabocapêmi.

⁴¹ Aro icanqueri Peroro:

—Natingomi, ¿Pai ri picantaiguê oca? ¿Paniroco naroegui, picoguico irogótaiguero omagaro matsiguenga?

⁴² Yotabitanêri Atingomi:

—Aisati picantari ibega iromeraro caninari, igótasanti, iquemisantasantêri ibatorote, icanquineri ora icocaqueri. Ira ibatorote icanqueri imaguetaiguêri basini iromeroropague iraperi. Aique iáque ibatorote. ⁴³⁻⁴⁴ Aroca iraniopêri iromeraro antatsi caninasati ora icanêri, ingampêri ibatorote: “Caninasati picantaguequero ora nococaquemi. Yamai nocogui pomisantasantinaro omagaro ora nasinta, nigótinta yamai quero pamatobiantí”. Aro inganinasêretê iromeraro. ⁴⁵ Irari, aroca irajitabetima iromeraro te ongoemeite: “Querojengari ipigaa nobatorote irooti cosamani”, Inguisaiguêrica itsipa basini iromeraro iripasataiguêri sêrari aisati tsinane, iromeratê mari, irapasantê iriro irisinguitopiantêma, ⁴⁶ iripigapêma ibatorote iromabocapê mari tenta iragueiri. Aro irócantapêri iratsipiri-acagopêri, irojocagapêri cara insibataiguê mari tsoengatsiri tenta inguemisante. ⁴⁷ Ira iromeraro igótabecaro ora icocaqueri ibatorote, carari te ingantiro, te irobetsiquima, iripasatacagantasantapêri. ⁴⁸ Carari ira te irogótasante ora icocaqueri ibatorote, quero tojai ipasatiri. Quero icocaguiri tojai ira te irogóte. Irari ogótasantatsi, ingocagasantêri tojai.

Quero antagaisati iniacaninatiri Quirisito.
(Mt 10.34-36)

⁴⁹ Aisati icanque Jesus:

—Nipocasique yaca quibatsica arota inguisaiguena matsiguenga iribêquêgotaguena corosiquê. Ainta inguemisantaiguêna, ainta basini quero iquemisantaiguena iratsipiriaca-gaigueri ira caninabentaiguê nane. Inguisabacagobitaiguêna. Nocogabeca abisênguitsineme omanapague. ⁵⁰ Nigóque inguisaiguêna matsiguenga, irógaiguêna. Nigótironta, no-gasêretasantaca yamai. Nocogui nangantiro omanapague. ⁵¹ Quero pijitasita nipocasica irágacaninatobagaiguêma omagaro matsiguenga. Quero yágacaninatobaga. Nipocasique nanganqueri inguisabacagaiguema. ⁵² Aintaca pabocorooti timaigatsi pongotsiquê inguisabacaguima, quero iquengabiritina. Ingaraque maba, inguisasêretaguêri pite ira quemisanquinane. Pite inguisasêretaguêri maba. ⁵³ Nipocasique iroonti inguisasêretiri

itomi iriri, aisati inguisasëretiri iriri itomi; onguisasëretobaguima osinto oniro; aisati onguisasëretobaguima eba aguiro.

Caninataque pinguenguero ora ogamequimi ora piniagabitaca.
(Mt 16.1-4; 5.25-26; Mr 8.10-13)

⁵⁴ Aisati Jesus icantaiguëri ira botoibiritaigari:

—Cara piniagabaquero oquibe mingori oconijapë aiquero cara icanaque paba, pican-taiguë: “Coraguetaque angani”. Aro omariaque. Pigóiguë omariaque cara pitimaigui.
⁵⁵ Aisati cara onguëtaguetanaeca, picanque: “Quero oparigui”. Aro osariganaque, ongat-siringaguetanë. ⁵⁶ Te pinganinate obirojegui; pinibatë patiro carari picanque basiniati. Pigóiguëca omariaque angani, aisati aroca ongatsiringaguetë, ¿Pairoroco te pigóbirite pini-antimaro ora piniaguë icanque Joan baotisantatsiri, aisati nacanque Naro aisati ora no-gometaiduëmi? ⁵⁷ Aisati ¿Pairo te pingobite pigóiguero ora aisonori, ora caninari? ⁵⁸ Aroca inguisabiriquimiri pomatsiguenga quirequi ira pirebetëri, iráganëmica cara joesiquë, piniantasantima pinguenguema cara abatsiquë queroquerai paretá. Pinguenguema atiraca ongantima popënbentajiri ira pirebeti. Aroca iráganëmi cara poesitoquë, ira joes iragáqueri soraro: “Páganëri ica, pomingueri”. Aro iromianquemi cara iromingamentoquë.
⁵⁹ Nangantaiguëmi: queroa pipënbentiri antagaisati ira pirebetiri, quero yomisotocajimi aisati.

13

Queroca picanta yacaqueroca, iripoguiriaiguëmi Tosorintsi.

¹ Aique iátasitaiguëri Jesus matsiguengapague, icomantaigapëri:

—¿Piquemocotaiguëri Garireasati yógagantaiguëri Pirato? Iáigabitaca Jerosarenquë iban-guë Tosorintsi yógaiguëneri ibira. Carari iguisaigabaqueri Pirato igátaiguëri isorarote yógaiguëri. Iconoataiguëri iraraa Garireasati iraraa ibira yógaiguëneri Tosorintsi.

² Yotabitaiganaqueri Jesus:

—¿Aroquenta yogamagaiguëri pijitaiguëco ira Garireasati cantasantagueantënguisti ora te onganinate, yabisaiganaqueri imatsiguenga? ³ Nangantasantaiguëmi: tesonori. Carari queroca pijocajiro ora picantaguetaiguë te ongomeite, queroca picantaigaa yacaqueroca, aro pingantaiguëmari ibega Garireasati camënguisti, Tosorintsi iripoguiriaiguëmi obiro-jegui aisati. ⁴ Aisati piquemocotaiguëri Jerosaresati cani cara oparigatetaiguëri mopëpongo cara Siroéquë, pitsitocaiguëri 18 matsiguenga, icamaiguë. ¿Pairo icamobitaiguë? ¿Piji-taiguëco icantasantaguetaiguë iriro ora te onganinate, yabisaiganaqueri basini Jerosare-sati, iroro inintacaguëqueri Tosorintsi pitsitocaiguëri? ⁵ Nangantaiguëmi: tesonori. Irianti cantaigari omagaro matsiguenga. Aisati obirojegui, queroca pijocajiro ora te ongomeite, queroca picantaigaa yacaqueroca, iripoguiriaiguëmi obirojegui aisati.

⁶ Aique icanque Jesus, yosiacagantaiguëneri:

—Ainta matsiguenga ipanguitëro iguera cara irobasitequë. Piquibiaque caninasati, inetsapiantabitacaro aítica oguisto, iráquerome, carari te onguitsotëmate. ⁷ Aique icanqueri ira omisantineri: “Maba osarini nocogabecaro oguisto oca igueraca; te naneiro. Pitoguiro iguera, teni ongomeite, otimabeca”. ⁸ Yotabitanëri omisantiro: “Nobatorote, ineta patiro osarini basini. Nanguiaque quibatsi nongonaguëro itiga pobira; ⁹ aique aroca onguit-sotanë, caninataque. Carari queroca pini oguisto, aro notoquero”.

Jesus yoguibegajiro tsinane sábaroquë.

¹⁰ Basiniquë sábaro yogomeantë Jesus cara yapatotaiga joríojegui. ¹¹ Ainta tsinane cara pongotsiquë aro inancaro camagari jirai. Aroque yoanaitëro tojai osarini ocarati 18, iroro poguítaguëca tiguëti ongantima aratingue catingasati. ¹² Cara iniaquero Jesus, icaimëro, icanquero:

—Obiro, tsinane, nagaguibegajimiro cara poguica.

¹³ Aro yotsagaquero, irooti pibeganaa, ocatingatanai. Aito cara ocanque catsigue:

—Icaninatasanti Tosorintsi, yogabisicotajina naro.

¹⁴ Aique ira obatatsi cara yapatoibiritaigari Tosorintsi jorío iguisaneinqueri Jesus aro-quentá yogaguibegajiro tsinane sábaroquë. Icantaguëri ira matsiguenga:

—Aiti 6 cataguiteri cara atarobacaataigui cara caninataque popocaigne iragaguibega-jimi. Carari quero pipocasitiri sábaroquë, iroonti cataguiteri comagoriantague.

¹⁵ Aique yotabitanëri Atingomi:

—Tojai pamatobianti. Pinibatë patiro, picanque basiniati. Pintaguëti obirojegui sábaroquë aisati. Pinetse: ¿Teco pintsicotitiri pobaacate aisati pomorane cara páganëri ni-jaaquë iróquima nija sábaroquë? ¹⁶ Carari cagari pobira oca tsinaneca, iroonti imatsiguenga Abaram. Tojai osarini ocarati 18 yoanaitëro Satanás. ¿Teco onganinatasante angábintsero sábaroquë?

¹⁷ Cara inibatë negaca, yoguimairentaiguëri antagaisati quisaneintaiguëri, yoguipasigu-
itaiguëri. Carari iraugui botoibiritaigari icaninabentaiganaqueri, icantaiguë:

—Ocaninatasanti ora icantagueti Jesos.

*Cara Tosorintsi itingomibintaiguëri matsiguenga quemisantatsiri, aisa ocantaro pibega
oguitso mositasa, aisati ocantaro pibega ora piponganta pan.*

(Mt 13.31-34; Mr 4.30-32)

¹⁸ Aique icanque Jesos:

—¿Yamai ati ocanta cara itingomibintiri matsiguenga Tosorintsi? ¿Pairo nanganquero
nosiacagantëmiro? ¹⁹ Aisati ocantaro pibega oguitso mositasa ora imionguë sérari iri-
toganequë. Pianë, piqubianë tojai, ipocaigapë tsimiripague, yogaigapëro imagosi ot-
segopaguequë.

²⁰ Aisati icanque Jesos:

—¿Pairo nosiacagantëmiro cara igáanti Tosorintsi? ²¹ Aisati ocantaro pibega ora pipon-
ganta pan. Cara obetsiquëro pan tsinane, águëro tojai opane tirigo, ongonaguëro arosata
piponganta pan. Aique oponganë antagaisati.

Icanque Jesos: “Pomomirintsibentima piretima Jonogaguitequë”.

(Mt 7.13-14, 21-23)

²² Aro iátagueque Jesos aikuero Jerosarénquë, iquenagueque poeboropaguequë yo-
gometaignapëri matsiguenga. ²³ Yosamitobëri paniro:

—Natingomi, ¿Atiraca ingaraque ira abisaicotajatsine? ¿Aroco ingaraque arosataanti?

Icanqueri Jesos:

²⁴ —Nosiacagantëmiro. Aroca pininti pingapë cara itimi Tosorintsi, pomomirintsiben-
tima pingapë otiomijani omoro. Ainta tojai icogasantaignabita iriáiguë Jonogaguitequë,
carari quero icantiro yaretaigaro tojai. ²⁵ Aisa icanta casintaro pongotsi, irasitëgotanëma.
Aique obirojegui terai pingaigue paratingaiguë sotoquë, pingaimë: “Natingomi, pisire-
naro”. Carari irotopitanëmi tsomagui: “Teni nogóiguemi negaraca popaniaca”. ²⁶ Aique pin-
gantaigabitëmari: “Jirai pitsibataiguëna, papëcoiguëna, pógotaiguëna, aisati pogometaignëna
abatsipaguequë noboeborotequë”. ²⁷ Inganque tsomagui: “Nagatsitaimiro teni nogóiguemi
negaraca popaniaca. Pijátotopitaiguëna; popigaiguëma tojainta picantagueti ora te ongan-
inate”. ²⁸ Canta pijáiguë, pigasëretasantaiguëma, piragasantaiguëma, aisati pitsitsiaguite-
taiguë, cara piniáiguëri jaanta ira Abaram, Isac, Jacob aisati omagaro comantantatsiri
cara itingomibintaiguëri Tosorintsi, carari obirojegui pijocaga sotoquë queronta picanta
piáigui canta. ²⁹ Iribocaigapë arosonorí quemisantatsiri paniaigacha cara iconseti paba
aisati cara iquiro, aisati toonquë aisati comate, aisati omagaro quibatsipaguequë, irisobi-
caigapë mesaquë iragántanequë Tosorintsi, inganinabentaigapëri. ³⁰ Quero yareta canta
tojai itingomipague yaca quibatsica, ira piniacandinataiguë, carari iraretaiguëma tojai ira
pomaintaiguë yamai inguemisantaiguënantata.

Eroris te iromitsoroguii Ira Jesos.

³¹ Irooti cataguiteri ipocaiguë arosata bariseopague. Icantaignapëri Ira Jesos:

—Pijáte basiniquë quibatsi. Icoguini Eroris iróacagantimi.

³² Icantaignabaqueri Jesos:

—Pijáigue, pingantaiguëri ira matobiantatsiri: “Icanque Jesos: ‘Quero nisiga. Nojo-
quineri matsiguengapague igamagarite, aisati nogaguibegajiri janaitatsiripague; nangan-
quero negaca yamai, naramani; aisati arosata cataguiteri notsonguëro natarobacaare ora
nipocasique yaca’ ”. ³³ Aro nanguenagueque yamai, naramani, aisati basini catagui-
teri. Caninataque nangame Jerosarénquë aisa nangantaiguëmari ibegaiga comantantatsiri-
pague jirai cara icamaiguë canta.

Jesos yogasëretocoigacari Jerosaresati.

(Mt 23.37-39)

³⁴ Aisati icanque Jesos:

—Jerosaresati, Jerosaresati, pógapinintaiguëri comantantatsiri, pibasiaqueri mopëquë ira
igáquemi Tosorintsi! Aisa ocanta tiapa omisantaiguëri ojaniquite, ocábintaiguëri, tojai
nocogabeca nopatotaiguemime obirojegui, nanguemisantacagaiguemime, carari te pinin-
taigue pinguemisantina. ³⁵ Pijitasitaiga Jerosarén caninano, carari nojocanëmi Naro, aisati
ijocanëmi Pabati Tosorintsi quero inomotajimi. Yamai nangantaiguëmi quero piniagaina
aisati irooti cara piniagabaquina nopocaje aisati, nantingomibintaigapëmi, pingantoco-
taigabaquena: “Coraque Ira igáque Atingomi. Icaninatasanti Iriró”.

¹ Basiniquë sábaro iáque Jesos irapë ibangoquë itingomi bariseo. Inetsaigasegui. ² Ainta cara paniro janaitatsiri, paniriabaguitachari yapaniriagueca omagaro. ³ Aro Jesos yosamitëri bariseoegui aisati ira ogameantiro isanguenare Moisés, icantaiguëri:

—¿Caninataqueco agaguibegajiri janaitatsiri sábaroquë? ¿Queroco?

⁴ Imairetasantaiguë irirojegui. Aro yotsagaqueri paniriachari Jesos yogaguibegajiri, igáqueri iriátae. ⁵ Icantaguëri bariseo Jesos:

—Aroca sábaroquë imariaque omoroquë pitomi, ¿Queroco págairi omanapague? Imariaqueca pobaacate omoroquë, ¿Queroco págairi irooti sábaroquë? Quero poguei oquëtaguetanaita.

⁶ Imairetaiguë tiguétinta ingantima irotopitiri.

Icanque Jesos: “Quero poguibata”.

⁷ Aro iniaiguëri Jesos ira igaimanejegui cara yoguibataigaca. Ico Gabeca irisobicaiguëme inganquima itingomi arota iraniacaninataigueri matsiguenga. Aro icantaiguëri Jesos, yosiacagantaiguëneri:

⁸—Cara ingaimëmica jiesitaquë cara iráquero iina sërari, quero pisobigui cara isobicaigui itingomipague tenta pigóte aroca iribocapë itingomi yabisanaguemi obiro. ⁹ Aique ira cajemaquemi pitirooti obiro inganquemi: “Pingabiritima, pomeri ica nagaimaneca irasi irisobicamento. Pisobigue obiro cara”. Aro popasiquitanë, pijáque pisobiaque cara carantatsiriquë. ¹⁰ Carari cara ingaimëmi, pirequima, pijáte, pisobigue carantatsiriquë. Aique, iribocasitëmi ira cajemaquemi, inganquemi: “Omana, nomatsiguenga, pisobigopë yaca itingomiquë”. Iraniaiguëmi igaimanejegui cara mesaquë, irogóiguëmi obiro itingomi. Aro pinganinatanë. ¹¹ Pairiraca quingachane caninari, irajiquima obatatsi, aro Tosorintsi iraguipasiguitëri, inganqueri carantatsiri. Aisati ira carantatsi, iraguibatasantëri iriro Tosorintsi, iraniacaninatëri imatsiguenga.

Pingábintseri ira coguitiachari.

¹² Aisati icanqueri Jesos ira cajemaqueri:

—Cara pingaimaiguëri matsiguenga pobangoquë, popaagaiguëri catingaquë quero ca chopiniquë, quero picaimiri irianti pamigotepague, querootisati pientipague, querootisati pijitaneegui, querootisati pitimanamire casintaguetchari. Aroca popaaguëri, aro iriro pëgatajimine, irapajagajimi obiro. ¹³ Carari caninataque pingaimaigueri ira te irasintaguetima pairoraca, aisati ira camabocori, aisati ira carancara, aisati ira comarajari, omagaro cantacha negaca, ¹⁴ tiguétinta ingantaiguema iripëgatajimi irapajagajimi obiro. Carari aiquenta cara Tosorintsi iraganiataigairi antagaisati quemisantatsiri, iripëgatajimi, imaimi obiro cara picábintsanti yamai.

Tosorintsi iritsita icábintsagaibitaca jorío.

(Mt 22.1-14)

¹⁵ Iquemaqueri Jesos paniro igaimane, icanque:

—Inganinasëretë ira papërone pan cara igáanti Tosorintsi.

¹⁶ Icanqueri Jesos quingabaguirentsiquë:

—Ainta paniro sërari. Yobetsiquëro tojai perintsi, icaimagantaiguëri imatsiguenga iri-bocai gapë irapaguë. ¹⁷ Aroque pobetsicaca antagaisati. Igátabecari ironomire ingomantaguetaguëri igaimane: “Moncaraca yamai, pobetsicaca omagaro; popogopë yamaica”.

¹⁸ Carari te ingogaigue iriáigue. Icanque paniro: “Irorai namanantë naguebatsite. Najáque yamai nanetsëro, caninaguitero. Pingantinari pobatorote: ‘Quero ipoqui’”. ¹⁹ Icanque basini: “Irorai namanantë nobaacate icarati 10. Yamai najátasiqueri naniantëmari iriroca caninari, aroca intarobacaaque caninasati. Pingantiri pobatorote: ‘Quero icanta ipoqui’”.

²⁰ Icanque basini: “Irorai náguë najina; iroero quero niátaguëti”. ²¹ Aro ipigapaa ironomire, icomantapëri ibatorote: “Icanquena: ‘Quero niáti, quero napi’”. Aro iguisaneinca, igáqueri ironomire: “Omanapague pijáte, pinguenagueque poeboroquë, pomapëri yaca ira te irasintaguetima pairoraca, aisati ira camabocori, aisati carancara, aisati comarajari, omagaro cantacha nega”. ²² Aique iáque ironomire, icaimaguequeri, yamaigapëri tojai. Icampëri ibatorote: “Casintinari, nocomantëri, ipocai gapë tojai, carari terai otsatenguima mesa; tojaiquerai basini”. ²³ Aro icanqueri ironomire ibatorote: “Pijátaguete abatsipaguequë, pomaigapëneri yaca irajagopëmaro nobango. ²⁴ Carari, nanganquemi, quero yapi noperi paniro ira nacaimaigabitaca”.

Icanque Jesos: “Pomomirintsibentinario ora nococaquemi”.

(Mt 5.13; 10.37-39; Mr 9.50)

²⁵ Arosonoru matsiguenga yoguaitaiguëri Jesos cara abatsiquë. Yapisitaanaca, ican-taiguëri:

²⁶—Nigóti pinintaiguëri piri, piniro, pijina, pitomi, pirenti, pitsiro, omagaro. Aisati pininta obiati. Caninataque, carari pingogaiguëca piguiatina, caninataque pinintas-antaiguena Naro. Queroca pinintasantina, tiguëti pingantima pomeguima nogomere. ²⁷ Pairiraca nintatsi iraguiatanëna, imeguima nogomere, iranatanëro igorosite, quero icantanonta iriati. Queroca ipomirintsibentinaro pairoraca nongocaqueri, tiguëti ingantima imeguima nogomere. ²⁸ Pairiraca cogatsi irobsitiquë oquibe pongotsi, ¿Teco irotsita inguengue ora opënatëma, irogócoitiri iguirequite aroca cotonguiboro iritsonguëro pongotsi? ²⁹ Aroca imarintëmaro, carari quero cotonguiboro quirequi, quero itsonguiro, iragui netsërone pongotsi irisëronquimari casintaro. ³⁰ Ingantocotaiguëri: “Iriro yobetsicabitacaro pongotsi; tiguëti ongantima iritsonguero”. ³¹ Aintaca itingomi aisati isorarote icarati 10,000, igótoctobëri basini itingomi ipoque iriro aisati 20,000 isorarote iromanápëri, ¿Teco iritsita cajemaquerine ogótacagantatsiri, irogóontobagobëma inguengaiguëma aroca onganinatë iromanátaigabaqueri, iritsongaigabaqueri? ³² Aroca inguengaiguëma quero yagob-eiri, iragátaiguëri iragátane iritonguibotobëmari basini itingomi aisati isorarote icarati 20,000 irosomitobëri pairoraca ingoque arota quero yomanátiri, iripigaigaima caninasati. ³³ Aisati picantaiga obirojegui. Aroca pingoque piguiatanëna, obitsita pinguengasantima ati ocanta omagaro ora pasinta. Pigótasantiro, aro pijocaiganaquero, piguiatasantaiguena. Queroca papabaquëajiro, tiguëti pingantima pomeguima nogomere. ³⁴ Nococaqueri ira aguiatina quemisanquina inguemisantacaguiri basini matsiguenga irogometiri intime caninasati. Irianti cantaca patiari caninari. Queroca ijocanëro irasi, quero yoguiatina, quero icomeiti, quero icanti ora nococaqueri. ³⁵ Irianti cantaro patiari cara omasanganë ora cochotacaguero, quero ocomeiti, ojoquero sotoquë ogatiquëngani. Aitica piguemita ora piquemanta pinguemisantiro ora nocomantëmi.

15

Jesús icomantëgotëri ira oisha ibiaga.

(Mt 18.10-14; Jn 10.1-18)

¹ Ipocasitaiguëri Jesús omagaro jorío coigotantatsiri quirequi, ipagantineri Iromasati. Aisati ipocasitaiguëri tojai cantaguetiro quimingari inguemisantaigapëri. ² Aisati ainta bariseoegui aisati iragui ogomeantiro isanguenare Moisés iniaiguëri Jesús, icantobaca: —Icanque Jesús ora te onganinate. Yágacaninataiguëri cantaguetatsiri, itsibataigari yapëcoiguëri.

³ Aique yosiacagantëneri Jesús, icantaiguëri:

⁴ —Pinguengaiguëri paniro sërari obirojeguiquë yomisantaiguëri iroishate icarati 100. Aroca imiaquima paniro iroishate, ¿Queroco ijocanëri 99 cara quesiiquë, iriatë ingooguëri ira oisha ibiaga irooti cara iraniopairi? ⁵ Cara iniopairi, icaninatë, iquiopairi, ⁶ ipigapaa ibangoquë, icaimaigapëri imatsiguenga aisati itimanamitane, icampëri: “Intsome anganinasëretanë; ipiaca noishate, nágairi aisati”. ⁷ Nangantaiguëmi, aisa ocanta inganinasëretasantaiguë cara Jonogaguitequë cara inganquima yacaqueroica paniro cantaguetatsiri ijocajiro ora icantagueti te onganinate. Yabisaiganaqueri cara icaninabentaiguëri tojai matsiguenga caninari te ingantiro quimingari.

Jesús iquenguitsatocoqueri quirequi ibiaga.

⁸ Aisati icantaiguëri Jesús:

—Aiti basini quingabagüerentsi nosiacagantëmiro: ainta tsinane pasincari iguitso quirequi icarati 10. Aroca imiaquima paniro, ongooguëtajiri. Ontsitinitanëca, oboquero nichero, otarogasantëro pongotsi; ongooguëri irooti cara onajiri, ágairi. ⁹ Cara págairi, ocamaiguëri omatsiguenga aisati otimanamitane ocantaigabaqueri: “Intsome anganinasëretanë: ipiaca naguirequite, nágairi aitosati”. ¹⁰ Nangantaiguëmi, aisa ocanta inganinabentaiguëri ironomire Tosorinti irisaanganetsite cara inganquima yacaqueroica paniro cantaguetatsiri, ijocajiro ora icantagueti te onganinate.

Jesús icomantëgotëri oboina ibiaga.

¹¹ Aisati icanque Jesús:

—Ainta sërari aisati pite itomi. ¹² Icanqueri iriri itomi carantatsiri: “Pabati, pomena yamaica omagaro ora nasintajima naro cara pingamaquëca”. Aro ipaguetaguëri pite itomi. ¹³ Cara pabisanaque arosata cataguëteri, itomi carantatsiri yapatotëro antagaisati irasi, iáque canta jaanta basiniatiquë quibatsi, yáganëro iraisati. Canta, te intimopë caninasati; icantaguetiro pairoraca icoganonta, yaparaqueri iguirequite aisati basini yasintabeca. ¹⁴ Cara itsonqueri omagaro, canta jaanta itasiataiguë matsiguenga. Aisati ira oboina sigachari itasesasantë. ¹⁵ Aique iáque icoqueri matsiguenga timatsi canta, intarobacaquineri. Ainta paniro, igáqueri ichacatequë imaiguëri iraperi ichanchoneegui. ¹⁶ Aisati yapëro oboina ora otaqui iraperi chancho, te inguemina; icogabecaro basini;

carari te imeri iriro iraperi. ¹⁷ Aique iquengasëretaca: “Ainta tojai tarobacaatineri apati. Cotonguiboro iraperi antagaisati, yapapintaiguë te iritsonguero, carari naanti yaca nangamaqueni pâguënanta natasegane. ¹⁸ Atsi nopiganajima apatiquë, nangampëri: ‘Pabati, nacantomotaguequeri Tosorintsi aisati obi-ro. ¹⁹ Teni ongomeite pijitina pitomi yamai tenta nanganinate. Pingantajina pomeraro, nantarobacaatimi pichacaratequë’”. ²⁰ Aito cara iparintaca iáque iririqûë. Cara aintaquerai jaanta, terai iraretima, ineintobacari iriri, igótobëri, icantaneintëgotëri itomi, isigasitanacari itonguibotobacari, yabitsinacobëri. ²¹ Icampëri: “Pabati, nacantaguetomoqueri Tosorintsi aisati obi-ro tenta nanguemisantimi. Teni ongomeite pijitina pitomi yamai tenta nanganinate...” ²² Carari iriri igáqueri ironomire: “Omanapague, pomapëneri quitsagarintsi caninarisonori, pinguitsagatiri, poguineri aniyo ibatsapacoquë aisati sapato iguitiquë; ²³ aisati pomapëri itiomijani baaca aneri, pôguineri. Intsome opaigue aisati intsome anganinasërebentiri notomi ²⁴ aroquenta ipigapaa. Najitabeca icamaqueni carari cantaca icaniantanaini. Ipiaca carari yamai naniajiri”. Iparintaigaca icaninasëretaguë, yapaiguë.

Përosati icanque Jesus:

²⁵ —Carari ainta itomi obatatsi cara ichacaratequë. Cara yaresërepa iquemaigapëri cara icántataiguë aisati icaninataiguë. ²⁶ Icaimëri pani-ro ibimantaga, yosamitëri: “¿Pairo icaninabiritaiguë cara pongotsiquë?” ²⁷ Yotabitanëri: “Ipigapaa pirenti. Yógantëneri itiomijani baaca aneri yapaiguë. Icaninatasantë piri aroquenta inioibairi itomi caninasati yaretaja”. ²⁸ Iguisanaca ireinti obatatsi, te iraninte ingue pongotsiquë. Carari iquemocoqueri iriri, isotocanë icanqueri: “Omana, notomi, pingapë. Pinganinabentobëri pirenti”. ²⁹ Carari yotabitanëri, icanqueri: “Tojai osarini nacanquemiro pairoraca picocaquena, te nopëgatsatëmatimi. Carari te pomena naro pani-ro chibo nopagaiguëri namigoteegui, nanganinatagaiguëri. ³⁰ Carari yamai ipocaji pitomi, yaparatasicari piguireguitë itsoncaquero tsinanepague antagueantatsiri, pâgacaninatobëri pôguëneri aneri baaca”. ³¹ Icanqueri iriri: “Notomi, përosati pinomouina. Omagaro nasintagueti iroonti pasi aisati. ³² Carari caninataque anganinabentiri pirenti. Aisa ocantabeca icamaque, najitabeca quero naniajiri aisati. Carari aisa ocanta icaniantanai, naniajiri. Ipegabeca, yamai naniajiri aisati. Intsome anganinasërebentiri”.

16

Jesús icomantëgotëri matobitiriri ibatorote.

(Mt 6:24)

¹ Aisati icantaiguëri irogomere Jesús:

—Ainta sërari yasintaguetaro tojai. Aintasati iromeraro yomisatineri omagaro irasi ibatorote. Ipoque basini, icomantëgotëri iromeraro cara icositagarantëri casintari. ² Icaimëri, yosamitëri: “¿Pairo ojita oca naquemocoquemi? ¿Aisonorico picositagarantëna? Yamai pobetsiquinaro pisanguenare, pomapënaro. Naninti naneiro ora picanque. Quero nanintacaguimi pintainaro pairoraca basini”. ³ Aique iquianca iriro: “Irojoquena nobatorote; quero inintacaguina nantaineri aisati. ¿Pairo nanganque yamai? Te nasintsite nasi-abaguite. Aisati nopasiquique cara nomanopiantëri imasitëna quireque. ⁴ Ajaa, nigóque ora nanganque. Aique cara irojoquena nobatorote, irágobëna basini ibangopaguequë”. ⁵ Aro icaimaiguëri paniropague ira irebetiri ibatorote. Icanqueri pani-ro: “¿Ati icarati pirebetiri nobatorote?” ⁶ Yotabitanëri: “Narebetëri tojai oguei aseitona, 100 irata”. Icanqueri: “Jeroca pisanguenare jirai. Yamaica pisanguenare cara pirebetiri 50 irata”. ⁷ Aique icanqueri basini: “Obi-ro, ¿Ati icarati pirebetiri nobatorote?” Yotabitanëri: “Narebetëri tojai tirigo 100 cantiri”. Icanqueri: “Jeroca pisanguenare jirai. Yamaica pisanguenare cara pirebetiri tirigo 80 cantiri”. ⁸ Aiquenta cara igóquero ibatorote ati ocanta iromeraro yamatobiqueri, icanque: “Te ongomeite cara yamatobiquina, carari igóti iráquero ora cogu-itiomotari”. Iraegui tsoengatsiri te inguemisantiri Tosorintsi, igótasantaiguë ati ongantima ingantacaqueri imatsiguenga ora icogui iriro. Yabisaiganaqueri quemisantatsiri tenta irogótasante; te inguengasëretima irobotiri basini. ⁹ Yamai nangantaiguëmi obi-rojegu: aintaca piguireguitë, pingábintsaguëri ira coguitiacha, pomitocotiri pomeri ora coguitiomotari. Iramigotenquimi, quero yomaguisantiro ora picanqueri. Aique cara pingamaqueca, pijocanëri piguireguitë carari irágacaninatobëmi Tosorintsi cara Jonogaguitequë, pintiomotaiguëri caninasati ira picábintsaguë cara pongotsiquë quero pitsonga. ¹⁰ Ira cantatsi caninasati cara Tosorintsi ipëri arosata, aisati irantë caninasati cara imëri tojai. Carari ira matobiantatsi cara ipëri arosata, aisati iromatobiantanë cara imëri tojai. ¹¹ Carari aroca pingositaguetaguëro ora yasinta basini yaca quibatsica, aisati pabentaigaro ora pasinta obi-ro, ¿Pairoco pëmiro ora caninaro quero pitsonga? Quero pairi. ¹² Aroca picositaiguëri iguireguitë basini, ¿Pairo imabiritimi Tosorintsi pairoraca caninari, pasiatü?

¹³ Aintaca ironomitaga, quero icanta iquemisantiri pite ibatorote. Iromaintëri paniro, iraninqueri basini. Aisa ocanta, aroca pingantineri Tosorintsi omagaro ora icocaquemi quero picantanonta obiati. Aroca pingoque pingantanontima obiati, quero pintineri Tosorintsi. Quero picantiro pite. Aroca pinintasantëri Tosorintsi, quero picogui popobotiri piguireguita. Aisati pinintirica piguireguita, quero piquemisantiri Tosorintsi.

Jesos inibataiguëri bariseoegui.

(Mt 19.1-12; 11.12-13; 5.31-32; Mr 10.1-12)

¹⁴ Aro iquemaiguëri bariseo ora icanque Jesos. Isërontaigacari icogasantinta quirequi bariseoegui. ¹⁵ Icantaguëri Jesos:

—Pijitasitaiga caninari obiatiegui, aisati picogaiguë iraniacaninataiguemi matsiguenga, carari igóquemi Tosorintsi ora piquianca. Te inguenguema Tosorintsi aisa icanta iquen-gaiga matsiguenga. Ora icaninabentaiguë matsiguenga iniacaninatëro, iniaquero Tosor-intsi te onganinatëmate. ¹⁶ Jirai ocaninatë inguemisantiro matsiguenga ora isanguenat-acaqueri Moisés Tosorintsi, aisati ora iquenguitsatacaqueri comantantatsiri jirai, carari yareca yamaica Joan baotisantantatsiri. Yamai Tosorintsi icocaqueri basiniati. Ongani-natasantë yamai inguemisantaigueri Joan matsiguenga intingomintasantëmari Tosorintsi. Yamai icogasantaguë tojai matsiguenga cara iragabaisicotajiri Tosorintsi, inganaque iragáantanequë, intingomintaiguëmari. ¹⁷ Aiquenta omeganëma quibatsi aisati Jonogaguë carari quero opeguëmata isanguenare Moisés. Icoqui Tosorintsi përosati ongantima arota pigóontimaro ati ongantima pintimaigüe caninasati. ¹⁸ Aintaca sërari irojoquero iina, iráque basini iina, yaguimintacaro iinasonori ora ijoque jirai. Aisati pairiraca ágairone ora ijoque ojime, yaguimintacari ojime cara icantaguëti ora te ongomeite.

Jesos icomantëgotëri ira casintaguëtachari aisati Irásaro.

¹⁹ Përosati icanque Jesos:

—Ainta paniro sërari casintaguëtachari, icanaque iguitsagare caninari, catamagorisonori aisati quiraquisaamagori. Antagaisati cataguëteri icaimaguëri imatsiguenga icantaguëi jiesita yapasantaiguë; te ongoguitiomotimari pairoraca. ²⁰ Carari ainta basini sërari jitcha Irásaro, irojocaga cara omoroquë casintaguëtachari. Iribatsasebaguitaga omagaro. ²¹ Icogabeca irapërome ora ongarataga yobariaque casintaguëtachari. Te inguemima. Te imitocotiri pairiraca; carari ipocasitaiguëri otsitipague itsotaguepëro iribatsagoro. ²² Aique icamaque Irásaro, yáganëri ironomire Tosorintsi cara ini Abaram caninaguëteroquë. Aisati icamaque casintaguëtachari, itiaca igamaga. ²³ Cara osobiquë itsipiriasantë isërequë, tojai iniacatsigatacero. Aisati inetsë canta jaanta, iniaiguëri Abaram aisati Irásaro. ²⁴ Icaimë, icanqueri: “Apa, Abaram, pingantaneintëgotina yaca; pigátiri Irásaro iragaapagotima ibatsapacoquë nijaquë iribocapëta yaca arota iragatsingatinaro nanine aroquenta natsipiriasantë yaca tsitsica”. ²⁵ Carari yotabitanëri Abaram: “Notomi, pinguenguero ati ocanta jirai cara pitimabeca quibatsiquë. Pitimi caninasati te pairoraca coguitiomotimine. Irari Irásaro tojai itsipiriasantë jirai. Carari yamai icaninatasanti iriro yaca; obiro pitsipiriasantë canta. ²⁶ Aisati aiqero obiroquë aiti otarabi paraguita játaque osobisonorinta arota pairiraca yaca quero yagobia iáti obiroquë. Querootisati pairiraca canta yagobia ipoqui yaca naroca”. ²⁷ Icanqueri casintaguëtabetachari: “Queroca ipoqui yaca, Apati Abaram, nomanaquemi pigátiri Irásaro cara ibangoquë apati. ²⁸ Canta, ainta pabocorooti igue. Ingamanaaigapëri, inguemisantacagaiguëri igue Irásaro, imasiniatitaiguëma, arota quero ipocaiapë yaca cara natsipiriasantasegui”. ²⁹ Icanqueri Abaram: “Aiti isanguenare Moisés aisati irasi comantantatsiri. Caninataque irinibataiguerota inguemisantirota imasiniatitima”. ³⁰ Yotabitanëri: “Quero, Apati Abaram; quero iquemisantiro Sanguenari, carari aroca iriátasitaiguëri camatsiri, inguemisantobëri iriro, ingantaiguëma yacaqueroca imasiniatitima”. ³¹ Carari icanqueri Abaram: “Queroca iquemisantiro Sanguenari, querootisati iquemisantobëri camatsiri ira cabiritajachane”.

17

“Quero pintaguëri basini ora te onganinate”.

(Mt 18.6-7; Mr 9.42)

¹ Aique icantaguëri irogomere Jesos:

—Nangantaiguëmi, përosati ini ira antaaqueri imatsiguenga ora te onganinate; carari Tosorintsi ingasitigatëri ira antaaquerine basini. ² Caninataqueme ingamaque queroquerai intaguëri ira quemisanquina ora te onganinate, aisa onganquima iraguëshotiaquineri oquibe mopë itsonoquë, irojoqueri angaarequë ingamaque. ³ Pigamema, quero pintaguëri basini ora te ongomeite.

Pisetajineri popiguemisantane ora icantaguetimi te onganinate.
(Mt 18.21-22)

Aisati icanqueri Jesus:

—Aintaca popiguemisantane icantaguetimi ora te onganinate, pingamanaairi. Aroca irojocajiro ora icantagueti te ongomeite, pijocajineri obiro, pomaguisantineri, quero piquengairo. ⁴ Aitaca patiro cataguiteri ingositêmi, inguisatsatêmi, pairoraca inganquemi, iragatsitapininqueroça tojai, aroca inganquemi: “Nacanquemi ora te ongomeite; iroro nogasêretaguêca. Nojocajiro quero nacantajimiro aisati; pijocajinaro obiro aisati”, aro pijocajineri, pingábintseri, quero piguisiri.

Aroca pinguemisantari Tosorintsi, inganquemiro tojai.
(Mt 21.18-22; Mr 11.22-26)

⁵ Ira iragátane Jesus icantaiguêri Ira Atingomi:

—Naquemisantabecari Tosorintsi, carari nocogaiguê pinguemisantasantacagaiguena.

⁶ Icanqueri Atingomi:

—Pinguemisanquêca arosata, pomaniri Tosorintsi pingantiri irisiabonguititiro ora anchatora, iragaratianquero cara angaarequê, aro inganquemiro.

Ira quemisantatsiri aisa icantari iromeraro Tosorintsi.

⁷ Aisati icantaiguêri irogomere Jesus:

—Quero piquenga obiatiegui caninari. Aintaca pomeraro isiabaguitê queroça yomisantimiri pobira, cara iripigaima pobangoquê, ¿Pairo pinganqueri? ¿Pinganquerimeco: “Pingapê omanapague, pisobigopê pope”? ⁸ Quero picantiri negaca. Pinganqueri: “Pobetsiquima, pingotina noperi aisati nomire, pomapênaro. Notsonqueroça naro, aro pope obiro, pôguima aisati”. ⁹ Quero picarasiatiri pomeraro aroquenta icanquero ora picanqueri. ¹⁰ Aisati obirojegui picantaigari ibega pomeraro. Cara pitsonguêro antagaisati ora icocagaiguêmi Tosorintsi, caninataque pingantaigui: “Patiro nacanquineri Tosorintsi ora icocaquena. Te inêmate ora nanguenguema naro caninari, naanti iromeraro”.

Jesus yogaguibegajiri 10 iribatsasetaga.

¹¹ Aisati yogaganaa Jesus, iáque aiqero Jersarênquê, iquenaque Samariaquê aisati Garireaquê. ¹² Cara yarecaro poeboro, itonguibocari sêrari iribatsasetaga icarati 10. Yaratangaiguê arosata casiriconiati, te irotsititimari Jesus. ¹³ Icaimaigabaqueri:

—Jesus Ogomeantatsiri, pingantaneintêgotaiquena, pigabaisaicotaiguena.

¹⁴ Aro iniaiguêri Jesus, icantaiguêri:

—Pijátasitaiguêri saseriroti, poniagaiguemari.

Aique iáiguê. Cara abatsiquê aito ca ibegaiganaja. ¹⁵ Aro ainta paniro iribatsasetabitaga, cara igóque aroque ibeganaa, ipigapaa, icaimanê catsigui, “Icaninati Tosorintsi yogaguibegajinanta”. ¹⁶ Yobaticagueritotasipari iguitiquê Jesus, yaquitomoca, icarasiapêri Ira Jesus. Irianti Samariasati, ipaniaca Samariaquê jirai. ¹⁷ Aique icanque Jesus:

—¿Teco ingarate 10 iribatsasetaga ira nogaguibegaji? ¿Atini ira basini? ¹⁸ Icarica cagari jorio, irianti basiniati matsiguenga. ¿Paniroco ica ipigapa inibacaninatêgotêri Tosorintsi?

¹⁹ Aique icanqueri iribatsasetabitaga:

—Pingabirituma, pijátaje yamai. Aroquenta piquemisanquina, iroro nogabaisaicoguetajimi.

Ati icanta Tosorintsi cara itingomibintanti.
(Mt 24.23-28, 36-41; Ir 19.11-12)

²⁰ Aique yosamitaiguêri Jesus bariseoegui:

—¿Ati ongantima orequima iragáantane Tosorintsi?

Yotabitaiganaqueri Jesus:

—Cara intingomibintêri matsiguenga Tosorintsi, quero pineiro tenta oneingani.

²¹ Quero pairi cantatsi: “Iroco oca”, queroootisati, “Iroco ora”. Aisonori quero oconijati carari aiti obirojeguiquê. Paniro itingomibintiri Tosorintsi ira quemisanqueri.

²² Aique Jesus icantaiguêri irogomere:

—Naro paniênguicha cara Jonogaguitequê nomatsiguengatapê. Quero natsibatimi pêrosati aiquenta nojocaiganaquemi. Coraque opoque cara pingogaigabitêma piniaigaina patiro cataguiteri basini, carari quero pineina. ²³ Aintaca inganquemi: “Ainta Quirisito cara”, aintasati cantêmine: “Ainta yaca”, quero poguiatiri, quero pitsipiriasita piáti cagarinanta Naro. ²⁴ Cara omabocapê tegotsitanatsi moretatsiri, osanguêguitetanêro omagaro jonoquê, aisati nangampaima Naro cara nopogopae quibatsica. Nomabocaigapairi matsiguenga, carari iraniaigabaquina antagaisati. ²⁵ Carari queroquerai nipocaji, Natsita atsipiriaquenguitsine tojai aronta iritsoengaigabaquina icaegui matsiguengaca,

inguisaigabaquina. ²⁶ Aisa ocanta jirai cara itimi Noé, itsoingauguëri Tosorintsi matsiguenga, aisa onganquima cara nopigaima Naro, iritsoengauguëna omagaro matsiguenga. ²⁷ Cara Noé icamanaiguëri, ira matsiguenga përosati icantaiga cara yametaiga: yapaiguë, yógaigaca, yágaiguëro iina, yágantacagaiguëro irisinto, përosati icantaiga irooti cara yote-tanacaro pitotsi Noé. Aique opariaque oquibeguintesonori angani, ponangasantaca, ongaaretanë omagaro, pipoguiriaiguëri antagaisati tsoengatsiri. ²⁸ Aisati icantaiga matsiguenga cara itimi Lot, yapaiguë, yógaigaca, yamanantaiguëro pairoraca, ipimantaiguëro, ipanguitaiguë ibanguire, yobetsicaiguëro pongotsipague, ²⁹ carari cara isotocanë Lot cara Soromaquë, irooti cataguiteri Tosorintsi yobariaquineri tsitsi oconogaro asopiri paniacha jonoquë, pipoguiriaiguëri antagaisati Soromasati. ³⁰ Aisa ingantaiguëma somatsiguenga cara nopocaje Naro. Iritsoengauguëna tojaisonori, quero iquengauguiri Tosorintsi. ³¹ Aisati cara omoncaraquema cataguiteri cara nopocaje, aintaca paniro jonoica ibangoquë, quero iqui cara iraganëro ora yasinta; aintaca paniro iritoganequë, quero ipigaa ibangoquë. Irisi-ganëmata. ³² Pinguengauguero iina Lot, opeganaca patiaru cara papisitaanaca. ³³ Pairiraca cogabitacha ingábintsëma yaca quibatsica tenta iraninte iratsipiriero, quero íati Jonogaguitequë, iratsipiriasantëma. Irari quemisantasantënane yaca quibatsica, irooti cara ingamobiquina Naro, aikuenta intiomoquina Jonogaguitequë, intimasantapë caninasati. ³⁴ Yamai nangantaiguëmi: cara nopocaje, intsibatëmari pite sërari irisomé irooti somamintotsiquë. Paniro náganë, ira basini nojocanëri. ³⁵ Otonongasegueca tirigo pite tsinane; paniro náganë, ora basini nojocanëro. ³⁶ Iriabiabaguetasegueca pite sërari cara togantsiquë. Paniro náganë, irari basini nojocanëri.

³⁷ Yosamitaiguëri irogomere:

—Natingomi, ¿Nega onganquima negaca?

Icantaiguëri Jesus:

—Atiraca ini igamaga, aito cara imarigasipëri tisoegui. Aisa ocanta, atiraca itimi tsoengatsiri, iratsipiriacaiguëri Tosorintsi.

18

Ora ogamaimentaga paserigapiniqueri joes te inganinate.

¹ Aisati basiniquë cataguiteri Jesus yogometaiguëri irogomere quingabaguirentsiquë. Icantaiguëri caninataque iromanopiantiri Tosorintsi, quero itsirisharo. ² Yosiacagantëneri quingabaguirentsi, icantaiguëri:

—Ainta poeboroquë ira joes ira te imingui Tosorintsi, teatisati ingantaneintëgotiri matsiguenga. ³ Aisati ainta irootiquë poeboro tsinane ogamaimentaga. Piátasitopiantëri joes, ocantopiantabitacari: “Pingábintsena pomitocotina; popëgabentina ira quisaneinquina”. ⁴ Iritsita te iraninte ingábintsero, carari piátasitopiantëri. Aikuenta iquianca: “Aisonori te nomingui Tosorintsi teatisati nangábintseri matsiguenga, ⁵ carari paserigapiniquina oca tsinaneca. Iro ro nomitocotaguëquero, nangábintsëro arota quero pipocasitopiantaina paserigaina aisati”.

⁶ Icanque Atingomi:

—Pinguengeri ira joes te inganinate, ora icanque. Ipëgabenuero tsinane ogamaimentaga. ⁷ Irianti Tosorintsi icaninati. Yamai përosati yamanopiantaiguëri quemisantatsiri, ¿Teco inguemaiguëri cara iripëgabintaiguëri? ⁸ Nangantaiguëmi, quero ocosamaniti cara ingábintsaguëri iripëgabintaiguëri. Carari cara nopigaima yaca quibatsica, ¿Aroco naniagapëri quemisantaiguëne iromanocotaiguëri Tosorintsi?

Yamanaiguë pitirooti: bariseo aisati coigotantatsiri.

⁹ Aisati Jesus yosiacagantaiguëneri matsiguenga yoguibataiga, iquengauguëri iriati caninari, imaintaiguëri basini. Jesus inibataiguëri oca quingabaguirentsica:

¹⁰ Íaiguë pite sërari cara oquibequë ibango Tosorintsi, yamanaigapë. Paniro ini bariseo, ira basini irianti coigotantatsiri, icoicotaiguëri iguireguite imatsiguenga, ipagantiri igobearigati Iromaquë. ¹¹ Yaringopë bariseo, yamanopë icanque negaca: “Tosorintsi, nacariasaguëmi cara te aisa nangantimari ibega basini sërari. Tojai nacaninanti naru; te nangantaguete, te aisa nangantimari cosirinti, te nomatobite, te naguimintimaro najina. Teatisati nangantimari ibega ica coigotantatsirica. ¹² Nameta omagaro ironisiquë nitita, aisati joebisiquë, te nope, iroonti naquenguimi Obiro. Aisati nopagarantimiro omagaro nágaguëti. Nágucä 10, nopabaquëmi patiro”. ¹³ Ira coigotantatsiri yaringopë cara omoroquë pënibaque te ingue. Te iraniacaninatima iriati; ipasiquique, te iranetse jonoquë, yoguica icanque: “Tosorintsi, pingantaneintëgotina naronta cantagueantatsiri, tenta nanganinate”. ¹⁴ Yamai nangantaiguëmi, tojai icantaguëti ira coigotantatsiri, carari icábintsëri Tosorintsi, yogabisaicotajiri. Cara ipiganaja ibangoquë, aroque igónjinca iriati

cara iniacaninatëri Tosorintsi. Irari bariseo te iraniacaninatiri iriro Tosorintsi, te iragabisaicotiri. Pairiraca quingachane caninari, irajiquima obatatsi, aro Tosorintsi iraguipasi-guitëri, inganqueri carantatsiri. Irari carantatsi, te irajitima caninari iriati, Tosorintsi iragubatasantëri iriro.

Icogui Jesus iribocasitaigueri janequijegui.

(Mt 19.13-15; Mr 10.13-16)

¹⁵ Aique yamapëngani tsorori janequipague cara Jesusiquë, icogaiguë cara irogaguetineri ibaco Jesus iguitopaguequë janequi, iromanocotiri cara ingábintseri Tosorintsi. Iniaigaba-queri irogomere, imetaigacari Jesus, icantaigabaqueri:

—Quero paseriguiri Atingomi.

¹⁶ Carari icaimaiguëri Jesus:

—Quero picantiri. Nocoguini iribocasitaigapëna janequijegui. Igóiguë iriro intingom-intina. Antagaisati icantaigari ibega ica intiomoquina cara iragáantanequë Tosorintsi.

¹⁷ Aisonori nangantaiguëmi: icaegui janequica inintaiguë intingomintimari Tosorintsi; pairiraca te aisati ingantima ibega janequi, quero paretta cara igáanti Tosorintsi.

Jesus icamanaaqueri ira sërari casintasantachari.

(Mt 19.16-26; Mr 10.17-27)

¹⁸ Basini cataguiteri quë iátasiqueri Jesus paniro itingomi jorío. Icampëri:

—Caninari ogomeantatsiri, pingomantina: ¿Pairo nanganque arota nantimaque përosati canta Jonogaguitequë?

¹⁹ Yotabitanëri Jesus:

—¿Pairo picantobiquina Naro caninari? Paniro ini caninari, Irianti Tosorintsi. ²⁰ Pigótiro ora iragáantane Tosorintsi ora ipëri Moisés: quero pintiro tsinane cagaro pijina; quero póganti; quero picosantati; quero pitsoiguëgotaguetari ira basinipague; pinguemisantiri aisati pinintiri piri aisati piniro quero pipëgatsatëmatari.

²¹ Icanqueri sërari:

—Aroque naquemisanquero omagaro oca, nomoncaraquero cara ninë janequi irooti yamai.

²² Iquemaqueri Jesus, icanqueri:

—Panibati. Pinintica iraniacaninatimi Tosorintsi, atsi pijáte pomimantiro antagaisati ora pasinta, pomaguetiri ira coguitaguetachari omagaro opënataga; aique imëmi Tosorintsi ora caninaro cara Jonogaguitequë. Cara pomimantëroca antagaisati, aro piguiatanëna Naro.

²³ Cara iquemobëro oca, yogasëretasantanaca irironta casintaguetasantacha, aique iáque tenta iraninte imimantiro. ²⁴ Iniobëri Jesus, icanque:

—iOpomirintsitomocari casintaguetachari iriátë canta itingomibintanti Tosorintsi!

²⁵ Nanganquemi: opomirintsitomocari cameyo ingue otiomijaniquë omoro quitsapi, carari omomirintsitomotasantëmari casintachari iriátë cara igáanti Tosorintsi.

²⁶ Iraegui quemaiguëri yosamitëri:

—¿Aisonorico? ¿Pairo inganquima matsiguenga ora iragabisaicoontëma?

²⁷ Carari yotabitaiganaqueri Jesus:

—Quero icantiro matsiguenga yogabisaicota iriati, carari Irianti Tosorintsi inganquero antagaisati. Te omomirintsitomotimari Iriroro.

Ora imaiguëri Tosorintsi iraegui aguiatëri Jesus.

(Mt 19.27-30; Mr 10.28-31)

²⁸ Aique icanque Peroro:

—Ogometinari, pinguengaiguena naroequi. Nojoaiganaquero omagaro ora nasintaiga, noguiataiganaquemi.

²⁹ Icanqueri Jesus:

—Aisonori nangantaiguëmi: quero pitsipiriario. Aroca pintingomintimari Tosorintsi, pijocaiguëro pobango, pijina, pirentipague, piri, piniro, pitomipague, pisintopague, ingantocobentaiguëmi Tosorintsi. Aroca pingogasantë intingomibintimi Iriroro, iroro pijocaguëquero pairorapagueraca, quero pitsipiriario. ³⁰ Aroca pijocanëneri arosata yamai, imaiguëmi tojai yaca quibatsica. Aisati irágaiganaquemi canta Jonogaguitequë pintiomo-queri përosati.

Mabataque icomantaiguëri Jesus irogomere cara ingamaque.

(Mt 20.17-19; Mr 10.32-34)

³¹ Aique icaimaiguëri irogomere casiriconiati icantaiguëri:

—Yamai ajáiguë canta Jerosarënuë. Jirai isanguenatocotaiguëna comantantatsiripague, Naro paniacha Jonogaguitequë nomatsiguengatapë. Yamai omoncaraquima omagaro

isanguentocotaiguëna. ³² Ira joríojegui irácagantaiguëna ira basiniati matsiguenga cagari jorío irágobëna. Irisérontaiguëna, iratsipiriacagaiguëna, irijobataiguëna. ³³ Aisati iripasataiguëna, aique irógaiguëna. Carari ongaraque maba catagüiteri nanganiatanae aisati.

³⁴ Te irogóigue irogomere ora icomantëri Jesos tenta inguemaigueri; icométaigabacaro.

Jesos iniacagajiri comarajari Jericósati.

(Mt 20.29-34; Mr 10.46-52)

³⁵ Cara pënibaque irarepëmaro Jericó, Jesos iniopëri comarajari onamiquë abatsi yamanopiantëri matsiguenga imaigueri quirequi. ³⁶ Iquemaigabaqueri tojai matsiguenga yabisaiganaque, aro yosamitë:

—¿Pairi bocatsi?

³⁷ Icomantaiguëri:

—Coraque Jesos Nasaresati. Irabisanaque yaca.

³⁸ Aique icaibatanë comarajari, icanque:

—¡Jesos, Obiro imatsiguenga David, pingantaneintëgotina!

³⁹ Iraegui obaqueri Jesos isintsitsataiguëri icantaiguëri:

—¡Pomairete!

Carari aiquero iátanëtigue icaimasantanë comarajari:

—¡Jesos, imatsiguenga David, pingantaneintëgotina!

⁴⁰ Yaratngopë Jesos, icaimagantëri; cara yarepa, icampëri:

⁴¹ —¿Pairi picogui nanganquemi?

Icanqueri:

—Natingomi, nanintini piniacagajina.

⁴² Icanëri Jesos:

—Aro piniaje yamaica. Aroquenta piquemisanquina nagobiajiro cara piniaje aisati, aro naniacagajimi, nogabisaicotajimi.

⁴³ Aito cara inianai, yoguiatëri Ira Jesos, icaninabenqueri Tosorintsi, icanque:

—Iniacagajina Tosorintsi; icaninati Iriro.

Aisati icanta omagaro matsiguenga iniaiguëri, icanque:

—Aisonori, icaninati Tosorintsi.

19

Iniobëri Jesos Saqueo.

¹ Aique yarepa Jesos Jericóquë iquenaguequero. ² Ainta ira casintaguetachari jitacha Saqueo, itingomi coigotantatsiripague, icóicotaiguëri iguirequite imatsiguenga ipagantaiguëri igobeingarite Iromasati. ³ Ico Gabeca Saqueo iraneiri Jesos, carari te iraneiri iriantinta catsitiini. ⁴ Isiganaca ibataiguëri basini matsiguenga tojai, itanë anchatoque ora jitacha sicómoro arota iraneiri Jesos cara inguenopë. ⁵ Cara yarepa Jesos, inetsë jonoquë iniopëri Saqueo, icampëri:

—Saqueo, piguëpë omanapague. Yamai nocogui nantimoquemi pobangoquë.

⁶ Aro yaguëpë omanapague, icanqueri:

—Intsome nobangoquë.

Aro tojai icaninatanë Saqueo, ⁷ carari iniaiguëri imatsiguenga, yabentaiganaca igu-isaneintaiguëri icantobaganaca:

—¿Pairi iátasibiriqueri Jesos cara ingangoquë Saqueo tenta inganinate? Icantaguetasanti.

⁸ Aique yaratianque Saqueo icanqueri Jesos:

—Natingomi, nomagarantaguetaguëri coguitiachari aganguisati antagaisati ora nasinta. Aisati aintaca matsiguenga namatobiqueri nocositëri, naguipigaineri omagaro, aisati nomëri basini. Nocositërica patiro, aro nomairi otsibasati.

⁹ Icanqueri Jesos:

—Yamaica catagüiteri Tosorintsi yogabisaicotajimi obiro aisati iragabisaicotajiri pomatsiguenga yaca pongotsica. Aisatinta picantari ibega Abaram: piquemisanquero nanibare. ¹⁰ Iroro nipocasique, nopaniaca Jonogaguitequë nomatsiguengatapë. Nipocasique nongooque nagabisaicotajiri pairiraca quemisanquinane, ira terai irogótiri Tosorintsi.

Ira itingomi ipaiguëri iromeraro quirequi.

(Mt 25.14-30)

¹¹ Ira matsiguenga iquemaiguëri Jesos ora icanqueri Saqueo, yosiacagantëneri quingabagüerenti aroquenta yareca aronisati Jerosarënuquë aisati yoguiaiguëri matsiguenga cara omanapague itingomibintaiguëri Tosorintsi. ¹² Aro icantococa Jesos:

—Ainta paniro sérari caninari imatsiguenga itingomi, iriátë cosamani parigoti basiniquë quibatsi imeganëma itingomi iriati, aique iripigaima itingomibintaiguëri imatsiguenga iobeborotequë. ¹³ Teraiquerai iriátë icaimaiguëri iromeraro icarati 10, ipaguetaguëri

panirootipague paniro iguibe quirequi. Icantaiçuêri: “Jerica tojai naguireguite, nomirisi-tatimiri. Pomanantantimari, pomimante, pomitojaigenari irooti cara nopigaima”. Aique iáque imeganêma itingomi. ¹⁴ Carari aintapague imatsiguenga te intingomintimari, igu-isaneintaigacari, igáqueri sêrari iáque icantabepari ira cobeingari: “Teni nanintaigueri ira sêrarira intingombintaiguena naroegui. Quero poguiri natingomiegui”. ¹⁵ Carari ijiqueri itingomi; aique ipigapaa, icaimagantaiguêri iromeraro ira ipaguetaiganaque iguireguite. Yosamitêri panirootipague: “¿Pomitojaiguênari naguireguite?” ¹⁶ Aro ipoque ira obaqueri yosamitêri icampêri: “Natingomi, nomitojaiguêmiri piguireguite. Popanaquina paniro. Yamai ainta 10 basini”. ¹⁷ Icanqueri itingomi: “Caninataque. Picanque caninasati ora nococaquemi. Cani nopêmi arosata. Yamai nomêmi 10 poeboro pintangombintaiguenari matsiguenga cara”. ¹⁸ Aique ipoque basini iromeraro icanqueri: “Natingomi, nomitojaiguêmiri piguireguite. Popanaquina paniro; yamai ainta basini pabocorooti”. ¹⁹ Icanqueri: “Caninataque. Pintangombintaiguenari matsiguenga timaigatsi pabocorooti poeboroquê”. ²⁰ Aique ipoque basini iromeraro icanqueri: “Natingomi, jerica piguireguite. Noguêmiri caninasati noponatêri nobaaniotequê. ²¹ Nacanque negaca notsorocuemí nigóquiminta obiro te pingábintsante. Naji que aroca nomitojaiguerime piguireguite, págabitsaquinari omagaro. Nigóquimi pobiguiti cara te pomanguite”. ²² Aique yotabitanêri: “Te pinganinate; te pingantiro ora nocacagabequimi. Picantabeca te nangábintsante; nágabitsaquinari omagaro; nobiguiti cara te nomanguite. Pigótabecaro oca, iroro naguísaneintaguêquimi. ²³ ¿Pairo te pogobitiri naguireguite cara omisanriririquê quirequi? Poguerime cara, aintame yamai aisati basini quirequi imaiguêname ira omisanririri”. ²⁴ Aique icanqueri ira quemaiçuêri: “Págabitsatiri naguireguite, pomeri ira omisantênari 10 quirequi”. ²⁵ Icantaiçuêri: “Carari, Natingomi, aroque ainta tojai iguireguite”. ²⁶ Nangantaiguêmi: pairiraca inomoque tojai, imêngani basini, carari ira te irasintasantima, ira arosata inomotiri irágopitênganiri. Aisa ocanta Irinibare Tosorintsi. Aroca pinguengero pigótasantêro, oganinasêretêmi. Carari aintaca cantatsi: “Nigóquero antagaisati”, irari ira te ingogue inguemisantina, quero iquemina. Nágabitsaqueri ora iquemabeca, iromaguisanquero. ²⁷ Aisati icanque itingomi: “Yamai, iraegui quisaiquina, te iraninte intingomintina, pomaigapênari yaca pigamagaigueri catingsatiquê naro”.

Icanaque Jesus Jerosarênquê.

(Mt 21.1-11; Mr 11.1-11; Jn 12.12-19)

²⁸ Cara itsonquero quingabaguientsi Jesus, yogaganaca itonganaque aiquero Jerosarênquê. ²⁹ Cara pênibaque irarequimaro pite poeboro ora jitacha Betatajê aisati Betania, ora poeboro pini aronisatiquê oguitaja jitacha Olibos, igáqueri pite irogomere, ³⁰ icantaiçuêri:

—Pijáique catingsati poeboroquê. Cara pinganaque, piniopêri itiomijani boro itsatocotaga. Teraiquerai ingueicotigani. Pintsaicotiri pomapêri yaca. ³¹ Aintaca matsiguenga irosomitobêmica: “¿Pairo pitsaicobiritiri boro?” aro pinganêri: “Icoguirini Atingomi”.

³² Aique iáiguê iragátane, iniaiguêri aisa ocanta cara icanqueri Jesus. ³³ Cara itsaicosiguirí, ainta casintari yosamitaigabaqueri:

—¿Pairo pitsaicobiritaiçuêri noborone?

³⁴ Yotabitaiganaqueri:

—Icoguirini Atingomi.

—Aro páganêneri.

³⁵ Aro yágaiganaquineri Jesus, yoguêneri iguitsagarepague imiticaraqûê boro itiomijani, aro iqueicotanacari Jesus.

³⁶ Negaraca cara inguenaque Iríro, ira matsiguenga yogaguetaiguêneri iguitsagarepague cara abatsiquê arota iragaticanêro boro. ³⁷ Cara iparintaca yanonganaca oguitoja Olibos yoguetaiguêri tojai irogomere. Icaninabentaiguêri icaimaiguê, icantaiçuê:

—Tojai icaninatasanti Tosorintsi. Tojai naniaiguêro cara itasangobentopiantacái.

³⁸ Ainta Agabisaicoontatsiri. Intsome antingomintobêmarí. Intsome aniacaninatobêri. Igáqueri Tosorintsi aroquenta iniacaninatêri Iríro. Caninasati itimi omagaro Jonogaguite-sati. Caninari Tosorintsi jonoquênintaberi.

³⁹ Aintasati bariseopague itsibataigari arosonorí matsiguenga aguiataiguêri Jesus. Icantaiçuê bariseo:

—Ogomeantatsiri, piguimarentaigueri matsiguenga ira aguiataiguêmi.

⁴⁰ Yotabitaiganaqueri Jesus:

—¿Pairo naguimarentobitiri? Caninataque inganinabentaiguena. Iromairetaiguêca irirojegui, Tosorintsi irinibatacaquero mopêpague ontngominquina.

Iraicoqueri Jerosaresati Jesus.

⁴¹ Cara pênibaque irarequimaro Jerosarên, Jesus iraicotaiguêri Jerosaresati, icanque:

⁴² —Yamai nipocasitaigabitëmi. Tojai nocogabeca nantimacagaiguemime caninasati, nagabisaicotaiguemime arota quero iguisaiguimi Tosorintsi, carari te pinintaiguena obirojegui. Pitsoingaigabaquina, yamaica quero pineina nantingomibintaiguëmi. ⁴³ Aiquenta orequima cataguiteri cara ira quisaiguëmine irishongaigapëmi, iroticaiguëmi arota quero pisigaiga, iratsipiriacaigapëmi, ⁴⁴ irógaigapëmi obirojegui aisati pijaniquite, irogomeriguëtëro omagaro pongotsiegui, quero pini yaca pite mopë otsibatobagaja. Ingantaigapëmiro negaca aroquenta nipocasitaigabitëmi, nantingomibintaiguemime, carari te pinguemisantina, te pintingomintaiguena, iroonti pitsoingaiguëna. Iroso aiquenta Tosorintsi iragátaiguëmi tojai soraro iripoguiriaiguëmi.

Ira Jesus ijocaiguëri pimantatsiri cara ibangoquë Tosorintsi.

(Mt 21.12-17; Mr 11.15-19; Jn 2.13-22)

⁴⁵ Aique iáque Jesus cara oquibequë ibango Tosorintsi, icanaque, iniaigapëri iraegui pimantaguetatsi aisati manantatsiri, iguisaigapëri ijocaiguëri. ⁴⁶ Icantaguëri:

—Aiti osanguenata jirai, icanque Tosorintsi:

Nocogasanti pomanocotaiguena yaca nobangoquë.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

Aro itsonque ijocaiganaqueri. ⁴⁷ Antagaisati cataguiteri yogomeanti Jesus cara ibangoquë Tosorintsi. Carari iguisaneintaiguëri itingomipague saserirotijegui aisati ira ogomeantiro isanguenare Moisés aisati obatatsiri, yosaminatobaganaca:

—¿Atiroco anganqueri Jesus, agamagaiguëri?

⁴⁸ Carari te irogóigue atiraca inganqueri arosonorinta matsiguenga aguiataiguëri, iquemisantaiguëri itingomintaigacari.

20

Yosamitaiguëri ira Jesus joríojegui: “¿Pairi agáquemi?”

(Mt 21.23-27; Mr 11.27-33)

¹ Patiro cataguiteri yogomeanti Jesus cara oquibequë pongotsi irasi Tosorintsi. Cara icomantaigaseguiri matsiguenga atiraca ingantima iragabisaicotaiguëri Tosorintsi, ipocasitaiguëri itingomipague saseriroti aisati ira ogomeantiro isanguenare Moisés aisati antiasipari, ² Icantaguëri:

—Pimantaiguena: ¿Pairiraca agáquemi cara pijocaiguëri pimantatsiri? ¿Pairi oguëmi obiro cara pijica itingomi?

³ Yotabitaiguëri Jesus:

—Aisati Naro, patiro nosamitaiguëmi. Pingomantina Naro: ⁴ ¿Pairi agáqueri Joan cara ibaotisaiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga?

⁵ Icantobagaiganaca jorío:

—Anganquerica: “Igáqueri Tosorintsi”, aro ingancái: “¿Pairo te pinguemisantobitaigueri Joan?” ⁶ Carari aroca anganqueri: “Igáqueri matsiguenga”, aro inguisaigacái caegui omatsiguengaca, iribasegaigacái mopëquë ijitaiguënta cara igáqueri Joan Tosorintsi ingomantagueantë.

⁷ Aro yotabitaiguëri:

—Teni nogóigue pairi agáqueri.

⁸ Aique icantaiguëri Jesus:

—Aisa Naro, quero nocomantaiguimi pairiraca agáquina nangantagueantë ocapague piniaiguëca.

Jesus icantocoqueri jorío aisa icancari ibega catsimari ira omisantiro obasi.

(Mt 21.33-44; Mr 12.1-11)

⁹ Aisati iparintaca Jesus iquenguitsataiguëri matsiguenga. Yosiacagantëneri icantaiguëri: —Ainta sërari panguiquero obasi, yogaiguëri omisantinerine irobasite. Iquengaigaca cara onguitsotanëca, ira omisantineri iráquero aganguisati oba, imagantëri casintaro aganquisati. Aique iáque jaanta itimaque cosamani. ¹⁰ Cara omoncaraca cara oracanë oguïtso oba, igátabecari iromeraro icanqueri: “Pijáte, pingampëri ira omisantino nobasite imagantaiguenaro nasiati”. Carari ira omisantiro yágaigabaqueri ipasataigabaqueri. Yoguipiguëri, te imëmatiri oba. ¹¹ Aique igátabecari basini iromeraro. Iriro aisati ipasataigabaqueri icantaguetobëri ora catsimaro, yoguipiguëri. Teatisati imaiguëri oba. ¹² Ira casintaro obasi igátabecari basini iromeraro. Yágaigabaqueri yámasitaigabaqueri ijocaiguëri sotoquë obasi. ¹³ Aique iquianca casintaro obasi, icanque: “¿Pairo nanganque yamai? Ajaa, nigóti. Nagáqueri notomi, ira nanintasanti. Irirojengari iraniacaninataigabaque”. Aro igáqueri itomi. ¹⁴ Ira omisantineri irobasite iniaigabaqueri itomi, inibatobaca: “Irironta itomi

casintaro. Cara ingamaquenica iriri, iriroquerai ágairone obasi. Intsome ógaigabaqueri, águirota obasi asintaiguemaro eiroquerai”.¹⁵ Aro yágaigabaqueri, yáganëri sotoquë obasi, yogamagaigabaqueri. Yamai, ¿Pairo pijique inganqueri ira casintaro? ¿Pairo ingantaiguëri ira catsimari? ¹⁶ ¿Teco iriátë iriro, inguisasantaiguëri omisantiro irobasite, iripoguiriaguëri? Aique irogaiguëri basini caninari ira omisantainerine irobasite.

Aro icantaiguë ira quemaiguëri:

—¿Querota pini negaca!

¹⁷ Inetsaiguëri Jesus, icantaiguëri:

—¿Pijitabeca quero pabisi? ¿Paioroco ocanti Sanguenari cantatsi:

Jirai itsoingaguëro mopë ira obetsiquorori mopëpongo, ijoquero tenta irogóiguero cara icoiguëro Tosorintsi iroonti otingomi mopë, otingomi pongotsi, cantaca otingomipoa pongotsi?

¹⁸ Pairiraca pariaquenguitsine yaca mopëca ocaraaque itongui; pairiraca otsinaque oca mopëca obichaqueri onganqueri pojongabatsari. Naanti osigaro mopë otingomi nacantocotaiguëmiro; queroca pigótina, pitsipiriaque; queroca piquemisantina, pijáque Sharincabeniquë. Pairiraca comëtobënanë, iripoguirianguengani.

Yogomequeri Jesus ira bariseo cara inganquineri itingomi ora icoicoqueri.

(Mt 21.45-46; 22.15-22; Mr 12.12-17)

¹⁹ Aro iquemaigabaqueri Ira Jesus ogomeantiro isanguenare Moisés aisati itingomipague saseriroti, icogaigabitaca irácagantëtime igóiguënta cara Jesus iquenguitsatocotaiguëri irirojegui carari te iráguiri itsorogaiguërinta matsiguenga. ²⁰ Iroro ora inetsaguëqueri jorío ira Jesus, aisati igátaiguëri sërari icanqueri:

—Pijáigue, pomatobitiri Ira Jesus. Pingantomemegapëma cara pingoguirome pigóiguero ora aisonori, pingoguirome pinguemisantaiguero, carari pingomëtaguiri irinibare. Aroca ingomëtëma pisiguima pingomantina. Aique naroequi nongomantëri cobeingari arota inguiseri Jesus.

²¹ Aique iáiguë. Icantaigapëri Ira Jesus:

—Ogomeantatsiri, nigóiguë aisonori pogomeantiro Irinibare Tosorintsi, aisati poniaguinaro catinasati atiraca ongantima aretaiguëmari Tosorintsi. Te pintsorogui pairiraca. ²² Yamai nosamitëmi: ¿Caninataqueco omëri Sésar aguireguite? ¿Teco onganinate omagantiri cobeingari cara Iromaquë?

²³ Igóque Jesus cara icogaigabitaca iromatobitirime irantacaguirime ora te ongomeite. Icantaiguëri:

—¿Pairo picogobiti pingomëtaguinario nanibare? ²⁴ Poniaguinari quirequi ira tenario pipënantiriri Iromasati.

Aro yamaigapëneri quirequi ira jitacha tenario. Yosamitaiguëri Jesus:

—¿Pari casintaro oca irosiacagomentoca? ¿Pari ijita sanguentëgotënguicha yaca tenario, iroonti iripajiro?

Yotabitanëri jorío:

—Iroonti irasi Sésar nogobeingarite.

²⁵ Aro icantaiguëri Jesus:

—Aro, pomaiguëri Sésar iraisati, pingantineri ora icocagaiguëmi, pinguemisantiri. Aisati pinguemisasantiriri Tosorintsi pomaiguëri ora iraisati, ora icocagaiguëmi Iriro. Pintingomintasantimari.

²⁶ Tigueti ingantima ingomëtaguiri Jesus irinibarequë catinasatiquë matsiguengajegui. Iquenganeintasantaigacari jorío cara caninasati yotabitanëri, aro imairetaiguë.

Aisonori inganiatanae igamaga.

(Mt 22.23-33; Mr 12.18-27)

²⁷ Aisati iátasitaiguëri Jesus saroseopague, ira ijitasitaiga cara quero icabiritaja igamaga, quero icaniatana. ²⁸ Icantaigapëri:

—Ogomeantatsiri, jirai isanguenataiguëna Moisés:

Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguëma itomi ireintitomaco.

²⁹ Jirai ainta sërari aisati ireinti icarati 6. Ira obatatsi yágabitaca iina, carari te irine itomi. Aique icamaque iriro. ³⁰ Aro iina yágairo ireinti. Aisati icamaque iriro te irine itomi.

³¹ Aisati icantaigaca ireintiegui yágaigabitaro tsinane, icamaiguë omagaro, teni irinëmate itomi. ³² Aique ocaaque tsinane aisati. ³³ Cara ingabiritaigaima, ¿Pari ágairone? Pinetse, ijinantaigabitaro antagaisati ireintiegui.

³⁴ Icantaiguëri Jesus:

—Aisonori, yaca quibatsica yameta sërari yáguero iina. Aisati tsinane págui ojime.

³⁵ Carari cara itimi Tosorintsi, paniro iraretima iragui iragabisaicoque Tosorintsi yaca

quibatsica, iraniacaninataiguëri. Iraganiatairi intiomopëri Tosorintsi carari quero yágai iina. Aisati tsinane, quero págai ojime. ³⁶ Canta queroootisati icamaji, Tosorintsi intom-intaiguëmari përosati iraganiataiguëri. Irianti aisati ingantaiguëmari ironomire Tosorintsi irisaanganetsite ira quero icami aisati. ³⁷ Jirai igóque Moisés cara ingabiritaiguëma igamagaëgi. Isanguenaque cara yoniagapari Atingomi cara otiomijaniquë anchato otaaga, icampëri:

Naro Tosorintsi. Iquemisantina Abaram. Iquemisantina Isac. Iquemisantina Jacob.

³⁸ Pinetse. Te ingante: “Iquemisantabequina”. Aroca iquemisanqueri Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi.

³⁹ Aro icantaiguëri ogomeantiro Sanguenari:

—Ogometinari, caninaro oca picantaiguëna.

⁴⁰ Aique itsorogaiguë irosomitaigairi Ira Jesus aisati.

Quirisito imatsiguenga David.

(Mt 22.41-46; Mr 12.35-37)

⁴¹ Aique icantaiguëri Jesus aisati:

—Obirojegui picantaiguë: “Ira Agabisaicoontatsiri imatsiguenga David”. ¿Pairo picantobiti negaca? ⁴² Iriati David isanguenatoqueri Quirisito jirai cara sárimoquë:

Ira Tosorintsi icanqueri Natingomi: “Pisobigue yaca nobacosonoriquëca. ⁴³ Pintsibatina yaca nagáantomentoquëca irooti cara nagabeiri antagaisati ira quisaiquëmi, irajitaiguëmi Itingomi”.

⁴⁴ Aique yosamitaiguëri Jesus:

—Iiroca Quirisito Itingomi David, ¿Pairo pijitobitaiguëri Iriro imatsiguenga David? ¿Pairo te pijitobitiri Pitingomi obirojegui aisati?

Icanque Jesus: “Pigamemari ira ogomeantiro isanguenare Moisés”.

(Mt 23.1-36; Mr 12.38-40; Ir 11.37-54)

⁴⁵ Cara iquemisantaigaseguiri Jesus matsiguenga botobiritaigari, icantaiguëri ira irogomere:

⁴⁶ —Pigamaiguemari ira ogomeantiro isanguenare Moisés. Icoagaui iranëitagueantimaro imanchaqui oquibeintsa; icogasantaguë iriáiguë cara opimantagani pairoraca arota iraniacaninataiguëri matsiguenga; aisati icogaiguë iragasobicaiguëri caninaroquë sobicomentotsi cara yapatotaiga jorío. ⁴⁷ Aisati yágabitsaqueru obango ogamaimentaga iroontita cosamani yamanocotasitari Tosorintsi arota iraniacaninataiguëri matsiguenga. Carari nongomantaiguëmi ira cantatsi negaca iratsipiriasantaiguë irabisaiquëri basini matsiguenga tojai ingasitigatëri Tosorintsi.

21

Ora tsinane opëri Tosorintsi antagaisati oquireguite.

(Mr 12.41-44)

¹ Ainta Jesus oquibequë pongotsi irasi Tosorintsi. Inetsaiquëri casintaguetachari cara yomingaiguiri iguireguite yogantaririquë quirequi ipëngani Tosorintsi. ² Aisati inioberó tsinane ogamaimentaga pomianqueri pite itiomijani iguitso quirequi ira te iripënatima.

³ Icanque Jesus:

—Nangantaiguëmi, aisonori ora ogamaimentaga te aisa ongantaiguemari basini paiguëri Tosorintsi iguireguite. Arosataanti quirequi opëri iroro, carari Tosorintsi iniacanatëro pabisaiquëri basini. ⁴ Iraegui basini ipaiguëri Tosorintsi arosata ira inomotaiguiri, aintaquerai tojai yoganontaiga. Carari opabacari Tosorintsi aisati opëri antagaisati pasinsiga inomotiro, teni irinaje basini omanantantajima operi.

Icanque Jesus ogomeriguëtëngani ibango Tosorintsi.

(Mt 24.1-3; Mr 13.1-4)

⁵ Inibatobaganaca irogomere Jesus, icantaiguë:

—¿Teco onganinatasante ora ibangora Tosorintsi? Pobetsiquëtëngani mopëpague oquibe aisati poganinaguetiro, aisati yoganinatancaro ora ipaiguëri Tosorintsi.

⁶ Aro icantaiguëri Jesus:

—Aiquenta irogomeriguëtaiguëro antagaisati ora piniaguë yamai. Quero pini pite mopë otsibatobagaa; omagaro ogomeriguëtëngani.

⁷ Yosamitaiguëri:

—Ogometinari, ¿Atiraca ongantima cara irogomeriguëtëro orapague pongotsi? ¿Pairo ogótacaquinane cara omoncaraquima antagaisati picantocotaiguëna?

Icanque Jesus: "Aiquenta omomirintsitomoquimari matsiguengajegui".

(Mt 24.4-8, 23-27; Mr 13.5-8)

⁸ Aisati icantaiguëri irogomere Jesus:

—Pigamaiguema arota quero yamatobitaiguimi. Iriboquë tojai matsiguenga ingantaiguëmi: "Naro Quirisito", aisati "Igåquina Quirisito nongomantëmi pënibaque irarequima Irro". Quero piquemisantaiguiri, quero poguatiiri. ⁹ Pinguemocotaiguëro omanátobagachari; ingantaiguëmi: "Yomanátobagani canta jaanta". Ira basini irojocaguëri itingomipague irogaiguëri irirai itingomi. Quero iquengaiganaja matsiguengajegui carari quero pitsorogaigui: aiquenta onganquima tojai inguisabacaquima irógobaquima, carari queroquerai omocarata omagaro ora nacantaiganaquemi. ¹⁰ Aisati nangantaiguëmi: aiquenta matsiguenga inguisaiganaqueri basiniati matsiguenga, inguisëgotobaganëma irógobaquima. ¹¹ Aisati tojai osebataguetanëma quibatsiquë. Aitosati iritasegaiguë tojaisonoru matsiguenga omagaruoguitequë; ontojaiganaque janatigantsipague; ingamaiguë tojai matsiguenga; intsorogaiganaque omagaro; cara jonoquë iraniaiguëro cobeingaguiteri ora te oneingani jirai.

Tojai inguisaguetaiguëri ira quemisantatsiri.

(Mt 10.17-22; 24.9-14; Mr 13.9-13)

¹² Përosati icomantaiguëri Jesus:

—Carari iritsite quisaguetaiganaquemine, irágaiguëmi, iratsipiriacagaiguëmi, irágaiganaquemi cara pongotsiquë cara yapatotaiga, iromingaguëmi iromingamentoquë. Irágaiganaquemi catingasatiquë itingomipague inguisatsaiguëmi aroquenta piquemisanguina Naro. ¹³ Aro pinguenguitsatocotina, ati ongantima nagabisaicotajiri cara inguemisanquina. ¹⁴ Quero pitsoroguiri, quero piquenga: "Aroca iráquena, ¿Pairoroco nanganqueri?" ¹⁵ Nogósëretacaquemi Naro ora pinganque. Onibataquemi Isëre Tosorinti arota quero igóti ipëgatsatimi ira quisaguëmine. ¹⁶ Irácagantëmi piri aisa piniro aisati pirentipague aisati pitsiropague, aisati irácagantëmi pomatsiguenga, omagaro. Irógarantaguequimi porocague. ¹⁷ Piquemisantaiguënanta, inguisaiguëmi matsiguenga. ¹⁸ Aroca iróquemi, quero opega patiro piguisi piguitoquë. Pijáiganaque Jonogaguitequë Tosorintsiquë. Quero atira picantëmata. ¹⁹ Cara iratsipiriacagaiguëmi aroca përosati pinguemisanquina, pintiomoquina Jonogaguitequë.

Icanque Jesus: "Iritsongaiguëri Jerosaresati soraro".

(Mt 24.15-22; Mr 13.14-20; Ir 19.41-44)

²⁰ Aisati iquenguitsatomotaiguëri Jesus:

—Cara piniagabaquerica soraro irishnguiguëmaro Jerosarén, aro pigóiguë pënibaque iritsongaguëro poboeborote. ²¹ Aique iraequi inasegatsine Joreaquë, irisigaiganaquimata cara otisipaguequë; iraequi inasegatsine Jerosarénquë irisotocaiganaqueta; iraequi inasegatsine togantsiquë quero ipigapaa poeboroquë. ²² Aro omoncaraquima antagaisati ora isanguenaque jirai cara ingasitigaiguëri Tosorinti omagaro tsoengatsiri. ²³ Tojai otsipiriaganaquero tsinane ora pënibatasegatsine aisati tsotagasegatsine ojaniquite queronta pisigasantanaca. Tojaisonoru iraniacatsigatëmaro Jerosaresati tojainta ingasitigatasantaiguëri Tosorinti. ²⁴ Iromanátaigapëri, ingamaiguë tojaisonoru jorío. Aisati irágaiganaquengani tojai Jerosaresati parigotipaguequë, iromerataigabaquimari. Ainta basiniati matsiguenga cagari jorío imaniaiguëma basiniatipaguequë quibatsi, intimaigapë Jerosarénquë irooti cara omoncaraquima antagaisati ora icantocoqueri Tosorinti jirai, irooti cara inganque: "Antagati".

Atiraca ongantima cara iripigaima Jesus.

(Mt 24.29-31; Mr 13.21-27; Yon 6.12-14)

²⁵ Përosati icantaiguëri Jesus:

—Aique cara pënibaque nopocaje Naro, imasiniatitanë omagaro iraequi jonoquëni: intstitinane paba aisa manchacori; imariaguëpë jonogasaki. Piniaguëro ora te oneingani jirai. Antagaisati matsiguenga timaigatsi yaca quibatsica intsorogasoiganaque cara inguemaigabaquero cara ojigocanëma oquibeguinte angaarepague aisati cara omotoncaatasantanë oquibeguintesonori. ²⁶ Aisati osebatëma omagaro Jonogaguite. Intsorogasoiganaque antagaisati matsiguenga, ingamëmanataiganaque inguengaiguëma: "¿Pairoraca basini onganquima? ¿Atiraca anganquima eiro?" ²⁷ Aique iraniaigabaquena Naro, Naati nopaniaca jirai Jonocaguitequë nomatsiguengatapé, nopogopë mingoriquë, nongobeingatasannotapé nosangueguitetasannotapé, nantingomibintasantaiguëri omagaro, nagabeiri antagaisati. ²⁸ Cara piniagabaquero omarintëma ocapague nocomantaiguëmica yamai, pinganinataigue, pinetsaigabaquima; pënibaque nopogopae notsonquemiro nagabisaicotasantaguëmi, quero pitsipiriagai aisati.

Ora ogóontëngani orequima cara intingomibintaiguëri matsiguenga Tosorintsi.

(Mt 24.32-35; Mr 13.28-31)

²⁹ Aitosati icantaiguëri irogomere Jesus:

—Aisati nosiacagantëmiro anchato jitacha iguera. Pinetsero iguera aisati omagaro basini anchatopague. ³⁰ Cara iroraini otsego, ositanae osi, aro pigóiguë pëmbaqué osariganaje. ³¹ Aisa ocanta, cara piniagabaquero ocapague nacantocotaiguemica, pigóontëmaro omanapague orequima cara Tosorintsi intingomibintaiguëri matsiguenga yaca quibatsica. ³² Nangantaiguëmi aisonori: queroquerei icamaigui joríojegui tsoengantatsi queroquerei omoncarata ocapague nocomantaiguëmica. ³³ Omeganëma omagaro inatsi jonoquë aisati omeganëma oca quibatsica, carari quero opega nasi nanibare. Omoncaraquima omagaro ora nacantaiguëmi.

Icantaiguëri Jesus: “Pigamaiguema pigueina”.

(Mt 24.36-44; Mr 13.33-37)

³⁴ Aisati icantaiguëri:

—Pigamaiguema. Nomabocapaimi. Quero picantiro ora te omitocotimi, quero pisin-guitaiga, quero pogasëretocotaquetaro orapague inatsi yaca quibatsica ³⁵ arota quero pogu-ipasiguitimi cataguiteri cara nopocaje. Omabocaiguëri omagaro matsiguenga ira te iraga-maiguema. ³⁶ Pigamema, pingaguite, pomanocotaiguëri Tosorintsi arota iromitocoiguëmi pingantiro ora caninaro, pintiomotaigabaquina, arota quero pitsipiriaro omagaro nocomantaiguëmi.

³⁷ Aro cara cataguiteri quë yogomeantë Jesus oquibequë pongotsi irasi Tosorintsi; cara ochapinitanë, íaque oguitojaquë jitacha Olibos, itimaque cara. ³⁸ Oquëtaguetanë íatasitaiguëri matsiguengajegui cara ibangoquë Tosorintsi, icogaiguë inguemisantopi-antaiguëri.

22

Iquengaigaca saseriroti cara Joras irácagantëri Jesus.

(Mt 26.1-5, 14-16; Mr 14.1-2, 10-11; Jn 11.45-53)

¹ Pëmbaqué orequima cataguiteri pague jitacha Pásicoa cara yapaiguero joríojegui ora pan te ine piponganta, aisati iquengaigaca cara isotocaiguë Ejiptoquë jiraisonori. ² Icoagaigabitaca iróguirime Jesus itingomipague saserirotijegui aisati iraegui ogomeantiro Sanguenari, icantobaca:

—¿Ati anganqueri ágagantiri Jesus agamagaiguëri? Intsome angantiro comanoroni querota iguisaigái matsiguenga iniacaninatërinta Jesus.

³ Aique ira Satanás camagari íatasiqueri Joras Cariotisati, ira yogometabeca Jesus; yago-biopëri yogomequeri irácagantëri Itingomi Ira Jesus. ⁴ Aro Joras íatasiqueri itingomipague saseriroti, icampëri:

—Nomitocoquëmi págaiguëri Jesus.

⁵ Icaninatasantaiguë, icantaigabaqueri:

—Aro, caninataque. Aroca águëri, aro nomaiguëmiri quirequi.

⁶ Iquengaigaca. Aro icanque Joras:

—Aro. Nanetsëri; aique nongomantaiguëmi ati ongantima págagantëri comanoroni. Quero iniaiguëmi matsiguenga.

Yobetsiquëri Jesus cara icarantacaro yapë.

(Mt 26.17-19; Mr 14.12-16)

⁷ Pareca Pásicoa cara yametaiga joríojegui yóguëri oisha aisati icantaigari ibega jorío jiraisonori Ejiptoquë. ⁸ Aro Jesus igátaiguëri Peroro aisati Joan, icanqueri:

—Pijáigue, pobetsicaiguero cara opaiguë Pásicoaquë.

⁹ Yosamitaiguëri pitirooti:

—¿Nega pininti nobetsiquëmiro?

¹⁰ Icantaguëri Irero:

—Cara pirequima Jerosarénquë, piniopëri sërari yágotëro nija. Piguiatiri irooti pongot-siquë cara inganaque. ¹¹ Aro pingantaiguëri casintaro pongotsi: “Icanque Ogometinari: ‘¿Nega pini cara nopaguë Pásicoaquë, Naro aisati nogomerejegui?’ ” ¹² Ironijagaiguëmiro oquibe coarito jonoquë; aito pobetsiquëro perintsi asi Pásicoa.

¹³ Aique íaiguë, iniaigapëri sërari aisati omagaro aisa ocanta icantaiguëri Jesus. Yobetsi-caiguëro Pásicoa.

Yogomeantë Jesus cara irapapinintobiqueri quemisantatsiri aisati irógobitaiguëmari.

(Mt 26.20-29; Mr 14.17-25; Jn 13.18-30; 1 Co 11.23-26)

¹⁴ Aique cara ochapinitanë yaretaigapa Jesos aisati irogomere, isobicaigapë mesaquë yapaigapë. Icanqueri:

¹⁵ —Tojai nocoque nopaaganaimi oca Pásicoa cara queroquerai nacami
¹⁶ nangantaiguëmintä cara quero napairo aisati irooti cara omoncaraquima omagaro isanguenatocotaiguëna cara intingomibintanque Tosorintsi iragáantanequë.

¹⁷ Aro yáguëro ógomentotsi, icarasiaqueri Iriri, icantaiguëri:

—Jeroca, pógaiguemaro obirogeui ¹⁸ nanganqueminta cara quero nógaaro obaa aisati irooti cara iragáantanequë Tosorintsi.

¹⁹ Aique yáguëro pan, icarasiaqueri Tosorintsi, itibatsaguequero, yotsatengaiguëri irogomerejgeui. Icantaguëri:

—Jeroca pan osigaro nobatsa. Popaiguero. ¿Teco nangamobitaiguemi? Nocogui cara popapinitaiguëro pan pinguengasëretapinitaiguëna cara nacamobiquemi.

²⁰ Aro yapaiguëro. Aisa yáguëro ora yóganta obaa, icanque:

—Jeroca obaa, pógaiguemaro. Iroero osigaro naraa ora naraatobitanëneri omagaro matsiguenga cara nangamobitaiguëri. Yamai naraa ocanti irorai Nibarintsi; iroero ingábintsanguëmari Tosorintsi cara icanque jirai. Cara irabentaiguëna matsiguenga inguemisanquina, Tosorintsi irojocajineri ora icantaguëti te onganinate, quero iquen-gaineri aisati. Cara pógapinitaiguëmaro obaa pinguengasëretaguëna cara nacamobitaiguëmi arota iragabisaicotajimi Tosorintsi. ²¹ Yamai ainta yaca yapëgotëna ira ágagantënane. ²² Nopaniaca Naro Jonogaguëtequë, nomatsiguengapë yaca quibatsica. Omoncaraca omagaro isanguenatocoquina jirai Sanguenariquë. Irari atsipiriasantërone ira ágagantënane.

²³ Aro iparintaigaca irogomere Jesos yosaminatobaca iriatiegui:

—¿Pairiraca ágagantërine?

Icomantë Jesos pairi obaquenguitsine.

(Mt 18.1-7; 20.25-28; Mr 9.33-37; 10.42-45; Ir 9.46-48)

²⁴ Aique icantobaganaca irogomere Jesos pairiraca obaquenguitsine irorojeguë.

²⁵ Icantaguëri Jesos:

—Pigóiguë cara yametaiga basiniati matsiguenga ira cagari jório itingomintaigacari itingomipague, iriro cantënguicha itingomi merataigari imatsiguenga. Icantasitaigaca: “Nomitocoiguëri natiriteeguë”. ²⁶ Carari quero aisati picantagari ibegaiga iriro. Pinin-tica piguibatima obiati, quero piquenga obiati caninari pabisiri basini. Pomitocoiguëri pomatsiguenga, pingábintsaguëtaiguëri, quero pimeratari. ²⁷ ¿Pairi obatatsi, iraco sobigatsi mesaquë, iraco mapënerine iraperi? Pigóiguë ibaque ira sobigatsi mesaquë, yapi, imer-atari iromeraro ira mapënerine iraperi. Carari te nomerataiguëmi Naro, Naanti cantaca pomeraro. ²⁸ Coshoni pogaiguëna jirai, pitsibataiguëna cara yobomirintsitapinincái omatsiguenga; ²⁹ aiquenta nomaiguëmi pintingomibintante aisati nacanta aroque ipëna Pabati cara natingomibintanque. ³⁰ Pintsibataiguëna, popëgotaiguëna aisati pógaiguëma canta nantingomibintanque, aisati antingomibintaiguëri omagaro jório imatsiguenga itomi Jacob icarati 12.

Jesos icomantëri Peroro: “Yamaica tsitinirica mabataque pinganque: ‘Teni nogótiri Jesos’”.

(Mt 26.30-33; Mr 14.26-31; Jn 13.36-38)

³¹ Aique icanque Atिंगomi:

—Simón, Simón, icogui Satanás iraniantëmi aisonorica piquemisanquina. Icogui irantacaquemi ora te onganinate. ³² Carari namanocoquemi iromitocotimi Tosorintsi irosintsisërequimi querota pijoquiro cara piquemisanti. Aiquenta, cara pijocajiro ora picantaguëti te onganinate, piganinasëretaguëtiri popiquemisantane, pomitocotaguëtiri, pinguemisantasantacaguëri.

³³ Icanqueri Peroro (Simón):

—Natingomi, naguiatëmi përosati. Aroca iromingaguëna, irógaiguëna aisati, quero nojocanëmi naro.

³⁴ Icomantëri Jesos:

—Nanganquemi, Peroro: yamaica tsitinirica queroquerai icaimi tiapa sërari, ongaraque maba pinganque: “Teni nogótiri Ira Jesos”.

Omoncaraquima omagaro ora isanguenatocoquengani Jesos.

(Ir 9.1-6)

³⁵ Aisati icantaiguëri irogomere Jesos:

—Jirai nigátaiguëmi piáiguë piquenguisatomotagueiguëri matsiguengajegui, nacanquemi: “Quero páganëro pitsaguine, querootisati poperi, querootisati basini pisapatote”. Yamaica nosamitëmi: ¿Pitsipiriauiguë? ¿Aiti coguitiomoquemi?

Yotabitaiguëri irogomere:

—Tesonori.

³⁶ Aro icanqueri Jesus:

—Carari yamai nangantaiguëmi: aitica pitsaguine, páganëro, aisati aitica pomotsirate páganëro. Piguireguita aisati. Teca ine pisabirite, pomimantiro basini piguitsagare pomanante patiro sabiri. ³⁷ Nangantaiguëmi cara omoncaraquima ora isanguenatocoquina jirai Isaías:

Itsibatacarari ira cantaguetiro ora te onganinate.

Aisonori, omagaro isanguenatocotaguequina omoncaraquima.

³⁸ Aique icantaigapëri:

—Natingomi, pinetse. Jeroca pite sabiri.

Icanque Jesus:

—Aroque, antagati, moncaraca.

Cara Jetsemaníquë Jesus yamanaqueri Iriri.

(Mt 26.36-46; Mr 14.32-42)

³⁹ Aique, cara yameta Jesus, íaque oguitojaquë jitacha Olibos. Yoguiataiguëri irogomere-jegui. ⁴⁰ Cara yaretaigapaa, icantaiguëri:

—Pingaguitaigue, pomaniri Tosorintsi cara iromitocoiguemi quero picantaguetiro ora te ongameite.

⁴¹ Aique yogaganaca arosata caraquerora, yobaticagueritotasipa, yamanocopëri Iriri:

⁴² —Pabati, teni naninte natsipirie, carari quero nancantiro ora nocogabeca Naro, iroonti nanganquero ora picocaquena Obiro.

⁴³ Aique ipocasipëri ironomire Tosorintsi imitocopëri yosintsitëri. ⁴⁴ Tojai yogasëretasanotaca, itsipiriasëretasantaca, aisati yamanocotasantëri Iriri. Tojai imasobique, opariaatë imasobire quibatsiquë cantaca iraraa. ⁴⁵ Icabitaja, ipigapaa cara isamaigasegui irogomere. Carani yogasëretasantaiga, iroro imagotaguëtaiguë.

⁴⁶ Icantaguëri:

—¿Pairo pisamabiritaiguë? Pingabiritaiguema pomanague arota quero picantiro ora te onganinate.

Cara yáganëngani Jesus.

(Mt 27.47-56; Mr 14.43-50; Jn 18.2-11)

⁴⁷ Aintaquerari inibatasegui Jesus cara yaretaigapa tojai matsiguenga. Ibataiguëri Joras, irianti irogomere Jesus, iátasipëri Jesus yasaboropari. ⁴⁸ Icabëri Jesus:

—Joras, ¿Págagantënanico cara pasarapëna? ¿Teco pigóte Naro paniacha Jonogaguetequë, nomatsiguengatapë?

⁴⁹ Aro iniaigabaqueri ira tsipataigari Jesus. Yosamitaiguëri:

—Natingomi, ¿Picoguico nopëgabentaiguemi nacarataiguëri?

⁵⁰ Aro paniro irogomere yáguero isabirite itoguimitatobëri iguemitonori ibimantaga itingomi saseriroti. ⁵¹ Icanqueri Jesus:

—¡Aroque, antagati! ¡Quero pintiri basini!

Aique yotsagaquineri iguemita, yogagubegajiri.

⁵² Jesus icantaigabaqueri itingomipague saseriroti aisati ira itingomipague sorarojegui omisanitiro ibango Tosorintsi aisati antiasiparipague, icantaiguëri:

—¿Pairo pamasibiriquinaro pisabirite aisati anchaqui? ¿Pijiquinanico Naro cosirinti?

⁵³ Omagaro cataguitëri piniagabitëna cara nogometaguëmi cara ibangoquë Tosorintsi, te pingantëmatina. Carari omoncaraca yamai págaiguëna aisati iragabianque camagari itingomibintanque arosata.

Icanque Peroro: “Teni nogótiri Jesus”.

(Mt 26.69-75; Mr 14.66-72; Jn 18.15-18, 25-27)

⁵⁴ Aique yágaiganaqueri Jesus cara ibangoquë itingomi saseriroti. Yoguiataiguëri Peroro icarantanë panirooti. ⁵⁵ Yogamataiguëro tsitsi cara saaguiteroquë tsomagui tantotsi. Isobicaigapë, Peroro aisati. ⁵⁶ Cara isobicasegui Peroro, oniasantëri tsinane obimantaga itingomi saseriroti, ocanque:

—Ica aisati yoguiatëri Jesus.

⁵⁷ Carari icanquero Peroro:

—¡Cagarina naro! ¡Teni nogótiri!

⁵⁸ Aique arosata, iniaqueri basini, icanque:

—Aisati obiro aguiatëri Jesus.

Carari icanqueri Peroro:

—¿Teni naguiatiri, teni nogótiri!

⁵⁹ Aique ocosamanitanë arosata, icanëri basini:

—Aisonori yoguiatëri ica sërarica, irianti Garireasati.

⁶⁰ Carari icanqueri Peroro:

—Teni nogóte pairoraca picanquina.

Iroontita inibasigui Peroro, irooti cara icaimanë tiapa sërari. ⁶¹ Aro inebintanaca Atin-gomi inetsëri Peroro. Aito cara iquianquero Peroro cara icomantëri Jesus: “Queroquerei icaimi tiapa sërari yamai, mabataque pinganque: ‘Teni nogótiri Jesus’”. ⁶² Aro isotocanai Peroro iragasantaca.

Isërontaigacari Jesus.

(Mt 26.67-68; Mr 14.65)

⁶³ Ira omisantaiguiri Jesus isërontaigacari aisati ipasataiguëri. ⁶⁴ Aisati ibasioquiueri iroiquë, inchtangaborotëri, icantaiguëri:

—Jaa, pingomantina: ¿Pairi capojëmi?

⁶⁵ Përosati, tojai icantocotaguetasitaigari, isërontaigacari.

Yáganëngani Jesus cara yapatotaigaca jorío obatsi icarati 71.

(Mt 26.57-66; Mr 14.53-64; Jn 18.19-24)

⁶⁶ Cara oquëtaguetamananaque, yapatotaigaca iraequi antiasipari aisati itingomipague saserirotijegui aisati iraequi ogomeantiro isanguenare Moisés. Yágaiganaqueri Jesus catin-gasatiquë itingomipague iri obatsisiri icarati 71. ⁶⁷ Icantagaibaqueri:

—Pingomantaiguena Obiroca Quirisito, Ira Agabisaicoontasiri.

Yotabitaiguëri Jesus:

—Aroca nongomantaiguëmi: “Jee, Naro Quirisito”, quero piquemisantina. ⁶⁸ Aisati nosamitaiguëmica pairoraca ora isanguenatocoquina, quero potabitaiguina. ⁶⁹ Nopaniaca Jonogaguitequë, nomatsiguengatapë yaca quibatsica. Yamai pënibaque najátaje aisati Jonogaguitequë, nosobigopë cara ibacosonoriquë Tosorintsi Agabiasanotachari.

⁷⁰ Icantagaiguëri antagaisati jorío:

—¿Obiroco Itomi Tosorintsi?

Yotabitaiguëri Jesus:

—Jee, Naro, cara picantaiguë.

⁷¹ Aro yosamitobaca:

—¿Pairi onogobique basini comantëgotërine? Aquemaiguëri omagaro eiro ora icanque Iriati: icantocotaguetasitari Tosorintsi. Ijitosorintsitasita Iriati.

23

Yáganëngani Jesus Piratoquë.

(Mt 27.1-14; Mr 15.1-5; Jn 18.28-38)

¹ Aito cara omagaro jorío obatsisiri yágaiganaqueri Ira Jesus catingasatiquë Pirato, ira cobeingari Iromasati. ² Aro icomantëgotaiapëri Ira Jesus, itsoiguëgotaiagari:

—Teni ingomeite Iraqui. Naniaiguëri cara yamatobitaiguëri nomatsiguengajegui, icantaigabitacari: “Quero popiri cobeingari quirequi”. Aisati icantopianti: “Naro Quirisito, pintangomintina, pinguemisantina Naro”.

³ Yosamitëri Jesus Pirato:

—¿Aisonorico? ¿Obiroco Itingomi joríojegui?

Yotabitanëri Jesus:

—Jee, Naro aisonori ora picanque.

⁴ Aro Pirato icantaiguëri itingomipague saserirotijegui aisati iraequi ogomeantiro isanguenare Moisés aisati tojai matsiguenga botoitaigacha, icanque:

—Ninibatëri Ica sërarica. Te ine pairi ingantaguetëmate ora nangasitigabiriqueri.

⁵ Carari icantopiantaiguëri jorío:

—Iguisagaigacari ira matsiguengajegui, icantaiguëri: “Intsome ojoquiri ogobeingarite”. Iparintaca cara Garireaquë, yamai yaca aisa icampa, yamatobitaiguëpëri tojai.

Pirato igáqueri Jesus cara Eroriquë.

⁶ Cara iquemaque Pirato, yosamitëri:

—¿Iriroco Garireasati Ica?

⁷ Yotabitëri:

—Jee, Iriro.

Icanqueri Pirato:

—Aro, atsi páganëri cara Eroriquë igobeingarite Garireasatiegui. Yamai ainta yaca Jerosarënuë; ipoque caní.

⁸ Aro yágaiganaqueri. Iniobëri Eroris, icaninatanë. Tojai iquemocotopiantëri Jesus itasongantagueque; icogasantë iraneiri. Icogabeca iraneirime cara itasonganti. ⁹ Cosamani yosamitagueatabecari Ira Jesus, carari te irotopitiri. ¹⁰ Tojai yogatsitapinintaiguë itingomipague saserirotijegui aisati iraeGUI ogameantiro isanguenare Moisés, icantaiguë:

—Teni inganinate Ica, aiti icantagueti ora te ongomeite.

¹¹ Aique isërontaigacari Ira Jesus Eroris aisati omagaro isorarote. Irooti iquitsagatacagaigacari caninaro quitsagarintsi icantomemegacari itingomi, isërontobitaigacari. Aique yoguipigaineri Pirato. ¹² Jirai iguisabacaga Eroris aisati Pirato, carari yamai iparintacaro yágacaminatobaca, ijocajiro cara iguisabitobaca jirai.

Ipëgantaari Jesus ira Barabás.

(Mt 27.15-26; Mr 15.6-15; Jn 18.39-19.16)

¹³ Aique Pirato yapatotaiguëri ira itingomipague saserirotijegui aisati obatacagaiguëri jorío aisati tojai basini matsiguenga, icantaiguëri:

¹⁴ —Pinetse, carani pamaigabitënari Ica, picantaiguëna yogometiri matsiguenga cara irojocajina naro aisati basini cobeingari natsipa. Pinaiguë cara nosamitasantëri pairoraca, carari naniacananatëri, te ine irantane ora te ongomeite. Picantaitaigaca obirojegui. ¹⁵ Aisati ira Eroris iniacananatëri, irooti cara yoguipigaineri. Ica te ingantagueti pairoraca ora nógobiqueri. ¹⁶ Yamai nopasatagantëri, nomisotoqueri.

¹⁷ Aro antagaisati osarini omoncaraca jiesita cara iquengaigaca joríojegui jiraisonori cara yogabisaicobintëri ironomire Tosorintsi cara Ejípitoquë. Cara jiesitaquë yameta Pirato iromisotocajiri paniro iromingane, ira icoigaiguë jorío. ¹⁸ Carari icaimaiguë omagaro jorío:

—¡Pógagantiri Ica; iriroque pomisotocaje Barabás!

¹⁹ Yomianqueri ira Barabás irironta ógueri aisati icantaiguëri imatsiguenga: “Intsome ojocajiri Iromasati ogobeingarite”. ²⁰ Icogabeta Pirato iromisotocajiri Jesus, icogabeca iraguimairentaiguëri matsiguengajegui, ²¹ carari aiquero iáiguë icaimaiguë:

—¡Popëicotiri, popëicotiri!

²² Yogatsitairo Pirato maba icantaiguëri:

—¿Pairo icanque ora nopëicobiriqueri? Nosamitaigabitëmi obirojegui aisati nosamitabitacari Iriró. Te ine ora pigótacagaiguëna ora icantagueti te onganinate. Te ine ora nagamagobiqueri. Iroro nopasataguëqueri, nomisotocajiri.

²³ Carari përosati icaimaiganaque:

—¡Popëicotiri, popëicotiri!

Aiquero icaimasantaiganaque iróoti cara yagobiaiguëri ira Pirato ora icogabeca iriro. ²⁴ Icantaguëri:

—Aro nanganque ora picocagaiguëna.

²⁵ Yomisotocajineri ira Barabás, ira yomianque jirai aroquenta yogamaguëri matsiguenga aisati icoque irojocajiri igobeingarite. Ipaiguëri Barabás, carari igáqueri isorarote irágaiganaqueri Jesus cara iribëquëgotaguëri.

Yágaiganaqueri Ira Jesus iribëquëgotëri.

(Mt 27.31-32; Mr 15.21-23; Jn 19.16-17)

²⁶ Aro yágaiganaqueri Jesus iribëquëgotaguëri. Itonguibocari Sirenesati, ijita Simón, ipanica parigoti. Aro imeratobacari soraro iráganëneri Jesus igorosite, yoguiatëri yanatanëneri. ²⁷ Aisati yoguiataguëri arosonorini matsiguenga aisati tojai tsinane, piraicotaiguëri. Aisati pogasëretococari. ²⁸ Carari inetsaiguëro Jesus, icantaiguëro tsinanepague:

—Jerosaresato, quero piraicotina Naro; piraicotaiguema obirojegui, aisati pitomijegui.

²⁹ Aiquenta orequima cataguiteri omomirintsitomotaiguëmi, pitsipiriaiguë. Ingantaiguë matsiguenga: “Onganinasëretë ora tsinane quero pogui ojaniquite, aisa ora quero otso-tacagui”. ³⁰ Aique ingantaigabitëma matsiguenga: “Otiopëna taranga, ománaiguenata oguitoja”. ³¹ Aroca itsipiriacaiguëna Naro te nangantëmate ora te onganinate, iritiguëmarini iratsipiriasantacaqueri iraeGUI cantasantatsi tojai te ongomeite.

³² Aisati yágaiganaqueri pite cosirinti iribëquëgotëri, intsibatëmari Jesus.

Ipëicotaguëri Jesus corosiquë.

(Mt 27.33-38; Mr 15.22-32a; Jn 19.18-24)

³³ Cara yaretaigaparo oguitoja ojita Carabera, ora ocanti osigaró iguito igamaga, aro ipëicotagapëri Jesus corosiquë. Aisati ipëicotaguëri pite cosirinti basiniquë pite corosi, paniro ibacosonoriquë Jesus, ira basini imatëpacoquë. ³⁴ Icanque Jesus:

—Pabati, pingábintseri icaegui yogamaguënani, quero piguisiri tenta irogóigue pairoraca icantaiguë.

Ira soraropague imaguimpibintëqueri imanchaquipague Jesus ipabacaguecaro yotsatiancaro. ³⁵ Ainta yaratingaiguë tojai matsiguenga inetsaiguëri. Aisati ainta obatacagaiguëri jorío isërontaigacari icantaiguë:

—Yogabisaicotaiguëri imatsiguenga. Intsome anetsaiguëri aroca iragabisaicoquima Iriati, Iriroca Quirisito Agabisaicoontatsiri, Ira icoiguë Tosorintsi igáqueri.

³⁶ Aisati isërontaigacari soraropague. Íatasiqueri ipapëri obaa cochoari ³⁷ icantaiguëri:

—¡Obiroca Itingomi joríojegui, pigabisaicotima Obiati!

³⁸ Aiti sanguenari poguëngani igorositequë jonoica iguito Jesus, ocanti: “Ícari Ica Irianti Itingomi joríojegui”. Osanguenaca maba nibarintsiquë: irinibarequë guiriego aisati irasi ebereo aisati iratín irinibare Iromasati.

Inibataiguëri cosirinti Jesus.

(Mt 27.39-44; Mr 15.32b)

³⁹ Aisati ainta paniro cosirinti ipëicoca aisati itsibatari Jesus, isërontacari icanqueri:

—¿Obiroca Quirisito Agabisaicoontatsiri? Atsi yamai pigabisaicotima Obiati, aisati pigabisaicotigaüena naro pitirooti.

⁴⁰ Irari basini cosirinti isintsitsaqueri itsipa, icanqueri:

—¿Teco pintsorogüiri Tosorintsi? Aisati obiro, pënibaque pingamaque. ⁴¹ Aroquenta ocositagueanti eiroegui acantaguetiro cagaro caninatatsi, iroro ipëicotaguëcái atsipiriaiguë yamai. Irari Ica te ingantëmate ora yógobiqueri.

⁴² Aisati icanqueri Ira Jesus:

—Jesus, Natingomi, pinguenguena cara pirequima pigáantanequë cara pigáanti omagaro, quero pomaguisantina.

⁴³ Yotabitanëri Jesus:

—Aisonori nanganquimi, yamaica catagüiteri pintsibatëna canta caninagüiteroquë.

Icamaque Jesus.

(Mt 27.45-50; Mr 15.33-37; Jn 19.28-30)

⁴⁴ Aroque icatingapë paba cara otsitinitanë omagaro quibatsi irooti cara ochapinitanë. ⁴⁵ Ítsitinitanë paba, aisati otisaraanaca aganguisati ora yotigantaro oquibe ibango Tosorintsi. ⁴⁶ Aito cara icaimanë Jesus, catsigue icanque:

—Pabati, yamaica nomëmiro nasëre.

Irooti icamantanaca.

Ora iquengaigaca ira niaiguëri Jesus cara icamaque.

(Mt 27.51-56; Mr 15.39-41)

⁴⁷ Ira igapitante sorarojegui icarati 100 iniaqueri Jesus cara icamaque, iniacaninatëri Ira Tosorintsi, icanque:

—Ícaninatasanti Tosorintsi; aisati Ica camënguistsica. Aisonori Irianti Itomi Tosorintsi caninari, te ingantëmate ora te onganinate.

⁴⁸ Aisati ira botoibiritaigari cara inetsaiguëri Jesus cara ipëicoca, iniaiguëro omagaro, ipigaiganaca yogasëretagaca. ⁴⁹ Ainta jaqueronta ira ogóiguëri Jesus inetsaiguë aisati ora tsinanepague tsipataigapari cara ipaniaca Garireaquë, onetsaiguëri aisati.

Cara itiaqueri Jesus omoroquë.

(Mt 27.57-61; Mr 15.42-47; Jn 19.38-42)

⁵⁰ Aro ainta caninari sërari jitacha José, itentaigacari basini obataatsiri jorío icarati 71 cara yapatotaigaca. ⁵¹ Iriro Arimateasati, te iranintiro cara ipëicotaguëri Jesus irironta aguiaquero iragáantane Tosorintsi cara intingomibintaiguëri antagasiati matsiguenga.

⁵² Ira José íatasiqueri Pirato yamanopëri imëri igamaga Jesus arota iromingueri. Aro ipëri. ⁵³ Aique íaque, yoguëpëri igamaga Jesus, iponatancari tocoya, yomianqueri irasiquë iritijomente yomoroquero mopëquë, ora terai iritijantimaro. ⁵⁴ Iroro catagüiteriquë yobetsicaiguë jorío jiesita; teraiquerai oretima sábaro cara imagoriaiguë. Pënibapë. ⁵⁵ Ora tsinanepague aguiataiguëri Garireaquë otsibataigapari aisati Jerosarënuquë, onetsaiguëri cara itiaqueri omoroquë. ⁵⁶ Pipigaiganaja obangoquë, pobetsiquëneri casangajengaropague otiritaiguërimo igamaga Jesus. Aroquenta pareca sábaro, cara omagoriaiguë cara ocanti isanguenare Moisés.

24

Icaniatanai Jesus, icabiritaja.

(Mt 28.1-10; Mr 16.1-8; Jn 20.1-10)

¹ Aique oquëtaguetanai tomincoquë, piáigamanë tsinane cara yomianqueri Jesus, págaiganaque casangajengaropague ora pobetsiquëneri. ² Cara paretaiagapa omoroquë oniaigapëro oquibe mopë aroque otitigaca ora yasintocoontacari José Ira Jesus.

³ Ocaigabitana tso magui, carari te oneiri igamaga Atingomi Jesus. ⁴ Iroontita onetsasigabitapaari, oquenganeintasantaca, aitoniatu yaratingaipapê pite sêrari iquitsagata catarisonoriguinte iguitsagare pobariaguitetasantê. Imabocaparo tsinane, ⁵ ostorogaigabaqueri, poguitasantaigaca. Icantai gapêro:

—¿Pairo picogobiqueri Ira caniatatsi yaca cara yomianqueri igamaga camatsiri? ⁶ Teni irinaje yaca. Aroque icaniatanai. Pinguengero ora icanque Jesus jirai cara aintaquerai Garireraquê. ⁷ Icantai guêmi: “Naro paniacha Jonogaguitequê nomatsiguengatapê cara niboguê yaca quibatsica, ai quenta irácagantêna matsiguenga cantagueantatsiri te ongomeite, iribêquêgotaiguêna, ai que ongaraque maba cataguiteri, nanganiatanae”.

⁸ Aro oquengaigairo irinibare Jesus. ⁹ Pipiganaja poeboroquê ocomantaigapêri irogomere Jesus aisati ocomantagueiguêri basiniégui quemisantatsiri. ¹⁰ Ainta María Magararasato, aisati Joana, aisati basini María iniro Santiago, aintasati basini tsinane. Tojai tsinane ocomantaigabitacari iragátane Jesus, ¹¹ carari te inguemisantaigabaquero ora ocomantabitaca tsinane cara icaniatanai Jesus. Ijitaigabitaca ocantasitaiga tsinane te ogóigue. ¹² Paniro Peroro icabiritanaca isiganaca omoroquê, yoguipa, inetsapê tso magui. Patiro iniopê ora tocoya iponatantabecari Jesus. Ai que ipiganaja pongotsiquê, iquenganeintasantaca.

Pite quemisantatsiri iniajiri Ira Jesus abatsiquê.

(Mr 16.12-13)

¹³ Aro irooti cataguiteri iáiguê pite quemisantatsiri cara poeboroquê jitacha Emaos, cosamani 11 quirometoro ai quero Jerosarênquê. ¹⁴ Cara iquenaigasegui inibatobaca, inibatêgotêri Jesus ati ocanta icantai guêri matsiguenga, aisati ora icantasantê Iriro. ¹⁵ Cara iáigasegui inibatobaca iquengamotobaca, yotsitipari Jesus, itsibatanacari abatsiquê. ¹⁶ Iniaigabitobacari carari Tosorintsi te iranintacaguiri irogótobêri. ¹⁷ Aro yosamitêri Jesus:

—Cara pi quenaigasegui, ¿Pairo picantobitobaca?

Irirojegui yaratingaiguê, yogasêretagaca. ¹⁸ Paniro, ijita Quiriopas, yotabitanêri:

—Igóiguê antagaisati Jerosaresati. ¿Obi roco paniro te pigótocotiro?

¹⁹ Yosamitêri Jesus:

—¿Pairo pinibatêgoti?

Icantai guêri iriro pitirooti:

—¿Teco pinguemocotiri Jesus Nasaresati? Caninasati icomantaguetaiguêri matsiguengajegui Irinibare Tosorintsi, aisati itasongagueanti. Iniacaninatêri Tosorintsi, aisati iniacaninataiguêri narogui. ²⁰ Irari itingomipague saserirotijegui aisati iraugui obatacagaiguêna yágagantêri, aro yogamagaiguêri ipêicotaiguêri. ²¹ Najitaigabitaca Iriro Agabisaicoontatsirite, iragabisaicocái eiro joríojegui. Icantabeca inganiatanae aisati, carari yamai pabisanaque maba cataguiteri cara icamaque. ²² Aintapague tsinane tsipataiguêna, piáigamanê omoroquê, pipigaigapaa omabocapaina cara ²³ ocomantaiguêna te oniaigairi igamaga Jesus, te irinaje. Aisati ocampê cara yoniagaparo ironomire Tosorintsi icanquero cara ainta Atingomi caniani. ²⁴ Aisati ainta naroguiquê iáiguê cara omoroquê iniaigapêro irooti ora ocanque tsinane, carari te iraniaigairi Iriro.

²⁵ Ai que icanqueri Jesus:

—¡Te pigótêmataigue; pitsoinguêri comantantatsiri ira quinguitsaiguêmi Irinibare Tosorintsi jirai! Terai pinguemisantiri. ²⁶ ¿Teco ingantaiguemi cara Iritsita atspiriaquenguitsine Quirisito Agabisaicoontatsiri ingamaque, ai que inganiatanae iriatê Jonogaguitequê?

²⁷ Aro yogometasantaiguêri Sanguenari, yotsateanquero omagaro comantêgotêri Iriro. Iparintacaro isanguenare Moisés, ai que yogometaiguêri isanguenare basinipague comantantatsiri. ²⁸ Aro yaretaigaaro Emaos, irabisanaqueme Jesus ²⁹ carari icantai guêri itsipa pite:

—Quero piáti. Pintiomotina yaca nobangoquê. Aroque ochapinitanê, pênibaque onsitintitanê.

Aro icanaque Jesus pongotsique, itimaque.

³⁰ Cara isobicaiguê mesaquê, yágûero pan Jesus, icarasiaqueri Tosorintsi, itibatsaaguero, ipaguetaiguêri itsipa. ³¹ Aito cara ira pitirooti igóiguêri Irianti Jesus; irooti cara ipegopitanacari. ³² Ai que icantobaca pitirooti:

—¿Teco onganinatasante icancái cara abatsiquê igótacaganacáiro Sanguenari? Tojai ocancái asêrequê, poganinasêretacái.

³³ Aito cara icabritaigaca, ipigaiganaja cara Jerosarênquê. Iniaigapêri ira irogomere Jesus icarati 11 cara yapatoica irirojegui aisati basini quemisantatsiri. ³⁴ Irirojegui icantai gabaqueri:

—Aisonori icaniatanai Atingomi icabiritaja. Iniajiri Simón.

³⁵ Aique ira pite Emaosati icomantaigapëri icampë:

—Aisati naro, naniaigairi canta abatsiquë. Yogometaigapëna caninasati cara niáigasegui carari terai nogótiri. Aique canta pongotsiquë itibatsaaguequero pan ipaiguënaró, irooti nigóontacari. Aito cara ipeganaca.

Jesos yoniagaigapari irogomere.

(Mt 28.16-20; Mr 16.14-18; Jn 20.19-23)

³⁶ Iroontita icomantaseguiro, Iriguito yoniagaigapari Jesos, yaratingopë aganguisatiquë irirojegui, icantaigapëri:

—Quero pitsorogaigui. Pomagoriaséretaique obirojegui.

³⁷ Itsorogasantaiquë irirojegui, te irogótaigabaqueri. Ijitaigabitaca iniaigabaqueri sèretsi.

³⁸ Aro icampë Jesos:

—¿Pairo pitsorogobitaiguë? ¿Pairo pitsoingobitaiguëna Naanti? ³⁹ Pinetsaiguero nobaco aisati naguiti cara ipëicoquina. Potsagataiguena pigóntëna aisonori Naro bocatsi; aiti nobatsa aisati notongui, te aisa nangantimaro pibega sèretsi.

⁴⁰ Aique yoniagaigapari ibacoquë aisati iguitiquë. ⁴¹ Iniaigabitari icaninabentaigabitari, carari terainta iragabaiague irajitiri cara icaniatanai. Cara iquenganeintasantaigasega, yosamitaiguëri Jesos:

—¿Aiti poperi yaca?

⁴² Aro ipaiguëri sima iritasitaga. ⁴³ Yáguëri yaaguëri cara inetsaigaseguiro.

Itsonque Jesos yogometaiguëri irogomere.

(Irag. 1.4-8)

⁴⁴ Aique icantaiguëri:

—Pinguengaiguero nanibare ora nocomantaiguëmi cani: “Tojai itsipiriacagaiguëna irógaiguëna, omoncaraquema antagaisati isanguenatoquena Moisés aisati comantantat-siri, aisati omoncaraquema omagaro isanguenatoquena David cara sárimoquë”. Yamai omoncaraca.

⁴⁵ Aique igótacagaiguëri ora ocanti Sanguenaripague, ⁴⁶ icantaiguëri:

—¿Teco ongante Sanguenari, “Iratsipiriaque Quirisito Agabisaicoontatsiri ingamaque, ongaraque maba cataguiteri inganiatanae ingabiritajima; ⁴⁷ aique iriáiguë iragátane imarintëma Jerosarénquë ingomantëgotaiquëri matsiguengajeguiquë cara irojocajiro ora icantaguëti te ongomeite aroca inguemisantaiguëri Jesos irabentëmari Tosorintsi, aro Tosorintsi irisetaigaineri ora icantaguetomoqueri quimingari quero iquengairo aisati?”

⁴⁸ Pigóiguëro ocanti negaca Sanguenari. Yamai piniaguëro cara omoncaraca ora isanguenatoquëna jirai. Yamai nocoguini pinguenguitsatocotaiguena. ⁴⁹ Pinëni yaca Jerosarénquë yamai queronta ocosamaniti cara nagátaiguëmiro ora icantasantaiguëmi Pabati, Iroonti imagantëmi Isëre Tosorintsi inantaigapëmi coshoni ogaiguëmi. Ogabiagaiguëmi pingantaiguëneri Pabati pairoraca ingocagaiguëmi.

Cara yogainocanaa Jesos Jonogaguëquë.

(Mr 16.19-20; Irag 1.9-12)

⁵⁰ Aique Jesos itsibaitaganacari irogomere irooti cara Betaniaquë. Cara, itimagonaguitanaca lbaco jonoquë, yamanaqueri Iriri icanque:

—Pabati, jericca nogomerejeguica; pingantocobentaiguëri, pomitocotaiguëri.

⁵¹ Cara icantocobentaseguiro Jesos, aito cara yáguëngani jonoquë yogainocanaa, ipeganaca. ⁵² Aique irogomere ipigaiganaja Jerosarénquë, icaninabentasantaiguëri Atin-gomi. ⁵³ Carari, omagaro cataguiteri iátopiantaiguë cara oquibequë pongotsi irasi Tosorintsi icantaiguë:

—Icaninatasanoti Tosorintsi.

Aro ocarati ora nasanguenaguëmi. *Irocas*

IRA JOAN ISANGUENATOCOQUERI JESOQUIRISITO ITOMI TOSORINTSI

Cara imatsiguengatapê Quirisito.

¹ Cara jiraisonoriguinte cara teraiquerai ine quibatsi ainta Quirisito Ira aisati icantaro pibega Irinibare Tosorintsi yoniaganta ati icanta Tosorintsi, aisati itiomqueri Tosorintsi, Irironta Tosorintsi. ² Cara jiraisonoriguinte itsibatari Tosorintsi. ³ Cara jiraisonorori yobetsicanêro antagaisati ora inatsi. Teni ine pairoraca ora aniaigui yamai ora te irobetsiquiro Irro. ⁴ Irro timagantatsiri caniatacagantatsiri. Ipaguetêri cara intimaiganaque pêrosati matsiguenga. Aisati Irro osangueguiteserêtocotiri matsiguenga cara yoniagaigacari Irro caninarisonori. ⁵ Irro aisati icantaro pibega cataguiteri ora osangueguitetaguero cara posibitanêro ora tsitiniri. Aisati Quirisito osangueguiteserêtocotaigui matsiguenga cara igôtacaqueri ora icantagueti te onganinate. Yaca quibatsica aiti tojai ora te onganinate cantaca tsitiniri, carari ora tsitiniri te ogabeiro te ogatsibaquiro ora cataguiteri.

⁶ Tosorintsi igâqueri ira sêrari jitacha Joan. ⁷ Irro ipoguéque Joan arota ingomantêgotiri Quirisito Ira osangueguiteserêtocotaigui matsiguengajegui arota inguemisantaigueri. ⁸ Joan cagari Quirisito. Iroonti ipocobique ingomantêgotiri Quirisito Ira osangueguitetocotiri matsiguenga. ⁹ Irro cantaca Cataguitersonori yosangueguitetocotiri antagaisati matsiguenga cara ipoque Irro yaca quibatsica.

¹⁰ Jiraisonorori yobetsiquêro Quirisito antagaisati. Carari cara inasegui yaca quibatsica te irogôtaigabaqueri matsiguenga te irâgacananataigabaqueri Itingomi. ¹¹ Ipoque irasiquê iguebatsite, imatsiguengatabitapari joriojequi carari te irâgaigabaqueri imatsiguenga. ¹² Carari aintapague ágobêri iguemisantobêri. Aito cara itomintaigacari Tosorintsi iniaiguêri caninari aisa icanta iniaqueri caninari Itomi Ira Jesoquisito. ¹³ Ira quemisantobêri Quirisito, pêrosati itimacagajiri Tosorintsi, yogabisaicotajiri. Carari te iragabisaicotajiri Tosorintsi iriantinta quemisantatsi iriri. Quero yogabisaicotaja iriati. Quero yogabisaicotabaga matsiguenga iriati. Paniro iragabisaicotajiri matsiguenga Tosorintsi cara inguemisanqueri Itomi.

¹⁴ Ira Quirisito ipaniaca Jonogaguetequê, imatsiguengatasantapê cara otsomaakeri iniro, itiomotaigapêna naroeiguiquê. Nanasantaigabaqueri caninarisonoriguinte. Irro paniro Itomi Tosorintsi Ira igâque yaca quibatsica. Irro cábintsasantaigapêrine matsiguenga irojocajineri ora icantagueti te onganinate aisati quero iquengairo aroquenta inintasantaigapêri. Aisati patiro inibatiro Irro ora aisonori. ¹⁵ Joan icomantêgotêri, icantaiguêri matsiguenga catsigue:

—Irro Ica nacantocoque cani cara nacanque: “Yamai aintana naro yaca. Aiquenta coraque iribocapê Irro Ira Atingomisonori. Ibaquina Irironta caninarisonoriguinte. Ira te aisati ingantina nibega naro aroquenta irinaga ini Irro jiraisonoriguinte”.

¹⁶ Irironta caninarisonoriguinte icábintsagueiganacái. Aiquero iátanêtigue icábintsantaiganacái. Aisati icantaneintêgotacái. ¹⁷ Jiraisonorori isanquenaquero Moisés ora igáantê Tosorintsi. Carari yamai icábintsasantacái Jesoquisito aisati ipaigacáiro ora aisonori. ¹⁸ Teni pairi neirine Tosorintsi. Paniro ini Itomi itimacacari Irri jiraisonoriguinte. Igôtacacái Irro ati icanta Irri.

Joan icomantêgotêri Quirisito.

(Mt 3.11-12; Mr 1.7-8; Ir 3.15-17)

¹⁹ Cara Jerosarênquê igâtaiguêri jorio ira saseriroti aisati imatsiguenga Irebí. Ipocasipêri cara inasegui Joan, yosamitaigapêri:

—¿Pairibi obiro? ¿Obiroco Quirisito Ira agabisaicoontatsi?

²⁰ Icomantêgotaca Joan yotabitobêri:

—Cagarina naro Quirisito Ira agabisaicoontatsi.

Catingasati icantaigabaqueri Joan. ²¹ Aisati yosamitaiguêri:

—¿Pairibi obiro? ¿Obiroco Erías?

Icanque Joan:

—Cagarina naro Erías.

Aique yosamitairi:

—¿Obiroco comantantatsiri ira isanguenatocoque Moisés jirai?

Yotabitobêri:

—Cagarina naro.

²² Aique icantaiguêri saseriroti aisa imatsiguenga Irebí:

—¿Pairiroco pijitara obiro? ¿Pairo pinibatëgotëma obiati? Nocogaiguini pingomantëgotima, ora nongomantaigapairi ira agáquina.

²³ Icanque Joan:

—Naanti comantantatsiri cara tera ontimingani ira isanguenatocoque Isaías jiraisonorri cara icanque comantantatsiri:

Pobetsicoboquitineri irabo Atingomi.

Ora ocanti piganinatineri paneingemento.

²⁴ Ira osamitaiguëri Joan iriantiegui iragátane bariseo. ²⁵ Yosamitairi aisati:

—Cagaribica Quirisito Agabisaicoontatsiri, cagaribica Erías, cagaribica comantantatsiri ira isanguenatocoque Moisés cara jiraisonorri; ¿Pairo pobaotisabiritaiguëri matsiguenga?

²⁶ Joan icanitaiguëri:

—Naro baotisantantaro nija, carari ainta omatsiguengaquë Ira te pigóigueri. ²⁷ Aiquenta iribocapë. Ira te aisa ingantina nibega naro. Nitsioingaa naati tenta ongomeite nantsibatimari Irironta obaquina. Irro caninarisonori Natingomi.

²⁸ Omagaro oca icanquero Joan cara poeboroquë jitacha Betania cara onamijaquë Jorirán aiquero cara iconyeti paba. Canta ibaotisataiguëri matsiguenga Joan.

Aisati icomantëgotairi Quirisito Joan.

²⁹ Cara oquëtaguetanai Joan iniobëri Jesus ipogopë, aro icomantaiguëri matsiguenga icanque:

—¿Pinetsaigabaqueri Ira iragátane Tosorintsi! Aisati icantari ibega itiomijani oisha ira ogamagaigui. Aisati Irro camobitaiguërine antagaisati matsiguenga irágopitagetajiri ora icantagueti te onganinate. ³⁰ Irro nocomantëgotë cani cara nacanque: “Yamai aintana nara yaca. Aiquenta coraque iribocapë Ira obatina Irironta caninarisonoriguente irinaganta itimatá cara jirasisonoriguente”. ³¹ Teni pigóigueri obiro. Teatisati nogótiri nara carari igáquina Tosorintsi cara nongomantëgotëri Quirisito arota irogóigueri omatsiguenga. Irro nobaotisantantobitaro nija cara noniaganqueri Irro.

³² Përosati icomantëgotëri Jesus Joan icané:

—Naniobëro cara paguëpë Isëre Caninaro Tosorintsi aisa ocampari ibega sompaguiti pinampari. ³³ Cara terai nogótiri nara, Ira agáquina nobaotisantantaro nija icanquina: “Cara piniobëro Caninaro Nasëre oguëtasipëri sërari aitosati pinampëmari, Ica sërari Ira baotisanquimarone Caninaro Nasëre, ora ocanti imëmiroti Nasëre”. ³⁴ Aroque naniaquero. Aro yamai nocomantëgotiri Ica Irro Itomi Tosorintsi.

Jesus icaimëri irogomere.

³⁵ Oquëtaguetanai aintasati inasegui Joan aisati pite irogomere. ³⁶ Iniobëri Ira Jesus cara yabisanaque, icanqueri irogomere Joan:

—¿Pinetseri Ira sërarira! Irro aisati icantari ibega itiomijani oisha igácáiri Tosorintsi.

³⁷ Ira pite irogomere Joan iquemaqueri aro yoguiatanëri Ira Jesus. ³⁸ Cara iniobëri pitirooti Jesus inebintanaca, icabëri:

—¿Pairo picoguí?

Yotabitanëri:

—Ogomeantatsiri, ¿Nega pitimi?

³⁹ Yotabitoberri Jesus icanqueri:

—Jooçaigüe pinetsënte.

Aique yoguiatëri cara itimiri. Aro inibatobaca irooti cara ochapinigitetanë. ⁴⁰ Ainta piteni ira quemisanqueri Joan aique yoguiatanëri Jesus. Paniro ijita Antiris ireinti Simón Peroro. ⁴¹ Iritsita Antiris icoganëri Simón ireinti iniopëri icampëri:

—Aroque naniaqueri Ira Quirisito.

Quirisito ocanti Agabisaicoontatsiri. ⁴² Antiris yáganëri ireinti cara Jesusiquë. Icabëri Jesus ira Simón:

—Obiro pijita Simón, itomi Joan. Yamai najitajimi Sejas aisati Peroro oca ocanti mopë.

⁴³ Oquëtaguetanai ipintsatatacaca Jesus iriatë cara Garireaquë. Aique iniaqueri ira Jeripe, icanqueri:

—Piguiatapëna.

⁴⁴ Ipaniaca Jeripe cara poeboroquë jitacha Betsaira. Aisati Antiris aisa Peroro pitirooti Betsairasati. ⁴⁵ Aique iáque Jeripe icoqueri Natanael, icanqueri:

—Aroque naniaiguëri ira isanguenatocoque Moisés jiraisonorri cara isanguenaque ora iragáantane Tosorintsi. Aisati isanguenatocotaiguëri comantantatsirijegui. Irro Jesus, itomi José Nasaresati.

⁴⁶ Yotabitoberri Natanael yosamitobëri:

—¿Aintaco caninari paniacha Nasarequë?

Icanqueri Jeripe:

—Jooque pinetsëntiri.

⁴⁷ Cara iniobëri Jesus ira Natanael icantocoqueri:

—Pinetseri caninari jorío ira te iromatobiante.

⁴⁸ Aique yosamitëri Natanael Ira Jesus, icanqueri:

—¿Pigóquinaco?

Icanëri Jesus:

—Naniaquemi cara teraiquerai ingaimimi Jeripe, cara pinasegui otabiquë panguirintsi jitacha iguera.

⁴⁹ Yotabitanairi Natanael:

—Ogomeantatsiri, Obiro Itomi Tosorintsi. Obiro Itingomi joríojegui imatsiguenga Isirael jiraisonori.

⁵⁰ Icanqueri Jesus:

—¿Piquemisanquina aroquenta nocomantëmi naniaquemi cara pinasegui otabiquë iguera? Aiquenta piniobëro basini tojai, aro pinguenganeintasantanëma. ⁵¹ Aisonori yamai nocomantaiguëmi nopaniaca Jonogaguitequë nomatsiguengatapë cara niboguë yaca quibatsica. Aiquenta piniobëro Jonogaguite osirianaquima, aisati piniagabaqueri ironomire Tosorintsi iragainocanëma jonoquë cara Naroquë aisati iraguëpë.

2

Yoguibatëro itasorintsite Jesus.

¹ Omoncaraca maba cataguiteri cara yáguëro iina sërari cara poeboroquë jitacha Caná cara Garireaquë. Aintasati pinasegui iniro Jesus. ² Aisati icaimëngani Jesus aisati irogomere cara yapatotaigaca igaimanejegui. ³ Cara pitsoatanaca oja oba aro ocanqueri iniro Jesus:

—Tsoatanaca obaa.

⁴ Yotabitanëro Jesus:

—Atsi caraquenta, ina. Terai oretima cataguiteri cara noniaguëmari matsiguenga cara nomitocotagueantëmari natasorintsite.

⁵ Aro iniro ocanqueri iromeraro ira quitiro obaa:

—Pairorapagueraca iragáquemi Jesus, pingantiro.

⁶ Aiti pinasegui oquibe chomo ocarati 6 ora yogantaro nija ora yoguëtetantaguetá jorío. Patiro chomo ojaquima nija 100 iritoro. ⁷ Aro igáqueri Jesus:

—Pijaguero nija cara chomoquë antagaisati cara ocarati 6.

Icanquero. Iagasantëro irooti otseraquë. ⁸ Aique icanqueri Jesus:

—Pinguiate arosata yamai. Páganëneri ira agáantiro jiesita.

Aro yáganëneri. ⁹ Cara iniantacaro iriro ora nija pegacha obaa, te irogóte negaraca opaniaca. Irianti iromeraro ogóiguëro cara ipiaquero Jesus irironta jagaiguëro nija. Aro ira agáantiro jiesita icaimëri sërari águëro iina ¹⁰ icabëri:

—Ametaigaro eiro cara omagaro poguibatagani iróquimaro ora obaa caninajaro. Aique cara iróquimaca tojai ira igaimane; aro cara imëgotaiqueri ora obaa te opënatima tojai. Carari obiro poguëro ora caninajaro obaa irooti yamai.

¹¹ Cara poeboroquë jitacha Caná cara Garireaquë yoguibatëro Jesus itasorintsite. Yoniaganca arota irogóigueri matsiguenga Iriro caninarisonori aisati sintsirisonori. Aro iquemisantaiguëri irogomere Jesus.

Itimaque Jesus cara Caperinaoquë.

¹² Aique iáque Jesus cara Caperinaoquë. Itsibataro iniro aisati icarataiguëri ireinti aisati irogomere. Cara, itimaiguë arosata cataguiteri.

Ijocaiguëri Jesus ira pimantatsiri cara ibangoquë Tosorintsi.

(Mt 21.12-13; Mr 11.15-18; Jr 19.45-46)

¹³ Pëmbaque orequima cataguiteri ora jitacha Pásicoa cara iquengapiantaiguero joríojegui cara jiraisonori isotocaigai Ejípitoquë. Aro iáque Jesus Jerosarënuquë. ¹⁴ Iniopëri cara oquibequë pongotsi irasi Tosorintsi ira pimantaiguiri oisha, aisati sërari baaca aisati paroma. Aintasati ira campiatiri quirequi. ¹⁵ Yobetsiquëro iripasamento Jesus iroonti sogatsa. Aique ijocaiguëri antagaisati pimantatsiri aisati ibaacate aisati iroishate. Yosibiquero imesane ira campiatiri quirequi yosocaguitëri iguireguite. ¹⁶ Icanqueri pimantatsiri paroma:

—¡Páganëri sotora! ¡Quero popimantaguetiri yaca ibangoquëca Pabati Tosorintsi!

¹⁷ Aique iquengaigairo irogomere ora Sanguenari cara ocanti:

Nocogasantí iraniacaninatiro pobango matsiguenga. Iroero ora inguisanijintaguëquina naro aisati ingoque iróquena.

¹⁸ Yosamitaiguëri joríojegui:

—¿Pairo poniagaiguëna ora nogóontimi Obiro cara igáquemi Tosorintsi picanquero negaca?

¹⁹Yotabitanëri Jesus:

—Pogomeriguétiro oca pongotsica. Cara omoncaraquima maba cataguiteri nobetsicaïro aisati.

²⁰Icantaiguë jorío:

—Tojai osarini ocarati 46 cara pobetsiquëngani oca oquibe pongotsica irasi Tosorintsi. ¿Yamai picanque Obiro pobetsicaïro mabanti cataguiteri?

²¹Carari Jesus te irinibatocotiro pongotsisonori oquibe. Iroonti inibatëgotë ibatsasonori aisatinta ocantaro pibega ibango Tosorintsi. ²²Iroo cara aroqueque icamaque Jesus icaniatanai, iquengaigairo irogomere oca nibarintsica, aro iquemisantaiguëro Sanguenari aisati iquemisanque ora yogometaguëri Jesus.

Jesus igótasantaiguëri matsiguenga.

²³Cara Jerosarënuë aiti cataguitëripague jitacha Pásicoa cara yapatotaigaa jorío. Itasorintsitaguetasanotapë Jesus iquemisantacagopëri tojai matsiguenga cara iniaigabaquero iquemisantaigabaquero ora icanque Irro. ²⁴Carari te imemari ira matsiguenga igóquerinta ora iquengaigaca omagaro. ²⁵Igóque ora iquianca antagaisati matsiguenga. Aro te ingogue basini comantirine ati icanta matsiguenga igóquerinta iraneingomentojeguiquë sërari.

3

Nicoremo ipocasipëri Jesus.

¹Ainta inasegui sërari jitacha Nicoremo. Irro bariseo. Aisati irro itingomi jorío. Aintasati basini itingomipague jorío. ²Cara tsitiniriquë ipocasipëri Jesus Nicoremo, icampëri: —Ogometinari, nigóiguë Obiro iragátane Tosorintsi tenta irineni pairiraca intasorintsitë cantimine pibega Obiro pitasorintsitanoti queroca itsibatari Tosorintsi.

³Yotabitoberëri Jesus icabëri:

—Nangantasantëmini, queroca Tosorintsi itimacagajiri matsiguenga yoganasëretairi, aisati queroca ibogai irirai, quero yareta Jonogaguitequë cara itimi Tosorintsi aisati igáanti Irro.

⁴Yosamitëri Nicoremo:

—Aroca antiasiparitanë ¿Atiroco anganaima cara iboganaje aisati? ¿Atiroco anganaima cara anganajiro aniro cara iboganaje aisati?

⁵Icomantëri Jesus:

—Nangantasantëmini queroca itimacagajiri yoganasëretairi matsiguenga Tosorintsi cara Irinibarequë aisati Isërequë Tosorintsi, quero iáti Jonogaguitequë cara itimi Tosorintsi aisati cara igáanti Irro. ⁶Ira otsomaaque iniro, iriánti imatsiguenga sërari. Ira yoganasëretairi itimacagajiri Isërequë Tosorintsi, imatsiguengatacari Tosorintsi aisati. ⁷Quero piquenganeintasanta aisati querootisati omabocaguimi ora nacanquemi: “Panibanibi intimacagajimi Tosorintsi”. ⁸Ora coguentima ocoguentimaguiteti. Piquemobëtiguero cara ojigocanëma, carari te pigóte negaraca oquenopë, teatisati te pigóte negaraca ojátagueque. Aisati ocantari ibega ira itimacagajiri Isërequë Tosorintsi. Pigótoqueroi ira irirai itimacagajiri Isërequë carari te pineiro Isëre Tosorintsi tenta oneingani.

⁹Aique yosamitairi Nicoremo:

—¿Atiroco ocanta oca picanquinaca?

¹⁰Yotabitanëri Jesus icanqueri:

—¿Obiro ogomeantatsi cara omatsiguengaquë teco pigótiro oca nacanquimica?

¹¹Aisonori nanganquimi ninibatëgotëro ora nigóigui. Aisati ora naniaiguë irooti nocomantëgotë. Carari obirojegui teni pinguemisantaigabaquero ora nocomantaiguimi.

¹²Teca pinguemiro cara ninibatëgotëro ora inatsi quibatsica, ¿Atirasatico pingantiro cara pinguemobëro cara nanibatëgotëro ora paniënguicha Tosorintsiquë? ¹³Te pairi játatsine Jonogaguitequë. Paniro Naro, Naronta paniënguicha Jonogaguitequë. Nomatsiguengatapë cara niboguë yaca quibatsica. ¹⁴Jirasonori Moisés itinaaquero irosiacogomento marangue jonoquë anchapoaquë cara te ontimingani aisa onganquima inganquina nibega Naro cara iribëquëgotëquina jonoquë ¹⁵arota pairiraca quemisanquinane iraganasëretairi intimacagajiri Tosorintsi arota quero iáti Sharincabeniquë, carari përosati cara intiomoquena Jonogaguitequë.

Përo icanque Jesus:

¹⁶—Tojaisonorinta Tosorintsi inintasanoiguiri matsiguengajegui, igáquena yaca quibatsica. Naro Itomi paniro. Igáquena arota pairiraca quemisanquinane nantimacagajiri, quero iáti Sharincabeniquë, carari përosati intiomoquena Jonogaguitequë. ¹⁷Tosorintsi teni irro iragábirintina Naro Itomi yaca quibatsica cara nangasitëgatagueri matsiguenga.

Igáquena arota nagabisaicoqueri matsiguenga ira quemisanquinane. ¹⁸ Quero icasitígatiri Tosorintsi ira quemisanquina Naro Itomi paniro, carari aroque icomantégotèri ira te inguemisantina iriátè Sharincabenuquè tenta inguemisantina. ¹⁹⁻²¹ Cara icantagueigui matsiguenga ora te onganinate, icoguini inganquero cara tsitiniriquè. Teni iraninte ingantiro cara cataguteriquè tenta iraninte iripasiguite cara iraniaiguèri imatsiguenga. Naro aisati nacantaro pibega cataguteri aronta nopasiquitacaguiri cara nogótacaguiri matsiguenga icantagueigui ora te pojocajenga arota iripasiguitanè. Iroero iguisaneintobitaiguina. Aroque Tosorintsi icomantégotaiguèri iriro iriátè Sharincabenuquè tenta iranintaigue inguemisantina. Irari ira cantaguetiro ora caninaro irotsitipèna tenta iripasiguiteni. Iroonti icanque caninasati cara imitocoqueri iriro Tosorintsi.

Iroero oca icanqueri Jesos ira Nicoremo.

Aisati icomantégotairi Jesos Joan.

²² Aique iáigai Jesos aisati irogomero cara Joreaquè. Cosamani itimaiguè cara ibaotisaiguèri matsiguenga. ²³ Aisati Joan ibaotisantagueque cara poeboroquè jitacha Enón aitoniatiquè basini poeboro jitacha Sarim aronta pini nija tojai. Ipogaigapè matsiguenga ibaotisaigabaqueri Joan ²⁴ cara teraiquerai iromingueri Eroris ira Joan. ²⁵ Ipègatsatobaca irogomere Joan aisati itingomi jorio. Inibatégotèro cara ati ingantima iraguètetaima matsiguenga. ²⁶ Ipcasipèri jorio icampèri ira Joan:

—Ogometinari, Ira tsipatimi cara onamijaquè Jorirán cara icontetipaba, Ira pinibatégotè cani, yamai ibaotisatèri matsiguenga. Yoguiataiguèri tojai matsiguenga.

²⁷ Yotabitanèri Joan icanque:

—Quero pairo asintachane pairoraca, queroca ipiri Tosorintsi. ²⁸ Piquemaiguèna obinieniatu cani nocomantèmi catingasati cara cagarina naro Quirisito Agabisaicoontatsiri. Patiro igáquena Tosorintsi nongomantégotiri cara teraiquerai ingonijapè Iriro. ²⁹ Naro cantari iramigote ira águèro iina. Iramigote inganinatanè cara inguemobèro irinibare. Nacaninatè naro yamai aroquenta yoguiataiganaqueri Jesos matsiguenga. ³⁰ Aiquero iriátanètique Iriro irobotanèna. Carari naro aiquero najátanètique nangarantanae. ³¹ Ira paniacha jonoquè Iriro obatatsi antagaisati. Naro paniacha quibatsica. Ninibatégotiro ora inatsi quibatsiquè. Quirisito iquenopè Jonogaguetequè. Iriro obatiro antagaisati Irironta Atingomi. ³² Icomantégotèro Iriro ora iniaque aisati ora iquemaque cara jonoquè, carari teni inguemisantiri matsiguenga ora icanti Iriro. ³³ Ira quemisantobèrone ora icomanti Quirisito, irogóque cara icanti Tosorintsi ora aisonori. ³⁴ Tosorintsi agáqueri Quirisito. Inibatiro Irinibare Tosorintsi aroquenta ipasanoqueri Caninaro Isère Tosorintsi Ira Jesos. ³⁵ Aisati inintasanoqueri Itomi Tosorintsi, iroero ipasanoaguèqueri omagaro arota iragáantaguetiro. ³⁶ Ira quemisanquerine Itomi Tosorintsi intimacagajiri Tosorintsi aisati pèrosati intiomoqueri cara Jonogaguetequè. Ira te iraninte inguemisantiri Itomi quero itiomotiri, caraanti iriátè Sharincabenuquè aroquenta iguisèri iriro Tosorintsi.

4

Iáque Jesos cara Garireaquè.

(Mt 4.12; Mr 1.14)

¹⁻³ Ira barisesoegui iguemocoqueri Jesos cara ibaotisaiguèri tojai matsiguenga. Ibatajiri Joan tojaininta irogomere Jesos. Carari te Iriro baotisantantsine Jesos irianti igáti irogomere imaotisaiguèri matsiguenga. Cara igóque Jesos ora icanti bariseo, aro iáigai Jesos aisa irogomere, isotocaiganaji cara Joreaquè, aique iáigai aiquero cara Garireaquè.

Yogomequero Jesos ora Samariasato.

⁴ Icoque Jesos inguenantaigamaro abatsi quenacha Samariaquè. ⁵ Yareca poeboroquè jitacha Sicar aronisati iguebatsitequè José ora ipèri cara jiraisonori iriri jitacha Jacob. ⁶ Pinasegui iguinare Jacob cara yáguero nija jirai. Aro imagotè Jesos isobigopè iguinarequè catinga paba. ⁷⁻⁸ Aroqueque igáqueri irogomere Jesos iriáiguè poeboroquè iromanantaiguènte perintsi. Aro pipogopè tsinane Samariasato cara onosiquègotènti nija. Yobetsatobacaro Jesos icabèro:

—Pomena nija.

⁹ Ocanqueri Samariasato:

—¿Pairo pamanobiquina nija Obiro jorio? Naanti Samariasato.

Ocanque negaca iguisanijintobaganinta joriojegui aisati ira Samariasatiegui.

¹⁰ Yotabitanèro Jesos:

—Arome pigóque ora icogabeca Tosorintsi imèmi aisati pigóquiname Naro manimiro nija, aro pamanocoquina nija obiro, aro nomèmi nija timacagantatsiri arota pintimanè pèrosati.

¹¹ Ocanqueri tsinane:

—Ogomeantatsiri, teni ine obiro ora páganquimaro nija aisati tsoaguisonorinta pini nija. ¿Nega páguero ora nija timacagantatsiri ora pomëna cara nantimanë përosati? ¹² Jacob nomatsiguenga jiraisonorí iquiquinano oca cara nacaaguero ora yóga iriro jirai aisati itomijegui omagaro ibiraeguí. Iroonti caninajaro nija. ¿Yamai pijiquenico pomëna basini nija caninajarisonori? ¿Pobaquerinico Obiro Jacob?

¹³ Yotabitanëro Jesus:

—Antagaisati ira ógaro oca nijaca, aisati iromiretae. ¹⁴ Irari óguëmarone nija ora nomëri Naro quero imiretai. Iroronta nija ora nomëri ocontetanëri isërequë onganquima cara picontiati nija. Ongantacaquimari përosati intio moqueri Tosorintsi cara Jonogaguitequë.

¹⁵ Aique ocanqueri tsinane:

—Ogomeantatsiri, pomena ora nija timacagantatsiri querota nomiretai, querootisati nipocaji yaca nonosiquëgotai nija.

¹⁶ Icanquero Jesus:

—Pijáte pingaimëntiri pijime popocaigapë yaca.

¹⁷ Potabitanëri iroro:

—Teni irine najime.

Jesús icomantëro icanque:

—Aisonori teni irine pijime. ¹⁸ Aroque páguë pijime icarati pabocorooti. Irari ira águimi yamai cagari pijime. Aisonori picanque teni irine pijime.

¹⁹ Ocanqueri tsinane:

—Ogomeantatsiri, ¿Ati picanta cara pigótocoquina? ¿Obiroco comantantatsiri? ²⁰ Jirai yamanocoqueri nomatsiguengajegui Tosorintsi yaca oguitojaica. Obirojegui jorío picantaigui te ongomeite yaca. Picantaigui patiro nomanocotaiguëri canta Jerosarënuë. ¿Nega ocaninati nomanocotaiguëri Tosorintsi?

²¹ Yotabitanëro Jesus:

—Pinguemisantina, tsinane. Coraque cataguiteri cara quero pamanocotiri Pabati Tosorintsi yaca oguitojaica querootisati pamanocotiri canta Jerosarënuë. ²² Pamanocotaiguëri obiro Ira te pigóiguëri. Naroegui jorío nigóiguëri Ira namanocotaigui Irironta agabisaicoontatsi ipaniaca cara naroequiquë Irironta jorío. ²³ Yamai aroque pareca cataguiteri cara iromanocotasantiri quemisantatsiri aronta omitocotiri Isëre Tosorintsi ogomequeri ora aisonori. Iroronta icogui Pabati Tosorintsi iromaniri antagaisati ira coguëri Iriroro. ²⁴ Teni iraneingani Tosorintsi tenta ine ibatsa, iroonti Isëre. Iroronta patiro yamanocotiri isërequë matsiguenga aisati yamanocoontari Irinibarequë Tosorintsi ora aisonori.

²⁵ Ocanqueri tsinane:

—Nigóque cara iribocapë Agabisaicoontatsiri Ira jitacha Quirisito aisati. Cara iribocapë ingomantagueiuenaro omagaro.

²⁶ Icanquero Jesus:

Naromé Quirisito ira nibatacaguimira.

²⁷ Aito cara yaretaigapa irogomere Jesus. Iquenganeintaiganaca cara inibataseguero Jesus tsinane, carari te pairi osamitapërine ¿Pairo pinibabiritiro?

²⁸ Aique jocanëro tsinane ogaamento piáque poeboroquë. Ocomantaguequeri omatsiguenga:

²⁹ —Popocaigapë piniaiguëri sërari aroque icomantënaró antagaisati ora nacantaguëti. ¿Iriropeera Quirisito?

³⁰ Isotocaiganaque Samariasati poeboroquë aique iáiguë cara inasegui Jesus.

³¹ Teraiquerai iraretaigapëmari Samariasati icantopiantëri Jesus irogomere icanqueri:

—Ogometinari, pope.

³² Carari icanqueri Iriroro:

—Aiti noperi ora te pigóiguëro obiro.

³³ Aique yosamitobaganaca irogomere icanque:

—¿Aintaco matsiguenga mapëneri iraperi?

³⁴ Icanque Jesus:

—Cara aroque opaiguë, teni anguenguero operi. Aisati cara nanganquero Naro aisati notsonquineri ora ininti Tosorintsi Ira agáquina, nanganinatanë. Teni nanguenguero noperi tenta natasegue. ³⁵ Picantaigui obiro: “Itsibasatinibani manchacori obiguitëma tirigo”, carari nanganquemi Naro: “Pinetsaiguëri matsiguenga. Irirorjegui cantaca osamatagasonori tirigo panibati obiguitëma. Ira matsiguenga panibati pinguemisantacaguëri”. ³⁶ Ira obiguitiro tirigo irágobëro ora iripënantëri casintaro. Aisati ira quemisantacaguëri matsiguenga Naro pënantërine. Ira quemisanquinane përosati intio moqueri Pabati Tosorintsi cara Jonogaguitequë. Aro inganinaiguë pitirooti ira comantëgotënanane aisati ira quemisantacaguëri matsiguenga. ³⁷ Aisonori cara ocanti nibarintsi: “Ira panguitatsi quero iriro águero. Basinati águërone”. Ipanguitiro poro matsiguenga

oguitso iroonti Irinibare Tosorintsi, carari basini obiguitêrone cara inguemisantacaguii matsiguenga. ³⁸ Nigátaiguiimi obiro pobiguitaiguero ora ipanguitê basini. Aisa icanta icomantêgotêna basini. Yamai pogometaigneri obiro matsiguenga arota inguemisantina.

³⁹ Iquemisantaigabaqueri arosonori Samariasati Ira Jesus aroquenta ocomantêgotêri tsinane cara ocanque: “Icomantêrono antagaisati ora nacantagueti”. ⁴⁰ Iroo icantobitaiguêri Samariasati Ira Jesus icanqueri:

—Pintiomotaiganaquina yaca.

Aro itimanê Jesus pite cataguiteri. ⁴¹ Aro iquemisantaiguêri tojai basini Samariasati aroquenta iquemaigabaqueri Irinenisonori Jesus. ⁴² Icantaiguêro ora tsinane:

—Pinibatêgotêri Jesus obiro carari te najitimi. Yamai naquemisantaiguêri aroquenta naquemaigabaqueri Irineniati Iriro. Nigóiguêri Iriro agabisaicotaiguêrine omagaro matsiguenga.

⁴³ Cara pabisanaque pite cataguiteri yogaganaca Jesus irooti cara Garireaquê. ⁴⁴ Irineniati cantêgotênguicha Jesus teni iraniacaninataiguêri comantantatsiri imatsiguenga. ⁴⁵ Cara yaretanaca Jesus Garireaquê, yágaigabaqueri caninasati aroquenta iniaiguêri Garireasati canta Jerosarénquê cara itasonganti Jesus.

Jesus yoguibegajiri itomi iromeraro itingomi.

⁴⁶ Aisati yarepaa Jesus cara poeboroquê jitacha Caná cara jirai ipiaquero nija obaa. Ainta iromeraro itingomi ipaniaa Caperinaoquê. Aro ijanaitê itomi. ⁴⁷ Cara iquemocotobairi Jesus iromeraro itingomi cara ipaniaa Jesus cara Joreaquê irooti Garireaquê, aro itásiqueri Jesus Canáque, yamanocopêri:

—Popogopê nobangoquê pigauibegajinari notomi. Pênibaque ingamaque.

⁴⁸ Icabêri Jesus:

—Queroca nitasongantagueti, quero piquemisantaiguina.

⁴⁹ Yamanocopêri iromeraro itingomi icampêri:

—Natingomi, panonganêma omanaque icami najaniquite.

⁵⁰ Yotabitanêri Jesus:

—Popiganajima pobangoquê. Aroque ibeganaa pitomi.

Iquemisanquero sêrari ora icanqueri Jesus, aro ipiganaja. ⁵¹ Cara yanonganaa pênibaque iraretajimaro ibango itonguibotaigacari iromeraro icomantobêri:

—Ira pitomi tegotsitanai.

⁵² Yosamitobêri ati ocanta yaropeiique. Yotabitanêri:

—Chopi aroque ipariique paba pabisanaqueri janatigantsi.

⁵³ Yamai igóque iriri cara ibegaja itomi chopi cara icanqueri Jesus: “Aroque ibeganaa pitomi”. Aito cara iquemisantaiguêri Jesus iriro aisati omagaro imatsiguenga.

⁵⁴ Ainta Jesus itimaji Garireaquê, ipaniaa cara Joreaquê. Ocarati yamai pite cara itasonganque Jesus cara yarepaa Garireaquê.

5

Jesus yoguibegajiri janaitatsiri cara ogaarequê.

¹ Aique omoncaraca basini cataguiteri cara yapatotaigaa joríojegui, cara itonganaji Jesus aisati Jerosarénquê. ² Cara Jerosarénquê pinasegui ogaare aitioniati omoro cara iquenacaguii oisha. Irinibarequê jorío ojita Betesita aiti pabocorooti pongotsi. ³ Cara pongotsiquê ainta inariaiga tojai janaitaguetatsiri, comarajari, carancara, emêngari, omagaro. Yoguiaque cara irosebaaquero nija ⁴ ironomire Tosorintsi. Cara yaguêpê irosebaaquero nija, aique pairiraca obaquênguistsine ingaatê irobegajima pairoraca ojita ora óguêri. ⁵ Ainta inasegui sêrari ijanaitê tojaisonori osarini ocarati 38. ⁶ Inariaca irisomamintoquê. Iniopêri Jesus igópêri ijanaitê cosamani. Yosamitapêri:

—¿Pinint pobegajima?

⁷ Yotabítobêri janaitatsiri:

—Nomatsiguenga, teni irine pairiraca cajaanquinane cara osebaatanêma nija. Iroontita najáque naro irobaquina basini ingaatê.

⁸ Aro igáqueri Jesus:

—Pingabiritima págaio pisamamento panêitanae.

⁹ Aito ca ibeganaa. Yáganairo irisomaminto, yanêitanai.

Iguisêgotaro jorío sábaro.

Ibeganaa sábaroquê. ¹⁰ Iroo icantaguêqueri joríopague ira sêrari janaitabitacha icanqueri: —Yamai iroonti sábaro. Teni ongomeite páganêro pisamamento. Jiraisonori isanguenaque Moisés ora quero atarobacaantaro eiro cataguiteri quê sábaro iroronta comagoriantaque.

¹¹ Yotabitanêri sêrari:

—Ira aguibegajina igáquina: “Págairo pisamamento panëitanae”.

¹²Yosamitaiguëri jorío:

—¿Pairo ijita ira agáquimi: “Págairo pisamamento panëitanae”?

¹³Te irogóte pairiraca aguibegajiri aroquenta ipeganaca Jesus cara matsiguengajeguíquë. ¹⁴Aique iniaijiri Jesus oguibequë pongotsi irasi Tosorintsi icanqueri:

—Pinetse. Aroque pibeganaa. Quero pintaguetaji aisati ora te onganinate arota quero pitsipirijaji agabenisonori.

¹⁵Ipiganaja iriro cara joríojeguiquë icomantaiguëri cara yoguibegajiri Jesus. ¹⁶Iroro iguisanijintaguëqueri jorío Ira Jesus aroquenta itasonganque sábaroquë ora cataguiteri comagoriantague. ¹⁷Carari icanqueri Jesus:

—Pabati Tosorintsi përosati ican tiro ora caninari irooti yamai. Aisati nacantari Iriro nacantiro ora caninari. ¿Pairo nojocobiquero cara sábaroquë?

¹⁸Aroquenta Jesus icanque cara Iriro Iriro Tosorintsi cara aisati ican tiri Tosorintsi, aisatinta itarobacaati Jesus sábaroquë, icogasanotaigabitaca jorío irógurime Jesus.

Cara igáanti Itomi Tosorintsi.

¹⁹Icanque Jesus:

—Nangantasantëmini Naro Itomi Tosorintsi teni nangantasitima Naro pairoraca. Iroonti nanganque ora ican ti Pabati. Ora omagaro ican ti Iriro, aisati nanganquero Naronta Itomi.

²⁰Inintasanotina Pabati Naronta Itomi. Yoniaguinaro antagaisati ora ican ti Iriro. Aisati ironijaguina basini tojai arota pinguenganeintasantaiganaquima. ²¹Cara icabiriqueri yoganiatairi Pabati ira camënguisti, aisa nacantari Naro naganiatairi pairiraca ira naninti. ²²Yamai Pabati teni ingomantëgotaguetiri matsiguenga ora inganque. Ipënaró Naro cara nogóntaiguëmari antagaisati matsiguenga nongomantëgotëri pairoraca ingantaiguë aisati negaraca iriáiguë. ²³Icanquero Pabati negaca arota omagaro irianicaninatina caninarina Naronta Itomi aisati ican ti iniacaninatiri Pabati. Ira te irianicaninatina Naro Itomi, teatisati irianicaninatiri Pabati Ira agáquina. ²⁴Nangantasantaiguëmini ora aisonori ira quemobërone nasi nanibare aisati inguemisanqueri Pabati Tosorintsi Ira agáquina, përosati intiomoqueri Tosorintsi cara Jonogaguitequë. Quero icasitigatiri Pabati. Jirai iáigabitaca aikuero Sharincabeniquë, carari yamai iriáigae cara Jonogaguitequë. ²⁵Nangantasantaiguëmini aroque omoncaraca cataguiteri cara iraequi jätënguistsineme aikuero Sharincabeniquë yamai cara inguemobëro nanibare aro nantimacaguiri Naronta Itomi Tosorintsi, iriáiguë cara Jonogaguitequë. ²⁶Aisati nacantari ibega Pabati catimaneri aisati timacagantatsiri, Iriro pënaró natimanë Naati aisati nantimacaguiri matsiguenga Naronta Itomi Tosorintsi. ²⁷Aisati itingomiquina ipënaró cara nongomantëgotaiquëri matsiguengajegui ora inganque aronta nopaniaca Jonogaguitequë cara nomatsiguentagatasantapé cara niboguë. ²⁸Quero pinguenganeintasantaigana aroca orequima cataguiteri cara antagaisati igamagaegui inguemobëro nasi nanibare, ²⁹aro ingabiritanaima inganiatanae irisotocanë imoropaguequë, ira cantaguetiro caninaro përosati intiomoqueri Tosorintsi Jonogaguitequë. Iriro cantaguetiro ora te onganinate nongomantëgotëri antagaisati cara iriáiguë Sharincabeniquë. ³⁰Teni nangantasitima pairoraca ara nocoguí Naro. Iroonti ora inganquina Tosorintsi nongomantëgotaiquëri matsiguenga. Patiro nanganque ora icoguí Ira agáquina.

Iraegui comantëgotëri Jesus.

Perosa icanqueri jorío Jesus:

³¹—Aroca Naati comantëgotënguichane, aro pingantocoquina Naro notsoigani. ³²Ainta basini comantëgotëna. Nigóque ora icomantëgotëna iroonti aisonori. ³³Caní posamitagantëri obiroyegui ira Joan; ora icomantaiguëmi iroro aisonori. ³⁴Carari Naanti Itomi Tosorintsi; jemita ora ingomantëgotëna matsiguenga. Patiro nacanquimiro arota iragabisaicotaigaimi Tosorintsi. ³⁵Joan aisati ican tiri pibega obotagantsi cara posanguëguitetasanoti. Arosata cataguiteri picaninatomotaiguëri obiroyegui. ³⁶Irinibare Joan ogótagaiguëmi cara Naro Itomi Tosorintsi. Aisati ogótasantaiguimi ora nacanque Naro cara nitasongobentiri matsiguenga cara igáquina Pabati. Patiro nanganque ora igáque Iriro. ³⁷Aisati Ira agáquina icomantëgotëna carari te pinguemaigabaquero Irinibare teatisati piniaiguëri atraca ican ti Iriro. ³⁸Teni pinguemisantaiguero obiroyegui Irinibare Tosorintsi tenta pinguemisantaiguëna Naro cara igáquina Iriro. ³⁹Pinibatasantaiguero caninasati ora Sanguenari pijjenta obiroyegui ontimacaguëmi përosati jonoquë, carari Naanti ocomantëgoti. ⁴⁰Teni pinintaiguë pabentina Naro pinguemisantina cara pintiomo-taiguëri Tosorintsi përosati Jonogaguitequë. ⁴¹Teni nongogue piniacaninatitasitaiguëna ⁴²nigóguëmintá obiroyegui teni pinintaiguëri Tosorintsi. ⁴³Nipoque igáquenanta Pabati, carari te pinguemisantaigabaquë. Carari iribocasitimaca ira matobiantatsi, irianta pinguemisantaigabaquë. ⁴⁴Teni pinguemisantobinte obiroyegui; iroontinta picogaigui

pinianacinatobaguima obirojegui matsiguenga. Teni pingogaigue iraniacinatinimi Tosorintsi. ⁴⁵ Quero pijitina Naro comantëgotëmine Pabatiquë. Pijitabeca piquemisanqueri Moisés carari iriati Moisés comantëgotëmine. ⁴⁶ Arome pinguemisanqueri Moisés, aisati pinguemisantaiguename Naro Naronta isanguenatocoque Moisés. ⁴⁷ Carari teca pinguemisantaiguero isanguenare Moisés, ¿Atirocco onganquima pinguemisantaiguëro nasi nanibare?

6

Jesos ipaiguëri iraperi sërari icarati 5,000.

(Mt 14.13-23; Mr 6.30-46; Ir 9.10-17)

¹ Itsonquero irinibare Jesos cara Jerosarënuë, aique iátaji cara Garireaquë. Imontianaca angaare jitacha Garirea aisati ojita Tiberias. ² Yoguiataiguëri tojaisonoru matsiguenga iniaiguërinta Jesos cara itasongobenqueri janaitatsiri. ³⁻⁴ Cara pënibaque orequima cataguiterpague ora jitacha Pásicoa cara irapatotaiguëma joríojegui, itongaiganaque oguitojaquë Jesos aisati irogomere isobicaigapë. ⁵ Iniaigabaqueri Jesos arosonoru matsiguenga yoguiataigapëri. Icanqueri ira Jeripe:

—¿Nega omanantëneri pan ora irapaiguë?

⁶ Icanque Jesos negaca arota iraniantëmari Jeripe. Aroque igóque Jesos ora inganque Iriro. ⁷ Yotabitanëri Jeripe:

—Aroca omanantë pan ora pënatacha 200 tenario, quero cotonguiboro cara irapaiguë omagaro arosata.

Panuro tenario yágui ira tarobacaatatsi poro cataguiteri. ⁸ Poro irogomere Jesos ijita Antiris ireinti Simón Peroro icanqueri:

⁹—Ainta yaca janequi sërari yamapë pabocorooti pan aisati pite itiomijani sima, carari quero cotonguiboro tojainta matsiguenga.

¹⁰ Igáqueri irogomere Jesos icanque:

—Pigasobicaiguëri.

Aiti pinasegui caninaro tobarisi tojai. Isobicaiguë sërari cara tobarisiquë icarati 5,000. ¹¹ Yáguëro pan Jesos icarasiaqueri Tosorintsi, aro yotsatengaiguëri ira sobicaigatsi. Aisati ipaguëtaiguëri sima. Ora ocarati icogaiguë matsiguenga. ¹² Cara iquemaigaca omagaro, icanqueri irogomere Jesos:

—Pobiitaguëtajiro ora ingarataiguë, arota quero omainatëmata.

¹³ Aro yobiitaguëtajiro iagajiro ocarataji 12 cantiri ora angarquenguicha pan aroquenta iquemaigaca tojaisonoru matsiguenga. ¹⁴ Cara iniaiguërinta matsiguenga Ira Jesos cara yomitojaiguëro pan aisati sima itasorintsitequë, aro icanë:

—Aisonori Ica Iriro comantantatsiri Ira boquënguitsine yaca quibatsica Ira oguiaiguë cosamani.

¹⁵ Igóque Jesos cara icogaiguë matsiguenga iráganëri inganqueri itingomi. Aro itongaquë Jesos aisati, iáque casiriconiati.

Ipigapaa Jesos Caperinaoquë, yanëiatanë nija jonoicanti.

(Mt 14.24-33; Mr 6.47-52)

¹⁶ Cara ochapinitanë yanongaiganaca irogomere Jesos yagaitanë angaarequë. ¹⁷ Yotetaiganaca pitotsiquë iátocoiguë aiqero cara antatinta Caperinaoquë. Aroque otsitiniquë. Teraiquerai iraretima Jesos. ¹⁸ Aro oparintanaca omotoncaatanë angaare sintsironta coguentima. ¹⁹ Icomatagaanaque pabocorooti quirómetoro cara iniaigabaqueri Jesos yanëiapëro angaare jonoicanti. ItSORogaiganaque irogomere. ²⁰ Icampëri Jesos:

—Naanti. Quero pitsorogaigui.

²¹ Aique icaninataiganaque yotetaigabajiri Jesos pitotsiquë. Aiguito iniaigaa canta onamijaquë canta iriatëri.

Icogaiguëri matsiguenga Ira Jesos.

²² Itimaiguë matsiguengajegui cara yapaiguë pan. Oquëtaguetanë igóiguë teni ine pitotsi. Patiro ora yotetaiganaca irogomere Jesos iátocoiguë, carari Jesos te intsibatanaimari. ²³ Paretaiga basini pitotsipague opaniaca Tiberiaquë aronisati cara yapaiguëro pan matsiguenga cara icarasiabintëro Jesos. ²⁴ Cara igóiguë teni irinaje Jesos irirojeguiquë teatisati irogomere, yotetaiganaca pitotsipaguequë irooti Caperinaoquë cara ingogaigairi Jesos.

Jesos ijica perintsi timagantatsiri.

²⁵ Cara iniaigairi antatinta, yosamitapairi:

—Ogometinari, ¿Ati ocanta pipoque yaca?

²⁶ Yotabitanëri Jesos icantaiguëri:

—Nangantasantëmini nigóiguëmi teni pingogaiguena cara nitasonganti, carari picogaiguina aroquenta papaiguëro poperi piquemaigaca. ²⁷ Quero picoguiro perintsi ora peganënguichane, ora pingogue perintsi timagantatsiri ontimacaguimi Jonogaguitequë përosati ora nomëmira Naronta matsiguengatapënguitsi. Ipënaró Pabati Tosorintsi cara nomaiiguëmiro irorota timaquimine obirojegui pisërequë.

²⁸ Yosamitaiguëri:

—¿Pairo nangantaiguë ora ininti Tosorintsi?

²⁹ Yotabitanëri Jesus:

—Icoguini Tosorintsi pinguemisantina Naro Irironta agáquina.

³⁰ Aique yosamitaigairi:

—¿Yamai paio pitasonguë aisati arota naniobëro nanguemisantimi? ¿Pairo pinti?

³¹ Omatsiguenga jirai yapaiguëro iraperi ora jitacha maná cara tera ontimengani. Ocan-tocoquero Sanguenari:

Ipaiiguëri Tosorintsi perintsi paniacha jonoquë.

³² Icantaiiguëri Jesus:

Nangantasantëmini, teni iriro paiguemirone Moisés ora perintsi paniacha jonoquë, carari yamai imaiiguëmi Pabati perintsi iroronorori paniënguichane jonoquë. ³³ Ora perintsi imaiiguëmi Tosorintsi yamai, Irianti sërari Ira masobingopënguitsi cara Jonogaguitequë. Itimacaqueri matsiguenga yaca quibatsiquë.

³⁴ Icantaiiguëri matsiguenga Ira Jesus:

—Natingomi, përosati pomëntaiguenaro perintsi ora picantocoque.

³⁵ Icanqueri Jesus:

—Naro perintsi timagantatsiri. Cara popë poperi, caraquenta pitasegae aisati. Cara póga nija, caraquenta pomiretae. Carari cara pinguemisantaiguënanica, pinganinasëretanë përosati. Pinguemasëretaiiguëmaro ora perintsi paniacha Jonogaguitequë. Naanti cantaca perintsi paniacha jonoquë. ³⁶ Pinaiguëna obirojegui carari aroque nacanquemi teni pinguemisantina. ³⁷ Antagaisati matsiguenga ira ipina Pabati iribocasitapëna Naro. Pairiraca bocasitapënanane coshoni noguëmari quero nojocajiri sotoquë. ³⁸ Nopaniacanta Jonogaguitequë nanganque ora ininque Ira agáquina. Teni nangante ora nocogui Naro. ³⁹ Ira agáquina ininti quero nobeguëmatiri paniro ira ipëna, carari nangábintsasantëri irooti cara nopocaje naganiatairi najátacaqueri jonoquë. ⁴⁰ Ininti Pabati Ira agáquina antagaisati niaiguënanane quemisantaiguënanane Naro matsiguengatapënguitsi, përosati intiomo-queri Tosorintsi Jonogaguitequë. Cara nopigaima nangabiriqueri naganëri jonoquë.

⁴¹ Yabentaigaca joríojegui aroquenta icanque Jesus: “Naro yamai perintsi paniacha Jonogaguitequë”. ⁴² Icantobaca jorío:

—¿Cagarico Jesus Ira itomi José? Nigótiri iriri aisati iniro. ¿Pairo icantobique yamai: “Nopaniaca Jonogaguitequë”?

⁴³ Icantaiiguëri Jesus:

—Quero pabentaiga. ⁴⁴ Quero ipocasitina matsiguenga iriati queroca Iriró agátinarine Pabati Ira agáquina Naro. Aisati nangabiritajiri naganiatairi cara nopocaje aiquenta.

⁴⁵ Isanguenataiguë comantantsiripague jirai:

Irogometaiiguëri Tosorintsi omagaro matsiguenga.

Antagaisati ira quemisanquerine Pabati ora yogomequeri iribocasitapëna Naro. ⁴⁶ Te pairi neirine Pabati. Paniro aronta nopaniaca Iriróquë. ⁴⁷ Nangantasantëmini pairiraca quemisanquinane nantimacaqueri cara intiomoqueri Tosorintsi Jonogaguitequë.

⁴⁸ —Naro perintsi timagantatsiri. ⁴⁹ Jirai pomatsiguenga yapaiguëro perintsi jitacha maná cara tera ontimengani. Carari icamaiquë antagaisati. ⁵⁰ Oca perintsi ninibatëgotica opaniaca jonoquë, aroca irapëro matsiguenga quero icamaji. ⁵¹ Naro perintsi timagantatsiri. Nopaniaca jonoquë aroca irapëro oca perintsica pairiraca matsiguenga intimacaqueri Pabati Tosorintsi përosati. Oca perintsi nomërica iroonti nasi nobatsa. Nomaiguëri matsiguenga arota intimacaganëri iriro përosati.

⁵² Aique yosamitobaca jorío icanque:

—¿Atiroco ingantima Iriró cara imacáiro ibatsa ajaguëri?

⁵³ Icanqueri Jesus:

—Aisonori nangantasantëmini nomatsiguengatapë. Queroca paaguero nobatsa queroo-tisatica pógaro naraa, quero pitimi Tosorintsiquë tenta pigótiri. ⁵⁴ Ira jaguërone nobatsa aisati óguëmarone naraa aro intimacaqueri Tosorintsi Jonogaguitequë përosati. Aisati nangabiritajiri naganiatairi cara nopocaje. ⁵⁵ Nobatsa iroronta perintsisonori aisati naraa iroronta omiretagantsisonori. ⁵⁶ Ira jaguërone nobatsa aisati óguëmarone naraa inguengasëretina, aro intiomoquina jonoquë. Coshoni iroquina Naro aisati coshoni noguëri iriro. ⁵⁷ Ira agáquina Pabati Irirónta timagantatsi. Naro përosati natiomotiri. Aisa icanta ira

jaguênane nantimacaqueri. ⁵⁸ Ninibatêgotiro perintsi opaniaca jonoquê. Teni aisati ongan-timaro pibega perintsi ora yapaiguê pomatsiguenga jiraisonori jitacha maná. Icamaiquê iriro. Carari ira pêrone oca perintsica ninibatêgotica pêrosati intimaque Jonogaguetequê.

⁵⁹ Antagaisati oca yogomeantêca Jesus inibatêro cara yapatotaiga jorío cara poeboroquê jitacha Caperinao.

Cara intime pêrosati matsiguenga.

⁶⁰ Aroqueque yogomeantê Jesus, ainta ira aguiatêri icantobaca:

—Comêtaru oca nibarintsica. ¿Pairi quemobêrone?

⁶¹ Igóque Jesus cara yabentaigacaro icomêtaigabacaro irinibare, yosamitêri:

—¿Teco ongomeitomotimi oca? ⁶² ¿Ati pingantaiganaque aroca piniagaibaquina nagain-ocanaima cara nopaniaca jirai? ⁶³ Itimaque matsiguenga aitinta isêre. Queroca pini isêre irianti igamaga. Oca nibarintsica ninibatimica ontimacaquemi pêrosati jonoquê; cara pinguemisantobêro, Isêre Tosorintsi ontimacaquemi. ⁶⁴ Pêrosati ainta obirojeguiquê ira te inguemisantina.

Cara jiraisonori cara irirai parintênguicha igóitacari Jesus ira te inguemisantiri aisati ira ágagantêrine. ⁶⁵ Aisati icanque Jesus:

—Iroro nacantaguêtaiguêmi quero ipocasitina matsiguenga irianti. Patiro iromapênarica Pabati iribocasitapêna.

⁶⁶ Tojai ira aguiataigabitari Jesus aique ijocaiganajiri, te intsibataimari aisati. ⁶⁷ Aro yosamitaiguêri Jesus ira irogomere icarati 12:

—¿Aisatico picogaigui obiro pijáigae?

⁶⁸ Yotabitanêri Simón Peroro icanqueri:

—Natingomi, teni irinaje basini ira naguiataigae. Patiro pasi pinibare ontimacagaiguêna pêrosati. ⁶⁹ Obiro naquemisantaiguê aisati nigóiguimi Obiro caninarisonori Itomi Tosorintsi catimanagerisonori.

⁷⁰ Yotabitanêri Jesus:

—Nocogaiguêmi obiro picarati 12, carari ainta poro obirojeguiquê iromeraro Satanás camagari.

⁷¹ Jesus inibatêgotêri Joras Cariotisati ira ágagantêrine Ira Jesus cara matsiguengaquê catsimari.

7

Ira ireintiegui Jesus te inguemisantaigueri.

¹ Aique iátagueque Jesus Garireaquê tenta iraninte iriáte Joreaquê icogaiguininta joríojegui iróqueri canta. ² Pêribaque orequima basini cataguiteri cara irapatotaiguêma joríojegui. Iquengaiquero jorío cara jiraisonori isotocaigai Ejlípitoquê cara itimaiguê ibango-naeguiquê. ³ Ipcasipêri ireinti Jesus icampêri:

—Pijáte canta Joreaquê arota iraniaiguemi pogomere cara pitasonganque canta.

⁴ Pinintica irogóiguemi matsiguenga quero pitasonganti comanoroni. Poniagaiguemari omagaro matsiguenga.

⁵ Icanqueri negaca ireinti tenta inguemisantirini Iriro. ⁶ Icantaiquêri Jesus:

—Terai oretima cataguiteri cara najáque Naro Joreaquê. Obirojegui pijátasiquima basini-pague cataguiteri ocaninatomotiminta. ⁷ Quero iguisanijintaiguimi obiro matsiguenga, carari Naanti iguisanijintaiguêri Naronta ogótacagaiguêri ora icantagueti te ongomeite. ⁸ Pijáigue obirojegui Jerosarénquê. Queroqueraí niáti Naro terainta omoncaratima cataguiteri cara najáque.

⁹ Aroque icanque negaca, pêro cara inê Jesus Garireaquê.

¹⁰ Cara iáiguê ireinti Jesus cara Jerosarénquê, aique iátaji Iriro comanoroni carari te ironijaguimari matsiguenga. ¹¹ Cara Jerosarénquê icogaigabitacari Jesus jorío, icantobaca:

—¿Atique? ¿Negaraco iquenaque?

¹² Tojai matsiguenga inibatêgotaiquiri Jesus. Ainta cantênguisti:

—Iriro caninari.

Ainta basini cantênguisti:

—Teni ingomeite. Yamatobiqueri matsiguenga.

¹³ Tojai inibatêgotêri carari te irinibate catingasatiquê ipingaiquerininta itingomipague jorío.

Iátaji Jesus cara Jerosarénquê cara yapatotaiga joríojegui.

¹⁴ Aroque yapatotaigaca jorío cara Jerosarénquê aronibati cataguiteri cara otsonganaquima jiesita. Aro itonganaque Jesus icanaque oquibequê pongotsi irasi Tosorintsi, yogomeantapê. ¹⁵ Iquenganeintaiganaca jorío, icantaiquê:

—¿Negaraco igóque tojai Ica tenta irisanguenatasanteni?

¹⁶ Yotabitaiganaqueri Jesus:

—Teni nogomeantasitamaro Naro. Patirontiatu nogomeantiro ora icanquina Ira agáquina. ¹⁷ Pairiraca nintatsi ingante ora icocaqueri Tosorintsi irogóquero nogomeantane negaraca opaniaca, irasi Tosorintsi iroontico nasiati. ¹⁸ Ira nibatocotacha iriati iroro ininti iraniacaninataguimari matsiguenga, irari nibatatsi aisonori patiro ininti iraniacaninatiri matsiguenga Ira agátiri. Ira nibatatsi negaca iroro caninari. Te intoisguéma. ¹⁹ Ipémiro Moisés ora iragántane Tosorintsi. ¿Aisonorico? Carari te poro quemisantirone obiro-jeguiquë. ¿Pairo picogobique pógaiguena Naro?

²⁰ Yotabitaiganaqueri joríojegui:

—Teni pineicotajima. Inanquimini camagari. Teni pairi nintatsine iróguimi.

²¹ Icanqueri Jesus:

—Patiro cara nitasonganque sábaroquë irooti piquenganeintasantanaca. ²²⁻²³ Yogometaiquëmi Moisés ora pameta pitoitiri pitomijegui. Yogomeantiro Moisés ora icanque omatsiguenga jiraisonori. Cara sábaroquë pitoitëri pitomi arota pomoncaratiro irogomeantane Moisés, ¿Pairo piguisaneintobitaiguina Naro aroquenta noguibegasantëri janaitatsiri cara sábaroquë? ²⁴ Quero pinibatëgotiri matsiguenga ora conijatasitacha. Querootisati picomantëgotasitari quero ca pigótasantiri.

Inibatëgotaca Jesus nega ipaniaca.

²⁵ Ainta Jerosaresati icantobaca:

—¿Iriroco Ira icogaigui iróguiri? ²⁶ ¡Pinetseri! Yogometaiqueri antagaisati matsiguenga carari te ingantaigueri pairoraca natingomipague. ¿Aisonorico igóguiri Iriro Quirisito Ira agabisaicoontatsi? ²⁷ Carari nigóguiri Ica negaraca ipaniaca. Cara iribocapë Quirisito quero pairi ogótiri negaraca imaniëma.

²⁸ Cara oquibequë pongotsi irasi Tosorintsi cara yogomeantasegui Jesus. Yotabitanëri catsigue:

—Pijitaigabitaca pigóguina Naro, aisati pijitaigabitaca pigóguë negaraca nopaniaca. Carari te nopocasitima. Nipoque igáquinanta Ira aisonori. Teni pigógueri obiro. ²⁹ Naro nigótiri aronta nopaniaca cara Iriroquë. Aisati Irirota agáquina.

³⁰ Icogaigabitaca iráquerime carari te pairi águirine terainta omoncaratima cataguiteri cara irágaiguëri.

Pënibaque iriátë Jesus.

³¹ Ainta tojai quemisantaiguëri icanque:

—Cara iriboquë Quirisito, ¿Aroco irobapëri Ica sërarica cara itasonganti?

³² Igóguë bariseo cara inibatëgotëri matsiguenga Ira Jesus. Iriro aisa itingomi saseriroti agátaiguëri ira omisantiro oquibe pongotsi cara iráqueri Jesus. Yarepari. ³³ Icabëri Jesus:

—Arosataanti cataguiteri ninë obiroquë. Aique najátaje cara agáquinariquë.

³⁴ Pingogabetaigaina quero piniajina, queronta piáigui cara ninë.

³⁵ Aique iparintaca yosamitobaca jorío:

—¿Atiroco iriátë Ica cara quero aniajiri? ¿Caraco iriátë cara iátagueque jorío jirai iguebat-sitequë ira cagari jorío? ¿Cara irogometaiquëri ira cagari jorío? ³⁶ ¿Pairo ocanti irinibare cara icanque: “Pingogabetaigaina quero piniajina, queronta piáigui cara ninë”?

Inibatëgotiro Jesus nija timagantatsiri.

³⁷ Cara cataguitëriquë carantatsiri cara yapatotaiga jorío, iroonti cataguitëriquë caninaro, icaimanë Jesus icanë catsigue:

—Aintaca paniro imiretasantë isërequë, iribocasitapënata nomëri ora icogui. ³⁸ Cara ocanti Sanguenari, pairiraca quemisanquerine Quirisito, cara iraneingomentoquë ocontianëri nija timagantatsiri.

³⁹ Jesus yosiacagantacaro nija iroonti icomantëgotëro Caninaro Isëre Tosorintsi inantasëretëmari antagaisati ira quemisanqueri Quirisito. Terai oguëpe Isëre Caninaro terainta iragainocanaima Jesus Jonogaguitequë.

Icantobagobicari Jesus.

⁴⁰ Ainta inasegui matsiguenga cara iquemobëro irinibare Jesus icanque:

Aisonori Ica sërarica Iriro comantantatsiri Ira isanguenatocoque Moisés jiraisonori Ira boquënguitsine.

⁴¹ Ainta basini icanque:

—Iriro Quirisitosonori.

Ainta basini cantënguitsi:

—¿Atiroco imaniëma Garireaquë Quirisito? ⁴² Ocanti Sanguenari Quirisito imatsiguenga David itingomi jorío jiraisonori. Aisati ocanti imaniëma Berénquë iboeborotequë David.

⁴³ Aro ira matsiguenga icasiriconiatubiritaiganacari Jesus. ⁴⁴ Ainta icogaigabitaca iráguirime, carari te pairi cantirine. ⁴⁵ Ira omisantiro oquibe pongotsi ipigasiiganaja cara agátiririqüë, ira bariseo aisati saseriroti. Yosamitaigabajiri bariseo:

—¿Pairi te pomabiripëri?

⁴⁶ Yotabitanëri ira omisantiro pongotsi:

—Teni irine sërari nibatatsi ibega Iriro.

⁴⁷ Yosamitairi bariseo:

—¿Aisatico obirojegui yamatobitaiguëmi? ⁴⁸ ¿Iquemisanquerico itingomi jorío, aisati iquemisanquerico bariseo? Teni. ⁴⁹ Carari icaegui matsiguengaca te irogótiro ora isanguenaque Moisés yamai ingasitígatëri Tosorintsi.

⁵⁰ Ainta Nicoremo ira bocasitëri Jesus jirai. Irianti bariseo. Icanqueri:

⁵¹ —Quero acasitígatiri pairiraca queroqueraica icomantëgota. Cara anguemaquerintata aroque ogóqueri pairoraca icanti, aro angasitígatëri. Intsomenta anguemirinta cara ocanti isanguenare Moisés.

⁵² Isintsitsaqueri:

—¿Aisatico obiro popaniaca Garireaquë? Pinibasantiro Sanguenari arota pigóte te pairi comantantatsiri paniachane Garireaquë.

⁵³ Aique iátaguetaji panirootipague cara ibangoqüë.

8

Ora tsinane antagueantatsiri.

¹ Carari aique iáque Jesus oguitojaqüë jitacha Olibos. ² Oquëtaguetanë ipiganaja oquibeqüë pongotsi irasi Tosorintsi. Ipocasitaigapëri tojai matsiguenga. Isobiaque Jesus yogometaiqüëri. ³ Aro ira bariseo aisati ira ogomeantiro isanguenare Moisés yamaigapëro poro tsinane ora aguimintari ojime. Yamaigapëro yoguëro aganguisatiqüë, icampëri Ira Jesus:

⁴ —Ogometinari, oca tsinane naniaiguëro aique nágaiguëro paguimintasegari ojime. ⁵ Ora isanguenare Moisés pigátaiguina nobasegaiguëro ora tsinane cantacha negaca. ¿Ati picanti Obiro?

⁶ Icantaiqüë negaca cara iraniantimari Jesus arota ingantocotasitimari Iriro. Aro yoguitanaca Jesus isanguenabatsatanë quibatsiquë ibatsapocoqüë. ⁷ Përosati yosamitapininqueri. Aro icabiritanaa Jesus icanqueri:

—Aintaca obirojeguiqüë pairiraca te ingantaguete ora te onganinate, iritsita miongatëquerone obatatsi mopë.

⁸ Aisati yoguitanaa Jesus isanguenabatsatanai quibatsiquë. ⁹ Cara iquemobëro irinibare Jesus, aro antagaisati irirojegui igónjinca icantaguetironta ora te ongomeite. Isotocaiganaque bariseo porocague. Iritsita obaquenguitsi antiásiparipague aique isotocaiganaque ira basinipague. Irinibani Jesus, aisati tsinane aisati irogomerejegui. ¹⁰ Aique icabiritanaa Jesus yosamitëro:

—Tsinane, ¿Atini yamai ira comantëgotëmi? ¿Te pairi baseguimine?

¹¹ Ocanque:

—Teni, Natingomi. Teni irinëmataje.

Icanquero Jesus:

—Querootisati nacasitígatimi Naro. Yamai pijátaje. Quero pogatsitairo ora te ongomeite.

Jesus iguëtaguiterite omagaro matsiguenga.

¹² Aisati Jesus yogometajiri irogomere icanqueri:

—Naro osangueguitesëretocotasantaguetiri omagaro matsiguenga arota nogótacaguiri ora icantagueti te onganinate. Aisati nacantaro pibega cataguetiri posangueguitetasanotiri iraineingementoqüë matsiguenga. Ira aguiatina quero yanëiti tsitiniriquë. Nosangueguitetocoqueri cara isërequë arota inguemisanquina intiomoquina Jonogagueteqüë përosati.

¹³ Aique icantaiqüëri bariseo:

—Picomantëgotaca Obiati. Notsoinguëmini. Teni pingantiro ora aisonori.

¹⁴ Yotabitanëri Jesus:

—Aroca nongomantëgotima Naati, nacantiro ora aisonori nigótinta Naro nega nopaniaca aisati nega najáque. Te pigóigue obiro negaraca nopaniaca teatisati pigóigue negaraca najáque. ¹⁵ Obirojegui cantëgoiguina terainta pigóiguero ora aisonori. Teni nangantocotiri pairiraca Naro. ¹⁶ Carari aroca nongomantëgotiri nanganquero ora aisonori quero nacantocotiri paniro Naro. Intsibatëna Pabati Irironta agáquina. ¹⁷ Isanguenareqüë Moisés ocanti aroca pite sërari inguengaiguema cara ingomantëgotëri matsiguenga, pinguemisantiri. ¹⁸ Yamai nacantococa Naro aisati icantocotina Pabati Ira agáquina. Ainta pite.

¹⁹ Aique yosamitaigüëri:

—¿Nega ini Piri?

Yotabitanëri Jesus:

—Teni pigótina Naro, teatisati pigótiri Pabati. Aroca pigótiname Naro, arome pigóqueri Pabati.

²⁰ Oca nibarintsica icanquero Jesus cara yogomeantasegui oquibequë pongotsi irasi Torosintsi cara yoguiri joriojegui quirequi. Te pairi águirine terainta omoncaratima cata-guiteri cara irágaiguëri.

“Quero piáti atiraca najáque Naro”.

²¹ Aisati icanantajiri Jesus:

—Canta najáque Naro, pingogaigabitëna obiroyegui quero piniajina queronta piáti cara najátaje Naro. Pingamaque queroquerai pijoquero ora picantagueti te onganinate. Quero popasiniatitaji.

²² Yosamitobaca joriojegui:

—¿Iragamaquëmanico cara icanque quero íati eiro cara iriátë Iriro?

²³ Icantaguëri Jesus:

—Obiro timaigatsi yaca osobica. Naro paniacha jonoquë. Obiro paniacha quibatsica. Naro te nomaniema quibatsica. ²⁴ ¿Teco nongomantimi cara pingamaiguë queroquerai pijoquero ora picantagueti te onganinate? Queroca piquemisantina Naro aro quero nojocajimiro ora picantagueti te onganinate, aro pijáiguë cara Sharincabeniquë.

²⁵ Yosamitaiguëri jorio:

—¿Pairi pijita Obiro?

Icanquero Jesus:

—Aroque nocomantëmi jirai. ²⁶ Aiti tojaiquerai nongomantëgotaiguëmi. Igáquina Pabati Tosorintsi nongomantaguequeri matsiguenga ora icanque Pabati ora icanti aisonori.

²⁷ Te irogótaiguero jorio cara Jesus inibatëgotëri Tosorintsi Iriro.

²⁸ Iroro icanqueroi Jesus:

—Cara popëicoquina corosiquë Naro matsiguengatapënguitsi, aro cara pigóiguëna Naro aisonori. Aisati pigóiguëna teni nangantasitima Naati. Iroonti nacanque ora icanti Pabati ²⁹ Irironta tsipatina Pabati. Te irioquina paniro përonta cara nacantiro ora ininti Iriro.

³⁰ Cara inibatë Jesus negaca, aro iquemisantaganaqueri tojai matsiguenga.

Itomijegui Tosorintsi aisa ira antaguetiro ora te onganinate.

³¹ Aique Jesus icantauiguëri jorio ira quemisanqueroi:

—Aroca përosati pinguenguero pinguemisantiro nanibare, obiro nogomeresonori.

³² Aique pigótaigabaquero nasi nanibare iroonti irorosonorori. Ongantacaquemi arota quero picantagueigui përosati ora te onganinate. Quero imerataimi Satanás quero icancacagajimiro ora quimingaro. Irojocobentajimiro Tosorintsi ora quimingaro.

³³ Yotabitaiganaqueri jorio:

—Naroequi imatsiguenga Abaram. Te pairi merataiguenane. ¿Pairi picantobique: “Quero imerataina Satanás”?

³⁴ Icantaganaqueri Jesus ira jorio:

—Nangantasantëmini, antagaisati ira cantaguetiro ora te onganinate irianti iromeraro Satanás. ³⁵ Atiraca ongantima iraninte, ira meratari iromeraro irioquiri sotoquë, carari itomi casintaro pongotsi përosati irinaque. ³⁶ Iroro aroca nomasiniatitanaimi Naro Itomi Tosorintsi, quero picantagueigui përosati ora quimingaro. Quero imerataimi Satanás. ³⁷ Nigóiguimi obiro imatsiguenga Abaram, carari piquengaiga pigamagaiguëna tenta pinguemisantobëro nanibare paneingomentoquë. ³⁸ Ninibati Naro ora naneicoqueri Pabati. Picantagui obiroyegui ora icanti pasi piri, piquemaiguëri.

³⁹ Yotabitaiganaqueri jorio:

—Nasiati pabati Abaram.

Carari icanqueroi Jesus:

—Obiroca imatsiguengasonori Abaram, pingantaiguero aisa ora icanti Abaram. ⁴⁰ Carari yamai picogaigui pigamagaiguëna cara nocomantaiguëmiro ora aisonori ora naquemaque Pabatiquë Tosorintsi. Abaram te ingantiro negaca. ⁴¹ Obiroyegui picantaiguero irootisati ora icanti piri.

Aique icantaganaque jorio:

—Naroequi teni ninasitima aisa picanta Obiro pinasita, carari ainta nasi Pabati Irianti Tosorintsi.

⁴² Icanë Jesus:

—Irirome piri Tosorintsi aisonori, pinintaiguename Naro, Naronta paniacha Tosorintsiquë. Teni nopocasitima, igáquinani Iriro. ⁴³ ¿Pairi te pinguemobitiro nanibare? Teni pinguemaiguero tenta pingoguëni pinguemisantiro. ⁴⁴ Obiroyegui irasi Satanás. Iriro piri

irianti camagari. Picogaigui pinganque ora icogui piri. Iriro ógueri cara jiraisonorí. Te irinibatiro ora aisonorí imaintirotinta. Itsogani irasinta icanta. Omagaro tsoigagansi paniacha Satanásiquè irironta tsoigagari matsiguenga. ⁴⁵ Obirojegui aisati picantari ibega iriro. Irore te pinguemisantaguètina ninibatironta ora aisonorí. ⁴⁶ Obirojegui yamai ¿Pairi cantênane aiti nacantagueti ora te ongemeite? Aroca ninibatêro ora aisonorí, ¿Pairo te pinguemisantobitina? ⁴⁷ Ira paniacha Tosorintsiquè inguemisantobêro Irinibare Tosorintsi. Te pinguemobêro obirojegui cagarinta obiro iraisati Tosorintsi.

⁴⁸ Aique icantaiganaque jorío:

—¿Aisonorico ninibataiguè Obiro Samariasati aisati inanquimi camagari quimingari?

⁴⁹ Yotabitanêri Jesus:

—Teni irinantina camagari. Patirontiatí nacanqueri ira matsiguenga iraniacani-nataiguèri Pabati, carari picantocotasitaguètina obirojegui ora te onganinate. ⁵⁰ Jemita iraniacani-nataiguè-nata Naro matsiguenga. Irinibatocotinata Tosorintsi ora caninaro. Aisati ingomantêgotaiguèmi Iriro obironta te pingomeitaigue. ⁵¹ Nangantasantêmini ora aisonorí, ira quemisantiro ora nacanti Naro quero icami isêrequè carari pêrosati intime jonoganta.

⁵² Icantaiganaque jorío:

—Yamai nigótasanoigui aisonorí inanquimi camagari. Icamaiguè Abaram aisati comantantatsirijegui. Carari picanque obiro: “Ira quemisantiro ora nacanti Naro quero icami”. ⁵³ ¿Obiroco obaqueri Abaram ira camênguítisi? ¿Obiroco obaqueri aisati comantantatsiririregui camênguítisi? ¿Obiroco Tosorintsi? ¿Pairiroco pijita Obiatí?

⁵⁴ Yotabitanêri Jesus:

—Aroca nanibatêgotêma quero ocomeiti, carari Irianti Pabati inibatêgotinaro ora caninaro. Iriati picantaigabitaca pasi pitosorintsite. ⁵⁵ Teni pigóigueri. Naro nigótiri. Arome nanganquimi teni nogótiri Pabati aro Naro tsoenti pibegaiga obirojegui cara pitsoigaiga. Carari aisonorí nigótiri naquemisantiro ora icanti Tosorintsi. ⁵⁶ Abaram pomatsiguenga jiraisonorí icaninatasanti cara igóque aikuenta nopoque Naro yaca quibatsica. Iquemisanquína icaninasêretê.

⁵⁷ Icantaiganaque jorío:

—Terai oretima 50 posarinite. ¿Piniakeri Abaram jiraisonorí?

⁵⁸ Yotabitanêri Jesus:

—Nangantasantêmini, cara teraiquerai irine Abaram, ainta ninêta Naro.

⁵⁹ Aito cara yágaiguèro jorío mopè cara iromiongatêquerime Jesus, carari aroque imánanaca Iriro cara matsiguengaque, isotocanè oquibeque pongotsi irasi Tosorintsi iátaji.

9

Yogaigubegajiri Jesus ira sêrari comarajatatsi cara iboguè.

¹ Cara yanêtê Jesus iniaqueri sêrari comarajari irinaga icomarajati cara iboguè. ² Yosamitaiguèri Jesus irogomere:

—Ogometinari ¿Pairo icomarajabirique ica sêratica cara iboguè? ¿Icantaguètinico iriri ora te onganinate, oraco iniro, iriatico cantênguítisi ora te ongemeite? ¿Irore ibogaguètê comarajari?

³ Yotabitanêri Jesus:

—Icomarajatasita. Te ingantaguete ica ora te onganinate, teatisati iriri, teatisati iniro. Icomarajati arota ongonijate itasorintsite Tosorintsi. ⁴ Cara yobariaque paba intarobacaaque matsiguengajegui. Cara ontsititanè quero itarobacaati. Aisa nacantaiga naroeigui. Yamai natarobacaataigui cataguèteriquè. Natarobacaatineri Ira agáquina. Aiquentata nangamaqueca quero natarobacaapai. ⁵ Iroontita ninasegui Naro yaca quibatsica, nosanguèguitetocotiri matsiguengajegui.

⁶ Cara itsonquero Jesus irinibare ijobaque quibatsiquè, yogaabatsaquero aro yáguè arosata yoguèneri iroquiquè comarajari. ⁷ Igáqueri:

—Yamai pijáte, pinguibaoguitima ogaarequè jitacha Siroé.

Siroé ocanti ogátaga. Aique iáque iquibaoguitaa aro ibeganaa, ipigapaa aroque iniaji. ⁸ Ira itimanamitanepague aisati ira niaiguèri jirai cara yamanopiantanti quirequi, ican-tocotaiguèri:

—¿Cagarico ini sobigatsi yamanopiantanti quirequi?

⁹ Ainta icanque:

—Iriro.

Ainta basini icanque:

—Cagari. Irianti irosiaqueri.

Icanè iriro:

—Naanti.

¹⁰Yosamitaiguëri:

—¿Ati picantaja cara piniaji?

¹¹Yotabitanëri ira comarajatabetacha:

—Ira jitacha Jesos yogaabatsaque quibatsi yoguinaro noroquiquë igáquina: “Pijáte Siroéqué pinguibaguitaima”. Aro niáque naquibatana aro nanianai.

¹²Yosamitaiguëri:

—¿Atini yamai ira niagaimi?

Icanque iriro:

—Taa. Teni naniajiri.

Yosamitaiguëri bariseo ira comarajatabetacha.

¹³Yágaiganaqueri ira comarajatabetacha cara bariseoquë. ¹⁴Aro iroonti cataguiteri sábaro Ira Jesos yogaabatsaque quibatsi ora yogaguibegantaari comarajari. ¹⁵Aisati bariseo yosamitaigairi ati icantaja ca inianai. Icanqueri:

—Yoguënaró Jesos cajabatsari noroquiquë, aique naquibataa nanianai.

¹⁶Ainta bariseo icanque:

—Ira aguibegajimi te aro imaniema Tosorintsiquë itarobacaquenta sábaroquë.

Ainta basini bariseo icanque:

—¿Atiroco inganquima iritasongantagueque ira sërari cantaguetatsira te pojocajenga?

Aro icasiriconiatitaiganaque bariseo. ¹⁷Aisati yosamitaigairi sërari comarajatabetacha:

—¿Pairo pingantocoqueri obiro yamai iniacagajiminta?

Icanque:

—Iriro comantantatsiri.

¹⁸Irari joríojegui te iranenti inguemisantaigueri ira comarajatabetacha yamaica aroque inianai. Icaimagantaiguëri iriri aisa iniro. ¹⁹Yosamitaigabaqueri:

—¿Iriro pitomi ica picantocoque cara iboguë comarajari? Ati icantaja iriro yamai cara inianai?

²⁰Yotabitanëri iriri aisa iniro:

—Nigóiguiri ica notomica. Nigóqueri ca iboguë comarajari. ²¹Carari atiraca icantaja yamai cara inianai teni nogóigue naro. Teatisati nogóigue pairiraca niagairi. Posamitaigueri iriro aroquenta iquibiaque cara ingomantëgotëma irineni.

²²Icanque iriri iniro negaca ipingaiguërinta jorío. Aroque icomantaguetaiguë jorío aroca pairiraca cantëgotërine Jesos Iriro Quirisito, irioquëri cara yapatoita jorío. Querootisati inintacaguiri icaí. ²³Iroco icantaguëque iriri aisa iniro: “Aroque iquibiaque. Posamitaigueri iriro”.

²⁴Aisati icaimaigairi sërari comarajatabetacha icanqueri:

—Pingantocotiri Tosorinti caninarisonori. Nigóiguiri ira sërarira ira aguibegajimi icanqueti ora te ongomeite.

²⁵Yotabitanëri iriro:

—Teni nogótiri iriroca cantaguetatsira. Patiro nigóque jirai nocomarajatabeta yamai aroque naniaji.

²⁶Aisati yosamitaigairi:

—¿Pairo icanquemi cara iniacagajimi?

²⁷Icanque sërari:

—Aroque nocomantaiguëmi carari te pinintaigue pinguemina. ¿Pairo picogui basini nongomantëmi? ¿Obiroco nintatsi pingantaiguemari irogomere aisati?

²⁸Yamai iguisatsatëri jorío:

—Obiro irogomere Jesos. Naroegui irogomere Moisés. ²⁹Nigóiguiri Moisés inibatëri Tosorinti. Ica te nogóigueri negaraca ipaniaca.

³⁰Yotabitaiganaqueri sërari:

—Naquenganeintasanotanëmi te pigóigue atiraca ipaniaca Ira niagajina noroquiquë. ³¹Nigóiguiri te inguemobëri Tosorinti ira cantaguetatsi te ongomeite, carari inguemobëri ira quemisanquerine intosroganëri, aisati inganquero ora icogui Tosorinti. ³²Cara oparintaca quibatsica irooti yamai te pairi niaguirine ira ibogatsi comarajari. ³³Aroca ica sërarica te imaniema Tosorintsiquë, quero itasonganti.

³⁴Iguisatsataiguëri bariseo:

—Teni pingomeite obiro. Picantaguetasanoti ora te ongomeite. Iroco pibogaguëque comarajari. Pijáte. Querootisati picai cara napatotaiga narogui jorío ibangoquë Tosorinti.

Ira te inguemisantiri Jesoquirisito icomarajatini isërequë.

³⁵Jesos iqemocoqueri sërari comarajatabetacha aroque ijocaguëri jorío. Iniajiri yosamitëri:

—¿Piquemisantiri obiro Ira paniacha jonoquë matsiguengatapënguisti?

Icanque sërari:

³⁶—Ogometinari, ¿Pairi ijita? Pingomantinari arota nanguemisantanëri naro.

³⁷ Icanqueri Jesus:

—Yamai aroque piniaqueri. Naromë nibatacaguimica yamai.

³⁸ Aro ira sërari yobaticagueritotanaca icanëri:

—Natingomi, naquemisantimi.

³⁹ Aique icanque Jesus:

—Iroto nipocasi que yaca quibatsica nongomantëgotaguëri matsiguengajegui. Ira comarajasëretatsi tenta irogótiri Tosorintsi, iriro nogótacaqueri ingantajimari naniacagajiri ira comarajatabetachari. Carari ira jitabitacha igótiro omagaro ora aisonori, nobegopitairi ora igótabeca; inganquimari ibega comarajasëretatsiri.

⁴⁰ Ainta bariseo inasegui iquemobëro oca nibarintsica yosamitaiguëri:

—¿Atiroco nacantaiga naro? ¿Nocomarajasëretaguinico?

⁴¹ Yotabitanëri Jesus:

—Arome pingomarajasëretague, querootisatime pini ora picantaguëti te onganinate. Carari yamai pijitabetaiga pigóiguero ora aisonori. Iroto iniaiguëmi Tosorintsi picantague-tasanotomotaiguëri ora te ongameite.

10

Jesos caninari omisantantatsiri.

¹ Përosati yogomeanti Jesus:

—Nangantasantëmini ora aisonori, ira quero iqui omoroquë cara itantota oisha iri-anti cosirinti, carantanta iratanë jonoquë tantotsi. ² Irari catsi omoroquë irianti omisantaiguëri iroishate. ³ Ira omisantiro sitëcori irasirigotobëtiguëri ira omisantantatsiri. Aisati inguemaibagaqueri oisha irironta casintari cara ingaimantaigapëmari iripajiroquë, iraguiataganaqueri sotoquë igótironta ora irinibare ira omisantirira. ⁴ Cara iromisotocaigapëri irobatacaganëri iroishate iraguiataguëri igótsatironta irinibare. ⁵ Irari quero yoguiatiri ira te irogótsatiri. Irisigabitsatanëmari tenta irogótsatironi irinibare.

⁶ Icomantaiguëri Jesus oca quingabaguirentsica carari te inguemaigabaquero matsiguenga ora icanqueri. ⁷ Aisati icanai Jesus:

—Nangantasantëmini ora aisonori, Naro nacantaro pibega sitëcori cara icaiguero oisha.

⁸ Antagaisati ira boquënguisti cara teraique nopoque Naro irianti cosirinti, aisati matobiantatsiri carari iriro te inguemaigabaquero oisha. ⁹ Nacantaro sitëcori. Naanti irareantima Tosorintsiquë matsiguenga ira quemisanquinane. Aro iragabisaicoqueri Tosorintsi. Nantsibatëmarinta nomisantëri cara inganaque aisati cara nomisotocanaïri aisa icantari oisha cara iromingabaquëri omisantantatsiri aique iraguiatëri sotoquë irapë. ¹⁰ Iroonti ipocasi que cosirinti ingositëni oisha aisa iragamaguëri iripoguiriaqueri. Carari nipoque Naro nantimasanotaquerini matsiguenga arota inganinatasanotanë. ¹¹ Naro caninari omisantantatsiri. Ira omisantantatsiri ingamobiquëri iroishate aisa Naro nangamobitaiguëri antagaisati ira quemisanquina. ¹²⁻¹³ Ira iromeraro omisantantatsiri te iranintiri iromisantasantineri iroishate. Paniro inintiri quirequi iripënantëri casintari oisha. Cara iraniobëri otsitiniro intsoroganëtiguëri irojocanëri oisha cagarinta irasi irisiganëma. Aro iráqueri otsitiniro oisha iragamagequeri iromisiaguequeri. ¹⁴⁻¹⁵ Naro caninari omisantantatsiri. Nigótiri noishateegui aisati igóiguina Naro. Aiquenta nangamobiquëri ira quemisanquinara. Irro cantaca ibega noishate. Aisa nacanta Naro nigótiri Pabati aisati igótina Naro. ¹⁶ Ainta basiniatipague tojai inguemisantaiguëna. Irro cantaca noishate aisati. Irrojegui nomapëri atosati, inguemisanquero nanibare, nopatotaiguëri omagaro Naronta paniro iromisantantatsirite.

Jesos inibatëgotaca cara ingamaque.

¹⁷ Përosati yogomeanti Jesus:

—Iroto inintasantaguëtina Pabati aronta nangamobiquëri Naneni noishate aisati nanganiatae. ¹⁸ Quero pairi óguinane. Naneni camasibiriquimarine matsiguenga. Aisonori nangamasiquima Naro aisati nanganiatanae. Iroto ora igáquina Pabati.

Icantobitobacari Jesus.

¹⁹ Cara iquemaigabaquero jorío nibarintsica, te inguengaiguema icantobitobacari Jesus.

²⁰ Ainta icanque:

—¿Pairi piquemisantobiquëri inancarina camagari? Irianti ichabënitaga, intaguëta-sitaro ora te inguenguema, teatisati iraneicotima.

²¹ Carari ainta basini icanque:

—Quero inibati sërari icanti negaca aroqueca inancari camagari. ¿Aroco iraniacagajiri camagari ira comarajari?

Ira joríojegui iguisaneinqueri Jesus aisati te iranintiri.

²² Cara tsaengaquë tojai jorío yapatotaigaca cara Jerosarénquë cara iquengaiguëro jirai cara yobetsiquëneri ibango Tosorintsi. ²³ Yanëisigui Jesus oquibequë pongotsi irasi Tosorintsi cara pinasegui omoro ora yobetsiquë Saromón jirai. ²⁴ Ishongaigapari jorío yosamitapëri:

—¿Ati ongantima pingomantëgotëma pairiraca pijita? Pingomantaiguena catingasati Obiroca Quirisito Agabisaicoontatsiri.

²⁵ Yotabitaiganaqueri Jesus:

—Aroque nocomantabitaguëmi carari te pinguemisante. Aroquesati nitasongantagueue ora igáquina Pabati Tosorintsi carari te pinguemaigue. ²⁶ Teni pinguemisantaiguena cagariminta noishate. Ira noishate iquemisanquina. ²⁷ Aisati iquematsatina noishate ira quemisanquina, nigóiguiri Naro, aisati yoguiataiguina. ²⁸ Nomaiguëri përosati intiomotaiguëri Pabati Tosorintsi Jonogaguitequë. Nomisantantaiguëri. Quero iáti Sharincabeniquë, querootisati pairi ágabitsatinari. ²⁹ Iraegui ipëna Pabati, Ira obaqueri antagaisati. Iriro sintsirisonoriguinte. Quero pairi ágabitsatirine Pabati. ³⁰ Naro aisati Pabati paniro ninaigui.

³¹ Aito cara yágaigairo mopë jorío cara iromiongatëqueri Jesus. ³² Icanqueri Iriro:

—Tojai piniaguëna cara nitasonganti. Tojai noniaguëmiro ora caninaro aroquenta igáquina Pabati. ¿Pairo pininti pobasegobitaiguëna?

³³ Yotabitaiganaqueri jorío:

—Quero nibasegaiguimi aroquenta picanque caninaro obiro. Orari nobasegobitaiguëmi cara picantocotaguetasitarinta Tosorintsi. Aisati cara pijitaja Tosorintsi Obiantinta matsiguenga.

³⁴ Icanqueri Jesus:

—Jirai Tosorintsi inibantaro Sanguenari cara icantocoqueri ira jitacha joes: “Obirojegui tosorintsi”. ³⁵ Nigóiguero ora Irinibare Tosorintsi iroonti ora aisonori. Aroca Tosorintsi ijitaiguëri tosorintsipague ira joes, ³⁶ ¿Iroro pairi picantocobiriquina cara nancantocotaguetasicari Tosorintsi aroquenta nacanque Naro Itomi Tosorintsi? Icasiriconiatiquena Pabati Tosorintsi aisa igáquina yaca quibatsica. ¿Aisatico pingantocoqueri Tosorintsi: “Icantasica cara icanque ‘Obirojegui tosorintsi’ ”? ³⁷ Queroca nacantiro Naro ora icanti Pabati, quero piquemisantina. ³⁸ Carari aroca nanganquero, aro pinguemisantiro, queroca piquemisantiro nasi nanibare. Iroro pigóiganaquero përosati ainta Pabati Naroica, aisati Naro aintana Iriroquë.

³⁹ Aisati icogaigabitaca jorío iráguirime Jesus, carari isigopitanacari.

Iáque Jesus Joriránquë.

⁴⁰ Aique iáque Jesus Joriránquë imontianaca aiquero onamijaquë cara icontetiquero paba. Itimaque cara ibaotisantanti Joan jirai. ⁴¹ Ipcasitaiguëri tojai matsiguenga, icantocoqueri:

—Te iritosongante Joan, carari aisonori antagaisati ora icomantëgotëri ica sërarica.

⁴² Carari canta iquemisantaiguëri Jesus tojai matsiguenga.

11

Icamaque Irásaro.

¹ Ainta poro sërari jitacha Irásaro ijanaitasantë. Itimi Betaniaquë oboeborote iritsiro pite ora jitaigacha María aisati Márta. ² Oca María iritsiro Irásaro ira janaitatsi ora tiriqueri casangajengaro iguitiquë Jesus aisati pobiriatantajari oguisi. ³ Oca pite iritsiro Irásaro pigántëri Jesus ocomantagantëri:

—Natingomi, ijanaitasantëni agabenisonori ira pininti pamigote.

⁴ Iquemobëro nibarintsi Jesus, icanque:

—Quero icami përosati. Ijanaitë arota ira matsiguenga iraniacaninataiguëri Tosorintsi caninarisonori aisati irogóiguëna matsiguenga Naro caninari Itomi Tosorintsi.

⁵ Ira Jesus inintasantiro Márta aisati María aisati Irásaro, ⁶ carari igótabeca Jesus cara ijanaitasantë Irásaro, përosati itimaque pite cataguteri cara inasegui Jesus. ⁷ Aique icanqueri irogomere Jesus:

—Intsome aisati Joreaquë.

⁸ Icantaiguëri irogomere:

—Ogometinari, cani icogaigabitaca jorío canta iróguimime iribasiaquimime. ¿Yamai aisatico pijátaje canta?

⁹ Icanqueri Jesus:

—Cara irigontepë paba irosanguemitocotaigapëri matsiguenga. Aroca iranëitë pairiraca cataguitëriquë quero intibata. ¹⁰ Carari caraca iranëique tsitiniriquë iran-tibaquima tenta ineti iguëtaguiterite. Aisa nacanta Naro quero nacami canta queroquerei pareta cataguitëri cara irôquina.

¹¹ Icanque negaca. Aitosa icanquëri:

—Yamai isamini namigote Irásaro carari najáque nangabacapairi.

¹² Aique icantaiguëri irogomere:

—Natingomi, isaminica aro irobegajima.

¹³ Igóque Jesus cara aroque icamaque Irásaro. Inibatëgotëri cara icanque isamini, carari te inguemaiguero irogomere. Ijique iriro aisonori isamini Irásaro. ¹⁴ Aique icanque Jesus catingasati:

—Aroque icamaque Irásaro. ¹⁵ Caninataque te nine Naro canta arota pinguemisantansan-tanëna. Yamai intsome ajáigue canta.

¹⁶ Tomás aisati ijita Tspari icanquëri irogomere basini:

—Intsome eiro arota angamaigue aisati anganquimari Iriro.

Jesus inibatapëro Márita.

¹⁷ Yaretaiganaca canta Betaniaquë. Icomantaigabaquëri aroque itiaiguëri otsibasati cataguitëri. ¹⁸ Aronisatiquë Betania otsibatáro Jerosarën maba quirómetro. ¹⁹ Iroro ipocasitaigapë tojai jorío iraganinataigapëro Márita aisati María aroquenta icamaque ojariri. ²⁰ Cara oquemocotobëri Márita Jesus piáque pitonguibotobacari, iroroque María përoca pinë pongotsiquë. ²¹ Ocabëri Jesus Márita:

—Natingomi, aintamime pinasegue Obiro yaca, querome icami jai. ²² Carari nigóque naro imëmiro Tosorintsi antagaisati ora pomanaquëri.

²³ Icanëro Jesus:

—Ira pijariri aro inganiatanae.

²⁴ Ocanque Márita:

—Jee, nigóque cara cataguitëriquë carantatsiri ingabiritaigaima antagaisati ira camënguitsi.

²⁵ Aique icanquero Jesus:

—Naro aganiataguetiri ira camatsi nomairi intimaje. Ira quemisantina ingamabequima carari cara aisa inganiatanae. ²⁶ Aisati antagaisati yamai ira caniaru iquemisanquina, aroca ingamaque yaca quibatsica, përosati intimanë canta Jonogaguitequënta. ¿Piquemisan-tiro oca?

²⁷ Potabitanëri Márita:

—Jee, Natingomi. Naquemisantimi Obiro Quirisito. Obiro Agabisaicoontatsiri Itomi Tosorintsi. Noguiaiguëmi cosamani Obiro cara popogopë yaca quibatsica.

²⁸ Pitsonquero pinibatë Márita, aique piáque ocaimëro María irento, ocanquero comanoroni:

—Ainta Ira ogomeantatsi. Icaimagantimini.

²⁹ Cara oquemobëro María oca, omanapague ocabiritanaca piáque Jesusiquë ³⁰ teraquërai iraretima Jesus poeboroquë, përo cara inasegui cara pitonguibotobacari Márita. ³¹ Aroqueque ipocasitaigapëro jorío arota iraganinatiro iritsiro Irásaro. Cara iniaigabaquero María ocabiritanaca omanapague pisotocanë, ijique cara piáque oraquima cara itiaica Irásaro. Aro yoguiataiganaquero. ³² Parecari María Jesus pobaticagueritotasipari ocanquëri:

—Natingomi, aintamime pinasegue Obiro yaca querome icami jai.

Jesus iracoquëri Irásaro aisati yoganiatairi icabiritajiri.

³³ Jesus inioberô piragopa aisati iragaigapa jorío itsibataigaparo, icantaneintëgotëro Jesus yogasëretanaca, ³⁴ yosamitaiguëri:

—¿Nega pitiaquëri?

Icantaiguëri:

—Natingomi, omana pinetsapëri.

³⁵ Aro iraganaca Jesus. ³⁶ Icantaiganaque jorío:

—¡Pinetsëri! Inintasantirini.

³⁷ Ainta basini jorío icantaiguë:

—Ica iniacagajiri comarajari; ¿Teco ingantiri Irásaro arota quero icami?

³⁸ Aisati icantaneintasantanaca Jesus yotsitipari cara itiaica Irásaro. Iroonti yasitocoontacari mopë. ³⁹ Jesus igáquëri jorío icanquëri:

—Posibitiro ora mopëra.

Ocanë Márita iritsiro Irásarotomaco:

—Natingomi, aroquejengari isititë aroquenta ocarati otsibasati cataguitëri cara itiaica.

⁴⁰ Carari icanëro Jesus:

—¿Teco nangantimi aroca piquemisantina, aro piniaquero itasorintsite Tosorintsi?

⁴¹ Aito cara yágaiguëro mopë yasirecoqueri. Inetsë Jesus jonoquë yamanocotanëri Iriri: —Pabati, nacarasiaquimini piquemaquinanta. ⁴² Nigóque përosati piquemina carari ninibabentaiguëri ica matsiguengaca arota inguemisantaiguena aisati irogóigue Obiro agáquina.

⁴³ Aroque yamanaqueque icaimëri:

—¡Irásaro, pingabiritima pisotogopë!

⁴⁴ Aito cara isotogopai Irásaro caniari iponataparo tocoya ibacoquë aisati iguitiquë aisa iboroquë iponatapa. Igáqueri matsiguenga Jesus:

—¡Pintsaicotiri popabaquëajiri!

Aro icantaiguëneri.

Iquengaiganaca itingomipague jorío iróguiri Jesus.

(Mt 26.1-5; Mr 14.1-2; Ir 22.1-2)

⁴⁵ Ainta arosanori jorío aguiatapëro María. Cara iniaiguëri itasonganti Jesus iquemisan-tanëri tojai. ⁴⁶ Ainta basini jorío íaiguë bariseoquë icomantaiguëri antagaisati ora icanque Jesus. ⁴⁷ Aique ira bariseoegui aisati itingomipague saseriroti yapatotaiguëri omagaro itingomiegui jorío. Icantagabaqueri:

—¿Pairo anganqueri Ira sërarira cara itasonganti tojai? ⁴⁸ Queroca acantiri pairoraca, omagaro inguemisantaiguëri. Aisati iribocaigapë Iromasati irotëanëro intiboroquero oquibe pongotsi irasi Tosorintsi aisati irágopitaigacáiro aguebatsitejegui.

⁴⁹ Paniro jorío jitacha Caijás, iriro obatatsi itingomisonori saseriroti irooti osarini ora iribëquëgotanquimari Jesus. Icanqueri imatsiguenga Caijás:

—Te pigóigue obiro pairoraca. ⁵⁰ Teatisati pigóigue caninataque cara ingamobitaigacáiro poro sërari arota quero ipoguiriagái Iromasati.

⁵¹ Te irinibatiro oca irineni Caijás. Irironta itingomisonori saseriroti, ocantacaqueri negaca Caninaro Isère Tosorintsi, cara icantocoqueri Jesus ingamobitaiguëri omagaro jorío. ⁵² Aisati ingamobitaiguëri antagaisati ianiquite Tosorintsi negaraca itimagueti, irapatotaigairi. ⁵³ Yamai iquengaigaca itingomiegui jorío irobetsaiguëro cara iróqueri Jesus.

⁵⁴ Iroto te iranëitaguëtaje Jesus Jerosarénquë carari isotocanë Joreaquë íaque poe-boroquë otiomijani jitacha Eparaín aronisatiquë piriabatsaro cara tera ontimingani. Cara itimaiguë Irro aisati irogomere. ⁵⁵ Pënibaque orequima cataguiteripague jitacha Pásicoa. Yametaiga jorío iriáiguë Jerosarénquë iraguëtetima queroquerei pareta Pásicoa. ⁵⁶ Icoigaigabitacarí ira Jesus. Cara ibangoquë Tosorintsi yosaminaitobaca:

—¿Pairo piquengaiga? ¿Aro iribocapë Jesus Pásicoaquë? ¿Queroco ipoqui?

⁵⁷ Aroque icomantaiguë bariseojegui aisati itingomiegui saseriroti aroca irogóigue pairoraca negaraca ini Jesus ingomantëgotëri arota irágaiguëri jorío.

12

Itiriquengani Jesus casangajengaro.

(Mt 26.6-13; Mr 14.3-9)

¹ Ocaranibati 6 cataguiteri teraiquerai oretima Pásicoa íaque Jesus poeboroquë ojita Betania cara itimi Irásaro ira camabitënguicha, ira yoganiatai Jesus. ² Yobetsaiguëneri Jesus ora tojai perintsi. Irroque Irásaro isobiacaqueri Jesus cara mesaquë. Iroroque Márita pamajaigapëneri iraperi. ³ Aique pamapë María ongaraataga casangajengaro jitacha náriro ora pënatacha tojai pitiripëri iguiti Jesus, pobiriantajari oguisi. Piaingatagueque omagaro pongotsiquë. ⁴ Aito cara icanque poro irogomere Jesus jitacha Joras Cariotisati. Iriati ira ágagantërine Jesus caraquenta. Icanque Joras:

⁵ —¿Pairo te omimantobitiro oca casangajengaro arota águiri 300 tenario? Aique omaiguëri omitocotaguëtirime ira coguitiacha.

⁶ Joras, tenta iranintiri ira coguitiacha, iroto icantobique negaca irironta cosirinti iriatísati omisantaiguëneri omagaro irogomere Jesus itsaguineegui. Caraquesatantata ingositëri quirequi. ⁷ Icanqueri Jesus:

—Ineta iroto oca. Aroque poguëro casangajengaro irooti cara nangamaque. Cara queroquerei iteina, pomasangaengatobënaró. ⁸ Ainta përosati irinaigui ira coguitiachari obirojeguiquë, carari quero përosati ninagaiguimi Naro.

Iquengaigaca jorío iróguiri Irásaro aisati.

⁹ Tojai jorío iquemocotaiguëri Jesus cara ainta Betaniaquë. Íaigue cara iraniaqueri Jesus aisati Irásaro ira yoganiatai Jesus. ¹⁰ Iroto iquengaigaguëtaca itingomiegui saseriroti

iróguiri aisati Irásaro ¹¹ aroquenta iniasantëri tojai jorío ira Irásaro, ijocaiganaqueri saseriroti yoguiataiganaqueri Jesos iquemisantaiganaqueri.

Icanaque Jesos Jerosarénquë.

(Mt 21.1-11; Mr 11.1-11; Ir 19.28-40)

¹² Tojaisonorí jorío yapatotaigapa cara Jerosarénquë ora cataguitèripague jitacha Pásicoa. Oquëtaguetanë iquemocotaigabaqueri Jesos pënibaque irarepëma, ¹³ íaque icarasitëneri ora cantaca chorinasi itonguibotobacari imatacoboguitëneri icaimaiguë catsigue yamanaiguë:

—¡Caninarisonori Tosorintsi! ¡Coraguetaque Agabisaicootatsiri caninari! ¡Igåquinari Tosorintsi! ¡Obirai Natingomiegui! Pigáantë pinganquimari íbega David cara igáanti jiraisonorí.

Icantaigabaqueri negaca joríojegui.

¹⁴ Jesos iniaqueri oboina boro iqueicocari cara ocanti Sanguenari jirai:

¹⁵ Quero pitsorogui, obirojegui pitimaigui poeboroquë jitacha Sión. Pinetsaigabaqueri Pitingomi Ira bocatsi iqueicocari oboina boro.

¹⁶ Antagaisati oca te inguemaigabitimaro irogomere Jesos. Aiquentata cara icamaque Jesos icaniatanai yogainocaa cara Iririquë cara yoguibatobëri, aro yamai iquemaiguëro irogomere. Aro igótocotobëri antagaisati oca isanguenatocoqueri jirai. Irooti cara omoncaraca. ¹⁷ Ira matsiguenga neiri Jesos cara icaimëri Irásaro yoganiatairi yamai icomantagueantëro ora iniaiguë. ¹⁸ Iroro íataguëque matsiguenga itonguibocari Jesos aroquenta igótocoqueri cara itasonganti. ¹⁹ Iniaigabaqueri bariseo cara íatagueque matsiguenga icantobaganaca:

—Yamai pinetsabaqueri irobacáini. Yoguiataiguëri omagaro.

Ipocasitaiguëri Jesos guiriego.

²⁰ Cara Jerosarénquë ipocagapë arosonori matsiguenga iromanocotaiguëri Tosorintsi. Aintasati guiriego icogaiguë irogótasantiri Tosorintsi. ²¹ Yotsitaigapari ira Jeripe, Betsairasati ipaniaca cara Garireaquë. Icampëri:

—Namigote, nanintaiguini naneiri Jesos.

²² Íaque Jeripe icomantëri Antiris. Íaiguë pitirooti icomantëri Jesos.

Icomantë Jesos cara ingamaque.

²³ Icabëri Jesos:

—Nopaniaca canta jonoquënta. Nomatsiguengatapë. Yamai aroque pareca cataguitèri cara nangamaque nanganiatanae najátaje Jonogaguitequë aisati. Aro iraniacanicatanaigabaquëna matsiguenga. ²⁴ Nangantasantëmini ora aisonori, queroca ocamí poro oguitso tirigo panguitacha quibatsiquë, quero otojaiganaque patironta inë, carari omanguitëmaca ianë ontojaiganaque. ²⁵ Eiro aisati angantimaro pibega oguitso tirigo. Ira nintasanotacha iriati icogui intimasante yaca quibatsica, quero íati Jonogaguitequë. Irari cantaneintëgotiri basini matsiguenga, te inguenguema paniro iriati, aro intimaque Jonogaguitequë përosati. ²⁶ Aintaca nintatsi ingantinaro aisati inguemisanquina iraguiatina negaraca najátacaqueri. Aitosati intiomquina cara natimi Jonogaguitequë. Inganqueri Pabati Tosorintsi: “Caninataque ora picanque”.

²⁷ —Yamai nogasëretasantanaca. ¿Pairo nanganque? ¿Nomanocoquimanico: “Pabati, pigabisaicotina ora pënibaque natsipiriaquero? Quero nacantiro, iroronta nipocasique quibatsica natsipiriaquineri matsiguenga. ²⁸ Pabati, nocogasanti ingantocotimi matsiguengajegui: ‘Caninarisonori Tosorintsi’ ”.

Aito cara iquemaibagaquero matsiguenga Irinibare Tosorintsi jonoquë icanque:

—Aroque noniagaigacari caninarina. Përosati nangantajiro aisati.

²⁹ Aintapague matsiguenga canta iquemaigabaquitiguiro Irinibare Tosorintsi icanque:

—Iroonti tijiringa.

Ainta basini cantaigatsi:

—Inibatërinjengari ironomire Tosorintsi.

³⁰ Yotabitaiguëri Jesos:

—Inibatëna Tosorintsi arota pigóiganaque obirojegui iquemina Iriro. Aroque nigótiro Naro. ³¹ Yamai ingasitígataiguëri Tosorintsi antagaisati te inguemisantina. Aitosati Tosorintsi irioquëri jaara Satanás irironta agáqueri iraegui te inguemisantina. ³² Intinaiguëna canta jonoiqueronta, iroro nopatotantaiguëmari antagaisati matsiguenga, iribocasitaiguëna ira quemisanquinane.

³³ Cara icanque negaca icomantëgotaca Iriati ingamaque cara corosiquë.

Yosamitaiguëri Jesos jorío.

³⁴ Yotabitanëri jorío icanë:

—Nigóontacaro Sanguenariquë cara përosati intimaque Quirisito. ¿Pairi picantocoque Obiro Ira paniacha jonoquë aisati imatsiguengatapë intinaaqueri jonoiqueronta? ¿Pairi casintari Ira paniacha jonoquë?

³⁵ Icanqueri Jesus:

—Ora nogometimi yamai aisa ocantaro cataguiteri. Posangueguitetocotimi. Iroontita ninë obiroquë panëiguitetaigue cataguiteri queroquerai otsitinitocotaiguimi. Ira anëitatsi tsitiniriquë te irogóte atiraca iriatë. ³⁶ Naro aisati nacantaro cataguiteri nosangueguitetocotaiguimi. Iroontita ninë obirojeguiquë, pinguemisantaiguena arota panëiguitete cataguiteri. Aro pigóguëro ora aisonori.

Cara itsonquero oca irinibareca, iaque Jesus imánopitaigacari.

Pairi te inguemisantobitiri Jesus jorío.

³⁷ Tojai itasonganque Jesus catingasati quë joríojegui, carari te inguemisantaigueri. ³⁸ Omoncaraca ora isanguenaque jirai Isaías comantantsiri cara icanque:

Natingomi Notosorintsite ¿Pairi quemisanquero nanibaregui? ¿Pairi poniaguë pitasorintsite?

³⁹ Aitosati Isaías isanguenatocoqueri ira te inguemisantaigue inguemabequima icanqueri:

⁴⁰ Nangantacaquimari quero iniaigui ora icanti Tosorintsi, querootisati icogaigui inquemisantina, querootisati iquenguina, querootisati ipasiniatitaji, querootisati nogabisaicotajiri.

⁴¹ Isanguenaquero Isaías negaca aroquenta iniaqueri Jesus caninarisonorigunte icomantëgotëri. ⁴² Carari ainta tojai jorío aitosati ainta itingomi iquemisantabecari Jesus, carari te ingomantomotiri matsiguenga itorogogaigüerinta bariseo. Iquengaigaca: “Inguisaneinquina bariseo, quero inintacaguina naqui cara yapatotaiga nomatsiguenga”.

⁴³ Ira quemisantabetacha icogasanti iraniacaninataiguëri matsiguenga carari te ingogue iraniacaninatiri Tosorintsi.

Irinibare Jesus ongomantëgotëri ira te inguemisantiri.

⁴⁴ Icaimë Jesus icanque:

—Ira quemisantina Naro, te paniro Naro, aisati iquemisantiri Pabati Ira agáquina. ⁴⁵ Ira neina Naro, aisati iraniaqueri Ira agáquina. ⁴⁶ Nosangueguitetocotiri omagaro matsiguenga. Nipocasique Naro yaca quibatsica arota quero yanëitantaigaro tsitiniri ira quemisanquinane. ⁴⁷ Ainta poropague quemabitacaro nanibare te inguemisantina, quero nacasitigatiri yamai tenta nopoqueni nangasitigatiri matsiguenga. Nipoguini nagabisaicotajiri ira quemisanquinane. ⁴⁸ Ira te irágobëna Naro teatisati inguemisantobëro nasi nanibare, aiquenta nanibare ongomantëgotëri. Queronta iquemisantiro nanibare ingasitigatëri Tosorintsi cara cataguiteri quë carantatsiri. ⁴⁹ Teni nanibasitima iroonti ninibati ora igáquina Pabati. Igáquina Iririo omagaro ora ninibatë aisati ora nogomeantë. ⁵⁰ Nigóquero ora igáquina Pabati iroonti Nibarintsi timagantatsiri. Iroro patiro ninibati ora igáquina Pabati.

13

Jesus iquibaguitaiguëri irogomere iguitiquë.

¹ Terai oretima Pásicoa cara iquengaigairo jorío cara isotocaigai Ejípitoquë jiraissonori. Igóque Jesus aroque pareca cataguiteri cara irojocanëro quibatsi iriatæ Iririquë. Cara inintasantaiguëri quemisantatiri Jesus yaca quibatsica, yamai inintasantasanoiguëri. ² Cara yapaigasegui, aroque iquianacari Satanás ira Joras itomi Simón ipaniaca Cariotiquë cara iracagantëri Jesus. ³ Igóque Jesus aroque ipëri Iriri omagaro. Aisati igóque ipaniaca Tosorintsi quë aisati yamai iripiganajima jonoquë. ⁴ Icabiritanaca mesaquë, isaboquëro imanchaqui, yaguëro oquibiansa tocoya imatsaguitanacaro, ⁵ ishëro nija irabatarioquë, aro iparintaca iquibaguitaguequeri irogomere aique iseantaari tocoyaquë ora imatsaguisiga.

⁶ Cara pënibaque inguibaguitiqueri Simón Peroro aro yosamitëri Peroro:

—Natingomi ¿Pinguibaguitiquinanico naro?

⁷ Yotabitanëri Jesus:

—Yamai teni pinguemiro ora nacanti, aiquenta pinguemaquero.

⁸ Carari icanë Peroro:

—Naro quero piquibaguititina.

Yotabitanëri Jesus:

—Queroca naquibaguititimi, quero pini Naroica.

⁹ Aique icanqueri Simón Peroro:

—Natingomi, querori patiro piquibiro naguiti. Aisati pinguiabaquina nobacoquê, pin-guibaquina naguitoquê.

¹⁰ Icanëri Jesus:

—Ira quibacha irirai quero iquibaja omagaro, patiro iguitiquê inguibima aroquenta irinaga yoguêteta. Obirojegui pinaga poguêtetaiga paneingomentoquê carari te antagaisati pinguetetaigue.

¹¹ Icanque Jesus: “Teni antagaisati pinguetetaigue”, aroquenta igóque pairiraca ágagantêrine. ¹² Aroqueque iquibaguitaiguëri Jesus icairo imanchaqui aisati, isobiaque mesaquê. Yosamitëri irogomere:

—¿Pigótaiguëro oca nacantaiguëmica? ¹³ Pijitaiguina Ogomeantatsiri aisati pijitaiguina Pitingomi. Picantaiguëro ora aisonori Naronta Pitingomi. ¹⁴ Aroquenta naquibaguitaiguëmi Naro Ogomeantatsiri aisati Pitingomi, caninataque pinguiabaguititobaguima aitosati obirojegui. ¹⁵ Noniaguëmiro ora pingantaiguê aisa pinganquero obirojegui ora nacantaiguëmi yamai. ¹⁶ Nangantasantëmini ora aisonori. Ira iromerataga quero ibatiri ira meratari, aisati icanta ira iragátaga quero ibatiri ira agátirira. ¹⁷ Aroca pinguemaquero oca nocomantëmica, aro pinganinataiganaque pinganquero. ¹⁸ Teni nanibatëgoiguëmi omagaro obiro nigótasantimininta aroquenta nocoiguëmi. Nocoiguëmi arota omoncaratima Sanguenari ora ocanti:

Ira pëcoquina pan yamai iguisanëintanaina. Icoque iróguina.

¹⁹ Nocomantaiguëmiro negaca cara iróquinaca pinguenquero, përosati pinguemisanquina Naantinta Agabisaicoontatsiri. ²⁰ Nangantasantëmini ora aisonori pairiraca ágobërine ira nagáque aitosati irágobënanisati Naro. Ira ágobëne Naro aisati irágobëri Pabati Ira agáquina Naro.

Jesos icomantëgotëri ira ágagantêrine.

(Mt 26.20-25; Mr 14.17-21; Ir 22.21-23)

²¹ Cara inibatë negaca Jesus yogasëretasantanaca icantaiguëri irogomere catingasati:

—Aisonori nangantasantëmini, ainta paniro obirojeguiquê ira ágagantëne.

²² Aique inetsabacagaguetanaca irogomere Jesus. Te irogóigue pairiraca ira inibatëgotë Jesus. ²³ Paniro irogomere ira inintasanti Jesus yapanamitacagasegui. ²⁴ Simón Peroro ijigotanëri ira panamisiguiri Jesus arota irosomitiri pairiraca ira inibatëgotasegui Jesus.

²⁵ Ira panamisiguiri Jesus inebintasitanacari yosamitëri:

—Natingomi, ¿Pari pinibatëgoti?

²⁶ Yotabitanëri Jesus:

—Ira nomê pan nagaatane, iriro ninibatëgoti.

Aro yogaatëro pan ipëri Joras Cariotisati itomi Simón. ²⁷ Yágobëro pan Joras aito cara inantanacari Satanás. Aique icanqueri Jesus:

—Ora picogui pingantiro, pingantiro omanapague.

²⁸ Iquemabecaro basini irogomere Jesus. Te poro quemasantobërine Jesus. ²⁹ Irironta Joras omisantineri iguirequite irogomerejegui, ainta ijique igáquerini Jesus iromanante Joras ora asi jiesita. Ainta basini ijique igáquerini imëri quirequi ira coguitiachari. ³⁰ Cara yapëro pan Joras isotocanë, aroque otsititanë.

Jesos igáqueri irogomere: “Pinintobaganëma”.

³¹⁻³² Aroqueque isotocanë Joras, icanque Jesus:

—Omanapague yamai iraniacananataiguëna matsiguenga, ingantocotaiguëna: “Caninarisonori Ira paniacha jonoquê imatsiguengatapë”. Aitosati ingantocotaiguëri Tosorinti: “Caninarisonori Tosorinti aroquenta igáqueri Itomi yaca quibatsica”. Aisati yamai ingantocoquina Tosorinti: “Ira matsiguenga iraniacananataiguerita Notomi”. ³³ Obirojegui cantaca najaniquite, arosata yamai ninagaiganajimi cara queroquerai niáti. Pingogabetajina, carari cani jirai nocomantaiguëri jorío, aisati yamai nongomantaiguëmi obiro: quero piáti cara najáque Naro. ³⁴ Oca nagáquemi irorai, pinintobaganëma. Aisa nacanta Naro nanintasanotaiguëmi, aisati pinintasanotobaguëma. ³⁵ Aroca pinintobaganëma, aro antagaisati matsiguenga irogóiguëmi obiro nogomerejegui.

Inganque Peroro: “Teni nogótiri Jeos”.

(Mt 26.31-35; Mr 14.27-31; Ir 22.31-34)

³⁶ Icanëri Simón Peroro yosamitëri Ira Jesus:

—Natingomi ¿Nega pijáque?

Yotabitanëri Jesus:

—Cara najáque quero poguiatina yamai. Aiquenta piguiatapëna.

³⁷ Icanqueri Peroro:

—Natingomi ¿Pairo quero noguiabiritimi yamai? Aroca nangamobiquimi nocoguini naguiatimi.

³⁸Yotabitanëri Jesus:

—¿Aisonori pingamobiquinaca? Nangantasanotëmini aisonori cara queroquerai icaimi tiapa sërari, maba pingantocoquena: “Teni nogótiri”.

14

Jesús Irriro abatsisonori irooti Jonogaguítequë.

¹Aitosati yogometaiguëri irogomere Jesus:

—Quero pogaserëtaiganaca. Aroque piquemisanqueri Tosorintsi, yamai pinguemisan-taiguena Naro aisati. ²Canta itimi Pabati aiti tojaisonorori pongotsipague. Queroca pini, nongomantaiguëmiro. Carari yamai najáque nobetsicaiguëmiro canta. ³Cara najáqueca nobetsicaiguëmiro pongotsi, aique nopigasitaigaantimi Naro nágaiganajimi canta, atiraca ninë obirojegui aitosati pintiomoquina. ⁴Pigóiguë obirojegui atiraca najáque, aisati pigóiguëro abatsi.

⁵Icanqueri Tomas:

—Natingomi, teni nogóigue atiraca pijáque, ¿Atiroco ongantima ca nogóiguëro abatsi?

⁶Yotabitanëri Jesus:

—Naro abatsisonori noniaguëmi atiraca ongantima piretaiguëma cara najáque. Aisati noniaguëmiro ora catingasati, aisati nantimacaquimi cara pinguemisanquinanica. Quero pairi játasitirine Pabati Tosorintsi, Naanti iriátanquima cara irarequimari Pabati. ⁷Arome pigóquina Naro pigóitëmarime Pabati aisati. Yamai pigóiguëri aroquenta piniaqueri.

⁸Icanqueri Jeripe:

—Natingomi, poniagaiguenari Piri, arota nanganinataigae.

⁹Yotabitanëri Jesus:

—Jeripe, cosamani natsibataiguëmi. ¿Teraico pigóiguena? Ira niaiguëna iniaquerisati Pa-bati iriro. ¿Pairo pamanobiquina noniagaiguëmiri Pabati? ¹⁰¿Teco pinguemina Naro inatsi cara Pabatiquë aisati Ira Pabati inina Naroica? ¿Teco pigóigue Naro aisati nacantari Pabati? Oca nibarintsica ninibataiguimica, teni Naro nibatirone. Ninibatëro ora icanquena Pabati. Ira Pabati Ira inina Naroica Irriro Ira antiro paniro itarobacaare. ¹¹Pinguemisantina aintana Naro cara Pabatiquë aisati Irriro inina Naro. Teca pinguemisantiro nanibare, pinguenguero cara nitasonganti, aro pinguemisantënaró.

Icanqueri irogomere Jesús iragáquineri Caninaro Isëre.

¹²Përosati inibataiguëri irogomere Jesus:

—Nangantantaiguëmini aro aisonori ira quemisanquinane Naro aro inganquero ora nacanti Naro cara nitasonganti Naro. Iritosongasantanë najáqueninta cara Paba-tiquë. ¹³Antagaisati pomanaguëna piquemisanquinaninta Naronta Pitingomi aro nan-ganquimiro Naro arota ingantocotaiguëri Pabati matsiguenga: “Caninarisonori Tosor-intsi ipaigainarinta Itomi”. ¹⁴Nomaiguëmiro pairorapagueraca pomanaguëna obirojegui piquemisantinaninta Naronta Pitingomi. ¹⁵Aroca pinintaiguinanica obiro, pinguemisanti-ro ora nagáantane. ¹⁶Aroca pingantiro, nomanocoqueri Pabati: “Pomagantineri basini Omitocoontatsiri”. Aro imagantaiguëmiro inëmi përosati. ¹⁷Iroonti Caninaro Isëre Tosor-intsi ora ogometaiguëmine aisonori. Ira te inguemisantiri Tosorintsi quero yágobëro Isëre Caninaro tenta iraneiro teatisati irogótiro. Carari obiro pigóiguero aroquenta ot-sibataiguëmi, aitosati yamai përo cara inaguëmi. ¹⁸Yamai quero nojocaiganaquimi përosati. Aiquenta nopigaima nantsibataigapaimi. ¹⁹Caraquesatantata quero iniaigaina matsiguenga, carari aronta nanganiatanae obirojegui piniajina. Përosati pintimaiguë caniarinanta Naro. Nanganiataigapaimi përosati. ²⁰Cara cataguitericquë opoque Isëre Caninaro pigóiguë cara ninë Pabatiquë, aisati obirojegui cara Naroquë aisati Naro obiro-jeguíquë. ²¹Ira ogótiro ora nigáantë aisati iquemisantina, inintina aisati, aisati Ira Pabati inintasantiri ira nintina Naro. Aisati naninqueri Naro noniaguëmari iriro.

²²Ira basinati Joras, cagari Cariotisati, yosamitëri icanqueri:

—Natingomi, ¿Pairo poniagobitaiguëna naantijegui, aro quero poniaguiri basinati mat-siguenga?

²³Yotabitanëri Jesús icanëri:

—Cara iraninquinaca matsiguenga iriátsaquina ora nacantiri, aro iriro iraninque Pabati. Apa aisa Naro nopogaigapë nantimacagaigapëri. ²⁴Ira te iranintina teatisati iriátsatina. Oca nibarintsica piquemisanaguëca obirojegui cagaro nasiati iroonti irasi Pabati Ira agáquina. ²⁵Yamai nocomantaiguëmiro antagaisati oca aintanaquerainta natsibataiguëmi obiro. ²⁶Cara opogopë Omitocoontatsiri ora jitacha Caninaro Isëre Tosorintsi, iragáquemiro

cara nomanagueri Pabati arota oniaguëmiro antagaisati aisati onguiancaguëmiro antagaisati ora nacanque.

Icomantanairi irogomere Jesus cara iriátae.

²⁷ Përosati icanairi Jesus:

—Nimagoriasëreti Naro. Aisati nomaiguëmiro pomagoriasëretaijanaque obiro. Ira te inguemisantina inganinatê arosata yaca quibatsica, carari ora nomëmiro pomagoriasëretaqueimi cara paneingomentoquë. Quero pogasëretaiga querootisati pitsorogaigui. ²⁸ Aroque piquemaiguëna cara nacanquemi: “Najátaje aisa nopigaima nantsibataigapaimi aisati”. Aisonorica pinintaiguina pinganinataiganaque cara pigóiguë najátajeni cara Pabatiquë Irironta obatina. ²⁹ Yamai nocomantëmiro negaca arota cara omoncaraquima përosati pinguemisantaiganaque. ³⁰ Yamai quero ninibataigaimi tojai obirojegui aroquenta ipogopë Satanás ira agáqueri iraegui te inguemisantina. Quero ibatina, querootisati yagobeina. ³¹ Aro onganquima negaca arota omagaro matsiguenga irogótocotaiguëna nanintasantiri Ira Pabati aisa nantineri ora igátina. Pingabiritaiganaquima intsome.

15

Jesus yosiacaro otsa oba.

¹ Përosati icanqueri irogomere Jesus:

—Nosiacaro Naro panguirintsi otingomitsa oba. Iriroquerai Ira Pabati aisa icantari ira omisantiro panguirintsi. ² Iripëshataguequero ora te inantima oguitso. Iroeroque ora otsa pinanta oguitso, iritotêro arosata irobetsataguequero arota inasantanê oguitso. ³ Obirojegui aroque piquëtetantajaro nanibare ora nopaiguëmira. ⁴ Coshoni pogaiguina nibega Naro coshoni nogaiguimi. Quero pini oguitso otsapaguequë quero ca coshoni pobatsatiro otingomitsa. Aitosati picantaro pibega otsa oba. Quero ca coshoni pogaiguina quero picantiro ora caninaropague. ⁵ Naro otingomitsa oba. Obirojegui otsapague. Ira coshoni yoguina Naro aisati Naro coshoni noguiri iriro inganque tojai caninaro. Quero ca coshoni poguina, quero picantëmatiro pairorapagueraca caninaro. ⁶ Ira quero coshoni yoguina Naro irioquëngani jaara ingasitigatêri Tosorintsi. Ira sërari cantaro pibega otsa ora te inantimaro oguitso, aro iripëshêro osiguiricanê; aro iráquequero iritaguêro. ⁷ Aroca obirojegui përosati coshoni pogaiguëna Naro querootisati pomagusantiro nanibare, pomanina ora picogui, aro nomëmiro. ⁸ Cara pingantaiguêro ora caninaro, piniacaguiri matsiguenga iraniacananatiri Pabati. Aisati pingantaiguëma nogomere caninari.

Jesus ijtaquetiri irogomere iramigote.

⁹ Përosati icanai Jesus:

—Naro nanintasantaguëmini obirojegui ibeguina Pabati cara inintasanotina Naro. Përo cara coshoni poguina Naro arota pigóiguë cara nanintaiguëmi. ¹⁰ Pijátasatagueroca ora nigátimi Naro, pigóiguë cara nanintaiguëmini, aisa ocanta naquemisantiro Naro ora igátina Pabati përo cara nacaninati inintananinta Iriro. ¹¹ Iroro ninibataiguëmi negaca arota pinganinasëretasantanê aisa nacanta nacaninati Naro. ¹² Yamai nagáiguëmi cara pinintobaganëma aisa nacanta nanintaiguimi obirojegui. ¹³ Cara ingamobiquerica iramigote ira matsiguenga, iriro inintasanoti. ¹⁴ Obirojegui namigote aroca pinganquero ora nigátimi Naro. ¹⁵ Teni najitaigaimi nomeraro yamai tenta irogótiro iromerataga ora inganque meratari, carari najitaiguëmi namigote aroquenta noniaguëmiro antagaisati ora icanquina Naro Pabati. ¹⁶ Obirojegui te pingoiguena Naro. Carari Naro nocoiguëmi obirojegui aisa nigátaiguëmi pijátague pingantiro tojai caninaropague përosati inê. Aique pairorapagueraca pomanocotiri Pabati obironta nasiati, aro imaguëmiro piquemisantinanta. ¹⁷ Iroro yamai oca nigátimi cara pinintobagaiganaquima.

Ira tsoengaigatsi iguisaneinqueri Jesus aisati iguisaneinqueri ira irogomere.

¹⁸ Përosati icanê Jesus:

—Inguisaneinquiminica ira te inguemisante, pinguenguero natsita iguisaneinque cara teraiquerai inguisaneintimi obirojegui. ¹⁹ Iraegui te inguemisantiri Atingomi inintobagaigaca. Querotame piquemisantiri obirojegui aisati iranintaiguëmime, carari obirojegui nocoiguëmini nágaiguëmi irirojeguiquë nopasiniatitaiguëmi. Iroro iguisaneintaguëtaiguëmi yamai tenta pintsibataigumarini obiro. ²⁰ Pinguenguero ora nacantaiguëmi cani ira iromerataga quero ibatiri ira meratari. Cara iguisaneinquina Naro matsiguenga aisati inguisaneintaguëmi obirojegui. Teca inguemisantatsatina Naro querootisati iguemisantatsatimi obiro. ²¹ Antagaisati oca aro ingantaiguëmi obironta nasiati. Inguisaneintaguëmi tenta irogótiri Ira agáquina Naro. ²² Aro nipocasiqueri nocomantaguequeri matsiguenga ora aisonori. Querome nipocasitiri ira te inguemisantina quero iniaiguiri Tosorintsi cara icantomotaguequeri ora te onganinate. Carari yamaica Tosorintsi iniaiguëri cara

icantaguetomotasantiri te onganinate. ²³ Ira quisaneintina Naro aisati iguisaneintiri Pabati. ²⁴ Querome nitasonganti catingsatiquè irirojegui ora te ingantiro basini matsiguenga, quero iniaiguirosi Tosorintsi cara icantaguetomotiri ora te onganinate, carari yamai iniaigabitèna cara nitasonganti pèrosati iguisaneinquina Naro aisati iguisaneinqueri Pabati. ²⁵ Carari omoncaraca cara isanguenatocoquena comantantatsiri jirai: Iguisaneintasiuguèna te paio nantabitima.

²⁶ Cara nagáquemiro Omitocoontatsiri ora jitacha Caninaro Isère Tosorintsi, Iroro aisonori, omanièma Pabatiquè aisati ongomantègotèna Naro. ²⁷ Aisati pingomantègotaiguèna obirojegui aroquenta pitsibataiguèna cara obirai nacaimaiguè irooti yamai.

16

Ira jorío inguisaneintaiguèri irogomere Jesus.

¹ Aisati icanque Jesus:

—Aroque nocomantaguequimiro oca arota quero pitsoinguirosi Tosorintsi. ² Aiquentata quero inintacaguimi jorío picaigai cara yapatotaiga iriro. Aisati orequima aiquentata cara irógaiguèmi matsiguenga iji que intèneri Tosorintsi caninasati. ³ Inganquero negaca tenta irogótiri Pabati teatisati irogótina Naro. ⁴ Nocomantaiguèmi yamaica arota cara orequimaca cataguiteri, pinguengaigairo ora nacantaiguèmi jirai. Teni nongomantimiro cara jirai aintananta Naro natsibataiguèmi obiro.

Ora onganque cara opogopè Isère Tosorintsi.

⁵ Pèrosati icanai Jesus:

—Carari yamai najáqueni cara nantiomopairi Ira agáquena jirai. Quero ini pairiraca osamitènane negaraca najáque. ⁶ Carari pogasèretaganaca cara nocomantèmi cara najátaje. ⁷ Yamai nongomantaiguèmi aisonori caninataque cara najátaje. Queroca niátaji quero pipoqui ora omitocotaiguèmine. Carari aroca najátaje, aro nomagantaimiro Naro. ⁸ Cara opogopè Isère Tosorintsi onguiancagopèri matsiguenga cara aisonori icantaguetomotiri Tosorintsi ora te ongameite, aisati oniagapèri ora catिंगari, aisati ogótacagopèri cara irogóntèmaro Tosorintsi ingomantègotèri matsiguenga pairoraca inganque. Aisati ingomantègotèri cara iriátè Jonogaguitequè queroca iáti Sharincabeniquè. ⁹ Ogótacagopèri iriro cantaguetatsiri te onganinate tenta inguemisantinani. ¹⁰ Aisati oniagaigapèri matsiguenga cara Naro Caninari aronta najátaje canta íniro Pabati, carari obirojegui quero piniaigaina. ¹¹ Ogótacagopèri cara ingasitígatèri irirojegui Tosorintsi aroquenta icasitígatèri Satanás ira agáiguirosi ira te inguemisantiri Tosorintsi. ¹² Arosonori ora nocogui nongomantaiguèmi carari obirojegui quero piquemaigabaquero yamaica. ¹³ Cara opogopè Isère Caninaro Tosorintsi Iroro comantaiguèmine omagaro ora aisonori queronta Iroro nibat-asitacha. Onganquero antagaisati ora icomantèro Pabati atraca onganquema aiquentata. ¹⁴ Oniacaninatagaiguèmi Naro Pitingomi aroquenta págaigabaquero ora nasiati aisati oniagaiguèmi obirojegui. Antagaisati ora yogomequero Pabati, irootisati ogometaguèmi obirojegui. ¹⁵ Aisati ora Isère Caninaro ágobèro ora nasiati ogótacaguimiro Iroronta ogome-tocoquinane.

Iragasèretanèma irogomere Jesus, aique inganinasèretanae.

¹⁶ Pèrosati inibatè Jesus:

—Caraqesatantata cara quero piniaigaina, caraquentata piniaigaina aisati caranta najátaje cara íniro Pabati.

¹⁷ Aique yosamitobaguetanaca irogomere Jesus:

—¿Pairo oca icantáica Jesus caraquesatantata cara quero aniajiri aique caraquenta aniaigairi? Aisati ¿Pairo ocanti cara iriátè Iririquè? ¹⁸ ¿Pairo ocanti oca nibarintsica caraquentata? Teni anguemaguero pairoraca inibati Jesus.

¹⁹ Jesus igóqueroi cara icogabeca irosomiquerime irogomere aro icanèri:

—Aroque nacanquemi caraquesatantata quero piniaigaina carari caraquenta aro piniaigaina. ¿Iroro posaminaitobagaiguèca obirojegui? ²⁰ Nangantasantèmini ora aisonori piraicotaiguèna aisati pigasèretaguèma carari ira te inguemisante inganinaigabitanèma. Carari obirojegui yamai pigasèretaguèma aique pinganinataiganaje. ²¹ Obiro aisa picantaro pibega tsinane. Cara ontsomaenica ongatsitasantè aisati ogasèretanèma, carari aroqueca otsomaqueroi otomi quero oquengairo cara ocatsitè carari yamai ocaninatasantè aroquenta otsomaqueroi otomi. ²² Aisati obirojegui pogasèretagaca yamai carari Naro nopigaima naniaigaimi, aro pinganinasèretasantaiganaque, quero pairi agasèretacaguimine aisati. ²³ Cara cataguiteri que quero posamitèmatina. Nangantasantaiguèmini ora aisonori, Ira Pabati aro imèmiro ora pomanaqueroi piquemisanquinanta Naro. ²⁴ Terai obirojegui pomanaigueroi pairoraca Naronta Pitingomi. Pomane piquemisanquinaninta aisati págobèroti arota pinganinatasantaiganaque.

Jesos icomantëgotasantëri Iriri.

²⁵ Aisati yogomequeri irogomere Jesos:

—Nacantaiguëmiro oca quingabaguirentsiquë ora ogomeantatsi, carari orequima cata-guiteri cara quero ninibatantaigaimiro quingabaguirentsi. Caraanti catingasati nogome-tocotaiguëmiri Pabati. ²⁶ Cara aique pomanaqueri Pabati piquemisantinanta carari Naro quero namaniri Ira Pabati Torosintsi cara imaignëmiro obirojegu ora pomanaqueri ²⁷ carari Ira Pabati inintaiguëmini pinintaiguinaninta Naro aisati piquemisantaiguina Naro cara nopaniaca Torosintsiquë. ²⁸ Nisotogopë cara Pabatiquë nipogopë yaca quibats-ica, carari yamai nojocanaïro quibatsi nopiganajima cara Pabatiquë.

²⁹ Aro icanëri irogomere:

—Yamaica pinibataiguëna caninasati. Teni pinibatantimaro quingabaguirentsi. ³⁰ Yamai nigóigui cara pigóque Obiro antagaisati, quero nocogaigai nosamitimi. Iro-ro ora nigóntaiguëmi cara popaniaca Torosintsiquë.

³¹ Yotabitanëri Jesos:

—¿Aisonori yamaica piquemisantaiguëna? ³² Yamai orequima cataguiteri, aroque ya-maicasonori cara obirojegu pomorocaguetaiganaque jaara panirootipague. Aisati pi-jocaiganaquina paniro Naro. Carari teni paniro ninë aintasati Pabati yaca Naroica. ³³ Yamai nocomantaiguëmiro oca arota pomagoriasëretaique piquemisantinanta. Irat-sipiriacagaiguëmi ira matsiguengajegu ira te inguemisante yaca quibatsica. Pingani-nasëretaiquinaque aroquenta nobataiganaqueri irirojegu.

17

Iriati Jesos manëgotacha.

¹ Cara itsonquero inibatë Jesos inetsanaque aiquero Jonogaguite icanë:

—Pabati, aroque pareca cataguiteri cara inganquina matsiguenga ora picogui Obiro. Yamai pigótacaguiri matsiguenga ora Naro Caninarisonori Pitomi, arota aisati Naro nogótacagaiguëri Obiro Caninarisonori, ² aroquenta pigáquina Naro Itingomi omagaro matsiguenga. Aisati yamai naganiatagairi antagaisati ira picoigaiquë ira popëna. ³ Obiro Torosintsi paniro pini. Caninataque irogóiguëmi antagaisati matsiguenga. Aisati cani-nataque irogóiguëna Naro pigátane, Naro Jesoquisito. Pairiraca ira ogóquinane Naro aisati irogóquimi Obiro, iriro përosati intiomocá cara Jonogaguitequë. ⁴ Aroque nitsonquero ora pigáquina nanganque yaca quibatsica arota iraniacaninataiguëmi matsiguenga. ⁵ Pabati, jiraisonoriguinte nationotimi cara teraiquerai ine quibatsi iniacaninataiguëna omagaro. Yamai nanintini pomainaro nibega cara jirai nantsibatapaimi aisati iraniacaninataina.

Yamanocoqueri irogomere Jesos.

⁶ Aisati icanë Jesos:

—Ica picoigaiquëca popaiguëinari yaca quibatsica nigótacaguëri atiraca picanta Obiro. Irirojegu pasi inabita aro popaiguëinari cara iquemisantobëro Pinibare. ⁷ Yamai igóiguë omagaro cara nitasongantí aisati ora nogomequerira omagaro opaniaca cara Obiroquë. ⁸ Cara nopaiquëri Pinibare ora popabaquinara, iquemisantaigabaquero igóiganaque yamai cara aisonori nopaniaca Obiroquë igóiganaque aisonori pigáquina Obiro. ⁹ Namanocobintiri Naro irirojegu, irari te nomanocotiri ira te irogótina. Namanocobintiri paniro icaegui popaiguinaca irironta pasiatiegui. ¹⁰ Antagaisati ira nasi iriro pasi, ira pasiatí iriro nasiatí. Iro-ro iquemisantobitaiguëna aisati iniacaninataiguëna Naronta Itingomi. ¹¹ Naro quero përo cara nini quibatsiquë carari irirojegu përo cara irinaque quibatsiquë. Naro najátajeni Obiroquë nantsibatapaimi. Pabati Caninari, pingábintsaiqueri pisintsirequë icaegui popëna arota inguengasëretaiquea aisati coshoni irogobaquima pibega Obiro aisa Naro aqungasëretanaca coshoni ogobaca. ¹² Cara niniquerai quibatsiquë nacábintsantaigacari pisintsire ira popaiguënarara. Te pairi pegachane, paniro ira quimingarisonoriguinte ira játënguitsi Sharincabeniquë arota omoncaratima Sanguenari. ¹³ Carari yamai najáqueni cara pinasegui Obiro. Yamai cara niniquerainta quibatsica ninibati negaca arota inganinasëretaiquinaque nogomere aisati nacanta nacaninarti Naro. ¹⁴ Naro nogomepëri ora Pinibare carari ira matsiguenga te inguemisante iguisaneinqueri nogomere tenta intsibataguëmarini irirojegu. Irironta nasiati icantina nibega Naro tenta nangantimari ira tsoengatsiri. ¹⁵ Te nomanimi páguiri jonoquë carari nomanaquemi pomisantiri arota quero yamatobitiri camagari yaca quibatsica. ¹⁶ Ira nogomere teni aisati ingantimari ira te inguemisante. Icantina nibega Naro te nangantimari ira tsoengatsiri. ¹⁷ Pigótacaguiri Pinibare ora aisonori arota inguengasanotantëmiro cara poganinasëretaiqueri cara iri-ocairo ora te ongomeite. ¹⁸ Obironta agáquina yaca quibatsica, aisati Naro nigáiguëri nogomere arota irogometagueiqueri matsiguengajegu ora Pinibare. ¹⁹ Naquengasantimi

Naati nomasantimi arota imasantaiguemi iriati nogomere aisonori inguengasantaiguemi irironta pasianti cara inguemisantiro Pinibare ora aisonori.

Jesos yamanocotiri omagaro quemisantatsiri.

²⁰ Përosati Jesos yamaniri Iriri:

—Nomanocotiri nogomerejeguica carari aisati nomanocotiri antagaisati ira quemisanquerone Pinibare cara ingomantanquero nogomere. ²¹ Nocogasanti antagaisati irirojegui inguengasëretaiganaquima aisati acanta ibega Eiro aquengasëretaca aisati coshoni ogaca Eiro, Pabati, pibega cara pini Naroquë aisati Obiro cara ninimi Obiroquë, arota coshoni irocái arota ira matsiguengajegui inguemisanquemi cara Obironta agáquina. ²² Aroque noniagagaicari cara acanta Eiro arota iraniacaninatacái aisati nopacari irirojegui arota nantime iriroquë ninanquimari, pibega Obiro pobabaquina Naro cara pinina Naroquë. Aisati inguengasëretaiganaquima irirojegui arota coshoni irocái Eiro. ²³ Aintana Naro irirojeguiquë Obiroquerai aintabi Naroica, arota intsibatobagaiguëma caninasati inguengaguëma. Aro ira matsiguengajegui iraniaiguëri ica cara iquengaignaca, irogóiguë cara Obiro agáquina aitosati pinintasanguiri icaegui pibeguina Naro cara pinintina. ²⁴ Cara terai ine quibatsi pinintina. Iroso popaguëtëna cara nosanguëguiteti. Yamai, Pabati, nocoguini ira popaiguëna përosati irine Naroica arota iraniaiguena Naronta Itingomi. ²⁵ Pabati Caninarisonori, ira matsiguengajegui te irogótimi carari Naro nigótimi. Aisati igóiguë icaegui nogomereca cara pigáquina Obiro. ²⁶ Nigótacagaiguëri atiraca cara picanta Obiro, aiquero nigótasantacagaiganaqueri cara picanta Obiro cara pinintasantina Naro aisati pinintasantacagaigueri iriro, arota ninantaiganaquimari Naro cara iraneingomentoquë.

18

Yáganëngani Jesos.

(Mt 26.36-56; Mr 14.43-50; Ir 22.39-53)

¹ Cara icaratanë inibatë Jesos isotocaiganaque cara Jerosarënuë Iriro aisati irogomerejegui, cara iáiguë aiquero antatinta nijatini piriatininaro jitacha Serirón. Cara, icaiganaque Iriro aisa irogomere panguirintsisiquë. ² Joras ira ágagantëri Jesos aisati igótiro panguirintsisi tojaitaquentayapatotaiga canta Jesos aisa irogomere. ³ Cara Joras yarepari Jesos, yamaigapëri soraro aisati ira omisantiro ibango Tosorintsi, ira igáiguë saseriroti aisati bariseo. Yamaigapë irobotanepague aisati irosataamento aisa isabirite aisati anchaqui. ⁴ Cara aroquenta igóque Jesos atiraca inganquimara iáque itonguibotobacari yosamitobëri:

—¿Pairi picogaigui?

⁵ Yotabitaiganaqueri:

—Ira nocogui Jesos Nasaresati.

Jesos yotabitobëri:

—Naromé.

Aintasati itsibataigapari Joras ira ágagantëri Jesos. ⁶ Cara icanque Jesos “Naromé”, itëaiganaque itisitaquë, iparigaiganaque irirojegui cara quibatsisiquë.

⁷ Aisati yosamitaigairi Jesos:

—¿Pairi picogaigui?

Icantaiganaqueri:

—Ira Jesos Nasaresati.

⁸ Yotabitanëri Jesos:

—Aroquemë nocomantaigabitëmi Naro Jesos. Picogaiguinaca Naro, pigátaigairi icaegui nogomere cara iriáigae.

⁹ Aro canca negaca arota omoncaratima ora irinibare Iriati cara icanqueri Iriri: “Ira popaiguënara te pairi pegachane”. ¹⁰ Ainta poro irogomere Jesos jitacha Simón Perero. Yáguëro isabirite itoguimitatëri iromeraro itingomi saseriroti, ira jitacha Máraço. ¹¹ Carari Ira Jesos igáqueri Perero:

—Pomingairo pisabirite cara poguiroriquë. Iroso agáquina Pabati cara natsipiriquë. ¿Queroco nacantobitiri Iriro?

Yáganëngani Jesos catingasatiquë Anás.

(Mt 26.57-58; Mr 14.53-54; Ir 22.54)

¹² Aique ira soraro aisati igapitante aisati ira omisantiro ibango Tosorintsi yágaiguëri Jesos aique yoguëshobagotaiguëri. ¹³ Arotsita yágaiganaqueri ibangoquë Anás. Ira Anás iriconguiri Caijás. Iriro Caijás itingomi saseriroti irooti osarini. ¹⁴ Iriati ira Caijás icomantatsatiguëri cani jorío: “Caninataque poro sërari ira camobiquerine omagaro jorío iragabisaicotaiguëri”.

Peroro icantocoqueri Jesus te irogótiri.
(Mt 26.69-70; Mr 14.66-68; Ir 22.54-57)

¹⁵ Simón Peroro yoguiatabitanacari Jesus, aisati itsibitanacari basini irogomere. Ira basinira irogomere igótirinta itingomi saseriroti. Icanaque iriro irooti cara icaaganëngani Jesus iraganquitérequê cara ibangoquê itingomi saseriroti. ¹⁶ Carari Peroro përo cara inê sotoquê. Aique isotogaspairi ira basinira irogomere ira igóti itingomi saseriroti. Inibatapëro ora omisantiro sitêcori cara inganaque Peroro. Aito ca icanaque. ¹⁷ Ora omisantiro sitêcori posamitobêri ira Peroro:

—¿Cagarico obiro irogomere inta tsomaguinta?

Yotabitanëro Peroro:

—Cagarina naro.

¹⁸ Arosonorinta catsingaguiteri ira iromeraro saseriroti aisati ira omisantiro ibango Tosorintsi yogamataiguê tsitsi cara irotataiguê. Peroro aisati itsibaitagapari cara yotaigasegui ora tsitsi.

Ira itingomi saseriroti yosamitëri Jesus.
(Mt 26.59-66; Mr 14.55-64; Ir 22.66-71)

¹⁹ Ira itingomi saseriroti yosamitëri Jesus:

—¿Pairo ijitaiga pogomere? ¿Ati icarati? ¿Pairo pogomequeri?

²⁰ Yotabitanëri Jesus icanëri:

—Iquemaiguêna antagaisati matsiguenga cara nogomequeri cara yapatoitaiga jorío aisati cara nogometaiguëri ibangoquê Tosorintsi. Carari tesonori nanibate comanononi obirojeguiquê. ²¹ ¿Pairo posamitobiquina Naro? Posamitaigueri iraugui quemaiguêna. Irro ogótatsi pairoraca ora nocomantaiguëri.

²² Cara inibatê Jesus negaca, ainta inasegui poro omisantiro ibango Tosorintsi, in-chotangaborotëri icanqueri:

—¿Aroco picanta pipêgatsatari itingomi saseriroti?

²³ Jesus yotabitanëri:

—Nacanqueroca ora te ongomeite, poniaguinaro. Carari ninibatêca caninasati ¿Pairo pinchotangaborobiriquina?

²⁴ Aique Anás igáqueri iromeraro:

—Piguêshotigui. Páganëri cara Caijásiquê itingomi saseriroti.

Yogatsitairo Peroro icanai: “Teni nogótiri Jesus”.
(Mt 26.71-75; Mr 14.69-72; Ir 22.58-62)

²⁵ Iroontita yosamitaiguëri Jesus, iriroquerai Peroro yaratingasegui përosati cara yotaigaseguero tsitsi. Aro icantaiguëri:

—¿Cagarico obiro irogomere ira sêrarira aisati?

Peroro aisati itsoiganaja icanai:

—Cagarina naro irogomere.

²⁶ Ainta iromeraro ira itingomi saseriroti, imatsiguenga ira itoguimitatê Peroro, yosamitëri:

—¿Teco naneimi cara pitsibatasegari Jesus cara panguirintsisiquê?

²⁷ Aisati itsoiganaja Peroro icanai:

—Teni nogótiri Jesus.

Aito cara icaimanê tiapa sêrari.

Yágaiganaqueri Jesus cara Piratoquê.
(Mt 27.1-2, 11-14; Mr 15.1-5; Ir 23.1-5)

²⁸ Coniamanisonoriquê ijocaiganaquero ibango Caijás cara yágaiganaqueri Ira Jesus ibangoquê Pirato ora jítacha peretorio. Cagarinta Pirato imatsiguenga, ira joríojegui te ingaigue cara ibangoquê arota quero yoguimingata. Aroca ingaiganaque iroguimingatêma quero yapaigui cara Pásicoaquê cara iquengaiguëro joríojegui cara isotocaigai Ejípitoquê jiraisonori. ²⁹ Aique isotogopê Pirato cara irinibaiguëri jorío icantaigapëri:

—¿Pairo icanque ica sêrarica?

³⁰ Yotabitaiganaqueri irirojegui:

—Aiti ora intagueque te onganinate. Querome inti ora te onganinate, querome namiri obiroquê.

³¹ Icantaiguëri Pirato:

—Págaiganaqueri obirojegui pingantaigueri ora ocomantimi isanguenare Moisés.

Carari yotabitaiganaqueri jorío:

—Teni iranintacaguina Iromasati nógaigueri pairiraca.

³² Aro ocanca cara omoncaraca ora icanque Jesus: “Iribêquêgotaiguêna ira matsiguenga”.

³³ Pirato ipiganaja icanaji ibangoquë, aro icaimëri Jesus yosamitëri:

—¿Obiroco Itingomi joríojegui?

³⁴ Jesus icanëri:

—¿Posamitasitina obiati? ¿Aintaco basini comantëmi?

³⁵ Pirato yotabitanëri:

—¿Naroco jorío? Yamaigapëmi yaca naroca pomatsiguenga aisati itingomiegui saseriroti. ¿Pairo picanque?

³⁶ Yotabitanëri Jesus:

—Cagarina Naro Itingomi yaca quibatsica. Narome Itingomi yaca, arome nagáqueri ira aguiataiguina inguisëcobentaiguename arota quero yágaiguina ira jorío. Naro cantënguicha cagarinanta Naro Itingomi yaca.

³⁷ Aro Pirato icanqueri:

—¿Aisonorico obiro Itingomi?

Yotabitanëri Jesus:

—Naro Itingomi cara picanquina obiro. Iroro nipoguëque. Niboguë yaca quibatsica arota nongomantaigueri matsiguenga caninaro Irinibare Tosorintsi. Antagaisati ira coguiro ora aisonori inguemaquero ora nacanti.

³⁸ Yosamitëri Pirato:

—¿Pairo ojita picanti ora aisonori?

Cara icanque Pirato oca isotocanai aisati inibataigairi joríojegui icantaiguëri:

—Teni nogótiro pairoraca icantagueque ica sërarica ora te onganinate.

Irobaratairime Jesus Pirato.

(Mt 27.15-31; Mr 15.6-20; Jr 23.13-25)

³⁹ Aisati icanqueri Pirato:

—Pëníbaque orequima Pásicoa cara obirojegui pametaiga nobarataimiri poro iromingaga. ¿Pinintaiguico obirojegui nobarataimiri Itingomi jorío?

⁴⁰ Aro ira joríojegui icaimaiganaji catsiguesonori icantaiganaque:

—¡Ira quero! ¡Pobaratairi Barabás!

Ira Barabás irianti cosirinti.

19

¹ Aique ira Pirato yáguëri ira Jesus ipasatagantëri. ² Ira sorarojegui yobetsiquëneri Jesus imatseiro iroontitotsei, aro imatseitacaqueri iguitoquë. Aisati icaaguëri manchaguinsi quiraaquisaamagori. ³ Aique iásitaigapëri cara inasegui Jesus icantomemegacari:

—¿Obiroco Itingomiegui jorío? ¡Intimeta Itingomi jorío!

Aisati incho tangaborotaiguëri cara iboroquë Jesus. ⁴ Aisati Pirato isotogopai cara joríojeguiquë icantaiguëri:

—Pinetsaiguëri cara nomisotogopëri yaca arota pigóiguë cara te naniatiri pairoraca ora icanque te onganinate.

⁵ Aito cara isotocanë Jesus imatseiparo totsei icapëro manchaguinsi quiraaquisaamagori. Aro ira Pirato icanqueri joríojegui:

—Jerica sërarica.

⁶ Cara iniaigabaqueri itingomiegui saseriroti aisati ira omisantiro ibango Tosorintsi icaimaiganaque catsiguë icantaiguë:

—¡Popëicotiri, popëicotiri!

Aro Pirato icantaiganaqueri:

—Yamai páganëri obirojegui popëicotaiguëri obiro tenta naniatirini ora icantagueque te onganinate cara Iriroroquë.

⁷ Carari ira jorío yotabitaiganaqueri:

—Naroeiguë aiti Sanguenari ogometaguina caninataque ingame ira jitapënguicha Itomi Tosorintsi.

⁸ Cara iqemobëro Pirato oca, itsorogasanotanë. ⁹ Aisati icanaji cara peretorioquë, yosamitairi aisati Jesus:

—¿Nega popaniaca Obiro?

Carari teni irotopitiri Jesus.

¹⁰ Aro icanëri Pirato:

—¿Pairo te potabitobitina? ¿Teco pigóte Naro itingomi? Cara nocoguica nagántëmi pëicotatsi aisati nocoguica nopabaquëajimi, aro nanganquero.

¹¹ Jesus yotabitanëri:

—Querome ipimiro Tosorintsi, quero picantëmatina Naro. Obiro picantabequina ora te onganinate carari ira mapëna yaca iriro cantasantëro te ongameite.

¹² Irooti icogantabitanaca Pirato irapabaquëajirime Jesus. Iro-ro cantanaacha cara icaimaiganaji jorío:

—Aroca popabaquëajiri Ira, te pomatsiguengatimari Sésar. Ira cantasitënguicha: “Naro itingomi”. Iriro Ira quisaneinqueri Sésar pitingomi.

Pirato ipaiguëri joríojegui Ira Jesus.

¹³ Cara iquemobêro Pirato ora inibataiguë jorío, igátaiguëri ira soraro iromisotoqueri Ira Jesus. Yamai iriroque Pirato sobiaquenguitsi iragáantomentoquë jonoica mopë cara yogan-inatiro iro-ro ojita cara irinibarequë ebereo Gabata. ¹⁴ Cara coniamaniquë yobetsicaiguëro Pásicoa, aro icanëri Pirato ira joríojegui:

—¡Jerica Pitingomi!

¹⁵ Carari irirojegui icaimaiganaque catsiguesonori:

—¡Páganëri! ¡Ingameta! ¡Popëicotiri!

Pirato icanëri:

—¿Naroco pëquëgotërine Ira Pitingomieguira?

Aro ira itingomi saseriroti yotabitanëri:

—Naroegui teni irine basini natingomi. Paniro ira Sésar.

¹⁶ Aito cara ira Pirato ipaiguëri joríojegui Jesus cara iribëquëgotaiguëri.

Cara ipëicotaiguëri Jesus.

(Mt 27.32-44; Mr 15.21-32; Ir 23.26-43)

Irooti cara yágaiganaqueri soraro. ¹⁷ Yamai Jesus isotocanë yanatanëro igorosite. Iáque cara oguitojaquë ora ojita Iguito Camatsirini. Aisati irinibarequë ebereo ojita Górogota. ¹⁸ Cara ipëicotaiguëri corosiquë, itsibatacari pite sërari ira ipëicoque aisati cara corosiquë basini. Poro inënguitsi ibacosonoriquë Jesus, basini inë imatepacoquë, carari Ira Jesus Iriro inënguitsi aganguisati. ¹⁹ Pirato igáantëneri sanguenari iroquineri jonoica iguitoquë Jesus. Ocanti oca sanguenarica: “Jesus Nasaresati Iriro Itingomi jorío”. ²⁰ Ipëicoqueri Jesus aronisatiquë Jerosarën: iro-ro ora ipocasitaiguëtapëri arosonori joríojegui iraniaiguëri. Inibataiguëro jorío ora sanguenari osanguenaca maba nibarintsiquë cara irinibarequë ebereo, aisati guiriego, aisati irinibarequë Iromasati.

²¹ Carari ira itingomiegui saseriroti icantaiguëri ira Pirato:

—Quero pisanguenatiro: “Itingomi jorío”. Orari pisanguenate: “Icanque Iriro: ‘Naro Itingomi jorío’”.

²² Carari ira Pirato yotabitanëri:

—Ora nasanguenaque, ineta.

²³ Cara ira soraro itsonqueri ipëicotaiguëri Jesus yágaiguëro ora imanchaqui ipabacaguëcaro icaratinta itsibasati. Aisati yáguëro igamisate ora te ontatima oaga omagatiro. ²⁴ Ira soraro icantobaganaca:

—Quero atisaraiguero. Intsome omaguimpibintiro arota ogóigue pairiraca áganërone.

Yamai aroque imoncaraquero soraro Sanguenari cara ocanti:

Ipabacaguetaigacaró nomanchaqui, aisati imaguimpibintëro nagamisate.

²⁵ Cara aronisati igorositequë Jesus pinaigasegui iniro Jesus aisati irento, aisati María iina Queriojás. Aintasati pinasegui María Magararasato. ²⁶ Ira Jesus cara iniaquero iniro pinasegui cara otsítiquë igorosite otsipasigari poro irogomere ira inintasantë Jesus, icanquero iniro:

—Ina, iriro pitomitsari ira.

²⁷ Aro icanqueri ira irogomere:

—Iro-ro pinirotsari ora.

Irooti cataguteriquë ira irogomere yáganairo ibangoquë yomisantëro iniro Jesus.

Cara icamaque Jesus.

(Mt 27.45-56; Mr 15.33-41; Ir 23.44-49)

²⁸ Cara igóque Jesus aroque imoncaraquero antagaisati Sanguenari, icanquë:

—Nomiretëni.

²⁹ Aiti pinasegui cobiti piagasegaro oja oba cochoari. Aro yogaatëneri chomigatiro cara obaaquë yoguëro chocopiquë ipëri Jesus cara ibagantequë. ³⁰ Cara ichomicobêro Jesus icanë:

—Nitsonquero antagaisati natarobacaare ora igáquina Pabati.

Aro imentsononganaca Jesus ipëri Isëre Iriri, icamanë.

Poro soraro yosataaqueri Jesus.

³¹ Iro-ro cataguteri cara yobetsicaiguero jorío Pásicoa. Onguëtauetanë iroonti sábaro caninaro asi Pásicoa. Tenta iraninte jorío irine igamaga cara corosiquë sábaroquë, iro-ro ora yamanaguëqueri ira Pirato cara iragáqueri soraro intingaraquetiri imingaaquë ira

pëicotaigasegacha aisati iraguëtaigairi. ³² Aro iátasiqueri soraro itingaraaipëri imingaaquë ira obasigatsira aisati basini ira itsipasiga Jesus. ³³ Cara iniopëri Jesus aroque icamaque; iroro ora te itingaraaguëtiri imingaaquë. ³⁴ Carari ainta poro soraro yosataantapari irosataamento imeriquiquë. Irooti cara pisotoatanë iraraa aisati nija. ³⁵ Ira comantairo oca iriro neiroy isanguenaquero ora aisonori. Yamai igótasantiro iriro aisonori arota obiroyegui pinguemisantaiguero cara pinibataiguëro oca Sanguenarica. ³⁶ Aro ocantagueca negaca arota omoncaratima ora Sanguenari cara ocanti:

Quero itingaraitiri poro itongui.

³⁷ Aisati ocanti basini Sanguenari:

Aro iranaiagairi Quirisito Ira yosataaque.

Cara itiaqueri Jesus.

(Mt 27.57-61; Mr 15.42-47; Ir 23.50-56)

³⁸ Aique ira José ira paniacha poeboroquë jitacha Arimatea yamanopëri Pirato cara iráganëri igamaga Jesus. José iriro ira aguiatabitari Jesus comanoroni, itoroquerininta jorío. Aro ira Pirato inintacaqueri ira José. Aro yáganeri igamaga Jesus. ³⁹ Aisati yarepa Nicoremo ira nibaqueri Jesus jirai tsitiniriquë. Yamapé 30 quiro casangajengaro ojita mira aisati ároes. ⁴⁰ Aique José aisati Nicoremo yágaiganaqueri igamaga Jesus iponatantaigacari tocoya aisati casangajengaro aronta icantaiguero iriro cara yametaigaro joríojegui cara itiaiguiri igamaga. ⁴¹ Cara ipëicotaiguëri Jesus aiti panguirintsisi aronisati aiti pinasegui iritijomente irorai terai iritijantimaro. ⁴² Aro cara itiaqueri Jesus aitoniatu pinasegui iritijomente aroquenta pënibaque omarintanëma sábaro.

20

Cara icaniatanai Jesus.

(Mt 28.1-10; Mr 16.1-8; Ir 24.1-11)

¹ Cara coniamanisonoriquë cataguteriquë tominco, piáque María Magararasato cara itiaa Jesus, cara terai onguëtaguetasante, oniopëro oquibe mopë aroque pasiríaa. ² Pisigasanotanaca María Magararasato cara inasegui Simón Peroro aisati inasegui ira irogomere Jesus ira inintasanoti, ocantaigapëri:

—Yáguëqueri Atingomi. Teni irinaje cara itiabecariri. Teni nogóte negaraca yogairi.

Inetsaigabitaari Peroro aisa Joan.

(Ir 24.12)

³ Ira Peroro aisati basini irogomere isotocaiganaque iáiguë cara itiaa Jesus. ⁴ Pitirooti isigaiganaca, carari ira basini irogomere iriro sigasantanënguicha ibatanëri Peroro iritsita arequenguicha. ⁵ Inetopisigapëro cara itiaa Jesus iniopëro tocoya aroque papinaguirícaa, carari te ingue. ⁶ Aique yarepa Simón Peroro icanaque iriro cara itiaa Jesus. Aisati iriro iniopëro ora tocoyatsa aroque papinaguirícaa. ⁷ Ora tocoya ora yoguëneri iguitoquë casiriconiatu pinasegui caninasati. ⁸ Ira iritsita arepënguicha naarai icanaque iriro yamai. Iniajiro tocoya yamai iquemisanque ⁹ teraiquerainta inguengairo cara ocanque Sanguenari Ira Jesus inganiatanae. ¹⁰ Yamai ipigaiganaja pitirooti irogomere Jesus cara ibangoquë.

Ira Jesus yoniagapaaro ora María Magararasato.

(Mr 16.9-11)

¹¹ Ora María përo cara pinë sotoquë aronisatiquë iritijomente piraca. Cara piragasega onetopique aiqero tsomagui ¹² oniaqueri pite ironomire Tosorintsi iquiro catarisonori imanchaqui. Isobiaque cara inabitaca Jesus. Poro inënguitsi cara iguitoquë Jesus, ira basini ironomire inasegui cara iguitiquë. ¹³ Yosamitëro:

—Tsinane, ¿Pairo piraicoque?

Iroro ocanqueri:

—Niraicoqueri Natingomi yáganëganinta te nogóte negaraca yogairi.

¹⁴ Cara pitsongue María pinibatë, papisitanaca aiqero otisitaquë, oniaqueri Jesus carari te ogótiri. ¹⁵ Aro yosamitapëro Jesus:

—Tsinane, ¿Pairo piraicoque? ¿Pairo picogui?

Iroro ojiqueri ira omisantiro panguirintsisi, aro ocanqueri:

—¿Obiroco áganairi Natingomi? Pingomantina negaraca pogairi. Nocoguini náganairi naro.

¹⁶ Jesus icanquero:

—¡María!

Onetsairi aisati ocanqueri nibarintsiquë jitacha ebereo:

—¡Ogometinari!

¹⁷ Ira Jesos icampëro:

—Popabaquëina terainta najáte cara íniro Pabati. Yamai pijáte pingantaigapëri naguemisantacagane ira quemisantaiguina pingantiri cara aique nogainocanëma cara Pabatiquë nasi aisati pasiegui Piri. Ira Tosorintsi nasi aisati Iriro Pitosorintsite obiro.

¹⁸ Aito cara piáque María Magararasato cara ongomantaigapëri ira irogomerejegui ocampëri:

—¡Naniajiri Atingomi!

Aisati ocomantaiguëri omagaro ora icanquero Jesos.

Jesos yoniagaigapaari ira irogomerejegui.

(Mt 28.16-20; Mr 16.12-18; Ir 24.36-49)

¹⁹ Aro irooti cataguiteri tominco chopiniguite yapatoitaigasega irogomere Jesos. Aro yasitaiguëro sitëcori itsorogaiguërininta joriójegui. Aro iquëgotapëri Jesos yaratingopë aganguisatiquë cara irogomerejeguiquë. Yobetsatapaari icampëri:

—Obirojegui, pomagoriasëretaique.

²⁰ Cara icampëri oca, yoniagaigapaari ibaco aisati cara imeriquiquë cara yosataaqueri soraro. Ira irogomerejegui icaninatasantaiganaji cara iniaigabajiri Itingomi. ²¹ Aisati yogatsitairi Jesos icantajiri:

—Obirojegui, pomagoriasëretaique. Cara igáquina Pabati Naro jirai, aisati Naro nagátaiguëmini obirojegui yamai.

²² Irooti cara itasongaiguëri irirojegui icanqueri:

—Coraque pinampëmi Caninaro Isëre Tosorintsi. ²³ Ira matsiguenga comantague-tirine Tosorintsi ora icantagueti te onganinate aisati inguemisanquena Naro, pingantiri: “Aroque ijocajimiro yomaguisanquimiro Tosorintsi ora picantaguetomotiri te onganinate. Teni inguisaneintajimi”. Aintaca matsiguenga ira te ingomantaguetiri Tosorintsi ora icanti te onganinate, pingantiri: “Querootisati ijocajimiro Tosorintsi ora picantaguetomotiri te onganinate. Përosati iguisaneinquimi”.

²⁴ Cara yoniagaigapaari Jesos irogomerejegui te irinasegue Tomás ira jitacha aisati Tsipari. Basiniegui irogomere icomantairi Tomás:

—Naniaigairi Ira Atingomi.

²⁵ Icanque ira Tomás:

—Queroca naneiro ibacoquë cara oquenaqueri carabo, queroca nominguero nobatsapaco, querootisatica nominguero nobaco cara yosataaqueri soraro, quero naquemisanti.

Jesos yoniagaari aisati irogomerejegui.

²⁶ Pabisanaque 8 cataguiteri. Aisati yapatoitaiga antagaisati irogomere Jesos cara pongotsiquë. Aisati yasitocogasega. Yamaica ainta Tomás itsipaisigari irirojegui. Aisati iquëgotapairi Jesos inasegopë aganguisati irogomerejeguiquë, yobetsatapaari icampëri:

—Obirojegui pomagoriasëretaique.

²⁷ Aique icampëri Tomás:

—Pinetsero nobaco. Pominguero pobatsapaco. Aisati pominguero pobaco yaca yosataaquina soraro. Quero pitsoinguina, pinguemisantina.

²⁸ Aique yotabitanëri Tomás:

—Obiro Natingomisonori, aisati Obiro Notosorintsite.

²⁹ Jesos icanqueri:

—Tomás, aroquenta piniaquena yamai, piquemisanquina. Ainta basini ira te iraneina carari iquemisantaiguëna. Inganinatasanoiganaque iriro.

³⁰ Jesos itasongasantomotaiguëri irogomere tojai ora te osanguenatima yaca Sanguenarica. ³¹ Ora itasonganque Jesos osanguenaca yaca Sanguenarica arota obirojegui pinguemisantaigueri Jesos Iriro Quirisito ora ocanti Agabisaicoontasiri. Iriro Itomi Tosorintsi. Aroca pinguemisanqueri përosati cara pintiomoqueri Iriro Jonogaguetequë.

21

Jesos yoniagapaari irogomere icarati 7.

¹ Aique Jesos yoniagapaari aisati irogomere cara onamijaquë angaare jitacha Tiberias. Yoniagapaari negaca. ² Cara, inasegaigui ira Simón Perero aisati Tomás ira ijita Tsipari. Aisati Natanael ira paniacha poeboroquë jitacha Caná cara Garireaquë, aisati ira itomijegui Sebereo, aisati pite basini irogomere. ³ Aro ira Simón Perero icantaiguëri:

—Aique najáque nasiriatëni.

Aique icantaiganaque iriro:

—Aisati naroequi naguiataiganaquemi.

Iáiguë yotetaiganacaro pitotsi, isiriataigabitaca omagaro tsitiniriquë, cara te iráguëmate.
⁴ Cara pënibaque onguëtaguetanë, Jesus inasegui onamijaquë angaare, carari irogomere te irogógueri Iriro.

⁵ Aro Ira Jesus icaimëri:

—Janequijegui, ¿Te págaigue sima?

Yotabitaiganaqueri irirojegui:

—Teni.

⁶ Aique igáqueri:

—Atsi pijoquiro pisiritite aiqero pobacosonoriqë, aro págaiguëri sima.

Aro ijocaiguëro. Yamai te iragabairo intinaajiro isiritite icaronta sima. ⁷ Cara iniaqueri arosónori sima aito icanque ira inintasanoti Jesus:

—¡Iriro Atingomi!

Cara iquemobë Simón Peroro Iriro Itingomi icanaquero imanchaqui saacananrinta inasegui, imatsecanë cara angaarequë. ⁸ Iraegui basini irogomere yaretacaganaaro pitotsi cara onamijaquë inosicaiganaquero isiritite jagacanta sima. Aitoniatinta onamija omoncarata 100 metoro. ⁹ Cara yaguëtaiganaque quibatsiquë iniaigapëro tsitsi itasisiga paniro sima aisati pan. ¹⁰ Jesus icantaigabaqueri:

—Pomaigapë sima ira pisiriataiguëra yamai.

¹¹ Simón Peroro yotetanaa pitotsiquë, inosicapëro siriti irooti cara onamijaquë iacaro sima iriantisonori iguibe icarati 153, tojai inabita carari te ontisaraaima siriti. ¹² Aro icantaiguëri Jesus:

—Omana popaigapë.

Carari te irine poro irogomere ira osamitirine pairiraca ijita, igóiguërinta Iriro Itingomi.

¹³ Aique Jesus yáguëro pan ipaiguëri irogomere aisati ipaiguëri sima. ¹⁴ Yamai ocarati maba cara yoniagaari irogomerejegui cara aroque icamaque icaniatanai Jesus.

Jesus inibataqueri ira Simón Peroro.

¹⁵ Cara itsongaiguë yapë, Jesus yosamitëri Simón Peroro:

—Simón itomi Jonás, ¿Pinintasantina Naro pibegaiguëri icaegui? ¿Pinintasanotina obiro?

Yotabitanëri Peroro:

—Jee, Natingomi, Obiro ogótatsi nanintimi.

Icanëri Jesus:

—Yamai pingantimari ira omisantiri itiomijani oisha. Pomisantaiguenari ira quemisanquina.

¹⁶ Yogatsitairi Jesus yosamitairi:

—Simón itomi Jonás, ¿Pinintasantina?

Yotabitanëri Peroro:

—Jee, Natingomi, Obiro ogótatsi nanintimi.

Icanqueri Jesus:

—Yamai pomisantinari noishate.

¹⁷ Mabatanë yosamitairi:

—Simón itomi Jonás, ¿Pinintina?

Yamai Peroro yogasëretanaca yosamitërinta ocarati maba aisonorica inintiri. Icanqueri:

—Natingomi, Obiro ogótiro antagaisati. Pigóti cara nanintimi.

Icanëri Jesus:

—Pomisantinari noishate. ¹⁸ Nangantasantëmini aisonori, cara jirai oboinaqueraibi piquiro pomanchaqui obineni piátagueque cara negaraca picogui pijáte. Carari cara pintiasiparitanë pintimagonaguitëma ira basini iriro caaguëmirone pomanchaqui aique iraganëmi cara te pininte pijáte.

¹⁹ Aro icanqueri negaca Jesus. Irooti yogomeantari aisati icomantëri atiraca inganquima Peroro cara ingamaquenica, inganqueri matsiguenga iraniacananatobëri Tosorintsi. Aique Jesus icanëri:

—Piguiatapëna.

Ira irogomere iranintane Jesus.

²⁰ Cara yapisitaanaca Peroro, inioberri cara yoguiataiganaqueri ira irogomere inintasanti Jesus. Iriati ira itsipasiga coshoni Ira Jesus cara yapaigasegui cani aisati yosamitëri: “Natingomi, ¿Pairi ijita ira ágagantëmine?”

²¹ Cara inioberri Peroro, yosamitëri Ira Jesus:

—Natingomi ¿Iriroque ica, ati inganquima?

²² Yotabitanëri Jesus:

—Aroca naninque Naro intimaque irooti cara nopigaima Naro, quero pogasëreta obiro. Obiro piguiatapëna.

²³ Aique iquemaigabaquero omagaro quemisantatsiri ijitabetaigaca quero icami ira irogomere inintasanoti Jesus. Carari Jesus te ingantiri cara quero icami. Patiro icanqueri: “Aroca naninque Naro intimaque irooti cara nopigaima Naro, quero pogasëreta obiro”.

²⁴ Iriati ica irogomere neiro oca aisati iriatitati sanguenatëro. Eiro ogóiguëro cara icanque aisonori.

²⁵ Aiti arosonori ora icantagueque Jesus. Arome irisanguenatëro patiropague oca, querome cotonguiboro omagaro quibatsiquë ora sanguenatënguichaneme. *Joan*

ORA ICANTAIGUË IRAGATANE JESOS

Irocas isanguenaquineri Tiójiro.

¹ Ora noguibatëmi, Tiójiro, nasanguenaquemi jirai. Nocomantëgotëri Jesos antagaisati ora icanque aisa ora yogomeantë cara iparintaca ²irooti cara yogainocanaa cara yáganëri Tosorintsi Jonogaguitequë. Teraiquerai iriáte Jesos jonoquë icoigaguequeri iragátane, icomantaiguëri ora inganque. Icomantancari Isère Caninaro Tosorintsi. ³ Aroqueque icamaque Jesos icaniatanai yoniagaigapaari iragátane. Tojai Jesos yoniagapinintaigaari arota irogóigue cara aisonori icaniatanai; cara ocarati 40 cataguiteri iniaigairi. Aisati yogometaiguëri ora iragántane Tosorintsi.

Aro ocaraque ora igátaiguëri iragátane Jesos.

⁴ Cara yapaagaiguëri Jesos icanqueri:

—Quero piáigui. Pinëni yaca Jerosarénquëca irooti cara imagantëmiro Pabati Isère Caninaro ora nocomantaiguëmi. ⁵ Ibaotisantancaro nija Joan, carari yamai arosataanti cataguiteri iroquemiro Caninaro Isère Tosorintsi obirojeguiquë, inasërepëmi.

⁶ Ira botoitacha yosamitaiguëri ira Jesos:

—Natingomi, jirai aiti iragántane omatsiguenga Isirael. Yamai te iranajjiri. ¿Yamaica piguipigairo?

⁷ Yotabitanëri Jesos:

—Teni ingogue Pabati pigóiguero ora inganque Iriro. Teatisati pigóte ati ongantima inganquero. Paniro igóti Iriro. ⁸ Orari Isère Caninaro Tosorintsi inanquemi omitocoquemi ogabiauquemi. Iroro pingomantaguetocotaguëquena yaca Jerosarénquëca, aisati Joreaquë, aisati Samariaquë, irooti antagaisatiquë quibatsi.

Cara yogainocanaa Jesos.

(Ir 24.49-53)

⁹ Aroque inibataiguëri Jesos, aique iáque yogainocanaa jonoquë. Ipaniguaigabaqueri irooti cara isorocanaque mingoriquë te iranaiagabajiri. ¹⁰ Iroontinta inetsaigabaqueri Jesos cara yogainocanaa, ainta inapë pite ironomire Tosorintsi icapëro iguitsagare catarosonori ¹¹ yosamitapëri icampëri:

—¿Aintajeguibi, Garireasati? ¿Pairo pinetsabiriti cara Jonogaguitequë? Iriati Jesos ira yáganë Tosorintsi jonoquë, caraquesatantata iribocapae. Cara iáque aisati ingampaima cara iripigaima.

¹² Aro ipigaigapa iragátane cara oguitojaquë jitacha Olibos poro quirometoro irooti Jerosarénquë. ¹³ Cara Jerosarénquë yapatoica iragátane Jesos jonoquë pongotsiquë cara itimaiguë. Ainta Peroro, Joan, Santiago, aisati Antiris, Jeripe, Tomás, aisati Baritoromé, Mateo aisati basini Santiago itomi Arijeo, Simón ira nintasantiro ibaísate, aisa Joras imatsiguenga Santiago. ¹⁴ Iquengaigaca përosati cara yamanaigui. Itsibataigari ireinti Jesos, aisati María iniro, aisati tsinanepague.

Icoiguëri Matías ira pëgairine Joras.

(Mt 27.3-8)

¹⁵ Pabisanaque arosataanti cataguiteri. Yapatoica ira quemisantiri Quirisito icarati 120. Yaratianque Peroro cara aganguisatiquë icanë:

¹⁶ —Nopiguemisantacagane, aroque omoncaraca ora isanguenague David jirai, osanguenatacaqueri Isère Caninaro Tosorintsi. Isanguenatocoqueri Joras ira obatacaganëri ira águëri Jesos. ¹⁷ Ira Joras itsibatabitaiguëna cara naquenguissatomotiri matsiguenga. ¹⁸ Aique Joras ipimantëri Jesos yágançari quirequi. Aique iáque ipariaque Joras itsirapë pisotsetanë iramaretsa. Ira basini matsiguenga yágairi iguireguite yamanantancaro quibatsi cara iritijiri camatsiri paniacha jaanta. ¹⁹ Iquemocoqueri antagaisati Jerosarésati, aro ijiquero irinibarequë iguebatsite Aséramama ora ocanti quibatsi asi araatsi. ²⁰ Cara jirai osanguenaca iribiroquë jitacha sárimo:

¡Querotasha pairi timapatsi cara itimirori iriro!

Aisati ocanti:

Iripëgairita basiniquerai sërari.

²¹⁻²² Yamai përosati inibatë Peroro:

—Ainta matsiguenga tsipataiguëna cara jirai naniaqueri Joan ibaotisantantagueque aisati itsibataiguina iniaqueri Jesos irooti cara icamaque icaniatanai yogainocanaa. Yamai iroro caninatënguisti nongoiguëri paniro matsiguenga intsibataiguëna cara nongomantëgotëri Jesos cara icaniatanai.

²³ Aro iquengaigaca irogaiguëri pite sërari: José aisa ijita Barasabás aisa ijita Jósito, aisati basini sërari ijita Matías. ²⁴ Yamanocoqueri:

—Obiro, Natingomi, pigótasantiro iraneingomento antagaisati matsiguenga. Yamai ainta yaca pite sërari. Poniagaiguenari pairi pininti ²⁵ pëgairine Joras ira tsipataigabitëna jirai iragátane Jesus aique icantaguetomotimi iáque iraisatiguetequë.

²⁶ Aro yosocaiquëro mopëquipague ora irogóntëmari pairiraca ingoiguë Tosorintsi. Aro icoiguëri Matías yogaiquëri intsibatëmari iragátane Jesus icarati 11.

2

Ora cataguiteri jitacha Pentecosités.

¹ Parepa cataguiteri jitacha Pentecosités. Yapatoitaigaca antagaisati ira quemisantiri Quirisito. ² Iroguito iquemaigabaquero cantaca coguentima oquibeguinte cara jonoquë. Pipogopë cara inaigasegui pongotsiquë piacaro. ³ Oconijatomopëri ocamparo pamaminguiro. Ipamagueque antagaisati. ⁴ Iroonti Isère Caninaro Tosorintsi. Aisati pinasërepëri antagaisati irirojegui coshoni pogaigapëri. Iparintaiganaca inibaiganaquero basinipague nibarintsi pinibataganërinta Caninaro Isère Tosorintsi. ⁵ Aroqueque yapatoica cara Jerosarënuquë tojainisonori joríojegui ipaniaguetaca jaapaguenta. Ipocasiti iromanaiguëri irinibaqueri Tosorintsi aroquenta iquemisantantëri. ⁶ Iquemocotaigapëri iragátane Jesus ira nibataguetatsi. Yapatobiripari. Te irogóigue pairoraca inguenguema cara iquemopëro antagaisati irinibaesonori. ⁷ Iquenganeintasanotaigapa icarpiti:

—¿Teco irirojegui Garireasati nibatatsica? ⁸ ¿Atiraca ocanta naquemaigapë inibataiguëro nasiati nanibare paniropague? ⁹ Ainta yaca matsiguengapague ipaniaigaca Páratiaquë, aisa Meriaquë, aisa Eránquë, Mesopotamiaquë, Joreaquë, Caparosiaquë, Pontoquë, Asiaquë, ¹⁰ Jirijaquë, Pampiriaquë, Ejípitquë, Iribiaquë aronísatiquë poeboro jitacha Sirene. Aintasati Iromasati. ¹¹ Irirojegui jorío aisati ira aretaigacha quemisantiri Tosorintsi aisa icantari jorío quemisantiri. Aintasati Queretasati aisa Arabiasati. Naroegui naquemaiguëri inibataiguëro nasiatiegui nanibarepague. Icantaiquë inibatëcoiguëri caninarisonori Tosorintsi itasorintsitanoti.

¹² Iquenganeintasantaiganaca antagaisati te irogóigue pairoraca inguenguema. Yosaminaitobaganaca:

—¿Pairo ocanti?

¹³ Ainta basini icabínsáqueri icanque:

—Isinguitaigacani.

¹⁴ Yaratinganë Peroro aisati basini iragátane Jesus icarati 11, inibatasantëri catsigue Peroro:

—Nomatsiguenga joríojegui, aisati obirojegui timaigatsi yaca Jerosarënuquëca, pingue-maiguena ora nongomantëmi yamai. ¹⁵ Icaegui matsiguengaca teni irisunguitima cara piquengaigaca obirojegui terainta irionogate paba. ¹⁶ Irooro oca isanguenatocoque jirai Joel comantantsiri cara isanguenaque:

¹⁷ Icanë Tosorintsi: “Aiquentata nomaiguëri Nasère Caninaro noguëneri cara matsiguengapaguequë. Ingomantëgotëna Naro pitomijegui aisati pisintojegui. Naro oniaguequerine oboinapague pairorapagueraca. Ira antiasiparipague inguisanitageque. ¹⁸ Aisati noguequeronta Nasère Caninaro noguëneri ira quemisantina sërari aisa tsinane. Aro ingomantëgotëna. ¹⁹ Cara jonoquë noniaguëmíroti ora pinguenganeintasantanquima. Osobica quibatsica noniaguëmíroti basiniati pinguenganeintasantanëma: tojaiti iraraa, tairingachari, arosonori catsiaguetaque inanë. ²⁰ Ira paba intsitinitanë aisa ira manchacori inguiraanë cantaca araatsi cara queroquerai ipoqui Atingomi irogótocotaiguëri omagaro matsiguenga ingomantëgotaigapëri. Irooro cataguiteri cobeingaiterisonori. ²¹ Pairiraca abenquimarine Atingomi iromanaqueri aito iragabisaicoqueri”.

Aro ocarati ora isanguenaque jirai Joel. Përosati cara inibatë Peroro:

²² —Nomatsiguenga joríojegui, pinguemaiquena ora nanganaguëmi. Yamai yoniaguëmi Tosorintsi cara inacatinatëri Ira Jesus Nasaresati. Itasangueantë, icanquero ora te aneiro jirai ora pinguenganeintasantantanaca cara itasorintsitantagueque Jesus ora pigóntëmari cara igáqueri Tosorintsi icantaguequero pairoraca. Pigótabecaro obirojegui. ²³ Jiraisonori iquianca Tosorintsi, aro igáqueri Itomi ingamaque yaca quibatsica. Obiro ógaiguëri cara popabaqueri ira basiniati matsiguenga catsimari ipëcotaiguëri. ²⁴ Irari Tosorintsi itinaajiri yoganiatairi aisatitanai. Yamai quero icamaji. ²⁵ Jirai David isanguenatocoqueri:

Përosati naneiri Natingomi catingasatiquë naro. Itsibatëna coshoni yoguëna imitocotina ora quero notsorogui. ²⁶ Irooro nacaninasëretagueque ninibatëgotëri caninasati.

Aitosati nobatsa omagoriaque caninasati ²⁷ queronta pijoquinaro nasère osobiquè, querootisati pinintacaguina pibatsaagui nobatsa naronta piniacaninatè. ²⁸ Aroque poniaguènarò negaraca cara narequimi carari yamai pèrosati nantimoquemi, obiropoganinasèretèna naronta pintsibatèma.

Iro ro ora isanguenaque David jirai. Pèrosati inibatai Peroro:

²⁹ —Nomatsiguengajegui, nanibatègotèri David catingasati. Igóiguè eiroegui icamaque David omatsiguengajegui cara jirai, itiaca yaca pèrosati irooti yamai. ³⁰ Ira David comantatsiri igótasanti aroque icomantasantèri Tosorintsi icanqueri:

—David, aiquenta noguèri Itingomi pigáantomentoque Irironta pomatsiguengasonori.

³¹ —Teraiquerai intinaajima Jesoquisito igótocoqueri David inibatègotèri Quirisito cara inganiatanae. Icanque David quero ojocagani isère osobiquè, querootisati pibatsaagui ibatsa. ³² Iriati Jesos icabiriqueri yoganiatairi Tosorintsi. Narogui irogomere Jesos nani-aigairi Irineniati. ³³ Tosorintsi yoguèri Itomi ibacosonoriqùè. Aisati ipèri Isère Caninaro Iriri icomantasantèri jirai. Yamai antagaisati oca piniaguèca aisati oca piquemaiguèca ipaiguènarò narogui Jesos. ³⁴ Cara terai iriáte Jonogaguitequè David icanque:

Tosorintsi icanqueri Quirisito Natingomi: “Pisobique yaca nobacosororiquèca ³⁵ irooti cara intingomintaiguèmi ira quisaneinquemi”.

³⁶ —Yamaicari nocoguini irogóigueta antagaisati joríojegui Iriati Jesos pipèicotaiguè obirojegui, aroque Tosorintsi icanqueri Atingomi aisa Ira Agabisaicoontatsiri.

³⁷ Cara iquemagnetobèro irinibare Peroro oshabitapèri joríojegui iraneingomètoque, inibataiganaqueri Peroro aisa basini iragátane Jesos, yosamitaiganaqueri:

—Nomatsiguenga, ¿Pairo nangantaiguè?

³⁸ Yotabitaiganaqueri Peroro:

—Pingantaigaima yacaqueroa, pabentaiguemari Jesoquisito, pomaotisabiritaiguemari Irro arota irojocajimiro Tosorintsi ora picantaguetaigui te onganinate, quero iquengaimiro. Aro coshoni irogaiganajimi ingábintsaigaimi. Aro imasitaiguèmiro Caninaro Isère aisati. ³⁹ Imasitèmiro obirojegui, aitosati imasitèmarì pijaniquitejegui, aisa antagaisatijegui matsiguenga ira ingaimè Atingomi Otosorintsite.

⁴⁰ Iroroca nibarintsi aisa basini tojai icomantaguetiri Peroro icanqueri:

—Quero posigajari yamai ica matsiguengaca icantaguetomotiri Tosorintsi ora te onganinate, te inguemisantiri. Pinguemisantiri obiro Tosorintsi arota iragabisaicoquimi irojocajimiro ora pintagueti te onganinate.

⁴¹ Aro iraegui quemisanquero irinibare ibaotisatagaca icarati 3,000. Yamai itsibataigacari quemisantatsiri. ⁴² Pèrosati iquemisantaguèro ora yogomeantè iragátane Jesos, iquengasèretatagaca, yapatotagaca, yamanaiguè, itsibatobagaiga itingaraguequero pan iquengasèretantagacari Jesos Ira camobiqueri. ⁴³ Iquenganeintasantaiganaquero antagaisati basini matsiguenga itsorogaiganaquero cara itasorintsitagueiguè iragátane Jesos imitocotaiguèrinta Tosorintsi. ⁴⁴ Pèrosati iquengasèretaganaca ira quemisantatsi aisati ipaguetobaganaca ora iraisati irro, te iromichate. ⁴⁵ Ipimantaguequero ora yasinta quemisantatsiri yotsatengaiguèri ipaguetèri ira coguitiaro pairoraca. ⁴⁶ Antagaisati catagueteri yapatoitopiantaca cara oquibequè pongotsi irasi Tosorintsi. Aisati yapaiguè pan ibangopaguequè. Icaninasèretaganaca. Aisati caninari iraneingomètojegui. ⁴⁷ Inibabentocotaiguèri Tosorintsi:

—Icaninatasanoti.

Ira Jerosaresatijegui iniacaninataiguèri ira quemisantatsiri. Pèrosati Tosorintsi yogabisaicoqueri ira irirai quemisanqueri Quirisito. Itsibataigari ira botoibiritari Jesoquisito.

3

Iquenguissatagueque Peroro oquibequè pongotsi irasi Tosorintsi.

¹ Chopiniguete iáiguè Peroro aisa Joan itanè cara oquibequè pongotsi irasi Tosorintsi. Iáque iromanaque irinibaqueri Tosorintsi ora yameta joríojegui. ² Cara omoroquè jítacha caninaro ainta inasegui paniro sèrari carancaratsi. Te iranèitèmate cara iboguè jirai irooti yamai. Antagaisati catagueteri iráganèngani cara omoroquè iromanaguequeri ira bocatsi imèri quirequi. ³ Cara iniobèri Peroro aisa Joan cara inganaqueme yamanobèri quirequi icabèri:

—Pingantaneintègotina, pomena quirequi.

⁴ Inetsaigapèri Peroro aisati Joan, icampèri:

—Pinetsena.

⁵ Inetsèri ininti irágobèri pairiraca. ⁶ Carari icanè Peroro:

—Teni irine nasi naguirequite, teatisati oro. Yamaica iroonti ora inatsi nomèmi. Nanganqueri yamai Jesoquisito Nasaresati iranèitacagajimita. Pingabiritima panèitanè.

⁷ Peroro yáguèri ibacosonoriquè imitocoqueri cara iraratinganè. Aito cara osintsitanai iguiti aisati igueroqui. ⁸ Omanapague icabiritanaca yanëitasantanai. Itsibatacari pitirooti tsomagui oquibequè pongotsi irasi Tosorintsi. Yanëitanè, imatsematsetanè, inibabentocotajiri:

—Caninari Tosorintsi.

⁹ Tojanisonori matsiguenga iniaiguèri cara yanëitasegui inibabentocoqueri Tosorintsi. ¹⁰ Igóiguèri irironta ira sobigantetatsi cara omoroquè caninaro oquibequè pongotsi irasi Tosorintsi, yamanopiantè quirequi. Iquenganeintasantaigacari matsiguenga. Teni irogóigue atiraca icanca. ¹¹ Cara ibeganaa carancaratabetacha te irapabaquëicotiri Peroro aisati Joan cara isotocané. Cara omoroquè jítacha iraisati Saromón isigaigapa matsiguenga iquenganeintasanotaigapa. ¹² Peroro iniaiguèri matsiguenga yosamitobèri:

—Nomatsiguenga ¿Pairo piquenganeintasantobiqueri ica? ¿Pairo pinetsabiritaiguëna? Cagaro natasorintsite noganëiantaari. Querootisati pijitina caninarina naro. ¹³ Iriro Tosorintsi iquemisanque Abaram jirai, aisati iquemisanqueri Isac aisa Jacob, achari-neegui, Iriro oniaganiguëmiri Jesus Itomi Caninarisonori. Obirojegui págagantèri, pitsoingauguèri catingasatiquè Pirato cara icogabeca iromisotocajiri. Te pinintaigue obirojegui. ¹⁴ Pitsoingaiguèri Ira caninatasannotatsiri. Te pomaniri Pirato iromisotocajiri Jesus, irianti picogaiguè iromisotocajimiri ógueri. ¹⁵ Pógaiguèri Ira timagantatsiri. Icamaque Jesus cariri icabiritajiri Tosorintsi yoganiatairi. Aisatitanai naniaigabajiri. ¹⁶ Iriati Jesus pèri isintsire ica sèrara. ¿Teco pigótiri? Iquemisanquerinta Jesus, ica yoguibegajica.

¹⁷ —Yamai, nomatsiguenga, nigóti naro te pigóigue obirojegui ora picantaguè cara pogamagaiguèri Jesus. Teatisati irogóigue pitingomipague. ¹⁸ Aroque Tosorintsi isanguenatacaganèri antagaisati comantantatsiri jirai icomantègotaguèri Quirisito cara ingamobicái. ¹⁹ Pinguenguaguema arota pomasiniatitanae yamai quero picantaja pibega jirai. Pabentaiguemari Tosorintsi pinguemisantaiguèri arota irojocajimiro ora picantaguèigui te onganinate. ²⁰ Aro ingábintsaigaimi Tosorintsi intsibatèmi arota iraganinasèretaiquemi. Aisati iragátajimiri Jesus aisati ijita Quirisito Ira Agabisaicoantatsiri Ira icomantègotaguè comantantatsiri jirai. ²¹ Irinaqueni Jesus canta Jonogaguetequènta irooti cara irobet-sicaguequero Tosorintsi antagaisati pairoraca yaca quibatsica. Jirai Tosorintsi isanguenatacaqueri, inibatagaiguèri comantantatsiripague ora inganque Tosorintsi yaca quibatsica. ²² Paniro comantantatsiri jítacha Moisés isanguenague jirai:

Tosorintsi Itingomisonori iragáquemiri comantantatsiri aisati inganquina nibega naro. Iriro omatsiguenga. Pairoraca ingomantaguèmi pinguemisantaigabaquitiguiri.

²³ Ira quero iquemisantobèri, iriro iripoguiriaiguè iritsonguëmata, quero itsibatari imatsiguenga quemisantatsiri.

²⁴ Antagaisati comantantatsiri icomantègotèro oca piniaiguëca yamai. Iparintaca Sameol aique basini comantantatsiri irooti yamai. Icomantègotèro omagaro. ²⁵ Aisati obirojegui pomatsiguengatacari ira comantantatsiri jirai. Picharineegui aisati obirojegui iquengauguèmi Tosorintsi cara icanqueri Abaram:

Nangantocobintaguèri antagaisati matsiguenga yaca quibatsica. Iroro nagátaguèqueri pomatsiguenga iragabisaicotaigaimi obirojegui iraganinasèretaiquèri matsiguen-gajegui.

²⁶ Tosorintsi yoguibatèri Itomi igáquemiri ingábintsaiguèmi caninasati arota pijoquiro obiro-jegui ora picantaguèti quimingaro, aro iragabisaicotaigaimi.

4

Peroro yogomequeri itingomi.

¹ Iroontita inibataigasegui matsiguenga Peroro aisa Joan, iriguito ipocaigapè saserirotijegui aisati saroseogui aisati itingomi ira omisantiro oquibe pongotsi irasi Tosorintsi. ² Iguisanijimpèri inibatobagaigaca:

—¿Pairo yogomebiriqueri matsiguenga? Icomantirini inganiantanae igamagapague aro-quentita itinaaja Jesus icaniantanai. Teni onganinate oca yogometirica.

³ Aroquenta ochapinitanè, yágagantèri ira Peroro, aisati Joan, aisa ira carancarata-betacha, yomingaiguèri irooti cara onguëtaguetanè. ⁴ Carari tojaini ira quemaguèri Peroro aisa Joan iquemisantaiguèro Irinibare Tosorintsi. Yamai quemisantatsiri icarataigui 5,000 sèrari.

⁵ Oquëtaguetanai yapatoica Jerosarénquè itingomiegui jorío, antiasipariegui, aisa ira ogameantiro Sanguenari. ⁶ Aintasati Anás itingomi saserirotijegui, aisa Caijás, Joan, Arijantoro, antagaisati imatsiguenga itingomi saseriroti. ⁷ Icaimagantèri Peroro aisati Joan yogobèri aganguisati, yosamitaigabaqueri:

—¿Ati picanqueri ica pogaguibegajica? ¿Pairo picantancari? ¿Pairo agáquemiro cara picanquero negaca?

⁸Pinantasantarinta Peroro Isère Tosorintsi pinibataqueri caninasati. Aro yotabitanèri Peroro:

—Obirojegui itingomi aisati antiasipari, ⁹¿Iriroco posamitaiguèna ica carancarata-betachaca icantaneintègotèri Tosorintsi? Pinetsaiguèri tegotsitatsi ini yamai. ¿Pico-gaiguinico pigóigue atiraca icanca cara ibegaja? ¹⁰Pinguemaiguena. Aisati caninataque inguemaigue antagaisati omatsiguenga. Yogabisaicotajiri Jesoquisisito Nasaresati Ira pipècotaigabitaca obirojegui, carari itinaajiri Tosorintsi yoganiatairi.

¹¹—Ira Jesus aisa icantaro pibega otingomi mopè cara ijocaiguèro jirai ira obetsiquirori pongotsi. Tosorintsi yoguibatèri Itomi Iriro Itingomisonori, carari obirojegui picantari obetsiquirori pongotsi. Pitsoingagabaqueri Jesus pipècotaiguèri. ¹²Teni irine basini Agabisaicoontatsiri yaca quibatsica ira agabisaicotajàine. Pairo Jesus ipacáiri Tosorintsi.

¹³Inibatasantè catingasati Peroro aisa Joan. Iniaigabaqueri itingomiegui iquenganeintasantanaca inibatobagaigaca:

—¿Pairo te intsorogobite pitirooti? Teni irotsatenguero sanguenari tenta irisanguenatasante. Irianti simaguíti. ¿Nega igóiguèro inibatèro ora icanque negaca? Irirojengari ogamequeri Jesus cara itsibataigacari jirai.

¹⁴Aintasati ira obegajacha. Iniaigabaqueri itingomiegui te irogóigue irotopitaiguèri Peroro. ¹⁵Aro igáqueri Peroro aisati Joan aisati ira obegajacha:

—Atsi pisotocanè canta. Caraquenta nangaimaigaimi.

Aro inibatobagaigaca itingomiegui. ¹⁶Icantaiguè:

—¿Ati-roco angantiri ira sèrarira? Quero itsoingaguèri eiro antagaisatinta Jerosaresati igóiguè cara itasonganque. ¹⁷Teni onganinate cara inguenguitsatomotaguetiri basini matsiguenga. Intsome omitsoroguiru, intsome angantiri: “Quero picomantègotairi Jesus”.

¹⁸Aisati icaimaigairi iguisatsatèri isintsitsaqueri:

—Quero picomantègotairi aisati Jesus. Querootisati pogometocotajiri.

¹⁹Peroro aisa Joan yotabitaiganaqueri:

—Pinguengaiguema obirojegui. ¿Teco iraniaigái Tosorintsi? Pingomantina. ¿Caninataqueco nanguemisantaiguèmi obiro; oraco irasi Tosorintsi nanguemisanque? ²⁰Quero nojocobintiro, nanganquero ora naniaque aisati ora naquemaque.

Yapatoitaigaca quemisantatsiri yamanaiguè.

²¹Yamai yogobeingataiguèri itingomiegui cara igátaigairi. Te iripasabintsatiri aroquenta itsorogaiguèri matsiguengajegui. Icanque matsiguenga:

—Caninari Tosorintsi aisati caninari ira quemisantatsiri yoguibegajiri carancaratsiri.

Iroro te iripasataguètiri. ²²Aroque yogabisè 40 osarini ira carancaratsi carari itasorintsite Jesus pogabisaicotajiri.

²³Aro itingomiegui yomisotocagairi Peroro aisa Joan, aique iáiguè cara inaignasegui basini quemisantatsiri. Icomantaguepèri antagaisati ora icanque itingomiegui saseriroti aisati antiasipari. ²⁴Aroque iquemaigabaqueri, yamanaiguèri Tosorintsi icantaiguè:

—Natingomi Tosorintsi, Obiro obetsiquèro Jonogaguete, aisati quibatsi, aisa angaare, antagaisati. Aisati pobetsicaguequeri antagaisati ira inatsi Jonogaguetequè, aisa quibatsiquè, aisa angaarequè. ²⁵Aisati jirai pogomequeri David ira quemisantimi. Pogomeantacari Pisère ora isanguenatacario oca:

¿Pairo iguisaneintaguetobiquimi ira basiniatsi matsiguenga? ¿Pairo iquengasèretaguebiritiro jorojegui ora te onganinate? ²⁶Ira itingomiegui iquengaigabitaca icogaigabita iritsonguerime Atingomisonori aisa Ira agabisaicoontatsi.

²⁷Yaca Jerosarènuè yapatoitaigaca arosaroni matsiguenga iguisaneintaguèri Jesus Pitomi caninari. Iriro poguè Agabisaicoontatsiri. Iguisaneintaguèri Eroris, Pontsio Pirato, jorojegui, aisati basiniatsi matsiguenga. ²⁸Jirai pigótiri. Yamai aroque icantaiguèro iriro-jegui ora piquianca pobetsiquè jirai. Aisati pisèretaca cara ingamobitaiguèna Pitomi Jesus.

²⁹Yamai Natingomi, pinetsaiguèri. Icoquini iromitsorogaiguena. Pingantocotina querota notsorogaiguèri pèrosati nanguenguitsatasantèmiro Pinibare. ³⁰Pitasorintsitanote, pigaguibegajiri ira janaitatsi arota irogótiri matsiguenga aisonori Iriro Jesus Pitomi aisati irianacaninataiguèri.

³¹Aroqueque itsonque yamanaiguè, aro posebatanaca pongotsi cara inaignasegui. Pinampari Caninaro Isère Tosorintsi icomantasantanquero aisonori Irinibare Tosorintsi, te intsorogaiganaque.

Iquengaigaca quemisantatsiri intimaiguè caninasati.

³²Yamai tojaini icarati quemisantatsiri. Iquengasèretaganaca. Ipabacaguetanaca ora iraisati, te iromichate. Te pairo cantatsine:

—Iroroca nasiati.

³³ Përosati iquenguitsatasantë iragátane Jesos icanque:

—Icabiritanaa Atingomi Jesos icaniantanai.

Aisati icábintsauguëri Tosorintsi ira iragátane. Yoganinasëretaiquëri. ³⁴ Te paniro tasegat-sine. Antagaisatinta yasintagueta togantsipague aisati pongotsipague ipimantaguëtiro yágancaro quirequi. Yamapëri, ³⁵ ipapëri iragátaneegui Jesos irotsatengaguëtiro ira coguetatsi panirropague. Icantaneintëgotëri imitocoqueri irapiguemisanacagane. ³⁶ Ainta inasegui paniro sërari jítacha José. Aisati iragátane Jesos ijitaiguëri Berinabé ora ocanti caninatagantatsiri. Ipaniaca oboguesiquë jítacha Chípire. Iriro imatsiguenga Irebí. ³⁷ Ipimantëro iritogane, yamapë iguireguite, ipapëri iragátaneegui Jesos.

5

Itsoigaca Ananías aisa Sajira iina.

¹ Ainta basini sërari jítacha Ananías aisati Sajira iina ipimantëro iritogane. ² Iquengaigaca iriro aisa iina yágarantobë aganguisati quirequi, yoguëri. Yáganëri basini Ananías ipapëri iragátane Jesos icampëri:

—Jerica quirequi pipënataca cara nopimantëro notogane.

³ Antagaisati pigótacaqueri Peroro Isëre Caninaro Tosorintsi. Icabëri Peroro:

—Ananías, pitsogani. ¿Pairo pinintacagobiqueru camagari Satanás yamaica inanquimi pineiquë? ¿Pairo pamatobibiritabecaro Isëre Tosorintsi cara págarantobë quirequi, poganontacari aganguisati? ⁴ ¿Cagarico pasi pitogane ora popimantëra, cagarico pasi quirequi? ¿Pairo piquengabiritaigaca picanque: “Jerica antagaisati quirequi”? Teni pomatobitina naro, Irianti pamatobitabeca Tosorintsi.

⁵ Iquemobëro Ananías oca nibarintsica, aito ipariganë icamaque. Iquemocotobëtiugirini itisorogantaiganaque antagaisati. ⁶ Aique yobetsicaiguëri oboinapague iponatancari tocoya, yágaiganaqueru itiaiguëri. ⁷ Pabisanaque cosamanisata pipogopë iina Ananías, terai ogóte cara aroque icamaque ojime. ⁸ Yosamitobëro Peroro:

—¿Ati icarati quirequi páguë cara popimantaiguëro pitogane? ¿Antagaisatico ica ipapënaca pijime?

Oniaqueru Sajira ocampëri:

—Jee, antagaisati.

⁹ Icabëro Peroro:

—¿Pairo piquengabiritaigaca obiro aisa pijime pomatobitaiguëro Isëre Atingomi? Pinetseri ira sërarpaguera. Aroque itiaiguëri pijime. Aisati obiro yamai iráganëmi iritijaiguëmi.

¹⁰ Aitosati opariganë Sajira ocamaque iguitiquë Peroro. Cara icaigapë oboina, ini-aigapëro aroque ocamaque. Yáganëro itiaquero otsibatapaari ojime. ¹¹ Aro itisorogantaiganaque omagaro ira quemëgotëri Ananías aisati iina.

Iragátane Jesos catingasati cara joríoquë.

¹² Tojai itasongapininti iragátane Jesos imitocoquerinta Tosorintsi. Yoniagaiguëri matsiguenga ora igóontacari Tosorintsi. Iquenganeintasantaiganaca matsiguenga. Yapatotaigaca ira quemisantatsiri cara omoroquë jítacha iraisati Saromón. ¹³ Itsorogaiguë matsiguengajegui cara intsibataiguëmari, carari icanque:

—Cobeingari ira quemisantiri Jesos, carari aisati caninari.

¹⁴ Tojaisonoru sërari aisati tsinane quemisantaiguëri Jesoquirisito. Itojaigasanoiganaque quemisantatsiri. ¹⁵ Yogaiguëri ira janaitaguëtiro cara abatsiquë. Yoguëri jatasintsiquë aronta inguenopë Peroro iromamegapëri arota irobeganaima. ¹⁶ Yapatotaigapa tojaini matsiguenga paniacha basinipaguequë poeboro aroniatiquë Jerosarén. Yamaigapëri ira janaitatsiri aisati ira inanca camagari. Yoguëbegajiri antagaisati.

¹⁷ Aro iguisaneintanaca itingomi saseriroti aisa ira tsipatachari ijita saroseo. ¹⁸ Yágagantëri ira iragátane Jesos yomianqueru iromingamentojeguëtiro Jerosaresati. ¹⁹ Cara tsitiniriquë yasirianaquineru ironomire Tosorintsi, yomisotocanaïri icanqueru:

²⁰ —Pijáigue cara oquibequë pongotsi irasi Tosorintsi. Pinguenguitsataiguëro ara nibarintsi timagantatsi. Inguemisanqueroca matsiguenga përosati intimaque Jonogaguëtiro.

²¹ Cara oquëtaguetanë iáiguë cara ibangoquë Tosorintsi yogomeantaguetanë. Iroontita yogomeantagui, itingomi saseriroti aisa ira itsibata icaimaiguëri yapatotaiguëri ira obatsiri jorío icarati 71. Irirojugui saseriroti, antiasipari, aisati ira ogomeantiro ora isanguenaque jirai Moisés. Igáqueru iromeraro:

—Pijáigue omingamentoquë pomaigapënaru yaca ira quemisantiri Jesos.

²² Aique iáiguë iromingamentoquë. Te irinaigauë. Aro ipigaigapa icomantaigapë ²³ icanque:

—Nanaigapëro omingamento ositasantaga sitëcori. Ainta ira omisantiro omoroquë. Cara nasiriabeparo te irinaigue tsomagui.

²⁴ Cara iquemaquero oca nibarintsica itingomi ira omisantiro ibango Tosorintsi aisa itingomi saseriroti imabocaca iquenganeintasantaiganaca. Yosamitobaganaca:

—¿Ati icanca irirojegui? ¿Nega íáiguë? ¿Atini yamai?

²⁵ Iriguito yarepa paniro sérari icampë:

—Ira sérari pomingaigabitaca ainta yamai tsomagui oquibequë pongotsi irasi Tosorintsi yogometaigapairi matsiguenga.

²⁶ Aique íáque itingomi ira omisantiro oquibe pongotsi aisa iratirite, yamaigapëri caninasati. Te ingantiri catsimari itsorogaiguërinta matsiguenga. Icanque itingomi:

—Iribasegaiguë'naca mopëquë.

²⁷ Yamapëri ira iragátane Jesus itingomi aisa ira itsibata, yogaiquëri aganguisati obatat-siriquë. Icabëri itingomi saseriroti:

²⁸ —Aroque nacantasantaiguëmi cani: “Quero picomantëgotaigairi Jesus”. Yamai pogometaiguëri omagaro Jerosaresati. Pinibatëgotina: “Irirojegui saseriroti ógaiguëri Jesus”.

²⁹ Yotabitaiganaqueri Peroro aisa basini iragátane Jesus:

—Caninataque nanguemisantaiguëri Tosorintsi. Inganqueca matsiguenga ora basiniati, quero naquemisantiri. ³⁰ Aisonori obirojegui ógaiguëri Jesus. Pipëcotaiguëri corosiquë. Carari icabiritajiri Tosorintsi yoganiatairi, Ira iquemisantaiguë omatsiguenga jirai.

³¹ Tosorintsi yogainocanëri Ira Jesus. Yoguëri ibacosonoriquë. Yoguëri Itingomi Obatatsiri aisati Agabisaicoontatsiri icoguininta imëri joríojegui cara ingantaigaima yacaqueroca, ingábintsaiquëri Tosorintsi iriocajiniri ora icantagueti te onganinate quero iquengairo.

³² Aroque nigótasantëro oca nocomantaiguëmica yamai nianasantaguequero. Aisati ocomantagueti Caninaro Isëre Tosorintsi, Iroro ipëri Tosorintsi antagaisati ira quemisantiri.

³³ Cara iquemaigabaquero oca nibarintsica págapëri oshabitapëri iraneingomentoquë itingomiegui, iguisaneintasanoiguëri iragátane Jesus. Icoigaigabitanaca iróguirime. ³⁴ Ainta sérari jítacha Gamariel. Iriro bariseo aisati yogomeantiro Sanguenari. Iniacaninataiguëri iriro matsiguenga. Aro yaratianque icanque:

—Iragánërita casiriconiati icaegui quemisantirica Jesus. Caraquenta aguipigapairi.

Aro yáganëri sotoquë. Aique icanë Gamariel:

³⁵ —Nomatsiguenga, pigamaiguema ora pinganquerira icaegui quemisantiri Jesus.

³⁶ Jirai iconijapë Téoras ira jítabitënguicha itingomi. Yoguiataiguëri tojai irogomere icarati 400 sérari. Yogamagaiguëri Téoras atingomiegui, yomisigaiganaqueri iratirite íátagueque. Yamai teni nanguemocotajiri. ³⁷ Aique cara isanguenatocotaguequëri antagaisati matsiguenga arota iripë'nabintëri quirequi impositio, iconijapë Joras Garireasati. Aisati yoguiataiguëri tojanisonori irogomere. Aisati yogamagaiguëri ira Joras, íátagueque iratirite. ³⁸ Iroro nocomantaguëtaiguimi yamai caninataque irineta icaegui matsiguen-gaca. Quero picantaguiiri pairoraca. Iriroca agáqueri matsiguenga ingomantagueque, aro otsonganaquima oca nibarintsica. ³⁹ Iriroca agáqueri Tosorintsi tiguëti pingantiri piguimairintiri. Quero pipëgatsatari Tosorintsi.

Cara iquemobëro oca nibarintsica, iquengaiganaca.

⁴⁰ Icaimagantaigairi ira iragátane Jesus. Ipogopë. Ipasataigabaqueri, icantasantaiguëri:

—¡Quero pinibatëgotaigairi Jesus! ¡Quero pinibatëmati!

Aro ígátaiquë itingomiegui yomisotocajiri. ⁴¹ Íáiguë quemisantatsiri icarati 12 icaninasëretaiquë aroquenta itsipiriobitaiguëri Jesus ora pasiguitagantsi. ⁴² Antagaisati cataguitëri përosati yogomeantaiguëri cara oquibequë pongotsi irasi Tosorintsi aisati pongotsipaguequë. Icomantëgotaiguëri Jesus icantopiantë:

—Iriati Jesus Agabisaicoontatsiri Ira oguiaguë eiro jirai.

6

Icoigaiguëri ira omitocoontatsiri icarati 7.

¹ Itojaiganaque quemisantatsiri. Ainta ira nibatatsi guiriego aisati ira nibatatsi ebereo. Yabenca ira nibatatsi guiriego icantaiguë:

—Antagaisati cataguitëri cara imitocoonti yotsatengaguetiro perintsi, omatsiguenga ogamaimentaga pitaseguë. Paniro imitocotiro iroontí ora nibatiro ebereo.

² Aro iragátane Jesus icarati 12 yapatoiqueri antagaisati quemisantatsiri. Icabëri:

—Teni ongomeite nojocanëro cara naquenguitsatopiantiro Irinibare Tosorintsi arota nomaguetaiguëmiro poperi. ³ Yamai, nopiguemisantane, pingoigaigue 7 matsiguenga omitocoontatsiri ira caninatatsiri, ogótasantatsiri, pinanca Isëre Caninaro Tosorintsi. Pomeri

itarobacaare ora imantaguetimiro poperi. ⁴Narogui përosati cara nomanaguë aisati cara nongomtagueantiro Irinibare Tosorintsi.

⁵Aro iquengaiguëro. Icoigaiguëri Isiteban ira quemisantasannotatsi aisa pinancari Isère Caninaro Tosorintsi. Aisati icoigaiguëri Jeripe, Porócoro, Nicanor, Timón, Párimenas. Aisati icoiguëri Nicorás Antioquíasati, jirai itsibataigacari jorío iquemisantabecari Tosorintsi, aique iquemisantasantëri. ⁶Aique yamaigapëri cara iragátanequë Jesus. Aro yamanocotaigabaqueri yogaguëneri ibaco iguitoquë. ⁷Tojai icarati ira quemaiguëro Irinibare Tosorintsi. Aiquero iáque itojaiganaque quemisantsiri canta Jerosarenquë. Aisati tojai icarati saseriroti quemisanquero Caninaro Nibarintsi.

Yáguëngani Isiteban.

⁸Tojai incaninasëretasantë Isiteban. Tojai itasongagueanti imitocoquerinta Tosorintsi. Iquenganeintasantaiganaca matsiguenga. ⁹Yapatotaigaca matsiguenga jirai ibimantaga, yamai yomisotocajiri, aintasati Sirenesati, Arijantiríasati, Sirisiasati, Asiasati. Irirojegui pëgatsatacari Isiteban. ¹⁰Teni irogóigue irotopitiri. Igótasanoti Isiteban inibatasantë Iroronta Isère Caninaro Tosorintsi nibatacaqueri. ¹¹Aro tojai ira quisaneinqueri ira Isiteban icantaiguëri basini matsiguenga:

—Intsome ontoiguëgotimari Isiteban. Aro nomaiguëmi quirequi. Pinibatëgotiri: “Naquemaqueri Isiteban. Itsoinguëri Moisés icantocoqueri ora te onganinate. Aisati icantocotaguetasiri Tosorintsi?”

¹²Iquemaiguëri joríojegui iguisaneintaiganaca antiasipariegui, aisa ira ogomeantiro Sanguenari, antagaisati. Omanapague ipocasipëri yágaigapëri Isiteban yáganëri itingomieguiquë jorío icarati 71. ¹³Aisati igátaiguëri ira tsoiguëgotëmarine inganque:

—Naquemaqueri Isiteban icantopiantë: “Teni onganinate ibangoca Tosorintsi. Teatisa ora isanguenaque Moisés. ¹⁴Irioquëro Jesus oquibeca pongotsi. Aisati imasiniatiquero ora nametaiga ora yogomeantaiguëna Moisés”.

¹⁵Aique inetsaiguëri Isiteban itingomiegui jorío aisati antagaisati ira sobicaigasegatsi. Inetsasantobëri iboroquë Isiteban caninaro aisa icantaborotari ibega ironomire Tosorintsi.

7

Icomantëgotaca Isiteban.

¹Yosamitëri itingomi saseriroti:

—¿Aisonori oca icantocotaiguëmica?

²Yotabitanëri Isiteban:

—Nomatsiguenga, aisati natingomiegui, pinguemaiguena. Jirai itimi omatsiguengajegui Abaram canta Mesopotamiaquëta teraiquerai iragaganëma Jaránquë. Canta yoniagapari Tosorintsi Ira caninarisonori. ³Icampëri:

Pijocanëri pomatsiguenga, pijátaje irooti basiniquë quibatsi ora noniaguëmira.

⁴Aique ijocanëro Abaram iguebatsite imatsiguenga. Itsibatari iriri cara iáguë Jaránquë. Aito icamaque iriri. Aro Iriroquerai Tosorintsi agaganëri Abaram irooti oca quibatsica cara pitimaigui obirojegui yamai. ⁵Terai imeri Tosorintsi oca quibatsica te imëmatiri arosata. Patiro icanqueri:

Aiquenta nomëmiro pintimenta yaca. Pingamaqueca obiro, aro intimaiguë pitomijegui yaca.

Terai irine itomi Abaram. ⁶Aisati icanqueri Tosorintsi:

Aiquenta intimaiguë arosonori pitomijegui aisati picharineegui cara iguebatsitequë basiniati matsiguenga, iromerataigabaquimari tojai osarini ongaraque 400 ingantaguequeri ora catsimari. ⁷Aique nangasitígataiguëri ira merataiguëmarine. Aro irisotocagaie pomatsiguenga naguipegairi yaca quibatsica, inguemisantaiguëna yaca. ⁸Nocogui yamai pitotima irogóontima matsiguenga piquemisanquina.

Aro iquengaigaca Abaram Tosorintsi. Cara inë itomi Abaram jitacha Isac, pabisanaque 8 cataguiteri itoqueri cara yametaiga joríojegui. Aisa inë itomi Isac jitacha Jacob, itoqueri. Aisati Jacob itomintacari itomi icarati 12, itotaguequeri. ⁹Ainta paniro itomi Jacob jitacha José. Iriati ireinti icarati 10 iguisaneinqueri José ipimantaiguëri. Yáganëri matsiguenga canta Ejípitoquë. ¹⁰Itsibatari Tosorintsi imitocoqueri icábintsëri, icanqueri ira Baraón itingomi Ejípitosati inacanianatëri José. Yoguëri Baraón aganguisonoriquë, aisati itingombiriqueri José cara itingomibintaiguëri antagaisati Ejípitosati aisati imatsiguenga Baraón.

¹¹Përosati inibatasegui Isiteban icanë:

—Pabisanaque cara pipoque itasegasanoiguë antagaisati Ejípitosati aisa omatsiguenga yaca Canánquëca. Te inae iraperiegui. Canta Ejípitoquë José yoguëro tojai perintsi.

12 Iquemocoquero perintsi Jacob canta Ejípitoquë. Aro igáqueri acharineegui itomijegui Jacob. Patiro iáiguë. ¹³ Cara iáigai aisati, yoniagaigabacari José igóigapëri ireinti. Aisati Baraón itingomi igóigabaqueri imatsiguenga José. ¹⁴ Aique icabëri José:

Atsi pijáigue, pingantiri Apati iribocapë yaca aisati antagaisati imatsiguenga.

¹⁵ Aro iáiguë irooti Ejípitoquë Jacob aisati imatsiguenga icarati 75. Canta, icamaque Jacob aisati canta icamaiguë acharineegui. ¹⁶ Aiquenta yágaiganaqueri igamagapague itiaqueri Siquemiquë cara quibatsiquë ora yamanantë Abaram jirai ipimantë itomijegui Emor.

¹⁷ Përosati icanti Isiteban:

—Cara aronibati omoncaraquima ora icanqueri Abaram Tosorintsi jirai, itojaiganaque omatsiguenga canta Ejípitoquë. ¹⁸ Aique ipoque irirai itingomi te irogóteri José.

¹⁹ Yamatobitaiguëri omatsiguenga icanqueri cara irojocaiqueri itomijegui arota ingame.

²⁰ Aro inë Moisés. Iniacaninatëri Tosorintsi. Maba manchacori iquibianë ibangoquë iriri, iniro pimánopitëri Ejípitosati. ²¹ Cara ojocanëri sotoquë oniopëri irisinto Baraón, págairi ocanqueri iriro asi otomi. ²² Yogometasantëri Ejípitosati antagaisati ora igóigui iriro. Catingasati inibati Moisés. Caninasati icantaguetiro pairoraca intagueti.

²³ Aisati icanë Isiteban:

—Ora irosarinite Moisés ocarati 40, aro iquianqueri iraniaqueri joríojegui imatsiguenga.

²⁴ Aique iáque. Iniopëri Ejípitosati iguisasiguiri paniro jorío. Yogamagapëri Moisés ira Ejípitosati; ²⁵ ijique irogóigueme imatsiguenga cara iriro iragabisaicoontaiguemarime Tosorintsi carari te irogóigue. ²⁶ Cara oquëtaguetanë iniopëri pite imatsiguenga iguisabacagasega. Icgabeca Moisés iraguimairitirime. Icantabecari:

¿Pairo piguisabacagobita? ¿Cagarico pomatsiguenga?

²⁷ Aro yosibitobëtiguiri ira quisasanoquenguicha, icabëri:

¿Pairi agáquemi obiro yaca pingampëma natingomi? ¿Picoguinico pomerataiguena?

²⁸ ¿Póguënanico naro pibiaqueri Ejípitosati chopi ira pogamaguë?

²⁹ Iquemobëro Moisés itsoroganë isiganaca irooti basiniquë quibatsi jitacha Matían. Irooti itimantapa. Canta yágapë ina, inë pite itomi.

³⁰ —Pabisanaque 40 osarini itimoqueri iriconguiri Moisés. Aiti pinasegui piriabatsaro cara aronisatiquë oguitoja jitacha Sinaí. Yomisantëneri Moisés iroishate iriconguiri, iconijatompëri ironomire Tosorintsi irisaanganetsite cara totseisiquë itairingopa yosiacaro tsitsi carari te otagatoma totseisi. ³¹ Iquenganeintasantanaca Moisés yotsitiparo totseisi icoque irianasatiro tsitsi. Iquemobëtiguero Irinibare Tosorintsi. ³² Icabëri:

Naro Tosorintsi; iquemisantina picharine Abarám aisati iquemisantina Isac, aisa iquemisantina Jacob.

Aro imogomogoatanaca Moisés itsoroganë te iranetsanajiro. ³³ Aisati icanqueri Tosorintsi: Piguëtiri pisapatote paratianquenta cara quibatsiquë caninaguitero catingasatiquë Naro Pitosorintsite, pinguemisantsatina.

³⁴ Naniaiguëri pomatsiguenga Ejípitoquë. Naquemaiguëri cara yabentaigaca. Yamai nangábintsaignëri. Iroto nipocasitaguëqueri. Yamai nagáqueminini Ejípitoquë.

³⁵ Jirai itsoingagabitacari ira Moisés icanqueri: “¿Paire agáquemi pingampëma natingomi?” Iriati Moisés igáque Tosorintsi yamai icanqueri itingomi cara iragabisaicotaiguëri imatsiguenga. Iroto igátaguëqueri ironomire Tosorintsi ira conijatomoqueri totseisiquë. ³⁶ Iriroro Moisés ágaiganaqueri imatsiguenga acharineegui. Itasongobentaiguëri cara Ejípitoquë aisati cara yoguimontiaiganaqueri angaarequë tsonaaro aisati quibatsiquë piriabatsaro. Itasongobentaiguëri 40 osarini.

Aisati icanë Isiteban:

³⁷ —Iriati Moisés icantaiguëri joríojegui:

Tosorintsi agáquemirine comantantatsiri aisa inganquina nibega naro. Iriroro pomatsiguenga. Pairoraca ingomantaiguëmira pinguemisantaigabaquitiguiri.

³⁸ Aisati Moisés itentaigari jirai omatsiguenga quibatsiquë piriabatsaro, aisati inibatobaca irisaanganetsite Tosorintsi oguitojaquë jitacha Sinaí. Aisati iriro iquemobëro Irinibare Tosorintsi timagantatsiri ora igóontacari Tosorintsi. Isanguenataigairo. ³⁹ Acharineegui te inguemisantiri Moisés itsoingaguëri. Icgagaigabitaca iripigaimame Ejípitoquë. ⁴⁰ Iroontita inë Moisés jonoquë oguitoja, icantaiguëri Aarón ireinti Moisés:

Nocogaiguini pobetsiquinari basini nobabane irirai irobataiguëna naguiatanëri, tenta nogóigue negaraca ipiaca Moisés ira maigapëna cara Ejípitoquë irooti yaca oguitojaica jitacha Sinaí.

⁴¹ Aro yobetsicaiguëneri yosiacagantëri itiomijani baaca. Ijiqueri ibabane yógaiguëneri itaquineri oisha, icaninasërebiritaganaqueri ira yobetsicasitaca. ⁴² Aro ijocaiganaqueri Tosorintsi iromanocotirita paba, manchacori, aisa jonasatapague. Jirai isanguenatocoqueri comantantatsiri jitacha Amós:

Obirojegui jorío, ¿Teco pógaiuenari oisha cara jirai tojai osarini ocarati 40 canta piri-abatsariquë quibatsi? ⁴³ Teni. Iroonti panataiguëri pobabane Moroc, aisati panataiguëri irosiacagomento jonogasati jitacha Repam, pitirooti posiacagantë pobetsicasitaigari obiro pamanocotasitaigari. Iroso nojocaguëquemi piguebatsitequë, nagátaiguëmi canta jaanta Babiróniaquë.

Aroque isanguenaque negaca Amós jirai.

⁴⁴ Përosati icanai Isiteban:

—Cara piriabatsaroquë quibatsi jirai yanataiguëro omatsiguenga ibango Tosorintsi iroonti tocoya cara yoguëro osanguenataga mopë. Moisés yobetsiquëneri ibango Tosorintsi aisati ocantaro pibega ora icomantasantëri Tosorintsi yoniaguëri. ⁴⁵ Ora ibango Tosorintsi yágobëro acharineegui cara ipëri Tosorintsi, aique yanataiguëro itsibataigari Josoe cara yágabitsaqueri iguebatsite matsiguenga catsimari. Ijocaiguëri matsiguenga Tosorintsi ipëri iguebatsite acharineegui. Përosa pini pongotsi irooti cara itimi David. ⁴⁶ Iniacaninatëri David Tosorintsi. Yamanabetari David: “Pabati Tosorintsi, jirai iquemisantimi Jacob. Obiro Itosorintsite. Yamai nocoguini nobetsiquëmiro caninaro pobango irorai ora pintimantima”. ⁴⁷ Carari te irobetsiquineri David. Saromón itomi yobetsiquëneri ibango. ⁴⁸ Carari Tosorintsi jonoquëntaberini teni intime pongotsiquë ora yobetsiquë matsiguenga. Aroque icanque comantantsiri:

⁴⁹ Icanë Tosorintsi: “Ora Jonogaguitequë iroro nisobiganta, cagaro yaca quibatsica. ¿Ati pinganquinaro pobetsiquinaro nobango? ¿Nega nomagoriaque? ⁵⁰ ¿Teco Naro obetsiquërone antagaisati?”

⁵¹ Te pinguenganeintasëretima obirojegui. Aisati picantari ibega basiniati matsiguenga te irogótiri Tosorintsi. Te pinguemiri Tosorintsi, teatisati pinguemisantiri. Përosati pipëgatsataro Isère Caninaro. Picantari ibega ira picharineegui ipëgatsataro cara jirai. ⁵² ¿Aintaca paniro comantantsiri te inguisaneintiri picharineegui? Teni. Yogamagaiguëri antagaisati ira comantantsiri icanque iribocapë Ira Caninarisonori. Yamai aroque ipogopë Iroso jesoquisito, págagantaiguëri pógaiuguëri obirojegui. ⁵³ Teni pinguemisantiro Irinibare Tosorintsi obirojegui ora yogometaguëmi ironomire.

Aroque inibatë Isiteban. Itsonquero.

⁵⁴ Cara iquemaigabaquero irinibare Isiteban oshabitapëri iraneingomentoquë iguisaneintasantanëri itingomiegui jorío, itsicaguitenatanëri. ⁵⁵ Aro pinancari Isiteban Isère Tosorintsi, inetsë jonoquë iniaqueri ironomire Tosorintsi. Aisati iniaqueri Jesos yaratingasegui ibacosonoriquë Tosorintsi. ⁵⁶ Icanque Isiteban:

—iPinetsaigue! Canta Jonogaguitequë naniaqueri Jesos Ira paniacha Jonogaguitequë otosomaqueri iniro jirai, imatsiguengatasantapë. Naniaqueri yaratianque ibacosonoriquë Tosorintsi.

⁵⁷ Aro yamai catsigue icaimë itingomi joríojegui ishapiquemitatanaca isigaisipari yágaiguëri. ⁵⁸ Yágaiganaqueri sotoquë Jerosarén, ibasiaqueri mopëquë. Ira comantëgotëri Isiteban ijocaiganaquero iguitsagare iguitiquë Saoro oboina sërari omisantëneri iguitsagare. ⁵⁹ Iroontita ibasegaseguiri, yamanaque Isiteban icanque:

—Jesos Natingomi, págobënaro nasère.

⁶⁰ Yobaticagueritoca, icaimë catsigue yamanocotajiri ira basiaqueri:

—Natingomi, quero poguibitacaiguiri oca icantagueiguëna icaegui ora te onganinate.

Aroque icanque Isiteban negaca, irooti icamantaca.

Inetsëri Saoro icanque:

—Caninataque. Icamaque yamai.

8

Iáiguë quemisantatsiri canta Samariaquë.

¹ Irooti cataguteri iparintaigaca joríojegui icantaguequeri catsimari ira botoibiritari Jesoquisito canta Jerosarénquë. Iátagueque antagaisati, isigaiganta Joreaquë aisati Samariaquë. Irinibani iniaiguënguitsi Jerosarénquë iragátane Jesos. ² Ainta matsiguenga quemisantantëri Tosorintsi itiaiguëri Isiteban tojai iracoqueri. ³ Iriroque Saoro përosati icantaguequeri catsimari ira botoibiritari Quirisito. Icoqabeta iritsongaiguërimë. Icanaque ibangopaguequë quemisantatsiri yágapëri inosicanëri sërari aisati tsinane, yomianqueri cara iromingamentoquë.

Iquemisanque ira timatsi basiniquë poeboro.

⁴ Ira quemisantatsi iátagueque icomantabaguecaro Irinibare Tosorintsi. ⁵ Jeripe omitocontantsiri yareca Samariaquë. Icomantëgotapëri Jesoquisito. ⁶ Yapatoica matsiguenga iquemaigabaqueri Jeripe ora icomantaguepëri aisa iniaigabaqueri cara itasangampë. ⁷ Yogabisaicotajiri tojai matsiguenga ira inanca camagari. Icaimaiguë camagarijegui

cara isotocaiganaji. Aisati yoguibiaguetajiri tojai emëngari aisati carancaratsi. ⁸ Irooti icaninasëretantaiganaca antagaisati Samariasati.

⁹⁻¹¹ Cara poeboroquë ainta sërari jítacha Simón. Jirai iriro matsi. Itasongabitaca. Aisati yamatobitaiguëri tojai matsiguenga tojai osarini. Ijitaiguëri iriro itingomi. Antagaisati matsiguenga iquemisanqueri. Iquenganeintasantanëri icantocotaiguëri icanqueri:

—Itasonganti Simón. ¿Iriromé tosoncaguiri Tosorintsi? Intsone antingomintimari.

¹² Aro ipogopë Jeripe icomantaguetiri matsiguenga Irinibare Tosorintsi aisa ati ocanta iragántane Tosorintsi. Aisati icomantëgotëri Jesoquirisito. Ibaotisatagapëri ira quemisantaiguëri Jesos, sërari aisati tsinane. ¹³ Simón aisati iquemisanque ibaotisataca yoguiatëri Jeripe. Iquenganeintasantanaca Simón cara itasonganti Jeripe.

¹⁴ Përosati ini iragátane Jesos Jerosarénquë. Cara iquemocotaigabaqueri ira Samariasati cara aisati iquemisanqueri Jesos, aro igáiguëri Peroro aisati Joan. ¹⁵ Iáiguë canta. Yamnocotaigapëri Samariasati cara coshoni oganëri Isëre Caninero Tosorintsi, ¹⁶ terainta iroguineri Tosorintsi Isëre iriroquë. Patiro ibaotisabiritabecari Atingomi Jesos. ¹⁷ Aro Peroro aisati Joan oguëneri ibaco iguitojeguiquë, yágasëretobëro Isëre Tosorintsi pinampari.

¹⁸⁻¹⁹ Cara iniaqueri Simón icabëri ira Peroro:

—Jerica quirequi. Nocoguini pogometajinaro natasonganqueni naro nangantimi pibega obi ro cara pitasonganti. Nocoguini noguëroca nobaco matsiguengaquë irágasëretantimaro Isëre Tosorintsi iriro.

²⁰ Icanqueri Peroro:

—Pijáte Sharincabeniquë aisati páganëri piguireguite. Pijitasica obi ro pomanantëro itasorintsi Tosorintsi. ²¹ Teni pingantina nibega naro. Igóquimi Tosorintsi te onganinate paneingomente. ²² Te onganinate ora piquengasëretabitaca. Pingantajima yacaqueroca pijiquiro ora picantagueti te onganinate. Pomaniri Tosorintsi ingábintsaimi, irojocajimirota ora picantagueti te ongameite. ²³ Nigóquimi pomichatasantini, picoguini iraniacaninataiguëmi matsiguenga. Aroque pagobiaquemí yamaica ora picantagueti quimingaro.

²⁴ Yotabitanëri Simón:

—Pomanocotina naro querota niáti Sharincabeniquë.

²⁵ Aique Peroro aisati Joan icomantanquero Irinibare Atingomi, iquenguitsatocotiro. Iquenaguetanë poeboropaguequë cara Samariaquë, icampëri:

—Aroca pinguemisanqueri Jesos, aro irojocajimiro Tosorintsi ora picantagueti te onganinate, iragabisaicotajimi.

Cara itsonquero icomantaguequeri ira Samariasati, ipiganaja cara Jerosarénquë.

Iquemisanque Etiopíasati.

²⁶ Iriisaanganetsite Tosorintsi iconijatomopëri Jeripe icampëri:

—Pingabiritanëma pijáte irooti poeboroquë jítacha Gasa. Pinguenaque abatsiquë paniacha Jerosarénquë oquenaque piriabatsariquë.

²⁷ Aito icabiritanaca Jeripe iáque. Itonguibocari matsiguenga paniacha Etiopíaquë irágaguitsotaga. Iriro otingomibintë Cantase. Iro ro tsinane itingomi Etiopíasati. Yomisantënero oguireguite. Iquemocoqueri Tosorintsi iriro, iátasiqueri canta Jerosarénquë, icoque irogótiri Tosorintsi. ²⁸ Yamaí ipigaa isobiaque irisicómentoquë inibataseguiro isanguenare Isaías, comantantatsiri cara jirai. ²⁹ Iro ro Isëre Tosorintsi cantëri Jeripe:

—Pijáte pitonguibotobëmari irisicómentoquë.

³⁰ Isigopa Jeripe itonguibocaro iquemaqueri inibatëro isanguenare Isaías. Yosamitapëri:

—¿Piquemaquero Sanguenari?

³¹ Yotabitanëri:

—Teni nanguemiro tenta irine ira ogamequenarone. Potetima pisobigopë yaca pogomepëna obi ro.

³² Aro isobigopë Jeripe. Ora Sanguenari inibatasegui ocanti:

Cara imaireti itiomijani oisha cara yapeitiri, aisa icanta Quirisito imaireti, te irinibate cara ira quisaneinqueri yáganëri yogamagaiguëri aisa icantari ibega oisha cara yogamaguiri. ³³ Yógasitacari catsimari. Quero ini itomi aroquenta yóguëri.

³⁴ Yosamitobëri Jeripe Etiopíasati:

—Nocoguini pingomantina ¿Pairi isanguenatocoque comantantatsiri? ¿Iriatico comantëgotacha? ¿Basinico iquenguitsatocoti?

³⁵ Aito iparintaca Jeripe icomantasantëri ora inibatasegui Sanguenariquë. Icomantëgotëri Jesos. ³⁶ Iátocoque abatsiquë irooti cara yarecaro nija. Yosamitëri Etiopíasati icanqueri:

—Iro ro nija oca. ¿Caninataque nomaotisatëma?

³⁷ Icanqueri Jeripe:

—Piquemisasantanirica Quirisito, caninataque pomaotisatëma.

Yotabitanëri:

—Jee, naquemisantantiri Jesoquirisito Iriro Itomi Tosorintsi.

³⁸ Yogaratianquero iriscómento. Aito yaguëtanë pitirooti itsibatanacari cara nijaquë. Ibaotísatëri Etiopíasati Jeripe. ³⁹ Ipiganaja iriscómentoquë. Aito isaanganë Jeripe, páganëri Isëre Tosorintsi. Te iraniobairi Etiopíasati. Paniro iátaji icaninasëretanë. ⁴⁰ Iriroque Jeripe iconijapë poeboroquë jitacha Asoto. Yogaganaca cara Asotoquë irooti poeboropaguequë. Icomantëgotaguequeri Jesus icanque:

—Pinguemisantiri Jesus, aro iragabisaicotajimi Tosorintsi.

Irooti, cara yareca Sesareaquë.

9

Ipasiniatitanai Saoro.

¹ Përosati ainta Saoro Jerosarénquë isariacari irócaiguëri antagaisati ira quemisantaiguëri Atingomi Jesoquirisito. Iroro iátaguëque iraniaqueri itingomi saseriroti. ² Yamanopëri icampëri:

—Nocoguini pomena pisanguenare. Náganëneri canta Tamásicoquë, nomëri ira obatacaguiri jorio cara yapatotaigaca. Pisanguenatinaro pingantiro negaca: “Pomitocotiri Saoro iráguiri antagaisati ira quemisanqueri Jesus, sërari, tsinane, omagaro. Iromapëri yaca Jerosarénquëca”.

Aro isanguenaquineri. ³ Aique iáque Saoro. Pënibaque irarequimaro Tamásico cara iroguito iniobero Saoro yosanguëguitetocopëri Tosorintsi. ⁴ Ipariganë quibatsiquë, iquemobëro irinibare Jesus:

—Saoro, Saoro, ¿Pairo picantobiquinero catsimari?

⁵ Yotabitanëri Saoro:

—¿Paiji pijita, Natingomi?

—Naanti Jesus Ira piguisaneinti. Obiro aisa picantari sërari baaca cara imeratëmanica iripasaqueri casintari. Ira baaca iragaitiguitabequimari carari iratsipiriopiantë. Aisati obiati casitigatacha cara piguisaneinquina.

⁶ Itsoroganë Saoro imogomogootanaca, icanë:

—Natingomi ¿Pairo picogui nanganque naro?

Aro icanëri Jesus:

—Pingabiritima pijáte Tamásicoquë. Canta, nongomantëmiro ora pinganque.

⁷ Ira sërari itsibataigapa Saoro iquenganeintaiganaca. Iquemasicaro irinibare, carari te iraneiri ira nibaquenguitsi. ⁸ Icabiritanaca Saoro yoquiriabetanaca, te iraniaje. Icatsatanëri ibacoquë irooti Tamásicoquë. ⁹ Canta, yogabisë maba cataguiteri te iranee, te irapae, teatisa iróguima nija.

¹⁰ Ainta Tamásicoquë quemisantatsiri jitacha Ananías. Iconijatomopëri Atingomi icaimapëri:

—¡Ananías!

Yotabitanëri Ananías:

—¿Pairo, Natingomi? Aintana naro yaca.

¹¹ Icampëri Atingomi:

—Pingabiritima, pijáte cara abatsiquë ora catingapoquiri. Cara ibangoquë Joras pingoguiri sërari jitacha Saoro ira Tárisosati. Ainta yamai yamanini. ¹² Aroque noniaguëri cantaca quisanitagantsi carari te irisome, iniaquemi obiro pinganaque poguineri pobaco iriroquë arota iraniana.

¹³ Icanqueri Ananías:

—Tojai naquemocoqueri ira picomantëna yamai. Icantobiqueri catsimari ira quemisantaiguimi canta Jerosarénquë. ¹⁴ Aisati naquemocoqueri cara igáqueri yaca itingomi saseriroti irágaiguëna antagaisati ira abentaiguëmira.

¹⁵ Icanëri Atingomi:

—Pijáte. Aroque nocoiguëri ingomantëgotina joríogequiquë, aisati basiniatiegui matsiungu, aisati itingomiegiquë. ¹⁶ Aisati noniaguëri cara tojai iratsipiriobiquina.

¹⁷ Aique iáque Ananías. Icapë pongotsiquë cara inasegui Saoro yoguëneri ibaco, icampëri: —Saoro, yamai obiro nopiguemisantane. Igáquina Atingomi Jesus ira conijatatequimi cara abatsiquë cara piquenopë. Igáquina cara aisati naniacagajimi, aisati inampëmi Isëre Caninero Tosorintsi.

¹⁸ Aito cara oparibentaguitanai ora iroquiquëti cantacha simabentaqui inatabecari, aro iniasantanai. Icabiritanaca Saoro ibaotísataca. ¹⁹ Aisati yapasanotanai, isintsitanai. Arosataanti cataguiteri itiomotaiguëri quemisantatsiri canta Tamásicoquë. ²⁰ Aique icomantëgotëri Jesus pongotsiquë cara yapatoita joríogëgi. Icanque Saoro:

—Jesus Irianti Itomi Tosorintsi.

²¹ Iquenganeintasantaiganaca antagaisati ira quemaiquëri. Yosaminatobagaigaca:

—¿Teco iriro tsongaiguërinime ira quemisantatsiri Jerosarénuquë? ¿Teco iriro boquënguitsi yaca iraguëshotaiquërimé ira quemisantiri Jesus, irágaiganaquerime itingomiquë saseriroti-jegui?

²² Aiquero otojaiganaque icomantëgotasantëri Jesus Saoro. Iquenganeintasantaiganaca joriójegui Tamásicosati cara igótacagasantaiguëri Saoro. Icanqueri:

—Aisonori Iriro Jesus Agabisaicoontatsiri. Ipaniaca Jonogaguitequë. Igáqueri Tosorintsi.

²³ Pabisanaque cataguiteri tojai. Iquengaigaca joriójegui Iróguirime Saoro. ²⁴ Carari Saoro iqemocoqueri. Antagaisati cataguiteri quë aisati tsitiniriquë imaguëtabecari jorió cara omoroquë poeboro. Icogaigabitacari Saoro irágobërimé irógaiguërimé. ²⁵ Carari tsitiniriquë ira quemisantatsiri yotequeri Saoro oquibequë cantiri yoguëtoqueri sotoquë oticoro irooti osobinta. Isiganaca. Carari te iraniobairi jorió. ²⁶ Yaretaja Saoro canta Jerosarénuquë. Icogabeca intsibatimarime quemisantatsiri. Iriro te iraninte, itsorogobëtiguiri. Ijitasicari te inguemisante.

²⁷ Carari yáganëri Saoro Berinabé catingasati iragátanequë Jesus inibabenqueri. Icomantëgotaguequeri Saoro cara abatsiquë inioberí Atingomi inibatobëri ipasiniatitanai Saoro. Aisati Tamásicoquë iquenguitsatocotasantëri Jesus. ²⁸ Yamai itsibataigari quemisantatsiri cara Jerosarénuquë. Perosati iquenguitsatocotasantëri Jesus. Te intorogue Saoro. ²⁹ Icomantaiguëri joriópague ira nibatatsi guiriego. Ipégatsacari icogabeca jorió irógaiguerime Saoro. ³⁰ Cara iqemocoquero quemisantatsiri, yágaiganaqueri Saoro irooti Sesáreaquë. Aique yogabisëri Tárisoquë.

Itasonganque Peroro.

³¹ Aique caninasati yapatoibiritari Jesus canta Joreaquë, Garireaquë, aisa Samariaquë. Iquemisantasanotaiguëri Atingomi. Iniacobeingataigacari. Itojaiganaque quemisantatsiri. Poganimasëretaiquëri Isëre Tosorintsi. ³² Iquenaguetanë Peroro basinipaguequë poeboro imitocotaiguëri quemisantatsiri, yareca Iriraquë. ³³ Canta, ainta matsiguenga jitacha Eneas inasegui irisomamintoquë. Iriro emëngari, te iranëite ocarati 8 osarini. ³⁴ Icampëri Peroro:

—Eneas, iragaguibegajimini Jesoquirisito. Pingabiritima pobetsicanëro pisamamento.

Aito cara icabiritanaca yanëitanai. ³⁵ Iniaiguëri antagaisati Irirasati aisa Sarósati iqemisantaiguëri Atingomi.

³⁶ Cara basiniquë poeboro jitacha Jope otimabeta tsinane quemisantatsiri ojita Tabita ora ocanati maniro. Iroero caninaro. Përosati omitocotaguetiri otimanamitane. ³⁷ Aro ojanaitë Tabita ocamaque. Paquibatëro ogamaga poguëro jonoquë pongotsi cara pini sitomencorentsi. ³⁸ Iquemocoqueri ira Peroro. Ira Jopesati igáqueri pite sërari ingaimëntiri Peroro cara Iriraquë ocosamanisatanë. Icampëri:

—Omanapague popogopë.

³⁹ Aro yoguiatëri Peroro omanapague itencari. Yáganëri jonoquë cara pinasegui ogamaga Tabita. Oshongabocaro antagaisati ora ogamaimentaga piraicoquero Tabita. Poniagaigabaqueri Peroro oguitsagarepague ocanatigabaqueri:

—Pinetsero oca. Cara terai ongame Tabita pobetsiquinero antagaisati ocapague.

⁴⁰ Yomisotocaguëro antagaisati Peroro, yobaticagueritopa yamanocopëro. Aique inetsëro ogamaga icampëro:

—¡Tabita, pingabiritima!

Aro poquirianai, onetsëri Peroro, pisobicanë. ⁴¹ Yágobagotairo Peroro icabiriquero, icaimaigairi quemisantatsiri aisati ogamaimentaga. Yoniagaigairi Tabita cara ocani-atanaí. ⁴² Aro iqemocotaiguëro antagaisati Jopesati. Tojai matsiguenga iqemisanqueri Atingomi. ⁴³ Cara Jopequë itimaque Peroro tojai cataguiteri ibangoquë Simón masitsiberi.

10

Iquemisanque Coronerio itingomi soraro icarati 100.

¹ Canta Sesáreaquë ainta sërari jitacha Coronerio. Iriro capitán itingomi soraro icarati 100 Itariasati. ² Iquemisantasantiri Tosorintsi aisati iniacobeingacari. Aisati imatsiguenga quemisantatsi. Tojai imitocoiguëri matsiguenga icábintsaiguëri. Përosati cara yamanopi-anti. ³ Aroque ochapinitanë cara iconijatompëri ironomire Tosorintsi irisaanganetsite icampëri:

—Coronerio.

⁴ Inetsëntobëri Coronerio itsorogasantanëri yosamitobëri:

—¿Pairo ojita, Natingomi?

Icampëri:

—Iquemaquemi Tosorintsi cara pamanopiantëri. Aisati iniaquemi cara pomitocoiguiri matsiguenga. ⁵ Yamai pigátiri matsiguenga cara Jopequë ingaimëntiri Simón, aisati ijita Peroro. ⁶ Itimi ibangoquë isometi Simón ira masitsiberi. Aiti ibango onamijaquë angaare. Iriro cantëmine ora pinganque.

⁷ Cara isaanganai ironomire Tosorintsi ira comantapëri Coronerio, icaimë pite iromeraro aisati paniro isorarote, maba quemisantiri Tosorintsi. ⁸ Icomantaguequeri antagaisati ora iniaque, igáqueri Jopequë. ⁹ Itimanë abatsiquë. Oquëtaguetamananaque iquenaque irooti catinga. Pënibaque irarequima Jopequë. Itanë Peroro jonoquë pongotsiquë yamanaque. ¹⁰ Itasegasantë icoque irape Peroro. Iroontita osobira pobetsiquëro perintsi tsinane, iniobëro Peroro ora cantaca quisanitagantsi igaguitaga iriro. ¹¹ Jonoquë yamanasegui Peroro iniabetobacaro paguëpë oquibemaronca tocoya yoguëshotaguequero Tosorintsi yoguëtopiantëro. ¹² Ainta yoguëtocoqueri pairiraca quimingaripague: chancho, marangue, saniri, paguitsa, tiso, antagaisati ijiqueri quimingari joríojegui. ¹³ Aisati Peroro iquemobëro Irinibare Tosorintsi. Ocampëri:

—Pingabiritima, Peroro. Póguiri pijagueri.

¹⁴ Carari yotabitanëri Peroro:

—Quero naaguiri, Natingomi, irianti quimingari.

¹⁵ Aisati icanqueri:

—Ira noguëtetai Naro, quero pijitiri quimingari obiro.

¹⁶ Aro pipiganaja tocoya jonoquë, paguëtopiantë, mabataque iniobëro Peroro paguëque aro pogainocanaca.

¹⁷ Iroontita iquianquero Peroro ora iniaque aisati ora iquemobë, yaretaigaca maba sërari iragátane Coronerio. Yosamitëcobempëri nega itimi Simón. Yaretaigapa omoroquë ibango.

¹⁸ Icaimapëri yosamitapëri:

—¿Aro itimi Simón yaca aisati ijita Peroro?

¹⁹ Përosati cara iquianca Peroro, aro ocomantëri Isëre Tosorintsi:

—Pinetse ainta maba sërari icoguimini. ²⁰ Pingabiritima piguëtanë piguiatanëri aro-quentana nigáquemiri Naro. Quero pitsoinguiri.

²¹ Yaguëtanë Peroro icabëri sërari:

—Naro picogaigui. ¿Pairo pipocasiti?

²² Yotabitaiganaqueri:

—Nopaniaca Sesáreaquë. Igátaiguëna Coronerio, igapitante isorarote icarati 100. Iriro caninari. Iniacobeingacari Tosorintsi. Aisati iniacaninatëri iriro joríojegui. Cani iconi-jatomoqueri ironomire Tosorintsi icanqueri: “Yamai pigátiri matsiguenga iromapëri yaca pobangoquë ira Simón aisati ijita Peroro. Pinguemisantiri cara ingomantëmiro Irinibare Tosorintsi”.

²³ Icabëri Peroro:

—Pingapë. Yamai pintimopë yaca. Naramani naguiatëmi.

Oquëtaguetanë iáiguë Peroro, iromeraro Coronerio, aisati itsibataigacari quemisantasi. ²⁴ Otsitinianë, oquëtaguetanai yaretaigaca Sesáreaquë. Ainta Coronerio aroque yapatotaiguëri ibangoquë tojai matsiguenga aisati itimanamitane. ²⁵ Icapë Peroro, yob-satobacari Coronerio yobaticagueritotasitobacari. ²⁶ Icabiriqueri Peroro icanqueri:

—Pingabiritima. Cagarina naro Tosorintsi. Naanti matsiguenga aisa nacanta pibega obiro.

²⁷ Inibatobaca pitirooti, icapë Peroro iniopëri tojai matsiguenga botoitachari.

²⁸ Icantagapëri:

—Naro jorío. Pigóigui obirojegui te iranintacaguina nomatsiguenga nantsibatimari basiniati matsiguenga. Teni iraninte naniaiguemi. Carari yogomequinaro Tosorintsi cara quero najitajiri pairiraca quimingari. ²⁹ Iroro nipoguëpë omanapague cara picaima-gantëna. Yamai nosamitapëmi, ¿Pairo picaimagantobiquina?

³⁰ Yotabitanëri Coronerio:

—Caní otsibasati cataguiteri aroque ochapinitanë canoca namanaque yaca nobango-quë, aro naniobëri matsiguenga iquitsagataro catarisonori iguitsagare. ³¹ Incampëna: “Coronerio, iquemaquemi Tosorintsi cara pamaniri. Aisati iniaquemi cara pomitocoiguiri matsiguenga. ³² Yamai canta Jopequë pingaimagantiri Simón aisati ijita Peroro. Itiomo-queri basini Simón ira masitsiberi timatsi onamijaquë angaare”. ³³ Aito cara nigáqueri nomeraro ingaimëntimi. Yamai caninataque cara pipogopë. Ainta napatoitomocari Tosorintsi. Nocogaiguini yamai pingomantaigapënaró pairoraca igáquemi Atingomi.

³⁴ Aique iparintaca inibatë Peroro icanque:

—Yamai nigótasantë aisonori Tosorintsi te ingasiriconiatitiri matsiguenga antagaisatinta aisati icantaiga nibegaiga naro. ³⁵ Pairiraca niacobeingatiri quemisanqueri Tosorintsi aisati icantaguequero ora caninaro, aro iraniacaninatëri Tosorintsi. ³⁶ Naro jorío.

Pigótocotobëro Irinibare Tosorintsi. Yoguibaiguënaró Irinibare icomantaiguëna: “Aroca pinguemisantaiguëri Jesoquirisito caninasati pintimaiguë”. Aitosati pingantina nibiaca naró yamai Irironta Jesoquirisito Itingomi antagaisati matsiguenga.³⁷ Piquemocotaigabaquero ora icanque Jesus. Aroqueque Joan iquenguitsatocoqueri: “Pomaotisabiritimari Quirisito”. Aique iparintaca Jesoquirisito icomantaguequeri Gariraquë irooti antagaisatiquë Jorea.³⁸ Pigótocotobëri Jesus Nasaresati, ati cantacacari. Imitocoqueri Jesus Tosorintsi. Ipasërequeri Isëre aisati ipëri itasorintsite. Irooti íatagueantaca icantaguequero caninaro aisati irooti yoguibegantacari ira inanca camagari, imitocoquerininta Tosorintsi coshoni yoganëri Jesus.³⁹ Naroegui iragátane Jesus naniaiguëri antagaisati ora icantagueque Jesus iboeborotepaguequë nomatsiguenga aisati canta Jerosarénquë. Aisati naniaiguëri cara yógaiguëri, ipëcotaiguëri corosiquë.⁴⁰ Maba cataguiteri itinaajiri Tosorintsi yoganiatairi yoniagainari.⁴¹ Te ironijagajimari basini matsiguenga, naantijegui yoniagaa. Naroegui icoigaiguë naniaigairinta cara icaniatai Jesus. Aroque icamasantabitaca, icaniatanai, napaagobairi aisati nógagobaari.⁴² Igáquina nongomantaguequeri matsiguenga: “Yoguëri Jesus Tosorintsi arota ingomantëgotiri antagaisati matsiguenga pairoraca inganque aisati negaraca iriáiguë, ira caniari aisa ira camatsi”.⁴³ Jirai icomantëgotëri Jesoquirisito antagaisati comantantatsiri icanque: “Pairiraca quemisanquerine Jesus aro ingábintsairi Tosorintsi irojocajineri ora icantagueti te ongomeite, quero iquengaineri aisati”.

⁴⁴ Irootnita inibatasegui Peroro, aro pipocasipëri Isëre Tosorintsi pinantaigapari antagaisati ira quemisanquero irinibare Peroro.⁴⁵ Aro iquenganeintasantanaca ira jorío quemisantatsiri itsibatapa Peroro. Yamai igóque aisati ipëri Isëre Tosorintsi ira basiniatsi matsiguenga cagari jorío.⁴⁶ Iquenganeintasantacari iquemaiiguërinta imatsiguenga Coronero aisati inibataiguë basiniatsi nibarintsi. Icantaguë:

—Caninari Tosorintsi.

Aro icanti Peroro:

⁴⁷ —Yágasëretaiguëro Isëre Tosorintsi aisa icantaiguëna nibega naró jirai. ¿Teco caninataque imaotisataiguëma?

Icanque jorío ira itsibatapa Peroro:

—Jee, caninataque.

⁴⁸ Aro ira Peroro icanqueri imatsiguenga Coronero:

—Pomaotisatobitaiguemari Jesoquirisito, ora irogóontaiguëmi matsiguenga cara piquemisanttiri Quirisito.

Yotabitanëri:

—Aro pomaotisataiguena.

Ibaotisatobitaigacari Quirisito. Aique yamanaqueri Coronero:

—Pintiompëna arosataanti cataguiteri pogometaigapëna.

11

Iquemocoqueri Jerosaresati cara quemisanque basiniatsi matsiguenga.

¹ Canta Jerosarénquë iragátane Jesus aisati basini quemisantatsiri quemocoqueri cara aroque quemisanqueri Jesus basiniatsi matsiguenga ira cagari jorío.² Cara itonganaji Peroro ipigapaa Jerosarénquë, iguisabiritobëri jorío ira quemisantatsi aisati ijique caninataque iritotima basiniatsi matsiguenga cara inguemisanque.³ Yosamitaigabaqueri:

—¿Pairo piábirique canta basiniatiquë matsiguenga? ¿Pairo papaagobiqueri? Picanquero ora te onganinate.

⁴ Aique Peroro iquenguitsatomotaigapëri antagaisati, icampëri:

⁵ —Ainta ninasegui naró Jopequë. Namanasegui cara naniobëro ora cantacha quisantagantsi. Oquenopë Jonogaguitequë paguëpë oquibemarónca tocoya yoguëshotaguequero Tosorintsi yoguëquinaro.⁶ Nanetsasantobëro. Ainta tsomagui pairiraca quimingaripague: chanco, maranque, secari, tiso — antagaisati najiqueru quimingari.⁷ Aisati naque-mobëri Tosorintsi icanquina: “Pingabiritima, Peroro. Póguiri pijagueri”.⁸ Nacanë naró: “Quero naaguiri, Natingomi, irianti quimingari”.⁹ Icantajina aisati Tosorintsi: “Ira noguëtetai Naro, quero pijitiri quimingari”.¹⁰ Mabataque yogatsitainaro, aro pogainocanaa Jonogaguitequë.¹¹ Aito cara yarepa maba sërari pongotsiquë cara natimaque. Ipaniaca Sesáreaquë icampë: “Igáitënani”.¹² Pigáquina Isëre Tosorintsi: “Piguiatanëri. Quero pitsounguirí”. Aro niáque. Aisati yoguiataiguëna ica nopiguemisantanea icaratí 6. Nacaigapë ibangoquë ira cajemacagantëna.¹³ Icomantaguetobëna cara iconijatomoqueri ironomire Tosorintsi icampëri: “Pigátiri matsiguenga Jopequë ingaimëntiri Simón aisati ijita Peroro iribocapë yaca.”¹⁴ Ingomantëmiroti Irinibare Tosorintsi pabisaicoontëma obiro aisati pomatsiguenga pobangoquë”.¹⁵ Cara noparintaca nocomantaguetagapëri, aro

pipocasipëri Isëre Tosorintsi pinampari aisa icanquina nibega naroequi cara pipocasipëna jirai. ¹⁶ Naquianquero ora icomantacái jirai Atingomi icanque: “Iroso nija ibaotisantana Joan, carari obirojegui iroquemiro Isëre Tosorintsi Caninaro”. ¹⁷ Jirai cara aquemisan-taiguëri Atingomi Jesoquirisito ipaigacáiro igácáiro Isëre Tosorintsi. Yamai aisati ipaiguëri Isëre basiniati matsiguenga. ¿Pairo najica nara cara nopëgatsaquimari Tosorintsi?

¹⁸ Iquemagabaquero irinibare Peroro quemisantatsi Jerosaresati, te irinaje yamai pëgatsatimarine Peroro. Iroonti icantaiguë:

—Iroso caninari Tosorintsi. Aisonori icoigaiguëri aisati basiniati matsiguenga imasini-atitanae ora iriátantajima Jonogaguetequë.

Yogomeque Berinabé aisa Saoro Antioquiaquë.

¹⁹ Aroqueque yogamagaiguëri Isiteban, iparintaigaca icantobiqueri catsimari ira quemisantari Quirisito. Islaguevanaca canta jaanta irooti Jenisiaquë, aique Chípiquequë, aisati irooti Antioquiaquë. Iátagueque icomantëgotëri Jesus. Paniro iquenguissatomotaguepëri joríojegui. ²⁰ Yaretaigaca Antioquiaquë matsiguenga ipaniaca Chípiquequë aintasa ipaniaca Sirenequë. Icomantaigapëri matsiguenga guiriego, cagari jorío. Icomantëgotëri Jesus:

—Pinguemisantari Jesus iragabisaicotajimi.

²¹ Imitocotasantëri Tosorintsi, aro iquemisantacaqueri tojai matsiguenga cagari jorío, yabentaigacari Atingomi. ²² Ira botoibiritari Quirisito canta Jerosarënequë iquemocotaiguëri, igáqueri Berinabé Antioquiaquë. ²³ Yareca Berinabé inioipëri irirai quemisantatsi, igópëri icábintsaiguëri Tosorintsi. Icaninasëretapë, icampëri:

—Coshoni poganëri Atingomi. Quero pomaguisantari. Pinguemisantasantanëri.

²⁴ Iroso caninari Berinabé. Iquemisantasantanëri Atingomi, aisati pinancari Isëre Tosorintsi. Iroso ora aiquero itojaigaguëtanë quemisantatsiri. ²⁵⁻²⁶ Aique iáque Berinabé cara Tárisoquë iátasiqueri Saoro. Iniaqueri, yáganairi cara Antioquiaquë. Patiro osarini itimaque pitirooti Berinabé aisati Saoro yogomequeri ira botoibiritari Quirisito. Arosori matsiguenga ira yogomeque. Cara Antioquiaquë ira quemisantari Quirisito iritsita jitaiguënguicha quirisitiano, ira iraisati Quirisito.

²⁷ Iroontita yogometaigaseguiri matsiguenga Berinabé aisati Saoro, ipogaigapë basini comantantatsiri ipaniaca Jerosarënequë. ²⁸ Paniro ijita Agabo yaratingopë aganguisatiquë ira quemisantatsiri. Ora Isëre Tosorintsi ocantacaqueri Agabo icampë coraque opoque cara iritasesasanoiguë tojai matsiguenga omagaroguitequë. Aro ocanca cara itingomib-intanti itingomi jitacha Caraorio. ²⁹ Aique ira quemisantatsiri Antioquiaquë iquengaigaca imagantaiguëri quirequi irapiguemisantane canta Jerosarënequë. Ira casintachari ipëri tojai, ira te irine tojai iguireguite ipëri arosata. ³⁰ Aro ipagantëri canta Jerosarënequë. Yáganëri Saoro aisa Berinabé. Ipëri ira omisantari irapiguemisantane.

12

Eroris yomianqueri Peroro.

¹ Ainta itingomi ijita Eroris canta Jerosarënequë yágagantëri atiraca icarati ira quemisantatsiri, cara ingantaguequeri ora catsimari. ² Yobatëantacari sabiri ira Santiago ireinti Joan. ³ Cara yoganinasëretaiga joríojegui, asiati Eroris yágagantëri Peroro. ⁴ Yágagantëri cara yapaisiguero pan joríojegui ora te ingonaguero piponganta. Oca jiesita jitacha Pásicoa. Aroque yágagantëri Peroro, Eroris yomianqueri iromingamentoquë. Ainta soraro yomisantëri icarati itsibasati coniamaniquë. Ainta basini itsibasati catingaquë. Basini irirai itsibasati soraro chopiniquë, aisa basini itsibasati aganguite. Icobagaca Eroris aroca abisanaque Pásicoa iráganërima Peroro cara yapatoita matsiguenga ironijagantërima. Icobagaca Eroris iranetsaiguërima matsiguenga cara iragamaguërima Peroro. ⁵ Ainta Peroro iromingamentoquë Eroris. Yomisantëri soraro. Ira quemisantatsiri botoibiritari Jesus yamanocobintasantëri Peroro.

Yomisotocajiri Peroro Tosorintsi.

⁶ Irooti tsitiniriquë cara queroquerei yoniaguiri Eroris matsiguengaquë isamasigui Peroro yoguëshosigaro pite sogatsa coshori. Icarasiguiri pite soraro, poro ibacosonoriquë poro imatequë. Ainta basini pite soraro omoroquë. ⁷ Iriguito iconijapë irisaanganetsite Tosorintsi yogonijaguitepëro tsomagui, icabocapëri Peroro icampëri:

—Pingaguete pingabiritima yamaica.

Aro otsaanaca ironeni ora yoguëshosiga ibacoquë aisa iguitiquë. ⁸ Aisati icampëri ironomire:

—Pomatsaguitima coshooti pomanchaquiquë. Pogumari pisapatote.

Aro icanquero Peroro. Icanai irisaanganetsite Tosorintsi:

—Pogaimaro pomanchaqui ora pobicota. Intsome, piguiatanëna.

⁹ Isotocanë Perero yoguiatanëri ironomire Tosorintsi. Te irogóte iroroca aisonori ora icanque irisaanganetsite, iquisanitasicaroco.

¹⁰ Yabisanaqueri soraro omoroquë, aique basini soraro, te iraniobairi. Yareparo oquibequë sitëcori coshori pasirianaca ironeni isotocanë Perero. Yáganëri ironomire Tosorintsi irooti cara págaboquiobaga abatsi yoganairi isaanganai te iraniobairi. ¹¹ Icanë Perero iquenganaca:

—Yamai nigóque. Aisonori igáquinari ironomire Tosorintsi cara iromisotocajina iragabi-saicotajina cara icogaigabitaca Eroris aisa joríojegui iróguiname.

¹² Iquianca Perero, iáque cara obangoquë Maria iniro Joan. Joan aisati ijita Maricos. Cara, inaisigui tojai matsiguenga yamanaigasegui. ¹³⁻¹⁴ Itaapëro sitëcori Perero ton ton ton. Pipogopë onamire María ojita Irore. Oquemobëri pigótsatobëri ora irinibare Perero ocaninasëretanë. Te osirecotiri. Pisiganëtiga tsmagui ocomantaigapëri matsiguenga:

—¡Ainta Perero sotoquë!

¹⁵ Icantaiagabaquero matsiguenga:

—¡Teni pineicotima!

Irore ocanatanë:

—Jee, aisonori iriro Perero.

Icantaiguë:

—Cagari Perero; irianti ironomire Tosorintsi omisantiri Perero.

¹⁶ Iroontita inibatobagaigaca tsmagui, përosati cara itaapianteró Perero sitëcori. Cara yasirecoqueri inobëri imabocacari. ¹⁷ Icanaque Perero yacopëri imairetanë. Icomantapairi cara yomisotocajiri Atingomi. Icampëri:

—Pingomantiri Santiago aisati ira quemisantatsi.

Aique iáque Perero basiniquë pongotsi. Imánaca.

¹⁸ Cara oquëtaguetanë itSORogaiganaque soraro cara icogabetajari Perero. ¹⁹ Igáantairi Eroris ingogajiri. Te irinaje. Eroris yosamitasantëri isorarote ira omisantëri Perero. Te. Aro igáqueri basini soraro iróqueri ira omisantabitacari. Aique iáque Eroris cara Joreaquë irooti basiniquë poeboro jitacha Sesárea.

Icamaque Eroris.

²⁰ Eroris iguisaneinqueri ira timaigatsi pitequë poeboro jitacha Tiro aisa Sirón. Iriro-queraiegui iquengaiganaca iromanaiguëri Eroris irianicaninatëri aronta opianica tojai iraperi iragáantanequë Eroris. Ipaigapëri quirequi ira Barásito iromeraro Eroris arota irinibabintëri caninasati. ²¹ Iquengaigaca cara cataguiteri. Cara yaretaigaca matsiguenga, icanaquero Eroris imanchaqui caninari, isobiaque cara iragáantomentoquë inibataigapëri Tirosati aisa Sirósati. ²² Iparintanaca Tirosati aisa Sirósati icaimané:

—Cagaro irinibare matsiguenga. Iroonti irinibare Tosorintsi.

²³ Aito cara itsirishobitanacari Tosorintsi igáqueri insaanganetsite yoanaitëri Eroris tenta ingomantëgotima cara irianti matsiguenga cagari Tosorintsi. Aito cara yaaganaqueri itsane icamaque.

²⁴ Yamai otojaiganaque Irinibare Tosorintsi iquemaigabaquero omagaroguitequë.

²⁵ Aroque itsonquero ora igáquengani Berinabé aisa Saoro cara Jerosarénquë, ipiganaja Antioquiaquë. Yáganëri Joan aisa ijita Maricos.

13

Iátagueque Paboro aisa Berinabé.

¹ Cara yapatoibiricari Jesoquisirito Antioquiaquë ainta comantantatsiri aisati ogomeantatsiri. Ainta Berinabé aisa Saoro, Irosio Sirenesati, Simón aisati ijita Tsitari, aisa Manaem itsibitari Eroris itingomi cara iquibiaiganaque pitirooti. ² Cara yapatoibiricari Atingomi aisati cara ititaigaca ocanque Isère Caninaro Tosorintsi:

—Poguinari casiriconiati Berinabé aisa Saoro. Nacaimëriini nagáqueri ingomantagueantë Nanibare.

³ Cara itsongaiguë yamanaiguë aisa itsongaiguë cara ititaiga, aro yogaiguëneri ibacojegui iguitoquë Saoro aisa iguitoquë Berinabé. Igátaiguëri.

⁴ Aroqueque pigáiguëri pitirooti Isère Caninaro Tosorintsi, iáiguë Serosiaquë yotetaigapa oquibequë pitotsi iquenocoque irooti oboguesiquë jitacha Chípíre. ⁵ Yaretaigaca poeboroquë jitacha Saramina yaguëtaigapë. Iparintaigapa icomantagueantapëro Irinibare Tosorintsi cara yapatotaija joríojegui. Aisati itencari Joan Maricos imitocotaguetiri. ⁶ Yogagaiganaca irooti poeboroquë jitacha Pajos. Iniaigapëri jorío jitacha Barajesos. Iriro matsi, aisati comantantatsiri matobiantatsiri. ⁷ Ira matsi itsibatacari tininti ijita Sérjio Paoro ogótsatsiri. Ira tininti icaimagantaiguëri Berinabé aisa Saoro. Icoque inguemobëro Irinibare Tosorintsi. ⁸ Ira matsi, aisati ijita Erimas, ipégatsatobacari tenta iranintacaguiri

inguemisante tininti. ⁹ Saoro, aisati ijita Paboro, inibatancari Isère Caninaro Tosorintsi. Inetsasantèri matsi, ¹⁰ icanqueri:

—Obiro matobiantatsiri, cantaguetatsiri, aisa picantari ibega camagari, te pinintèmatiro ora aisonori nibarintsi. ¿Te pingaratèmate cara pitsoinguèro Irinibare Tosorintsi? ¹¹ Yamaica ingasitígatèmini Tosorintsi pingomarajaqueni, cosamani quero piniajiro cata-guiteri.

Aito cara icomarajatanè matsi. Itsitiniatanè iroquiquè. Icoque pairiraca catsata-jirine. ¹² Cara iniaqueri tininti, iquenganeintasantanèro Irinibare Tosorintsi. Aito cara iquemisantànèro iriro.

Iquenocoque irooti Asiaquè.

¹³ Cara Pajoquè yotetaiganaca Paboro aisa itsipa cara pitotsiquè iquenocoque irooti Pérejequè cara quibatsiquè jitacha Pampiria. Aito ijocanèri Joan. Iriroque pigaacha irooti Jerosarènuquè. ¹⁴ Yogaganaca Berinabé aisa Saoro irooti basiniquè poeboro aisati ojita Antioquia cara aronisatiquè Pisiria. Ora cataguiteri comagoriantague icanaque pitirooti cara yapatoita jorío, isobigopè. ¹⁵ Cara aroque inibataiguèri matsiguenga ira obatatsi, inibatèro ora isanguenaque Moisés aisa ora isanguenaque comantantaguetatsiri, aro icantaigabaqueri Berinabé aisati Paboro:

—Nomatsiguenga, aítica ora pininti pinibatiri ica matsiguengaca, atsi pinguengabagui-tomotiri.

¹⁶ Aro icabiritanaca Paboro yacopèri matsiguenga imaireitanè icanè:

—Nomatsiguenga joríojegui aisati obirojegui quemisantasantiri Tosorintsi, pinguemina. ¹⁷ Itosorintsite Isirael icoigaiguè nomatsiguenga jirai, aisati yomitojaiganaqueri cara itimiquerai Ejípitokuè. Tosorintsi oniaigaiguèri Ejípitosatiegui itasorintsite ora yágantajari nomatsiguenga ¹⁸ irooti canta te ontimingani, iroonti piriabatsaro quibatsi. Te ine anchato tenta ine tojai angani. Itsirishacari Tosorintsi tenta inguemisantaigueri 40 osarini; tojai itsoingaguèri. ¹⁹ Aisati Tosorintsi ipoguiriaiguèri basiniati matsiguenga ira nibataiguero siete basiniati nibarintsi. Yágabitsaqueri iguebatsite, ipaiguèri nomatsiguenga jirai. ²⁰ Pabisanaque osarini ocaratí 450. Ipaiguèri Tosorintsi basinipague itingomi ira comantègotantatsiri aisati ijita joes irooti cara inè Samoel comantantatsiri ibatacagaiguèri. ²¹ Yamanopiantaiguèri Samoel: “Pomaiguenari natingomi”. Ipaiguèri Tosorintsi ira Saol itomi Sis iriro imatsiguenga Benjamín jirai. Itingomibintanque Saol 40 osarini, ²² aro yágabitsaqueri Saol Tosorintsi, yoguèri David irirai itingomi joríojegui. Icantocoqueri David Tosorintsi:

Naniacananatèri David itomi Isaí, nanintiri. Inganquero antagaisati ora nongocaqueri, catingasati inguemisanquina.

²³ —David icharinencari Ira Jesus. Jirai Tosorintsi icomantèri David cara iragáqueri iragabisaicotajiri matsiguenga. Yamai igáqueri Jesus iragabisaicotagairini Isirael cara icanque Tosorintsi jirai. ²⁴ Teraiquerai iriboque Jesus, Joan icomantaguequeri joríojegui cara iriocairo ora icantagueti te onganinate inganaima yacaqueroca, imaotisataguèma. ²⁵ Cara pènibaquè iritsonguèro Joan cara ingomantaguequeri matsiguenga Irinibare Tosorintsi, icanque: “Cagarina naro Agabisaicoontatsiri ira poguiaiguèra. Aique naro coraque iribocapè basini Itingomisonori. Teni aisa nangantimari ibega Iriro. Teni onganinate nantsaitiri isapatotsate. Ibaquina Irironta Itingomisonori, nitsingaa naronta cantaca iromeraro. Naanti matsiguenga”. ²⁶ Nomatsiguenga, irasiquè itomi Abaram, aisati obiro-jegui quemisantasantiri Tosorintsi, nongomantaiguèmini aroca anguemisantiri Jesus, aro iragabisaicocái Tosorintsi.

²⁷ —Ira Jerosaresati aisati itingomipague te irogógueri Jesus pairiraca ijita Iriro. Teatisati inguemiro Sanguenari ora isanguenataiguè jirai comantantsirijegui isanguenato-cotaiguèri Jesus. Antagaisati cataguiteri comagoriantague inibataigabitaro Sanguenari Jerosaresati carari te inguemiro, te iraneiri Jesus Sanguenariquè. Iroo imoncaraquero Sanguenari cara inibatècoiguèri Jesus: “Ingameta”. Te irogógueri. ²⁸ Cara te ingantèmatiro Jesus ora te onganinate, yamaiguèri ira Pirato cara irocagantèri. ²⁹ Aroqueque omoncaraca ora isanguenatoqueri Jesus, aro ipèicoqueri corosiquè irooti cara icamaque. Yoguètajiri cara corosiquè yáganèri itiajiri. ³⁰ Carari Tosorintsi icabiriqueri itinaajiri yoganiatairi. ³¹ Tojai cataguiteri Jesus iconijatomotaigapairi ira tsipataigari jirai abat-siquè cara íaiguè Garireaquè irooti Jerosarènuquè. Yamai ira tsipataigari Jesus jirai iriro comantègotaguèri matsiguengaquè. ³² Naroegui comantaiguèmine yamai Caninaro Nibar-intsi cara aroque omoncaraca ora icanqueri Tosorintsi omatsiguenga jirai cara iragáqueri Agabisaicoontatsiri. ³³ Naroegui itomijegui jirainisati imoncaraquinaro Tosorintsi ora icantocobintèri Jesus jirai. Cara sárimoquè pite icanque Tosorintsi: Obiro Notomí, yamai notomintèmi najiquími obiro Notomisonori.

³⁴ Aisati Tosorintsi icantocoqueri cara ingabiritajiri igamaga arota quero ibatsagui cara icanque:

Nomoncaratasantëmiro ora nocomantëri David jirai.

³⁵ Iroro aisati icantocoqueri Jesus David basiniquë sárimo:

Quero pinintacaguina nibatsagui Naronta piniacandinati Pitomi.

³⁶ Cara iquemisanquero David aisati icanquero ora icocaqueri Tosorintsi, aro icamaque, itiaigairi ira icarati matsiguenga jirai, ibatsaque. ³⁷ Carari igamaga Jesus Ira icabirique Tosorintsi yoganiatairi te iribatsague.

³⁸ —Nomatsiguenga, nocoguini pigóigue obirojegui ora nongomantaguetaiguëmi, yamai Tosorintsi irojocajimiro ora picantagueti te onganinate pinguemisanquerica Jesus tenta ojocajimiro cara piquemisanquero ora isanguenague Moisés jirai. ³⁹ Iraniacandinatëri Tosorintsi pairiraca quemisanquerine Itomi. ⁴⁰ Obirojegui, pigamaiguema querota pomoncarataigaro ora isanguenataiguë comantantatsiri cara icantaiguë:

⁴¹ ¡Pinetsaigue, tsoengatsiri! ¡Pinguenganeintasantaiguema, pingamaiguëni pitsongaiguëma! Naronta Tosorintsi natasangantantëni. Cara piniaiguëro quero piquemisanthro, aisati pairiraca comantabimirone quero piquemisanthro.

⁴²⁻⁴³ Cara itsonganaquero inibatëro, isotocanë Paboro aisa Berinabé cara yapatoica jorío, yamanaiguëri matsiguenga cara ingomantaigairi aisati cara basiniquë catagüiteri comagoriantague. Arosonori jorío iquemisantiri Tosorintsi aisati matsiguenga ira cagari jorío yoguiaiguëri Paboro aisa Berinabé. Iriroque Paboro aisa Berinabé inibataigairi cara përosati inguemisantaiguëri Tosorintsi arota ingábintsaguëri. ⁴⁴ Cara basiniquë catagüiteri comagoriantague yapatoica pëmbaque omagaro matsiguenga cara poeboroquë arota inguemiro Irinibare Tosorintsi. ⁴⁵ Ijonaqueri jorío cara iniaigabaqueri tojai matsiguenga, aro iguisaneintobiqueri Paboro aisa Berinabé. Aisati ira jorío icantocotaguetasacari Paboro aisa Berinabé itsoiguëgotasitacari. ⁴⁶ Te intorogue Paboro aisati Berinabé, icanqueri:

—Noguibatëmi obirojegui jorío nocomantabimiro Irinibare Tosorintsi, yamai tenta pinintaigue págobëro pinguemisantobëro, quero pitiomotiri përosati Tosorintsi Jonogaguitequë, yamai najátasitiri basiniatiegui matsiguenga ira cagari jorío. ⁴⁷ Naronta igáque Atingomi icanque:

Obiro noguë aisa pingantimaro obotagantsi poniagaiguëri pigótacagaiguëri omagaro pot-satenganëri matsiguengapague cara iragabisaicoiguëri Tosorintsi cara inguemisanquëri Itomi jitacha Jesoquisito.

⁴⁸ Cara iquemobëro oca ira cagari jorío, icaninasëretaiganaque icantocobentaiguëro Irinibare Atingomi caninero. Iquemisantaiguëro antagaisati ira icóigaiguë Tosorintsi intiomoguëri jonoquë. ⁴⁹ Aro icomantantaguetiro ora Irinibare Tosorintsi omagaruiguitequë quibatsi. ⁵⁰ Ira joríojegui inibaiguëri ira obataguetatsi cara poeboroquë, aisati inibaiguëro tsinanepague obatatsi ora cogabitacha ogótiri Tosorintsi. Icanqueri jorío cara ingantobitaiguëri ora catsimari ira Paboro aisa Berinabé irooti cara ijocaiguëri. ⁵¹ Cara iáiguë pitirooti ipotetanëni pojongamamori isapatotequë, icanque:

—Tenta pinguemisantiri Tosorintsi, ingasitígataiguemita.

Irooti yogagantanaca cara poeboroquë jitacha Iconio. ⁵² Irari quemisantatsiri icaninasëretaiganaque aisati pinancari Isère Caninero Tosorintsi.

14

Paboro aisa Berinabé iquemisantaqueri tojai basiniati matsiguenga.

¹ Canta Iconioquë icanaque Paboro aisa Berinabé pongotsiquë cara yapatotaiga jorío. Icomantëgotapëri Jesus; iquemisantaqueri tojai matsiguenga, jorío aisati ira cagari jorío. ² Ainta jorío, ira te inguemisante, icantocotaguetasacari Paboro aisati Berinabé. Ira jorío botoitëri basiniati matsiguenga iguisaneintacaqueri ira quemisantatsiri. ³ Tojai catagüiteri itimaque Paboro aisati Berinabé icomantëgotaguetiri Atingomi, te intorogue. Ira Atingomi imitocoqueri Paboro aisati Berinabé itasangobentaiguëri matsiguenga, ora irogóontaiguëmari matsiguenga cara ingábintsaguëri Tosorintsi. ⁴ Te inguengaguema matsiguenga Iconiosati. Ainta ira aguiaiguëri jorío. Aintasati basini aguiaiguëri ira quemisanquëri Jesus. ⁵ Cara icoque jorío aisati basiniati matsiguenga aisati itingomipague iquen-gaiga ingantobiquerime catsimari Paboro aisa Berinabé, icogabeca iribasegaigerime. ⁶ Cara iquemocoqueri Paboro aisati Berinabé isiganaca poeboroquë aitoniatu jitacha Irísitira aique yogaganaca basiniquë poeboro ojita Térebe, iroro pitirooti poeboro Iri-caoniaquë. Aisati iátaiguë basiniquë poeboro aronisati. ⁷ Yotsatenganëri matsiguenga icomantaguetanëri Caninero Nibarintsi.

⁸ Canta Irísitiraquë iniopëri isobiaque sërari carancaratsi te iranëitëmate përosati cara inë irooti cara yarepa Paboro. ⁹ Iquemobëri Paboro. Inetsapëri iriro Paboro igótocopëro cara iquemisanqueri Atingomi yoguaqueri iragaguibegajiri. ¹⁰ Icampëri:

—jPingabiritimal

Aro omanapague icabiritanaca yaratinganë yanëitanë. ¹¹ Iniaiguëri tojai matsiguenga, igóiguë cara yoguibegajiri Paboro, icaimëgotobëri icantaiguë:

—Yamasobingopë nobabane icampari sërari.

Inibataiguëri irinibarequë Iricaoniasati. ¹² Ira Berinabë ijitaigabaqueri Seos. Iriroque Paboro ijitaigabaqueri Erimes irironta comantantsiri. ¹³ Cara poeboroquë aiti pongotsi irasi Seos ibabane Iricaoniasati. Ainta saseriroti irasi Seos. Yamapë sërari baaca aisati santotega. Itsibataigacari matsiguenga ira saseriroti cara icogaigabitaca iróquinerime baaca Berinabë aisati Paboro.

¹⁴ Iquemocoquero pitirooti iragátane Jesus, itisaraanëro iguitsagare tenta iraninte iriro iróguineri baaca, isigasitanacari cara yapatoica matsiguenga. Icaimaiguëri ¹⁵ icanque:

—Matsiguenga ¿Pairo pintaigui? Cagarina naro pobabane. Naanti matsiguenga aisati nacantaiguimi pibega obirojegi. Ora nipocasiti nongomantaiguëmiro pijoquiri oca picantaqueti te onganinate. Aisati pijoquiri pobabane ira cagari Tosorintsi. Pinguemisan-taiguëri Tosorintsi Ira catimanageronori Ira obetsiquëro Jonogaguëte, aisati quibatsi, angaare, antagaisati ora inaguetatsi, omagaro yobetsiquëro. ¹⁶ Jirai yabetaiguëri matsiguenga ira cagari jorío cantagutiro pairoraca. ¹⁷ Përosati yoniagacari jirai Tosorintsi, aisati yoniagaiguëmi, icábintsiguëmi, yobariaquemiro angani, ipaiguëmiro poperipague papasanoiguë piquemaiganaca ora picaninasëretantaigaca.

¹⁸ Tojai ora icomantaguequeri, pënibaqueme iritaineri ibaacate carari te ingantiro. ¹⁹ Aique ipocaigapë jorío ipaniaca Antioquiaquë aisati Iconioquë. Ijiticagopëri aisonori ira matsiguenga icampëri:

—Pigamemari Paboro. Itsoigani. Iriro matobiantatsiri. Intsome obaseguiri.

Aro iguisaneinqueri Paboro matsiguenga, ibasegaiguëri ijitaigabitaca yogamagaiguëri. Inosicaiganaqueri igamaga sotoquë poeboro, ijoqueri. ²⁰ Iátasiiguëri quemisantatsiri is-hongopari Paboro irooti cara itinaanaa icabiritanaa ipigapaa poeboroquë. Oquëtaguetanë iátacaqueri Berinabë irooti Térebequë. ²¹ Icomantëgotëri Jesus. Tojaini matsiguenga ira iquemisantacaque. Aro ipiganaja Paboro aisati Berinabë Irísitiraquë aique Iconioquë aique Antioquiaquë. ²² Cara iátagueque pitirooti yapatoiqueru quemisantatsiri icomantas-antaigapëri:

—Coshoni poguëri Atingomi. Përosa cara pinguemisantasanotiri. Quero pipasiqutiri. Aiquenta tojai pitsipireicobintëri Jesus cara queroquerai paretta Jonogaguëtequë.

Icomantasantapëri oca, yosintsisëretëri ira quemisantaigatsi. ²³ Aitosati cara yapatoibiricari Quirisito ira quemisantatsiri, Paboro aisati Berinabë yogaigapëri antiasipari ira omisantirine irapiguemisantane. Itica Paboro aisati Berinabë, yamanocoiguëri ira omisantiri icanque:

—Natingomi, pomitocotiri ica iromisantasantaiguëri irapiguemisantacagane.

²⁴ Aique iquenaque Pisiriaquë, irooti cara yareca Pampiriaquë. ²⁵ Cara poeboroquë jítacha Péreje aroque icomantëgotaguepëri Jesus, aro yogaganaa basiniquë poeboro jítacha Ataria ²⁶ cara yotetanacaro pitotsi iquenocotaji irooti Antioquiaquë cara ipaniaca, cara jirai igátaiguëri quemisantatsiri yamanocoiguëri Tosorintsi icanqueri:

—Pingábintsiguëri ica cara iriáguë ingomantagueantëro Pinibare pasiati.

Yamai ipigaa aroque icomantagueantëro. ²⁷ Aro yarepaa Paboro aisati Berinabë. Yapatoiqueru quemisantatsiri iquenguitsatomotaigapëri antagaisati ora icantacacari iriro Tosorintsi. Aisati icomantapëri cara Tosorintsi yoniagaigacari basiniati matsiguenga iquemisantaiguëri Jesoquirisito aisati. ²⁸ Aro tojai cataguiteri itiomotaigapëri irapiguemisantane Antioquiaquë.

15

Yapatoica ira obatatsi iquemisanti.

¹ Cara Antioquiaquë yaretaigapa jorío quemisantatsiri ipaniaca Joreaquë. Yogometaigapëri irapiguemisantane icampë:

—Isanguenaque Moisés: “Pitotima”. Queroca piquemisantiri, quero yogabisaicotajimi Tosorintsi.

² Aro ipëgatsacari Paboro aisa Berinabë, tojai inibatobaca. Te inguengaiguema. Igátaiguëri Paboro aisati Berinabë aisati basini cara iriáguë Jerosarénquë. Icanqueri:

—Pijáigue iragátanequë Jesos aisati ira omisantiri opiguemisantane. Posamitasantaqueri oca: “¿Aisonorica icocagaiguiri iritotima basiniati matsiguenga cara inguemisantequeca?”

³ Aro igátaiguëri; aique iáiguë. Iquenaiguë Jenisiaquë aisati Samariaquë, icomantaguepëri:

—Yamai iquemisantaigui tojai basiniati matsiguenga.

Aro icaninasëretanë antagaisati quemisantatsiri.

⁴ Yaretaigapa Jerosarenquë yobetsataigabacari yágacatinatobëri quemisantatsiri aisati iragátane Jesos aisati ira omisantiri quemisantatsiri. Iquenguitsatomotaigapëri antagaisati ora icantacacari iriro Tosorintsi. Icomantë cara iquemisantacaqueri tojai basiniati matsiguenga ira cagari jorío. ⁵ Yaratingaiguë bariseo quemisantatsiri icanqueri:

—Panibati iritotima. Caninataque inguemisantiro antagaisati ora isanguenaque Moisés.

⁶ Aro yapatoica iragátane Jesos aisa ira omisantiri quemisantatsiri. Icoigaiguë irogóigue irotopitiri Antioquiasati. ⁷ Tojai inibatobaca. Aro yaratinganë Peroro icanque:

—Nopiguemisantane, pigóiguë obirojegui jirai cara icoiguëna Tosorintsi nocomantaguëri basiniati matsiguenga ira cagari jorío inguemisantiro Jesos aro iragabisaicoqueri Tosorintsi. ⁸ Tosorintsi igótasantëri iraneingomentoquë, aro ipaiguëri iriro Isëre Caninaro aisa icanquina nibega naroequi jirai. ⁹ Tosorintsi niaiguëri quemisantatsiri ira cagari jorío aisati icantina nibegaiga naro. Pairiraca quemisanquerine, irojocajineri ora icantagueti te onganinate. ¹⁰ Yamai ¿Pairo pigóontobicari Tosorintsi, picanca: “Te pigóte?” Aroque yágobëri Tosorintsi icanqueri iraisati ira basiniati matsiguenga cagari jorío. ¿Pairo te págobitiri obirojegui? ¿Pairo pobomirintsibiritiri opiguemisantane cara picocagaiguëri iritotima aisati ingantina nibega naro joríojegui nametaigacaro cara notoiga? Jirai nomatsiguenga te inguemisantiro antagaisati ora isanguenaque Moisés. Aisati yamai naquemisantabecaro naroequi. Aiti ora te nanguemisantiro. Quero pobomirintsitaiguiri popiguemisantane cagari jorío. ¹¹ Te iragabisaicotái Tosorintsi cara aquemisanquero ora isanguenare Moisés. Yogabisaicocái Jesoquisito cara aquemisanqueri Irro. Te opënatima cara icábintsaigái. Irooti iragabisaicoontëmari basiniati matsiguenga.

¹² Imairetaiguë antagaisati botoitacha. Aique iquemaiguëri Berinabé aisati Paboro iquenguitsatocoqueri Tosorintsi icanque:

—Igåquina natasongobenqueri basiniati matsiguenga.

¹³ Aisati imairetaigái. Aro icomantaguëri Santiago icanque:

¹⁴—Nopiguemisantane, pinguemina. Aroque iquenguitsacái Simón (aisati ijita Peroro) cara Tosorintsi iparintaca icábintsaiguëri basiniati matsiguenga. Icoiguëri Tosorintsi icanqueri iraisati. ¹⁵ Jirai isanguenatocoquero aisati comantantatsiri jitacha Amós icanque:

¹⁶⁻¹⁷ Icanti Atingomi: “Aiquenta nopigaima quibatsiquë. Naguipigairo iragáantane David jirai terainta ongonijataje yamai. Nobetsicairo arota antagaisati matsiguenga ingoquina, jorío aisati ira cagari jorío, pairiraca quemisanquenane”.

Irooti oca icanti Atingomi ¹⁸ icomantanquero cara jiraisionori. ¹⁹ Iroro nacantaiguëmi yamai naanti te onganinate obomirintsitaiguëri basiniati matsiguenga. Aroca inguemisantiro Tosorintsi, antagati, aroque. ²⁰ Caninataquejenga omagantiri sanguenari. Anganquero negaca: “Quero papiro perinti ora aroque ipëri matsiguenga ibabane. Quero pintiro tsinane cagaro pijina. Quero paaguiri ibatsa irisitiaga aintinta inëri iraraa. Querootisati pógaro iraraa”. ²¹ Antagaisati cataguitëriquë comagoriantague ainta inibatiro ora isanguenaque Moisés iquenguitsatomotaguetiri matsiguenga omagaroguitequë poeboropaguequë cara yapatoita jorío.

²² Itsonquero irinibare Santiago. Aro iragátane Jesos, aisati ira omisantiri quemisantatsiri, omagaro, iquengaigaca iragáqueri matsiguenga iraguítanëri Paboro aisati Berinabé irooti Antioquiaquë. Icoiguëri pite matsiguenga ira obatacaqueri quemisantatsiri. Paniro ijita Joras aisati ijita Barasabás, aisati basini ijita Siras. ²³ Isanguenataiguë ipagantëri Antioquiasati sanguenari ocanti: “¿Aintabi nopiguemisantacagane? Yaca Jerosarenquë nacarataiguëri iragátane Jesos, ira omisantiro quemisantatsiri, antagaisati. Yamai nasanguenataiguëmiro obirojegui cagari jorío Antioquiasati, Siriasati, aisati Siriasati. ²⁴ Naquemocoqueri matsiguenga ipaniaca yaca aique iáque obiroque icomëtaquimi cara yogomequimiro: ‘Pitotima, pinguemisantiro ora isanguenaque Moisés’. Teni naro agátrine. Iátasica. ²⁵ Iroro napatoitaguëca nauquengaigaca yamai nagáquemiri ira no-coigaiguë. Intsibatanëmari Berinabé aisa Paboro ira nanintaneegui. ²⁶⁻²⁷ Aro nagáquemiri Joras aisati Siras cara ingomantasantaiguëmiro irooti oca nasanguenaquemica. Ica pitirooti teni intsorogue ingamobitiri Atingomi Jesoquisito. ²⁸ Oquianca Isëre Caninaro Tosorintsi aisati nauquengaigaca naroequi caninataque quero nocomantaguimiro ora comëtaró. Irooti nongomantaiguëmi oca: ²⁹ ‘Quero papiro perinti ora aroque ipëri matsiguenga ibabane cagari Tosorintsi. Quero pógaro iraraa, querootisati paaguiri ibatsa

irisitiaga aitinta inëri iraraa. Quero pintiro tsinane cagaro pijina'. Aroca pinganquero negaca, caninataque. Yamai caninasati pintimaigue".

³⁰ Aique íáiguë Antioquiaquë iragátane. Yapatoipëri quemisantatsiri ipaigapëri sanguenari. ³¹ Inibataigabaquero sanguenari icaninataiganaque. ³² Joras aisati Siras comantantatsiri inaiaguë, tojai icomantantaguepëri yoganinasëretaigapëri iquemisantacagasantapëri. ³³ Tojai catagüteri itiomoguintiri quemisantatsiri. Aique ipiganaja Joras. Yobetsatobaari irapiguemisantacagane, icabëri:

—Caninasa pijátaje.

Irooti ipigantaja cara itimi ira agáqueri.

Pitetaque iquenaque Paboro cara yogomeantë.

³⁴ Paniro íaque Joras. Iquianca Siras aito intimaje Antioquiaquë. ³⁵ Aisati itimaque Paboro aisa Berinabé. Yogomeantanë icomantagueantanëro Irinibare Atingomi. Itsibatacari basini comantantatsiri. ³⁶ Basiniquë catagüteri icanque Paboro:

—Berinabé, intsome aniajantiri opiguemisantacagane, ira ocomantagueque Irinibare Atingomi jirai. Aniajantirita atiraca icantaiga yamaica.

³⁷ Icoque Berinabé iráganëri Joan, aisati ijita Maricos. ³⁸ Icanque Paboro:

—Cara áganëri jirai atencari, ijocanacái Pampiriaquë ipigapaa. Te intsibatái cara aque-naque. Yamai quero náganairi aisati.

³⁹ Aro ipëgatsasantobaganaca te inguenguema. Berinabé yáganëri Maricos, yotetanacaro pitotsi, íatocoque Chípirequë. ⁴⁰ Paboro yáganëri Siras. Yamanocoqueri quemisantatsiri: —Natingomi, pingábintsaigueri pomitocotiri ica pitirooti arota iriáigue caninasati.

⁴¹ Aique iquenaque Siriaquë aisati Sirisiaquë yosintsisëretaigapëri ira botoibiritari Quirisito iquemisantacagasantapëri.

16

¹ Yaretaigaa Térebequë, aisati Irísitaraqüë. Canta itimi quemisantatsiri jitacha Timoteo. Iniro jorio quemisantatsiri. Iriri guiriego. ² Ira quemisantatsiri Irísitaraqüë aisa Iconioquë iniacaninatëri Timoteo. ³ Icoque Paboro intsibatimari Timoteo, carari antagaisati ígótocoqueri iriri cara cagari jorio irianti guiriego. Icanqueri Paboro:

—Aroca pitoquima obi-ro aisa pinganquimari joriojegui, aro irágacananatëmi.

Icanë:

—Aro.

Aro itoqueri. ⁴ Aique iquenagueque poeboropaguequë ipaigapëri sanguenari ora ipagantëri Jerosaresati, irooti iquengagaca ora isanguenaque iragátane Jesus aisati basini obatacaguiri quemisantatsiri. ⁵ Aro yosintsisëretaigapëri iquemisantacagasantapëri ira botoibiritari Quirisito, përosati cara itoiaiganaque quemisantatsiri.

⁶ Ico Gabeca iriáigueme Asiaquë orari Isëre Caninaro ocanqueri:

—Quero picomanti Asiaquë.

⁷ Aique íáiguë Jirijiaquë aisati Garasiaquë. Yaretaigaca Misiaquë icogabeca iriáteme Bitiniaquë. Ocanqueri Isëre:

—Querootisati piáti Bitiniaquë.

⁸ Iquenaque Misiaquë yanonganaca irooti poeboroquë jitacha Toróare. ⁹ Cara tsinitiriquë iquisaniqueri Paboro ira Maseroniasati. Icantasingapëri:

—Popogopë pomitocoigapëna narogui yaca Maseroniaquëca.

¹⁰ Aroqueque iquisaniqueri Paboro iniasiringaqueri matsiguenga, aro nigóiguë iragáquina Tosorintsi Maseroniaquë, nongomantaguepërita aroca inguemisanqueri Jesus, iragabisaicotajiri Tosorintsi. Aro nocoque pitotsi.

Íaque Paboro Eorapaquë.

¹¹ Notetanaca Toróarequë naquenocoque catingasati oboguesiquë jitacha Samotorasia. Oquëtaguetanë naretaigapa poeboroquë jitacha Neáporis. Aro naguëtanë. ¹² Nogaganaca irooti poeboroquë ojita Jeripo. Iroro poeboro obatatsiri. Ainta tojai matsiguenga paníacha Iromaquë. Aito natimopë arosata catagüteri. ¹³ Sábaroquë nisotocanai Jeripoquë nanëitanë onamijaquë angaare nocoqueri jorio cara yamanai. Naniopëro tsinane papatoisigaca. Nisobigopë narogui nocomantëgotapëri Jesus. ¹⁴ Ainta paniro tsinane jitacha Iriria paniaca jirai Tiatiraquë. Iroro pimantatsiri tocoya quiraaguisaamagori. Aisati oquemisanqueri Tosorintsi. Yamai Ira Atingomi iquemisantacaquero ora icomantë Paboro. ¹⁵ Obaotisataca iroro aisa ora otsibata obangoquë. Ocantasantëna:

—Aroca pigóiguë yamai cara naquemisantasantëri Atingomi, pijátaique nobangoquë, pintiomoguintina.

Aro tojai ocantopiantëna irooti cara notabitanëro:

—Aro.

¹⁶ Basiniquë catagüteri, niáiguë cara nomanaqueri Tosorintsi. Nitongüboaro tsinane onamítaga inancaro camagari. Igótacaquero ora pairoraca abisënguítisine. Irobo yáganta tojai quirequi ira onamitaro. ¹⁷ Aro poguiatëri Paboro aisa naroequi, ocainë:

—Ica sërarica igáqueri Tosorintsi jonoquëñintaberi. Icomantaiguëmi atiraca pingantima cara iragabisaicotajimi Tosorintsi.

¹⁸ Aro ocantopiantë irooti tojai catagüteri. Itsirishanacaro Paboro yapisitasitanacaro igátajinero ogamagarite icanque:

—Iriro Jesoquisito naquemisanti. Irobo iripajiro nojogantëmi: “Pijátopitiro pijocanëro tsinane”.

Irooti ijogantanacaro camagari. ¹⁹ Cara igóquero ira onamitaro icanque:

—Quero nágantajaro quirequi yamai tenta irinajeni ogamagarite.

Iguisaneinqueri Paboro aisa Siras yágagantëri yáganëri aganguisati poeboro aisati cara ini itingomipague. ²⁰ Ipaiguëri itingomi jítacha joes icampëri:

—Teni ingomeite ica sërarica. Iriro jorío. Iguisaneintacagaigapëna naroequi timatsi yaca Jeripoquëca. ²¹ Icomantaguepëro ora yametaiga. Teni onganinate nanguemisantobëri namecaronta naro basiniati. Naroequi nomatsiguengatacari Iromasati.

²² Iguisanaca antagaisati matsiguenga aisati itingomi. Igáqueri iromeraro:

—Pisaboquëtiri imanchaqui Paboro aisati Siras, popasatiri.

²³ Aro tojai ipasatancari anchaqui, aique yomianqueri. Icantasantëri omisantiro iromingamento:

—Pomisasantiri ica pitirooti. Pigamemari.

²⁴ Iquemobëro oca, yomingasantëri itsitogantacari anchato iguitiquë. ²⁵ Aganguite tsitiniri yamanoqueri Tosorintsi Paboro aisati Siras. Inibabeneri caninari aisati icántabenqueri. Iquemaiguëri antagaisati iromingane. ²⁶ Iroguito posebatanaca omagaro quibatsi aisa iromingamento. Pasirianaquero sitëcori opariganai ora itsinagantacari aisa otsaaguetanaca ora yoguëshotancari. ²⁷ Icaguitanë omisantiri aro iniaquero pasiriaca sitëcori ijique aroque isigaiganaca ira irinaga yominguëri. Itsoroganë yáguëro isabirite iróganëmame iriati. ²⁸ Carari icaimasantëri Paboro catsigue:

—¡Quero pógasitanaca obiati tenta nasiganëma! ¡Aintana omagarojegui yaca!

²⁹ Iriro icanqueri iromeraro:

—Pomapëna obotagantsi.

Aro yamapëneri, icanaque yobaticagueritotasipari Paboro aisa Siras. Imogomogoatanaca. ³⁰ Aique yomisotoqueri yosamitëri:

—¿Ogomeantatsiri, paio nanganque cara iragabisaicotajina Pitosorintsite cara irojocajinaro ora nacantaguetomotiri te onganinate?

³¹ Yotabitanëri:

—Pinguemisantiri Atingomi Jesus pintingomintimari, aro iragabisaicotajimi irojocajimiro ora picantagueti te ongomeite. Aisa inganquima pomatsiguenga.

³² Aro Paboro aisa Siras icomantasantëri Irinibare Tosorintsi ira omisantiri aisa imatsiguenga. ³³ Irooti tsitiniriquë iquibajineri cara ipasatëri. Aique ibaotisataca ira omisantiri aisa antagaisati imatsiguenga. ³⁴ Yáganëri ibangoquë ipëri iraperi. Ira omisantiri aisati imatsiguenga icaninasëretaignaque aroquenta iquemianqueri Tosorintsi ipabacari.

³⁵ Oquëtaguetanë igáqueri joes:

—Pomisotocajiri Paboro aisa Siras.

³⁶ Ira omisantiri icomantëri Paboro:

—Igátajina nomisotocajimi. Yamai caninasati pijátaje.

³⁷ Carari icanqueri Paboro:

—Quero niáti. Naro nomatsiguengatacari Iromasati. Te irosomitëmatina itingomi. Te irogóte pairoraca nacanque. Aisati ipasatasitëna, yomingasiquina. ¿Yamai comanononi icogui iriocaína? Iribocapëta iriati iromisotocajantina.

³⁸ Aro ipiganaja soraro icomantapëri irinibare Paboro. Cara igóiguë itingomi jítacha joes cara imatsiguengatacari Paboro ira Iromasati, aro itsorogasantanë. ³⁹ Ipocaigapë itingomi yamanopëri Paboro aisa Siras irojocajineri ora icantaguetomotiri. Yomisotocajiri caninasati, yamanaqueri iriátæ. ⁴⁰ Aro isotocanë Paboro aisa Siras iromingamentoquë, aisati ipiganaja obangoquë Iriria, iniopairi quemisantatsiri, yogometaignapëri yogani-nataignapëri. Aique yogaganaca basiniquë poeboro.

17

Iguisanaca Tesarónicasati.

¹ Iguenague Paboro aisati Siras cara poeboroquë jítacha Ampíporis aisati Aporonia irooti yarecaro poeboro jítacha Tesarónica. Aiti pongotsi yapatoianta jorío. ² Icapë Paboro

icomantaigapèri matsiguenga Irinibare Tosorintsi. Cara yameta, maba sábaro inibatobaca. ³Yogometaignapèri igótacagasantapèri ora isanguenaque comantantatsiri jirai. Icampèri:

—Icomantègotèri cara iribocapè Agabisaicoontatsiri, ingamaque, ingabiritanaima igamaga inganatanæ. Ira isanguenatochoque comantantatsiri aroque ipoque imoncaraquero Sanguenari, Iriro Agabisaicoontatsiri jitacha Jesus, Ira nocomantèmi yamai.

⁴Iquemisantobèro irinibare Paboro porocague jorío. Itsibatacari Paboro aisa Siras. Aisati iquemisantobèri aronori guiriego aisati icancari jorío cara iquemisantiri Tosorintsi, aisati tojaini tsinane imatsiguenga itingomipague. ⁵Aro iguisanaca tojai joríojegui, yapatoiqueri matsiguenga ira te ingomeite aisa peratachari. Iguisagantaiguèri tojai matsiguenga, iáiguè ibangoquè Jasón, icogabepari Paboro iráganèrime itingomiquè. ⁶Te irine Paboro, irianti Jasón casintaro ora pongotsi. Yágaiganaqueri Jasón aisa quemisantatsiri itsibatacari, yágaiganaqueri itingomiquè, icomantègotèri icaimègotèri catsigue:

—¡Ica iguisaigacari omagaro matsiguenga! Yágacaninatobèri Jasón ibangoquè. ⁷Yogomeantè icanque: “Quero piquemisantiro ora iragáantane Sésar aintanta basini Itingomi Ira jitacha Jesus”.

⁸Cara iquemobèro oca iguisanaca itingomipague aisati matsiguenga. ⁹Icoicotaiguèri iguireguitè Jasón aisa ira itsibata cara quero isiga. Icampèri Jasón:

—Teni nantiro ora te ongomeite carari jerica quirequi. Iriro pigóontènari cara quero nisigopitimi. Aitica nacantagueti ora quimingari, aro págasantèri naguireguitè; teca paio nangante piguipigainari.

Aro yomisotoqueri. ¹⁰Otsitinitanè ira quemisantatsiri igáqueri Paboro aisa Siras iriátae poeboroquè jitacha Barea. Yarecero Barea icanaque pongotsiquè cara yapatoita jorío.

¹¹Iriro Bereasati caninari, te aisa ingantimari Tesarónicasati. Icogasantobèro Sanguenari inguemisantiro. Antagaisati cataguitèriquè inibatapininquero arota irogóasantiro aisonorica ora icomantèri Paboro. ¹²Tojai quemisanqueri Jesoquirisito, sèrari aisati tsinanepague guiriego imatsiguenga itingomi. ¹³Cara Bareaquè icomantantaguepèro Paboro Irinibare Tosorintsi. Cara igótocoqueri jorío Tesarónicasati, ipocasitaigapèri inibatègotèri itsoiguègotacari Paboro, iguisacari matsiguenga. ¹⁴Aito cara igáqueri quemisantatsiri ira Paboro iriátae angaarequè. Irianti inènguitsi Siras itsibatacari Timoteo. ¹⁵Ainta ira ágaiganaqueri Paboro irooti oquibequè poeboro jitacha Atenas. Igátajiri Paboro:

—Yamai pijátaje popiganajima. Cara piretajima Bareaquè, pingomantinari Siras aisa Timoteo omanapague iribocapæ.

Icomantanque Paboro Atenasiquè.

¹⁶Cara ipaniguiatèri Paboro cara irarequima Siras aisa Timoteo, yanèibaguitè Atenasiquè. Iniopèro aronori irosiacagamento ibananepague yobetsicasitagueteri Atenasísati ijitasitari itosorintsite. Iroonti mopè, iroonti anchato. Paseriguèri Paboro. ¹⁷Yogometaignapèri cara yapatoita jorío, aisati ira quemisantatsi icancari jorío. Antagaisati cataguitèri iáque cara opimantaguetagani Atenasiquè yogometaignuèri matsiguengajegui. ¹⁸Icomantègotèri Jesus cara icamaque, aisati cara icanatanai itinaanaa igamaga. Ainta matsiguenga cogapinintatsiri pairoraca inguemasantè. Ainta irogomere Epicóreo aisati irogomere Isitoico. Yapatoica yosamitobagaigaca:

—¿Pairoraca icanti ira nibatasitachara?

Icanque basini:

—Icomantègotapèri basiniati Tosorintsi.

¹⁹Ipogoqueri yágaiganaqueri otiomijaniquè oguitoja jitacha Areópago cara yametaiga yapatoita. Icabèri:

—Yamai nocogaiguini nogóiguero ora pogomeantè oca irorai nibarintsi. ²⁰Te nanguemopiantiro oca picanti. Nocogui pingomantasantinaro atiraca ocanti nibarintsi.

²¹Arosataanti itarobacaati Atenasísati aisati itsibatari paniacha basiniquè poeboropague. Irianti icogaiguè inguemobèri ira iriraique quinguitsatiro pairoraca ora terai inguemiro.

²²Aro yaratinganè Paboro aganguisatiquè icampèri:

—Atenasísati, nigótocotimi obirojegui cara pamanocoiguiri tojai pobabane pijitosorintsititari. ²³Cara naquenagueque naniopèro ora pamanocotasita. Aisati naniopèro cara pisanguenati ocanti “Amanocotiri Tosorintsi Ira te irogótingani”. Iriro piquemisantabeta te pigótiri, Iriati nongomantègotèmi yamai.

²⁴—Ainta Tosorintsi Ira obetsiquèro quibatsi, aisati ara inaguetatsi yobetsiquèro Iriro. Teni intime pongotsiquè ora yobetsiquèneri matsiguenga Irironta casintaro antagaisati Jonogaguete aisati quibatsi. ²⁵Tiguèti angantiri eiro pairoraca, Irironta tosogobentái. ¿Aroco ingoque omitocotiri eiro? Teni. Ira timagantatsiri icábintsaigái. Ira pacáiro antagaisati, operi, omire, asintsire, cara aneingui, omagaro. ²⁶Yoguibatèri Arán yobetsiquèri

jirai. Aique Arán yobetsicancari antagaisati basini matsiguenga arota ontojaiganaque eiro otsatengaguetanëmaro quibatsi. Iriro Tosorintsi cantatsi atriraca intimaiguë matsiguengajegui aisati atriraca ongantima intimaiguë canta. ²⁷Jirai yobetsiquëri matsiguenga Tosorintsi arota ingoguequeri irogóqueri Irironta aronisati ini. ²⁸Iriro timagái, aganiatái, osebataigái, Iriro inagái Tosorintsi. Aro icanque jirai ogótatsiri pomatsiguenga: “Ijicái Tosorintsi ianiquite”.

²⁹—Eiroeguica ianiquite Tosorintsi, teni onganinate yamai osiacagantiri oro, mopë, anchato, quirequi, yobetsicasitagueteri matsiguenga. Aisati quero osiacagantiri pairoraca iquenga matsiguenga. ³⁰Jirai cara te irogótiri Tosorintsi matsiguenga, te inguisanijintiri te ingantobitiri ora icantaguëti te onganinate. Yamaicari igáqueri Tosorintsi ingantima matsiguenga yacaqueroca irojocajiro ora icantaguëti quimingaro, imasiniatitanae, ³¹aroquenta yoguëri sërari joes Ira jitacha Jesoquirisito iraniantaiguëmari omagaro matsiguenga ingomantëgotëri pairoraca inganque aisati negaraca iriátë. Aroque igóque Tosorintsi atriraca ongantima iraniantaiguëmari. Ingantiro Iriro caninasati aroquenta otsomaaqueri iniro imatsiguengatapë, aisati icamaque, itinaajiri Tosorintsi igamaga yonaniatari.

Irooti itsongantacaro irinibare Paboro.

³² Cara iquemocoqueri Jesus itinaanaa igamaga, ainta icabíntásanoigabaqueri Paboro Atenasitati. Ainta basini icabëri:

—Caraquenta pogometaigna basini aisati.

³³ Aique iáque Paboro. ³⁴ Ainta arosataanti matsiguenga itsibatancari Paboro iquemisanqueri Jesus. Paniro jitacha Ironisio tsipatari itingomipague Areópagoquë. Aisati ainta tsinane jitacha Panaris. Aintasati basini matsiguenga itsibatancari Paboro.

18

Icomantagueantë Paboro canta Corintoquë.

¹ Aique ijocanëro Paboro Atenas, yogaganaca canta poeboroquë jitacha Corinto. ² Iniopëri jorío jitacha Aquira aisa iina Pirisira. Pontosati inabita Aquira. Irirai aretajacha ipaniaa Itariaquë itsibataparo iina aroquenta inë cobeingari jitacha Caraorio iguisaneintaiguëri jorío ira timatsi Iromaquë. Igáqueri:

—Atsi pijáigae basiniquë quibatsi. Quero pinaigai yaca Iromaquëca.

Aro yarepa Corintoquë Aquira aisa iina. Canta iniopëri Paboro itiomopëri ³ aroquenta aisa icantari Paboro ira Aquira ipangotacaro tocoyapango. Iriro itiomotaguëpëri arota intarobacaataiguë. ⁴ Antagaisati sábaroquë yogometabecari Paboro cara yapatoita jorío. Iquemisantabetobacari jorío aisati matsiguenga ira cagari jorío. ⁵ Cara ipocaigapë Siras aisa Timoteo, ipaniaca Maseroniaquë, aro iguenguitsatasantanëro Paboro ora Irinibare Tosorintsi. Icomantaiguëri joríojegui icanqueri:

—Jesus Iriro Quirisito Ira Agabisaicoontatsiri.

⁶ Ipëgatsatagacari joríojegui aisati icantocotaguëtasitari. Aro Paboro ipotetanëro iguit-sagare icanqueri:

—Aro pingamaque obirojegui tenta pinguemisantiro Irinibare Tosorintsi, quero pogu-ibitaquinaro naro cara pijátaiguë Sharincabeniquë. Carari yamai najátasiqueri matsiguenga ira cagari jorío. Nongomantaguequerini.

⁷ Yogaganaca icanaque ibangoquë Tisio Jósito. Iriro quemisanqueri Tosorintsi. Itimi toonquëquero ibango Tosorintsi iguenguitsamento. ⁸ Yameta Quirisipo inibatëro Sanguenari cara yapatoita jorío. Iriro obatatsi. Carari iquemisanqueri Jesoquirisito Atingomi. Aisati iquemisantaiguëri imatsiguenga ira timatsi ibangoquë. Aisati iquemisantaigabaquero Irinibare Tosorintsi tojai Corintosati aisati ibaotisataigaca. ⁹ Cara tsitiniriquë isamë Paboro iniasiringaqueri Atingomi icampëri:

—Quero pitsorogui. Përosati cara pinguenguitsataguete, quero pomairëti ¹⁰ nantsibatëmininta. Quero pairi cantaguëti matimi pairoraca. Ainta tojaini matsiguenga yaca poeboroica inguemisantaiguëna.

¹¹ Aro përosati cara yogometaguequeri Corintosati Irinibare Tosorintsi. Tojai itimanteque, patiro osarini aisati aganguisati basini.

¹² Yamai Garión itingomi Acayasati cara iguisaneintaiguëri joríojegui ira Paboro. Yáganëri Gariónquë ¹³ icampëri:

—Ica sërarica teni inganinate. Icantaguequeri matsiguenga: “Pomanocotiri paniro Tosorintsi”. Teni iriátatsiro ora icanque Sésar.

¹⁴ Pëniabique irinibaqueme Paboro, irari Garión inibataiguëri jorío icanqueri:

—Obirojegui jorío, paserigaiguëna. Aitime ingantaguete ica ora te onganinate, iróquerime pairiraca, arome cara naquëgotaguëmime. ¹⁵ Carari oca iroonti asi ora pogomeantane,

iroonti asi ora isanguenaquemi pomatsiguenga jirai, antsita pingantiro obirojegui. Quero naquemiro naro. ¹⁶ Yamai pijáigue.

¹⁷ Iriro Sósitenes irirai obatatsi cara yapatoita jorío. Aro ira matsiguenga guiriego yágaiquëri Sósitenes, ipasataiguëri catingasatiquë iragáantomento Garión. Iriro te inguemasantiri.

¹⁸ Tojai cataguiteri itimanteque Paboro Corintoquë, aro yobetsatanaari irapiguemisan-tacagane, iátocoque pitotsiquë irooti Siriaquë. Itsibatanaacari pitirooti, Pirisira aisa ojime Aquira. Aro yapeitaca Paboro cara poeboroquë jitacha Senquerea aroquenta imoncara- quero cara yogagatsatineri Irinibare Tosorintsi. ¹⁹ Yaretocotaigaca Ejesoquë cara yoganëri Aquira aisa Pirisira. Icanaque Paboro pongotsiquë cara yapatoita jorío yogometaigapëri Irinibare Tosorintsi inibatobaca. ²⁰ Icabëri:

—Cosamani pintimaque yaca pogometaiguena.

Te ingogue Paboro. ²¹ Yobetsatanaari icanqueri:

—Aroca ingoque Tosorintsi, aiquenta nopigaima aisati.

Aro yotetanaa pitotsiquë iátocoque ²² irooti yareca Sesáreaquë. Itonganaque Jerosarenquë, yobetsataparí ira botoibiritari Quirisito. Aique yogaganaca irooti Antioquiaquë cara ipaniaca.

Mabataque iquenaque Paboro cara yogomeantë.

²³ Pabisanaque tojai cataguiteri itimaque Paboro Antioquiaquë, aique iátaji Garasiaquë aisati Jirijiaquë, yogometaigapëri yosintsisëretapëri antagaisati ira quemisantatsiri.

²⁴ Ainta jorío ijita Aporo. Ipaniaca poeboroquë jitacha Arijantiría canta Ejípitiquë. Yareca Ejesoquë. Caninasati iquenguitsatasanti, igótasantiro Sanguenari. ²⁵ Aroqueque iquemocoqueri Jesus icomantëgotëri. Caninasati icomantasantë, carari te irogótiro antagaisati ora icantagueque Jesus. Patiro igótiro Aporo ora yogomeantë Joan ira baotisantatsiri. ²⁶ Iparintaca iquenguitsasantapë pongotsiquë cara yapatoita jorío. Cara iquemobëri Aquira aisa Pirisira, icabëri:

—Nocoguini nanibatimi casiriconiati.

Icampë:

—Aro, intsome.

Aro Pirisira aisa Aquira yáganëri ibangoquë, caninasati yogometaigabaqueri omagaro ora icantagueque Jesus igótasantaqueri, yotsatianquineri antagaisati ati angantima cara aretimari Tosorintsi. ²⁷ Aique icanqueri Aporo ira quemisantatsiri:

—Nocoguini najáte Acayaquë aisati.

Aro yotabitanëri:

—Caninataque. Aisati nasanguenaquineri opiguemisantane canta.

Aro isanguenaquineri: “Págaigabaqueri caninasati Aporo. Pinguemisantiri”.

Jirai Tosorintsi cábintsëri Acayasati irooti iquemisantanaacari. Aro yamai cara yareca Aporo tojai iquemisantacagopëri yosintsisëretapëri. ²⁸ Ipëgatsapari joríojegui. Yoniagasan-taigapëri icampë:

—Iriro Jesus Ira oquenguitsatocoti Sanguenari Iriro Agabisaicoontatsiri Ira igáque Tosorintsi.

19

Iáque Paboro Ejesoquë.

¹ Iroontita inasegui Aporo Corintoquë, iquenopë Paboro cara Garasiaquë aisa Jirijiaquë irooti yaretaja Ejesoquë. Iniopëri arosata quemisantatsiri. ² Icampëri:

—Jirai cara piquemisantaiguëri Quirisito, ¿Págasëretobëro Caninaro Isëre Tosorintsi?

Yotabitëri:

—Teni nanguemocotiro. ¿Pairo ojita?

³ —¿Pairo pobaotisabirita?

—Nobaotisabiritari Joan.

⁴ Aro icampëri Paboro:

—Ibaotisatiguëri matsiguenga Joan aroquenta ijocajiro ora icantaguëti te onganinate. Aisati icomantëri: “Pinguemisantiri Ira boquënguitsine, Iriro Jesus Atingomi”.

⁵ Cara iquemaigabaquero oca, aro ibaotisabiricari Atingomi Jesus. ⁶ Yoguëneri ibaco Paboro iguitoquë, aro paguëpë Caninaro Isëre Tosorintsi. Yágasëretobëro, inibatënëro basiniati nibarintsi, icomantagueiguë. ⁷ Icarati 12 ica Ejesosati quemisantatsiri.

⁸ Aro icanaque Paboro ibangoquë Tosorintsi iguenguitsamento, icomantaguëtasantaiguëri matsiguenga maba manchacori. Tojai iquenguitsatocoqueri Tosorintsi, ati angantima aretimaro iragáantane. Tojai yogomeantë. ⁹ Ainta iconagaca matsiguenga ira te

irágobëro ora icomantë Paboro. Te iraninte inguemisantiri tenta inguenganeintëmatima. Icantocotasicari catingasatiquë matsiguengajegui icanque:

—Teni inganinate Ica Quirisito icomantëgoti Paboro. Itsoigani.

Irooti ijogantanacari Paboro, yáganëri quemisantatsiri casiriconiati. Përosa cara iquenguitsatacagaiguëri antagaisati cataguiteri canta yogomeanti aisati Tirano. ¹⁰ Pite osarini yogomeantëro Paboro Irinibare Atingomi, iroso iquemocotaguëtaigabaquero antagaisati matsiguenga timaigatsi canta Asiaquë, joríojegui aisa basiniati matsiguenga ira cagari jorío.

¹¹ Tosorintsi ipëri Paboro itasorintsite. Irooti ora itasongantagueantaca ora te oneigani jirai. ¹² Yamapëneri janaitaguetatsiri ibaaniote Paboro aisa manchaguentsite, yoguëneri, irooti ibegantanaa. Irootisati ijogantaineri camagari ira inantabeca. ¹³⁻¹⁴ Yaretaigapa canta Ejesoquë jorío játaguetatsiri iriro yogabisaicobintëri matsiguenga inanca camagari. Irirójegui icarati 7 itomi Isiqueba imatsiguengatacari saseriroti. Iniabecari Paboro cara igáqueri camagari. Icoagaigabitaca aisa ingantimarime, icantasicari ira inanca camagari:

—Ainta Jesus Ira icomantëgoti Paboro. Iroso iripajiro nojogantëmi, pijátopitiri ica matsiguengaca.

¹⁵ Yotabitanëri camagari:

—Nigótiri Jesus, aisati Paboro nigótiri, carari teni nogótimi obiroyegui. ¿Pairo nanguemisantobitimi?

¹⁶ Aito ira inanca camagari imatsecanë yágobëri iguisaigabaquero omagaro siete sërari, yagobiaiguëri. Aro isigaiganaca saacanari aisa aroque icasiroabaguitëri. Ijocaiganaqueri ibangoquë.

¹⁷ Iquemocotaiguëri antagaisati Ejesosati, joríojegui aisa ira cagari jorío. Itsorogantaiganaque aisati inibacaninatëgotaiquëri Atingomi Jesus. ¹⁸ Ipogaigapë tojai ira iriraini quemisantatsi, icomantagueiguë yotsatengaguetaigapëro icampë:

—Aiti nacantaguëti te onganinate.

Aisati ipocai gapë ira matsi. ¹⁹ Tojai ira aroque yamanaqueri camagari, imitocoqueri jirai, yamaigapëro isanguenare ora igóontaro imatsine, yapatobompoi quero yogamatëro. Icanque:

—Teni naninte nomatobitajiri aisati nomatsiguenga, aroquenta nopabacari Tosorintsi naquemisantobëri.

Imoncarataiguëro cara ocarati pipënata sanguenari: icarati 50,000 iguitso quirequi.

²⁰ Tojai Ejesosati iniaigabaquero caninaro Irinibare Tosorintsi aisati cobeingaro. Iquemaigabaquero arosonori matsiguenga.

²¹ Aique ipintsataca Paboro iriáte Jerosarénquë. Inguenaque Maseroniaquë aisa Acayaquë. Iquiaanca:

—Narequimaca canta Jerosarénquë nagaganëma Iromaquë.

²² Igáqueri pite omitocoontatsiri irobotanëri Maseroniaquë, Timoteo aisa Erásito. Përosati cara itimaque Paboro Asiaquë.

Iguisaneintanaca Ejesosati.

²³ Teraiquerai iriáte Paboro, iguisaneintanaca Ejesosati ora icomantëgoti Jesoquirisito Atingomi. ²⁴ Iguisaneintacaganëri Temétirio ira obetsiquiri quirequi. Yosiacagantapinintiro otiomijani obango Aritemisa ibabane ora aisata ojita Tiana. Temétirio aisati itsibataigari basini ipimantaiguëro osiacogomento yágancaro tojai quirequi. ²⁵ Temétirio yapatoi queri imatsiguenga ira obetsiquiri quirequi ibega iriro, icabëri:

—Pigóiguë obetsiguëro osiacogomento obabane ágantaiga eiro aguireguite. ²⁶ Aisati piniaiguëri ica Paboroca piquemocoqueri. Arosonori matsiguenga ira iquemisantacaque Paboro: Ejesosati aisati Asiasati itsibataigacari. Icanque ora yobetsiquë matsiguenga iroso cagari Tosorintsi. ²⁷ Yamai ainta Aritemisa obabane ora iquemisantaguë antagaisati Ejesosati aisati omagaro Asiasati. Carari përosati cara yogomeantë Paboro, icantopi-antaiguëri matsiguenga cara quero yamanantairo osiacogomento obabane, aisati quero iniacaninataigairo obango caninaro obabane, quero ipocaji iniajiro. Aroca përosati cara inganquero negaca Paboro, irojoquero Aritemisa, quero iquemisantajiro matsiguenga. Aisati quero nágantajaro quirequi.

²⁸ Iquemaigabaquero oca nibarintsica, iguisaneintanaca aro icaimapinintaiganaque catsigue:

—Caninarosonori Aritemisa, iroso obabane eiroegui Ejesosati.

²⁹ Antagaisati Ejesosati icai baiganaque isigaiganaca irooti cara yapatoi taiga Ejesosati-jegui. Yágaiganaqueri inosicaiganaqueri ira Gayo aisa ira Arisitárico. Iriro pitirooti Maseroniasati, itsibatari Paboro. ³⁰ Icogabeca Paboro inganaqueme irinibatocobentëtime carari te iranintacagaqueri quemisantatsiri. ³¹ Aintasati itingomipague iramigote Paboro icomantagantëri:

—Quero piáti canta yapatoitaiga Ejesosati. Irógaiguëmi.

³² Aro icaimasitagueca paniropague, ira basini cajemanënguitsi ora basiniati. Icaimasitagueitaiganaca. Tojai ira te irogóigue pairoraca yapatobirita. ³³ Ainta canta Arijantoro igáqueri jorío. Yacopëri matsiguenga cara iromairetaiguë, icogabeca irinibataiguerime.

³⁴ Carari cara igóiguëri iriro jorío, aro icaimaiganaque omagaro:

—¡Caninarosonori Aritemisa, iroro atingomi eiroegui Ejesosati!

Cosamani cara icalbaitaiguë catsiguesonori. ³⁵ Iquemocoqueri, ipogopë ira sanguenatapinintatsiri yoguimairetaigapëri matsiguenga icampëri:

—Nomatsiguenga, antagaisati igóiguë ora Aritemisa iroro obabane aisa osiacagomento cara oparigatëpái opaniapa jonoquë, aisati eiro Ejesosati omisantinero obango. ³⁶ Oca igóiguë omagaro matsiguenga. Caninataque yamai pomairetaigue. Quero picantaguebir-itiri catsimari ica sërarica. ³⁷ Pamasitapari yaca, carari teni ingositiro obango Aritemisa, teatisati ingantocotaguetasitimaro obabane. ³⁸ Ainiroca yabenta Temétirio aisa ira itsibata, irabintamarita ira atingomi joem. ³⁹ Aitica ora basiniati, caninasati pingomantëgotiro, aique cara ingaimaigacái atingomi opatoiquima caninasati. ⁴⁰ Yamai te opatoitaiguma caninasati. Aroca irosomitaigacái atingomi paio apatoibirita yamai, ¿Pairi comantërine? Ingantococái eiro: “Icoguini irojoquiri atingomipague Iromasati, aro inguisaneintanacái”.

⁴¹ Aroque itsonquero icampëri oca, igátaiguëri iriátæ ibangopaguequë. Aique iáigai.

20

Iáque Paboro Maseroniaquë.

¹ Aroque imairetaigai Ejesosati, icaimaiguëri Paboro ira yogomeque quemisantatsiri. Aique yobetsatanaari, iáque irooti Maseroniaquë. ² Iquenagueque canta. Tojai yogometagueitaigapëri quemisantatsiri irooti yareantaca quibatsiquë jitacha Guiresia ³ cara itimaque maba manchacori. Pënibaqueme irotetanëma pitotsiquë inguenocoque Siriaquë, aro igótocotaiguëri jorío iquengaigaca iróguiri. Iroro iquengasëretaguëca icanque:

—Nopintsacani nopiganajima Maseroniaquë.

⁴ Iáiguë Paboro aisa ira itsibata: Sópatoro itomi Piro Bereasati, Arisítárico aisa Seconto Tesarónicasati, Gayo Térebesati, Timoteo Irisitarasati, Tíquico aisa Torójimo Asiasati. ⁵ Icaegui obataiguëri Paboro irooti yareca poeboroquë jitacha Toróare. Canta yoguiaquina Paboro aisa naro Irocas sanguenatiro oca sanguenarica. ⁶ Cara Jeripoquë aroque yapaiguëro pan ora te ingonaguro ora piponganta, aique nogagaiganaca Paboro aisa naro, naquenocoque pitotsiquë. Ocarati pabocorooti cataguiteri naretaja Toróarequë cara yoguiaquina iraugui obaenguitsi. Aito cara natimaiguë ⁷ cataguiteri.

⁷ Tomincoquë napatotaigaca cara nantibatsaaguequero pan nanguengasëretantaiguëmari Jesus cara icamobicái. Cosamani nanguitsapë Paboro irooti aganguite ipintsacataninta iriátë naramani. ⁸ Aiti tojai obotagantsi cara napatotaigaca jonoquë oquibe pongotsi. Cara osobi aiti basini sitomencorentsi, aique quibatsi osobi. ⁹ Isobiaque omoroquë ira oboina jitacha Eóitico. Ipotsiquitanë cosamaninta icomantagueantë Paboro. Aro isamasantanë ipariganë osobi. Nisigaiganaca naguëtaiganaque nágabitapari. Aroque icamaque. ¹⁰ Yaguëtanë Paboro omanapague yabitsionopëri, icaniatanai. Icanque Paboro:

—Quero pogasëretaiga aroquenta icaniatanai, aisatitanai.

¹¹ Aisati nataiganaji jonoquë, aro cara itibatsaaguepero pan Paboro, napaiguë. Përosati cara inibatobagaigaca irooti cara oquëtaguetanë niáigai. ¹² Yamapairi ira oboina teni ati ingantima tegotsitatsi, icaninasëretaiganaji quemisantatsiri.

¹³ Icantaguëna Paboro:

—Obirojegui pobataigue. Pinguenocoque pitotsiquë irooti poeboroquë jitacha Asón. Cantana páganaina. Aito nanguenague naro abatsiquë.

¹⁴ Aro iniaigaina Asónquë, notetanaa pitotsiquë, naquenaiguë irooti poeboroquë ojita Mitirene. ¹⁵ Oquëtaguetanai naquenocotaiguë irooti catingasati oboguesiquë jitacha Quío. Oquëtaguetanai aisati naquenocoque irooti basiniquë oboguesi ojita Samos. Cara pabisanaque maba cataguiteri naretagaipa poeboroquë ojita Mireto. ¹⁶ Iquiencia Paboro irabisanaque Ejesoquë, tenta iraninte intimanë cosamani Asiaquë. Icoque iraretima Jerosarénquë cara queroquerai omoncarata cataguiteri jitacha Pentecosité.

¹⁷ Cara Miretoquë icaimagantaiguëri antiasipari ira omisantiri ira botoibiritari Jesoquisito Ejesoquë. ¹⁸ Yaretaigapa, icabëri Paboro:

—Pigóiguë ati nacanta natiomotaiguëmi obirojegui jirai cara naraini arequenguicha Asiaquë. ¹⁹ Pigóiguë cara naquemisantasanotëri Atingomi. Aisati nacantari pomeraro. Niraicotopiantëri matsiguenga. Itsipriopiantagaiguëna jorío. ²⁰ Te nomairetëmate carari nocomantasantaiguëmiro antagaisati ora Caninaro Nibarintsi, notsatengaiguëmiro. Nogometaiguëmi cara papatoita aisati pobangopaguequë. ²¹ Nocomantëri jorío aisati

basiniati matsiguenga ira cagari jorío nacanqueri: “Pingantaigaima yacaquero. Pijiquero ora picantagueti te onganinate. Pabentimari Tosorintsi pinguemisantiri Itomi, Irianti Atingomi Jesoquirisito”.

²² —Yamai najáqueni Jerosarénquë, ojátacaquina Isère Tosorintsi. Teni nogóte paio-raca ingaintëna canta. ²³ Patiro nigóquero ora ocomantëna Isère Tosorintsi. Antagaisa-tiquë poeboro ocomantapinintina cara iromingaiquëna iratsipiriacaquina. ²⁴ Cara te nontsorgue. Jemita nangame. Teni nongogue nantime yaca quibatsiquë, iroonti nocoguini notsonquero ora igáquina Tosorintsi jirai nantëneri. Aisati igáquina Atingomi Jesus nongomantaguetiri matsiguenga ora Caninaro Nibarintsi: “Icogasanoti Tosorintsi ingábintsaiguëri matsiguenga. Icogasanoti irojocajineri ora icantagueti te onganinate”. ²⁵ Yamai nigóque quero piniaigaina aisati. Cara nacarataiguëmi jirai, aroque nocomantas-antëmiro iragáantane Tosorintsi, Iriro Atingomi aneingomentoquë. ²⁶ Nocomantasantëmi yamai, aintaca paniro ira te inguemisantiri Jesus, iriátëca Sharincabeniquë, quero pogu-ibitacuinaro ²⁷ aroquenta notsatengaiguëmiro naquenguitsatomotimiro antagaisati ora icanti Tosorintsi.

Oca icomantaiguëri Paboro. Përosati icanqueri:

²⁸ —Pigamaiguema obiatiegui. Aisati pomisantobentiri antagaisati popiguemisantaca-gane aisa icancari ira casintari omisantiri iroishate. Aroquenta pinanquimi Caninaro Isère Tosorintsi, obirojegui pomisantobentaiguëri quemisantatsiri ira botoibiritari Tosor-intsi. Itomi icamobitaiguëri omagaro matsiguenga ora iragabisaicoontimari antagaisati ira quemisantirine. ²⁹ Nigóque naro cara najáque, iribocaigapë ogoeantatsiri irianti matobiantatsiri ingoque pijocaiguëri Jesus Ira piquemisaiguë. Iriro aisati ingan-quimari otsitino catsimari iragamaiguëri oisha. ³⁰ Aintasati yaca obirojeguiquëca aiquenta ira ogoeantënguinsine ora cagaro catingaro iromatobitagarantëri quemisantat-siri iraguiatanëri iriati ira ogoeantatsiri. ³¹ Pingaguite pigamaiguema. Pinguengero ora nogometaiguëmi maba osarini. Tsitiniriquë aisa cataguitëriquë niraicoquemi no-comantasantaiguëmiro Irinibare Tosorintsi pinguemisantasanotiro. ³² Namanocoquemi Atingomiquë: “Pomisantiri Ejesosati, pingábintsaiguëri arota inguemisantaiguero Pini-bare”. Onguemisantacaganëmi Irinibare Tosorintsi onganquimi pintsibataiguemari ira yoguëtetai Tosorintsi ijitiri ianiquite. ³³ Te nanebetimaro ora yasinta basini: aisa quirequi teatisati iguitsagare. ³⁴ Pigóiguë cara nantanontaca irooti napantaigaca naro aisati ira natsibatata. ³⁵ Nacanque caninasati. Aisati pingantina nibega naro. Pintarobacaate pomitocotaiguëri ira te irine iguireguite. Icanque Atingomi Jesus: “Caninataque omito-cotaiguëri. Teni onganinate cara përosati imasitaigacái”.

³⁶ Itsonquero Paboro ora icanqueri Ejesosati, aro yobaticagueritotaigaca yamanaque. ³⁷ Iragagaca antagaisati. Yabitsontaguëri ira Paboro yasaraacari iboroquë. ³⁸ Yogasëretaigaca aroquenta icanque Paboro cara quero iniajiri aisati. Itentaigaari cara ibitoquë, inetsaigabaqueri cara iátocoque.

21

Iáque Paboro aiquero Jerosarénquë.

¹ Irooti nojogantaiganacari quemisantatsiri Ejesosati. Notetaiganaca pitotsiquë, catin-gasati naquenocotaiguë irooti oboguesiquë jitacha Cos. Oquëtaguetanë nogagaiganaca oboguesiquë jitacha Iroras, aique poeboroquë ojita Pátara. ² Canta, naniaigapëro basini pitotsi ojáque Jnesiaquë. Aro notetaiganacaro, naquenocoque. ³ Nanianëro oquibe oboguesi jitacha Chípire aiquero nomatequë nabisaiganacoque catingasati naquenocoque irooti Siriaquë. Naguëtaiganaque poeboroquë jitacha Tiro cara yoguëtanëro ora yamapë ira casintaro pitotsi. ⁴ Canta naniaigapëri quemisantatsiri. Natiomotaiguëri 7 cataguitëri. Pogometaiguëri Caninaro Isère Tosorintsi, icantaigabaqueri Paboro:

—Quero piáti Jerosarénquë.

⁵ Pabisanaque 7 cataguitëri, nogagaiganaca. Aro yoguiataiganaquina irooti sotoquë Tiro antagaisati quemisantatsiri aisa iina aisa ianiquite. Cara onamijaquë nobatica-gueritotaigaca namanocobintaigaca. ⁶ Aro nobetsataiganajari niáque. Notetaiganacaro pitotsi. Iraegui aguiataigapëna ipigaiganaja ibangopaguequë. ⁷ Cara Tiroquë naquenoco-que poeboroquë jitacha Toremaira. Canta nobetsataigapari opiguemisantane, natiomo-taiganaqueri poro cataguitëri. ⁸ Oquëtaguetanë nogaganaca, naretaigaca irooti Sesáreaquë. Nacaigapë ibangoquë Jeripe ira comantantatsiri natiomopëri. Iriro icarataiguëri jirai ira omitocontatsiri icarati 7. ⁹ Ainta otsibasati irisinto terai oneiri sërari ocomantanti aisati iroro.

¹⁰ Pabisanaque arosata catagüiteri, yarepa comantantsiri jitacha Agabo ipaniaca Jerosarénquë. ¹¹ Ipocasitaiguëna, yáguëro irisitigatsaquiropaboro. Yoguëshotiacaro iguítiquë iriati aisa ibacoquë, icampë:

—Canta Jerosarénquë aisati inganquengani iraguëshotiaqueri jorío ira casintaro oca irisitigatsaquiropaca. Imaiguëri basiniati matsiguenga ira cagari jorío. Ocanti negaca Caninaro Isère Tosorintsi.

¹² Naquemaigabaquero oca nibarintsi, naro natsibatari aisa ira Sesáreasati quemisantatsiri nacamanaaqueri Paboro:

—Quero piáti Jerosarénquë.

¹³ Yotabitaiganaquena Paboro:

—¿Pairo piraicobiriquina? ¿Pairo pogasëretacagobiquina? Jemita iraguëshotiaquenata canta Jerosarénquë. Jemita irógaiquena. Jirai yogabisaicoquina naro Atingomi Jesus, yamai nangamobiqueri Iriro.

¹⁴ Te inguemisantaiguena, aro nomairetaiguë. Nacantaiguë:

—Ongantimata ora icogui Atingomi.

Yaretaigaca Jerosarénquë.

¹⁵ Aique nobetsicaigaca narogui, aro nitongaiganaque irooti Jerosarénquë.

¹⁶ Iconagaigaca ira aguiataiganaquina quemisantatsiri Sesáreasati. Yáganëna ibangoquë Manasón paniënguicha Chípirequë jirai; yamai itimi Jerosarénquë. Tojai osarini iquemisanti Manasón. Iriro natiomotaiguë. ¹⁷ Aroque naretaigaca Jerosarénquë, yágacanimataigabaquina opiguemisantane icaninasëretaiguë. ¹⁸ Oquëtaguetanë iáiguë Paboro aisa narogui iniopëri Santiago. Iriro botoitaiguëri omagaro ira omisantiri quemisantatsiri. ¹⁹ Yobetsatobagaigaca iquenguísatomotaguëri Paboro yotsatengaiguëneri antagaisati ora icantacacari iriro Tosorintsi. Aisati icomantë cara Tosorintsi oniagaigacari basiniati matsiguenga cagari jorío iquemisantaiguëri Jesoquirisito aisati.

²⁰ Iquemaigabaquero irinibare Paboro icanquë:

—Caninari Tosorintsi.

Aisati icantaiguëri:

—Paboro, nopiguemisantaneegui, pigóque arosonoriguinte ini jorío opiguemisantane. Aisati antagaisati iriro quemisantantiro ora isanguenague Moisés jirai. ²¹ Iquemocotaiguëro cara pogometiri joríojegui ira timatsi basiniatiquë quibatsi: “Quero piquemisantiro isanguenare Moisés. Querootisati pitotiri pitomijegui. Querootisati pametaro ora yogomeanti Moisés”. ²² ¿Paioraca anganque? Caraquenta inguemocotaiguëmi cara paretaja. ²³ Caninataquejengari pijátsataiguena. Ainta itsibasati opiguemisantacagane iquengaigaca icasiriconiatiquineri Tosorintsi. ²⁴ Páganëri oquibequë pongotsi irasi Tosorintsi, piguëtetanontaiguema cara yogomeanti Tosorintsi aisati ora yameta jorío. Popeitima popënabentineri cara irapeiquima ira itsibasati, aisati popënabentineri iroishate ira iritaineri Tosorintsi. Aique irogóiguë joríojegui te aisonori ora iquemocuquimi. Irogóiguëta cara aisa obiropiguemisantiro isanguenare Moisés. ²⁵ Aroque naquengaigaca ora inganque quemisantatsiri ira cagari jorío. Aroque nopagantëri sanguenari. Iroro oca nocomantëri: “Quero papi perintsi ora aroque ipëri matsiguenga ibabane. Quero paaguiri ibatsa irisitiaga aintinta inëri iraraa. Querootisati pógaro iraraa. Quero pintiro tsinane cagaro pijina”.

²⁶ Aro iquemisanqueri Paboro. Oquëtaguetanë yáganëri ira sërari icarati itsibasati, yoguëtetanontaigaca cara yogomeanti Tosorintsi, icanaque oquibequë pongotsi irasi Tosorintsi icomantapë:

—Ongaraque 7 catagüiteri nomoncaraquero ora icanti Tosorintsi jirai aisa ora isanguenague Moisés. Aroca nangantaiguëro, aro nomaiiguëri Tosorintsi oisha.

Yágagantëri Paboro yomianqueri.

²⁷ Pëníbaque omoncaraquima 7 catagüiteri. Canta oquibequë pongotsi irasi Tosorintsi iniaigabaqueri ira Paboro jorío Asiasati. Iguisaneinqueri yapatotaiguëri inatsiguenga, aro yágaiguëri Paboro. ²⁸ Icaimaiganaque:

—Nomatsiguenga, pomitocotaiguena. Iriro ica quenaguëtatatsi yamatobitaiguëri matsiguenga. Cara yogomeanti icanqueri: “Teni inganinate jorío. Teni onganinate ora isanguenare Moisés. Teni onganinate oca pongotsica irasi Tosorintsi”. Iroro oca icantiri matsiguenga. Yamai pinetseri. Yamapëri ira basiniati matsiguenga ira cagari jorío, yoguëmingatëro oca pongotsica.

Iroro inibataiguë jorío. ²⁹ Antagaisati iniaiguëri Torójimo Ejesosati itsibatari Paboro cara Jerosarénquë. Iroro ijitagüëque cara iriro Paboro cajaganëri tsomagui oquibequë pongotsi. ³⁰ Aro iguisaneintaiguëri antagaisati Jerosaresati, yapatotaigaca canta. Yágaiguëri Paboro inosicanëri sotoquë pongotsi, yasitocoqueri sitëcoriquë. ³¹ Iroontita ipasataiguëri

ira Paboro pëmbaunque iróqueri, iquemocoqueri igomantantite soraro icarati 1,000. Icomantëntiri:

—Omagaro Jerosaresati iguisaiganaca.

³² Omanapague yáganëri isorarote aisa igapitantepague isigaigapa comantanti. Iriroque joríojegui cara iniaigabaqueri, aro yapabaquëanëri Paboro. ³³ Yaresërepari comantanti yágantëri Paboro, yoguëshotancari pite sogatsa coshori. Yosamitapëri:

—¿Pairo pijita obiro? ¿Pairo picanque?

³⁴ Yotabitaquetaiguëri jorío icaimaguëtanë, carari te inguemiri comantanti atiraca icanca Paboro. Te irogócototiri pairoraca iguisabiritaigaca jorío, aro igáqueri isorarote:

—Páganëri ibangojeguiquë soraro.

³⁵ Yareparo atomentotsi. Tojai icabaitaiganaque jorío yosibisibitobaganaca. Aro yanatanëri Paboro soraro. ³⁶ Përosati cara yoguaitaiguëri matsiguenga icaimaguëtaiguë:

—¡Póguiril! ¡Ingameta!

³⁷ Cara omoroquë ibango soraro, yamaqueri comantanti Paboro icanqueri:

—¿Caninaroco nanibatimi?

Yotabitanëri:

—¿Pigóti pinibatiro guiriego? ³⁸ ¿Cagarico obiro Ejípitotsati ira quisaacari matsiguenga cani? ¿Teco páganëri ógueri icarati 4,000 cara tera ontimingani piriaguiteroquë?

³⁹ Yotabitanëri Paboro:

—Cagarina. Naanti jorío. Nopaniaca Tárisoquë. Iroro poeboro obatatsi canta Sirisiaquë. Nomanaquimíni, pinintacaguina nanibatiri nomatsiguengaca.

⁴⁰ Aro inintacaqueri. Yaratianque Paboro jonoquë atomentotsiquë yacopëri matsiguenga. Imaireitanë, aro inibatancari irinibare ebereo.

22

Paboro iquenguitsatomoqueri joríojegui.

¹—Nomatsiguenga aisati natingomiëgui, pinguemaiguena yamai nongomantëgotëmani naro.

² Iquemaigabaquero ebereo irinibare, aiquero imairetasantaiguë jorío. Përosa icanqueri Paboro:

³—Narori jorío paniacha Tárisoquë canta Sirisiaquë. Yaca Jerosarënuëca nasanguënaque, aisati yogometasantëna Gamariel icomantasantënaró antagaisati ora yameta omatsiguenga timënguëtsi jirai. Nocogasanti nanganque pairoraca ingocaquina Tosorintsi, aisati nacantabetaiguëmi pibega obiro yamai. ⁴ Nacantaguebiritiri catsimari ira quemisantiro ora yogomeque Jesus irooti nógancari. Nágaiguëri noguëshotaguëri sërari aisati tsinane nomianqueri iromingamentoquë. ⁵ Igótiro oca itingomi saseriroti aisa itsibatari. Ora nocomantëmi yamai igóigui. Iriro itingomi saseriroti isanguënaquineri Támasicosati. Igáquina Tamásicoquë náganëneri sanguenari. Niátasiqueri nágaiguërimë iraëgui quemisantiri Jesus naguëshotaguërimë nomapërimë yaca ingasitígataigabaquerime itingomi saseriroti. ⁶ Cara pëmbaunque narequimaró Tamásico, naquënaque abatsiquë, aro catinga paba, iroguito jonoquë oconijapë yosanguëguitetocopëna Tosorintsi. ⁷ Nopariganë quibatsiquë. Naquemobëro irinibare Jesus ocampëna: “Saoro, Saoro, ¿Pairo picantobiquinaro catsimari?” ⁸ Nosamitëri: “¿Pairo pijita, Natingomi?” Yotabitanëna: “Naro Jesus Nasaresati, naro picantobique catsimari”. ⁹ Ira tsipataiguëna iniaiguëro cataguiteri cantaca omanarontsi carari te inguemobëro ora icanque Jesus. ¹⁰ Nacabëri: “¿Pairo picogui, Natingomi?” Icampëna: “Pingabiritima pijáte Tamásicoquë. Canta ingomantëmi pairoraca pinganque”. ¹¹ Aroque pogomarajapëna cataguiterisonori. Te nanianae. Icatsabagotanëna irooti Tamásicoquë. ¹² Itimi canta matsiguenga jitacha Ananías. Iquemisantantiro isanguënaire Moisés, aisati iniacaninataiguëri joríojegui timaigatsi Tamásicoquë. ¹³ Iriro bocasitapëna icampëna: “Saoro, yamai obiro nopiguëmisantane. Igáquina Tosorintsi naniacagajimi aisati”. Aito cara nanianai. ¹⁴ Përosati icanquina: “Omatsiguenga jirai iquemisantiri Tosorintsi. Obiro icoque yamai pigótirota ora icogui pingante. Aisati icoguëmi piniaquerita ira Caninatasanotatsiri pinguemiri. ¹⁵ Aisati pinguëguitsatomotiri antagaisati matsiguenga. Pingomantëgotiri Jesus Ira piniaque aisa Ira piquëmaque. ¹⁶ Yamai ¿Pairo picosamanibirique? Pomaotisatima, pabentimari Jesus, aro irojocajimiro ora picantaguëti te organinate”.

¹⁷⁻¹⁸ Perosati icanque Paboro:

—Aro nipigapaa yaca Jerosarënuë. Cara namanasegui oquibequë pongotsi irasi Tosorintsi, iconijatompëna Atingomi icampëna: “Omanapague pijocanëro Jerosarën, pisanëma, queronta iquemobëro ora picomantëgotina yaca”. ¹⁹ Notabitobëri: “Natingomi,

irirojegui igóiguëna cara naro ágaiguëri ira quemisantimi obiro nomingaiguëri nipasataiguëri pongotsiquë cara yapatoita. ²⁰ Aisati cara icamaque Isiteban pigomantantatsirite, nacaninatë najique: ‘Caninataque ingameta’. Nomisantëneri iguitsagare ira basiaqueri mopëquë”. ²¹ Aro Ira Natingomi icanquina: “Atsi pijáte. Nocoguini nagátimi naro canta jaanta basiniatiquë matsiguenga”.

²² Iquemabecari joríogegui irooti oca. Yamai cara icanque basiniati matsiguenga, icaimasantaiguë icantaiguë:

— ¡Píjoquiril! ¡Teni ongomeite intime! ¡Ingameta!

²³ Icaibaitasanotanë, iguisaneintasantanaca imionguëro jonoquë iguitsagare aisati pojongamamori. ²⁴ Iniaquero comantanti igáqueri isorarote:

— Páganëri tsomagui pobangoquë. Popasatiri ingomantanëta pairoraca icantaguëti ora iguisancari imatsiguenga.

²⁵ Aro yoguëshotabitacari iripasataiguëri. Aro Paboro yosamitëri igapitante soraro:

— Naro matsiguengatacari Iromasati. Terai irosomitëmatina itingomi. ¿Caninarico iripasatasitina quero yosamitobënanta?

²⁶ Iquemaquero capitán oca nibarintsi, iáque comantantiquë icampëri:

— ¿Pairo pintí? Ica sêrarica irianti matsiguengatacari Iromasati.

²⁷ Aro ipocasipëri comantanti yosamitapëri Paboro:

— ¿Obiroco matsiguengatacari Iromasati? Pingomantina.

Yotabitanëri Paboro:

— Jee, naro.

²⁸ Icanëri comantanti:

— Tojai nipënabenqueri Iromasati cara nomatsiguengatacari naro.

Icanqueri Paboro:

— Naro aito ninë niqúibiaque nomatsiguengatacari.

²⁹ Aito cara ijocanëri Paboro ira pasaantënguitsineme. Itsoroganë comantanti cara igótanë Paboro imatsiguengatacari Iromasati aroquenta yoguëshotasicacari. Te onganinate iraguëshotasicatimari ira Iromasati.

Yáganëngani Paboro catingsatiquë jorío obatsisiri icarati 71.

³⁰ Icoquini comantanti irogótasantë paio ca icantaguebiriqueri jorío ira Paboro. Aro oquëtagueatanë, icaimagantaiguëri irapatotaiguëma jorío: itingomipague saseriroti aisati ira obatsisiri icarati 71. Yomisotoqueri Paboro, yáganeri catingsatiquë jorío.

23

¹ Inetsasantaiguëri obatsisiri ira Paboro icanque:

— Nomatsiguenga, nigóti iniacatinatëna Tosorintsi irooti yamai. Teni nontsorogue naneingomentoquë.

² Aro Ananías itingomi saseriroti igáqueri itsibatari:

— Pinchotangabagantetiri.

³ Icanque Paboro:

— Obiro inguisë Tosorintsi obironta matobiantatsiri. Pisobiaque yaca, picoque pomoncaratirome ora isanguenaque Moisés. Yamai pinguisagantëna. Te pomoncaratirome ora Sanguenari.

⁴ Ira matsiguenga aroniatiquë Paboro icanqueri iriro:

— ¿Picantocotaguetasitari obiro itingomi saseriroti?

⁵ Yotabitanëri Paboro:

— Teni nogóte cara iriro itingomi saseriroti. Nogóquerime, quero nacantirime aronta ocanti Sanguenari: “Quero picantocotaguetasitari itingomi pomatsiguenga”.

⁶ Igóque Paboro cara ainta iconagacari saroseo aisati bariseo. Icaimanë:

— Nomatsiguenga, naro bariseo, naatisati itomi. Najiti cara intinaajiri Tosorintsi ira camënguitsi iraganiatairi aisati. Iroro iguisabiritaiguëna yamai.

⁷ Iquemobëro oca inibatë Paboro, ipégatsatobaca catsigue bariseoegui aisa saroseoegui. Iguisaneintobaca. ⁸ Ira saroseo jitatsi: “Quero icaniatai aisati ira camatsiri. Querojenga pini isère matsiguenga, querootisatijenga ini ironomire Tosorintsi”. Ira bariseo icantaiguë: “Intinaajima aítinta isère matsiguenga. Inganiatanae. Aintasati ironomire Tosorintsi irisaanganetite”. ⁹ Tojai iguisatsatobagaigaca catsigue. Aro yaratingaiguë ira ogomeantiro Sanguenari, iriro bariseo. Icantasantaiguë:

— Tenijengari ingantaguete ica sêrarica ora te onganinate. Iriroca nibaqueri ironomire Tosorintsi, irineta.

¹⁰ Aiquero tojaisonorí iguisatsatobagaigaca. Itsorogobiqueri Paboro comantanti cara iroguiripitëri intibatsaaqueri jorío. Aro icaimëri isorarotepague igáqueri:

—Págabitsatiri, páganëneri pobangoquë.

¹¹ Aro yáganëri. Otsitinitanai iconijatompëri Paboro Atingomi icampëri:

—Pinganinaserëte. Piquenguitsatocoquina yaca Jerosarenquë, aisati pinganquima pini-batë canta Iromaquë.

Yáganëngani Paboro Sesáreaquë.

¹² Oquëtaguetanë yapatoica joriópague, iquengaigaca cara quero yapi querootisa yóga nija irooti cara iróqueri Paboro. ¹³ Icarati 40 jorío quinguënguicha iróguiri. ¹⁴ Iátasitaiguëri saserirotijegui aisati antiasipari icantaigapëri:

—Catingasatiquë Tosorintsi naquengaigaca naroequi nóguëri Paboro. Quero napi, querootisa nóгаа nija irooti cara nóguëri. Queroca nóguiri, iratsipiriacagaiguenata naroequi Tosorintsi. ¹⁵ Yamai obirojegui manaantirine comantanti iromapëri Paboro obiroquë. Pingantiri picogaiguë posamitasantiri arota pigóiguero ora icantaguëti. Naroequi nomaguetaiguëri nógobëri cara queroquerai yareta obiroquë.

¹⁶ Ainta itineri Paboro iquemocoqueri jorío cara isariacari iróguiri Paboro. Aro iáque ibangoquë soraro icomantapëri iriconguiri. ¹⁷ Paboro cajemaqueri capitán icanqueri:

—Páganëri ica oboinaca comantantiquë. Aiti ora ingomantëri. ¹⁸ Yáganëri capitán, icanqueri comantanti:

—Icaimagantëna Paboro ira iromingane yamanaquina: “Páganëri ica oboinaca comantantiquë. Aiti ora ingomantëri”.

¹⁹ Icatsabagotanëri ira janequi casiriconiati cara irosomiqueri comantanti, yosamitëri:

—¿Pairo ojita pingomantëna?

²⁰ Yotabitanëri:

—Ira jorío iquengaigaca cara iromanajimiri naramani páganairi Paboro catingasatiquë ira obatatsiri icarati 71. Icoagaiguini iromatobiquimi, inganquimi icoguini irosomitasantaiguëri aisati. ²¹ Quero piquemisantiri aintanta sërari icarati 40 iquengaigaca iróguiri. Icantaguë: “Quero napaiguë querootisati nóгаа nija irooti cara nógaiguëri Paboro. Queroca nóguiri, iratsipiriacagaiguenata naroequi Tosorintsi”. Yamai aroque yobetsicaigaca. Yoguiaquimi yamai, pinganqueri ora iromanaquimi.

²² Aro igátajiri oboina comantanti icantasantobëri:

—Quero picomantiri pairiraca ora picomantëna yamaica.

²³ Aique isotocanë. Iriro comantanti icaimëri pite capitán igáqueri:

—Pobetsicaiguëri pisorarote ingaraque 200 iranëitaiganaque aisati 70 ingueicotanëma imorane, aisati 200 áganënguistsine irosataamento. Iriáiguë Sesáreaquë aganguitesata.

²⁴ Aisati pobetsiquineri Paboro imorane, ingueicotanëma. Páganëri caninasati canta Bériquis itingomiquë.

²⁵ Aique isanguenaquineri sanguenari ocanti negaca: ²⁶ “¿Aintabi, Bériquis, natingomi? ¿Tegotsitatsibi? Naro yaca Caraorio Irísias nasanguenaquimi. ²⁷ Nongomantëgotëri ica sërarica nagáquimirini. Yágaiguëri jorío icogaigabitaca iróguirime. Naquemocoqueri, aro nantaigacari soraro nágabitsataiguëri aroquenta nigótoocoqueri iriro matsiguengatacari Iromasati. ²⁸ Nocoque nogóteme pairoraca iguisabiritaiguëri, aro naganëri cara itingomiquë obatatsi icarati 71. ²⁹ Patiro icanocotaiguëri jorío negaca: ‘Iriro teni inguemisantiro ora isanguenaque omatsiguengajegui’. Te ingantaigue pairoraca ora nagamagobiqueri naro teatisati ora nomingabiriqueri. ³⁰ Cara nigótanë iquengaigaca jorío cara iróqueri, aito cara nauqianca nagáquimirini. Aisati nocomantaiguëri ira quisaneinqueri iriátaigue obiroquë arota ingomantëgotasantiri”.

Irooti isanguenaquineri, aro ipabaqueri capitán icanqueri:

—Jeroca, páganëneri Bériquis, aisati páganëri Paboro.

³¹ Aro ira sorarorejegui yágaiganaqueri Paboro tsitiniriquë. Yaretaigacaro Antípatiris.

³² Oquëtaguetanë ipigaigaa ira soraro anëitasantinguicha. Yágaiganaqueri Paboro ira quijëgotaguënguicha imoranequë ³³ irooti yaretaigacaro Sesárea. Ipapëri sanguenari Bériquis itingomi aisati ipapëri Paboro. ³⁴ Iniobëro sanguenari Bériquis, yosamitobëri Paboro:

—¿Nega popaniaca obiro? ¿Pairo ojita piguebatsite?

Icomantëri Paboro:

—Nopaniaca Sirisiaquë.

³⁵ Icanqueri itingomi:

—Caraquenta nanguemasantëmi cara iribocaigapë ira comantëgotëmine.

Aique igáqueri soraro:

—Pominguëri canta ibangoquë Eroris. Pinetsasantiri.

24

Paboro icomantëgotaca catingsatiquë Bériquis.

¹ Pabisanaque catagüteri pabocorooti, aro yanonganaca yarepa Ananías ira itingomi saseriroti canta Sesáreaque. Iconagaca antiasipari ira aguiatapëri aisati nibabintantsiri jítacha Téretoro cara iromitocoqueri Ananías. Irrojegüi iátasitaigüeri Bériquis itingomi ingomantëgotëri Paboro. ² Icaimëngani iriro, aro iparintaca inibatë Téretoro icanque:

³—Caninari natingomi, nacarasiataguëmi pitingomibintasantaiguëna caninasatisonori. Yamai caninasati natimaigui. Picantaiguëna ora caninaro. Aro nacarasiatasantëmiro antagaisati. ⁴ Quero nocosamanitiro basini. Përosati obironta cábintsantatsi, aro nocoque yamai pinguemina arosata. ⁵ Naniaiguëri ica Paboro icomantëri jorío omagaropaguequë quibatsi ijocagantëro ora nametaiga naro. Aisati iriro obatatsi ira quemisanqueri Jesus Nasaresati. ⁶ Icgabeca iraguimingatirome pongotsi oquibe irasi Tosorintsi, carari nágaiguëri nocogabeca nanganquerime cara isanguenaquenaro Moisés. ⁷ Carari yareca Irísias inta comantanti aisa tojai isorarote yágabitsaquinari, igátaiguëna nopocaiguë obiroquëca nongomantëgotëri. ⁸ Yamai posamitërica obiati, pigótanëro omagaro oca nocomantëgotërica.

⁹ Icantaguë joríojegui:

—Aisonori ora icanque Téretoro. Inibatë catingsati.

¹⁰ Aique Bériquis yacoqueri Paboro irinibaque. Icanque iriro:

—Nigóti tojai osarini pitingomibintaiguëri picomantëgotaiguëri nomatsiguenga. Iroso nacaninasëretaguëque nongomantëgobentima yamai. ¹¹ Quero ocomëtati pigótocotanëna omoncaraca 12 catagüteri nareca Jerosarënuë. Niátasiquero nomanocoquerini Tosorintsi. ¹² Te iraniaiguëna nopëgatsatimari pairiraca cara oquibequë pongotsi irasi Tosorintsi, teatisati basiniatiquë pongotsi cara yapatoita jorío, teatisati poeboroquë. ¹³ Querootisati iniantinaro ora icomantëgotasitëna yamai.

¹⁴—Carari yamai nongomantasantëmi cara naquemisantiri Tosorintsi aisa icanta nomatsiguenga jirai iquemisantigüeri. Naquemisantiro isanguenare Moisés aisa ora irasi comantantsiri. Aisonori, naquemisantiri Jesus ira te iraniacananataguëri irrojegui ica. ¹⁵ Aisati nacantaigari iriro, nigótiri Tosorintsi cara iraganiatairi antagaisati camaguetatsi, ira caninatatsi, aisa ira te inganinate, omagaro intinaigari Tosorintsi. ¹⁶ Iroso nocogasantaguëti iraniacananatana Tosorintsi aisati matsiguenga. Nocoque nantime caninasati. Nigóque cara iniacaninatëna Tosorintsi. ¹⁷ Pabisanaque osarinipague niátagueque canta jaanta. Yamai nipigaa namapëneri nomatsiguenga quirequi ipagantiri timatsi jaanta. Aisati nomasitëmari oisha Tosorintsi nataquineri. ¹⁸ Cara oquibequë pongotsi irasi Tosorintsi iniaiguëna. Aroque noguëtetaca. Te nopatoitiri matsiguenga, teatisa nanguisaguimari. ¹⁹ Ainta inasegui joríoipague paniacha Asiaquë iniaiguëna pongotsiquë iguisaneintaiguëna. Aitime nangantaguetiri ora te onganinate, caninataqueme iribocapë yaca iriro ingomantëgotëna. ²⁰ Queroica ipoqui, ingomantëgotinata icaegui ora pairoraca nancantagueque te onganinate cara catingsatiquë itingomi ira obatatsi icarati 71. ²¹ Patiro nacanque: “Nigóti cara iraganiatairi Tosorintsi ira camaguetatsi. Iroco picogui posamitina arota pigótina”.

²² Aro itsonquero Paboro cara icomantëgotaca. Aro Bériquis igótasantëro ora yogometocotagani Jesoquisito cara iquemocotiro jirai. Icanqueri:

—Antagati yamai. Aiquenta iribocapëca Irísias ira comantanti, aro cara nongomantëgotëmiri naro ora pinganque.

²³ Aisa Bériquis igáqueri capitán:

—Paganëri Paboroca, pomingueri. Pinetsasantiri. Pinintacagüri pairoraca ingoque. Aisati pinintacagüri cara iraniaqueri imatsiguenga iromitocoqueri.

²⁴ Pabisanaque arosata catagüteri. Ipigapaa Bériquis aisa iina jítacha Torosira. Iroso jorío. Icaimaganterri Paboro, icoque inguemiri cara atiraca angantima anguemisantiri Jesoquisito.

²⁵ Iquenguitsatocoquero Paboro atiraca angantima aganinasëretima, aisati antime caninasati. Aisati iquenguitsatocoqueri Tosorintsi atiraca angantima ingomantëgotëri antagaisati matsiguenga ora pairoraca inganque aisati negaraca iriátë. Aro itorogasantanë Bériquis icanqueri Paboro:

—Aroque yamaica. Atsi pijátaje. Caraquenta, queroca natarobacaati, aro nangaimaimi aisati.

²⁶ Icgabeca Bériquis imabaquerime quirequi Paboro arota iromisotocajiri. Iroso icaimapinintobitabecari, inibatatabecari. ²⁷ Pabisanaque pite osarini. Aro Pórisio Jesúsito pëgairi ira Bériquis. Icoque Bériquis iraganinataguëri ira joríojegui, iroro përosati yominguëqueri ira Paboro.

25

Paboro yabencari ira Sésar.

¹ Yareca Jéxito Sesáreaquë cara iripëgairi Bériquis itingomi. Pabisanaque maba cataguiteri itonganaque irooti Jerosarénquë. ² Canta, itingomipague saseriroti aisa ira obatsisiri jorio irirojegui ipocasitaiguëri Jéxito icomantëgotaguëri Paboro. ³ Aisati yamanaiguëri:

—Poganinataiguena. Pigátinari Paboro Jerosarénquëca.

Iquengaigaca iromaguetiri abatsiquë, aro irógaigabaqueri. ⁴ Yotabitanëri Jéxito:

—Ainta Paboro yomianqueri Sesáreaquë. Queroquerai ocosamaniti najáque naro canta.

⁵ Aisati nocoguini iraguatanëna ira obatsisiri obiroquë. Ingomantëgotëri ora icantaguetomiquimi ira Paboro.

⁶ Pabisanaque poro tominco arosata cataguiteri basini, ipigapaa yanonganaca irooti Sesáreaquë. Oquëtaguetanë isobiaque iragáantomentoquë, aro icaimagantëri Paboro.

⁷ Yarepa iriro. Ira joríojegui paniacha Jerosarénquë ishonganacari icantocotaguetasicari tojai, carari te ingantima irógotasantaguiiri Jéxito aisonorica ora icomantëri. ⁸ Aro icantocobintaca Paboro icanque:

—Teni nangantocotëmatimi te onganinate ora icanti Tosorintsi isanguenaque Moisés. Teatisati nangantocotëmatiro ora pongotsi irasi Tosorintsi. Teatisati nangantocotaguetëmatiri Sésar ira itingomi.

⁹ Icoque Jéxito iraganinataiguëri joríojegui. Aro yosamitëri Paboro:

—Piquemaque yamai ora icomantëgotëmi icaegui. ¿Picoquico pijáte Jerosarénquë? Canta nongomantëgotëmi naro.

¹⁰ Icanë Paboro:

—Quero niáti. Nomatsiguengatacari Iromasati. Caninataque pingomantëgotina obiro yaca ora nanganque. Pigótasanti cara te nangantaguetomotiri jorio. ¹¹ Aitica nacantagueti ora te onganinate, jemita irógaiguenata. Cara itsoiguëgotaguetasitënaca ica joríojegui, te ongomeite irágasitanëna pairiraca canta irirojeguiquë. Nabencari Sésar igobeingarite antagaisati Iromasati. Iriro comantëgotënane.

¹² Inibatobaca Jéxito aisa ira itsibataiga. Aique icanqueri Paboro:

—Pabencari ira Sésar. Aro nagáquimi iriroquë.

Paboro iquenguitsatacaqueri Aguiripa.

¹³ Pabisanaque arosata cataguiteri yareca basini itingomi jitacha Aguiripa otsibatapari iritsiro jitacha Berinisi. Ipocasiqueri cara irobetsatapëmari ira Jéxito. ¹⁴ Itimopë Aguiripa tojai cataguiteri. Aique Jéxito icomantëgotëri Paboro. Icanqueri:

—Ainta yaca poro sërari ira yomianque Bériquis jirai. ¹⁵ Cani niáque Jerosarénquë. Canta icomantëgotobëri itingomipague jorio: saseriroti aisa antiasiparipague. Yamanaquina cara nagamaguëri. ¹⁶ Notabitanëri: “Naro Iromasati. Teni nometaiguema nangantocotiri pairiraca cara queroquerai icantiri ira cantëgotëri”.

¹⁷ —Aroque ipocai gapë joríopague yaca, oquëtaguetanë nisobiaque nagáantomentoquë, nacaimagantairi Paboro. ¹⁸ Yaratianque ishonganacari. Teni ingomantëgotiri ora pairoraca te onganinate aisa ora naquengabeca. ¹⁹ Iguisatsabiritasicari ora yameta basiniati Paboro. Aisati iguisatsabiritasicari sërari jitacha Jesus ira camënguitsi, carari icanque Paboro: “Icaniatanai”. ²⁰ Teni nogóte paio nanganque atiraca nosamitëcobenqueri, aro nosamitëri Paboro: “¿Picoquico pijáte Jerosarénquë? Canta nongomantëgotëmi naro”. ²¹ Carari te iranote iriáte. Icoque yabencari Sésar ogobeingarite comantëcobenquerine. Aro nigáqueri nosorarote iromingairi irooti cara nagáqueri canta Sésariquë.

²² Icanqueri Aguiripa:

—Aisati naro nocoguini nanguemiri.

Icanë Jéxito:

—Naramaniinta pinguemaqueri.

²³ Oquëtaguetanë icanaque Aguiripa caninara imanchaqui yareca iriro aisa Berinisi iritsiro. Yareca cara yapatoiqueri Jéxito ira matsiguenga. Icarataguëri comantantiegui aisa ira obatsisiripague ira timatsi Sesáreaquë. Aique Jéxito icaimagantairi aisati Paboro. ²⁴ Icanqueri:

—Nobingatsarite Aguiripa, aisati omagaro obirojegui nagaimane yaca. Pinetseri ica sërarica. Iguisaneintaiguëri antagaisati jorio Jerosaresati, aisati jorio timatsi yaca. Icantocotaguëri: “Teni intime caninasati”. ²⁵ Carari nigótocoqueri naro te ingantagueti ora irógobitaiguëri, cara yabencari Sésar, aro yamai nocoguini nagáqueri Sésariquë. ²⁶ Te nogóte pairoraca nasanguenatocoqueri ora nomagantëri Sésar nogobeingarite. Iroro namaguëtaiguemiri ingomantaguetimi, nobingatsarite Aguiripa, aisati obirojegui. Nocoguini pingomantinaro ora nasanguenatocoqueri. ²⁷ Ainta ica iromingaga jirai. Tenijengari ongomeite nagátasitimari, teca ine ora nongomantëgotëri.

26

¹ Aique icanqueri Paboro Aguiripa:

—Yamai nanintacaquemi obiro comantëgotachane.

Aro yacotanë Paboro icomantëcobentanaca icanque:

²—Natingomi Aguiripa, pigóti cara icomantëgotëna joríojegui ora te onganinate. Nacani-nasëretanë yamai cara nongomantëgotëma catingsatiqué obiro ³aroquenta pigótasanti ora yametaiga jorío. Nocogui pinguemasantina antsinisati. Quero pitsirisina. ⁴Antagaisati jorío igótocoquina ati nacanta natimaque Jerosarénquë cara jirai oboinaquerai naro. ⁵Ingomantëgotëna jorío, igóguë jirai cara nobariseotabeca. Nacantari iriro naquemisantantiro ora isanguenaque Moisés. ⁶Jiraisonori icanqueri nomatsiguenga Tosorintsi iraganiatairi ira camatsiri. Oca naquemisantiro. Iroro inintaguëque jorío yamai irógaigüena. ⁷Jirai itimi Jacob aisa itomijegui icarati 12. Antagaisati catagüiteri aisa tsitiniri iquemisantaigüeri Tosorintsi irooti yamai. Përosati cara yoguiaqueri ira Tosorintsi inganquero ora icanasantë Irinibarequë jirai. Natingomi, aisati naro noguiaqueri. Iroro icancotaguëquina yamai jorío ora te onganinate.

⁸—¿Pairo pijitobique obirojegui cara quero itinaajiri yoganiatairi Tosorintsi ira camatsiri? ¿Pairo pitsoingobique? ⁹Jirai najitabeca naro caninataque cara nacantaguebiritiri catsimari ira quemisantiri Jesus ira Nasaresati. ¹⁰Nacantaguebiritiri catsimari canta Jerosarénquë. Nomingaigüeri tojai ira quemisanqueri Jesus irironta agáquena itingomiegui saseriroti. Cara yogamagaigüeri nacanque: “Caninataque”. ¹¹Nacasitigatapinintaigüeri pongotsipaguequë cara yapatoita arota ingantocotaguetasitimari Tosorintsi, naguisasantobërinta. Cara isigaiganaca basinipaguequë poeboro noguiabiritaguetagüeri.

¹²—Iroro niátaguëque aiquero Tamásicoquë. Igáquina itingomiegui saseriroti. ¹³Niáque abatsiquë, aro catiga paba. Omanapague oquëtaguetasantë naniobëro catagüiterisonorigüente yosangueguitocopëna Tosorintsi naro aisati ira tsipataigüena. ¹⁴Nitëaiganaque quibatsiquë, aique naquemobëro cara inibatanquinario irinibare ebereo icanquena: “Saoro, Saoro, ¿Pairo picantobiquinero catsimari? Obiro aisa picantari sërari baaca cara imeratëmani iripasaqueri casintari. Ira baaca iragaitgüitetabequimari carari iratsipiriopiantë. Aisati obiati casitigatacha cara piguisaneinquina”. ¹⁵Notabitanëri: “¿Pairi pijita, Natingomi?” Icanquina: “Naanti Jesus Ira piguisaneinti. ¹⁶Carari pingabiritüma. Noniaguëmi Naati pomitocotiri matsiguenga pingomantëgotaguetina ora piniaque aisati ora noniaguëmi aiquenta. ¹⁷Atiraca ongantima ingantobitaigüemiro catsimari pomatsiguenga, aisa ira basiniati matsiguenga, nagabisaicoquimi cara quero yóguimi queronta nanintacagüeri. Yamai nagáquimi basiniatiqué matsiguenga. ¹⁸Pogometaiguenari irogóguenata. Yamai cantaca yanëitaigüini tsitiniriqué intaguetiro ora te onganinate yamatobitaigüerinta Satanás camagari. Pogometaiguenari arota irogóguena irojocajiro ora icantagueti te onganinate, iranëitaigae cara catagüiteriqué, ingantajiro ora caninero, inguemisantiri Tosorintsi. Aro irojocagajiri Tosorintsi ora icantagueti te onganinate quero iquengairo, iraguëtaigüeri Tosorintsi, coshoni iroqueri intsibataigüemari ira quemisantina”.

¹⁹—Yamai, natingomi Aguiripa, nocomantëmi cara te nopëgatsatimari Jesus. Naquemisantasantotëri ora icanquina. ²⁰Iritsita nocomantaigüë Tamásicosati, aique Jerosarésati, aique Joreasati. Aique nocomantaguequeri ira basiniati matsiguenga. Nocomantëri irojocagairo ora icantagueigui te onganinate, inguemisantaigüeri Tosorintsi, imasiniatitanae, ingantagueteta ora caninero. ²¹Iroro yáguëquina oquibequë pongotsi irasi Tosorintsi icogabeca iróguiname. ²²Carari yogabisaicoquina Tosorintsi imitocoquina yamai nocomantaguetiri omagaro matsiguenga ira itingomi, aisati ira cagari itingomi. Patiro nocomantëgotiro ora cantënguichane ora icanque jirai comantantatsiri aisati Moisés. ²³Icanque iratsipireirota Ira Agabisaicoontatsiri ingamaque. Aique irobaque inganiantanae. Ingomantagueigüeri jorío aisa basiniati matsiguenga cara inganiataigae aisati.

²⁴Iroontita inibatë Paboro, icaimëri Jësito:

—Paboro, teni pineicotima. Aroquenta tojai pisanguenatanë teni pineicotanaima.

²⁵Yotabitanëri Paboro:

—Teni, caninari natingomi Jësito. Naneicotasantaca cara nocomantëmiro ora catin-garo nibarintsi. ²⁶Igótasantiro Aguiripa ora ninibatëgotë. Naquenguitsatiro caninasati najiquenta igótasantiro tenta ománima oca. ²⁷Natingomi Aguiripa ¿Piquemisantiro ora isanguenataigüë comantantatsiri? Nigóquimi cara piquemisantiro.

²⁸Yotabitëri Aguiripa:

—Omanapague picogabeca pinguemisantacaquina pinganquiname iraisati Quirisito.

²⁹Icanqueri Paboro:

—Omanapagueca pinguemisantiri, queroca aikuenta, teni nogóte. Nocogasanti aisati pingantima nibega naro obiro aisa antagaisati ira quemaiquëna ingantinata nibega naro. Patiro teni nongogue iraguëshotantaiguemaro oca sogatsa coshotsari.

Aroque itsongue inibatë Paboro.

³⁰ Icabiritanaca Aguiripa, aisa Jésito, aisati Berinisi, aisa ira itsibata, ³¹ iáiguë casirico-niati, inibatobaganaca icantobaca:

—Teni ingantaguetiro ica sërarica ora te onganinate. Quero icami. Teatisati irante pairoraca ora iromingabiriqueri.

³² Aguiripa icanqueri ira Jésito:

—Querome yabentari Sésar, pomisotocajirime.

27

Igáquengani Paboro Iromaquë.

¹ Ainta inasegui sërari jítacha Jorio. Iriro capitán itingomi soraro icarati 100. Ira sorarogeuji yágapajirotaiguëri Aogósito igobeingarite. Cara pobetsicaca antagaisati iragáqueri Paboro Itariaquë, Jésito icanqueri Jorio:

—Aiti yamai oquibe pitotsi. Páganëri Paboro Itariaquë aisa inta basini iromingaga.

² Aro notetaiganaca pitotsiquë opaniaca Aramisíaquë, yágairo ágomentotsi asi pitotsi nanguenocotaiguë poeboropaguequë onamijaquë Asia. Itsibataiguëna Arisitárico Tesarónicasati ipaniaca Maseroniaquë. ³ Oquëtaguetanë naretocotanaca Sirónquë. Canta, icábintsëri Paboro Jorio, inintacaqueri iriáte Paboro cara iraniaqueri imatsiguenga ira pabaqueri iraperi. ⁴ Aique nogaganaca. Sintsiro coguentima ocoguintimatocoquina. Naquenocotaiguë aiquero cara oboguesiquë jítacha Chípíre. ⁵ Nimontiaiganacaro angaare noguiataiguëro onamijaquë Sirisia aisa Pampiria naretaigaca poeboroquë jítacha Mira Irisiaquë. ⁶ Canta, iniaquero Jorio basini pitotsi oquibe opaniaca Arijantiríaquë. Yotetaiganaquina aique piáque Itariaquë. ⁷ Tojai cataguiteri antsínisati naquenocotaiguë comëtaronta naretocotaigaca catingasati Caniroquë. Opomirintsitomotaiguëna coguentima, noshonganaca irooti oboguesiquë oqibeguite ojita Quereta. Nabisanaquero Saramona ⁸ naquenocotanë onamijaquë irooti canta pini pitotsi santëcoguiteri quë jítacha Caninajaro aronisati poeboroquë jítacha Irasea.

⁹ Aroque nogabisaiquë tojai tominco, abisaque cataguiterpague cara ititaiga joríogeuji. Aro ocobeingatasantë nanguenocotaiguë angaarequë aroquenta omotoncaatasantanaca, icomantaiguëri Paboro, ¹⁰ icanqueri:

—Obirojegui, pinguemina. Nigóti ocobeingatocotasantacái anguenocotanëca yamai. Najique omiaquima ora amaguëti aisatijengari eiro.

¹¹ Carari ira capitán te inguemisantiri Paboro. Iquemisanqueri casintaro pitotsi aisati ira játaguero pitotsi. Icanque:

—Intsome.

¹² Tenta ongomeite cara pini pitotsi ojita Caninajaro cara tsaengaquë, iquengaigaca iragagaiganaquima. Icobabetaigaca naretocotaiguëmame Jenisequë cantaqueronta Quere-taquë. Canta, quero pareta sintsiro coguentima cara iconteti paba. Iroro Jenise caninaro nantimaiguë tsaengaquë nantsatocoquero pitotsi canta. ¹³ Oparintaca coguentimainga aique piáque toonquë. Ijitaiguëro caninaro, aro yágairo ágomentotsi asi pitotsi. Naquenocotaiguë aronisati onamijaquë Quereta. ¹⁴ Iroguito paretocotaiguëna oqibeguintesonori coguentima jítacha Norésite opaniaca quibatsiquë. ¹⁵ Páganëro pitotsi. Te ojábintsate pitotsi aiquero coguentimaquë, aro nanintacaquero áganëro. Ojátagueque. ¹⁶ Cara nabisaiganaque santëcoguiteri quë oboguesiquë arosata jítacha Cáora, aro nopomiritaigaaro cara nágairo otiomijani pitotsi aro onosicapë notetajiro. ¹⁷ Aroque notequero, aro yobetsiaiguëro ora oquibe pitotsi, yoguëshotantaguetajaro oquibe sogatsa osobi pitotsi arota quero otin-garaanaca. Itsorogaiganaque nanguenocotaiguë omaniquiquë jítacha Sírite aítinta nija jintaaro arosonori omaniqui tsoaguaia. Aro yoguëtaiguëro tocoya páganëronta pitotsi coguentima. ¹⁸ Oquëtaguetanë, iparintaca ijocaiguëro ora yamaguëti sintsirota coguentima. ¹⁹ Cara oquëtaguetanai maba, ijocaiguëro tojai tinari. ²⁰ Ocaratanë tojai cataguiteri, te naneiri paba teatisati jonogatsi. Pérosati ocoguintimatasantanë najitaiguë nangamaiguë.

²¹ Pabisanaque tojai cataguiteri te nopaigue, yaratanque Paboro icanque:

—Obirojegui, caninataqueme pinguemisantina cara inaiquë nime canta Queretaquë. Arome pinguemisanaquina quero pijocaiguërome yamai ora pamaguëti pitotsi. ²² Carari yamai pinganinasëretaique queronta picami poro. Patiro ocaraaque pitotsi. ²³ Naraningui iconijatomopëna ironomire Tosorintsi Natingomi Ira naquemisanti. ²⁴ Icampëna: “Quero pitsorogui, Paboro. Aro pirequima catingasati quë Sésar. Aisati Tosorintsi cábintsaiquërine antagaisati ira tsipatimi pitotsiquë”. ²⁵ Aro pinganinataigue, natsipajegui, aroquenta

naquemisanqueri Tosorintsi cara inganque ora icomantëna. ²⁶ Aganëro pitotsi coguentima irooti oboguesiquë cara ocarapë.

²⁷ Ocaratanë 14 catagüiteri yamai otsitinitanë. Naquenocotasitanaca angaarequë jítacha Atiriático. Aganguite igóiguë pitotsiberi cara notsitiparo quibatsi. ²⁸ Imoncarataiguëro nija, aro omoncaraca nija pini 37 métoro. Cosamanisata yogasitairo. Omoncaraca 28 métoro. ²⁹ Itsorogasantaguë cara picorianganëro mopë. Ijocaguëro otsibasati ágomentotsi cara otioguiquë pitotsi arota ontsaguipë quibatsiquë aro omaireque pitotsi. Itsorogasantë aro yoguiaiguërota onguëtaguetasantanë. ³⁰ Icgabetaigaca pitotsiberi irisigaiguemame. Yoguëtaiguëro otiomijani pitotsi. Yamatobitabecari ira cagari pitotsiberi icanqueri:

—Nojoqueroti basini ágomentotsi cara otsobaquë pitotsi.

³¹ Paboro comantëri igapitante soraro:

—Queroca inaigui iriro pitotsiquë, querootisati pabisaicoti obirojegui.

³² Aito cara yobëshahquero sogatsa soraro opariganë otiomijani pitotsi. ³³ Terai onguëtaguetasante, Paboro icantaiguëri ira basini matsiguenga irapaigne. Icanqueri:

—Yamai ocarati 14 catagüiteri ititaigaca eiro te opaigue. ³⁴ Yamai nomanocoiguëmiro poperi arota pisintsitanë cara pomatanë. Aisati quero opega poro piguisi piguitoquë. Quero ati picantëmata.

³⁵ Aroque icanque negaca, yáguëro pan icanqueri Tosorintsi:

—Pabati, aronega nacarasiaquemiro oca perintsica.

Irootita inetsaiguëri pitotsiberi aisa soraro omagaro, itibatsaaguequero pan Paboro yapëro. ³⁶ Icaninasëretaguë antagaisati, cara yapaiguë. ³⁷ Aintajeguina naro pitotsiquë nacarataiguë 276. ³⁸ Aroque yapaiguë iqumemaigaca, ijocaguëro tirigo aisa antagaisati ora pamapë pitotsi irooti cara opoongatanë pitotsi.

³⁹ Oquëtaguetanë iniaiguëro quibatsi ora te irogóguero. Aiti potsitiataca nija aisati oparaguëti. Aro icgabetaigaca iriátaquerome pitotsi cara oparaguequë. ⁴⁰ Aro ijocaguëro ágomentotsi angaarequë. Itsaicotaiguëro sogatsa aguëshotiro ogomaro, itinaiguëro tocoya, naquenocotabetaigaca aiquero oparaguequë. Posibiquero pitotsi coguentima. ⁴¹ Aro naquenocotabetaigaca aganguijaquë picorianganë pitotsi omaniquiquë ora te ongonijate. Oquëshotasantapë pitotsi omaniquiquë te osebataima. Omotoncaatasantanaca oparintaca picaraaguëtanë pitotsi cara otioguiquë. ⁴² Icgabetaigaca soraro iróguirime ira iromingaga arota quero imatanë irisigaigaima. ⁴³ Irari igapitante te iranintacaguiri iróguiri. Icoque iragabisaicoqueri Paboro. Igátaiguëri icanque:

—Irobotanë ira ogótatsi imati irooti quibatsiquë. ⁴⁴ Obiro basini pinguenantaiguëmaro anchabata aisa pairoraca asi pitotsi.

Aro antagaisati yaretaigaca caninasati quibatsiquë.

28

Itimaque Paboro Márataguë.

¹ Aroque nabisaicoigai cara icomantaigabaquina ora oboguesi ojita Márata.

² Icantaneintëgotaguëna Máratasati. Yágaigabaquina yogamataigabaquina tsitsi icaimaiguëna arota notataigapë opariaquetinta angani ocatsingaguetë aisati. ³ Aro Paboro yágaguepë anchaime ijoquero tsitsiquë. Cara ocatsiringaguitetanë isotocanë marangue itsiaqueri Paboro përosati cara inëri ibacoquë. ⁴ Cara iniaqueri Máratasati ira marangue itsiaqueri përosati, aro icantobaca:

—Irirojengari ógueri. Tenta irojogatima angaarequë, quero inintacaguiri Tosorintsi itimi.

⁵ Carari ipotetëri Paboro tsitsiquë, te irapanireima. ⁶ Inetsaigabaqueri Máratasati ipaniguiabecari cara irapanirianëmame queroca iriguito imariganëme ingamaque. Tojai ipaniguiabecari te irapanireima arosata, aro iquengaigaca aisati icantobagaigaca:

—Irirojenga Tosorintsi tetsi irapanireimatsi.

⁷ Aronisati pinë iguebatsite itingomi Máratasati. Iriro jítacha Póborio ira ágaigabaquina caninasati ipabaquina noperi maba catagüiteri. ⁸ Inariasega iriri Póborio irisomamintoquë. Ijanaitapinintü aisati póguëri arantseinga. Yotsitipari Paboro, yamanocopëri Tosorintsi, yotsagapëri yoguibegajiri. ⁹ Iquemocotaiguëro oca, ipocasitaiguëri Paboro antagaisati basini janaitaguetatsiri. Yoguibegajiri omagaro. ¹⁰ Iniacaninataiguënanata Máratasati ipaguetaiguëna tojai. Cara niáigai ipaguetobaina pairorapageraca ora nocoguitiaca.

¹¹ Yabisanaque maba manchacori notetaigaca basiniquë pitotsi opaniaca Arijan-tiriraquë. Iroro, aito pogabisëro tsaenga cara oboguesiquë. Ira pitotsiberi yobetsiquëri pite ibabane otsobaquë pitotsi, icantacacari iribogagane jitaigacha Cásitori aisa Pórosi.

¹² Naquenocotaigapë poeboroquë jítacha Siracosa. Canta natimaiguë maba catagüiteri.

¹³ Aique naquenaiguè onamijaquè naretaigacaro poeboro jitacha Irejio. Oquètaguetanè ocoguintimapè oquenopè toonquè, posibitaiguèna pite cataguiteri irooti Posoriquè.

¹⁴ Canta, naniopèri quemisantatsiri icogaiguè nantiomotaigapèri poro tominco. Aique nogagaiganaca cara naretaiguèma Iromaquè. ¹⁵ Aroqueque iquemocotaiguèna quemisantatsiri Iromasati, ipocasitaiguèna itonguibotobèna poeboroquè jitacha Joroápio. Aisati ipocasitaiguèna basini nopiguemisantane poeboroquè ojita Maba Pongotsi. Cara iniochèri Paboro icarasiaqueri Tosorintsi icaninasèretanè. ¹⁶ Canta Iromaquè inintacaqueri Paboro intimopè casiriconiati pongotsiquè. Itsibatacari paniro soraro ira omisantiri.

Itimaque Paboro Iromaquè.

¹⁷ Ocarati maba cataguiteri icaimagantèri Paboro ira obatatsi jorío. Cara yapatoica icabèri:

—Nomatsiguenga, nongomantaiguèmini cara te nangantaguetomotaigueri omatsiguenga, teatisati nojoquiro ora yametaiga omatsiguengajegui jirai. ¹⁸ Irari jorío ágaiguèna Jerosarénquè, ijogatètanènarai Iromasati icanqueri: “Póguii ica”. Yosamitaiguèna itingomipague, te nangante pairoraca ora te onganinate irógobiquina. Aro icogaiguè iromisotocajina ¹⁹ carari ipégatsaquina joríojegui. Iroto nabentagüecari Sésar. Te nongomantègotagueri nomatsiguenga pairoraca. ²⁰ Iroto nacaimobiquimi obirojegui yaca naniobèmi aisati nanibatobèmi. Naquemisantiro ora icantái Tosorintsi jirai cara iriboquè Agabisaicoontatsiri aisa intinaajiri igamaga iraganiatairi. Yamai nocomantèmi aroque yareca Quirisito, icamaque icaniatanai. Iroto yoguèshotataguèquinario oca sogatsa coshotsari.

²¹ Yotabitaigapèri:

—Teni nágobè sanguenari isanguenatoçoitèmi canta Joreaquè, teatisati iraretima poro nomatsiguenga ingomantègotèmi. ²² Carari nocogaigui pingomantasantaiguenaro ora piquianca, nigótinta omagaroquè poeboro iguisaneintiri ira quemisantiri Quirisito.

²³ Iquengaigacaro cataguiteri, aro ipocasitaiguèri tojai jorío ibangoquè Paboro. Icomantaigabaqueri ora iragáantane Tosorintsi. Coniamaniquè irooti tsitiniriquè Paboro icomantègotèri Jesus. Icoque irogótasanotaguii ora isanguenatocoqueri Moisés Ira Jesus, aisa ora isanguenatoctoiguèri comantantatsiri. ²⁴ Ainta ira quemisanquero irinibare Paboro. Ainta basini ira tsoenguèri te inguemisantiri. ²⁵ Tenta inguengaiguèma, teraiquerai iriáigae, icanqueri Paboro:

—Caninasati ocanque Isère Caninaro Tosorintsi ocomantaqueri Isaías comantantatsiri cara isanguenataiguèneri nomatsiguenga jirai, ²⁶ ocanqueri:

Pijáte joriojeguiquè pomatsiguenga pingomantiri: “Pinguemabetaiguemaro Nanibare, carari quero piquemobèro. Piniabequimaro ora noniagaguèmira, carari quero pigóiguiro ora nocomantabitaiguèmi”. ²⁷ Tenta inguengasèretima ica matsiguengaca, te inguemaigue, te iranee tenta iranintiro. Yamatsibocasèretasitaca arota quero igóitiri ora icanti Tosorintsi catingaro, quero iquemiro, quero iquenguero isèrequè, quero ipasiniatitaji, quero nogabisaicotajiri Naro.

—Aroque ocanque Isère Tosorintsi isanguenarequè Isaías. ²⁸ Pigóigue yamai, igáqueri Tosorintsi quemisantatsiri iriátaiguè basiniatiquè matsiguenga ira cagari jorío. Inguemisanqueri Tosorintsi, aro iragabisaicotaguèri iriro.

²⁹ Itsonquero irinibare Paboro. Aro isotocaiganaji joriojegui, pèrosati inibatobagaigaca.

³⁰ Ocarati pite osarini itimanè Paboro pongotsiquè ipènabentiro. Canta, yágacatinatiri antagaisati ira bocasitaiguèri. ³¹ Iquenguitsatocotaigabaquero iragáantane Tosorintsi. Aisati yogomeantè Paboro iquenguitsatocoquero ora iraisati Jesoquirisito Atingomi. Te irine ira pégatsatimarine. *Irocas*

PABORO ISANGUENAQUINERI IROMASATI

Paboro ibetsataigari quemisantatsiri cara Iromaquë.

¹ ¿Aintajeguibi nopiguemisantane canta Iromaquë? Naro Paboro nasanguenataiguëmiro oca. Icoiguëna Jesoquisisito igáquena nangantineri ora icocaquena cara nongomantagueiguëri matsiguenga ora Caninaro Nibarintsi ati icanta cara yogabisaicoonti Tosorintsi. ² Jirai Tosorintsi isanguenatacagaiguëri ira comantantatsiri ³ cara icomantëgotaguëri Itomi, Ira paniacha Jonogaguetequë imatsiguengatasantapë, imatsiguengatapar David. ⁴ Ipoque Jesoquisisito yaca quibatsica, yogamagaigabaqueri matsiguenga carari yoganiatairi Tosorintsi itasongasantëri. Quirisito yoniagaigapari matsiguenga cara aisonori Iriro Itomisonori Tosorintsi. Yasintasantacái, iroso antingomintasantaguëquimari. ⁵ Naquemisanquerinta, icábintsëna igáquina nanguemisantacaqueri omagaro basiniati matsiguenga ira cagari jorío. ⁶ Aisati obirojegui icaimaiguëmi icoiguëmi pintingomintimari Jesoquisisito. ⁷ Nasanguenataiguëmi Iromasati quemisantatsiri cara tojai inintaiguëmi Pabati Tosorintsi, yoganinasëretëmi. Nocogui përosati ingábintsasanti aisati iromagoriasëretaguëmi arota caninasati pintimaigue. Ingantaiguemirota Tosorintsi aisati Atingomi Jesoquisisito.

Ininti Paboro iriáte iraniaiguëri Iromasati.

⁸ Yamai nongomantëmi cara atraca najátagueque naquemocotopiantaiguëmi cara piquemisantasanotaiguë. Iquemocotaiguëmi omagaroguitequë. Aroquenta piquemisanqueri Jesoquisisito obiro aisati, iroso nacarasiabiriquimi Tosorintsiquë. ⁹ Igóque Tosorintsi cara pairoraca icocaquina, nocogasanti nanganquineri omagaro. Aisati nocogui nomitocotiri antagaisati matsiguenga; përosati cara nocomantëgotëri Quirisito, naquenguitsatomotaiguëri matsiguenga atraca icanta cara yogabisaicoonti Jesus. Përosati naquengauëmi ¹⁰ namanocotaiguëmini. Aisati namaniri: “Pabati, pinintacaguina naretimari naniaiguëri Iromasati”. ¹¹ Tojai naquengauëmi, naninti naniaiguëmi aisati nogomequimiro ora pogomequina naro Isëre Tosorintsi. Nocogui nomitocotaiguëmi aiquero pinguemisantasantanëri Atingomi. ¹² Aisati cara aniobaguimaca anguemisantantë, aro aganinasëretobaquima. ¹³ Naninti pigóigue, nopiguemisantane, tojai nocogabeca najátasitaiguemime, carari te iranintacaguina Tosorintsi. Nocogui nomitocotaiguëmi aisa ocaanta nomitocotaiguëri tojai basini matsiguenga ira cagari jorío. ¹⁴ Aroquenta icábintsëna Tosorintsi aisati icoiguëna, quero nomagoriasëreti queroca nocomantaguetiri Guiresiasati aisati basini matsiguenga, ira ogótabetacha aisati ira te irogóte. ¿Teco naro igáque nanguenquitsatomotagueiguëri omagaro? ¹⁵ Iroso ora nocogasantaguëque nongomantaigapëmi cara Iromaquë aisati.

Icomantë Paboro paio iquenguisabiriquero Caninaro Nibarintsi.

¹⁶ Teni nopasiquitëmate nocomantaiguëri matsiguenga ora Caninaro Nibarintsi ati icanta cara yogabisaicoonti Quirisito. Iritosongobentiri Tosorintsi antagaisati ira quemisanquerine. Iritsita jorío iragabisaicoque Tosorintsi, carari yamai aitosati iragabisaicoqueri basiniati matsiguenga ira cagari jorío. ¹⁷ Pinetse, pairiraca quemisanquerine, iraniacaninatëri Tosorintsi, ira caninarisonori cara jirai isanguenatacacheri ira comantantatsiri jitacha Abacoc:

Tosorintsi iraniacaninatëri omagaro ira quemisanquerine, cantaca te ingantaguetëmatiro ora te onganinate, aisati intimacagajiri yaca quibatsica aisati caninasati intiomocotiri Jonogaguetequë.

Ira matsiguenga cagari jorío te irogóguëri Ira Tosorintsi.

¹⁸ Itimi Tosorintsi Jonogaguetequë, Iriro cantënguicha iguisacari omagaro ira te inguemisantiri carari përosati icantaguetiro quimingari, aisati te iraninte inguemisantiro ora aisonori ira irogóontëmari Tosorintsi, ora yoniagancari Iriro. ¹⁹ Aroca ingogaiguëri irogóguëri ati icanta Tosorintsi, te omomirintsiabitima irogóguëri aroquenta yoniagabitacari Tosorintsi. ²⁰ Te iraneingani Tosorintsi carari jiraisonori oconijaque antagaisati ora yobetsiquë Iriro, ora igóontaigacari eiro cara ainta Iriro aisati aiti itasorintsite. Oconijatomotaiguëri omagaro matsiguenga. Yamai quero pairi cantatsi tsoengatsiri: “Te nogótocotiri Tosorintsi”. ²¹ Jirai igóigabitacari, carari te iraninte inguemisantiri te intingomintimari. Tosorintsi icábintsapinintabecari carari te ingarasiataiguëri Iriro. Te inguengasëretaguëri: iquengasicaro pairoraca; yamai teni inguenguema catinasati. Itimaiguë tsitiniriquë icantaguetironta ora quimingari. ²² Icantaigabitaca: “Tojai nigóti naro”, carari te irogóte. ²³ Icaninatasanoti Tosorintsi

Ira timatsi Jonogaguitequë përosati, carari te intingomintimari matsiguengajegui. Yobetsiquëri irosiacagomentopague yobaticagueritotasicari yamanocotasitari. Yosiacagantaiguëri sërari ira camatsi, aisati tsmiripague, basiniripague, aisati maranguepague. Yamanocotasitari itingomintasicari iroonti ora yobetsicasitagueta, cagari Tosorintsisonori.

Tosorintsi icasitígataiguëri matsiguenga ira cagari jorio.

²⁴ Tojai icogaiguë matsiguenga iquenganeintapinintiro ora quimingari aisati icantague-tobagaigaca; iroro ora ijocaguëqueri Tosorintsi icanque: “Trineta. Iroonti inintaiguëro quimingari. Quero iquemina”. ²⁵ Jirai igótaigabitacari ati icanta Tosorintsi, carari yamato-bitagaca iriati, tenta iranintiri Tosorintsi; iquemisantasicaro tsoigagantsi. Itingomincari ira yobetsiquë Tosorintsi, yamanocotasitari, te intingomintimari Ira obetsiquëro omagaro. Intsome aniacaninatiri Tosorintsi përosati Irironta caninarisonori. ²⁶ Aro Tosorintsi inintacaqueri matsiguenga icantaguetaguë pairoraca icogaiguë. Te ongogue tsinanejegui águe ojime, iroonti ocoque opitsinanete. ²⁷ Aisa icanta sërarijegui: te ingogue irágue iina, iriati icogaiguë irapisërarite. Icantaguetobaca iroro pairorapagueraca quimingari, carari te irogógue iripasiguite. Aro itsipiriacagaiguëri Tosorintsi yamai. ²⁸ Tenta iranintaiguëri Ira Tosorintsi, ijocaiganaqueri te inguengaigairi. Aisa icanta ijocaiganaqueri iroro Tosorintsi icantocotaiguëri: “Jemita, irineta. Irantirota quimingaripague, querota iquengaa catinasati”. ²⁹ Icantaguetobaca iroro ora te onganinate. Iguisaneintaguëri Ira Tosorintsi, ipégatsatobaga, inintaigaca iriati, iquengasantaigabitaca caninari, inibatégotaigabitaca caninasati. Iquengaguetabecaro ingantagueti tojai basinipague ora te onganinate, te inguemisantaiguëri iriri casintari. ³¹ Tigueti ingantima irogóguero ora caninari, te ironomcarataiguëro irinibare, te iranintaiguëri imatsiguenga, teatisati ingantaneintégotaiguëri. ³² Igóigabitacaro ora icanque Tosorintsi: “Antagaisati icantaguetopiantiro ora te onganinate iriáguë cara Sharincabeniquë”, carari përosati icantaguetiro quimingari aisati intaqueri basinipague.

2

Teatisati iraganinatiri Tosorintsi joriojegui.

¹ Yamai aintajenga paniro cantatsi: “Icantaguetiro iroro ora te ongomeite. Teni inganinate”. Carari nongomantëmi: aisonori, aroca pingantocoqueri basinipague: “Aitiro picantaguetiro ora te onganinate”, aitisati ora picantagueti obiro. Aisa picantari ibega iroro: pigótabecaro caninaro carari te pingantiro. ² Igóiguë eiro caninasati ingasitígataiguëri Tosorintsi antagaisati ira cantaguetiro cagaro caninatatsi. Ingasitígatëri caninasati igóquerinta antagaisati iquianca matsiguenga aitosati omagaro ora icantagueti te ongomeite. ³ Carari obiro, picanque: “Ainta icantaguetiro iroro”, aisati picantari ibega iroro, pingantuetiro obiro ora te ongomeite. ¿Pijiqueca quero icasitígatimi obiro Tosorintsi? ⁴ Pinetse. Tojai icábintsasantaiguëmi Tosorintsi icantaneintégotaiganaquemi. Te iritsirisimi, yabequimi cara picantaguetiro quimingo. ¿Pomaintëro omagaro oca? ¿Te pigóte cosamani icogabeca Tosorintsi pinguengaiguema, pijocajiro ora te onganinate picantagueti, pingantima yacaqueroca? Pigótabecaro, carari te pingantiro. ⁵ Icaimasëretabequimi Tosorintsi, carari te pininte pinguemiri ora icanquemi, te pininte pomasiniatitima pingantima yacaqueroca. Aiquero piáque picantaguetopiantëro ora cagaro caninatatsi, irooti cataguteriquë cara ingomantégotëmi Tosorintsi ingasitígatëmi. Irironta caninari, quero iguisasitari matsiguenga. Igóque atraca icantaiga omagaro. ⁶ Ingasitígataiguëri antagaisati ira cantaguetiro ora te ongomeite; aisati iragasobiaqueri Jonogaguitequë omagaro ira cantiro caninari. ⁷ Pairiraca inganque caninasati aisati ingoquero omagaro ingocaqueri Tosorintsi, aisati ingoque cara antagaisati matsiguenga iraniacaninataiguëri Ira Tosorintsi, aro Tosorintsi intimacagajiri, iraganiasëretëri yamai aisati imëri iroro cara përosati intiomuqueri Jonogaguitequë. ⁸ Carari pairiraca nintasantacha iriati, icoque irobotacaguima, te iraninte ingantiro ora icocaqueri Tosorintsi, icogasita ingantaguetiro ora quimingari; aro inguisasantëri iroro Tosorintsi ingasitígatëri. ⁹ Iratsipiriacagaiguëri omagaro pairiraca cantaguetiro ora te onganinate, jemita iriroca jorio, iriroca basiniati matsiguenga cagari jorio. Aisa icantobaga iniaiguëri Tosorintsi. ¹⁰ Irari cantatsi caninasati, Tosorintsi iromagoriasëretaqueiri, iraniacaninatëri, imëri cara iraniaqueiri Tosorintsi jonoguë. Imëri pairiraca, iritsita jorio, aique ira cagari jorio. ¹¹ Catingasatiquë Tosorintsi imoncaratobaca omagaro matsiguenga te imasiniatitobaguëmatima. Iniaiguëri aisa icantaiga.

Tosorintsi igótaqueri ira cagari jorio.

¹² Ira cagari jorío te irogótiro isanguenare Moisés, carari aitiro icantaguetiro ora te onganinate, iriatê Sharincabeniquê. Quero icantiri iriro Tosorintsi: “¿Pairo te pinguemisan-tobitiro isanguenare Moisés?” tenta irogótiro. Carari ira ogótabecaro isanguenare ainiro icantagueti, aisati iriatê Sharincabeniquê. Iratsipiriasantaqueri Tosorintsi, inganqueri: “Pigótabecaro isanguenare Moisés Iroonti Nasi Nanibare, carari te pinguemisantiro”. ¹³ Te iraniacananatasitimari Tosorintsi ira quemasitaigabitêmarone isanguenare Moisés, irianti iniacaninatasantê ira quemisantasantêro Irinibare. Iniacaninatêri cantaca te ingan-taguetêmate ora te onganinate. ¹⁴ Pinetseri iraegui cagari jorío, ati icantaiga. Te irogótiro Sanguenari carari aitipague imoncaraquero ora ocanti Sanguenari. Igónijintabecaro cara itimaiguica caninasati. ¹⁵ Aroca inganque caninasati, pigótocoqueri cara igónijintabecaro iriro ora ocanti Sanguenari. Te iraneiro Sanguenari carari yamai igósêreca aroca inganque caninasati aisati igósêreca aroca ingantaguequero ora te ongomeite. ¹⁶ Aiquenta Tosorintsi inganqueri Jesoquisrito: “Aroquenta pigótocotaiguêri atraca ocanta ora icantagueti omagaro matsiguenga, aisati pigótiri ora iquengaigaca, aro Obironta joes pingomantêgotiri negaraca iriáiguê aisati pairoraca ingantaiguê. Pingantocotiri aroca aniacaninatêri, aisati aroca atsipiriacakeri”. Irootisati nocomantanti naro: cara ingomantêgotaguetiri matsiguengajegui Jesoquisrito, iragabisaicotajiri ira quemisantiri, aisati ingasitigatêri tsoengatsiri.

Igótaigabitaro joríojegui isanguenare Moisés: aroca ingantaguetiro ora te onganinate, ingasitigatasantêri iriro Tosorintsi.

¹⁷ Carari obiroca jorío, pigamema. Picanque: “Nigótiro naro isanguenare Moisés. Naronta jorío iniacaninatasantina Tosorintsi”. Pinibatasita, piniacaninatasitaca obiati. ¹⁸ Pigóiguêro ora icocagaiguêmi Tosorintsi. Jirai yogometaiguêmiro isanguenarequê Moisés, iroro yamai pigóontacaro caninaripague. ¹⁹ Pijitasitaiga pigótacagaiguêri iraegui te irogóigue. Aisa ocantabeta posangueguitetocoquerime ira timatsi tsitiniriquê terainta irogótocotiri Tosorintsi. ²⁰ Pigótacagaiguêrime ira te irogóigue, aisa ocantabeta pogome-querime janequipague. Aisonori pigótaigabitacaro isanguenare Moisés, pijitasitaigacaro pogomequimiro caninasati ora aisonori. ²¹ Pinetse. Pogometaiguêri basini, carari ¿Pairo te pigóbirite obiro? ¿Teco onganinate pogometima obiati? Picomantaguetagabitari basini: “Quero picositanti”. ¿Teco pingosite obiro? ²² Picantaigabitari: “Quero paguimintaro pijina”, carari ¿Teco paguimintimaro pasi pijina? Pomaintêri ibabane basiniatsi matsiguenga, picantabeca: “Quero pamanocotiri ira yobetsicasita; quero pijitosorintsisatitari”. Carari ¿Teco pingositiri ibabane ira cagari jorío, pomimantêri basini? ²³ Pijica caninaribi, picantasiabeca: “Nigótiro naro Irinibare Tosorintsi”. Carari te pomoncaratiro ora ocantimi. ¿Teco pitsoingui Tosorintsi? ²⁴ Isanguenaque jirai: Obirojegui jorío, aroquenta te pinguemisantasantiri Tosorintsi, iniaiguêmi matsiguenga ira cagari jorío, icantocotaguetasitari Tosorintsi icantaiguê: “Teni inganinate Itosorintsite jorío, quero naquemisantiri tenta naninte aisa nanganquimari ibegaiga jorío”.

Ati icanta ira quemisantsiri.

²⁵ Aroca piquemisantiro isanguenare Moisés, aro caninataque pitotima aisati ora irogóntêmi matsiguenga cara obiro jorío, obiro irasi Tosorintsi. Carari teca pinguemisan-tiro, teatisati onganinate pitotima. Pinganquimari ibega ira cagari jorío te iritotima. ²⁶ Aroca inguemisano Sanguenari ira cagari jorío, ¿Teco iraniacananatiri Tosorintsi? Icancari jorío, irironta quemisantsiri. ²⁷ Ira te iritotima, te iraneiro isanguenare Moisés, carari canquero ora ocanti Sanguenari, ¿Teco onganinate irobatimi, ingomantêgotimi obiro jorío pigótabecaro Sanguenari carari te pinguemisantiro? ²⁸ ¿Ati icanta joríosonorio? ¿Pari aganinatêri Tosorintsi? ¿Ji-roco totantatsiri? Teni. ²⁹ Irianti joríosonorio quemisantiri Tosorintsi, iquenganeintêri Iriro. Tosorintsi te iraniacananabitiriri aroquenta itoca, irianti iniacaninatê aroquenta iquemisanqueri. Iniacaninatêri Tosorintsi, jemita quero iniacaninatiri matsiguenga.

3

Omagaro matsiguenga icantaguetomotiri Tosorintsi.

¹ Obirojengari cantatsi: “¿Natsipiriasitaco cara naro jorío? ¿Pairo ocaninatobiti cara notota?” Te pitsipiriasitimaro cara pijoriotê. ² Jirai Tosorintsi ipaiguêri joríojegui Irinibare arota irotsatengaiganauineri omagaro matsiguenga. ³ Aisonori te inguemisantaigue antagaisati jorío, aiantanta tsoengui Tosorintsi. Tenta ironijaguimari caninari jorío, ¿Aroco iromatobiqueri quemisantiri Tosorintsi? ⁴ Quero. Quero yamatobitiri. Aroca iromatobiantaiguê omagaro matsiguenga, carari quero icanta Tosorintsi yamatobiantêmati. Jirai isanguenaque David; icanqueri Tosorintsi:

Catingarisonori Pinibare; teni pintsoiguema. Te pairi pëgatsatimine.

⁵ Aintaca jorío cantatsi: “Carari aroca nangantaiguëro te ongomeite, iraniaquina matsiguenga, irogótiri Tosorintsi caninari tenta ingantina nibega naro. ¿Teco onganinate cara nangantaguetomotiri arota iraniacaninataiguëri Tosorintsi matsiguenga? ¿Iroroco inguis-abiriquina Tosorintsi cara nacantaguetomotiri naro?” Inibati cantaca sërari ira te irogótiri Tosorintsi. ⁶ Oca tesonori onganinate irinibatiro matsiguenga. Quero yamatobitiri Tosorintsi; catingasati icanque cara ira cantaguetiro ora te ongomeite iriátê Sharincabeniquê. ⁷ Pinetse. ¿Onganinatêco cara nontsoiguema arome nogótacaquerime matsiguenga te intoiguema Tosorintsi, aique intingomintaiguëmari matsiguenga? Tesonori ongomeite. Aique ¿Pairo inguisabiriquina Tosorintsi cara nontsoiguëgotëmari? ⁸ ¿Onganinatêco nangantaguetirome ora te onganinate arota inganinatantimarome Tosorintsi? Tesonori, quero nacantiro. Caninataque Tosorintsi iragátiri Sharincabeniquê ira cantaguetasitaro oca, inibatasita cantacha nega. Carari ainta cantêgotasitina: “Yogometiri matsiguenga Paboro cara caninataque ingantaguetiro cagaro caninatatsi”. Itsoigani iriro.

⁹ ¿Aroco caninataque inganque jorío: “Naroegui jorío. Caninarina naroequi, carari te inganinate iraegui basiniati matsiguenga”? Te onganinate irinibatiro ingantiro negaca. Aroque yoniagaigacái Tosorintsi cara imoncaratobaca omagaro, antagaisatinta icantaguetiro ora te ongomeite, jorío aisati basiniati matsiguenga ira cagari jorío. ¹⁰ Aronta ocanti Sanguenari jirai:

Teni pairi caninatatsine, tesonori irine poro. ¹¹ Teni irine ogótirone ora icocaqueri Tosorintsi, teatisati irine cogatsi irogótiri Tosorintsi. ¹² Omagaro ijocanëro irabo Tosorintsi, te ingantëmatriro ora icocaqueri. Teni irinëmatriro poro cantirone caninari. ¹³ Cara isititi igamaga, aisa onganquima osotocanê irinibare quimingatsaro cara ibagantequê. Tojai yamatobianti, itsoiguëgotagacari imatsiguengapague, iroro yamasiantaguêcari. ¹⁴ Tojai iguisatsatapinintaiguëri imatsiguengajegui. ¹⁵ Iriro ógueri. Omanapague irógasiquimari matsiguenga. ¹⁶ Negaraca iriátagueque itspiriacaqueri basini. ¹⁷ Teni irogótëmatriro ingantaneintëgotiri matsiguenga, teatisati irogóte intime caninasati. ¹⁸ Teni intsoroguematriro Tosorintsi, teni inguemisantëmatriro.

Iroro ora isanguenatacaqueri Tosorintsi jirai.

¹⁹ Yamai igóiguê eiro cara pairiraca ogótabecaro isanguenare Moisés aisati igótabeca ora icocagabecari Tosorintsi, quero icantiro: “Teni nogótiro”. Tenta ingantiro caninari, Tosorintsi ingasitígataiguëri iratsipiriacaiguëri antagaisati ira cantaguetiro ora te onganinate. ²⁰ Quero icanti poro pairiraca: “Nacanquero omagaro ora ocanti iragántane Tosorintsi yamai iniacaninatêna”. Teni ingantëmatriro negaca. Ora Sanguenari patiro ogótacacái cara acantaguetomotiri Tosorintsi omagaro eiro ora cagaro caninatatsi.

Tosorintsi yogabisaicotajiri antagaisati quemisantaiguëri Quirisito.

²¹ Ora isanguenare Moisés te omitocotá, te oganinatái, carari yamai yoniagaigacáiro Tosorintsi ati angantima iraniacaninatacái cantaca te angantaguetiro pairoraca ora te onganinate. Irootisati icomantaiguê Moisés aisati comantantsiri. ²² Icomantacái yamai cara aquemisanqueri Jesoquisito, iniacaninatacái Tosorintsi, jorío aisati ira cagari jorío. Iniaigacái Tosorintsi omoncaratobaca antagaisati ²³ aitironta acantaguetomotiri Tosorintsi ora te onganinate, jorío aisati ira cagari jorío. Te pairi cantirone ora caninaro icocagabecái Tosorintsi. ²⁴ Cara aquemisanqueri Jesoquisito Ira camobicái, icábintsacái Tosorintsi yogabisaicotajái, iniacaninatacái cantaca te angantaguetëmatriro pairoraca ora te onganinate. Tojai icábintsasantacái Tosorintsi, te ingoicotái pairoraca cara ijocajáiro ora acantagueti te onganinate, quero iquengairo aisati. ²⁵⁻²⁶ Igáqueri Itomi, icamobicái iraabiritanacái, Yamai cara aquemisanqueri, aroque moncaraca, ijocajáiro ora acantaguetomotiri, isetajáiro, iniacaninatacái Tosorintsi cantaca te angantaguetëmatriro quimingari, quero iquengairo aisati. Aitosati jirai, teraiquerai iriboque Jesus yaca quibatsica, te ingasitígataiguëri quemisantatsiri Tosorintsi igóquenta cara aique ingambobitaiguëri matsiguengajegui Quirisito. Iroro igóigaguêê eiro cara icaninatasanoti Tosorintsi jirai aisati përosati, aitosati iniacaninataiguëri omagaro quemisantaiguëri Jesoquisito.

Te pairi agabisaicotachane.

²⁷ Yamai teni angantima aguibatima tenta pairi agabisaicotachane iriati. ¿Pairo te angantobitiro eiro? Irianti quemisantatsiri yoganinasëretêri Tosorintsi, yogabisaicotajiri. ²⁸ Iroro igóigaguêê cara aquemisanqueri, yoganinasëretacái Tosorintsi. Te ingante: “Pomoncaratiro isanguenare Moisés, ora pabisaicoontaima”. ²⁹ ¿Paniroco yogabisaicoitaigari jorío Tosorintsi? ¿Teco aisa iragabisaicoitaigari basiniati matsiguenga ira cagari jorío aitosati? ³⁰ Ainta paniro Tosorintsi, icábintaiguëri antagaisati omagaronta imoncaratobaca. Cara inguemisanquerica Quirisito jorío, iragabisaicoqueri Tosorintsi; aisati ira cagari jorío cara inguemisanque, iragabisaicoqueri, iraniacaninatêri cantaca te ingantaguetëmatriro ora te

onganinate. ³¹ Cara aquemisanqueri Jesoquirisito, ¿Onganinatëco ojocanëro isanguenare Moisés? Teni, quero ojoquiro. Cara aquemisanqueri, omoncaraquero ora ocanque Sanguenari.

4

Iniacaninatëri Abaram Tosorintsi.

¹ Pigótocoiguëri Abaram ira jorío tímatsi jirai, ati icanta. Yamai nongomantaiguëmi: ² te iragabisaicotima iriati. Arome iragabisaicoquimame iriati, inganquima iraguibatimame inganqueme: “Tojai nacininati; nogabisaicotaja”. Carari te iragabisaicotima, iroero te ongomeitaguëte iraguibatima catinasatiquë Tosorintsi. ³ Pigóiguë ora ocanti Sanguenari: Isëretacari Tosorintsi Abaram iquemisanqueri, iroero iniacaninataguëqueri Tosorintsi, cantaca te ingantaguëmate ora te onganinate.

⁴ Nosiacagantëmiro: aintaca sërari isiabaguitëneri ibatorote, ¿Teco caninataque iripë nabintiri? Te onganinate ingantiri: “Jerica quirequi nomasitëmiri”, aroquenta itarobacaquineri irebetëri. ⁵ Queroca icantiro sërari ora caninari, carari patiro iquemisanqueri Tosorintsi isëretacari, aro yoganinasëretëri Tosorintsi yogabisaicoqueri. Te iripë nabintima sërari arota iraniacaninatiri Tosorintsi cantaca te ingantaguëmate ora te onganinate. ⁶ Pinetse, te ingante pairoraca arota ingábintseri Tosorintsi, carari inganinasërete cara inguemisanqueri. Irootisati ora isanguenaque David jirai:

⁷ Yoganinasëretaguëri omagaro matsiguenga icábintsaiguë Tosorintsi, ijocajineri ora icantaguëti te onganinate, yomaguisanquineri. ⁸ Aisonori icaninasëretë sërari cara Tosorintsi quero iguisabiritiri ora icantaguëti quimingari, querootisati iquengairo.

⁹ Aro ¿Pairi isanguenatocque David, ira totacha, iraco te iritotima; ira jorío, iraco cagari jorío? Icomantëgotaguëri antagaisati. Yamai nagatsitairo ora pigóiguë: iquemisanqueri Tosorintsi Abaram, iroero iniacaninataguëqueri cantaca te ingantaguëmate ora te onganinate. ¹⁰ Carari ¿Ati ocanta cara yoganinatëri Abaram Tosorintsi? ¿Cara aroque itoca, caraco terai iritotima? Iniacaninatëri cara terai iritotima. ¹¹ Tosorintsi iniaqueri Abaram caninari, aique icanqueri iritotëma, irogóontimari matsiguenga cara Abaram iritsita quemisanquenguitsi, aro yoganinatëri iriro Tosorintsi. Yamai pairiraca te iritotima carari iquemisanqueri Tosorintsi yoganinatëri aisati, iriro yosigari itomi Abaram, iniacaninatëri cara terai iritotima. Iroonti iquemisanqueri Tosorintsi. ¹² Iraegui jorío quemisantatsiri aisati inganquimari ibega Abaram. Quero ijiti aroca iritotëma, aro iragabisaicoquima; iroonti caninatatsi inguemisante, aro iragabisaicotajiri Tosorintsi. Inganquimari Abaram, iquemisanque, yogabisaicoqueri cara terai iritotima.

Ora icanqueri Abaram Tosorintsi.

¹³ Cara iquemisanque Abaram, aro iniacaninatëri Tosorintsi. Aique icanqueri iriro aisati imatsiguenga: “Nococaquemi aiquenta pigáantaiguëri antagaisati quibatsisati. Nomëmi obi ro nagáantane aisati ira quemisantaiguëna cantaguëbi obi ro cara piquemisanquina”. ¿Pairi icantobiquero oca? ¿Imoncaraqueroco Abaram isanguenare Moisés? Teni, terainta ine isanguenare. Tosorintsi icanqueri negaca aroquenta iquemisanqueri Abaram, isëretacari. ¹⁴ Aroca Tosorintsi imaiguëri ime iragáantane ira cogabitacha iromoncaratimarome isanguenare Moisés, aroque yamatobiqueri Abaram cara imëri cara inguemisanque. ¹⁵ Tosorintsi ingasitigataiguëri omagaro ira ogótabecaro isanguenare Moisés carari te iromoncaratiro, inguisaiguëri. Iroero cantënguicha te irogócotiro isanguenare, iroero te inguisagaguëtiri Tosorintsi. ¹⁶ Iroero yogabisaicotaguëtajiri Tosorintsi omagaro ira quemisantiri aisa icantari ibega Abaram cara iquemisanque iriro. Aro icábintsaiguëri antagaisati quemisantatsiri, jorío aisati ira cagari jorío, imoncaraquero Tosorintsi ora icanque. Yamai Abaram cantaca iriri omagaro quemisantatsiri. ¹⁷ Jirai isanguenataqueri comantantsiri Tosorintsi, icanqueri:

Abaram, obitsita quemisanquina, aiquenta aisa ingantaiguëma pibega obi ro tojai basinipague matsiguenga cara inguemisanquina. Obi ro cantaguëbi iriri.

Ira Tosorintsi iniaiguëri antagaisati quemisantatsiri icantaigari Abaram. Tosorintsi timagantatsiri yoganiatari camabitachari aisati inaaquero omagaro ora terai ine.

¹⁸⁻²⁰ Igóto cocoa Abaram aroque intiasiparitanë, pëni baque ingamaque aroquenta yogabisë osarini ocarati 100. Aisati igóquero Sara ina cara sirabaro. Te irinëmate itomi, carari icomantëri Tosorintsi:

Intojaiganaque pomatsiguengasonori.

Aro te iritsoenguiri Tosorintsi; iroonti iquianquero ora icanqueri, igóque Abaram aisonori ora icanque Tosorintsi, iromoncaraquero omagaro. Teraiquerai irine imatsiguenga, icaninabenqueri Tosorintsi, iquemisanqueri, icanque: “Icaninatasanoti Tosorintsi”. ²¹ Igóque Abaram cara itasorintsitasanoti Tosorintsi, te omomirintsitomotiri iromoncaratiro ora

icanqueri. Igóque cara iromoncaraquero. ²² Aroquenta iquemisanque Abaram, iniacaninatèri Tosorintsi. ²³⁻²⁴ Isanguenague cara iniacaninatèri Abaram, carari irootisati icantaigacái eiro yamai: igóigüè eiro cara anguemisanqueri Tosorintsi, asèretimari, aro iraniacaninatacái cantaca te angantaguetèmatiro quimingari. Igóigüèri cara Tosorintsi yoganiatairi Atingomi Jesoquirisito ²⁵ Ira camobicái aroquenta acantaguetomoqueri ora te onganinate, ipè nabencáiro, yágabitsacáiro. Aro yoganiatairi Tosorintsi iroso igóontacari aisonori iniacaninatacái yágacaninatacái, teni inguisaigái yamai.

5

Iniacaninatacái Tosorintsi, aro igóigüè eiro pèrosati antimaque Jonogaguetequè.

¹ Aroque icamobicái Atingomi Jesoquirisito, icaniatanai. Cara aquemisanqueri ágobèri, aro yogabisaicotajái. Yamai iniacaninatacái Tosorintsi cantaca te angantaguetèmatiro ora te onganinate. Jirai ipègataigacari Tosorintsi, yamai te anguisabacagajima. Yágacaninatacái Iroso. ² Aquemisanqueri Jesoquirisito, aro igótacacáiri Tosorintsi icábintsasantacái pèrosati. Tojai acaninabenqueri, igóigüè eiro aiquenta aniaigüèri ati icanta Iroso aisati imasinitatájái aisa ibega Iroso. ³ Aroca atsipiriaigüè pairoraca, anganinabenqueri Tosorintsi. Igóigüè eiro aroca iratsipiriacaái matsiguenga, iromitococái Tosorintsi abequero arota quero abenta. ⁴ Aroca igóigüè iromitococái Tosorintsi abequero, aro anganineri omagaro ora icocacái. Aroca anganque ora icocacái, angungüero ora icancái, aisati igóigüè cara iromoncaraquero Irinibare, quero yamatobitái, ⁵ aisati ipacáiro Isère pinasèrecái pigótacacái tojai inintasantacái Tosorintsi. Quero yogasèretacagái. Aro acaninabenqueri. ⁶ Jirai tigueti angantima agabisaicotima eiroegui, tenta ine asintsire. Aique omoncaraca cara igáqueri Itomi Tosorintsi; ipoque Quirisito icamobitaigüèri omagaro tsoengatsiri, ira pègacari. ⁷ Querojengari aneiri paniro ingamobiqueri basini caninatatsiri iragabisaicotajiri. Carari aintajenga ingamobiqueri caninatatsiri. ⁸ Carari iroontita te anganinate eiro, te anintiri, cara ipègatacari Tosorintsi, igáqueri Quirisito yaca icamobitaigacái. Aro yoniagaigacái icábintsasantacái, inintasantacái. ⁹ Piraatanè iraraa Quirisito cara icamobicái. Iroso yamai iniacaninatancái Tosorintsi, cantaca te angantaguetèmatiro ora te onganinate. Aiquenta inguisèri omagaro matsiguenga tsoengatsiri, ingasitigatèri Sharincabeniquè, carari iragabisaicotajái eiro quemisantatsiri quero iguisaái. ¹⁰ Jirai aguisabacaga eiro aisati Tosorintsi. Aique icamobicái Itomi, yamai te inguisaái Tosorintsi, ágacaninatobaca aroquenta aquemisanqueri Quirisito. Icaamaque, aisati icaniatanai, pèrosati cara itasongobencái, inibabencái cara quero opegaja. ¹¹ Yamai acaninabenqueri Tosorintsi aroquenta aquemisanquero Atingomi Jesoquirisito, iroso iniacaninatancái Tosorintsi imatsiguengatacái teni inguisaái.

Ora icanque Arán aisati ora icanque Jesoquirisito.

¹² Cara jiraisonori iparintacaro icantaguetiro ora te onganinate Arán, yoguiminasèretaca iriati, aisati yoguimingataigüèri antagaisati basini matsiguenga irasi yoguero icantagueti ora te onganinate aitosati. Icantagacari ibega Arán. Icaamaque Arán, aisati icantaigacari iroso basini matsiguenga irasi yoguero icamaguetagüè aroquenta icanquero ora te ongomeite. ¹³ Jirai te ine isanguenare Moisés. Icantagueti matsiguengajegui ora te onganinate, carari te irogótasantaigüe pairoraca icocaqueri Tosorintsi terainta imaugeri Irinibare. ¹⁴ Carari icamaigüè omagaro matsiguenga: Arán ira parintacaro, aisati antagaisati ira aguiataigüèri, irooti cara itimaque Moisés. Ora intè Arán iroso agamagaigüèri omagaro matsiguenga, te ogamaguiri ora icantagueti irosojegui. Ira Arán yosiacari Ira boquènguitsine aiquenta ¹⁵ carari inasitaca Iroso aisati. Airoo icantagueti Arán ora icamantaigaca tojai matsiguenga, carari icábintsasantaigüèri matsiguenga Tosorintsi te inguisaigari cara icantaguetiro ora te onganinate aroquenta ipoque Jesoquirisito Ira igáque Tosorintsi. ¹⁶⁻¹⁷ Ora patiro icanque quimingari Arán pogamagaigüèri tojai matsiguenga, carari ora icanque Quirisito poganiataigari tojai matsiguenga. Yamai Tosorintsi icábintsasantaigüèri tojai, teni ingueincotaigari ora icantaguetagui, iroonti iniacaninataigüèri omagaro quemisanqueri Quirisito. Yoganiasèretagüèri antagaisati quemisantatsiri, aisati intimacagaigüèri Jonogaguetequè pèrosati.

¹⁸ Patiro icantagueti Arán ora te ongomeite, irooti iáigüènime omagaro aiqero Sharincabeniquè. Carari ainta basini sèrari, Ira Quirisito, iroonti icantaguetiro caninaro. Iroso yoganinasèretaguetajái Iroso, yamai ajáigüè eiro Jonogaguetequè cara antiomotaigüèri pèrosati. ¹⁹ Jirai te inguemisantiri Tosorintsi Arán, iroso te anganinatantima yamai. Carari iquemisanqueri Irosi Quirisito, iroso yoganinatancái. ²⁰ Jirai Tosorintsi isanguenatacakeri Moisés arota irogóigüe matsiguenga te onganinate ora icantagueti tojai. Teni inganinataigüe, irianti quimingari, carari tojaisonori quemisantatsiri icábintsasantaigüèri

Tosorintsi. ²¹ Aro teni anganinataigue, irooti acamantaigaca, carari cara aquemisan-taiguèri Atingomi Jesoquirisito iroso icábintsantaguècáiro Tosorintsi yoganinatancáiro yoganiasèretacái. Yamai teni inguisaigaái cara acantagueti ora te ongomeite, pèrosati inti-macacái canta Jonogaguitequè.

6

Cara obaotisabiricari Quirisito, acantagari atsibatacarari cara icamaque itiaica icani-atanaí.

¹ ¿Pairo anganque yamai? ¿Angantaguequeco pairoraca ora te ongomeite arota ironi-jaguimaro Tosorintsi cara ingábintsasanoigapinincái? ² Tesonori. Quero ogatsitairo ora te onganinate. Iniaigacái Tosorintsi aisa acanta acamabeca, quero acantajiro aisati ora te onganinate. ¿Aroca angamobiquero ora te ongomeite, Atiromo angantimo angantopiantairo? ³ Cara aquemisanqueri Jesoquirisito aisati obaotisabiricari, aisa acanca atsibataigacarini cara icamaque. Iniaigacái Tosorintsi aisa acanca acamacaquerini, acamaque eiro cara icamaque Quirisito. ⁴ Aisa acanca acarataiguèrini cara itiaica, itiaica eiro aisati; cara icabiritanaa Quirisito aisa acanca acabiritanaani eiro aisati. Yamai inasitaiga aisa acancari ibega Jesus: icamaque, aique itasongasanotajiri Pabati Tosorintsi yoganiatairi. Yamai inasitanaa, te angantajima ibega jirai. ⁵ Aroca acantajiri ibega Quirisito cara icamobicái, aisa acanca itiacarari acaniatacaqueri aisati. Inasitanaa eiro. Te ingantajima Quirisito ibega jirai, aisati eiro te angantajima ibega jirai. ⁶ Jirai tojai ocogasantabitaca angaintetiro ora te onganinate, carari yamai aisa acanca atsibataigari Quirisito cara ipèicoca corosiquè icamaque. Iniaigacái Tosorintsi aisati acanca ipèicocani eiro acamaiguè aisati. ¿Pairo ocogobiti yamai agatsitairo ora te ongomeite? Jirai aisa acanca eiro ibega iratirize camagari, intacáiro quimingaripague. Carari yamai aisa acanca acamobiqueri, tiguèti ingantima iromerataái camagari aisati. ⁷ Pinguenguema. Cara ingamaque matsiguenga quero pairi meratajari aisati. Quero yogatsitairo ora quimingari icantagueti jirai. ⁸ Aroca iniaigacái Tosorintsi cara acamacaqueri Quirisito cara icamaque, igóiguè aisati iraganiatacái intamacacái Irroquè. ⁹ Igóiguè eiro cara icamaque Quirisito, icaniatanaí. Quero icamaji aisati, tiguèti ingantima ingamaje aisati. ¹⁰ Icamaque Jesus, icamobicáiro ora acantagueti cagaro caninatatsi. Aroque. Moncaraca. Quero icamaji aisati. Yamai itiomogueri Tosorintsi, coshoni yoguèri pèrosati. ¹¹ Yamai pinguenguema obirojegui, picanta picamasanoiguè quero pogatsitairo ora te onganinate picantagueti jirai; pinguenguema cara yoganiataigaimi aisati Jesoquirisito, pitimobiqueri Tosorintsi pigótirinta Irro.

Ati acanta te pinguemisantiro yamai cantaguetagantsi, carari pinguemisantiri Tosorintsi.

¹² ¿Teco cantauibi picamaqueni? Iroso yamai quero pinintacagajiro cantaguetagantsi cara ontaquemi ora picantagueti jirai. Quero piquengairo picantajiro ora picanti jirai. ¹³ Aisa picantabeca picamaque, yamai quero popabacaro obiati cantaguetagantsi, yamai quero pinintacagajiro ontaguimiro ora te onganinate. Carari aisa picanca yoganiatai-mini Tosorintsi pomemari Irro, pinintacaguiri irantacaguimiro pairoraca ora caninari icocaquemi Irro. ¹⁴ Quero pagobeimi cantaguetagantsi ora pameta jirai; tenta pomomir-itajimaro ora isanguenare Moisés, carari icábintsasanoiguèmi Tosorintsi, yosintsisèretèmi arota quero pagobeimi cantaguetagantsi. ¹⁵ ¿Pairo anganque yamai? Yamai tenta omomirintsitomotajái isanguenare Moisés, aisati igóiguènta tojai icábintsasanocái Tosorintsi, ¿Caninataqueco angantaguetiro pairoraca ocogui ora te onganinate? Querosonori. ¹⁶ ¿Pairoco pitingominquima? Aroca pomèmaro pitingominquimaro cantaguetagantsi, ogobeimi ontogopiantèmi ora quimingari, pijáque aiquero Sharincabeniquè. Carari aroca pomèmaro Tosorintsi pitingomintimari Irro, iraganinasèretèmi irantacaguimiro ora caninaro, pijáque Jonogaguitequè Irroquè. ¹⁷⁻¹⁸ Jirai pitingomintabecaro cantaguetagantsi; yamai pitingomincari Tosorintsi. Piquemisanquero omagaro yogometaguèmi Irro, iroso nacarasiataguèqueri yamai. Jirai picantopiantabitacaro ora cagaro caninatatsi; yamai picantopiantaiguèro ora caninatatsi.

¹⁹ Nongomantaiguèmiro ora pigóiguè, ora pinguemantèma. Aisa ocanta jirai popabacaro pitingomincaro cantaguetagantsi pagobeimi ontogopiantaquemi ora quimingaropague, caninataque yamai pomèmaro pitingomintimari Tosorintsi pingantopiantaiganaquero caninataguetatsiri, pinganinatasantaiguè. ²⁰ Jirai cara pitingomincaro cantaguetagantsi, picantaguetabecaro ora te onganinate, te pinintaigue pingantiro caninaro. ²¹ Carari yamai pipasiquiquero ora picantaguetabeca jirai. ¿Pairo páguè? Tesonori páguèmate. Picantaguetabecaro, pijáiguèntame aiquero Sharincabeniquè. ²² Carari yamai te pingantaigairo ora cagaro caninatatsi tenta ogabaiami yamai cantaguetagantsi. Yapabaquèacagajimiro

Tosorintsi, yamai pitingomincari Irriro. Yoganinasëretaiquëmi Irriro, imitocoiguëmi picantopiantiro ora caninaro, aisati yoganiataimi Irriro, përosati pintiomotaiguëri Jonogaguitequë. ²³ Jirai ora cantaguetagantsi ontacáiro quimingari angamaque ajáiguëme aiqvero Sharincabeniquë. Carari aquemisantaiguëri Jesoquirisito, atingomincari, icábintsacái Tosorintsi, yoganiasëretacái, ipasitaigacáiro cara antimaiguë Jonogaguitequë përosati.

7

Cara aquemisanti, te omerataigaái isanguenare Moisés.

¹ Yamai, nigótocotaiguëmi, nopiguemisantane, pigóiguërona isanguenare Moisés, aisati pigóiguë cara ingamaqueca matsiguenga, te ongantocotajiri isanguenare Moisés. ² Nosiacagantaiguëmiro oca: cara águë ojime tsinane, choshoni oguëmari irooti cara ingamaque. Te ongomeite ojocasitajimari. Carari cara ingamaqueca ojime, te ongantocotajiri ojime Sanguenari tenta irinaje. ³ Aintaca ojime, te onganinate aguimintimari. Aroca igamaque ojime, aro caninataque ágae basini ojime. Yamai te aguimintimari ojimetomaco. ⁴ Pigóiguë, nopiguemisantane, icamaque Quirisito: aisa picanca picarataiguëri cara picamaiguë obirojegui. Yamai quero ocanocotimi isanguenare Moisés aroquenta picamobiquero. Irooti yoganiataimi Tosorintsi arota pintsibatimari Quirisito Ira cabiritajacha, aisati arota pingantineri ora icocagaiguëmi Irriro. ⁵ Jirai atingomintaigacaro cantaguetagantsi, acantopiantaiguëro tojai pairoraca ora te onganinate ora icacocoque Tosorintsi: “Quero picantiro”. Cara icanque: “Quero picantiro”, aro tojai acantopiantaiguëro ora quimingaro, ajáiguëme aiqvero Sharincabeniquë. ⁶ Carari yamai aisa acanta acamobiquero isanguenare. Quero aquengairo ora icantaiguë jorio yametaigacaro irriro. Yamai teni angantopiantiro ora ocanti isanguenatineri jirai, irooti omitococái Isëre Tosorintsi acantopiantiro ora icocacái Tosorintsi.

Paboro icomantëgotëro isanguenare Moisés.

⁷ ¿Pairo nangantaiguëmi? ¿Oraco te onganinate isanguenare Moisés? Teni nangantimiro. Querome pini isanguenare, quero nigótime te onganinate ora nacantagueti. Querome ocanti:

Quero pinebetaro ora yasintagueta basinipague, quero nigónijintame aiti nasi naquengagueta quimingaro nacantaguetiro. ⁸ Pigótacagabequina te onganinate nanebetimaro pairoraca, nigótabecaro Sanguenari. Iroto cantënguicha aiqvero niátanëtigue nanebetasantanacaro pairorapageraca. Querome pini Sanguenari, quero nigótime teni ongomeite cara nanebetaro. ⁹ Jirai cara terai nogótime Sanguenari, nacaninasëretasitabitaca. Carari aique pigótacaquina cara aitiro ora nacantagueti, iroto nogasëretaguëca nigótinta cara najáqueme aiqvero Sharincabeniquë. ¹⁰ Nigótabeca aroca nomoncaraquero antagaisati ocanti isanguenare Moisés, aro përosati nantimaqueme Jonogaguitequë, carari tiguëti nangantima nomoncaratiro. Pigótacaquina yamai aiti nacantaguetiro ora te onganinate, iroto najátaguëqueme Sharincabeniquë. ¹¹ Najitabeca cara nanganquero omagaro ora ocanti Sanguenari carari natsipiriasicaro. Pamatobiquina. Cara nigótasanti ora ocanti, nigónjinca tesonori nomoncaratiro, najáqueme aiqvero Sharincabeniquë. ¹² Pinetsaiguero, ocaninati isanguenare Moisés, irooti Irinibare Tosorintsi, ocaninatasanti.

Pairo acantobitiro ora te onganinate.

¹³ Aro ocaninati Sanguenari, carari ¿Pairo najábiriqueme Sharincabeniquë? ¿Iroroco Sanguenari játaquinane? Tesonori. Irooti cantaguetagantsi játaquinane. Irooti ora nacantagueti te ongomeite, iroto játaquinane aiqvero Sharincabeniquë. Irooti pigótacaquina Sanguenari quimingarisonori ora nacantagueti. ¹⁴ Irooti caninaro Sanguenari aroquenta Tosorintsi isanguenatacaquero; narori, nasi noguiro nacantaguetiro ora te onganinate. Aitijenga pinëna tso magui cantaguetagantsi ontaquinano ora te onganinate. ¹⁵ Teni nogótocotima naati; nocogabeca nantimeme caninasati carari te nangantiro. Nacantopiantëro oca teca nanintiro nangante. ¹⁶ Cara nacantaguetiro oca teca naninte nangantiro, nigóque ocaninati ora ocanti Sanguenari. ¹⁷ Teni nongogabetima nangantiro pairoraca, carari nasi noguiro teni nanganinate, iroto ora nacantasitaguëtaro aitinta cantaguetagantsi naroiça. ¹⁸ Nigónjinca teni nanganinatëmate. Cara nocogabeca nangantiro ora caninari, tiguëti ongantima nangantiro caninari. ¹⁹ Teni nangantiro ora caninaro nocogabeca nangantiro, irooti nacantopiantëro ora quimingaro ora te nongogabetima nangantiro. ²⁰ ¿Pairo nangantasibiriquimaro teni nongogabetima nantiro? Irooti cantaguetagantsi naroiça; nasi noguiro teni nanganinate, iroto nacantasitaguëtaro. ²¹ Aro nigónjinca jirai cara otsomaaquina inato, nasi noguiro nacantaguetiro te onganinate. Aique cara

naquemisanqueri Quirisito otimacagajina Isère Tosorintsi, pinasèrequina. Yamai noco-gabeca nangantopiantiro ora caninaro. ²² Aroquenta itimacagajina Tosorintsi, naquengasantabitacaro Irinibare, nocogasanotabitacaro nangantirome ora icocaquina. ²³ Tojai nogasèretasantaca. Tojai naquengabecari Tosorintsi, nocogasantabitaca nangantirome ora icocaquina. Carari aiti pinèna tsomagui pipègatèna cara tigueti ongantima nangantiro caninaro, iroonti omabocaquina nanganguero ora te onganinate ora te nanintiro. ²⁴⁻²⁵ Tojai natsipirique. Naquengasèretabitaca nangantirome ora icanquina Tosorintsi, iroo cantènguicha nasi noguero teni nanganinate. ¿Pairi omitocoquinane arota quero nacantopiantairo ora te onganinate? Irianti Atingomi Jesoquirisito omitocoquinane. Iroo yamai tojai nacarasiatasantaguètiri Tosorintsi.

8

Omitococái Isère Tosorintsi.

¹ Cara inguemisanquerica Jesoquirisito pairiraca, quero icasitígatiri Tosorintsi, quero láti cara Sharincabeniquè. ² Jirai, nasi noguero nacantopiantèro ora te onganinate, najáque me Sharincabeniquè. Carari naquemisanqueri Jesoquirisito, pogabisaicotajina Isère Tosorintsi, poganiataina, otmacaguena aiuenta cara Jonogaguitequè. ³ Pinetse, tigueti ongantima ogabisaicotajái isanguenare Moisés; así oguero te anganinate. Te angantiro ora ocancái. Carari yogabisaicotajái Tosorintsi. Igáqueri Itomi yaca quibatsica, imat-siguengatapè yosigopái ibega eiro carari te irantiro ora cagaro caninatatsi. Icamobicái, ipasinititajái cara opabacari, yamai quero acantaja ibega jirai. ⁴ Yamai cara anguen-gasèretèro anguemisanquero Isère Tosorintsi, aro omoncaraquero ora ocanti Sanguenari. Te angantiro yamai ora ocoganontabeca. ⁵ Iraegui te irógotiri Tosorintsi, tsoengatsiri, iquengapiantèro ingantiro ora te ongomeite. Iraegui ira ogótiro Isère Tosorintsi icoguü ingantiro ora ococaqueri Isère. ⁶ Ira quingasèretiro pèrosati pairoraca icoganonca iriati, iriatè Sharincabeniquè. Carari ira quingasèretiro pèrosati ora ococaqueri Isère Tosorintsi, intimaque caninasati yaca quibatsica, aisati aiuenta intimaque Jonogaguitequè. ⁷ Ira quingasèretaro ora icogagueti ingante, icantaguètiro, itsoinguèri Tosorintsi, ipègatacari. Teni iraninte ora icocaqueri Tosorintsi, teatisati ingantima ingantiro.

Ati icanta ira cantatsi ora icoganonta.

⁸ Tosorintsi teni inganinabiritiri antagaisati cantaguètatsi pairoraca ora icoganonca iriati ora te onganinate. ⁹ Carari obirojegui, te pingantiguemari iriro. Aroca pinanquimi Isère Tosorintsi, coshoni pogaiguèmi, obiro irasi Quirisito. Aintaca pairiraca te inantimari Isère Quirisito, te irogótiri Quirisito, cagari irasi. ¹⁰ Jirai icanquero Arán ora te ongomeite iroo icamaguèque; irooti acamanta eiro yamai aisati, carari obiroca irasi Quirisito, Tosorintsi yoganasèretaimi iniacaninatèmi, aisati pitimi caninasati, aisati intimacaguemi Iriroquè cara Jonogaguitequè pèrosati. ¹¹ Icamaque Jesus, carari yoganiatairi Tosorintsi. Yamai aroca pinasèrequimi Isère, aiuenta Tosorintsi ingabiritaiguèmi obiro aisati, iraganiatamiro pobatsa. Ingantaiguèmi aroquenta pinasèrequimi Isère. ¹² Yamai, nopiguemisanthane, atsipiriasiquimaro cara pèrosati angantaguètiro ora te onganinate, arota omitococái Isère Tosorintsi angantiro caninaro. ¹³ Aroca pingantopiantèro ora quimingaro, pijáque aiquero Sharincabeniquè. Carari aroca pinguemisanquero Isère Caninaro Tosorintsi, iroo quero picantaguètiro ora te ongomeite aique pintiomoqueri Tosorintsi Jonogaguitequè pèrosati, pintimasanotapè.

Omagaro ira quemisanqueri Tosorintsi itomintacari.

¹⁴ Omagaro ira quemisanquero Isère Tosorintsi, irirojegui itomi Tosorintsi. ¹⁵ Yamai te pintsorogaiqueri Tosorintsi, te aisa pingantimari ibega iromeraropague, carari ipèmiro Isère, coshoni pogaiguèmi, pinasèrequimi. Aítica Isère, obirojegui itomipague Tosorintsi, picanqueri: “Pabati Tosorintsi”. ¹⁶ Ogomecái Isère, ogónijintacacái aisonori itomintaigacái Tosorintsi. ¹⁷ Eiroca itomipague, aro aiuenta imaigacái Tosorintsi antagaisati ora yoguèneri itomipague, aisa ocanta aroque ipèri Quirisito irasi. Aisati aroca atsipiriobiqueri Quirisito yaca, aisati antsibatèmi Jonogaguitequè cara yosanguèguitetasanti. Aro anganinabentasantanèri.

Aiuenta quero aquengairo pairoraca ora atsipiriobiqueri yamai.

¹⁸ Aiuenta caninasati antimaque Jonogaguitequè, aniaquero irosanguèguitere Quirisito, igóiguè cara quero aquengairo pairoraca ocancái yaca quibatsica: cara atsipiriobiqueri Quirisito, cara ajanaitè, cara isèrontacái matsiguenga, cara te asintsite, cara omagotè, cara ocoguitiaca, omagaro. Quero aquengairo. ¹⁹ Aisati antagaisati yobetsiquè Tosorintsi yoguiaiguè icogasanti iraniaigacái cara ironijagaiguèri Tosorintsi cara eiro quemisantatsiri itomijegui. ²⁰ Itsipiriasitaigaca itimaguetaiquè omagaro

ira yobetsicaiguê Tosorintsi: omagaro camênguítine: basiniripague, matsiguenga, panguirintspague, omagaro. Te ingantabetima pairoraca icamantaigaca iriati; iroonti iparintaca icamantaigacaro ora icantagueque Arán jirai ora te onganinate. ²¹ Aiquenta quero icantaja ibega yamai, iroonti iraganinatasantaiguêri Tosorintsi antagaisati ira yobetsicanê cara iraganinatasantaigacái eiro. Cara irosanguêguitetobê Atingomi angarataigabaqueri eironta itomipague Tosorintsi. Aro quero itsipiriasitaja aisati iraequi yobetsiquê Tosorintsi. ²² Aisati ocanta yamai otsiaquimanica tsinane cara ontsomaaquenica ongatsitasantê irooti yamaica, aisa ocanta yamai omagaro inatsi yaca quibatsica itsipiriaiguê irooti yamaica, icogasanti irobetsicaíri irirai Tosorintsi, icogasanti irojocajiro ora inaga jirai. ²³ Aisati eiroegui quemisantatsiri atspiriabeca. Pinasêrecái Isêre Tosorintsi omitococái, carari ocogasantaiguê angantaiguê mari ibega Quirisito cara Tosorintsi irogótacagaiguêri omagaro cara eiro itomipague. Aro ingabiritajáiro obatsa, imasiniatitajáiro iraganinatacáiro; quero atspiriaji aisati, quero acamaji, quero pinai atspiriagantsi. ²⁴ Igóiguê eiro cara inganquero Tosorintsi antagaisati ora icancái, iromoncaratasantacáiro Irinibare. Aro aquemisanqueri, iroso yogabisaicoontaái; carari terai iromoncaratiro omagaro ora icancái. Aguaiguêri cara aiquenta ingantobencáiro antagaisati. ²⁵ Aroca igóiguê cara iromoncaracáiro Tosorintsi ora icancái, aro caninasati aqueicoquimaro, quero itsirisharo.

Omitococái Isêre Tosorintsi cara omanakeri.

²⁶ Aiti tojai ora te ogóiguero eiro, carari omitococái Isêre Tosorintsi tenta ogóigue omanocotiri caninasati, carari pigóque Isêre, ongantocobintacái. Cara omanocotabetimari eiro, tenta ogóitiro nibarintsi caninaro, Ora Isêre omitococái ongantacacairo ora te ogóitiro cara atiraca anganar. ²⁷ Igóitasantacái Tosorintsi aitosati igóque pairoraca ocanti Isêre. Cara ocantocobintacái pamanocobintái, pigóquero omagaro ora icocacái Tosorintsi.

Ora icocacái Tosorintsi.

²⁸ Igóiguê eiro aroca aninqueri Tosorintsi, icantocobintaáiro omagaro ora ocancái poganinatacái. Aroca omomirintsitomocái pairoraca, igóque Iriro, quero inintacaguairo ojocagajiri cara aquemisanqueri. Icanáiro negaca icogacáinta jirai, icancái ora icocacái. ²⁹ Jiraisonori igótocotaigacái Tosorintsi cara anguemisanqueri, icantococái: “Inganinatanê ira quemisanquinane, ingantaiguê mari ibega Notomi”. Itomi Irianti Jesoquirisito, jiraisonori itimi ibacái. Aique itomintaigaái eiro, omatsiguengataigacari Quirisito Ira obacái. ³⁰ Jirai icantococái Tosorintsi: “Nontomintaiguê mari”, aique icogacái itomintacái; aique iniacaninatacái yoganinatacái cantaca te angantaguetiuro ora te onganinate. Aisati icantococái: “Aiquenta caninasati intiomotaigapêna cara Jonogaguetequê iraniopêna cara nosanguêguiterequê intsibataigapêna”.

³¹ ¿Teco onganinate ocapague? Pinetse, itasongobencái Tosorintsi. ¿Pairi yamai agabi-acáine? Quero pairi agabiái. ³² Te irometocotimari Itomi, Ira igáque yaca quibatsica icamobicái. ¿Teco ogóigue aisati imaigacáiro antagaisati ora coguitiomocáine? ³³ Icoigacái Tosorintsi, iniacaninatacái cantaca te angantaguetê mario pairoraca ora te onganinate. ¿Yamai pairi comantêgotacáine aiti ora angantagueti ³⁴ ora iragáantacái Sharincabeniquê? Quero pairi. ¿Teco ingamobitái Jesoquirisito, yogabisaicotajái? Aisati icabiritanaa, yogainocanaa isobicomopêri Iriro ibacosonoriquê, inibabencái. ³⁵ ¿Pairi jocaquerine Quirisito cara inintaigacái? Querosonori ini. Aroca iratsipiriacacái, inguisaigacái, ingantaguecái catsimari; aroca omomirintsitomocái pairoraca, aroca ágacái atasegane, teca ine omanchaquipague, aroca ontsoroquêro pairoraca; aroca angamaque; jemita, pêrosati inintasantacái Quirisito. ³⁶ Aisa ocanta jirai isanguenatococái:

Naquemisanqueminta, Natingomi, iroso isariaguêtaiguêna iróguina. Iniaiguêna cantaquina oisha cara yógapinintiri.

³⁷ Aisonori tojai inintaigacái Quirisito, pêrosati itsibatacái imitococái atiraca ocanta, iroso acaninabentaguê queri. ³⁸⁻³⁹ Aisonori te inêmate ora jocaquerine cara inintaigacái. Quero icantiro ironomirepague Tosorintsi irisaanganetsite, querootisati camagaripague, basini obatacagantatsiripague, iraequi paniacha jonoquê, iraequi paniacha osobinta, antagaisati ira yobetsicaiguê Tosorintsi, quero ijocaguiri Tosorintsi cara inintaigacái. Aroca angamaque, aroca antimaque, quero icantiro yamaica, querootisati aiquenta. Aquemisanqueri Atingomi Jesoquirisito, aro yamai inintasantagacái, aisati coshoni yogacái omagaro, yamai, aisati pêrosati.

9

Tojai icábintsaiguêri jorójequi Paboro.

¹⁻² Tojai naquengasêretêgotêri antagaisati nomatsiguengasonori, iraequi jorío. Aisonori oca nacanti, igóque Quirisito teni nontsoiguema. Aisati pigóque Isêre

pinanquinanta. Nogasëretocotaigacari nomatsiguenga tenta inguemisantaiguëri Quirisito. ³ Arome nangantiro nagabisaicotiri, najáqueme Sharincabeniquë irabisaicoontëmame nomatsiguenga; najáqueme canta, querome naneiri Quirisito naro canta Jonogaguitequë. Tojai nacábintsaiguëri nomatsiguenga nocogasanti iragabisaicotajiri Tosorintsi. ⁴ Nomatsiguenga aisati ijitaiga Isirael, itomintaigabitacari Tosorintsi. Itsibataigari itasongobentaguetaiguëri, yoniagapinintaiguëri irosangueguite. Iquemaigabitacaro joríojegui ora icantantaiguëri Tosorintsi ira jirainisati; igótaigabitacaro isanguenare Moisés; igótabela ati ingantimame inguemisantiri Tosorintsi, iromanaiguërimë; igótaigabitacaro Irinibare Tosorintsi cara icanque aiuenta iragáqueri Agabisaicoontatsiri. ⁵ Jiraisonorri iparintaigaca imatsiguenga Isirael. Aisati cara iriojeguiquë cara imatsiguengatapë Quirisito, imatsiguengataparri joríojegui. ¿Teco Iriro Quirisito Tosorintsi? Irirosonorri Tosorintsi. Caninataque aniacaninataiguëri përosati, antingomintantaiguëmari omagaro eiro. ⁶ Igótaigabitacaro Irinibare Tosorintsi, carari te inguemisantaiguëri. ¿Pairo te inguemisantobite? ¿Yamatobitaiguërico Tosorintsi? Tesonorri, teni iromatobitiri. Pinetse: antagaisati jorío ipaniaca Isiraeriquë jirai, irianti imatsiguengasonori, carari te inguemisantaiguëri Tosorintsi omagaro jorío. ⁷ Aisati te ingantantaiguëmari ibega Abaram antagaisati imatsiguenga. Jirai icanqueri Abaram Tosorintsi:

Ira pomatsiguengasonori imaniëma cara pitomiquë jitacha Isac.

⁸ Oca yamai nongomantëmiro paio ocanti. Tosorintsi te intomintimari omagaro imatsiguenga Abaram. Irianti imatsiguengataca imatsiguenga Isac. ⁹ Icanque Tosorintsi negaca:

Panibati osarini nopocaje Naro, ontsomaaqueri otomi Sara pijina.

¹⁰ Pabisanaque patiro osarini iboguë Isac. Aique iquibianë, yáguë iina ojita Iribeca. Cara poganë ainta tomagui pite otomi. ¹¹ Aintaquerai opëniabaqueri Iribeca pitirooti; terai ingantiro pairoraca caninari, teatisati irantiro ora te onganinate, aito icoiguëri Tosorintsi. ¹² Aro icanquero Iribeca Tosorintsi:

Ira iritsita iboguënguitsine inganquimari ibega iromeraro ireinti carantatsiri.

¹³ Aisati isanguenatocoqueri pitirooti:

Icanque Tosorintsi: “Nanintasantiri Jacob, irari Esaó te nanintasantiri”.

Pinetse: igóque Tosorintsi ora icocaqueri, aique imoncaraquero.

Ati icanta Tosorintsi cara icanqueri jorío aisati ira cagari jorío.

¹⁴ ¿Paioroco anganque: “Teco onganinate oca icanque Tosorintsi?” Tesonorri, quero acantiro. ¹⁵ Jirai icanqueri Moisés Tosorintsi:

Naanti cantirine pairiraca nangantaneintëgotë, aisati nangábintsëri pairiraca naninti.

¹⁶ Te ingantaneintëgotiri ira coguero, teatisati ira cantasantobitiro, carari Tosorintsi ican-taneintëgotëri pairiraca icoiguë Iriro. ¹⁷ Cara Sanguenariquë, jirai Tosorintsi icanqueri Baraón:

Nacantasiqimi obiro itingomi Ejíptosati, ora irogóontima matsiguenga cara tojai nita-songanti Naro, aisati arota tojai intingomintaiguena omagaro quibatsisati.

¹⁸ Pinetse, ingantaneintëgotëri Tosorintsi pairiraca icogui; aisati imegajiri tsoengatsiri pairiraca icogui. ¹⁹ Yamaica najique pinganquena: “Aroca inganqueri pairiraca tsoengatsiri, aique ¿Pairo inguisabiriqueri cara icantagueti? ¿Teco icantaguetiro ora icocaqueri Tosorintsi?”

²⁰ Pinetse, obianti matsiguenga: te onganinate popëgatsatimari Tosorintsi, Irirosonorri Atingomi. Nosiacagantëmiro cobiti. Aroca onganquero obetsiquorori: “¿Pairo te pobetsicobitina naro caninasati?” ²¹ Ora obetsiquorori cobiti, ¿Teco ontiro quibatsi pairoraca ocogui? ¿Teco onganinate obetsiquë patiro cobiti caninaro, aisati otsipa quero poganinatiro? ²² Aroca ingoque Tosorintsi, ¿Teco onganinate iratsipiriacaguiri ira iguisëgotaca? ¿Teco onganinate irogótacaguiri matsiguenga cara aiti itasorintsite? Carari teca irinante iratsipiriacaguiri iraugui cantiro ora te onganinate, irianti abequero ora icantagueti, ican-taiguëri antsinisati, aro ¿Pairo picantaguebiritiri Tosorintsi? ²³ Tojai icábintsasanoqueri ira játatsi Jonogaguitequë, ira icoiguë jirai, yobetsiquëri arota irogóiguëri Iriro cábintsantsiri aisati irogóiguëri Irirosonorri Itingomi, intsibatëmari Jonogaguitequë cara yosangueguiteanti. ²⁴ Iroro yobetsicaguëcái, icoigaiguëri quemisantatsiri, jorío aisati ira cagari jorío. ²⁵ Irootisati isanguenague Oseas jirai:

Icanti Tosorintsi: “Ainta cagari nomatsiguenga jirai, inaigabitaca; carari yamai nomatsiguengatacari. Aintasati jirai inaigabita te nanintasantiri, carari yamai nanintasanotairi”.

²⁶ Aisati icanque Oseas:

Cara irasiquè iguebatsite icanqueri jirai ira cagari jorío: “Obirojegui cagari nomat-siguenga”, carari yamai aisati irajitaigairi itomipague Tosorintsi timagantatsiri.

²⁷ Aitosati isanguenaque Isaías, iquenguitsatocoqueri joríojegui:

Tojaisonorí ingarataiguè imatsiguenga Isirael, aisa inganquima pibega omaniqui oparaguequè oquibeguinte angaare, quero acantiro igócoitiro atiraca ocarati omaniqui. Aisati iriro joríojegui, quero acantiri igócoitiri atiraca ingarataiguè tojaininta icarati. Carari tenta inguemisante tojai, quero itojaigasanti ira iragabisaicotaje Tosorintsi, arosataanti ini. ²⁸ Aiquenta iromoncaraquero Tosorintsi antagaisati ora icanque: iromabocaiguèri omagaro tsoengatsiri, ingasitígatèri. Omanapague irotsatengasantèro omagaro.

²⁹ Aisa ocanta cara isanguenaque Isaías:

Querome icábintsagaicái Tosorintsi, Ira agáantatsi omagaro cara Jonogaguítequè aisati omagaro yaca quibatsica, querome yogabisaicotajái arosataanti quemisantatsiri, aro iritsongacáime, aisati angantaiguèmarime Soromasati aisati Gomorasati ira ipoguiri-santaiguè Tosorintsi jirai.

Paíro te inguemisantobite joríoipague.

³⁰ ¿Paíro nangantaiguèmi? Ira basiniati matsiguenga cagari jorío, te ingogaigabitimaro iraganinatiri Tosorintsi, carari yamai iquemisantaiguèri, iroro iniacaninatancari. ³¹ Irari joríojegui icogaigabitaca ingantaguetirome ora isanguenare Moisés arota iraganinatanti-marome, carari te iromoncaratiro. ³² ¿Paíro te iraniacaniabiritaiguèri jorío Tosorintsi? Tenta inguemisantaiguèri Tosorintsi; iroonti icogabeca irantaiguero pairoraca caninano. Tojai icomètabitacaro, tenta irogóigue aroca inguemisantaiguèri Jesos, aro iraniacani-nataiguèri Tosorintsi. ³³ Jirai isanguenaque ora icanquineri jorío Tosorintsi: Nagátabequimari Notomi cara Siónguè, carari quero igótaigabaqueri jorío. Quero igóiguiri Quirisito pairi ijita, iroro iritsoengaguètaigabaqueri, ingomètoèbèmarí iragasèrebiriqumari. Carari quero yogasèreta ira quemisanquerine Quirisito, iroonti inganinasèrebenqueri.

10

¹ Nopiguemisantane, tojaisonorí nocogui iragabisaicotaigairi joríojegui Tosorintsi. Namanocotopiantèri Tosorintsi: “Pinguemisantacagaiguèri nomatsiguenga ora pigabisaicoontèmarí”. ² Nigóque tojai icogaigabitaca jorío iraganinataiguerime Tosorintsi, ingantaiguènerime antagaisati ora icocaqueri. Carari te irogóigue pairoraca icocagaiguèri. ³ Te irogóigue ati icanta Tosorintsi cara iniacaninatacái. Icogaigabita iraganinataiguemame iriati, te ingogue iraganinataiguèri iriro Tosorintsi. ⁴ Pinetse, ipocasinái Quirisito, icamobicái. Yamai cara anguemisanqueri Iríro, iraganinatacái. Atsipiriasicaro yamai cara omoncaratabetimaro ora isanguenare Moisés arota abisaicoontimarome.

Ati anganquima ora abisaicoontèma.

⁵ Jirai Moisés isanguenatocoqueri ira cogatsi iromoncarataguetiromo Sanguenari:

Aintaca cogabitacha iromoncarataguetiromo Sanguenari iraganinatantimarome, caninataque iromoncaratirome omagaro, aro intimaque pèrosati.

⁶ Iroro cantènguicha cara aquemisanqueri Quirisito, iniacaninatacái Tosorintsi. Icanè:

Quero piquenga: “Nomomirintsitèmaro nabisaicoontèmaro. Najátasiqueri Quirisito canta Jonogaguítequè, nomapèri yaca arota iragabisaicotajina”.

Teni, quero picantásita negaca obiro. ⁷ Querootisati piquenga:

Aro najátasique osobi cara ini ira camaiguènguítisi, nangabiriqueri Quirisito Ira camènguítisi, arota iragabisaicotajina.

⁸ Cara aquemisanqueri Quirisito, aro yogabisaicotajái.

Aiti yaca pini Irinibare Tosorintsi, aroque piquemaquero.

Quero popomirintsita pabisaicoontimaro queronta picantiro. Pinguemisanqueroca oca nocomantèmica, aro iragabisaicotajimi Tosorintsi. ⁹ Aroca pingomantèri matsiguenga cara Jesos Irianti Pitingomi, aisati pinguenari Irianti Itomí Tosorintsi Ira cabiritajiri, aro iragabisaicotajimi. ¹⁰ Pairiraca sèretimarine Quirisito, inguemisanqueri, aro iraniacani-natèri Tosorintsi; aisati aroca ingomantèri matsiguenga cara iquemisanqueri Quirisito, iragabisaicotajiri iriro Tosorintsi. ¹¹ Ocanti Sanguenari:

Quero ipasiquiti ira quemisanqueri.

¹² Omoncaratobagaigaca omagaro eiro, jorío aisati ira cagari jorío. Eatijegui iniaigacái Atíngomi Irironta agáantatsi antagaisati, Itíngomi omagaro. Pairiraca abentaigapèmarine, ingábintsagaibaqueri, ingantaneintègotobèri. ¹³ Ocanti Sanguenari: Iragabisaicotaigái Atíngomi pairiraca abentimarine.

Tojai itsoingaguèri Quirisito jorío.

¹⁴ Queroca iquemisantiri Atingomi matsiguenga, ¿Ati ingantima cara irabentëmari? Queroca iqemocotiri, ¿Ati ingantima inguemisanqueri? Queroca ini ira comantantatsiri, ¿Ati ingantima inguemocotiri? ¹⁵ Queroca igátingani comantantatsiri, ¿Ati ingantima iriátë ingomantëgotëri Quirisito? Aisonori Tosorintsi igátaiguëri, cara isanguenatocotaiguëri jirai:

Caninataque cara ipoque iraequi comantacáiro Nibarintsi Caninaro. Tojai acaninabentobëri aniacaninatobëri.

¹⁶ Carari te omagaro inguemisantobëro Nibarintsi Caninaro cara Quirisito iragabisaicota-jiri pairiraca quemisanquerine. Isanguenatocoqueri tsoengatsiri Isaías:

Natingomi, nocomantaigabitacari, carari tojai icarati ira te inguemisantina, itsoingobëro Pinibare.

¹⁷ Patiro inguemisanque matsiguenga cara ingomantëgotëqueri Jesoquirisito, cara icamobicái aisati cara icaniatanai iroro iragabisaicoontaigacái.

¹⁸ Pijique ¿Te inguemocotiri antagaisati jorío? Aisonori iquemaigabitaca. Ocanti Sanguenari:

Iáque comantantatsiri omagaro quibatsiquë, iquemaibagaqueri antagaisati timaigatsi.

¹⁹ Piqueanca ¿Te irogóigue jorío cara inguemisantaiguë basiniati matsiguenga? Igótabeca aroquenta icomantaiguëri Moisés jirai:

Icanque Tosorintsi: “Aiquenta pinguisaneinqueri basiniati matsiguenga ira pitsoingaigabitaca. Pijonaiguëri pinguisaiguëri iraequi te irogótabetimari Tosorintsi”.

²⁰ Aisati catingasati isanguenaque Isaías:

Icanti Tosorintsi: “Te ingogaiguena ira basiniati matsiguenga, te irosomitocobintina, carari noniagaigacari Naati nigótacaqueri, yamai igóiguëna”.

²¹ Aisati Isaías icomantëgotëri joríojegui ira aisati ijitaiga Isirael; inibataqueri Tosorintsi:

Ira joríojegui, tojai nacaimapinintaigabitacari, carari ipëgatsaiguëna, te ingogue inguemisantina.

11

Tosorintsi te iromaguisantaiguëri joríojegui.

¹ Yamaica nosamitëmi: “¿Iriroco Tosorintsi joquëri ira joríojegui? ¡Teni! ¿Yomaguisantaiguërico ira itomintabitaca? Teni”. Naatisati jorío carari te iromaguisantina naro. Nomatsiguengatacari Abaram aisati Benjamín. ² Tosorintsi te irojocaiguëri përosati iraequi jorío ira igótaiguë icoigaiguë jirai. ¿Teco pigóigue ora ocanti Sanguenari? Oquenguitsatocoqueri Eriás jirai cara yamanaqueri Tosorintsi, icanque:

³ Natingomi, tesonori inganinataigae iaequi jorío. Yógapinintaiguëri ira pigomantantatsirite; yogomeriguetëro itagantaripague cara yamanaigabitaca jirai; aisati ira imatsiguenga ijocagaiguëri cara iquemisantaigabitëmi. Yamai icogaiguë iróguina naro. Paniro naquemisantimi naanti.

⁴ Pinguenguero ora yotabitanëri Eriás Tosorintsi. Icanqueri:

Aintaquerai 7,000 sërari quemisantasantina, nacábintsaiguëri nacasiriconiatiqueri. Te intingomintobëmari ira Baal, te irajitosorintsitaitimari ira ibabane basiniati matsiguenga.

⁵ Aisa ocanta yamai. Ainta arosataantipague jorío igoigane Tosorintsi, icábintsaiguëri.

⁶ Pinetse, icábintsaiguëri Tosorintsi te ingantiri cara irantiro jorío pairorapagueraca. Arome ingocaqueri irantaguetiro pairoraca arota iraniacaninatiri Tosorintsi, te ingábintsaiguëri.

⁷ ¿Pairo anganque yamaica? Icogaigabitaca jorío iraniacaninataiguëri Tosorintsi, carari te. Iniacaninataiguëri porocague, ira icoguë Tosorintsi. Iriroquerai basini, te ingogaigue inguemisante tenta inguenganeintëmatima. ⁸ ¿Teco aisati ongantocoqueri Sanguenari? Ocanti:

Irobegabitsaqueri Tosorintsi cara iquengabeca jorío. Iniaquetabecaro pairoraca, iquemaguëtabecaro, carari te inguemisantaiguë. Aisa icantaiga irooti yamai.

⁹ Aitosati isanguenatocoqueri David:

Icaninabiritaigabitacaro pairoraca, carari yamatobitaigaca iriati. Aique ingamaque iratsipriobitaiguëmaro ora icantagueti te ongomeite. ¹⁰ Aisati inganquima te iraniante iraequi, aisati iroguitaiguëmame inguiaqueronta tinaronori, aiquenta quero pini ora igóonta; quero icaninanti. Iroonti iragasëretaguëma.

Ati icanta jorío aisati basiniati matsiguenga.

¹¹ Aro itsoingaiguëri Tosorintsi joríojegui: ¿Aroco ijocaguëri Tosorintsi iguisaiguëri yamaica? Teni. Quero iguisiri. Iroonti yogabisaicotaigairi basiniati matsiguenga ira cagari jorío arota ingogue joríojegui ingantaiguemari ibegaiga iriro, inguemisantaiguë aisati. ¹² Itsoingaiguë, te ingogaigue inguemisante, carari Tosorintsi yogabisaicotaiguëri

basinati matsiguenga. Aiquenta, cara aisati inguemisantasantaigae joríojegui, ¿Teco aiqero iriáiguétiqgue inguemisantasantaigae iriro aisati tojai ira basinati matsiguenga irabisaicoantaiguéma? ¹³ Cagari obirojegui jorío. Pigóigué cara igáquina Tosorintsi nongomantaguetaguémi. Nocogasanti nanganquineri antagaisati ora icocaquena. ¹⁴ Naninti nongocaguri nomatsiguenga ingantaiguémi pibega obiro, inguemisantaigueri Quirisito cara iragabisaicotagarantéri iriro. ¹⁵ Itsoingauénta jorío yamai, te irágacaninataigueri Tosorintsi, carari yágacaninataiguémi obiro cagari jorío. Yamai ira jorío icantaigacari ira camaséretagatsi, tenta inguemisante; aiquenta inguemisantaigairi Tosorintsi, aro irágacaninataigabajiri iriro aisati. Játaiguame tojai matsiguenga aiqero Sharincabeniqué, carari aiquenta cara inguemisantaigué jorío iriáigué tojaisonorí cara Jonogaguétiqgué. ¹⁶ Pinetse, Tosorintsi iniacaninatéri Abaram iraisati, icasiriconiatiqueri, ¿Teco irania-caninataigueri imatsiguenga Abaram aisati? Yamai nosiacagantémíro anchato: aroca ocaninati opari, ¿Teco aisati onganinate otsego? Aisa icanta Abaram, icaninati iriro, aiquenta Tosorintsi iraganinataigueri imatsiguenga Abaram aisati. ¹⁷ Yamai intsome anguengero anchato jitacha olibo. Ocaninati opari aisati opoa, carari otsegopague te. Aro itotaguequero casintaro ora otsego te ine oguito, ijoquero. Yágué basini otsego, iroonti oliboniro, yoguibitaquero arota onguitsotane. Piané iragabitane. Ora opari iroonti ocaninati Abaram; ora otsego posiacari jorío; ora irorai yoguibitaque posiaquemi obirojegui cagari jorío. ¹⁸ Yamai quero pijita obiro otsegosonorí; quero piquenga: “Nacaninati naanti, te nangantimari ira jorío ira ijoque jirai”. Pinguenguema cara oquéshotaquimi opoa, iroroque opari coshotacaguero opoa. ¹⁹ Yamaijenga pijique: “Ijocaguéri jorío Tosorintsi, coshoni yoguéna naró. ¿Teco nanganintasante naró?” ²⁰ Aisonorí, itsoingauéri jorío, ijocagabitacari Tosorintsi. Piquemisantaiguérinta, iroro coshoni yoguéquemi. Quero piniacaninata obiati; pominguirí Tosorintsi. Pigamema arota quero pijocajiro obiro cara piquemisanqueri. ²¹ Iritsita jorío ijocagué Tosorintsi; queroca piquemisantirí përosati obiro, irojoquemi aisati obiro.

²² Pinguengueri Tosorintsi: Iríro cábintsantsirí, aisati casitígatantatsirí. Tenta inguemisantaigueri jorío, icasitígataguéri, carari icábintsaguémi obiro piquemisantaiguérinta. Aroca përosati piquemisanqueri, përosati ingábintsaguémi; queroca piquemisantirí, irojocajimí obiro aisati. ²³ Irari joríoipague; aroca inguemisantaigae, irágacaninataigairi Tosorintsi. Irironta Atingomisonorí ingantaiguéri matsiguenga pairoraca icogui. ²⁴ Jirai te pigótaigueri Tosorintsi, carari yágacaninataiguémi cara piquemisanqueri: obiro cantaca otsego oliboniro yoguibitaquemi opoaqué olibo caninaro. Aisati ocaninatasanti irágacaninataigairi jorío ira cantaro otsegosonorí olibo. ²⁵ Nopiguemisantane, aiti ora naninti nongomantémíro ora te pigóiguero jirai. Nongomantémí arota quero piniacaninata obiati. Pinetse, itsoingagarantabeca jorío yamai, carari ainta porocague quemisantatsi. Iroro canténguicha quero itsoingauéri përosati. Cara omoncaraquima inguemisantaigué basinati matsiguenga ira cagari jorío, aro omoncaraquima aisati inguemisantaigué jorío. ²⁶ Aisonorí, aiquenta Tosorintsi iragabisaicotaigairi omagaro jorío. Aisati icanti Tosorintsi Sanguenariqgué:

Iribocapé Agabisaicoantsirí, irijoríotapé, inguemisantaicaguéri imatsiguenga, irojocajineri cara itsoingueri. ²⁷ Nomoncaraquero omagaro nacasantasaguéri imatsiguenga jirai: nomaiguéri irorai Nibarintsi cara nogabisaicotaigairi, nojocajineri ora icantaguetomoquina te onganinate, quero naguisaneintaigairi aisati.

²⁸ Yamai ipégataigairi Tosorintsi joríojegui itsoingauéri; iroro yamai Tosorintsi yobabisaicotaguétaigaimi obiro cagari jorío. Carari icóiguaguéri jorío Tosorintsi jirai, përosati inintaiguéri, aiquenta iromoncaraquineri ora icantaiguéri imatsiguenga jirai: ora icantaiguéri Abaram aisa Isac aisa Jacob. ²⁹ Teni iromatobiante Tosorintsi: quero yágabitsatajáiro ora ipaigaicái, querootisati ijocajiri iigoigane përosati. ³⁰ Jirai te pinguemisantaigae obirojegui, carari aroquenta itsoingasantaguéri Tosorintsi joríojegui, iroro icantaneintégotaguétaiguémi obiro yamai. ³¹ Yamai te inguemisantaigae jorío carari aiquenta inguemisantaje aitosati, aisa ingantaiguémi pibega obiro. Aique ingantaneintégotagairi Tosorintsi, aisa ingantaiguémi pibega obiro cara ingantaneintégotaguémi. ³² Icanque Tosorintsi cara aitiro icantaguetiro ora te onganinate omagaro matsiguenga, te inguemisantirí, carari icogui ingantaneintégotagueri antagaisati, iragabisaicotaigairi. ³³ ¿Teco inganinatasanote Tosorintsi? Aitinta ora igóntasanota, tojaisonorí igóntasanoti. Tigueti angantiro ogóiguero eiro ora iquenga Iríro, teatisati ogóiguero pairoraca icantocaguéri matsiguenga. ³⁴ Iroocisati ocaniti Sanguenari:

¿Aintaco igótiro ora iquenga Atingomí? Teni. ¿Aintaco yogomequeri pairoraca inganque Iríro? Teatisati. ³⁵ ¿Aintaco ipéri pairoraca, iripënabentéri? Teni irine.

³⁶ Pinetsaigue, iqueanquero Tosorintsi yobetsiquéro antagaisati. Ipijootaguéri omagaro, itimacaqueri. ¿Cagarico Iríro asintaigairi antagaisati timaigatsi? Intsome yamai omagaro

eiro antingomintasanotaiguemari përosati, intsome angantocotiri: “Caninarisonoriguinte Tosorintsi”. Aroque.

12

Ipasiniatitanê quemisantatsiri.

¹ Nopiguemisantane, tojaisonorinta icábintsaigacái icantaneintëgotacái Tosorintsi, noco-gasanti yamai pomaiguemari obiati pingantasantiri irasintasantimi, pintimobiqueri. Quero picantastaro pairoraca, iroonti pingantaiguê ora ingocaquemi Iriro, iroonti ora caninaro. Caninasati pintime, inganinabentaiguêmi. Caninataque pingantineri obiro negaca. ² Quero picantaigari ibega tsoengatsiri, iroonti pomasiniatitima cara pinguen-gasêretêro ora caninaro. Iroro pigóontimaro ora icocaquemi Tosorintsi, aro pinganquero. Ora icogui Iriro, iroonti caninarosonori.

“Quero piniacaninata”.

³ Icábintsêna Tosorintsi cara icanquina iragátane. Yamai nongomantaiguêmiro paniropague: quero pairi aguibatacha. Quero pijita pabisêri basini popiguemisantane. Caninasati pinguengaiguema ati picantaiga, aroquenta Tosorintsi ipacáiro paniropague cara aquemisanqueri aisati anganquineri ora icocacái paniropague. ⁴ Pinguenguema ati acantaiga: paniro pini obatsa carari aiti tojaipague, oroqui aniaantaro, aguemita aquemantaro, obagante inibatantaro, obaco opogontaro, aguiti anëitantaro, omagaro. Te antagaisati ongantaiguê irootisati. ⁵ Aisa acanta omagaro quemisanqueri Quirisito, tojai acarantaigui, omatsiguengatobaca. Eiro acantaro pibega ibatsa Quirisito: paniropague eiro acantaro iguiti, ibaco, iroqui, iguemita. Paniro ibatsa carari te omagaro ongante irootisati. Eiro iraisati Quirisito, carari paniropague icanquineri basiniati, omitocotobaca. ⁶ Ipaguetacáiro pinasitagueca ora anganquineri Atingomi. Inintacacái paniropague anganquineri pairoraca, carari pinasitagueca. Quero operataro ora anganque. Aroca inganquemi pingomantaguetiro ora yoniaguêmi, aro pingomantiro caninasati, pinguemisantiri. ⁷ Aroca inganquemi pomitocotiri basinipague, aro pomitocoqueri caninasati. Aroca irogomequemi obiro, obiroquerei ogoquerine caninasati ira basinipague. ⁸ Aroca inganquemi piganinasêretiri popiguemisantane, aro piganinasêretiri caninasati iriro. Aroca iragáquemi pomasitimari ira coguitiaro pairoraca, aro pomasantiri. Aroca iraguibatêmi itingomi, pigántiri pomatsiguenga caninasati; piniacaninatagueri. Aroca inganquemi pingantaneintëgotiri basiniati, pinganinatane.

⁹ Pinintaqueri pomatsiguenga, quero picantastari: “Nanintimini”, iroonti pinintasantiri. Quero picogui orapague te onganinate, iroonti pingogaigue pintiro ora caninatasantatsi. ¹⁰ Pinintasantobaguima obiro quemisantatsi, ¿Teco pingantobaguima cara piquemisanti? Piniacaninatiri basinipague, pingogue piguibatiri. ¹¹ Pairoraca pinganque, quero poperata, iroonti pisintsibentineri Atingomi antagaisati ora icocagaiguêmi. ¹² Pigóiguênta cara iromoncaraquero Tosorintsi omagaro ora icanquemi, pigueiro, aro pinganinabentiro. Aroca omomirintsitomotimi pairoraca, antsinísati pabequero. Përosati pomaniri Tosorintsi arota iromitocotimi. ¹³ Pomapinintiri popiguemisantane ora coguitiomotari. Caninasati pintimacagobêri ira niaiguimi, pingábintsabaqueri. ¹⁴ Pingantocobentiri ira cantaguetimi catsimari, pomanocotiri Tosorintsi: “Pingábintseri ica”. Quero pipêgatari. ¹⁵ Pinganinataguiiri ira caninatatsi. Aroca iragasêrequeira pomatsiguenga, aro pigasêretacaguimari obiro aisati. ¹⁶ Pinguengasêretobaguima, págacaninatobaguima. Quero poguibata obiati, querootisati pitsinguiiri pomatsiguenga. Pintsibatimari ira cagari obatatsi. Quero pijita ogótasantatsiri. ¹⁷ Aroca pomatsiguenga ingantaguequimi catsimari, quero pipêgatari, quero piguisiri. Pingogue pingantiro ora iraniacaninataiguê pomatsiguenga. ¹⁸ Quero pipêgatobaga. Pingogasantague pintimacagaigueri matsiguengajegui caninasati. ¹⁹ Yamai, nanintane, quero piguisiri ira cantaguetimiro catsimari quero pipêgatari. Irianti Tosorintsi atsipiriacaquerine, ingábintsêmi cara icanque jirai:

Natsipiriacaqueri nanguisêcobenquemi Naronta Pitingomi. ²⁰ Aroca iritasiaque ira quisimi, pomeri iraperi. Aroca iromiretê, pomeri imire. Aique iripasiguitê, quero iguisaimi aitosati.

²¹ Quero pinintacaguiri ira te ingomeite irantacaguimiro pairoraca ora te onganinate. Iroonti pingábintseri, poniaguimari cara caninaribi obiro.

13

Caninataque anguemisantaigueri atingomipague.

¹ Pinguemisantaigueri pitingomipague obirojegui, ¿Teco Tosorintsi oguirine cara itin-gomibintaiguêmi? Querome inintacaguiri, querome itingomibintimi. ² Ira pëgatari

itingomi, ipëgatarì Tosorintsi aisati aroquenta Tosorintsi oguëri cara intingomibintëmi. Tosorintsi ingasitigatëri ira te inguemisantiri itingomi. ³ Ira timatsi caninasati te imingui itingomi, irari cantaguetiro ora te onganinate. Aro queroca picogui pitsoroguari pitingomi, pintime caninasati; aique iraniacaninatëmi. ⁴ Aisonori, Tosorintsi inintacaqueri cara intingomibintanque irorota pintimantima caninasati. Carari teca onganinate ora picantagueti, ara pintsoroguari. Te iratsipiriasitima itingomibintanti. Tosorintsi inintacaqueri iratsipiriacaigaigueri antagaisati ira antiro ora te ongomeite. ⁵ Tenta onogue iratsipiriacaigái atingomipague, teatisati onogue ogónijintima cara acanque ora te onganinate, aro caninataque anguemisantiri atingomi, angantiro ora caninaro. ⁶ Iroro popagarantaguetiri pitingomi piguireguita arosata. Popënabentiri arota ingantiro ora igáqueri Tosorintsi: intingomibintaguëmi caninasati. ⁷ Pogaiqueneri omagaro pitingomi ora icoguitiaca: aintapague pomeri quirequi, ainta basini pomeri pairoraca. Aintapague basini pomingaigueri, pinguemisantagueri, piniacaninataigueri.

Caninataque anintasantobaguima, omagaro.

⁸ Quero pirebetaguetiri matsiguenga pairorapagueraca, iroonti pinintobaguima pingábintsabacaguima. Ira nintiri itimanamitane aisati imoncaraquero omagaro isanguenare Moisés. ⁹ Icanti:

Quero paguimintaro pijina, quero paguimintari pijime, quero póganti, quero picositanti, quero pinebetaro ora yasinta basinipague.

Tojai basini icanque Moisés:

Pinintiri pitimanamitane pibega cara pininta obiati.

Aroca anganquero oca, aro omoncaraquero antagaisati ora icanque Moisés. ¹⁰ Aroca anintiri atimanamitane, tiguëti angantima angantëmatiri ora te onganinate, ora omoncarantëmaro omagaro isanguenare Moisés.

Quero ocosamaniti cara iribocasitapái Atingomi.

¹¹ Quero ocosamaniti cara iribocasitapái Atingomi Jesoquirisito. Jirai aquemisanqueri, ajitasitaigabitaca ongosamanitë cara iriboquë. Carari yamai intsome aguaigueri, aisati intsome antime caninasati. ¹² Aroca angantaguetopiantëro ora te onganinate, aisati acanta atimini tsitiniriquë, imánacacaro ora acantagueti. Aroca angantopiantëro caninaro, aisati acanta atimini cataguitëriquë, quero ipasiquitiro ora acanque. Aro yamai posiacaro cara pëmbaque onguëtaguetanë, pëmbaque iribocapae Atingomi. Caninataque quero acantaguetiro yamai ora te onganinate, intsome angantiro iroonti ora caninaro. ¹³ Intsome antimaigüe caninasati arota iraniaigacái matsiguenga cara acanquero caninaro. Quero acantaguetiro pairoraca cagaro caninatatsi. Quero pisinguita, quero piconoitari ira cantaguetiro ora quimingaropague; quero aguisabacaga, quero antiro tsinane cagaro ajina, quero ontiri sërari cagari ojime, quero ipëgatsatobaga, quero anebetaro ora yasinta. ¹⁴ Pomemari Atingomi Jesoquirisito arota intingomibintasantimi Irironta Pitingomisonori, pinguemisantiri. Quero picogajiro ora te onganinate, querootisati piquengairo. Pomaniri Atingomi iritosongobentimi cara pingantiro caninaro, iragabiaquemi cara quero pogatsitairo ora quimingari picantagueti jirai.

14

Caninataque irágacanimatobaguima omagaro quemisantatsiri, ira quemisantasantatsi aisati ira quemisantatsi arosantaanti.

¹ Ingoqueca basini quemisantatsiri ingarataigueti cara piquemisantagui, aro págacanimatobaguiaqueri. Teraica irogótasante ora icocacái Atingomi, carari quero pipëgatsatari cara igótabela iriro. ² Ainta cantatsi caninataque opaigue pairoraca: ibatsa aisati omagaro. Carari ainta basini te irogótasante, ijitabeca te ingomeite ajagueri ibatsa, iroonti panguirintspague opë. ³ Aroca pameta paaguiri ibatsa, quero pomantiri ira te iraagueri. Aisati teca pijagueri ibatsa obiro, quero picanti: “Te ingomeite ira aaguira ibatsa”, aroquenta yágacanimatëri iriro Tosorintsi, itomintari. ⁴ ¿Teco Iriroro Tosorintsi Itingomi? ¿Ocaninatico pinganque obiro: “Te ingomeite ira tenta inguemisantiri Atingomi”? Tosorintsi ingantocoqueri iriro ocaninatica ora icantagueti. Aisati Atingomi iragabiaqueri ingantiro caninaro. ⁵ Aisati ainta inganque: “Te omoncaratobaguima ora cataguitëri; pinasitaca patiro cataguitëri anguemisantasantirita Tosorintsi”. Ainta basini inganque: “Caninataque antagaisati cataguitëri anguemisantiri, te inasitima, omagaro cataguitëri irootisati”. Aro ocaninati pigóigüe pairoraca picogui obiati, carari quero pipëgatobagobitaro ora cataguitëripague. ⁶ Ira cantatsi: “Nacasiriconiatiquero patiro cataguitëri naquemisanqueri”, ¿Teco ingogue intingomintimari Atingomi? ¿Pairoro ametocobiritari? Aisati ira aaguira ibatsa, icarasiaqueri Atingomi, itingomintari. ¿Pairoro ametocobiritari? Aisati basini te iraagueri ibatsa, aitosati icarasiaqueri Atingomi,

itingomincari caninasati. ⁷ Teni antimasitima, teni angantanontima ora ocogui eati, teni antimobitima; teatisati angamasitima. ⁸ Aroca antimaque, caninataque antimobitiri Atingomi; anganquineri omagaro ora icocacái. Aroca angamaque, caninataque angamobitiri Iriro aisati. Intsome antingomintimari Atingomi, eiropa caniari, eiropa camatsi, eiropa iraisati yasincáinta. ⁹ Icoqui Quirisito intingomibintaigueri omagaro, caniatatsiri aisati camatsiri. Iroro icamobique Iriro aisati icabiritanaa. ¹⁰ ¿Pairo picantocobiritiri popiguemisantane: “Te inganinate”? ¿Pairo pitsoingobitiri? Nogótacagaiguêmi: aiquenta aniaigapêri Tosorintsi; ingaimacái, aique ingomantêgotaigacái caninaroca ora acantagueti. ¹¹ Jirai ocanti Sanguenari:

Icanque Atingomi: “Pêrosati nacaniati Naanti, aisonori oca nongomantêmica. Aiquenta iroboticagueritotasitaigapêna antagaisati matsiguenga, intingomitaiguêna. Inganquina: ‘Caninaribisonori, Obiro Tosorintsi’ ”.

¹² Aisonori, aiquenta aniaiguêri, aisati ongomantaiguêri omagaro ora acantagueti yaca quibatsica, aique ingantocotaigacái ocaninataca ora acantagueti.

¹³ Te onganinate angantocotasitimari opiguemisantane: “Te onganinate ora icantagueti inta”. Carari intsome asêretima quero antaguiro ora te ongomeite, intsome omitocotiri ingantirota caninaro. ¹⁴ Yogomequina Atingomi Jesus, nigóti ocaninati omagaro ora yoganê. Aitica ora ijique pigasêretacaquimari; teni onganinate cara pinganque quero icantiro. Aroca inganquero, iraguimingasêretêma. Caninataque ajague ibatsa, irari jitasitacha te ingomeite iraguero ibatsa, aro quero yaaguiri iriro tenta inganinate iraguero. ¹⁵ Aisati obiro, aroca pijagamotêri popiguemisantane ira tsorogatsi iraguero iriro, pijagaquerica, aique pigasêretacaquimari; teni onganinate cara pinganque oca. Cara pigasêretacaquimari, teni pinintasantiri. Aroquenta Quirisito icamobiqueri iriro aisati, caninataque quero pitsoingaguiro yamai. ¹⁶ Pijitaigabitaca ocaninati pintaguetague paio-raca, carari basini ijitabeca te. Quero pintaguiro icantocotaguetasitimi. ¹⁷ Aroca iragáantê Tosorintsi aneingomtoquê, aro atingomincari; quero ogasêreta cara api aisati cara óga; iroonti anguemisanque Isêre Tosorintsi, anganquero ora caninaro, antiomotobaquima caninasati, anganinatanê. ¹⁸ Aroca anguemisanquero Isêre, aro caninasati anganquineri Quirisito ora icocacái. Aisati iraniacaninatacái Tosorintsi aisa omatsiguenga. ¹⁹ Aro yamaica intsome onogue anguegasêretaguema, antime caninasati, aisa intsome omitocotobaguima, asintsisêretobaguima, anguemisantacagobaganêma.

²⁰ Aroca yogasêreca popiguemisantane cara iniaquemi paagomotiri ibatsa, quero pamasisêretiri popiguemisantane quero pijocaguiro cara iquemisanti. Aisonori caninataque opaguetiro pairoraca ajagaguitiri pairiraca, carari te onganinate ojocaguiro cara iquemisanti opiguemisantane. ²¹ Aro quero paagasitomotari ibatsa, quero rootisa pisinguotomotari, quero picantiro pairoraca ora amasisêrequeerine basini. ²² Aroca pigóti inintacaquemi Tosorintsi pinganque pairoraca, quero picantopiantomotiri ira te irometimaro, teni inguenguemi. Aroca pigónjinca ocaninati ora picantagueti, aro pinganinatomotiri Tosorintsi. ²³ Carari pijitica te ongomeite pairoraca icanque popiguemisantane, quero picantasaritiro obiati. Aroca pinganquero, pingantaguetomoguero Tosorintsi ora te onganinate. Teca pigóte inintacaquemiro Iriro, teni ongomeite pingantasitimaro.

15

¹ Pinetse, aroca aquemisantasanti, aisati igóiguê eiropa caninaro oca nocomantêmica, caninataque. Carari aisati caninataque anguengeri ira te inguemisantasante, aisati omitocotiri ira te irogótasante; quero acantasaritiro ora ocogabeca eati. ² Iroonti anguengeri opiguemisantane arota inganinate iriro. Aisati intsome omitocotiri arota irogótasantanê, inguemisantasantanê. ³ ¿Teco aisati Quirisito te ingantassitima ora icogabeca Iriro? Ocantocoguero jirai Sanguenariquê:

Quirisito icanqueri Iriri: “Iraeguê quisatsaiguêmi Obiro, iguisatsatêna Naro aisati”.

⁴ Jirai Tosorintsi isanguenatacagueri comantantatsiri. Isanguenataiguêneri ira joríojegui jirai, aisati isanguenare omitococái irooti yamai arota ogóontimaro atimaiguica caninasati. Aisati iroro omitococái abetiro cara itsipiriacaquí matsiguenga, aisati poganinatacái cara aiquenta antiomoguero Tosorintsi Jonogaguíteque. ⁵ ¿Teco Tosorintsi imitocotopiantaiguêmi cara pabetiro ora itsipiriacaquemi aisati icaninatagaiguêmi? Yamai nocogui iromitocotimi piniacaninatobaganêma aisati págacaninatobaguima cara yogomecái Jesoquirisito. ⁶ Nocogui omagaro obirojegui pinguenguema pingantaigue: “Caninarisonoriguente Otororintsite Iriri Atingomi Jesoquirisito”. ⁷ ¿Teco yágacaninataigacái Quirisito? Yamai aisa pinganquima págacaninatobaguema omagaro obiro, aique iraniacaninataiguêri Tosorintsi matsiguenga.

⁸ Jirai ipoque Quirisito yaca quibatsica, Irianti jorío, imitocotaiguêri imatsiguenga, igótacagaiguêri cara te iromatobitêmataigueri Tosorintsi. Aisati igótacagaiguêri cara

iromoncaraquero omagaro ora icantaiguëri jorío Tosorintsi jirai. ⁹ Aisati ipocasique irogótacaiguëri ira basiniati matsiguenga cagari jorío cara icantaneintëgotaiguëri iriro aisati arota ingantaiguë: “Caninarisonori Tosorintsi icantaneintëgotaiguëna aitosati”. Irootisati ocanti Sanguenari:

Icanqueri Iriiri Quirisito: “Nongomantaiguëri ira basiniati matsiguenga: ‘Icaninatasanoti Tosorintsi; intsome angántabentaiguëri’ ”.

¹⁰ Aiti basini Sanguenari cantatsi:

Cagaribi jorío, carari pitsibataigacari iriro picaninabentaiguëri Tosorintsi.

¹¹ Aisati ocanti basini Sanguenari:

Obirojegui cagari jorío, pingante: “Icaninatasanoti Tosorintsi”. Iraniacaninataiguërita antagaisati matsiguenga.

¹² Aisati isanguenaque Isaias:

Ingonijapë imatsiguenga Isaí, iribocapë intingomibintaigapëmari basiniati matsiguenga, inguemisantaigabaqueri iragabisaicotaigapairi.

¹³ Igóiguë cara iromoncaracáiro Tosorintsi omagaro ora icancái, intimacagajái canta Iriro-quënta Jonogaguítequë. Cara piquemisantaiguërinta yamai, nocogui iraganinasëretaiguëmi aisati iromagoriasëretaguëmi arota pintimaigue caninasati. Aisati nocogui ogabiaquëmi Isère Tosorintsi pigueiri Atingomi iripigaimanica aisati pigótasantaigue cara iromoncaraquëmi omagaro ora icanque.

Icanque Paboro: “Tojai naninti nanguguitsate”.

¹⁴ Yamai, nopiguemisantane, nigótocoiguëmi cara picaninataiguë, aisati pigótasantaiguëro Iribinare Tosorintsi, aisati pigóiguë pingomantobaguimaro Iribinare. ¹⁵ Yamai catingasati nasanguenataiguëmi, naquengacaguëmi omagaro ocapague, arota quero pomaguisantiro. Aisonori icábintsëna Tosorintsi, ¹⁶ igáquena nongomantaguetaiguëri basiniati matsiguenga ira cagari jorío. Naquenguitsatomotaiguëri ati icanta Jesoquirisito cara yogabisaicoonti. Nigótacaiguëri ati icanta Tosorintsi arota imaugemari inguemisantiri. Aique ogometasantaiguëri Isère Tosorintsi, oganinasëretaiguëri, yágacananataiguëri Tosorintsi. ¹⁷ Iroto nanganinabentaiguëri cara yagobiacaquina Quirisito naquemisantacaguëri tojai matsiguenga cara nocomantëgotëri Tosorintsi. ¹⁸ Quero ninibatëgotasitaro pairoraca, iroonti naquenguitsatocoque ora icantacaquina Quirisito. Iniaiguëna basiniati matsiguenga aisati iquemaiguëna, iquemisanqueri Tosorintsi. Iroto pitasonaguëquina Isère, nacanquero ora irorai te iraniaiguero matsiguenga, iquenganeintaiganaca. ¹⁹ Aro nocomantaguetaiguëri matsiguenga cara Jerosarënuë, aisa aronisatipague, irooti Iriricoquë, aisati omagaruquitequë. Nocomantëgotëri Quirisito, ati icanta Iriro cara yogabisaicoonti. ²⁰ Nocogasanti nanguenguitsatomotaiguëri iraegui terai irogóguëri Quirisito. Te nongogue naguiatiri basini ira iritsita comantënguitsi. ²¹ Jirai ocanti Sanguenari:

Inguemaque iraegui terai inguemocotiri Quirisito: irogóguëri iraegui terai irogótocoiguëri. ²² Aro tojainta naquenguitsatomotaiguëri ira terai irogótiri, tiguëti nangantima najátasiquimi, te naretaiguëmi obiro. Notigopiantaca. ²³ Carari yamai, aroquenta natsatengaugüneri matsiguengajegui yaca Caninaro Nibarintsi, nocomantaguetaiguëri, aisati tojai osarini nocogabeca naniaiguëmi, ²⁴ iroto nopintsataguëca najáte obirojeguiquë. Nanganinatamotaiguëmi, aique naninti nagaganëma canta irooti Ispaniaquë. Nocogui pomitocotaigabaquina cara najáque, pingábintsanguëna, poniaguëna atraca nanguenaque.

²⁵ Carari yamai naninti najátaje Jerosarënuë, nágaiganaguëneri opiguemisantane canta ²⁶ quirequi ipagantiri Maseroniasati aisati Acayasati. Yapatotaiguëneri coguitiari quirequi. ²⁷ Aroque icogaiguë ingábintsanguëri quemisantatsiri cara Jerosarënuë. Te iromatsiguengatimari carari ira Jerosaresati parintënguicha icomantaguetaiguëri ati ongantima iragabisaicotima. Aro icanque Maseroniasati: “¿Teco inguemisantacagá joriopague? Iroto yamai caninataque angábintsanguëri iriro. Omagantëri quirequi arota iromanantantimari pairoraca coguitiomocari”. ²⁸ Cara nojocanëneri quirequi ira yapatotaiguëneri, aro najáque obirojeguiquë. Aique nagaganëma irooti cara Ispaniaquë. ²⁹ Nigóque cara naretaiguëmi, nanguenguitsatomopëmi, aro anganinabentaiguëri Quirisito.

³⁰ Yamai, nopiguemisantane, eironta iraisati Quirisito, aquemisantaiguëri, aisati pogometagaicái Isère Tosorintsi anintobaguima, nocogui yamai pomitocotaiguëna, pomanocotaiguëna Tosorintsiquë arota iragabiaguina, ³¹ arota quero yágaiguina tsoengatsiri cara Joreaquë. Aisati pomanocotaiguëri Jerosaresati cara inganinabentaigabaqueri quirequi ipagantaiguëri irapiguemisantane. ³² Aique aroca iranintacaquina Tosorintsi, naretaigapëmi, tojai nanganinatapë. Aro nomagoriasëretapë arosata, aisati aganinasëretobaquima. ³³ Nocoguini iromagoriasëretaguëmi Tosorintsi, coshoni irogaiguëmi. Aro ocaratí, amen.

16

Ibetsataigari Iromasati.

¹ Yamai naninti pingábintsaignabaquero Jebe ora nigáque obiroquë. Iroro opiguemisantane opaniaca Senquereaquë cara omitocotaiguëri tojai quemisantatsiri. ² Págacanimatobëro caninasati, iroronta quemisanqueri Atingomi aisati. Pomitocotaigabaquero, pomero ora coguimotaro. Yaca omitocotaiguëri tojai quemisantatsiri, aisati omitocoquena naro. ³ Pobetsatinaro Pirisira aisati Aquira ojime. Tojai imitocotaiguëna cara nacantaiguëneri Jesoquisrito. ⁴ Jirai icogaigabitaca iróguiname matsiguenga, carari pogabisaicoquena Pirisira aisati Aquira. Ocábintsëna pogabisaicoquena cara pënibaque iróguirome iroro aisati ojime. Pënibaqueme ingamobitaiguëna. Tojai nacarasaitaiguëri, naro aisati omagaro opiguemisantane ira cagari jorío. ⁵ Aisati pobetsataiguenari omagaro quemisantatsiri botoitacha cara ibangoquë Aquira. Pobetsatinari aisati Epeneto; nanintantiri iroro. Jirai cara naquenguissataguetomotaiguëri Asiasati, iritsita quemisanqueri Quirisito.

⁶ Pobetsatinaro María, iroronta omitocotasantaiguëmi. ⁷ Aisati pobetsataiguenari nomatsiguenga Antorónico aisati Jonias. Jirai itsibaitaiguëna cara yomianquena iromingamentoquë. Iniacaninatasantaiguëri iragátane Atingomi. Ibaitaiguëna cara iquemisantaguëri Quirisito jirai. ⁸ Pobetsatinari Ampiriato, iquemisanqueri Atingomi; tojai nanintiri. ⁹ Pobetsatinari Orobano, icaraitaiguëna cara nocomantëgotaguetaguëri Quirisito. Aisati Isitaquis, pobetsatinari iroro, nanintane. ¹⁰ Aisati pobetsatinari Aperis, ira iniacaninatë Quirisito. Pobetsataiguenari opiguemisantane cara ibangoquë Arisitóboro. ¹¹ Pobetsatinari nomatsiguenga Eroriano. Aisati pobetsataiguenari ira quemisantaiguëri Atingomi cara ibangoquë Narisiso. ¹² Pobetsataiguenaro Tirijena aisati Tirijosa, ocanguineri Atingomi. Aisati ocanta Pérísira, pobetsatinaro. Inintantiro Atingomi, Ira ocantasantine iroro. ¹³ Pobetsataiguenari Irojo igoigane Atingomi, aisati iniro, ora cantaca nasi inato. ¹⁴ Aisati Asínquirito, Jeregonte, Erimes, Patorobas, Eremas, pobetsataiguenari iroro, aisati iraequi botoitacha itsibaitaiga. ¹⁵ Aisati pobetsataiguenari Jirórogo aisati Joria, Nereo aisati iritsiro, Orimpia aisati omagaro quemisantaiguëri cara yapatotaiga. ¹⁶ Cara popatotaiguëma, págacanimatobagaiguema, pinintobagaiguema. Ibetsataiguëmi antagaisati quemisantaiguëri Quirisito, yapatobiritaigacarari negaraca itimaigui.

¹⁷ Yamai nangantasantaiguëmi, nopiguemisantane, pigóiguëri ira cantobagaigacha cat-simari, yogometaguëri quemisantatsiri cara iripëgatobaguima, aisati icantacaqueri ora te ongomeite. Aisati te iraninte pinguemisantiro ora yogometaguëmi iragátaneegui Atingomi. Pigamaiguemari, quero pitsibatari, quero poguaitiri. ¹⁸ Teni ingantineri ora icocagaiguëri Atingomi Quirisito, iroonti icantasitaigaro pairoraca icogagueti iriati. Caninasati inibatabitaca, carari icogaiguë iromatobitaiguëri iraequi te irogótasante.

¹⁹ Igótocoiguëmi omagaro quemisantatsiri cara piquemisantasanti, iroro nacaninabentaguetaguëmi. Carari nocogui pigótasantaigue pingantiro omagaro ora caninaro; iroro-querai ora te onganinate, quero picantëmatiro. ²⁰ Nocoguini iromagoriasëretagaiguëmi Tosorintsi arota pintimaigue caninasati. Quero ocosamaniti cara Tosorintsi irobotanëri Satanás aisati querota intaguimiro ora te ongomeite. Ingábintsaignemita Atingomi Jesoquisrito. ²¹ Ibetsataiguëmi Timoteo, ira tsipatina cara nacanguineri Atingomi. Aisati ibetsataiguëmi nomatsiguenga Irosio, Jasón, aisati Sosípatoro. ²² Yamai naro Térísio sanguenatëneri Paboro oca sanguenarica. Aisati naro, naquemisanneri Atingomi, nobetsataiguëmi naro. ²³ Ibetsataiguëmi Gayo, ira agasobiquina ibangoquë aitosati ira bototaiguëri quemisantatsiri yaca. ²⁴ Ibetsataiguëmi aisati Erásito ira omisantineri iguireguite icaegui timaigatsi yaca. Aitosati ibetsataiguëmi opiguemisantane jitacha Coarato.

Icaninabentiri Tosorintsi Paboro aisati itsonquero isanguenare.

²⁵ Yamai intsome antingomintimari Tosorintsi, Ira agabiací cara aquemisantasantëri, cara asëretasantaigacarari oca naquenguissatocoquerica Jesoquisrito. Te irogótaigue jirainisati cara iriboquë Quirisito iragabisaicotajái. Teraiquerai ingomantiri Tosorintsi, ²⁶ carari yamai igótacací. Isanguenatacaqueri comantantatsiri jirai, aisati igátaiguëna naro, aro nocomantaiguëri omagaro matsiguenga: “Caninataque pinguemisantaiguëri Tosorintsi catimanagerisonori”. ²⁷ Tojaisonorri igótasanti Irianti, paniro ini. Intsome, antagaisati quemisantaiguëri Jesoquisrito, angante: “Icaninatasantoti Tosorintsi”. Aro ocarati, amen. *Paboro*

YOGUIBATĚ PABORO ISANGUENAQUINERI CORINTOSATI

Paboro ibetsataigari Corintosati.

¹ ¿Aintajeguibi, nopiguemisantacagane canta Corintoquĕ? Naro Paboro nasanguenataigu-
miro oca. Icoiguĕna Tosorintsi iragátane Quirisito Ira jitacha Jesos aisati. Itsibatina yaca
opiguemisantacagane ira jitacha Sósitenes. ² Nasanguenataiguimiro obiro quemisantat-
siri ira botolbiritari Quirisito aisati Tosorintsi canta Corintoquĕ. Obiro yosaasĕretaiguĕ
Jesoquisrito. Aroquenta piquemisanqueri Atingomi iniacaninataiguĕmi caninari. Yamai
pomatsiguengataigacari Iriro aisati picantaigari antagaaisati quemisantatsiri negaraca
itimaigui ira abentaigari Atingomi. ³ Nocoguini pĕrosati ingábintsaiquĕmi Pabati Tosorintsi
aisati iromagoriasĕretaiguĕmi arota intimacagaiguĕmi caninasati. Ingantaiguemirota
Iriro aisati Atingomi Jesoquisrito.

Paboro icarasiaqueri Tosorintsi icábintsaiquĕrinta Corintosati.

⁴ Pĕrosati nacarasiatiri Tosorintsi aroquenta icábintsaiquĕmi panirootipaquĕ obiro-
jegui cara piquemisanqueri Jesoquisrito. ⁵ Aroquenta piquemisanqueri Quirisito, yo-
ganinasĕretaiguĕmi, ipasiniatitacagaiguĕmi. Yamai pinibataigui basiniati aroquentori-
asĕretaiguĕmi arota intimacagaiguĕmi caninasati. Ingantaiguemirota Iriro iquianca-
gaiguĕmi basiniati. ⁶ Aroquenta omoncarapa irinibare Quirisito ora igáquena noco-
mantaiguĕmi jirai, yoganinataiguĕmi cara icanquĕ Iriro. ⁷ Aisati icanacagaiguĕmi Jeso-
quisrito pintineri antagaaisati ora ininti Iriro arota pintimobitaigueri caninasati irooti
cara piguiaigabaqueri cara iribocapae Atingomi. ⁸ Iromitocotaiguĕmi aiqero pijátanĕtigue
pinguemisantaiganaqueri Quirisito irooti cara cataguitiquĕ cara ingonijapae Atingomi
arota quero pairi aguibitaquimironĕ pairoraca. ⁹ Pĕrosati imoncaratiro Tosorintsi ora
icanti. Iriro coiguĕmi arota pigóigueri Itomi aisati pinguengasĕretaiguemari Atingomi
Jesoquisrito.

Icanquĕ Paboro: “Pinintobagaiguema”.

¹⁰ Nopiguemisantacagane, nocogasanti pingantaiguema caninasati. Caninataquĕ cara
pinguengasĕretaiguema. Teni ongomeite pinganaitobaguima. ¹¹ Nacantaiguĕmi negaca,
nopiguemisantane, icomantaigapĕnanta omeraropague Coroe cara picanaitobagaigaca
canta. ¹² Yamai nigóquĕ ainta obirojeguiquĕ ira cantatsi: “Naro irogomere Paboro”.
Aintasati basini icanti: “Naro irogomere Aporo”. Aintasati icanquĕ: “Naro irogomere
Sejas”. Aisati ainta icanĕ: “Naro irogomere Quirisito”. ¹³ ¿Casiriconiatipagueco ini Quirisito?
¿Nipĕicobiritaiguĕmico naró? ¿Naroco pobaotisabiritaigaca? Tesonori. ¹⁴ Yamai nacarsi-
aqueri Tosorintsi tenta nomaotisataiguĕmi naró. Paniro nobaotísatĕri ira Quirisipo,
aisati Gayo. ¹⁵ Aro quero pairi cantasitachane: “Nobaotisabiricari Paboro”. ¹⁶ Aisati,
nobaotísataiguĕri imatsiguenga Isitéjana. Teni nanguengairi basini ira nobaotísatĕ.

¹⁷ Teni iragátina Quirisito nomaotísataigueri matsiguenga, patiro igáquena nongoman-
taguetiri ora Caninaro Nibarintsi. Icoiguini Quirisito nongomantĕgotĕri catingasati arota
inguemobĕro antagaaisati matsiguenga, inguemisanqueri Jesoquisrito, aro iragabisaicotaj-
jiri Tosorintsi. Aro quero nocomantĕgotasitari Ira Quirisito cara icamobicái.

Cara igótabeta matsiguenga aisati cara igótasanti Tosorintsi.

¹⁸ Nocomantĕgotĕri Quirisito icamobicái corosiquĕ, carari ainta matsiguenga
isĕrontaigacaró icanquĕ: “Itsoigani Paboro”. Irianti játĕnguistsine cara Sharincabeniquĕ
tenta irabisaicote. Carari igóiguĕ eiro yogabisaicotajái Tosorintsi itasorintsibiricái cara
aquemisanqueri Quirisito. ¹⁹ Jiraisonori isanguenaquĕ comantantatsiri:
Icanquĕ Tosorintsi: “Nogótacagui ira ogótabetachari cara te irogóte; te ingantina nibega
Naro, Naronta ogótasano tiro omagaro. Aisati nobegopitairi ora iquenga ira
quingabitachari”.

Paboro itsoroqueri ira Corintosati.

²⁰ ¿Atiraca ingantima yamai ogótabetachari? ¿Atiraca ingantima ira ogometobagabetachara yaca quibatsica?
isanguenare Moisés? ¿Aisati atiraca ingantima ira ogometobagabetachara yaca quibatsica?
Aroque icanqueri Tosorintsi ira ogótabetachara icantajari ira te irogótĕmate. ²¹ Igóti Tosor-
intsi cara ainta sĕrari ogótabetacha quero yareta iriati igótiri Tosorintsi. Iroto iquengaguĕca
Tosorintsi iragabisaicotajiri matsiguenga ira quemisanquerine cara Nibarintsiquĕ Cani-
naro. Cara nocomantĕgotĕri Quirisito ainta tojai isĕrontaigabacaró Nibarintsi. ²² Ira joríojegui

icogaigui cara natasongante ora te oneingani jirai arota iraniaantaiguena itsibatina Tosorintsi, carari ira cagari jorío, irianti Guiresiasati, icogaigui cara nogótasantacaguiro ora irorai ogótagantsi iquengaiga iriati. ²³ Përosati nocomantaguetiri matsiguenga nocomantëgotiri cara icamobicái Quirisito corosiquè arota iragabisaicotajái. Icomëtobacaro joríojegui; iroro iguisaneintaguèquina jorío, aisati isërontaiguèna Guiresiasati, icanque: “Te ongemeite ora yogomeanti Paboro”. ²⁴ Ainta ira icoiguè Tosorintsi, jemita iroro jorío, jemita iroro Guiresiasati, ora nocomantaguequeri poniaguèri itasorintsite Quirisito iragabisaicoontëmari ira quemisanquerine. Iroro aisati igótacaqueri matsiguenga Tosorintsi Irironta ogótasantatsi. ²⁵ ¿Pairo itsoingobitaiguèri matsiguenga Ira Tosorintsi? Iroro obantasantatsi igóti. Aitosati Iroro obantasantatsi isintsiti. Teni irine matsiguenga cantimarine Iroro.

²⁶ Nopiguemisantacagane, pinguengaiguema ati picantaigaca. Isërontaiguèmi pomatsiguenga ira te inguemisante, icantocoquemi: “Te irogóigue quemisantatsiri, teatisati irine itingomi irirojeguiquè. Te irobate pairiraca”. Aisonori teni irini tojai ogótacagantatsiri obiropuè. Teatisati obatacagantatsiri. ²⁷ Isërontaiguèmi matsiguenga, carari Tosorintsi icoiguèri ira te irogóigue, carari yogabisaicotajiri arota iripasiguitaiganaque ogótatsiri. Aisati icoiguèri ira te irisintsitaigue arota iraguibasiguitiri ira itingomipague. ²⁸ Icoigasantaiguèri ira te inganinate aisati ira imaintaigui matsiguenga. Ira te inganinate icoiguèri Tosorintsi arota iraguibasiguitaigueri matsiguenga ira jitasitacha caninari. ²⁹ Icanque negaca Tosorintsi arota catingsatiquè Iroro quero pairi jitachane caninari. ³⁰ Carari yogabisaicotajái Tosorintsi yoganiataái aroquenta aquemisantaiguèri Jesoquirisito Itomi. Igótasanotacái ora icantocobentái. Aisati yoganinatasantacái, yogéteseretái. Itomintacái iraisisonori. Ijocobentajairo ora acantagueti te onganinate icamobicáinta Quirisito. ³¹ Isanguenaque comantantatsiri jiraisonori Sanguenariquè: Quero aniacaninata eati. Patiro intsome angantocobentiri Atingomi: “Iroro caninarisonoriguinte”.

2

Ati icanta Paboro icomantaguequeri matsiguenga Caninaro Nibarintsi.

¹ Nopiguemisantacagane, cara niáque jirai obiropuè, nocomantaiguèmiro catinasati Irinibare Tosorintsi, te nongomantimi cométaro nanibare arota piniacaninatina naro caninari. ² Patiro nocoque nongomantëgotiri Jesoquirisito Ira ipëicitaguè matsiguenga, icamobicái. Teni nanguenguisatimiro basiniati. ³ Cara ninasegui obiropuè jirai, notsoroque cara queroa catinasati nocomantëgotiri Quirisito. ⁴ Te nanibate caninatsaro nanibare ora nigótabeca, carari naquenguisatomotaiguèmiro Caninaro Nibarintsi irasi Tosorintsi. Omitocoquinanta Isère ouemisantacaguemiro Irinibare Tosorintsi. Aisati itasongobenquimi Iroro. Aro piquemisantaiguèri. ⁵ Nocoque pinguemisantiri Tosorintsi cara yoniaguèmiro Irinibare ora yogabisaicoontaimi aisa itasongobentaiguèmi Iroro, tenta iroro pabisacoontima irinibare matsiguenga.

⁶ Carari ninibatiri ora ogótagantsisonori ira quemisantantatsiri, ira ogótasantiri Tosorintsi. Teni nanibataigue aisa ingantima ira te inguemisantiri Tosorintsi. Teatisati nanibataigue ibegaiga itingomipague ira camatsi omanapague. ⁷ Ninibatëgotaguero ora ogótagantsisonori paniacha Tosorintsiquè ora ogometocotiri Quirisito. Te ogótingani jirai, carari yamai igótacacairo Tosorintsi ora iquianca jiraisonori teraiquerai irobetsiquero pairorapagueraca. Iquianca iragáqueri Quirisito iragabisaicotajiri antagaísati quemisanquerine. ⁸ Ira itingomipague yaca quibatsica te irogóigue ora iquianca Tosorintsi cara igáqueri Jesoquirisito Itomi yaca. Arome irogóiguero, querome ipëicitiri Quirisito querome icami Atingomi caninarisonoriguinte. ⁹ Iroro isanguenaque jiraisonori:

Aiti ora yobetsiquineri quemisantatsiri Tosorintsi. Te oneingani, teatisati inguemocitiro matsiguenga, teatisati inguengaiguero, carari Tosorintsi yobetsiquineri ira nintaiguèri.

¹⁰ Te irogóigue matsiguenga ora iquianca Tosorintsi, carari yamai Tosorintsi igótacacairo eironta quemisanqueri. Yoniagancaro Isère Tosorintsi aroquenta pigótasantiro Isère antagaísati. Pigótasantiro omagaro ora iquianca Tosorintsi. ¹¹ ¿Pairo ogótatsi ora iquianca basini matsiguenga? Paniro igótiro iriati. Aisa ocanta teni pairi ogótirone ora iquianca Tosorintsi. Patiro Isère pigóti. ¹² Teni angungasëretima aisa acantari ira matsiguengajegui te inguemisante, carari ipasitacairo cara icábintsasantaái Tosorintsi. ¹³ Cara inibatëgotëro cara icábintsagaicái Tosorintsi, inibatancaro nibarintsi ora pogomecái Isère Tosorintsi, cagaro irinibare matsiguengapague. Pogometocoqueri Tosorintsi nibarintsiquè ora pogomecái Isère. Iroro aquemaguèquero eiro quemisantatsi pinancáinta Isère.

¹⁴ Ira te inguemisantiri Quirisito teni inantimari Isère Tosorintsi. Teatisati inguemiro ora pogometi isère Caninaro Tosorintsi. Isërontacaro tenta inguemiro. Icanti: “Teni

onganinate; teni onguemingani”. Quero pairi quemirone queroca Iroro quemaguiri Isère Tosorintsi. ¹⁵ Ira quemisantatsi pinancari Caninaro Isère iquemaquero omagaro aronta oquemacaguiri Isère Tosorintsi. Ira te inguemisante icantocoqueri quemisantatsiri, “Teni nanguemiri iriro”. ¹⁶ ¿Aintaco ira ogótiro ora iquianca Tosorintsi? ¿Aintaco ira ogometiri Iriro? Tesonori. Carari eiro igótiro ora iquianca Quirisito pogomecáinta Isère Caninaro.

3

Te inguenguema Corintosati.

¹ Aisati, nopiguemisantacagane, nigóque piquemisanqueri Quirisito jirai, carari terai pinguemisantantiro antagaisati ora pogometaguèmi Isère Tosorintsi. Iroro ora te nongomantaguètaiguemi ora nocogabeca. Aisati picantaigari ibega itiomijani janequi, te pigótasante. Posigari irirai parintacha igóqueri Quirisito. ² Jirai, patriro nocomantaguèmiro ora te ongomèate. Iroonti cantaca tsoimitsi ora yóga janequi terainta iraguèri ibatsa. Aisati obirojegui picantari janequi, terai pinguemisantantiro ora irasi Quirisito irooti yamai. ³ Terai pinguemisantaiguero Isère Tosorintsi terainta pinguenguema. Pijonobaca, pipégatsatobaca aisati picantari ibegaiga ira terai inguemisantiri Quirisito. ⁴ Cara icanti paniro: “Naro irogomere Paboro”, aisati basini cantatsi: “Naro irogomere Aporo”, ¿Cantaigaquibi matsiguenga ira terai inguemisantaiguero? ⁵ Pinetse. ¿Pairo ijita Aporo? ¿Pairo naro? Naantijegui iromeraro Tosorintsi ipaguetaiguèna panirootipague ora nacantineri, nomitocotaiguèmi naquemisantacaguemi.

⁶ Naro osigari panguitatsiri; nocomantaguequi ora Nibarintsi Caninaro cantaca oguitso. Imitocoquemi Aporo cara piquemisantaigueraqueri Quirisito; Aporo aisa icantari ira areincotiro nija oguitsoquè. Carari paniro Tosorintsi yogaguibiaquero. ⁷ Iroro cagarina naro obatatsi cara nocomantaguèmiro Irinibare Tosorintsi; cagarisati Aporo obatatsi cara imitocoiguèmi piquemisantantiri Quirisito. Naanti panguitatsi. Irianti areincotiro. Carari paniro Tosorintsi obatatsi Irironta agaguibiaquero oguitso iroontinta Irinibare. ⁸ Aisati imoncaratobaca ira panguitatsi aisati ira areincotiro. Aisati icantobaca. Ira casintaro panguirintsi iripènantentiri panirootipague ira antineri. ⁹ Aisati nacantari Aporo, naantijegui iromeraro Tosorintsi. Obirojegui quemisantatsiri aisa picantaro panguirintsi ora intira Tosorintsi. Aitosati picantaro pongotsi ora yobetsiqui Tosorintsi. ¹⁰ Naro aisati nacantari ogótasantatsiri yobetsiqui pongotsi. Icábintsèna Tosorintsi nantineri cara nocomantegóteri Quirisito. Aroque noguèmiro otingomipoa carari cagaro anchapoa, Irianti Quirisito. Yamai yobetsiquini basini; yogometocoquemi Quirisito. Caninataque iragamema antagaisati ira antatsi. ¹¹ Quero pairi oguero basini otingomipoa. Aroque noguèro naro. Teni inae basini. Ora otingomipoa, Irianti paniro Jesoquirisito. ¹² Ira obetsicatsi pongotsi, ¿Pairo irantèmaro? ¿Irantèmaroco oro, quirequi, mopè caninaro? ¿Oraco anchato, tobari, choco? ¿Ora coshori? ¿Oraco patsagatsi? ¿Inganquero ora caninaro, oraco te onganinate? ¹³ Aiquenta ongonijaque ora yobetsiquè paniroopague irogótasantacaquerinta matsiguenga Tosorintsi. Ora obetsicaga pongotsi caninarosonori, quero pitaga. Aroca obetsicabitèma ora te onguèshote, aro otaquima. Cara catagueriquè cara iribocapae Jesoquirisito irogóntasantèmaro antagaisati ora intineri iromeraro caninarosonorica. ¹⁴ Queroca pitaga ora yobetsiquè matsiguenga iroronta caninaro, aro inganquero Tosorintsi: “Caninasati picanquero”. ¹⁵ Aroca otaquema ora yobetsiquè quemisantatsiri, tenta onguèshote, iragàretasantèma, carari iragabisaicotajiri iriro Tosorintsi. Quero iáti Sharincabeniquè. Querootsati icantiri Tosorintsi: “Picanque caninasati”.

¹⁶ ¿Teco pigóigue pinaiguèmi Isère Tosorintsi obirojeguiquè? Obirojegui cantaquibi ibango. ¹⁷ Queroca pomisantiro ibango Tosorintsi, aroca pamasiquero, ingasitigataiguèmi. Ocaninatasati ibango Tosorintsi. Ora ibango obiantieguinta quemisantatsi botoibiritari Tosorintsi piquemisantaiguèrinta Iriro. ¹⁸ Quero pamatobita obiati. Aintaca paniro obirojeguiquè iquianca iriati ogótsatsiri yaca quibatsica, yamatobica iriati. Ijtabeca iriro caninaro ora iquenga. Caninataque inguenguema aisati inganque: “Arosataanti nigóque. Pogometina”. Aro irogótasantacaqueri iriro Tosorintsi. ¹⁹ Ainta tojai ira te inguemisantiri Tosorintsi. Ijica igóque iriro, carari Tosorintsi iniaqueri te irogótemate. Jirasonori isanguenague:

Ira tsmiripague ijtabeca tiguèti águirine, iroro cantènguicha iromaboquèri matsiguenga iráqueri iragamaguèri. Aisati icantari antagaisati ira jitabitacha igótasanti, omanapague iromaboquèri Tosorintsi iraguipaisiguitèri.

²⁰ Aisati ocanti Sanguenari jirai:

Igóti Atingomi te onganinate ora iquenguagabitaca ira jitacha ogótasantatsiri.

²¹ Caninataque quero pairi aguiatirine matsiguenga; paniro pinguemisantiri Quirisito. Piguiatiri Iriro. Aisonori yobetsicaiguëmiro Tosorinti antagaisati ora inatsi arota pinganinabentaiguero. ²² Iroro nacantaguëtaiguëmi: igáquena Tosorinti cara nomitocotaiguemi. Aisati igáqueri Aporo, aisati Sejas, iromitocotaiguemi aisati. Ipaiguëmiro Tosorinti omagaro inatsi quibatsiquë arota pinganinabenquero. Aroca përosati pintime, pinganinate. Aroca pingamaque, aisati pinganinate. Pinganinabentiro ora inatsi yamai, aisati ora inënguitsine aiquenta iroronta pasiegui. ²³ Aisati obirojegui irasi Quirisito: piquemisanquerinta icaninabenquimi Iriro. Aroquenta Quirisito irasi Tosorinti icaninabenqueri Iriro Tosorinti.

4

Ora icantaiguë iragátane Quirisito.

¹ Yamai pigóiguëna naroeui iromeraro Quirisito. Igáquena Tosorinti noniaguetaigueri matsiguengajegui ora iquianca Tosorinti jiraisonori ora imánaque, te irogótro matsiguenga. ² Caninataque inganquero iromeraro antagaisati icocaqueri casintari. Aisa nacanta nocogasanti nanganquero omagaro igáquena Tosorinti cara nongomantantaiguëmiro catingsati Irinibare Tosorinti. ³ Jemita ora pingueincoquina obirojegui. Jemitasati ora ingueincoquina matsiguengajegui. Naro teni nongomantëgotima caninarinaca naro. ⁴ Najica naro te nangantaguete ora te onganinate, carari quero nacanti: “Naro caninari”. Paniro Atingomi comantëgotënanane naroca caninari. ⁵ Iroro nocomantobitaiguimi yamai, quero picantocotiri pairiraca: “Picantaguetomotiri Tosorinti”. Aiquenta iribocapae Atingomi irosanguëgitocopëro omagaro ora mânabitënguicha yamai tsitiniguitiquë. Irogónijanquero ora icanque matsiguenga aisati ora iquianca. Pairiraca iraniacaninatapë Atingomi, ingantaiguëri Tosorinti: “Picaninati”.

⁶ Pinetsaigue, nopiguemisantacagane. Nasanguenatococa naati aisati nasanguenatococueri Aporo arota pigóigue quero poguibatiri pairiraca matsiguenga. Quero poguibatiri paniro iroontita pomaintiri ira basini. Patiro pinganque cara ocanti Sanguenari. ⁷ ¿Pairo pijibirica obiati obatatsiri? ¿Teco Iriro obetsicáirone Tosorinti ipáairo antagaisati ora asinta? ¿Aitico pasi ora te imemiro Tosorinti? Aroca ipëmiro ¿Pairo piquengasantobita obiati aisati cantaca te Tosorinti pemirone? ⁸ ¿Aroque págaiguëro obirojegui omagaro ora ininti Tosorinti imauguemi? ¿Obirojegui yamai casintachari? ¿Yamai obiroco itingomi pigáanti, naroqueari pijocaiganaque jaaquerora? Nocogabeca aisonorime pigáanti pisobicaiguëme pigáantomentoque, arota nantsibataiguëmime naroeui aisati pigáantanequë. ⁹ Najique Tosorinti yogaiguëna carantatsiri naroeui iragátane cantaca iromeraro matsiguenga. Inetsaiguëna matsiguengajegui ingantocotaiguëna: “Teni ingomeite quemisantatsiri; caninataque ingamaigue antagaisati”. Aisati inetsaiguëna ironomire Tosorinti. ¹⁰ Icantocotaiguëna matsiguenga cara te naneicotima aroquenta noguataiguëri Quirisito. Inibatëgotasitaiguëna: “Te irogóte”. Carari piqueincotaiga obiatiëgui pigóiguë omagaro irasi Quirisito. Aisati obirojegui sintsiri, carari te nasintsite naroeui. Iniacaninataiguëmi obirojegui matsiguenga, carari imaintaiguëna naro. ¹¹ Përosati irooti yamai nitaseaque, nomiretapininque, aisati nitsoincotaigaca nomanchaqui. Ipasataiguëna matsiguenga. Teni ine nasi nobango: naquenaquenatagueque. ¹² Nomagotaguëni nantaiguininta nobacoquë. Cara inguisatsataiguëna matsiguenga, nomanocotanëtiiguiri Tosorinti: “Pabati, pingantaneintëgotiri iraegui quisatsatëna”. Aisati cara inguisaiguëna catsimari, aro nabequero, quero nipëgataari. Përosati naquenguisataguequeri matsiguenga ora Caninaro Nibarintsi. ¹³ Aroca ingantocotasitaguequina, notabitaigabaqueri antsinisati. Icantaguëna: “Obirojegui cajara”. Icantocoiguina: “Teni ingomeite Paboro aisa itsipajegui”. Icantaguina cantacha nega irooti yamai.

¹⁴ Teni nasanguenataguemiro oca arota naguipasiguitaiguemi, iroonti nacamanaaiguimi nanintaiguëmini cantaquibinta nasisonori najaniquite obirojegui. ¹⁵ Jirai paniro naro naquemisantacaquemiro cara nocomantaigapëmiro ora Caninaro Nibarintsi irasi Quirisito. Naro aisa nacantari ibega piri naquemisantacaqueminta. Yamai ainta tojai basini ira ogometaguimi cara aiquero pinguemisantaiguemiri Quirisito, carari teni irine tojai casintimi panironanta naro cantaquina piri. ¹⁶ Iroro ora nacantasantobitaiguëmi piguataiguena. Aisati pingantaiguena nibega naro. ¹⁷ Nagáqueri Timoteo cara iriátë obirojeguiquë. Naquemisantacaqueri jirai. Yamai iriro cantaca notomi nanintane. Icanque omagaro ora icogui Atingomi. Yamai inguiancagajimiro ati ocanta cara nocomantëgotaguequeri Jesoquisisito cara atiraca yapatobiritaigari Quirisito quemisantatsiri. ¹⁸ Ainta obirojeguiquë ira quingasantabitacha iriati, icanti: “Querojenga ipocaji Paboro yaca”. ¹⁹ Carari aroca iranintacaquina Atingomi, aro naniaigaantimi obirojegui canta omanapague. Quero naquemisantasiparo ora irinibare ira quingasantacha iriati, carari nogópëri ira aisonorica intasantineri Tosorinti. ²⁰ Iriroca Atingomi Tosorinti, quero

inibatasita ora caninatsaro, patiro antëneri ora caninaro icogui Iriri. ²¹ ¿Pairo picogaigui? ¿Picoguico cara najátasiquimi nanguisatsataigapëmi, picogaiguico nanintaigapëmi aisati nangantaneintëgotaigapëmi?

5

Inintacaqueri Corintosati ira te inganinate.

¹ Icomantëquina pitsibataigari ira águiro irajitane. Aintanta sérari yáguéro inirotsari ora yágabita iriri. Teni ingomeite ira cantiro negaca. Tesonori ingantëmatiro negaca matsiguenga ira te irogótiri Tosorintsi. ² ¿Përosati piquengasantaiga obiatiegui? ¿Pairo te pigasëretobitaiguema? ¿Pairo te pijocobitaigueri ira cantëro ora quimingari obirojeguiquë cara papatotaiga? Caninataque quero pinintacaguiri ipoqui. ³ Yamai teni nantsibataiguemi, carari përosati nauengasëretaiquëmi, aisati nangantimame nineme obirojeguiquë. Aroque nocomantëgotëri ira águéro inirotsari. Teni ingomeite. ⁴ Popatobiritaiguemari Atingomi Jesoquisrito. Aro ora itasorintsite ontsibataiguëmi obirojegui, ogótacagaiguëmi Isère ora caninaro pinganque. Aisati naro nanguengasëretaiquëmi yaca. ⁵ Pomisotocaigueri ira antaguetatsi ora quimingari arota iratsipiriacaqueri Satanás. Aro ingasitigatagantëri Tosorintsi arota iraniajima, ingomantëgotëma cara icantaguetiro ora te onganinate. Aique aroca irojocajiro quimingari, iragabisaicotajiri Atingomi Jesoquisrito cara iribocapae.

⁶ ¿Pairo piquengasantobitaiga obiatiegui? ¿Teco pigóigue aitica arosata ora piponganta pan, aro otsatenganëro omagaro pan oponganë? ⁷ Pijocajiro antagaisati ora te ongomeite cara obirojeguiquë quemisantatsiri. Ora quimngaro poguimingataiganaquimi potsatenganaquimi posigaro ora piponganta pan potsatenganëro omagaro pan. Aro pinaiguë caninari cantaca pan te ine ora piponganta. Picaninataigui obirojegui yamai aroquenta icamobitaiguëmi Jesoquisrito yoganasëretaiquëmi. Iriri cantaca oisha ira camobitaiguëri joríojegui jiraisonori canta Ejípitoquë cara yogabisaicotagairi Tosorintsi. Yabisanaqueri jonoquë ironomire Tosorintsi te iragamaguiri jorío aitinta iraraa oisha. ⁸ Aro intsome anganinabentiri Quirisito. Intsome angante ora caninari osiaquimaro pan ora te ine piponganta. Yamai imitocotaigái Quirisito arota quero amatobianti, querootisati aguisatantati, querootisati acantiro pairorapagueraca cagaro caninaro. Ora te onganinate posigaro pan ora inatsi ora piponganta.

⁹ Jirai nasanguenataiguëmi, nacantaigabitëmi quero piconagari ira antiro tsinane cagaro iina. ¹⁰ Te nangantimi: “Quero pitsibatari ira te inguemisantiri Tosorintsi”. Te nanguencotaigueri irirojegui te inguemisante ira antiro cagaro iina, ira cogatsi ora yasinta basini, ira cositatsi, ira manëgotabitari ibabane cagari Tosorintsi. Aroca pijocasantanëri irirojegui tiguëti pinguenajera. ¹¹ Nasanguenatocotiri yamai ira cantatsi: “Naro popiguemisantacagane”. Aroca intiro tsinane cagaro iina, quero poguëshonitaigari. Aisa icanta ira cogasantiro ora yasintagueta basini, aisati ira manëgotabitari ibabane cagari Tosorintsi, aisati pitsatsatitachari, aisati singuitachari, aisati cosirinti. Yamai nacantasantaiguimi, quero pitsibatari papëgotiri irirojegui. ¹²⁻¹³ Naro quero nocomantëgotiri iraequi te inguemisante; paniro Tosorintsi ingomantëgotaiguëri ora inganque aisati negaraca iriáiguë. Carari obirojegui pingomantëgotaigueri ira popiguemisantacagane. Iroro yamaica pijoguëtaigueri ira te ingomeite ira picarataigabitaca. Quero pijitajiri popiguemisantane.

6

Cara irisintsitaboaquimaca quemisantatsiri.

¹ Aroca pinguisaneinqueri popiguemisantacagane, ¿Caninataquico pabenquimari ira jitacha joes te inguemisante arota ingomantëgotëmi pairoraca pinganque? Teni. Caninataque pabentimari basini popiguemisantacagane. ² ¿Teco pigóigueri iraequi quemisantatsiri comantëgotaiguërine antagaisati matsiguenga ora inganque? Aroca pingomantëgotaiguëri omagaro matsiguenga aiuenta, ¿Pairo te pingomantëgobiritiri popiguemisantacagane yamai ora ingantaguetomotimi ora arosata? ³ ¿Teco pigóigue aiuenta ongomantëgotaiguëri eiro ira ironomire Tosorintsi? Pingomantëgotërica iriro, ¿Queroco picantocotiro yamai ora arosatapague yaca? ⁴ Aitica yamai piguisaneintobaga, ¿Pairo pabentobitaigari ira te inguemisante, ingomantëgotëmi pairoraca pinganque? ⁵ Nacantaiguimi negaca arota naguibasiguaitaiguëmi. ¿Teco irine obirojeguiquë paniro obetsiquinerine popiguemisantacagane cara inguisabacaguimanica? ⁶ Carari piguisaneintobaca obiro aisa popiguemisantacagane, pabencari joes ira te inguemisante. ⁷ Pitsipiriasitaigaro cara pabentaigacari joes ira te inguemisante. Teni onganinate picantaigui negaca. ¿Pairo te pinintobitacaguiri popiguemisantacagane ingantëmiro ora te ongomeite? ¿Pairo te pinintobitacaguiri jemita ingositimi? ⁸ Te pingantaigue negaca. Picantobagaigacaro obiati ora te onganinate. Aisati picositobaca. ⁹⁻¹⁰ Ira antaguetatsi

quero yareta canta igáanti Tosorintsi. ¿Teco pigóiguero oca? Quero pamatobitobagaiga. Quero iáti canta Atingomiquè ira antiro tsinane cagaro iina. Quero iáti ira manègotabitari ibabane cagari Tosorintsi. Queroootisati ira tsigantobagachari, queroootisati ora tsigantobagachari. Queroootisati ira antiri sèrari. Queroootisati cosiantatsiri, queroootisati ira coguètaguetiri ora yasintagueta basinipague; queroootisati singuitachari; queroootisati nibatocotaguetasitachari; queroootisati ira ágabitsatiri ora yasinta basini. Iraegui cantaguero cantacha negaca quero yaretaro iragáantane Tosorintsi. ¹¹ Aisati picantaigabitari iragui antiro quimingari. Iroero cantènguicha yoguètetaigaimi Atingomi yoganinasèretaimi Iriero aisati Isère Tosorintsi opasiniatitanaimi. Iniacaninataiguèmi Tosorintsi cantaca te pingantaguetèmate pairoraca te onganinate cara piquemisantaiguèri Atingomi Jesoquirisito.

Yoganinatacái Atingomi eiro iraisati.

¹² Ocantagani: “Caninataque nanganque pairorapagueraca ora inintacaquena Atingomi”. Carari aroca nangantasiimaro pairoraca, quero omitocotina. Teni nongogue ogabeina ora nameta. ¹³ Aiti operi ora aquemara, aisati asegoto aisati omaretsa cara piáti operi. Carari aiquenta irobegairo Tosorintsi ora ametaiga yamai. Quero ocogui api cara Jonogaguetequè. Carari te iroero irobetsicobitái antiro tsinane cagaro ajina; iroonti yobetsicasitacái Atingomi omanocotiri Iriero eironta iraisati. Aisati Iriero asiati. Aisatinta inintasantacái icogasanti intimacacái eiro. ¹⁴ Aisati icanta Tosorintsi icabiriqueri Quirisito, yoganiatairi, aisati iritosongajái eiro, ingabiritajái. ¹⁵ Nobaco iroonti nasi. Iroero asi nobatsa. Aisa icanta quemisantsitiri irasi Quirisito. Antagaisati quemisantsitiri aisati icantaro ibaco Quirisito, iguítii, iguemita, iroqui, omagarpague. ¿Teco pigóiguero oca? ¿Caninataqueco águèro irasi Quirisito antanquimaro tsinane antagueantatsiri? Tesonori ongomeite. ¹⁶ Aroca intiro sèrari ora tsinane antagueantatsiri iniaqueri Tosorintsi aisa inganquima cara yágasantiro iina. Iroonti cantaca ibatsa iriro. ¿Teco pigóigue Sanguenari ocanti:

Cara iráque iina sèrari, ira pite inganquima paniro ibatsa iriro?

Tosorintsi iniaqueri paniro. ¹⁷ Carari ca coshonica oguèri Atingomi, antsibasèretimari anganquimari ibega Iriero. ¹⁸ Quero pintiro ora cagaro pijina. Quero pintiri ira cagari pijime. Pairoraca icantagueti matsiguenga te onganinate yamasitaiguèri imatsiguenga; carari ira antagueantatsi cagaro irasi, iriati amasienguicha. ¹⁹ ¿Teco pigóigue pinanquimi pobatsaquè Caninaro Isère Tosorintsi? Igáquemiro Tosorintsi coshoni oguèmi. Yamai teni pasintima obiatiegui; Irianti Tosorintsi asintimi ²⁰ aroquenta yamanantaiguèmi Quirisito cara icamobitaiguèmi corsosiquè. Yamaica pairorapagueraca pingantaiguè pingantineri Tosorintsi. Aro iraniaiguèmi matsiguenga ingantaiguè: “Caninarisonori Tosorintsi. Yoganinatasantaiguèri Corintosati”.

7

Icomantègotèri ira águenguetsine iina.

¹ Aro cani pisanguenataiguèna, posamitagueta. Yamai notabitaiganaguemi. Naji que naro caninataque quero yágui sèrari iina. ² Arota quero pintiro tsinane cagaro pijina, querota pintiri sèrari cagari pijime, caninataque págue pijina panirootipague sèrari. Aisati caninataque omagaro tsinane águe ojime panirootipague. ³ Caninataque iranintacaguimaro iina ontaguimari. Aisati onganquima iroero, onintacaqueri ojime irantiro. ⁴ Ora iina quero pigáta irooti, irianti agátirone ojime. Aitosati quero igáta iriati sèrari, iroonti iina agátirine. ⁵ Quero pometopitaro pijina. Aisati, tsinane, quero pometopitari pijime. Aroca pinguengaiguèma: “Quero aniobaga arosata cataguiteri arota omanocotasantiri Tosorintsi”, aro caninataque. Aique pintimacagobaguima aisati querota intaguimi Satanás ora te onganinate. ⁶ Teni nagátaiguemi: “Págue pijina”. Carari pinintica páguero, aro caninataque.

⁷ Nocogabeca pingantaiguename nibega naro, carari ipaguetacái Tosorintsi panirootipague. Teni aisa angantaiguema omagaro. Teni ine najina carari caninasati natimi. Ainta basini sèrari, queroaca pine iina, aro Satanás irantacaqueri ora te onganinate, iroonti tsinane icogasanti. ⁸ Yamai nongomantaiguimi obiro ira te ine iina aisati ora ogamaimentaga: caninataque pingantaiguema nibega naro, pintimasitima paniro. ⁹ Carari queroaca picantiro pitimasita, aro caninataque páguero pijina. Caninataque páguero pijime. Teni onganinate pingogasantabitima págue pijime. Aisati onganquima obiro tsinane, te onganinate pingogasantabitima págue pijime. ¹⁰ Yamai nongomantasantèro ora águenguetsi ojime. Teni naro comantimine, Irianti Atingomi comantasantèmine: querotasha pijoquiri pijime. ¹¹ Aroca pijoqueri, quero págai basini. Caninataque pigatsitairi págairi ira págabita. Aisati nongomantasantèri sèrari, quero ijoquiro iina.

¹² Yamai nongomantëri basinipague. Te ingomantëgotiri Atingomi. Aintaca iina ira quemisantatsi te onguemisante iroro, aisati oninti ontimacaqueri, quero ijoquiri. ¹³ Aisati, tsinane quemisantatsiri, aintaca pijime te inguemisante, aisati ininti coshoni iroquimi intimacaquimi, quero pijoquiri. ¹⁴ Aintaca tsinane quemisantatsiri, carari te inguemisante ojime, iriro te ingantimari ira tsoenguëri Tosorintsi iquemocoquerinta. Tosorintsi icanque: “Irirro ojime ora quemisanquinane, iriri ojaniquite. Nocogasanti inguemisantina iriro aisati”. Aisati aintaca sërari quemisantatsiri, carari te onguemisante iina, iroro teatisati ongantimaro ora tsoenguëri Tosorintsi oquemocoquerinta. Ijique Tosorintsi: “Irirro iina ira quemisanquinane, iniro ianiquite. Nocogasanti onguemisantina iroro aisati”. Tosorintsi iniaqueri ianiquite irianti itomi quemisantatsiri, iniacani-nataiguëri icogasanti inguemisante itomi aisati. ¹⁵ Cara aintaca sërari quemisantatsi, ora iina te onguemisante, onintica ojoquiri ojime, aro ojoquirita. Aisati aintaca tsinane quemisantatsi, ira ojime te inguemisante, iraninquca, irioquirota. Quero nacantiri quemisantatsiri coshoni iroguiroro iina te onguemisante onintica ojoquiri. Aro ojoquirita. Aitosati quero nacantiro tsinane quemisantatsi coshoni oguiri ojime ira te inguemisante inintica irojoquiri. Aro irojoquirota. Teni ingoque Tosorintsi inguisabacaguima. ¹⁶ Tsinane, aroca coshoni poguëri pijime ira te inguemisante, ¿Aroco pigabisaicotacagantëri? Aisati picanta obiro, sërari, aroca coshoni poguëro pijina ora te onguemisante, ¿Aroco pigabisaicotacagantëro?

¹⁷ Aroque icoigaiguëmi panirrootipague Tosorintsi, yogabisaicotajimi. Yamai caninataque pintaigueneri Atingomi antagaisati ora icogui Irro. Ocarai oca nocomantaguetiri iraugui botoibiritari Quirisito negaraca niátagueque. ¹⁸ Jirai icoigaiguëmi Tosorintsi. Ainta obirojeguiquë ira totacha iriantinta jorio jirai. Yamai quero pogasëreta. Aintasati ira terai iritotima cara icoiguëmi Tosorintsi. Quero pitota yamai. ¹⁹ Jemita pitoca jirai. Jemita terai pitotima. Yamai patiro caninataque pinguemisantasitiro ora icanquemi Tosorintsi. ²⁰ Atiraca picantaiga jirai cara icoigaiguëmi Tosorintsi, përosati pingantima yamai. ²¹ Cara icoiguëmi Tosorintsi, ¿Obiroca pobimantaga? Quero pogasëreta. Caninataque pintineri pobatorote. Carari aroca iragátajimi pobatorote, caninasati piguiatasantiri Quirisito. ²² Obiroca pobimantaga cara icoiguëmi Tosorintsi, jemita. Yamai aroque yomisotocajimi Atingomi cara yoberantëmi Satanás jirai. Teca obiro pobimantaga cara yogabisaicoquemi Atingomi, yamai picantaigari ibimantaga irasi Quirisito. ²³ Aroque ipënbentaiguëmiro Jesoquisito cara corosiquë ora picantaguetagui te onganinate. Yamai quero popega. Quero popimantaa aisati. Quero picantaja quimingari pibega jirai. ²⁴ Iroro, nopiguemisantacagane, nongomantaiguëmi atiraca picantaiga cara yogabisaicotajimi Tosorintsi, përosati pingantaiguema.

²⁵ Yamai nongomantëgotëro tsinane te oneimatiri sërari. Teni irogometocotiro Atingomi, carari nongomantaiguëmi ora naquenga naro. Icabintsëna Atingomi, cara quero namatobitimi. Pigóiguëro oca. ²⁶ Yamai aiti ora obomirintsitasantái. Iroro ora najique naro atiraca picantaiga yamai, caninataque pingantaiguema përosati. ²⁷ Aroqueca páguë pijina, caninataque; quero pijoquiri. Teca ine pijina quero picogui págui pijina. ²⁸ Aroca páguë pijina, caninataque. Aisati aroca águë ojime ora te oneimatiri sërari, caninataque. Carari páganquenica, obomirintsitasantuëmi. Te naninte obomirintsitaiguemi pitsipiriaigue, iroro nacanquemi: “Quero págantai yamai”.

²⁹ Yamai nongomantëmi, nopiguemisantacaganeegui, quero ocosamaniti cara pintaiguineri Atingomi ora icogui. Teca ine pijina, pintineri Tosorintsi. Aintaca pijina, pintineri Tosorintsi aisati. ³⁰ Aroca pigasërequima, quero pogasëreta cosamani. Aroca pinganinatë, quero picaninati cosamani. Aroca pamanantë pairoraca, quero piquenga ora pasi queronta pini cosamani. ³¹ Caninataque pintimabequima yaca quibatsica. Aisati pinganinatantimaro ora inatsi yaca, carari quero pinebetaro, quero picaninatantaro përosati queronta përo cara pini oca quibatsica, querootisati ora inaguetsati yaca. Otsongaima omagaro. ³² Nocogasanti naro quero pogasëretaiga. Ira timasitacha quingasëretapinintiro ora icogui Atingomi. Patiro, icogui iriro iraganinatiri Ira Atingomi. ³³ Irari ira ágantatsi iquengasëretapinintiro ora yametaiga imatsiguenga arota iraganinasëretiro iina. ³⁴ Tojai iquengasëretaguetiro pairorapagueraca. Ora tsinane te ágante aisati ora te oneiri sërari, tojai oquengasëretaguiro ora icogui Atingomi. Antagaisati ora onganque aisati ora onguengasëretë, ontineri Atingomi. Orari ágatsi ojime oquengasëretapinintiro ora pametaiga omatsiguenga arota oganinasëretiri ojime. ³⁵ Ocarai oca nocomantaiguëmi nocoguinita nomitocotaiguemi. Te naninte nobomirintsitaiguemi. Patiro nocogui pintimaigue caninasati, aisati pigóigue pintasantineri Atingomi ora pairoraca ingoque.

³⁶ Pinetse, aintaca pisinto terai oneiri sërari aroqueca piquibiaque, picoguica águiri ojime, aro caninataque. Aroca págantacaquero pisinto quero picantagueti ora te onganinante. ³⁷ Aroca pomequimaro pisinto, aro caninataque; aisati caninataque aroca obomirintsitëmi

onibatëntimi, pinganquero: “Aro páguiri”. Caninataque pinte ora picogui, ora piquianca.³⁸ Aro caninataque págantacaquero pisinto ora te oneiri sêrari. Aisati caninatasaque pomequimaro.³⁹ Aroca águê tsinane ojime, coshoni oguêmari irooti cara ingamaque. Carari ingamaqueca aro caninataque yamai ágairi basini ojime. Carari paniro ágairi ira quemisantiri Atingomi.⁴⁰ Aroca onganque ogamaimentaga ora nogometaguêmi, caninataque quero págantaji, aro najique onganinatasantê. Aisati najique naro pogomequina Isêre Tosorintsi oca nocomantaiguêmica yamai.

8

Icomantêgotêri Corintosati ira ibatsa aroque ipêri ibabane.

¹ Yamai nongomantaiguêmi cara ati pingantaigueri ira ibatsa aroque ipêri ibabane matsiguenga. Ibabane irianti ira yobetsicasita matsiguenga ira ijiti itosorintsite. Ipêri ibabane arota iraniacaninatiri iriro. Ijitabeca antagaisati irogótasantiri ati inganqueri ibatsa. Carari aroca ogótasitima eiro, aquengasantaigaca eati caninari. Icoigaái Tosorintsi anintobaganêma, omitocotobaganêma anguemisantasantanêri Atingomi, antime caninasati.² Aintaca jitabitacha igótasanti, iriati matobitacha; terai irogótasante.³ Irari nintasantiri Ira Tosorintsi, iriro Tosorintsi igótiri.⁴ Cara pisanguenarequê posamiténa ora caninataqueca ajagaigueri ibatsa ira yóguineri ibabane matsiguenga. Igóguê eiro te intosorintsite ira yobetsicasita matsiguenga. Paniro ini Tosorintsisonori; teni irine basini.⁵ Ainta inaguetatsi canta jonoquê aisati yaca quibatsica ira ijitasitari matsiguenga itosorintsite. Aro tojai inaguetatsi ijitosorintsitasitagueta, tojaisati itingomi,⁶ carari igóguê eiro ainta paniro Pabati Tosorintsi. Iriro oniaganquero antagaisati ora aniaigui. Aisati yobetsicanontacá eiro. Aintasati paniro Atingomi Jesoquirisito Ira obetsiquêro omagaro, aisati yogabisaicotajái.

⁷ Carari ainta opiguemisantanepague ira te irogótiro oca nocomantaiguimica. Jirai yametaiga yamanopiantêri ibabane ira yobetsicasita matsiguenga ira ijiti itosorintsite. Aroca iraguêri ibatsa ira aroque yógueneri ibabane matsiguenga, ijique quemisantsiri irasonori ira ijitosorintsitaguêti. Te irogóte. Aroca iraguêri yamai ibatsa ira yóguêneri irosiacagomento matsiguenga, aro tojai irisêretimari ibabane iroguiminasêretanêma irajitabetima ora te onganinate iraguêri.⁸ Carari ira aagui eiro quero yoganinatái catingsatiquê Tosorintsi. Queroca aaguiri quero yoganinasêretái. Aroca iraguêri querootisati yoganinasêretái.⁹ Pigamaiguema obiati cara pijaguêrica ibatsa querota pintaguiri ira popiguemisantane ora ijique te onganinate terainta irogótasantiro cagari Tosorintsi ira ibabane matsiguenga.¹⁰ Aroca iraniaquemi ira te irogóte cara paaguêri canta ibangoquê ijitosorintsitaguêti, inganque: “Igóque iriro. Aisati nanganquimari ibega iriro najaguêri ibatsa irasi ibabane matsiguenga”.¹¹ Pigóque obiuro caninataque pijaguêri ibatsa. Iriro te irogóte. Iroontita cara iraguêri inguenguêma: “Teni onganinate najaguêri. Ingasitigátêna Tosorintsi nacantaguetinta ora te onganinate”. Aro pintaqueri obiuro ora te ongomeite. Iriatisati popiguemisantane ira icamobique Quirisito.¹² Te ongomeite pintaquiri ora te onganinate. Cara piquengasêretaguiri ora cagaro caninatatsi, pamasisêrequeri, pintaqueri ora te ongomeite, te pingábintseri popiguemisantane cara icocaquemi Quirisito.¹³ Iroro ora nocomantaiguêmi: aroca najaguêri ibatsa, iroro nantagantêmaro nopiguemisantane ora te onganinate, quero naaguiri ibatsa aisati, tenta naninte nantaguiri ora quimingari.

9

Icanque Paboro: “Pingantaiguena nibega naro”.

¹ ¿Teco iranintacaguina Tosorintsi pairorapagueraca? ¿Teco naneiri Atingomi Jesus? ¿Teco naro iragátane naquemisantacaguêmi? ² Aintaca basini te irógote naro iragátane Tosorintsi, carari pigótasantaigui cara igáquina obiurojeguêmi. Yamai iraniaquemi basini matsiguenga cara naquemisantacaguêmi, aro pigótacaguiri aisonori naro iragátane Atingomi.³ Ainta icantocoquina: “Te iragátiri Tosorintsi”. Yamai notabitêri: ⁴ “¿Teco onganinate nope aisati nóguima naro Paboro aisati basini iragátane? ⁵ Cara nanguenagueque nongomantêgotêri Jesoquirisito, aintame najina quemisantsitiri, ¿Teco onganinate nantaguequimarome aisa nacantaigari ibega basini iragátane Atingomi, aisa nacantari ireinteguê, aisa nacantari Sejas? ⁶ ¿Paniroco naro natarobacaque cara nipênabentiro noperi? Aisati nacantari Berinabé; itarobacaati iriro aisati. ⁷ Nosiagantaiguêmi: ¿Teco iripênabentapinintiri ira soraro? ¿Teco intsimiro oba ira panguitiro? Ira piratari ibaacate ¿Teco iráguero baacatsomija?” Aroque nacanqueri ira cantêgotina cagarina naro iragátane Atingomi.

⁸ Nocomantêgotaiguêmi ora aniopiantaigui, carari ¿Pairo ocanti isanguenare Moisés? Irootisati ocanti. ⁹ Jirasonori isanguenague Moisés:

Quero poguineri cantiri itsobaquë sërari baaca ira agaticaguitiro tirigo, carari caninataque irape arosata.

¿Paniroco baaca iquengasëretiri Tosorintsi? Teni. ¹⁰ ¿Teco ingantococái eiro aisati? Aisonori icomantëgotacái. Yogomecái pairoraca caninaro anganque. Aroca inguigajiro quibatsi sërari cara imanguitantajimaro, icogui iráquero oguito aiquenta. Aisa icanta ira obigitatsi pairoraca aisati icogui iráquero iraisati oguito. ¹¹ Pinetse, aisa ocanta cara nopanguitëmiro pisërequë Irinibare Tosorintsi. ¿Yamai opomirintsitomotimico pomagarantaiguenaro noperi, naguitsagare, pairoraca basini? ¹² Aroca popagarantasiagueteri basini ogomeantatsiri, ¿Teco onganinateme pomagarantiname naro? Carari te pomena tenta nanintiro. Jiraini piquemisanatigabaquero ora Caninaro Nibarintsi nocomantëmira cara nocomantëgotëri Quirisito. Tojai opomirintsitomoquina, carari te naninte nojocaguimiro cara piquemisanqueri Quirisito. Iroero ora te nongoicotaguëtimi pairoraca. ¹³ Pigóiguero ira saseriroti antineri Tosorintsi cara ibangoquë, yaaguiri ibatsa canta. Ainta ibatsa itaquineri Tosorintsi, aisati yaagagaranqueri iraisati ibatsa. ¹⁴ Aisa ocanta, icanti Atingomi: “Caninataque ira quemisantatsiri imagaranquitguiri ora icogui ira comantagueantiro Caninaro Nibarintsi”.

¹⁵ Caninataque imeagarantina pairorapagueraca quemisantatsiri, carari teni nongoicotëmatiri. Teni nasanguenataiguemini yamai arota pomaiugenaro pairoraca. Teni nanintiro. Nacanasëretanë cara te nongoicotimi. Arome águëna natasegane, quero namanimi: “Pomena noperi”. Aguinata, nangameta. ¹⁶ Aroquenta nocomantague-tiro ora Caninaro Nibarintsi teni nanguengasantima. Teni nomairebintsate icomantaguananta Natingomi. Queroca nocomantëgotiri ingasitigatëna. ¹⁷ Aroca nongoque nongomantagueante, aro imëna Tosorintsi. Carari queroca nocoguro, ainta igáquena, imeratina jirai, ipënarora ora nantineri. ¹⁸ ¿Pairo yamai imëna? Caninataque me nongogantimarome pairoraca, carari teni naninte nongoicoonte. Patiro nacanasëretëgotimi cara piquemisanatiguëri Atingomi. ¹⁹ Te poro meratinane, carari nantapinintineri antagaisati aisatime nangantimarime ibega iromeraro. Nacanti negaca arota tojai matsiguenga inguemisantiri Atingomi Jesoquisito. ²⁰ Aroca nangarataiguëri jorío, nanganquimari ibegaiga iriro arota nanguemisantacaguiri. Aroca nangarataiguëri ira quemisantiro isanguenare Moisés, aisati nanganquimari ibega iriro cara nanguemisantacaguiri. Carari yamai te nanguemisantiro naro isanguenare Moisés, te obomirintsitina. ²¹ Aroca nangarataiguëri ira cagari jorío, ira te inguemisantiro isanguenare Moisés, nangantaiguëmari iriro aisati nocoguinanta nanguemisantacaguiri ora Caninaro Nibarintsi. Te nomaguisantajiro ora icanquena Tosorintsi; naquemisantasantëro ora icanti Quirisito. ²² Aisati, cara nangarataiguëri ira quemisantatsi arosata, nanganquimari ibega iriro, nanguemisan-tasanotaganëri. Nangantaiguëmari antagaisati arota nanguemisantacaguiri. ²³ Omagaro nacanquero cara inguemisantasantaiguëmaro matsiguenga Caninaro Nibarintsi. Aisa naro nacininatomotiro Caninaro Nibarintsi ora yogabisaicoontaina Tosorintsi.

²⁴ ¿Teco pigóigue isigaiganaca tojai sërari irogontëmari pairiraca obaquenguitsine? Irobaque paniro ira sigasanotacha, aro imëri pairoraca ora jitacha peremio. Aisati pisigaiganaquima obirojegui págaiguerota pairoraca caninaro imëmi Tosorintsi. ²⁵ Ira siganënguichane iragáquima caninasati iriati quero icanti pairoraca ora amasiquerene. Inganquero iriro iráquerota matseirontsi iroonti osi ora quero ocasamaniti. Aisa icanta quemisantatsiri cara coshoni iraguiatëri Atingomi. Aisati imaáiro Tosorintsi ora quero pisiguiriqui. ²⁶ Aisa nacanta naro nantineri Natingomi, quero nacantari sigasantachari ira te irogóte negaraca iraretima. Nantineri Tosorintsi nocoguinanta inganquina: “Caninataque pisigopa”. ²⁷ Nantasantineri, te nangantëmate pairoraca basini arota, cara nocomantaguequeri basini matsiguenga ora Nibarintsi Caninaro, quero icantina Natingomi: “Te pintasanotinaro ora nococaquimi”.

10

Iquenguitsatocoqueri joríojegui jirai; aisati yogomequeri quemisantatsiri.

¹ Yamai, nopiguemisantacagane, nongomantëgotaguëri joríojegui. Pigóiguë obirojegui ati icantaiga iriro jiraisonori cara isotocaiganaji Ejíptoquë. Iquenguetaiguë canta tenta ontimingani. Pamamegapinintaiguëri irirojegui mingori, aisati pitsiraatatëtaneri angaare, aganguijanta opiriatanë. Yoguimontiaiguëri omagaro jorío Tosorintsi. ² Yoguiataiguëri ira Moisés itingomi cara osobi mingoriquë aisati aganguijanta angaarequë. Yoguiataiguëri iquemisanqueri aisatime inganquimame imaotisabiriquimarime Moisés. ³ Yapaiguë iraperi ora ipapinintaiguëri Tosorintsi. Aisati yóigaigacaro nija ora ipaiguëri Tosorintsi ⁴ ora contiaatapënguitsi mopëquë. Yoguëneri mopë Tosorintsi ora osigari Quirisito Ira tsipataigari. ⁵ Carari te iraganinataiguëri Ira Tosorintsi. Iroero icamaguëtaiguë tojaisonori

canta tenta ontimingani. ⁶ Pinguengasëretaiquema oca, ora pigóontima ora icogui Tosorintsi. Quero picantaihari ibegaiga jorío jiraisonori: inebetaigaro ora te onganinate. ⁷ Quero piquemisantiri ira ijitosorintsitasitagueta. Ira jorío yamanocotaigabitacari itiomijani baaca, irianti oro. Isanguenatocotaiguëri:

Isobicaiguë matsiguenga, yapaiguë aisati yógaigaca. Aique yaratingaiganaque, imaticobentaiganaqueri baaca, omaninquebintaiganaqueri.

⁸ Querootisati acantaihari ibega iriro cara intaguetaigabaquero tsinane cagaro iina. Aito canta icasitígataiguëri Tosorintsi, yogamagaiguëri jorío, icamaiguë icarati 23,000 patiro cataguiteri. ⁹ Aisati iniaantaigacari Ira Atingomi irogóontimari inguisaiguërica. Aro Tosorintsi igátaiguëneri tojai marangue itsigantaguetaigacari aro icamagarantaiguë tojai matsiguenga. Querootisati acantari ibega iriro eiro; quero aniaantari Tosorintsi. ¹⁰ Aisati yabentaigaca, irooti ipoguiariagantaigacari ironomire Tosorintsi. Querootisati acantari ibega jorío jirai.

¹¹ Aro ocanca negaca jirai isanguenaquero arota anguengasëretimaro ogóontimaro yamai. Aisati omoncaraquima ora iquianca Tosorintsi jirai. ¹² Aintaca paniro ijique: “Naro sintisiri, naquemisantantari Irinibare Atingomi”, aro nacantiri naró: “Pigamema querota picantaguëti ora te onganinate”. ¹³ Ainiro aquengasëretaiquero acantaguëtiro ora te ongomeite, aisa acantari ibega antagaisati matsiguenga iquenguero icantaguëtiro ora cagaro caninatatsi. Carari Tosorintsi caninari. Abenquimarica Iriró, iromitococái cara quero acantaguëtiro. Quero yamatobitái, iromitocotasantacái querota acantaguëtiro ora aquengabetaiga.

¹⁴ Iroro, nanintaneegui, nongomantëmi: quero piquemisantiri pamanocotiri ibabane matsiguenga ira yobetsiqui iriati. ¹⁵ Nigóquimi obiroyegui ogóontatsiri. Iroro ora pinguemaguëtoberó ora nasanguenaquimi, ora pigóontoberó pinguemisantoberó. ¹⁶ Cara acarasiatocoqueri Tosorintsi oja oba ora osigaro irarara Jesoquirisito aisati óguëmaro, ¿Teco iroro anguengasëretantimari Quirisito? ¿Teco eiro iraisati? Aisati cara anti-aquero pan ora osigaro ibatsa Quirisito aisati opaiguëro ¿Teco iroro anguengasëretantimari Iriró cara icamobicái? ¹⁷ Tojaininta eiro, cara opaiguëro patiro pan, omatsiungatobaca eiroeguina iniaicái Tosorintsi paniro aquemisantaiguërinta Quirisito paniro. ¹⁸ Pinguengeri ira joríojegui. Cara yóguineri Tosorintsi ira oisha aique yaaguëri ibatsa, iquengasëretancari Ira Tosorintsi. ¹⁹ ¿Pairo nacanti? ¿Aisonorico Tosorintsi yobetsiquëri ira ijitosorintsitasitagueta? Teni. ¿Caninarico ira ibatsa ira yaaguë ira te inguemisantiri Tosorintsi? Tesonori nangantiro negaca. ²⁰ Ocari oca nangantantaiguëmi: iraegui te inguemisantiri Tosorintsi, cara yóguëneri ibabane ira ibira te imaiqueri Tosorintsi, irianti camagari ipaiguë. Cara yaaguëneri, irianti camagari yaagobiti. Nocogasanti quero paaguiri ibatsa irasi camagari, quero piquengasëretiri. ²¹ Aroca pinguengaiguëri Atingomi cara pógumaró oja oba osigaro irarara, quero pógotari ora irasi camagari aisati. Aroca popëro pan popëgotëri Atingomi, quero papëgotiri ira camagari aisati. ²² ¿Aroco picogaigu inguisaiguëmi Atingomi? ¿Obiroyeguico sintisirisonori pabisirico Atingomi?

²³ Ocantagani: “Caninataque nanganquero pairoraca ora inintacaquena Atingomi”. Carari aroca nangantassitima pairoraca, quero omitocotina. Quero nocogui nacantabetaro ora te onguemisantacaquina Irinibare Tosorintsi. ²⁴ Quero piqueincotaiga ora picogaguëti aisati obiroyegui, iroonti pinguengaigue omitocoqueri basini. ²⁵ Cara ipimantagueta ibatsa, aro pomanantiri pijagueri. Quero posamitocobentiri: “¿Nega páguëri? ¿Aroco yóguëneri ibabane matsiguenga?” Quero pitsorogui aroca ipëri ibabane matsiguenga aroquenta yobetsiquëri Tosorintsi. ²⁶ Ocanti Sanguenari:

Ora quibatsi iroonti irasi Atingomi, aisati irasi antagaisati ora inaguetatsi quibatsiquë.

²⁷ Aintaca ira te inguemisante cajemëmine irapajaquimi picoguica pijáque, aro pijáte. Pairoraca imëmi, aro popero. Quero posamitocobentiri ibatsa nega ipaniaca. Quero pijitiri quimingari. ²⁸⁻²⁹ Carari aintaca poro inganquemi: “Icari ica ibatsa yóguëneri ibabane matsiguenga”, aro pinguengeri ira comantimi. Aroca ijiti iraaguëri ica ingantagueque ora te onganinate, quero paaguiri obiroyegui. Quero picantaguëtiro ora te onganinate. Pigóti obiroyegui yoguimingatimi ira ibatsa, carari te irogóte iriro. Pingábintseri.

Ainta ira cantatsi: “Inintacaquina Tosorintsi najaguëri pairiraca. ¿Pairo te iranintacagobitina ira tera irogóte? ³⁰ Aroca nangarasiatocoqueri Tosorintsi ibatsa aique najaguëri, ¿Pairo picantobiquina naró quero naaguiri cara ijitiri te inganinate ira te irogóte?” ³¹ Aro nongomantëmi. Cara pijagaiguëri ibatsa; aisati cara pógaguëma, pairoraca pingantaguëtaiguë, pingantineri Tosorintsi arota iraniacananataiguëri Iriró matsiguenga. Aique inganinabentaiguëmi Tosorintsi, aisati iraniaiguëmi ira te inguemisante, inganque: “Aisonori caninari Tosorintsi, caninasatinta itimaiguë quemisantatsiri”. ³² Quero picantaguëtiro ora te

onganinate ira jorío querootisati ira cagari jorío te inguemisante, querootisati quemisantisiri ira botoibiritari Tosorintsi. ³³ Pingogaigue pingantina nibega naro. Pairoraca nanganke nomitocotiri basini matsiguenga. Te naro cantëgotachane naati; nacantocotaiguëri matsiguengajegui arota inguemisantaiguëri Tosorintsi, arota iragabaisaicoitaigairi.

11

¹ Aisati pingantaiguema nibega naro, aisa nacantari ibega Quirisito.

Ora onganque tsinane quemisantisiri.

² Nacaninabentaiguimi cara piquengaiguina aisati piquengaiguero omagaro ora nometaiguëmi jirai. ³ Yamai nogótacagaiguëmi cara Quirisito igáqueri antagaisati sërari; aisati igáquero tsinane sërari; aisati igáqueri Ira Quirisito Tosorintsi. ⁴ Cara iromanocoqueri Tosorintsi sërari, aisati cara ingomantanquero Irinibare Tosorintsi, quero ibasiguitota iguitoquë. Aroca imasiguitoquima iroonti pasiguitagantsi. Inganquimaro pibega tsinane. ⁵ Carari cara omanaque tsinane, aisati cara ongomantanquero Irinibare Tosorintsi, caninataque omasiguitotima oguitoquë. Queroca obasiguitota, iroonti pasiguitagantsi. Aisatime onganquima opeitimame antagaisati oguisi, teni ontingomintimari ojime. ⁶ Queroca oninti obasiguitota tsinane, aro caninataque opeitirota oguisi. Queroca ocaninati papeita, aro omasiguitotima përosati. ⁷ Teni ongomeite cara imasiguitotima sërari cara yamani aroquenta yosiacari Tosorintsi Ira obetsicanëri jiraisonori. Tosorintsi agátiri sërari iriro itingomi antagaisati inanënguitsi quibatsiquë. Aisati iriro itingomi tsinane, igátiro. ⁸ Yoguibatëri sërari cara yobetsiquëri Tosorintsi. Aique yáguë imeriqui sërari ora yobetsiquë ora tsinane. ⁹ Te irobetsiquiri sërari asi tsinane; carari Tosorintsi yobetsiquëneri tsinane irasi sërari.

¹⁰ Iroro ora caninataque omasiguitotima tsinane arota irogóontaiguemaro ironomire Tosorintsi cara otingomincari ojime. ¹¹ Pinetsaigue, te ontimasitima tsinane, teatisati intimasitima sërari. Ininti Atingomi ágobagaiguema. ¹² Jiraisonori Tosorintsi yobetsiquëro tsinane iroonti imeriqui sërari. Yamai ipaniaca sërari cara tsinanequë. Carari ira matsiguengajegui ipaniaca Tosorintsiquë. ¹³ Pigóontaiguema. ¿Pairo piquengaiga obiro? Aroca omanocoqueri Tosorintsi tsinane, ¿Caninataqueco omasirijaguitotima? ¹⁴ Te ometaiguema eiro ira sërari ingaguisite. Aro opasiquique aintanta oquibiantsa aguisi. ¹⁵ Carari aniacaninataiguëro tsinane cara ongaguisiteca oguisi. Iroro omasiguitoontima. ¹⁶ Aintaca cogatsi iripëgatsatina, nogótacaqueri cara nameta naro oca nocomantëmica, aisati yametaigaro omagaro ira quemisantiri Tosorintsi.

Yogometocoquero Paboro cara yapapinintobitaiguëri Jesus.

(Mt 26.26-29; Mr 14.22-25; Ir 22.14-20)

¹⁷ Yamai aiti basini nongomantëmi. Teni naniacaninataiguëmi cara papatoica papabiritaiguëri Jesus. Te onganinate, te omitocotaiguëmi. ¹⁸ Natsita comantëmine oca. Icomantapëna cara papatobiricari Atingomi, teni pinguengaiguema, pipëgatsatobaca. Najitobëro aisonori arosata. ¹⁹ Cara pipëgatsatobaga, iroro pigóontaiguëmari ira quemisantantatsi aisonori. ²⁰ Cara papatoica, papabiritaiguëri Atingomi, tesonori pinguengaiguëri Iriro. ²¹ Cara papaigui, ainta yágonantaigaca iraperi iraisati, te irapajaguiri basini. Te popaagagobaguima aintanta ira tasiaquenguitsi, aintasati ira singuiquenguicha. ²² ¿Pairo picantaigui? ¿Teco ine pobangojegui cara popaigue aisa pisinguitaiguema? Ainta pomainti popiguemisantane, pipasiquitacaqueri ira te ine iraperi. ¿Pairo nangantaiguëmi? ¿Aroca naniacaninataiguëmi? Quero.

²³⁻²⁵ Aroquenta yogomequina Atingomi ora nogaquemira cani. Jirai, tsitiniriquë, yáguëro pan Atingomi Jesus. Aro icanqueri Iriri: “Pabati, nacarasiaquemiro oca pan, aronega”. Aique itiaquequero yotsatengaigacaro. Icanëri irogomere: “Jeroca pan ora osigaro nobatsa. Cara popapinintaiguëro pinguengaiguena Naro camobiquimine”. Aro yapaiguëro. Aitosati yáguëro irógomento. Icantaguëri irogomere: “Jeroca oja oba ora osigaro naraa. Cara pógapinintaiguëmaro, pinguengaiguena, pigóigue pisotoatobitaiguëmi naraa pabisacoontëmaro. Cara nangamobitaiguëmi, aro pigóiguë quero namatobitaiguëmi. Nanganquimiro antagaisati ora nocomantaiguëmi. Aisati iromoncaraquimiro Irinibare Pabati”. Irooti tsitiniri cara yágagantëqueri Jesus. ²⁶ Cara popapinintaiguëro oca pan aisati cara pógapinintaiguëmaro oca oja, aro pingomantaiguëri basini matsiguenga icamobicái Atingomi. Përosati pingantaiguero negaca irooti cara iribocapae Jesus. ²⁷ Aintaca poro irapëro pan, iróquimaroca oja oba cara icantaguëti te onganinate, icantasicaro. Te iromitocotiri matsiguenga iraniacaninatiri Ira Quirisito. ²⁸ Obitsita ogótocoquenguichane obiati ainiroca picantaguetomotiri Atingomi ora te onganinate. Queroca pini, aro popëro pan, aisa pógüëmaro oja. ²⁹ Te onganinate opëro pan eiro, teatisati óguimaro oja oba queroca

aquengasëretaro ora ocanti pan aisa ocanti oja. Angantasiquimaroca ingasitígatacái Tosorintsi.

³⁰ Iroro ora ainta obiroquë ira janaitatsi aisa ira te irisintsite. Aisati ainta camaguequenguitsi. ³¹ Aroca ongomantëgotima eati aítica antagueti te onganinate, quero icasitígatái Tosorintsi. ³² Cara ingasitígatacái Atingomi, icoguini iraganinatái iragatingatái arota eiro quero iáti Sharincabeniquë. Te iraninte Tosorintsi antsibatimari ira tsoengatsiri. ³³ Yamai, nopiguemisantacagane, nangantasantimi aroca popatoitimaca cara popapinintobitaigueri Atingomi, piguiaque irooti cara iraretaiguëma antagaisati. ³⁴ Iritasegueca poro, irapeta irasiquë ibango cara queroquerai ipoqui arota quero icasitígatimi Tosorintsi cara papatoica. Aiti basini nocoguini nongomantëmi, carari cara narequimi nogometaiquëmiro.

12

*Ora opaguetáí Isère Tosorintsi.
(Irom 12)*

¹ Yamai, nopiguemisantacagane, nocogu pigótocoquero ora opaguetaiquimi Isère Tosorintsi paniropague obiro. ² Pigóiguë jirai teraiquerai pinguemisantiri Atingomi, ainta piquemisantabateta ora pobetsicaiguë obiati. Pijitosorintsisatitari carari te irinibatimi, irianti mosonti. ³ Nocoguini pigóiguë oca. Aroca poro cantënguitsine “Teni inganinate Jesos”, teni onibatagui Isère Tosorintsi. Aisati te paniro inganque: “Jesos Irianti Atin-gomisonori”, teca onibatagui Isère Tosorintsi.

⁴ Pinasitagueca ora opaguetacái Isère Tosorintsi carari irooti Isère. Iroonti paniro. ⁵ Pinasitagueca cara omitocoquero eiro Atingomi carari paniro ini. ⁶ Pinasitagueca ora ipaguetacái Tosorintsi. Icantacacái omagaro acanti, carari paniro ini Iriro. ⁷ Panirootipague pogometaganacái Isère arota omitocotobaguetanëma. ⁸ Ora Isère ogótacaquero paniro cara ingomantasantagueti catinasati ora iquianca Tosorintsi; ira basini pogometacaquero caninasati ora igótagueque. Opaguetëri pitirooti Isère Tosorintsi. ⁹ Opëri basini sërari inguengasëretantimari Tosorintsi igóque ora icogui ingantagueti Tosorintsi. Ira basini opëri iragagubegaguetiri janaitaguetatsiri. ¹⁰ Opëri Isère Tosorintsi ira basini sërari iritosongantë; opëri basini ingomantantagueti ora yoniaguëri Tosorintsi. Pigótacaquero basinipague cara igótaguecobëri comantantatsiri aroca iquenguitsatagui camagari, teca onibatagui Isère Tosorintsi. Opëri basini onibataaquero basiniati nibarintsi. Poniaguëri basini cara iragabisëro inibati basiniati. ¹¹ Antagaisati ocapague pinasitagueca opaguitaiguëri quemisantatsiri Isère Tosorintsi Iroronta irooti paniro. Pairoraca onintagueti, opaguetaiquëri panirootipague quemisantatsiri.

¹² Pinetse: pigóiguë patiro pini obatsa eiro, carari aitosati aiti aguiti, obaco, oroqui, aguemita, aneingomento, omagaro. Tojai inatsi, carari patiro pini obatsa. Aisati acantari ibega Quirisito; paniro ini, carari tojai eiro quemisanquero. ¹³ Paniro pini Isère Tosorintsi. Pitasongobentái, iroo omatsiguengatobaganaa, eiro paniro aisati acantari ibega Quirisito paniro, Ira obaotisabiritaigaca. Acarataigui jorio, ira cagari jorio, ibimantaga, aisati ira te imimantima. Pinancái paniro Isère Tosorintsi, coshoni pogaigacái. ¹⁴ Patiro pini obatsa, carari aiti ágantaro, aniaantaro, aquemantaro, anëitantaro, antagaisati. Tojai pini, carari patiro pini obatsa. ¹⁵ Aroca onganque aguiti: “Tenta naro ibaco, te naro ibatsa iriro”, ¿Teco ora aguiti obatsa aisati, te inasitanëma? ¹⁶ Aroca onganque aguemita: “Tenta naro iroqui, te naro ibatsa iriro”, ¿Teco ora aguemita obatsa aisati, te inasitanëma? ¹⁷ Arome antagaisati obatsa iroonti oroqui ¿Ati ongantimame anguemantimaro? Arome antagaisati obatsa iroonti aguemita ¿Ati ongantimame anguemijengantimaro? ¹⁸ Carari te irobetsicái Tosorintsi negaca: yobetsicairo obatsa caninasati. Ipáairo aquemantaro, aniaantaro, anëitantaro, omagaro. Pairoraca icoque, icantaguequero negaca. ¹⁹ Arome iroonti aneingomento, ¿Negarame inë basini obatsa? ¿Ati ongantimame? ²⁰ Patiro pini obatsa, carari aiti tojaipague obaco, aguiti, oroqui, aguemita, aguetsi, aneingomento, omagaro. ²¹ Teni cara ongantima oroqui onganquero obaco: “Teni nanintimi”. Teatisati aguito onganquero aguiti: “Teni nanintimi”.

²² Aisonori, aiitro obatsaquë pairorapagueraca ora te osintsite, carari anintasantiro. Aguibatiro. ²³ Aisa ocanta, aiti ora ipasiquitocoti, carari caninataque pini. Caninasati omasiquero ora te ongogue ongonijate. ²⁴ Te omasitiro ora te opasiquitocotiro. Carari caninasati yobetsiquëro obatsa Tosorintsi. Caninataque pini orapague te aniacaninatëgotiro. ²⁵ Te onganinate cara onguisabacaguima obatsa. Icoquini Tosorintsi ongábintsabacaguima obaco, aguiti, anei, antagaisati. ²⁶ Aroca ongantsitë poro, aisati otsipiriaquero omagaro obatsaquë. Teca ongantsitë, onganinatë antagaisati obatsa.

²⁷ Obirojegui botoibiritari Quirisito aisati picantaro ora ibatsa Quirisito. Panirooti-pague obirojegui picantaro iguiti, ibaco, iroqui, iguemita, omagaro. ²⁸ Aro acarataigui tojai quemisantaigui Tororintsi. Yoguibatëri iragátane. Igáqueri inguenguitsatagueque Nibarintsi Caninaro. Aisati igáqueri comantantatsiri ingomantanque. Aisati igáqueri ogomeantatsiri irogomeantë. Aique igátaguequeri basinipague. Ainta itasongantagueti; basini yogaguibegajiri janaitaguetatsiri; basini omitocountatsi; basini irianti itingomi, igátaguequeri quemisantatsiri ora ingantagueque; basini inibatasitague taro basinati nibarintsi. ²⁹ ¿Aintaco antagaisati eiro quemisantatsiri iragátane Quirisito? Teni. ¿Aintaco omagaro eiro comantantatsiri? ¿Aintaco antagaisati ogomeantatsiri? ¿Itasongantaguetico omagaro? ³⁰ ¿Yogaguibegajirico janaitatsiri omagaro? ¿Inibataguetiroco antagaisati basinati nibarintsi? ¿Iquemobërico antagaisati icomantaguetiri irapiguemisantacagane ora inibatagueti basinati? Tesonori. ³¹ Carari caninataque pingogasantague imaguetaiguemi Tororintsi cara pintineri caninasati ora icoicotaguetimi. Yamai nogometaiguëmi ora pingantasantineri caninarisonori.

13

Caninataque anintobaguima.

¹ Aroca nanibatasitima basinipague nibarintsi aisa aroca nanibatasitima irinibare ironomire Tororintsi carari te nanintiri basinipague, naanti catsiguetsari. Nacancaro pibega catsiguero campana ocantasita, teeng, teeng, teeng, teeng. ² Aroca nogóquero ora inganque Tororintsi teraiquerai inanënguistsine, aroca nongomantagueantiro matsiguengaque, aroca nogótaguequero ora terai ironijagantiro Torosintsi, aroca nogótasantëro antagaisati, aroca nanguemisantanotëri Tororintsi arota nagátiro oguitoja: “Ogaganëma”, aro ogaganëma, carari teca nanintaiguëri basinipague matsiguenga, teni nongomeite. ³ Aroca nomasitaguetimari antagaisati ora nasinta ira basinipague matsiguenga, aisati aroca nantineri Tororintsi nocomantëgotëri, iroto inguisaneintaguëquinaca matsiguenga arota iritaguëna nangamobitaiguëri, teca nanintaiguëri matsiguenga, te omitocotina omagaro ora natsipirique.

⁴ Aroca anintaiguëri basinipague matsiguenga, quero aguisiri omanapague; iroonti angábintsaguëri; quero aguisabiritiri, quero oguibata eati. ⁵ Aroca anintaiguëri matsiguenga, quero acanti te onganinate, otatibotëri basini caninasati. Quero omichati queronta anti ora ocogasanti; quero aguisaneintaguetiri basini; quero aqueincotiri basini ora te onganinate. ⁶ Quero acaninatëgotiri ora icanque basini te onganinate. Anganinatëgotiri ira cantiro ora caninaro, ora catingaro, ora aisonori. ⁷ Atsipirique antsinisati; quero ipëgatar. Ajitocoqueri basini ora caninaro. Aguaqueri Tororintsi agabiacáirone ora te onganinate. Pairoraca inanënguistsine, përosati anagante caninasati.

⁸ Quero ocomantanti përosati; quero inibatasitaro basinati nibarintsi përosati; quero përosati igótabetaro pairoraca; carari përosati anintobaganëma. ⁹ Yamai teni ogótasantague; igótabeca, teatisati ongomantantaigue, ¹⁰ carari cara orequima ora caninarisonori, quero ocogajiro oca caninataguetabetacha yamai. ¹¹ Cara eiro janequiqueraí, aisa acantari janequi cara inibatasita, igótasitabeca arosata, aquengasitabeca arosata. ¹² Carari cara iquibianë ojocanëro cara acantari janequi. Aisa ocanta yamai aniaantari Tororintsi coboriarique, carari te ingonijatasante. Aiquenta aniasantapëri Jonogaguitequë. Yamai igótabecari eiro Tororintsi arosata, aiquenta ogótasantapëri aisa ocanta igótasantacái yamai Iriro. ¹³ Yamai përosati aquemisantaiganaqueri Tororintsi, igóguë quero yamatobitái, aisati anintobaca përosati. Aiti maba caninari, carari caninatasantaque cara anintobaca.

14

Ira nibatatsi basinati nibarintsi, aisati ira comantatsi.

¹ Pingogasant pinintaiguëri basini matsiguenga. Aisati pingogasantiro omaguetaiguëmi Isère Tororintsi cara pintineri Atingomi. Caninataque pingogaigue omemi cara pingomantaguetiri matsiguenga Irinibare Tororintsi. ² Ainta irapague nibatatsi basinati nibarintsi. Teni iromitocotiri irapiguemisantane queronta iquemaigabaqueri matsiguenga. Quero poro quemirine. Irianti Tororintsi yamanabeca, Iroronta nibatacaqueri Isère Tororintsi. ³ Carari ira comantaguetiri imatsiguenga Irinibare Tororintsi inguemisantacagaiganaqueri, iromitocotaiguëri, aisati iraganinataiguëri. ⁴ Ira nibatatsi basinati nibarintsi imitococa irineni. Ira ogomeantiro Irinibare Tororintsi, imitocotaiguëri omagaro quemisantatsiri. ⁵ Nocoguini pinibataigue basinati nibarintsi, carari nocogasanti pingomantantiro Irinibare Tororintsi. Tojai icanque comantantatsiri: igótacaqueri irapiguemisantane. Aintaca abisërone irinibare ira nibatasitacha, aisati ocaninati. Irogótacaqueri quemisantatsiri cara inguemaigabaquero.

⁶ Yamai, nopiguemisantacagane, aroca najáque cara obirojeguiquë, nanibatásitapëmaro basiniati nibarintsi ¿Queroco niátasita? ¿Ati ongantima nomitocotaiguëmi queroca nogaiguimiro ora yoniaguëna Tosorintsi, queroca nigótacagaiguimiro Irinibare, queroca nocomantaiguimiro iguenguitsare Jesoquirisito, queroca nogometimi ora terai pigóiguero irasi Quirisito? ⁷ Aisati teni onganiate cobërentsi, soncari, cabaronta matsiguenga. Aroca amasiquima teni ogóte pairoraca ocanti. ⁸ Aisati teca intibote caninasati soraro ¿Pairi ogóquenguitsine irobotsequëma cara iromanáque? ⁹ Aisati picantaiga obirojegui. Aroca pinibatantimaro pininequë ora te inguemaigabaquero basini, ¿Ati ingantima inguemaiguëro ora pingantabequima? Pinibatásita. ¹⁰ Yaca quibatsica aiti tojai nibarintsi pague. Pina-sitaguëtanaca. Patiropague caninaro irasi ira quemobërone. ¹¹ Carari teca anguemaigabaquero irinibare basiniati matsiguenga, te omatsiguengatimari, aisati te iromatsiguengatái queronta aquemiri.

¹² Iroronta picogaiguimiro omaguetaiguëmi Isëre Tosorintsi ongantacaguëmi, yamai aisati pingogaigue omaiguëmi cara pomitocotaiguëri popiguemisantane inguemisantasantane. ¹³ Iroro ora aroca pinibatabitaro nibarintsi ora te irogótiro basini, caninatuque pomaniri Tosorintsi imemi cara poniagaiguëri quemisantatsiri ora pinibati. Aique inguemobëmi omagaro. ¹⁴ Aroca nomanocoqueri Tosorintsi nibarintsiquë ora te ogótengani, nomanaqueri nasërequë, carari teni nogóte naati ora ninibati. ¹⁵ ¿Pairi nanganque? Aroca nomanaqueri Tosorintsi nibarintsiquë ora te ogótengani, nomanaqueri nasërequë. Aisati caninataque nogóte ora nomanaqueri. Nangántabenqueri Tosorintsi nasërequë, aisati caninataque nangántabentiri ora naquemaque. ¹⁶ Aroca pomane obiro pisërequë, pinganque: “Caninarisonori Tosorintsi”, ¿Ati ingantima inguemaigabaquero pitsipa ira te irogótiro? Quero yamanacaguëmi queronta iquemimi. ¹⁷ Caninasati picarasiatiri Tosorintsi, carari te omitocotiri basini. ¹⁸ Nacarasiaqueri Tosorintsi, ninibatasantiro basiniati nibarintsi, nobataiguëmi. ¹⁹ Carari cara apatobiritari Atingomi, nocogasanti nanibate arosata catinasati arota nogometaguëri quemisantatsiri. Te onganinate aroca tojai nanibatasantë nibarintsiquë ora te irogóiguero quemisantatsiri. ²⁰ Nopiguemisantacagane, quero piquengaiga cantaca janequi, pinguengasantaiguëma cantaca antiasipari ogótatsiri. Carari quero piquengairo ora te onganinate, queroca picantiro ora quimingaro. Caninataque pingantaiguëmari janequi cara te irogótiro ora cagaro caninatatsi. ²¹ Ocanti Sanguenari:

Icanque Atingomi: “Nanibataiguëri joríojegui nibarintsi paguequë. Aisati nagátaiguëri matsiguenga cagari jorío irinibataigapëri basiniati nibarintsi, carari quero ique-maigabaquero jorío, querootisati iquemisantina Naro”.

²² Iroro ora cara pinibataiguëroca basiniati nibarintsi, iroonti ora irogóontëmaro ira terai inguemisante cara yogomequimi Tosorintsi. Carari cara pingomantantaiguëroca, pomitocotaiguëri quemisantatsiri.

²³ Pinetsaigue: cara popatobiritaiguëmari Atingomi, aisati omagaro nibatatsi basiniati quë nibarintsi, aroca ingaigapë iraequi te inguemisante, ¿Queroco icantocotaiguëmi: “Te iraneicotaiguëma irirojegui. Ichabënitaguëmi?” ²⁴ Carari aroca antagaisati pingomantagueantë, aisati ingapë poro ira te inguemisante, cara inguemaigapëmi aro oshabitapëri iraneingemento cara irogóque ainta ora icantaguetomotiri Tosorintsi te onganinate. Irajique omagaro comantëgotëri iriati. ²⁵ Aro ingomantëgotëri ora imánabeca isërequë. Aro irobotcagueritotasipëmari Tosorintsi, irajiquerí Itingomi. Aisati ingantaiguëmi: “Aisonori itsibataiguëmi Tosorintsi”.

²⁶ ¿Pairi nanganque, nopiguemisantacagane? Cara popatoitima, caninataque poro cántatocoquerine Tosorintsi Iriro caninari, irogomeantë basini, ainta ingomantanque basini, basini nibaquerone basiniati nibarintsi quero igóiguë ira tsipataigari, aisati ainta ironijagaiguëmiro ora icanti. Pairoraca pingantaiguë, pingantineri Tosorintsi aisati pingogaigue pomitocotaiguëri quemisantatsiri. ²⁷ Ainta nibaquerone nibarintsi ora te pinguemaiguero, aro irinibaque paniro, irinibaque basini, irooti maba. Quero basini. Patiropague irinibatagueque paniropague. Caninataque poro oniagaiguëmirone ora ocanti nibarintsi. ²⁸ Queroca ini ira oniagantirone, quero inibati basiniati nibarintsi; iromaireteta catinasati quë irapiguemisantane. Patiropague casiriconiati, irinibaquerinta Tosorintsi. ²⁹ Caninataque paniropague ingomantante Irinibare Tosorintsi pite, queroca maba. Iraequi basini inguengasëretaigabaquero ora icomantaiguë. ³⁰ Iroontita icomantanti poro, aroca Isëre Tosorintsi oniaguëri ogomeantagantsi ira basini, aro iracotanë. Aique ira nibasigatsi iritsita tsonguërone irinibare. ³¹ Paniropague ingomantagueantë antagaisati arota irogometaguëri omagaro quemisantatsiri, iraganinasëretaiguëri aisati. ³² Ira comantantiro Irinibare Tosorintsi iromairete cara Isëre Tosorintsi ongomantaquëri basini. ³³ Te iraninte Tosorintsi angatsiguëguitaigue cara omanocotiri. Icoqui omairetaigue, caninasati anganque poropague arota anguemasantobëri.

Yametaiga icantaigui negaca antagaisati quemisantatsiri ira botoibiritari Atingomi. ³⁴ Aisati ametaiga eiro, ora tsinanejegui omairetaiguè tenta irinintacaguero onibate cara yapatotaiga. Caninataque onguemisanque cara ocanti Sanguenari. ³⁵ Ocoquica ogóte tsinane pairoraca, caninataque osamitèri ojime cara obangoquè. Teni onganinate onibataigüe tsinanejegui cara papatobiritaigari Atingomi. ³⁶ Pinetse. ¿Pijitaiguico opañica Irinibare Tosorintsi cara obirojeguiquè? ¿Pijiqueco paniro pigóguero obirojegui? ³⁷ Aintaca comantantatsiri ijica Iroero nibatacaqueri Isère Tosorintsi, nocoguini irogótiro oca: oca nasanguenataiguèmica, iroonti iragáantane Atingomi. ³⁸ Queroca poro quemisantiro oca, querootisati piquemisantiri iriro. ³⁹ Yamai, nopiguemisantacagane, pingogasantaigne pingomantantiro Irinibare Tosorintsi. Aisati pinintacaguiri popiguemisantane irinibataiguero basini nibarintsi. ⁴⁰ Carari, caninasati pingantaiguero antagaisati, paniropague pingantiro.

15

Paboro icomantègotèri Jesus icabiritanaca icaniantanai. Aisati cara angabiritanaima eiro.

¹ Yamai, nopiguemisantacagane, nocoguini nogótacagaiguero Caninaro Niabrintsi ora nocomantaiguèmi jirai. Irooti piquemisantaigabaquero aisati pèrosati piquemisantane yamai. ² Irooti pabisacoontaca yamai, aro pèrosati piquemisantasantaigasegui. Carari piquemisantomemegacaroca, quero yogabisaicotajimi Tosorintsi. ³ Noguibatè nocomantèmiro ora yoniaguèna Tosorintsi: ainta acantaguetomotiri ora te onganinate, iroero ora icamobitaguècái Quirisito. Imoncaraquero ora ocanti Sanguenari. ⁴ Aisati yomianquengani igamaga omoroquè. Pabisanaque maba cataguiteri, aro icabiritanaa yoganiatairi Iriri cara ocanti Sanguenari. ⁵ Aique yoniagaari ira Sejas, aique yoniagaigaari aisati antagaisati irogomere ira caratatsi 12. ⁶ Aique yoniagaigaari tojai quemisantatsiri icarati 500. Iniaigabajiri. Ainiroquerai yamai itimaigui irirojegui, carari arosataanti camènguisti. ⁷ Aique yoniagaari Santiago, aique yoniagaigaari omagaro iragátane. ⁸ Aique naro carantènguisti. Yoniagapèna naro, nacantari ibega ira ibogatsi queroquerai imoncarata 9 manchacori. ⁹ Igáquena, carari te nangantimari ibega basini iragátane, tenta nongomeite naro. Noguaitaguequi ira quemisantatsirijegui, naguisabitacari, nocogabeca nóguirime omagaro. ¹⁰ Icabintsasantèna naro Tosorintsi icantaneintègotèna, irooti nareantaca yamai. Te ingábintsasantasitina. Ipomirintsibencari Tosirintsi basini iragátane, carari nopomirintsitasantobencari naro. Te nangantasitimaro naro, icábintsasantèna, imitocoquina, iroero nacantasantaguèquineri. ¹¹ Jemita pairi comantaiguèmi, naro, iriroco basini iragátane, caninataque piquemisanque. Nacantaigari ibega iriro, nocomantaiguèmiro Irinibare Tosorintsi irooti ora piquemisantaigabaquera.

¹² Pinetse. Naquemocoqueri aintapague obirojeguiquè ira cantasitacha quero icabiritaja igamaga. Cani jirai nocomantègotèri Quirisito narogui iragátane aisati comantantatsiri cara icabiritanaa Quirisito icaniantanai. Piquemisantaigabaquena. Yamai, ¿Pairo picantobiti quero icabiritaja camaguetatsiri? ¹³ Querome icabiritaja camaguetatsiri, querootisati icabiritaja Quirisito. ¹⁴ Querome icabiritaja Quirisito, natsipiriasicarome nocomantègotèri aisati pitsipiriasicarome piquemisantaiguèri. ¹⁵ Pigóguème cara nontsoiguègotasitimarime Tosorintsi narogui iragátane. ¿Teco nongomantègotèri: “Icabiriqueri Quirisito”? Carari querome icabiritaja camaguetatsiri, querootisati icabiritari Tosorintsi Iriri. ¹⁶ Querome icaniantanai camaguetatsiri, querootisati icaniantanai Quirisito. ¹⁷ Aisati querome icabiritaja Iriri, piquemisantaigabitari, pèrosatime pingantagueti ora te onganinate. ¹⁸ Aisati antagaisati quemisantatsiri ira camènguisti, játaqueme Sharincabeniquè. ¹⁹ Aisati, querome acabiritaja, atsipiriasiquimarome cara aquemisantaigabitari Quirisito yamai, ogasèretasantaca abisanaqueri basini ira atsipiriaigatsi.

²⁰ Carari aisonori icabiritasanta Quirisito, ibatiguèri omagaro basini camaguetatsiri carari inganiataigae aikuenta. ²¹ Aroquenta icanquero Arán jiraisonori ora te onganinate, iroero acamasanoigaguèti yamai. Carari ainta Ira jitacha Quirisito, icantagueti ora caninaro, irooti angabiritanaima eiroegui. ²² Omatsiguengatacari Arán, iroero acamaantaguètaiga. Aisa ocanta antagaisati eiro omatsiguengatacari Quirisito, anganiantanae eironta iraisati, ingabiritajái. ²³ Ibatagacái Quirisito. Aikuenta, cara iribocapae intinaigari antagaisati quemisantatsiri. Cara omoncaraquema, angabiritajima omagaro eiro, anganiantanae. ²⁴ Aique Quirisito agabeirine antagaisati agábetachari, obatabetachari, itingompague, omagaro iritsongaigapèri. Aro inganqueri Tosorintsi: “Pabati, yamai nagobiaqueri antagaisati. Pigátaiguèri pèrosati omagaro inaigatsi Obironta Itingomisonoriguinte”. ²⁵ Irobatacagantanè Quirisito irooti cara iragabaiguèri iritsongaiguèri omagaro ira quisagabitari. ²⁶ Aique quero icamaji matsiguenga aisati. ²⁷ Ocanti Sanguenari:

Ipëri Itomi Tosorintsi iragáantaiguëri antagaisati inaigatsi. Paniro te iragátiri Iriri, Ira përi Quirisito antagaisati.

²⁸ Cara iragabiaiguëri Quirisito iraugui pëgacari, aique inganqueri Iriri: “Jerica, Pabati. Popabaquina cara nagobiaqueri omagaro icaegui. Yamai nocoguini intingomintaiguemita antagaisati. Aisati Obiro nasi Natingomi”. Aique Iriri Tosorintsonori, Itingomisonorigu-inte.

²⁹ Pinetse. Ainta obirojeguiquë ira baotisabiricari ira camënguisti. Querome icabiritaiganaja camaguetatsiri, ¿Pairo icantobitiro? ¿Teco iratsipiriasitima? ³⁰ Aisati querome nacabiritaja naroequi iragátane Quirisito, ¿Pairo nocomantëcobiriqueri? ¿Teco natsipiriasitima? ³¹ Piquemisantaiguëri Atingomi Jesoquisito. Iro ro ora nacininasëretëgobiritaiguëmi. Aisa oanta, aisonori nocomantasantaiguëmi oca: teni nogóte atiraca ongantima iróquina iraugui quisaneinquina cara nocomantanti. Antagaisati cataguiteri icogabeca irógaiguemane. ³² Canta Ejesoquë iguisaneintasantaiguëna catsimari matsiguenga, tojai yobomirintsitaiguëna. Aisa icantaigari ira secari atsgantatsiri ira nipëgatata. Querotame nacabiritanaca ¿Pairome omitocoquinane? “Caninataqueme intsome opaiganaque, aisa ógaiganaquima. Coraque angamaiguë naramani”. Aro angaraque. ³³ Pigamaiguemari ira nibatasitacha cantacha nega. Iromatobiquemi. Cara ocantagani: “Quero pitsibitari ira cantiro quimingari arota quero ijocacaguimiro ora picantabeta caninari”. ³⁴ Pingaguite, pingungasëretima. Quero pogatsitairo ora te onganinate. Ainta obirojeguiquë ira te irogótiri Tosorintsi. Nacanquemiro negaca arota popasiquitaigue.

³⁵ Ainta ira osamitënguistsine: “¿Ati ingantajima cara ingabiritaigaima camaguetatsi? ¿Ati ongantajima ibatsa aroca inganiaetae?” ³⁶ ¡Quero posamitasita! Pinetsaigue: cara pomanguitiro oguitso, quero pii panguirintsi queroca ocamí oguitso. ³⁷ Cara ianë, iroonti basiniati. Cagaro cantaro oguitso ora popanguitë. Popanguitëro tirigoguitso iroonti oguitso. Pinanë obatsa, oboa, osi, omagaro. Yamai iroonti basiniati. ³⁸ Popanguitëro. Aro imaguëtëro Tosorintsi antagaisati oguitsopague asiati obatsa, oboa, osi, omagarpague basiniati. Ipaguetaiguëro ora icogui Iriri. ³⁹ Teni aisa ongantobaguima ora ibatsapague. Basini pini ibatsa matsiguenga. Basiniati ibatsa basiniripague. Casiriconiati pini ibatsa tsimiripague aisati simapague. Antagaisatipague basiniatipague. ⁴⁰ Ainta ibatsa paniacha yaca quibatsica. Aintasati ira paniacha Jonogaguitequë. Ocaninataigui omagaro, carari te aisa ongantobaguima. Pinasitanaca poropague. ⁴¹ Ora irobariane paba teni aisa ongantimaro iguëtaguiterite manchacori. Ora irasi jonogasatipague iroonti basiniati. Inasitaguëtanaca. Aintapague obariasantatsi, irari basini, te.

⁴² Aisa acanta eiro, cara angabiritajima. Quero aisa acantaja ibega yamaica. Iritijëcái, aro obatsaganë obatsa. Angabiritaiganajima; quero abatsaganai aisati. ⁴³ Teni ongomeite oca iritijëtabecáica, carari onganinatasantë ora cabiriquenguichane. Yamai teni asintsite, angabiritajima sintsirisonori. ⁴⁴ Oca obatsaca iritijëcái, aro amecaro quibatsi atimantaigaro. Cara angabiritajima, inasitanaima obatsa, omeantimaro antimaque cara Jonogaguitequë. Aitiro obatsa yaca quibatsica; aiquenta inanë basiniati antimantimaro Jonogaguite. ⁴⁵ Ocanti Sanguenari:

Caniatatsiri inabita sërari obaquenguisti, ira jitacha Arán.

Carari aique ipoque Quirisito carantënguisti, Ira caniatcacagantsiri aintita Isëre timagantsiri. ⁴⁶ Yamai obaque obatsa ora atimanta yaca quibatsica. Aiquenta antimantapëmaro basiniati obatsa ora omeantëma Jonogaguitequë. ⁴⁷ Ipaniaca quibatsiquë ira obaquenguisti jitacha Arán. Yobetsiquëro ibatsa iroonti quibatsi. Carari Quirisito ipaniaca Jonogaguitequë Ira carantënguisti. ⁴⁸ Itimaque Arán yaca quibatsica. Aiti ibatsa, aisa icantaigari antagaisati matsiguenga timaigatsi quibatsiquë. Aiti ibatsasonori Quirisito Jonogaguitequë, aisa angantaiguëma eiro jätënguistsine Iriroquë. ⁴⁹ Yaca asi obatsa osigaro irasi Arán. Aiquenta osiaquemaro irasi Ira panënguicha Jonogaguitequë.

⁵⁰ Iro ro, nopiguemisantacagane, nongomantaiguëmiro oca: quero piáti oca obatsaca canta igáanti Tosorintsi, querootisati piáti ora obatsaga: canta, quero pinai ora pat-saagantsi. ⁵¹ Yamai, noniaguëmi ora te irogóguero matsiguenga jirai: quero acami antagaisati, carari omagaro eiro omasiniatitanae. ⁵² Intibotanë, aro ogóguë omoncaraca antagaisati. Intibotanë, irooti angabiriantëma eiro, camabetacha, quemisantatsiri, quero acamaji aisati. Aisati eiro terai angame omasiniatitanae. Inganquero Tosorintsi omanpaguesonori. ⁵³ Yamai asiati obatsa obatsaganë; carari aiquenta quero ibatsagaji aisati. Yamai acamaque, carari aiquenta quero acamaji aisati. ⁵⁴ Cara omasiniatitanae irooti cara quero ibatsagaji, querootisati acamaji, aique omoncaraquema ora ocanti Sanguenari:

⁵⁵ Aro. Yamai ocaratí cara angamaque agabeironta camagantsi. Quero ogatsitaa acamaji. Quero aquengasëretaa acamaji. ¡Caninataque! Yamai quero otSOROGAIGAI acamaji.

⁵⁶ Cara angantaguetiro ora te onganinate, aro ontsorogaiguëro angame, cara ocanti Sanguenari, aroca angantagueque ora te ongomeite, angamaque. ⁵⁷ Carari aroque icamobicái Atingomi Jesoquirisito, icabiritaja, yogabisaicotajái. Aro intsome angantocotiri: “Caninarisonori ini Tosorintsi, intsome angarasiatiri”. ⁵⁸ Iroro, nopiguemisantacaganeegui, nanintane, përosati pinguemisantasantanëri Atingomi. Pintineri përosati, pintarobacaatineri. Pairoraca pinganque, pingantobentiri Iroro. Quero poperatasita. Quero pitsipiriasita, intsibataiguëminta Atingomi, imëmi ora caninaro aisati.

16

Yapatotëneri Jerosaresati iguireguite.

¹ Yamaica nangantocoqueri quirequi papatotëneri piguemisantane coguitiachari canta Jerosarénquë. Oca nongomantaiguimica, aisati nocomantaguequeri quemisantatsirijegui cara Garasiaquë. ² Omagaro tomincoquë, caninataque popatotineri Jerosaresati piguireguite. Atiraca ingarague piguireguite, poguineri casiriconiati ira pinintaigui pomagantineri. Aro cara naretanëmi naro, aroque ainta quirequi, arota quero nobomirintsitaigapëmi. ³ Cara najáque obirojeguiquë, nasanguenaquineri Jerosaresati aisati. Aro pingoigaigue ira pigáque iráganëneri. ⁴ Aisati pinintica najáte naro, aro nantsibatanëmari.

⁵ Aiquenta najáque naniaigaimi, carari arotsita najátagueque canta Maseroniaquë, aique narequimi obirojeguiquë. ⁶ Cara najáque obiroquë, nocoguini nantiomotaiguemi cosamani, irooti omagaro tsaengaquë. Aiquenta, pomitocotaigabaquina pingábintsaiquëna atiraca najáque aisati. ⁷ Teni naninte naniaiguemi omanaanti yamai. Aiquenta nocogui nantiomotimi, aroca iranintacaquena Atingomi. ⁸ Yamai natimaque yaca Ejesoquëca irooti cataguiteriquë jitacha Pentecosités. ⁹ Ainta tojaini yaca ira cogatsi nanguenguitsatomo-taigueri ora Caninaro Nibarintsi. Arosonori ira quemisantaigabaquero. Aintasati tojai ira quisaneintaiguëna pëgatsatina.

Paboro ibetsataigacari irapiguemisantane.

¹⁰ Cara iraretanëmica Timoteo, pingábintsaiqueri irironta aisati icantina nibega naro, intineri Atingomi. ¹¹ Quero poro maintirine. Carari págacaninatobëri, aisati caninasati pingábintseri arota iripigaima yaca caninasati. Noguiaqueri iriro, aisati basini opiguemisantane intsibataigapëmari. ¹² Namanabecari iriáte Aporo obirojeguiquë, intsibatanëmari ira basini opiguemisantane, carari te iraninte iriáte yamai. Cara ingoqueca aiquenta, aro iriátë.

¹³ Pigamaiguema. Përosati pinguemisantaiganaqueri Atingomi. Quero pitsorogaigui. Nocoguini irisintsisëretacaquimi Tosorintsi aisati pisintsibentineri. ¹⁴ Pairoraca pingantaiguë, pinintobaganëma. ¹⁵ Pigóiguëri, nopiguemisantacagane, ira Isitéjana aisati imatsiguenga. Ibataiguëri Acayasati iquemisantaiguë. Icantaguëro caninaro, icábintsaiqueri imitocotaiguëri quemisantatsiri. Icabintsasitacari, te ingoicotiri. ¹⁶ Ipomirintsitaca imitocotasantaiguimi pairoraca icantaguequimi. Nocoguini pinguemisantaigabaqueri iriro, aisati icantaigari ibega iriro. ¹⁷ Nacaninatasantë cara yaretaiguëna Isitéjana, aisati Jorotonato, aisati Acaico. Nogasëretocoquimi, carari imitocotaigapëna aisatime ingantimime pibega obirojegui arome piretimame yaca. ¹⁸ Imagoriasëretagaigapëna aisa icanta imagoriasëretagaiganaquemi cani. Caninataque piniancaninataigueri iriro.

¹⁹ Iraegui quemisantatsiri botoibiritari Atingomi yaca Asiaquë ibetsataiguimi. Aisati ibetsatasantaiguimi Aquira, Pirisira iina, aisati omagaro botoitacha canta ibangoquë iriro. ²⁰ Ibetsataiguimi antagaisati opiguemisantane yaca. Cara pobetsatobaganëma, caninasati págacaninatobaganëma. ²¹ Aisati nobetsataiguimi naro Paboro. Nasanguenataiguimiro arosata naati. ²² Iriáteta Sharincabeniquë ira te iranintiri Atingomi. ¡Omana, Atingomi! ¡Popoquel! ²³ Nocoguini ingábintsaiquemi Atingomi Jesoquirisito. ²⁴ Nanintasantaiguimimi omagaro obironta quemisantaiguiri Jesoquirisito.

Aro ocarati ora nasanguenataiguëmi. *Paboro*

YOGATSITAIRO PABORO ISANGUENAQUINERI CORINTOSATI

Ibetsataigari Corintosati.

¹ ¿Ainirobiegui, nopiguemisantacagane, cara Corintoquê? Naro Paboro yaca Maseroni-aquê, nasanguenataiguimiro oca. Icoiguêna Tosorintsi aisati igâquena Jesoquirisito. Itsibatina yaca Timoteo opiguemisantane. Nasanguenataiguimi obirojegui quemisantatsiri ira botoibiritari Tosorintsi canta Corintoquê, aisati iraegui quemisantatsi omagaroquê Acaya. ² Yamai nocoguini përosati ingâbintsaiquemi Pabati Tosorintsi aitosati iromagori-asêretagaiguemi arota intimacagaiguemi caninasati. Ingantaiguemirota Iriro aisati Atingomi Jesoquirisito.

Iraganinataigari Tosorintsi ira atsipiriaigatsi.

³ ¡Caninarisonoriguinte Otosorintsi! Iriro Iriro Atingomi Jesoquirisito. Icantaneintêgotacái aisati yoganinatasantacái ⁴ cara atsipiriasitaigaro pairoraca aisati cara ogasêretaigaca aisati cara ocogasantaigabitaaro pairoraca. Cara yoganinasêretái, aisati igôtacacái eiro aganinasêretaiguêri ira basini cara iragasêrequima aisa ocanta imitococái Tosorintsi. ⁵ Aroca tojai atsipiriobenqueri Quirisito aisa icanca icantobicái Iriro itsipiriobencái, aisati tojai irobesêrecacái eiro. ⁶ Iroro aroca nomomirintsitobitaiguêmi, nanganquero arota iraganinasêretaiguemi Tosorintsi, aisati iragabisaicotajaimi Iriro. Aroca iraganinasêretaiguêna, aisati pinganinatanê obirojegui pigótinta aisati iraganinasêretimi Tosorintsi aisa pingantina nibega naroequi. Iragabisaicotajimi, iromitocotaiguêmi pabetiro cara pitsipiriobentaiguêri Quirisito pairoraca. ⁷ Nigôtasanti aroca pingantaiguêna nibega naro pomomirintsibentiri Quirisito obiro, aisati pingantaiguêna iraganinasêretimi Tosorintsi.

⁸ Nopiguemisantacagane, nocoguini pigóigue cara yobomirintsitasantêna naroequi cara Asiaquê; nogasêretasantaca agabanisonori irooti cara te nabetiro. Najitabeca nangamaque.

⁹ Aisonori nigóiguê tigue nangantima nagabisaicotima naati. Patiro nogueicoitari Tosorintsi. Paniro Iriro icanta yogabisaicoonti icabiritaguetirinta camaguetatsiri. ¹⁰ Aroque yogabisaicoquena. Te nangamaigue. Aisati yamai iragabisaicoquina. Aisati nagueicoqueri cara përosati iragabisaicotopiantina. ¹¹ Pomitocotaiguena, pomanocotina arota ingantocotina Tosorintsi. Aintaca tojai ira manêgotaiquênane, aisati tojai ingarasitaiguêri Tosorintsi cara tojai icâbintsaiquêna.

Patiro catingasati isanguenague Paboro.

¹² Aro imitocoiguêna Tosorintsi, tojai icâbintsaiquêna, iroro nacantocotaguêtiri. Te nogótasitima pairoraca nangantineri, carari caninasati yogomequina Tosorintsi ora ico-caquina. Najique nacantaiguêro caninasati. Nigóiguê piniacaninatêro ora nacantague-tomotimi, aisa icanca basini matsiguenga iniacaninataiguêna. Iroro nacininataguêque. ¹³ Catingasati nasanguenataiguemiro oca. Te ongomêtate pinibatobêro nasanguenare. Aisati te omomirintsite pigótaigabaquero. Nocoque pinguemasantaigabaquero. ¹⁴ Arosata piquemisantabecaro cara nocomantaiguêmi jirai. Nocoguini cara iripigaima Atingomi Jesus, nanganinabentaiguemi cara piquemasantaiguêro ora nogometaiguêmi. Aisati pinganin-abentaiguêna naroequi.

Iriátême Paboro iranajirime Corintosati.

¹⁵ Yamai nigóque piniacaninataiguêna. Iroro nopintsatabitaca najátajeme nania-jimime aitosati. Nocogabeca nomitocotajimime aisati, nanguemisantantacaguimi. ¹⁶ Nocogabeca naniajantimime omantaanti cara najâqueme Maseroniaquê. Aique cara nopocaje Maseroniaquê naniopaimime aitosati. Aique pomitocotaiguêname cara naganêmanica cara Joreaquê. ¹⁷ ¿Pijique nomatobitaiguêmi cara nopintsatabitaca najâqueme obirojeguiquê? ¿Pijique nacantari ibega ira cantasitacha: “Aro” aisati: “Quero”? Te nangantimari iriro. Te nongogue nomatobitimi. ¹⁸ Igóque Tosorintsi cara te nomatobitaiguêmi. Igóque quero ninibati: “Aro nanganquero”, aique: “Quero nacantiro”. ¹⁹ Nocomantêgotêri Jesoquirisito naro aisati Timoteo aisati Siribano (iriati Siras). Quirisito inibatê catingasati ora aisonori; tesonori irinibate: “Aro nanganquero”, aique: “Quero nacantiro”. Nanintini nangantimari ibega Iriro. ²⁰ Atiraca ocaratí Sanguenariquê jirai cara inibatêgotêri Quirisito. Aisonori imoncaraquero Quirisito omagaro icantaigacái Tosorintsi Sanguenariquê. Iroro nocomantaguêtiri matsiguenga cara icaninatanasanti Tosorintsi aisati Jesoquirisito Atingomi. Përosati imoncaraquero Irinibare. ²¹ Cara aquemisantaiquêri Quirisito, itasongobencái Tosorintsi, yosintsisêretacái, icoigacái iraisati. ²² Itasongobencái

aisati ipaáiro Isère Caninaro coshoni pogacái, pínancái asêrequê. Yamai igóiguê eiro quero ijocajái, iromoncaratiro omagaro Irinibare.

Icomantairi paio te iriábirite iranijiri.

²³ Iroro te najátaguête naniajimi jirai, tenta nongogue nasintsitsatimi, aisati te naninte nauipasisguitimi, nogasêretacaguemi. Igóque Tosorintsi te nontsoiguema. ²⁴ Te nongogue nagátimi pinguemisantaiguena aroquenta piquemisantasantaiguêri Tosorintsi yamai. Cararina naro pitingomi, iroonti nocoque naganinasêretaguimi, antagati.

2

¹ Naquianca: “Yamai quero niáti naneiri Corintosati. Aroca najáque nagasêretacaguêri iriro aisati nagasêrequima naro”. ²⁻³ Aroca nagasêretacaguimi, ¿Pairi aganinasêretêname naro? Teni irine, paniro obiatiegui. Iroro nasanguenataguêtaiguêmi cani jirai, nasintsitaquemi. Te naninte najáte nagasêretacaguimi obirojegui; teatisati naninte pigasêretacaguina naro. Cara najáque nocogui naganinatobaguima obiro, naro. Nigóti cara nanganinasêretomoguimi, aitosati pinganinasêretaiguê obirojegui. ⁴ Jirai nasanguenataguêmiro, tojai nogasêretocotasanoiguêmi, aisati tojai niraicotaiguêmi. Carari te naninte nagasêretacaguimi, iroonti nocoque pigóigue tojai nacábintaiguêmi, nanintasantimi.

Yamai pijocajineri ira sêrari icantaguetiro te ongomeite.

⁵ Cani jirai nasanguenatocoqueri ira sêrari ágairo irajitane. Te panirona naro nagasêretocotimari. Aisati obirojegui pogasêretocotaigacari. ⁶ Aroque piquengabiritaigacari, picasitígataiguêri irooti cara ijocajiro ora icantagueti te ongomeite. Antagati yamai, aroque omoncaraca ijocajiro. ⁷ Yamai pijocajineri obiro, quero piguisaneintajiri. Iroonti pingábintaiguêri, pigaiagasêretiri arota quero aiquero iáti yogasêretasanta. ⁸ Nocogui yamai pigótacaqueri aisonori picábintsasantêri. ⁹ Iroro nasanguenataguêtaiguêmi jirai. Nocoque naniaitaiguêmi, aisonorica piquemisantaiguina. ¹⁰ Pairiraca pijocajine ora icantagueti, aisati naro nojocajineri. Aroca ingantaguetomotaiguêmi pairoraca ora te ongomeite, icogui Quirisito pijocajineri, quero piguisaneintiri. Jirai catingasatiquê Quirisito nojocajineri naro ira sêrarira ágairo irajitane. Yamai pingantina nibega naro ¹¹ arota quero icantacaguimi Satanás ora te organinate. Nigóque tojai icogabeca iromatobítai.

Icarasiaqueri Tosorintsi cara iquemisantacaqueri tojai matsiguenga.

¹² Cani jiraini nareca Toróarequê nocomantagueigapêri atraca icanta Quirisito cara yogabisaicoonti. Tojai imitocoquena Atingomi tojai yágacatinatobêna ira timaigatsi, tojai iquemisanquero Caninaro Nibarintsi. ¹³ Carari nocogabepari Tito, iriro cantênguicha te naneiri. Te nomogariasêrete. Aro nobetsataiganajari, nogaganaca cara Maseroniaiaquê. ¹⁴ Pêrosati nacarasiatopiantaiguêri Tosorintsi naroequi aroquenta yagobiacaquina imitocoquina nacantaiguêri antagaisati ora inintacaquena. Yamai igótacaguêri omagaro matsiguengajegui cara Irro Quirisito Itingomisonori. ¹⁵ Naquemisantaiguêri Quirisito aisati nocomantêgotêri, iroro iniacaninataiguêna Tosorintsi. Nacarataiguê tojai matsiguenga. Nigótacaqueri cara iriáiguê Jonogaguetequê aroquenta naquemisantacaqueri; ainta tojai basini nigótacaqueri cara iriáiguê Sharincabeniquê tenta inguemisante ora nocomantêri. ¹⁶ Nacantaigabitari iraequi tsoengaiguina. Iroro iriáiguê Sharincabeniquê. Ainta basiniegu nocomantaiguêri, aro iquemisantaiguêna iriro. Iroro iriáiguê Jonogaguetequê. Ingantaiguemani caninasati intimaque pêrosati. Tojai naquengasantêro oca. Querome yagobiacaquina Tosorintsi, querome naquemisantacaguêri matsiguenga. ¹⁷ Ainta tojai matsiguenga yogomeantabitaro Irinibare Tosorintsi icomantomemegaroro ira irágentema quirequi. Te nangantimari naroequi. Igáquina Tosorintsi nogomeantiro Irinibare catingasati. Igóque nocogasantiro nangantiro negaca. Nocomantêgotagueantêri Quirisito. Aisati imitocoiguina Irro.

3

Ira Corintosati ogótacaqueri basini cara aisonori caninari Paboro.

¹ ¿Pijique yamai cara naquenguitsatasantaa naati? ¿Picoqueca yamai basini sanguenatêgotêname naroca caninari? Aisa naroequi, te nanintacaguimi pisanguenatocotina pingomantaguetiri basini matsiguenga naroca caninari. Nigóque ainta cogaquimi pisanguenatineri iriro caninari. ² Igótocotaiguêmi omagaro matsiguenga cara piquemisantaigabaquero ora nocomantaigapêmi, iroro ipasiniatitaguêtaiguêmi Tosorintsi. Aisati naquenganeintêgotaguêmi pêrosati. ³ Carari igáquina Quirisito. Naquenguitsatomotaigapêmi. Oquemisantacaquemi Isère, opasiniatisêretaiguêmi Isère Tosorintsi Ira caniatacagantatsira. Iniaiguimi matsiguenga cara te pingantaigaima pibega jirai, aro igótocoquina aisonori igáquina Quirisito aisati aisonori ora nocomantêgotiri.

Tosorintsi imitocoqueri ira Paboro inganquineri Iriro.

⁴ Nigóiguë aisonori oca nocomantaiguëmica. Naquemisanquerinta Quirisito yagobia-caquina Tosorintsi imitocoquina nacanquineri ora icocaquina. ⁵ Tigueti nangantiro naro; te nangantisitamaro pairoraca, Irianti Tosorintsi cantaquinaro. ⁶ Iriro ogótacaquina atiraca icanta yogabisaicoonti. Jirai aiti Irinibare Tosorintsi aique yogaquero isanguenaquero Moisés. Ocomantaguetiri matsiguenga ora icocaqueri Tosorintsi. Queroca iqemisantiro omagaro, iriáiguë Sharincabeniquë. Carari iroraique yamai Tosorintsi igáque Isère ontimacagajiri quemisantatsiri ojátacagajiri jonoquë. ⁷ Jirai isanguenaque Tosorintsi mopëquë, itsibatari ira Moisés cara oguitojaquë. Caramanisata yanongopaa Moisés yobariaborotasantapë iboroquë. Cara iniaigabajiri imatsiguenga, irianti joríojegui, te iranetsabintiri yotsioquiquerinta. Carari opeganaa arosata arosata cara yobariaborotasanosigui Moisés. Icanque Tosorintsi cara antagaisati ira te inguemisantiro Sanguenari iriátë Sharincabeniquë. ⁸ Cara isanguenaquero mopëquë Tosorintsi jiraisonoru, yobariaborotasantë Moisés cara yoniagampëro imatsiguengaquë. Tojai iqunganeintasantaca omagaro. Yamai aiti Isère Tosorintsi coshoni poguëri quemisantatsiri, përosati ocaniataqueri aiquenta ontimacaqueri Jonogaguitequë. Ora irorai, asi Isère Tosorintsi, pabisëro ora inaga irasi Moisés. ⁹ Caninaro isanguenare Moisés, ora oniagaiguëri matsiguenga cara icantaguetiro quimingari, aisati poniagaiguëri cara icaninatasanoti Tosorintsi. Carari caninarisonori ora irorai Nibarintsi cara iraniacaninatëri matsiguenga Tosorintsi cara inguemisanqueri Jesoquirisito Itomi. Iniaqueri quemisantatsiri aisa ocantabeta te ingantaguetëmate ora te onganinate. ¹⁰ Ocaninatabitaca ora isanguenatacaqueri Moisés Tosorintsi carari caninarosonoriguente ora ogometaguëna Isère. Iroro nosobicomontapëmari Tosorintsi jonoquë. ¹¹ Ocaninatabitaca isanguenare Moisés tenta përo ca ine. Carari caninarosonori irorai Irinibare Tosorintsi: nantiomotasantotëri përosati Jonogaguitequë. ¿Teco iroro caninarosonori yamaitica?

Angantasantanëmari ibega Quirisito.

¹² Aroquenta nigóiguë aisonori nantiomokeri Tosorintsi, iroro te nopasiquitaguëte cara naquenguitsatomotaguetiri matsiguenga. ¹³ Te nangantimari ibega Moisés cara ibasiborocaró ibaniote arota quero ineiri imatsiguenga cara omeganaima cara yobariaborotasantë. ¹⁴ Carari te inguemaiguero joríojegui. Icaintetanë inibatëntabitaro isanguenare Moisés irooti yamai, iroro cantënguicha te irogótocotiro aisati te inguemiro. Paniro Quirisito icantiro igótacaqueri cara inguemisanqueri. ¹⁵ Aisonori irooti icantaiga yamai jorio. Cara irinibatabequimaro isanguenare Moisés, quero igótiro tiguëti ingantima inguemiro. ¹⁶ Carari cara irabentimari Atingomi Jesoquirisito, irogótacagaiguëri cara quero yamatobitaja iriati. Aro irogótasantanë. ¹⁷ Cara ainta Atingomi, aitosati pini Isère ora ogomequeri quemisantatsiri cara paniro Quirisito agabisaicoontatsi, cagari Moisés. Cara yoguiatëri Quirisito icaganëri Tosorintsiquë, catingasati inibatapëri, te përo cara ingantaguete ora te onganinate, quero itsipriasitaro yamai iqemisantiro isanguenare Moisés. ¹⁸ Yamai tenta omatobitima igóiguërinta eiro Atingomi, igótasantiri cara icaninatasanoti Iriro. Aisati ogótacaqueri basini matsiguenga ati icanta Quirisito cara aiquero angungasëretanëri, aguiatanëri. Pitasongobencái Isère arota aiquero anganëmari ibega Iriro. Yamai acantaigabitacari arosata, carari opasiniatitopiantanë. Aiquenta angantasantapëmari Quirisito anganinatasantapë.

4

Caninasati Paboro icomantantiro Irinibare Tosorintsi.

¹ Icantaneintëgoiguëna Tosorintsi, aisati igáquena nongomantaguetaguëri matsiguenga. Iroro quero nogasëretocotaguëtaró. ² Teni naninte nomatobitiri matsiguenga; irari te ingemeite ira matobitaguëtaiguëri. Te nomasiniatitiro Irinibare Tosorintsi, teatisati nongomantasitimari matsiguenga cara ocaninati pairoraca icogui Tosorintsi; arome nangantiro negaca, nomatobiquerime. Carari iroonti catingasati nogometaguëri matsiguenga. Pigóiguëro obiro, aisati igóque Tosorintsi aisonori oca nacanquimica. ³ Aintaca ira te ingueme ati ingantima iragabisaicotajima, iriáiguë Sharincabeniquë. ⁴ Yamatobitaguëri Satanás yogomarajasërequeri, tiguëti ingantima irogótiro teatisati inguemisantiro Caninaro Nibarintsi. Irianti Satanás iqemisanque tsoengatsiri. Satanás te iranintacaguëri inguemisantiri Quirisito cara iragabisaicotajiri, teatisati iraninte intingomintimari Quirisito Ira caninatatsi Tosorintsi ini. ⁵ Te naninte naru nanguenguitsatocotima, Irianti Atingomi Jesoquirisito naquenguitsatocoti. Naanti cantaca pomeraro; nanintaiguë nomitocotaiguëmi arota pinguemisantaiguëri Iriro Pitingomi. ⁶ Jirai yobetsiquëro quibatsi Tosorintsi, iroonti tsitiniri, carari icanque Tosorintsi: “Yamai onguëtaguëtanëta”. Aro oquëtaguetanë. Yamai aniaiguëro pairoraca. Aisati yamai yosanguëguitesëretocociacái

Tosorintsi, igótacagaiganacái ati icanta Quirisito. Anguengauguêrica Iriro, aro igóiganaque eiro caninarisonoriguinte Tosorintsi.

Tosorintsi imitocotaigái ocomantêgotêri.

⁷ Te nasintsibatsate naroequi, teatisati paniro nongomantêgotaigueri Tosorintsi caninarisonori. Irianti Tosorintsi omitocoiguêna cara nocomantanti. Piniaguêna naroequi iragátane te nanganinate, te nasintsite, aro pigótocoigüeri yagobiacagaiguêna Iriro nocomantêgoti. ⁸ Tojai yobomirintsitaiguêna carari te irojocaguinaro cara nocomantanti. Tojai naquengasêretagaica carari te nagasêretima. ⁹ Tojai iguisaiguêna matsiguenga, icantaguebiritaguêna catsimari, carari te irojocanêna Tosorintsi, itsibataiguêna imitocoquina. Ipégatapinintaiguêna matsiguenga carari te iróguina. ¹⁰ Aisa ocanta jirai ainta tojai icogaigabitaca iróguirime Jesus, aisati yamai ainta tojai icogabeca iróguina niro. Paniro Jesus yogabisaicotopiantêna arota ironijagantina cara itimi Jesus aisonori yoganiatanêna. ¹¹ Cara naquenguitsatocoquerinta Quirisito icogaiguê matsiguenga irógaiguena. Carari pênibaque nangamaque, iraniaiguêna matsiguenga cara pêrosati intimacaquena Jesoquirisito, aro irogótocoigüeri Quirisito aisonori ainta Iriro caniari. ¹² Pêrosati nocomantanti niro, iroro ora icogaguêque iróguina. Carari piquemisantaiguêna obi-ro, iroro ora itimacaguêtimi Tosorintsi arota pintiomotaigueri canta Jonogaguitequê. ¹³ Jirai osanguenaquengani: Naquemisanque, iroro nocomantaguêtiri nomatsiguenga Irinibare Tosorintsi.

Aisa ocanta, naquemisantaiguê niro, iroro nocomantaguêtaiguêmiro. ¹⁴ Nigóiguê Tosorintsi itinaajiri Atingomi Jesus, yoganiatairi. Aiquenta iraganiataigaina naroequi, aitosati iraganiataigaimi obi-ro, aro nantsibataiguêmi obi-rojeguê catingasati Iriroquê. ¹⁵ Tojai nopomiribiriquimi cara ingábintsaiquemi Tosorintsi. Aisati ingábintsaiquêri tojai basini matsiguenga. Aro tojai pingarasiatasanotêri antagaisati obi-rojeguê quemisantasiri, pingantocoqueri: "Icaninatasanoti Tosorintsi". ¹⁶ Iroro ora te agasêretaguêtaiguema eiro. Omagotasantê obatsaquê, antiasiparitanê, pênibaque angamaque tenta anguêshote, carari te anguengasêretima antagaisatinta cataguiteri yosintsisêretagaíi Tosorintsi, yogainasêretagaíi. ¹⁷ Yamai arosata itspiriacagaigacái tsoengatsiri yaca quibatsica, carari te anganinatasitima. Igóiguê omanapague abisanaque. Arosata opomiribiritaiguêri Tosorintsi yamai, carari igóquero Iriro, aiquentata irágaiganacái Jonogaguitequê antiomoqueri pêrosati. Canta, antimaiguê caninasati, quero ocantaja pibega yaca. ¹⁸ Quero aquengasantiro ora atspiriaqueque yaca quibatsica. Aiquenta omeganaima omagaro ora aniaiguê yamai. Iroonti aquengasantiro ora te oneingani yaca, ora inatsi Jonogaguitequê. Quero opega iroro.

5

Icomantêgotêro Paboro ora acaninasêretobiti.

¹ Igóiguê eiroegui quemisantatsiri cara angamaiguêca yaca obatsaquê, antimaiguê Jonogaguitequê. Antimantêmaro basiniati obatsa ora irobetsicacái Tosorintsi. Te irobetsiquiro matsiguenga. Pêrosati antimaiguê canta. ² Yaca quibatsica tojai opomirintsitacái ogasêretasataca yamai, aisati tojai aquengasêretagaica tojainta ocogui ojocanêro obatsa yaca quibatsica aro agaganêma Jonogaguitequê, antimantapêmaro irorai obatsa. ³ Canta quero patiro pini asêre, aitosati inê basiniati obatsa caninaro. Aro iraniacaninataigacái Tosorintsi. ⁴ Aiquenta omasiniatitanêma carari yamai iroontita atimaque yaca quibatsica, ogasêreca. Te aninte ojoquiro oca obatsaca cantaca inaga omanchaqui, carari tojai ocogasanti omasiniatitanaima, aro antimantaimaro basiniati obatsa ora quero pitsonga. ⁵ Iroro ora yobetsicobicaíro Tosorintsi arota antiomotiri Iriro basiniatiquê obatsa. Aisati ipacáiro Isêre coshoni ogacái, ogóontaiquema eiro iraisati Tosorintsi, iráganacái Jonogaguitequê. ⁶ Iroro acaninasêretaguêque, igóquenta eiro pêrosatinta atimantaro obatsa inaga yaca quibatsica, terai antsibatasantimari Atingomi. ⁷ Terai aneiro ora yobetsicacái Tosorintsi jonoquê, carari aquemisanqueri Quirisito, aro igóiguê aniaiguêro aiquenta. ⁸ Acaninabiritabecari Atingomi yaca quibatsica carari ocogasanti ojocanêro obatsaca, ajáque Jonogaguitequê, antsibatasantapêmari Atingomi. ⁹ Aroca atimaigui yaca, ocogasantabita aganinatiri Atingomi. Aisati aroca ajáque cara Iriroquê Jonogaguitequê, ongogasantê aganinatapêri. ¹⁰ Aiquenta ingaimacái aganguisatiquê, ingomantêgotacái Quirisito panirootipague. Aroca yamai acantaguetiro caninari, ingábintsaiagacái imaáiro caninaro, aroca acantaguetiro yaca yamai ora te onganinate quero i yaca quibatsica carari ocogasanti ojocanêro obatsaca, ajáquepaáiro ora caninaro, iragasêretacacái.

Isanguenatococa iriati Paboro.

¹¹ Tojai natingomintasantacari Atingomi, naniacobeingacari. Iroro naquemisantacagobitaigui matsiguenga. Igóque Tosorintsi cara naquemisantasano-têri; naninti pigóiguero panirootipague obi-rojeguê aisati. ¹² Teni naninte nanibatêgotima naati, carari teatisati

naninte popasiquitocotina. Iraegui cantëgotaguetasiquina ijitaigaca iriati caninari, carari te inganinasëretaique. Nocoguini popëgatsatimari, pingomantëgotina caninasati ora aisonori. ¹³ Aroca ingantocoquina: “Te iraneicotima Paboro”, aro nangantineri Tosorintsi ora icocaquina. Aroca naquengaigaca caninasati, nanganquimiro arota nomitocotaiguemi. ¹⁴ Tojai inintasantacái Quirisito icamobicái, icábintsasantëna naro. Iroro nacantobitaiguineri ora icocagaiguëna. Cara icamaque Irro, Tosorintsi iniaiguëri antagaisati matsiguenga aisa icanca icamaiguë irirojegui aisati. ¹⁵ Aroquenta iniaigacái Tosorintsi caninari cara aquemisanqueri Quirisito, caninataque ojocajiro antagaisati ora acantagueti te onganinate quero atimobenta eati, carari antimobitiri Irro, angantagueti ora icocacái. Yamai itimacagajái Tosorintsi aisa ocanata yoganiatairi Jesoquirisito cara aroque icamobicái. ¹⁶ Jirai najitabecari Quirisito irianti matsiguenga, te nogótabetimari arocá Irianti Tosorintsi. Carari yamai nigótasantëri ati icanta. Aisati jirai najitaiguëri quemisantatsiri irianti matobiantatsiri; yamai quero nitsoinguiro aroquenta yamai naniaiguëri aisa icanta iniacaninataiguëri Tosorintsi. ¹⁷ Cara iquemisanqueri Quirisito matsiguenga, aro yoguëshonicari, ipasiniatisërequeri Tosorintsi. Quero iquengairo ora icantabeca jirai, quero icantaguetajiro quimingari, aroquenta ipasiniatitaja iriati, yamai iquianqueri Tosorintsi. ¹⁸ Ocarí oca iparintineri matsiguenga Tosorintsi. Igáqueri Quirisito icambobicái, yoganinatacái aquemisanquerinta, yágacainatacái Irro. Yamai quero ipëgasëretaari eiro. Yamai icogui Tosorintsi ongomantaiguëri basini matsiguenga cara inguemisantaiguëri, aro aisati irágacainatagabaqueri irirojegui Tosorintsi. Quero iguisairi aisati. ¹⁹ Pinetse yamai. Igáqueri Quirisito iraganinatagaái eiro, iroro irágacainataguëcái Tosorintsi. Quero iquengairo aisati ora acantagueti te ongemeite. Yamai igátaigacái ongomantaiguëri omagaro basini matsiguenga cara icogasantí Tosorintsi irágacainatagabaqueri irirojegui. Panibati inguemisantasantiri, imëmari. ²⁰ Aisonori naroequi iragátane Quirisito, nogagaiganaquemiro Irinibare Tosorintsi. Aisati icocaquemi pinguemisantiri Quirisito, pomemari, aro irágacainatagabaqueri Tosorintsi. ²¹ Te ingantaguetëmate Quirisito ora te onganinate; Irianti caninari. Carari ipocasique icamobicái. Tosorintsi icasitígabricáiri Itomi cantata Quirisito cantaguetatsi ora te ongemeite. Itsipiriobencái aroquenta acantaguetiro quimingaro eiro. Iroro yamai yoganinasëretobicái Tosorintsi; iniacaninataigacái cantata te angantaguetëmate pairoraca te onganinate. Iniaigacái caninari aisa ancancari Quirisito caninari.

6

Ora icanque Paboro.

¹ Yamai imitocoquina Tosorintsi nacantineri ora icocaquina. Iroro nacantobitaiguëmi; icábintsasantaguëmi Tosorintsi. Quero pitsoinguiro yamai. ² Jirai icanque Sanguenariquë: Cara pamaquina, naquemaquemi, nomitocoquemi, nogabisaiçoquemi irootiquë cataguiteri.

Yamai aisati naro nongomantëmi: caninataque yamaica pinguemisantiri Quirisito arota iragabaisicotajimi. Quero pogueiro irooti naramani. ³ Nacantaiguë caninasati arota quero pairi sërontaiguina. Te naninte nantaguiro pairiraca ingantagueti ora te onganinate. Catingasati nogometaiguëmi arota ira matsiguenga quero icantocotaguetasitaiguina naroequi comantëgotëri Quirisito. ⁴ Përosati nacantasantineri Tosorintsi arota pigóigue aisonori natingomintasantacari. Përosati nantasantineri carari tojai nopomiribiritari tojai nogasëretopiantaca. ⁵ Ipatatapinintaiguëna matsiguenga, yomianquina. Iguisapinintaiguëna. Tojai nobomirintsita, nomagotasantë cara nocomantaguequeri matsiguenga. Nacaguitapininti tsitiniriquë. Nanipiantaca nitasegue. ⁶ Aisati noniagaca cara naquianca caninasati, natimaque caninasati. Nigótasantëro Irinibare Tosorintsi iroonti aisonori. Caninasati aisati antsinsati nacantaiguëri ira quisaguëna carari te nanguisaneintiri irro. Nacábintaiguëri matsiguenga; omitocoquina Isëre Tosorintsi nangantineri; nanintaiguëri matsiguenga. ⁷ Nocomantaguequeri ora aisonori, iroonti Irinibare Tosorintsi, yagobiacaquena Tosorintsi imitocoquina arota nanganquineri caninasati aisati nanguemisantaqueri basiniati matsiguenga inganinanquima. Aisati icábintsëna Tosorintsi arota quero yagobeina camagari, querootisati ijocaguinaro cara nocomantëgotëri Quirisito. ⁸ Ainta iniacaninataiguëna aisati basini isërontaiguëna. Ainta ira nibacaninatëgotëna, aisati ira cantëgotaguetasitaiguëna. Basini quemisantaiguëna carari aintasati tsoengaiguëna. ⁹ Te irogóiguena matsiguenga carari igótina Tosorintsi. Ainta isariabitëna irógaiguëname, carari caniarinaquera. Tojai naniacatsigataguetasicaro carari te nangame yomisantënanta Tosorintsi. ¹⁰ Nogasëretocotaigacari matsiguenga, iroro cantënguicha nacandinabenqueri Tosorintsi përosati. Teni ine tojai ora nasinta carari nomitocoiguëri matsiguenga irogótiri Tosorintsi, inganinabentaiguëri Irro. Teni inëmate pairoraca nasi, carari icábintsëna

Tosorintsi tojai, ipëna omagaro ora nocoque. Nacaninabentaguequero omagaro yoganë Tosorintsi yaca quibatsica.

Tojai Paboro icábintsaiquëri ira Corintosati.

¹¹ Nopiguemisantacaganeegui, nocomantasantaiguëmi omagaro naquengaigaca, te nománopitimiro pairoraca. Tojai nanintaiguëmi. ¹² Te nopasiquitaiguëmi. Carari obirojeguiquë te pinintaiguëna pipasiquitaiguëna. ¹³ Aisati nacantacagaiguëmi ibega notomijegui aisati nasintojegui tojainta nacábintsaiquëmi. Ninibataiguëmi catingasati. Naninti pingábintsaiquëna naro aisati pinibataiguëna catingasati, arota quero pipasiquitiro paio-raca.

Quero picantaigari ibega tsoengatsiri.

¹⁴ Quero coshoni poguiri tsoengatsiri ira te inguemisante. Pinetse, aroca acaninati eiro, ¿Acartarico ira te inganinate? ¿Omatsiguengatarico? Teni. Oca cantaca cataguiteri aisati tsitini: te omoncaratobaguima, casiriconiati pini. ¹⁵ ¿Imatsiguengatarico ira Satanás Quirisito? Tesonori. Aroca aquemisanti, ¿Acartarico tsoengatsiri? Teni. ¹⁶ ¿Caninataquëco iráganëri ibabane matsiguënga tsomagui ibangoquë Tosorintsi? Quero. Pinetse. Coshoni yogaigacái Tosorintsi catimanagerisonori cara icanque jirai isanguenatacaqueri comantantatsiri:

Coshoni nogaiguëri antagaisati quemisanquina, nantimaque irirojeguiquë, quero no-jocajiri. Najitaiguëri nasi, aisati irajitaiguëna Itosorintsite. ¹⁷ Iroto piniantimari tsoengatsiri, pijocanëri, quero coshoni poguiri, quero picantaguetiro ora quimingari cantaca iriro. Aro nágacaninataiguëmi antagaisati, ¹⁸ nontomintaiguëmi, nasintontaiguëmi, pingantaiguëna: “Pabati”. Naro Tosorintsi, Pitingomisonori sintsirisonoriguinte.

Iroto ora icanque Tosorintsi jirai.

7

¹ Yamai, nanintane, aroque igóiguëro oca icomantacái Tosorintsi. Intsome yamai quero acantaguetiro ora te onganinate, querootisati auengairo. Intsome aniacobeingatiri Tosorintsi, anguemisantasantiri, anganquineri aisonori ora icocacái.

Paboro icaninabentobitaiguëri Corintosati.

² Nocogui págacaninataiguëna, pingábintsena. Pigóiguë te nomomirintsitaiguëmi, te nantagaiguëmi ora te onganinate, te nomatobitaiguëmi. ³ Teni naninte naguibitaiguëmi. Pigóiguë tojai nanintasantaiguëmi, teni naninte nagasëretacagaiguëmi. Përosati naquengaiguëmi yaca quibatsica. Aisati aroca nangamacagaiguëmi, aisati përosati nanguengaiguëmi cara Jonogaguitequë. ⁴ Cani jirai nogasëretocoquëmi, carari yamai nacaninabentobitaiguëmi aroquenta piquemisantaigabaquero nasanguenare. Nacantocotaiguëmi obirojegui caninari. Yamai ainta yobomirintsitaiguëna matsiguënga, carari nobesëreobitasantaiguëmi.

Iniacaninataiguëri Corintosati Paboro.

⁵ Cara naretaigaca Maseroniaquë iroto yamai te nomagoriaigue. Itsipiriacagaiguënaró matsiguënga, te inguemisantina, ipëgatsataiguëna. Tojai nogasëretaigaca. ⁶ Carari igóque Tosorintsi iraganinasëretaiguëri ogasëretachari. Cara yarepa Tito, yoganinasëretaigapëna. ⁷ Aro nacaninabentobëri Tito cara itsibatapaina aisati. Aisati icomantapëna cara págacaninataigabaqueri obiro cani; icaninabentaigapëmi. Icampëna cara pogasëretocoquina aisati pagamaigaca; quero pogatsitairo ora picantagueti quimingari. Aisati picantocobentaiguëna. Aro icomantapëna Tito omagaro oca, nacaninatasantë. ⁸⁻⁹ Nigóque cara piniobëro nasanguenare, pogasëretanaca; aisati nogasëretocotabecaro naro arosata cataguiteri, carari yamai te. Te nasanguenatasitimi. Aro cara pinibatobëro, pogasëretacagaigabitënëmi arosata, aique picantaigaca yacaquero, pijoquero ora quimingari, pabentaigacari Tosorintsi. Aro nacaninatëcobentaiganaquëmi yamai. ¹⁰ Icoqui Tosorintsi agasëretima arota ojocajiro ora acantagueti te onganinate, omasiniatitanae. Aique iragabisaicotajái. Aroca anganquero negaca ora icocacái, anganinasëretanë. Irianti tsoengatsi agasëretacagaigabitënëmi arosata, aique picantaigaca yacaquero, pijoquero ora quimingari, pabentaigacari Tosorintsi. Aro nacaninatëcobentaiganaquëmi yamai. ¹¹ Icoqui Tosorintsi agasëretima arota ojocajiro ora acantagueti te onganinate, omasiniatitanae. Aique iragabisaicotajái. Aroca anganquero negaca ora icocacái, anganinasëretanë. Irianti tsoengatsi agasëretacagaigabitënëmi arosata, aique picantaigaca yacaquero, pijoquero ora quimingari, pabentaigacari Tosorintsi. Aro nacaninatëcobentaiganaquëmi yamai. ¹² Nasanguenataiguëmi nococaquëmi pomitocotiri ira cantaguetatsi, aisati pomitocotiri iriri. Carari tojai nococagasanotëmi pigótaigae pinintasantaiguëna. Aitosati iroto icocaquëmi Tosorintsi. ¹³ Iroto nacaninabentasantobitaiguëmi. Aisati nacaninabentasantobëri Tito aroquenta icaninasëretë iriro cara

págacanineataigabaqueri. ¹⁴ Cani, teraiquerai iriátasitimi, nacanqueri: “Icaninataiguë Corintosati, caninasati irágacanineatobêmi”. Aro yaretaiguëmi igópê aisonori nacanqueri, te nontsoiguema. Aisa ocanta te nomatobitaiguëmi obiroyegui. ¹⁵ Tojai inintaiguëmi. Igóque piquemisantaigabaqueri aisati pitsorogaigabaqueri. ¹⁶ Aisati nacaninabentaiguëmi nigótinta përosati pingantopiantiro ora icocaquemi Tosorintsi.

8

Tojai icábintsanti Maseroniasati.

¹ Yamai, nopiguemisantacagane, naninti nongomantaiguëmi cara tojai icábintsaiduëri Tosorintsi antagaisati opiguemisantane canta Maseroniaquë. ² Tojai yobomirintsaiduëri matsiguenga, carari tojai icaninabentasantaiguëri Tosorintsi. Te irasintima tojai carari tojai yapatotaiguëri Jerosaresati quirequi, ipagantëri iquemocoquerinta itsipiriaiguë irapiguemisantane. ³ Te arosata imeri, tojai ipabaqueri. Te iromichatiri iguireguite. Te pairi cantiri: “Pomitocotaiguëri popiguemisantane”. Ipasitaigari iriatiegui. ⁴ Yamanopiantaiguëna: “Nocogasanti nomitocoiguëri nopiguemisantane”.

⁵ Nigótabea imëri quirequi, carari icábintsasantaiguëri, imabocaquena cara iritsita pabacari Tosorintsi iriati. Icantaiguëna: “Nanganquineri Tosorintsi pairoraca ingocaquina, aisati nanganquimiro pairoraca pingantaiguëna. Pingomantaiguëna pairorapageraca ingocagaiguëna Tosorintsi”.

⁶ Cani jirai nigáqueri Tito ingantaiguëmi: “Popatotineri Jerosaresati piguireguite”.

Aro caninasati poparintaigacaró. Yamai nagátajimiri aisati ingantaigapëmi popotaiguëneri aisati piguireguite, pingábintsaiduëri popiguemisantane. Pitsongueneri ora poparintaca jirai.

Paboro icantaiguëri Corintosati: “Pomitocotiri ira coguitiacha canta Jerosarénquë”.

⁷ Tojaipague pobataiguëri basini popiguemisantane: piquemisantasanti, picomantasanti, pigótasantaiguë, aisonori poguiatasantaiguëri Atingomi, picanquineri ora icocaquemi, aisati pinintasantaiguëna naro. Yamai nocogui pobate aisati pingantaneintëgotaiguëri ira coguitiacha. ⁸ Teni naninte nagátimi pomaiguëri coguitiachari, carari aroca pomasantaiguëri, pigóca obiroyegui aisati pigótacagaiguëri basini cara aisonori pinintasantaiguëri popiguemisantane. ⁹ Naquiancagaiguëmiri Atingomi Jesoquirisito. Icábintsasantaigacái. Irironta Tosorintsi, tojai yasintagueta canta Jonogaguitequë, carari ijocanéro antagaisati ora caninarira canta, imatsiguengatapê ipogopê yaca quibatsica. Yaca itsipiriasantê, te ine irasi, te ine cara intimeri, itsoingaigabaqueri imatsiguenga. Itsipiriobitaigacái eiro arota caninasati intimacagaigacái Jonogaguitequë. ¹⁰ Yamai nongomantaiguëmi ora naquianca naro: caninataque pomitocotaiguëri ira coguitiacha. Jirai basiniquë osarini poparintaca pomitocoqueri cara picogaiguë obiatiegui. ¹¹ Yamai aintaca piguireguite pomitocoointimari, aro caninataque pingantiro negaca irooti cara pitsongaiguëro; popatotineri pomagantiri. ¹² Caninataque picogaiguë pingábintsanti. Icoqui Tosorintsi aintaca piguireguite, aro pomeri caninasati. Carari teca irine piguireguite, quero popiri, quero nacantimi pomeri. ¹³ Te naninte nobomirintsaiduëmi, aroca pomitocoiguëri basini. ¹⁴ Ainta pasintaguetaigaca. Yamai pingábintsaiduëri ira cogatsi. Aiquenta aroca irasintaguetaiguëma iriro cara obiroyega coguënguistsine, aique imaguëmi iriro ingábintsaiduëmi obiroyegui. ¹⁵ Aisati ocanti Sanguenari jirai:

Ira ágobënguisti tojai maná cantaca pan ipagaranqueri basini iraperi. Irari ira ágobëro arosataanti, te iritasegue. Imoncaracaró antagaisati.

Paboro igáqueri Tito iraniaigairi Corintosati.

¹⁶ Aisati icantina Tito nibega naro, inintaiguëmi icogui iromitocoiguëmi, iroro nacarasiatobiqueri Tosorintsi. ¹⁷ Nacanqueri:

—Pijátasitajantiri Corintosati, piniaigaantiri.

Te paniroyegui naro cogaguirine iriáte, irineni coguënguisti iraniajimi aitosati. ¹⁸ Aisati nagáqueri basini opiguemisantane intsibatanëmari. Tojai iquenguitsataguequero Caniaro Nibarintsi. Iquemocotaiguëri quemisantatsiri omagaroguitequë, aisati piquemocotaiguëri obiroyegui. ¹⁹ Aisati iriro icoigaiguë quemisantatsirijegui yaca, igátaiguëri intsibatina canta Jerosarénquë, iromitocoquina cara náganëneri quirequi ira coguitiacha. Irágacanineataigabaqueri Jerosaresati inganque icaninatasanti Tosorintsi. Aisati ira pomagantëri quirequi ira noniagaigapëri ira Jerosaresati cara angábintsabacagaiguëma eironta quemisantatsiri. ²⁰ Tojainta piguireguite caninataque iraguiatëna ira pigátane arota quero icanti pairiraca: “Icositëri quirequi Paboro”. ²¹ Nocogasantaiguë te paniroyegui iraniacanineataiguëna Tosorintsi, carari aisati nocogui iraniacanineataiguëna opiguemisantaneegui, arota irogótocoiguëna narogui caninari. ²² Aisati nagáquemiri basini opiguemisantane

intsibatanëmari Tito aisati itsipa. Tojai icantëneri Atingomi. Yamai icogasanti irani-aiguemi aroquenta igóque piguemisantaiguë. ²³ Ira Tito irianti natsipa, coshoni yoguiatina. Tojai imitocotopiantëna. Aisati ira intsibatanacara iraniaiguëmi, irianti iragátane opiguemisantane. Icaninaiguë, iquemisantasantëri Quirisito. ²⁴ Tojai nacantopi-antaiguëri quemisantsiri yaca: “Caninari Corintosatijegui”. Aro cara piniagabaqueri ica nagáquemica, págacaninataigabaqueri, arota irogótaigue quemisantsiri yaca aisonori oca nacantocotaiguëmi.

9

Paboro icomantëri paio icogobique iromitocoigueri Jerosaresati.

¹ Nacantasitaiguëmiro: “Pomitocotaigueri popiguemisantane”, aroquenta pigóiguë picábintaiguëri. ² Nigóque te pomichatiri piguireguite, iroro nocomantobitaiguëri Maseroniasati: “Pabisë poro osarini icogaiguë Corintosati imagantaigueri Jerosaresati quirequi, iromitocotaiguëri”. Iquemocotaiguëmi, inintaiguë ingantaiguëmi pibega obirojegui, iromitocoiguëri iriro aisati. ³⁻⁴ Nacantaiguëri: “Icogaiguë Corintosati imagantaigueri Jerosaresati iguireguite”. Yamai nagátaiguëri ica irobataiguëna, ingampëmi popatotaigueneri piguireguite. Aroca intsibataigapëna Maseroniasati iraniaiguëri piguireguite, irogóiguë aisonori ora nacantocoiguëmi. Aique quero nipasiquiti naro, querootisati obiro. ⁵ Iroro najique caninataque nagátaiguëmiri iraugui opiguemisantane iromitocoiguemi cara popatotaiguëri quirequi. Aro cara narequima naro, ainta piguireguite papatotëri aroque picasiriconiatiqueri. Aro quero nacantajimi: “Popatotaiguineri yamai Jerosaresati”.

⁶ Cara popatotëri piguireguite, pinganquimari ibega panguitatsiri. Aroca imanguitiro tojai oguitso, aiquenta iráquero tojai, imobotëro. Carari imanguitiroca arosata, aitosati arosata iráque. ⁷ Pigóti ati icarati quirequi pininti pomeri. Aro pomeri. Quero pomichatiri. Icoquini Tosorintsi, cara pomitocoqueri popiguemisantane, pinganinatanë. ⁸ Igóque Tosorintsi icábintsasantaiguëmi, quero inintacaguimi picogasanti. Imaiguëmiro antagaisati ora coguitioquimi, aisati imaiguëmiro ora pomitocoontimari basinipague. ⁹ Aisati ocanti Sanguenari:

Te pitsipiriasitimaro cara pomitocoqueri coguitiachari, queronta ipeicotaro Tosorintsi cara picábintsanti.

¹⁰ Tosorintsi ipaguetëri omagaro panguitatsiri oguitso ora imanguitë. Aisati ipapinintiri iraperi. Aitosati iromitotaiguëmiro ora pasiatiegui arota pingábintsagaanaqueri ira cogatsi pairoraca. ¹¹ Imasanoiguëmiro arota pomitocoigueri basinipague. Cara nágaiganaquineri nomaigapëri, aro irágobëri quirequi ira popagantëri, ingarasiataiguëri Tosorintsi, iraniacaninatasantaiguëri. ¹² Cara pomitocotaiguëri popiguemisantane, te paniro pingantaneintëgotiri iriro, carari aisati tojai pingantacaguiri Jerosaresati ingarasiatasantaiguëri Tosorintsi. ¹³ Ingantaiguë coguitiachari: “Icaninatasanoti Tosorintsi. Ira quirequi ipagantaiguëna Corintosati, yoniagaigaca aisonori iquemisantaiguëro ora Caninaro Nibarintsi irasi Quirisito. Tojai ipagantaiguënarí”. ¹⁴ Aisati iromanocoiguëmi arota ingábintaiguemita Tosorintsi. Inguengasëretaiguëmi Jerosaresati, iranintaiganaquemi aroquenta icantaiguëmi Tosorintsi cara pomitocoiguëri. ¹⁵ Intsome angarasiatasantiri Tosorintsi aroquenta icábintsasanoigacái cara igacáiri Itomi iragabisaicotajái.

10

Icantocobentaa iriati Paboro.

¹ Ainta cara obirojeguiquë ira pëgatsatina icantaiguëmi: “Jirai, cara icarataiguimi Paboro, itSOROGAIGUIMI, ipasiquitomotaguimi, carari aintaca canta jaanta ipagantaiguimiro isanguenare isintsitsaiguimi”. Aiti ora naninti nongomantëmi: pigóiguë icantaneintëgotagacái Quirisito, te irisintsitsatái. Nocogasanti nanganquimari ibega Iriro. ² Ainta ira cantëcoiguina: “Te ingantiro Paboro ora icogagabecari Tosorintsi; iroonti icantasitaro ora icogaguëti iriro”. Queroca imaireti iriro, pinetsaigabaquina cara quero notsorogopëri, aro nanguisatsataigapëri, carari nocogui ágacaninatobaganëma. ³ Yaca quibatsica ainta camagaripague ira quisaiguina aisati ipëgataiguina. Teni ine ibatsa. Naro, aiti nobatsa aisa ocanta irasi antagaisati matsiguenga, carari tiguëti nangantima nopëgatimari camagari nobacoquë, teatisati nogóte nopëgatimari. ⁴⁻⁵ Carari teca ine nobatsaquë ora nopëgantantimari, imitocoiguina Tosorintsi Isërequë, itasongobentaiguina ora nopëgantantimari camagari. Nagobiantacari itasorintsite Atingomi yosintsisëretinanta. Aitosati yoguibataiguina cara ipëgatsataigari Tosorintsi matsiguenga, icanque: “Quero

piquemisantiri Tosorintsi”. Aisati imitocoiguina Tosorintsi noguimairentaiguëri ira quingasantacha sêretaguetasitaro te ongomeite tenta irogótiri Tosorintsi. Aisati naquemisantacaqueri Quirisito irooti cara iquengasantaiganacari Atingomi. ⁶ Nigóque pinguemisantaguëna, carari aintajengari arosatapague ipêgatsaiguëna. Cara nopoque obirojeguiquê nangasitêgatapëri, nomanopëri Tosorintsi iratsipiriacaiguëri pëgaantachari.

Icanque Paboro: “Igáquina Quirisito”.

⁷ ¡Pinetsaigue! Aintaca ijitabequina te iragátina Quirisito; icantocotasita iriati cara icanque: “Naro igáque Quirisito”. Carari nogótacaiguëmi: aisati naro iragátane Quirisito. ⁸ Aroca nanibatêgotima arosata cara nacantopiantaiguëmi igáquena Atingomi carari aisonori ora nacanque. Icoacaquena nanguemisantacaiguëmi; te ingogue notsoingagaiguëmi. Nacanquinerinta ora igáquena, quero nipasiquiti. ⁹ Quero pijiti cara nocogui nomitsorogantimiro nasanguenare. Te nanintiro nasintsantimiro. ¹⁰ Nigóque ainta ira cantêgotina: “Isanguenatasita Paboro, isintsitsaiguëmi. Carari cara iriboquê yaca, piniagabaqueri te irisintsite, teatisati irogótêmate ingomantasantaiguëmiro catinasati Irinibare Tosorintsi. Pomaintobëri”. ¹¹ Pingantiri iriro: cara narequima, nongomantasantapëmi irootisati oca nasanguenataiguëmica. Quero notsorogui, quero nopasiniatitiro nanibare.

Te ongomeite aquenga eati caninari, iroonti anganinabentaiguëri Atingomi.

¹² Aro iniacaninatasitaigaca iriati ira tsoengaiguëna. ¿Pairo nongogobitê nangantimari iriro? Icantaguê: “Nomoncaratobagaigaca naantijegui, nacaninatasantaiguê”. Aisonori imoncaratobagaigaca, carari te irogóque ora icanque. Nigótasantaiguê naroequi. ¹³ Te naninte naniacaninatasitima naati; iroonti nocogui nangantiri Tosorintsi antagaisati ora icocaquina. Nigóque igáquena obiroquê, icocaquena nanguemisantacaiguëmi. ¹⁴ Te nangantaigue ora te ingocaguina, carari pigóguê naro obantênguisti naquenguit-satomotaiguëmiro Caninaro Nibarintsi, nocomantêgotëri Quirisito Irianti Agabisaicoontatsiri. ¹⁵ Te naninte nangaintiri ora icanti basini; teatisati naninte ingaintinaro ora nacanti naro obirojeguiquê. Nasi pinasitanaca, aisati iraisati pinasitanaca. Nocogui aiquero pijátaiganaquitigie obiro pinguemisantasanotanê. ¹⁶ Aique, nagaganêma canta queronta obirojegui. Nongomantaigapëri basini matsiguenga, ira terai inguemocotaiguëri Quirisito. Quero nomitojaigaguetiri comantantatsiri patiroguitequê. Quero nacantasipa naro quemisantacaqueri ira iquemisantacaque basini. ¹⁷ Te ongomeite aniacaninatiro ora acanque eiro, iroonti caninataque anganinabentiro ora icantacaganacá Atingomi. ¹⁸ Te inganinate ira niacaninatachane iriati, irianti caninari ira iniacaninatê Atingomi.

11

Icomantêgotaca Paboro, aisati icomantêgotaiguëri ira osiacagantasitacari iragátane Quirisito.

¹ Naninti nongomantêgotaima aisati, carari pijique te naneicotima. Jemita ora pijitabeca, quero pitsirésina, pinguemaiguëna. ² Cara iráquero iina sërari, icoguiro te oneiri sërari. Teca onganinate, irojocajiro. Obirojegui quemisantatsi picantaigaro pibega oboina tsinane te oneiri sërari. Naro cantaca piri aroquenta naquemisantacaiguëmi. Tojai nocogasanti iraniacaninatasantëmi Quirisito irasintëmi, quero ijocajimi aisa ocanta cara iráquero iina sërari. Nocogasanti përosati piguiataiguëri Quirisito. ³ Jiraisonoru yamatobipëro Eba marangue, irianti Satanás. Yamai notsoroicotaiguëmi aroca iromatobitaiguëmi obiro aisati. Pigamaiguëma cara piquengari arota quero popeicotaro cara piquemisanqueri Quirisito, aisati cara piguiataiguëri, aisati cara pinintaiguëri. ⁴ Te pinguenguëmatima. Pabetaigabaqueri pairiraca játasitaiguëmine, piquemisantabetobacari. ⁵ Ora icomantaiguëmi cagaro irootisati nogomeanti naroequi. Nocogasanti ogomotaiguëmi Isëre Tosorintsi; irooque ica bocasitênguicha cogatsi irogometimiri camagari. Nocomantaiguëmi pinguemisantri Jesos Pitingomi pabisacoontimari, carari pinasitanaca ora yogometaigapëmi ira pasiniatitiro Irinibare Tosorintsi. ⁶ Pairo piquemisantobitobëri? ⁶ Aintaca ira obaquina teca nanibate caninasati, carari aiti tojai nigótageueti. Pigóguëna cara nigóti aroquenta noniagaca cara ninasegui obirojeguiquê.

⁷ ¿Pijitaiguê nacantagueti te onganinate jirai cara nocomantaiguëmiro Irinibare Tosorintsi cara te nongoicotaiguëmi? Nacanquero arota nomitocoiguëmi. ⁸ Nágobëri iguireguite basini quemisantatsiri. Ipagantënari cara nogometaiguëmi. ⁹ Iroontita natiomotaiguëmi, aro nocoguitiabecca, carari te nongomantimi. Ainta ipaniaigapa Maseroniaquê quemisantatsiri yamapënnari quirequi. Jirai tesonoru nongoicotimi obirojegui, querootisati aiuenta quero nobomirintsitaiguëmi. ¹⁰ Nigóque irooti icocaquina Quirisito. Nacanquineri catinasati. Yamai nongomantaiguëri antagaisati Acayasati cara te nongoicotaiguëmi jirai

teatisati yamai. ¹¹ ¿Pairo nacantobique negaca? ¿Pijitaiguè te nanintaiguemi? Igóque Tosorintsi aisonori nanintasaitaiguèmi. ¹² Carari nocogui nogótacagaiguemi te nangantimari ibega ira basini ogometaitaigitimi, yamatobitaiguèmi. Popaiguèri, iroro yogometaguèquimi iriro. Naanti tesonori nongoicotimi cara ininti iriro. ¹³ Te iragátaiguèri iriro Tosorintsi. Yamatobitaiguèmi. Iroonticantomemegacari iragátane Quirisito. ¹⁴ Quero piquemisantiri, irianti matobiantatsiri. Aisati icantaigari ibega Satanás yamatobianti. Yosiacari iriro caninari ironomire Tosorintsi carari cagari. ¹⁵ Aisa icanta ira quemisantiri Satanás; yosiacagantomemegacari ira quemisantiri Tosorintsi. Icogui iraniacaninataiguèri iriro matsiguenga. Carari aiquenta ingasitígataiguèri Tosorintsi, ingasitasanotacaqueri Sharincabeniquè.

Tojai itsipiriobiqueri Quirisito Paboro, ibataiguèri ira quisanijintaiguèri Corintoquè.

¹⁶ Nagatsitaimiro: quero pijitasaitaiguina te naneicotima. Carari pijitinaca te nogóte, jemita. Pinintacaguina nongomantègotima arosata naati. ¹⁷ Te iriro cantinane Atingomi cara nongomantègotima, te ira iraguibatima Iriati. Carari noguibataca naro cantaguina ira te iraneicotima. ¹⁸ Yoguibatiga iraguèi quisaneintaiguina, pègatsaitaiguina. Aisati naro nangantaiguèmari ibegaiga iriro, naguibatèma arosata. ¹⁹ Pijitaigabitaca pigóiguè obianti, carari pabetaiguèri ira te iraneicotima, te irogótocotima. Pitsoinguèna naro. ¿Teco aisonori? ²⁰ Irari matobitaiguèmi, te pitsoingauguèri iriro. Tojai imerataiguèmi, yágabitsaitaiguèmiri piguireguite, ipasaborotaguèmi, yoguibataca catingsatiquè obiro-jeguiquè. ¿Teco aisonori?

²¹ Te nangantimari ibega iriro, nipasiquiero. Tojai yoguibataca iriro, aisati noguibataca naro aisatime nacantabeca te naneicotima naro. ²² Yoguibatibitaca irironta ebereo. Aisa naro jorío. Imatsiguengataigacari Isirael, ira icoiguè Tosorintsi. Aitosati nacantari naro. Ijitaiga icharineegui Abaram jirai. Naro matsiguengatari Abaram aisati. ²³ Icantasitaigaca: “Nacantaiguèri Quirisito ora icocaquina”. Carari tojai nobataiguèri naro. ¿Pairo nobabirique naro? Aisonori tojai nacanquineri Quirisito ora icocaquina; iroro yomingapiantagabitèna iromingamentopaguequè. Tojai ipasatapinintaiguèna. Tojai nacamopiantabitaca; icogasantagabitaca iróguiname. ²⁴ Ipasatapinintaiguèna jorío, ocarati 39 ipasatèna. Aisa ocanta basiniquè cataguitèri ipasataiguèna 39. Aisati basini cataguitèri irooti pabocorooti cataguitèri ipasatapinintaiguèna nomatsiguenga. ²⁵ Aisati ipasataiguèna anchaquiquè Iromasati. Aisati basiniquè cataguitèri. Aisa basini, maba ipasataiguèna anchaquiquè. Patiro ibasegaiguèna mopèpaguequè. Tojai naquenantacaro oquibe pitotsi; ocaraque maba nitsiticoque oquibequè angaare. Nogabisè patiro cataguitèri aisati patiro tsitiniñi cara angaarequè oquibe. ²⁶ Tojai naquenagueque naquenaguitatagueque. Tojai naniaquero cobeingaripague. Natsipiriabeca cara pènibaqueme nojogatèma nijapaguequè, aisati cara icositaigabaquina cosirinti, cara isariaigabitèna nomatsiguenga iróguiname, aisati cara basiniatsi matsiguenga icogaigabitaca iróguiname. Yogamagaigabitèna poeboropaguequè aisati nacamabeca cara tera ontimingani. Pènibaqueme nojogatèma oquibequè angaare. Aisati yogasèretacaquena ira quemisantomemegacha. ²⁷ Tojai natarobacaatasantè, tojai opomirintsitomoquina. Tojai tsitiniñi te nasame te nomagoree, natsipiriaguero natasegane aisati nomire. Tojai nitica, aisati nacatsingaque tenta ine pite nomanchaqui. ²⁸ Aisati pèrosati naquengasèretopiantaiguèri opiguemisantaneegui negarapagueca yapatobiritaigacari Atingomi Jesoquirisito. Nocogasanoti aiquero inguemisantasantaiganaque. (Aroque nobataiguèri omagaro ira quisaguina cara obiro-què.)

²⁹ Aintaca opiguemisantane te inguemisantasante, te irogótasante, nogasèreca naro. Aintaca antaqueri te onganinate, naguisasèrequeri naro. ³⁰ Aro noguibataca, carari nomomantaiguèmiro oca arota pigóontimaro te naro cantasitimarone pairoraca; te nasintsite naro, Irianti Tosorintsi cantaguinaro ³¹ Ira Iriri Atingomi Jesoquirisito. Intsome antingomintasantimari pèrosati Irironta caninarisonoriguinte. Igóque Iroro cara te nontsoiguena. ³² Jirai ainta itingomi jitacha Aretas. Igáqueri basini cara poeboroquè ojita Tamásico iragántiri Tamásicosati. Iroro cogabitacha irácagantiname. Icoagaigabitèna sororopague ³³ carari yágaiganaquina nopiguemisantane cara iroticoroquè cara ishongarori poeboro. Carari aiti omoro jonoquè. Yotetaiguèna oquibequè cantiri, yoguètocoquina sotoquè, yomisiganèna. Aro nisigopitanacari itingomi.

12

Cara yoniagacari Paboro Tosorintsi.

¹ Pinetse, te onganinate nongomantègotima naati, carari naninti nongomantimi ora icomantèna Atingomi aisati ora yoniaguèna. ²⁻³ Yamai ocaraque 14 osarini yáganèna Atingomi canta Jonogaguitequè, cara ocaninaguitetasanotapè. Te nogóte antagaisatica

yáganëna nobatsa teca iroonti nasëre yáganë. Paniro igóti Tosorintsi. ⁴ Paniro nigóti naro aisonori yáganëna canta Jonogagueitequë, cara ocaninaguitetasanotapë. Tigueti nangantima nongomantimi ora naquemaque teatisati ora naniaque tenta ine nanibare nongomantanquima. Aisati te iraninte Tosorintsi nongomantaiguemiro. ⁵ Tojai nacaninabenquero ora naniaqueque, carari tigueti naguibatima naati, tenta nongomeite naro. Te nangantëmate naanti, Irianti Tosorintsi icantacaquina pairoraca; iroro nacaninabentaguëtanëri Iriro. ⁶ Arome nongogue naguibatimame ora nacanque naro, quero nitsoinga aisonorinta ora nongomantaiguëmi, aisonori yáganëna Tosorintsi jonoquë. Carari quero ninibatëgotiro ora yoniaguëna canta. Patiro nocogui irogóontaiquena matsiguenga ora iniaiguëna nacanque aisati ora iquemaiguëna ninibati. ⁷ Aiti tojai igótacaquina Tosorintsi yoniaguëna carari te ingocaguina naguibatëgotima. Iroro Tosorintsi inintacaqueri Satanás itsipiriacaquina. Yobomirintsitina aisati ocanta cara nosotaa totseiquë arota quero noguibatëgota. ⁸ Ocaraque maba namanabecari Atingomi cara irágajinaro, ⁹ carari icanquina: “Nacábintsëmi Naro. Aroque. Quero pininti basini. Pinguemisantina. Quero noguibegajimi, caraanti natasongobenquimi arota pabetiro ora pitsipiriaque. Cara pigóti tigueti pingantiro pairoraca tenta pisintsite obiro, aro nagobiacaquemí noniaiguëmaro obiroquë nasi nasintsire”.

Aro yamai nacaninabenanëri aroquenta tigueti nangantima nangantëmatiro paio-
rapageraca naro. Irianti Quirisito cantaquinaro yoniaganquinaro isintsire. ¹⁰ Iroro nobesëreobicari Quirisito cara te nasintsite, cara najanaitë, cara nocoguitiaca, cara isërontaiguëna matsiguenga, cara icantaguebiriquina catsimari, cara natsipiriobiqueri Quirisito pairoraca. Nacaninatanë; nigóque te nagabeiro naneni carari yagobiacaquinaro Iriro. Yosintsitëna.

Caninasati icanque Paboro cara itimi Corintoquë.

¹¹ Nocomantëgotaca naro, carari te nanintiro. Caninataqueme piniacaninatiname obiro, pingomantëgotiname, carari te pingantiro. Iroro naquenguësatocotaguëca naro. Nigóca te nongomeite, carari te irobataiguena ira ogometaigapëmi ira piniacaninataigabaque. ¹² Jirai, cara natsibataiguëmi, antsinisati nogometaiiguëmi, nigótacagaiguëmi aisonori igáquena Tosorintsi. Itasongaguetacaquina ora terai piniaguero jirai; aisa nacanque tojai ora piquenganeintantaiganaca. ¹³ Nacantaiguëmi nacantacagaiguëmi ibegaiga antagaisati quemisantisiri ira botoibiritari Quirisito negaraca ini. Paniro obiro, te nobomirintsitaiquemi te nangantimi: “Pomena ora nocoguitiaca”. ¿Pijitaiquëco caninataqueme nangantimime? Quero piguisabiritinaro cara te nongoicotaiguemi. ¹⁴ Jirai piteque niáque naniaigaimi; yamai naninti najátasitaigaimi aitosati. Quero nobomirintsitimi tenta ninantiro pasiasi. Patiro nococagaiguëmi obiro pinguemisantaigabaquina. Nosiacantimi ibegaiga notomipague. Te onganinate janequi papiantirine ira casintari, carari ocomeiti iriri imëri itomi ora coguitiomotari. ¹⁵ Nocogasantí nomitocoiguemi. Aroca nopë nabentasantobitimi omagaro nasiati, jemita. Aroca nangamobitaiguëmi, jemita. Nocogasantí nanguemisanta-
caquemi. Tojai nanintasanoigabitimi obiro, carajenga obirojegui arosataanti picábintsëna. ¹⁶ Aintapague obiroquë icantaiguë: “Aisonori, te ingoicotái Paboro, carari ainta yamatobiantí iriro. Igóque iramatobicái irágantëmaro pairoraca”. ¹⁷ ¿Aroco yamatobitaigapëmi ira nigátaguëque obiroquë? ¹⁸ Cani jirai nigáquemiri Tito, aisati nigáquemiri itsipa opiguemisantane. ¿Aitico te ingantaiguemi caninasati? ¿Yágabitsapëmico pairoraca Tito? ¿Teco aisa ingantima nibega naro: te ingoicotimi?

Tojai yogasëretocoqueri Corintosati Paboro.

¹⁹ Pijitasitaigabita patiro nocogui piniacaninataiguena. Teni. Naquemisanquerinta Quirisito, patiro nocogasantí nanguemisantacagaiguemi obirojegui aisati. Igóque Tosorintsi nacantaiguëmiro ora aisonori. ²⁰ Yamai notsoroicoquemi cara najátasiquemica naniaigapaimi, quero naniacaninataigapaimi. Aisati notsoroque aroca quero piniacani-
nataiguena naro. Notsoroque naniaigapëmi piguisatsatobaga, pijonobaga, piguisaneintocotobaga, pisintsatsatobaga, picantocotasitaguëto, comanoroni picantocotobaga te ongemeite, pijicaninataica paniripague, te pintiomotobaguima caninasati. ²¹ Notsoroque cara naretajimica aisati, nogasëretocotaigapëmi. Notsoroque iraguipaisiguitënaca Tosorintsi përosati aintapague obiroquë icantaguëtiro te onganinate, aisati terainta irojocajiro ora cagaro caninatatsi: ira antaguëtiro tsinanepague; aguimintaro iina; ira antiro pairoraca ora icogui iriro; omagaro cantacha nega.

13

Icoque Paboro inguemisantasantacagaigueri Corintosati.

¹ Jirai piteque naniaiguëmi, yamai nocogaji naniaigaantimi aitosati. Carari nongomantëgotai-
gapëmiri ira cantaguëtatsti te ongemeite aisa ocanta ocanti Sanguenari jirai:

Aintaca pite queroca maba ingomantëgotasantëri ira cantaguetiro te onganinate.

² Jirai piteque nacantaigabitacari antaguetatsiri te ongomeite, yamai queroca ijocajiro ora icantagueti quimingaro, nanguisatsataigapëri. Quero nacantaneintëgotapairi aisati.

³ Aique pigóiganaque ora picogaiguë: aisonorica nogabisëmiro irinibare Quirisito inibatacaquina. Te intoroguematimi Iriro, inguisëgotaiquëmiro ora te onganinate queroca pobetsicasëreta. ⁴ Ipëicotaigabitacari Jesos jirai, te irisintsite, carari yagobiacaqueri itasongobenqueri Tosorintsi, yoganiatairi. Yamai isintsitasanti. Te nasintsite naroequi, nacantari Quirisito jirai. Carari itasongantacaquina, iragabiacaquina nangasitigataiguëri ira cantaguetatsi te ongomeite. ⁵ Pigóontaiguema obiati. Pigóigue aisonorica piquemisantasantaiguëri Quirisito. ¿Teco pigóte coshoni yogaiguëmi Quirisito, yogabisaicotaigaimi inampëmi? Teca coshoni iroguimi, teni pinguemisantaiguëri.

⁶ Carari nocogui pigóigue obiro cara naquemisantasantaiguëri naroequi.

⁷ Namanocotaiguëmi Tosorintsi cara iromitocoiguëmi quero picantagueti ora te onganinate. Te nongogabetima piniacaninatina; iroonti naninti piganinatasantaiganaquema. Jemita naroca piniacaninati obirojegui. ⁸ Tigueti nangantiro nomasiniatitiro Irinibare Tosorintsi, iroronta aisonori. Te notsoinguiro. Patiro nocomantantaguetaiquëro catinasati arota inguemisantasantobëro matsiguenga.

⁹ Nacaninataiguë cara piquemisantaiguë, jemita queroca piniacaninataiguëna. Tojai nococagaiguëmi pinguemisantasantaiganaque. Irooti namanocotopiantimi Tosorintsi iromitocoiguëmi aiquero pinguemisantasantanëtigue. ¹⁰ Iroto nasanguenataguëtaiguëmi yamai, nasintsitsataiguëmi arota quero nasintsitsapëmi cara naretaigapëmi aisati. Igáquina Atingomi cara nangantacagaiguëmiro caninari, carari teni naninte natsipiriacaiguëmi. Nocogui nomitocotaiguëmi pinguemisantaigue caninasati.

Ibetsataigari.

¹¹ Aro yamai, nopiguemisantacagane, pinganinabentaiguëri Quirisito. Pobetsicasëretaiguëna quero pogatsitairo te onganinate. Pinguiancagobaguëna ora icocagaiguëmi Atingomi Jesoquisito. Pinguengasëretagobaguëna, piniacaninatobaganëma; aique coshoni irogaiguëmi Tosorintsi iromagoriasëretagaiguëmi tojainta inintasantaiguëmi.

¹² Pobetsatobaguëna, págacaninatobaguëna. Ibetsataiguëmi obirojegui antagaisati opiguemisantane yaca. ¹³⁻¹⁴ Yamai nocogui ingábintsiguëmita Atingomi Jesoquisito, aisati irogótacagaiguëmita Tosorintsi ati ocanta cara inintasantaiguëmi, aitosati coshoni ogaiguëmita Caninaro Isëre Tosorintsi.

Aro ocarati ora nasanguenataiguëmi. *Paboro*

PABORO ISANGUENAQUINERI GARASIASATI

Paboro ibetsataigari Garasiasati.

¹ ¿Aintajeguibi, Garasiasati? Nasanguenataiguimini naro Paboro. Te iragátina matsiguenga, teatisati ingantina “Pinguenguitsataguete”. Irianti Jesoquisisito agátina cara nanguenguitsatomotagueigueri matsiguenga. Aisati igáquina Tosorintsi Iriri Jesoquisisito Ira cabiriqueri Itomi. ² Nacarataiguèri quemisantatsiri yaca, nasanguenataiguèmi nopiguemisantacaganeegui canta Garasiaquè. ³ Nocoguini pèrosati ingábintsaiquemita Pabati Tosorintsi aisati iromagoriasèretagaiganaquemita cara intimacagaiguemi caninasati. Ingantimirota Iriri aisati Atingomi Jesoquisisito ⁴ Ira pèicobiricái jirai. Icamobicái arota iragabisaicotajái, iraganinasèretái, irobasiniatitajái. Te iraninte antimaigue aisa ingantaiguèmarì ibega iraequi tsoengatsi, ira antaguetasantsi tojai quimingari. Icanque Quirisito cantacha nega aroquenta icocaqueri Pabati Tosorintsi. ⁵ Intsome angantocotiri: “Tosorintsi caninarisoriguente pèrosati”.

Panìro ini Agabisaicoontatsiri: Irianti Jesoquisisito.

⁶ Naquengasèretègotèmi ati picantaigaca. Icoigaiguèmi Tosorintsi icábintsaiquèmi Quirisito. ¿Omanapagueco yamai pijocajiro ora Caninaro Nibarintsi piquemiantaiguè? ¿Pijiqueco ainta basini ira agabisaicotaiguèmine? ⁷ Teni irine basini Agabisaicoontatsiri; panìro Quirisito. Aisonori nocomantègotèmiri catingasati. Queroca piquemiantiri Iriri, quero yogabisaicotajimi. Carari ainta basini yamatobipèmi yobomirintsitaigapèmi. Yogometaigapèmi icampèmi: “Quero panìro yogabisaicotajimi Quirisito”. Irantacagaiguèmi ora cagaro caninatatsi. ⁸ Aroca nomasiniatiquerome ora aroque nocomantaiguèmi, caninataqueme iratsipiriacaquerime Tosorintsi cara Sharincabeniquè. Aisa icanta, aintaca imasiniatitrome ironomire Tosorintsi irisaanganetsite, caninataqueme iratsipiriacaquerime Tosorintsi aisati, iragáquerime Sharincabeniquè. ⁹ Aroque nocomantaiguèmi, yamai nagatsitaimiro: aintaca pairiraca pasiniatiquerone ora nocomantaiguèmi, aro iratsipiriacaqueri Tosorintsi cara Sharincabeniquè. ¹⁰ ¿Pijitaiguèco nocogui iraniacaninatina matsiguenga? Tesonori. Irianti Tosorintsi nocogasanti iraniacaninatina. Aroca nanintabeta nanganinataguirime matsiguenga, quero nacantinerime Quirisito.

Ora icomantanti Paboro, iroonti yoniagacari Jesoquisisito.

¹¹ Yamai, nopiguemisantacagane, naninti pigóigue cagaro irinibare matsiguenga ora nocomantaiguèmi cara ati ongantima iragabisaicotaigaimi Quirisito. ¹² Te inguengero matsiguenga, te irogometinaro. Irianti Jesoquisisito ogótacaquinaro antagaisati. ¹³ Piquemocotaiguina ati nacantabeta jirai: naro jorí, nomoncaratasantabitacaro omagaro ora yametaiga nomatsiguenga. Pigóiguè aisati jirai naguisaigabitari antagaisati quemisantatsiri, ira botobiritaigacari Tosorintsi. Nocogabeca nojocaguirime cara iquemiantaiguèri Quirisito. ¹⁴ Aisonori nomoncaratasantabitacaro antagaisati irogameantane jirainisati nomatsiguenga. Nobataiguèri omagaro oboina natsipa. Nacantasantabitaca antagaisati ora yametaigaca nomatsiguenga jiraisonori. ¹⁵ Carari jirai, teraiquerai nine, igóquina Tosorintsi, icoiguèna, icábintsasantèna. Iroto yogabisaicotobiquina. ¹⁶ Yoniaguènarì Itomi, naniasantèri nigóqueri ati icanta. Aitosati igáquina Tosorintsi arota nongomantègotiri Quirisito basiniatiquè matsiguenga ira cagari jorí. Te nosamitiri pairiraca: “¿Pairo nanganque?” ¹⁷ Teatisati najäte cara Jerosarènuè, te nanibatiri basini iragátane ira yoguibatè Tosorintsi igátaiguèri, aito cara niáque Arabiaquè. Aique nipigapaa Tamásicoquè aisati. ¹⁸ Cara, nogabisè maba osarini, aique niáque cara Jerosarènuè, aro naniopèri Sejas. Ocarati 15 cataguiteri natimocokeri. ¹⁹ Aisati naniaqueri Santiago ireinti Atingomi. Te naneiri basini irogomere Jesus. ²⁰ Iniaquina Tosorintsi, igóque te nontsoiguema. Aisonori oca nasanguenataiguèmica. ²¹ Aique aisati naquenagueque canta quibatsipaguequè, Siria aisati Sirisia. ²² Terai irogóguena quemisantatsiri ira botobiritaigari Quirisito cara Joreaquè. ²³ Patiro iquemocotaigabaquina naquemisanque. Icantocoquina: “Jirai iguisaigabitacái antagaisati, icogabeca iripoguiriagacái, carari yamai ipasiniatitanè, iquenagueque matsiguengajeguiguè icomantègotèri Quirisito”. ²⁴ Aro icaninabiritaiguèna quemisantatsiri canta, icantaiguè: “Icaninatasanti Tosorintsi, yogabisaicotajiri Paboro”.

2

Aisati ipiganaja Paboro Jerosarènuè.

¹ Cara pabisanaque 14 osarini, aisati nipiganaja canta Jerosarénquë. Itsibatina Berinabé aisati natencari Tito. ² Igótacaquina Tosorintsi caninataque najáte. Niátasitaiguëri ira obatacagantatsiri opiguemisantane, te najátasitaiguëri omagaro quemisantatsiri. Nocomantantaigapëri oca nocomantapininquimica, aique nosamitapëri: “¿Ocaninatico oca nocomantaguetiri basiniati matsiguenga ira cagari jorío? ¿Natsipiriasitaco?” Yotabitobëna: “Jee, caninataque; te pitsipiriasitima”. ³ Pinetse, itsibatapëna Tito. Cagari iriro jorío, carari te ingantaiguëri: “Caninataque pitotima”. ⁴ Ainta inasegui quemisantomemegachari, icantaigabitëna: “Naro popiguemisantane”, carari cagari. Te ingaimirini; icasitapa arota irogóiguero nogomeantane aroca nomoncarataiguero isanguenare Moisés. Ico gabeca nogometaiquerime cara iritotema quemisantatsiri. Te irogóigue paniro iragabisaicotajiri Jesoquirisito omagaro ira quemisanqueri; teatisati irogóigue cara Quirisito te irobomirintsitáiro ora yametaiga jorío. ⁵ Te nanguemisantëmatri ira cogabitcha matobitaiguenaneme. Nocogasanti pigótasantaiguero ati ocanta abisaicoontaari Quirisito.

⁶ Te ingomantëmatinaro pairoraca ira obatacagantatsiri. Jemita iriro irogomere Jesus jirai, te naguibatiri. Teatisati iraguibatiri Tosorintsi. ¿Irirojegui oca icantaiguena nibega narogëui; irianti matsiguenga? ⁷ Te iragátaiguena pairoraca, iroonti icanquena: “Obiersonori igáquemi Tosorintsi cara pinguenguitsatomotaguetiri basiniati matsiguenga ira cagari jorío ati ongantima cara iragabisaicotajiri Quirisito. Aisa ocanta igáqueri Peroro ingomantaguetiri nomatsiguengasonori ira joríojegui”. ⁸ Aisonori, Tosorintsi igáqueri Peroro ingomantëgotaguetiri Jesoquirisito cara joríojeguiquë. Iriatisati Tosorintsi agáquena naro nanguenguitsatomotaiqueri matsiguengajegui cagari jorío. ⁹ Piquemocotaiguëri Santiago aisati Sejas (iriati Peroro) aisati Joan, iraugui obatacagantatsi cara Jerosarénquë. Cara igóiguë iriro cara itasongobenquina Tosorintsi, yágacaninegabaquina naro aisati Berinabé, iquengasëretaiquëna, icantaiguë: “Aisonori, acantobagaiga. Aisa ocanta naquenguitsatomotaiquëri joríojegui, caninataque pijáigue obirojegui pingomantaguetiri iraugui cagari jorío”. ¹⁰ Patiro aisati icanquina: “Nocogaiguë pingábintseri ira quemisantatsiri cogachari pairoraca”. Nacaninanë aroquenta nameca naro aisati nomitocotaiguëri ira coguitiachari.

Paboro isintsitsaqueri Sejas cara Antioquíaquë (Sejas iriati Peroro).

¹¹ Carari cara iáque Sejas cara Antioquíaquë, icantaguequero ora te onganinate. Iroro ora napëgatsatobitari nasintsitsaqueri cara catinasatiquë iriro. ¹² Cara yareca iriro, yapëgotapëri cagari jorío. Oca caninataque, carari aique yaretaigaca Jerosaresati iragátane Santiago. Itsorogobëri Sejas tenta iraninte cara ingomantëgotiri itsibatari ira cagari jorío. Yogomeantë Jerosaresati cara quero oca omoncaratiro isanguenare Moisés, quero abisaicoontaro. Yogomeque caninataque iritotima antagaisati sërari quemisantatsiri. Itsorogobërinta Sejas, ijocanëri basiniati quemisantatsiri ira cagari jorío, paniro yamai itsibatari joríojegui, yapëgotairi iriro. Oca te onganinate. ¹³ Aique yoguiataiganaqueri basini jorío quemisantatsiri; icancari ibega Sejas, ijocanëri ira cagari jorío itsorogaiguërinta cara intsibatëmari. Igótaigabitaca cara icanque ora te onganinate, carari përosati icantasitaro. Aisati icantacaqueri Berinabé te ongomeite. ¹⁴ Aique nareca naro. Cara naniaigapëri ira Sejas te intsibatimari basiniati irapiguemisantane cagari jorío, nigóqueri cara te iromoncaratiro ora aisonori ongomantaguetiri matsiguenga: “Paniro yogabisaicotajái Jesoquirisito; tiguëti abisaicoontaro omoncaratiro isanguenare Moisés”. Aro napatotaiguëri omagaro quemisantatsiri. Nacanqueri Sejas: “Te pingantiro caninari ora pigóti ora yoniaguëmi Tosorintsi jirai. Obiro jorío, carari yamai te pomoncaratiro ora isanguenare Moises pijocanëro; yamai picancari ibega cagari jorío. Pinetse, ¿Pairo picocagobitiri ira cagari jorío aisa ingantaiguëmari ibegaiga jorío? ¹⁵ Nasi noguero, narogëui jorío. Teni aisati nanganitimari iraugui cagari jorío, ira cantaguetiro te ongomeite tenta irogótri Tosorintsi jirai. ¹⁶ Carari nigóiguë te pairi iraniacanine Tosorintsi cara imoncaratabecaro isanguenare Moisés. Igóti Tosorintsi cara te iromoncaratasantiro, aiñiro icantagueti te onganinate. Aisati nigóiguë cara pairiraca abentimarine Jesoquirisito, imëmari, inguemisanceri, aito cara iraniacanine Tosorintsi cantaca te ingantaguetëmte pairoraca te onganinate. Iniaqueri caninari aisa icancari Quirisito caninari. Iroro ora naquemisantobitaiguëri Quirisito narogëui arota iraniacanineasantaiquena Tosorintsi. Quero iquengairo ora nacantaguetomotiri. Aisati te inguenguero nomoncaratiroca isanguenare Moisés. Te iraniacanineatiri ira moncaratabecaro ora ocanti isanguenare Moisés”.

Ocari oca nacanqueri Sejas aisati antagaisati nomatsiguenga jorío cara Antioquíaquë.

Quero pogabisaicotajái isanguenare Moisés.

¹⁷ Pinetse. ¿Pairo nabentobitari Quirisito? Nocogaiguë iraniacanineantaiguena Tosorintsi. ¿Teco ogometaiquena isanguenare Moisés cara aiñiro nacantaguetomotiri? Iroro ora nabentaguëtaigacari Quirisito arota irojocajinaro ora te onganinate. ¿Icantaguetico Quirisito

ora te onganinate? Tesonori, te ingantaguetëmatio, teatisati ingantaguetacaguina naro te ongomeite. ¹⁸ Aroque nitsoinguëro isanguenare Moisés queronta pogabisaicotina. Yamai arome nangantimime: “Intsome omoncaratiro isanguenare Moisés arota abisaicoontaimaro”, përosatime nangantaguetiro ora te onganinate. ¹⁹ Pinibatiro obiuro, te nangantiro naro: “Nomoncaraquero isanguenare Moisés”. Pogomequina cara quero nacantiro omagaro ocanti isanguenare, aisati pogomequina nanguemisantiri Tosorintsi. Iriro caniatacaquina, aro natimobiqueri Iriro yamai. Ipëicoqueri Quirisito icamaque. Aisa nanganquimame nantsibatimarime Quirisito corosiquë, aisatime naro nangamaque, aisatime nangamobiquero isanguenare Moisés, te nanguengairo, teatisati nanguengairo ora nacantaguetabeca jirai te onganinate. ²⁰ Yamai te nanguemisantiri ira cantabitëna: “Pinguemisantiro isanguenare Moisés, aro pabisaicoontëmario”. Aisonori natimi naro, carari te nantimasitima. Itimacaquina Quirisito. Itimi naroca. Natiomoqueri Iriro aroquenta coshoni yoguëna; ipënaro Isëre pinasërequina. Aroquenta naquemisanqueri, itimacaquina; yamai përosati naquemisanantëri, nangantineri omagaro icocaquina Quirisito Ira camobiquina naro inintasantënanta. ²¹ Te iratsipiriasitima Tosorintsi cara icábintsëna. Carari pijitaigabitaca aroca pomoncaratiro isanguenare Moisés, aro pabisaicoontëmario. Pabencaroca isanguenare, tiguëti ongantima pinguemisantiri Quirisito. Carari quero piquemisantiri Iriro, itsipiriasicaro cara icamobiquemi.

3

Cara anguemisanque, coshoni pogacái Isëre Tosorintsi.

¹ Yamai, Garasiasati, te pigócototaiguema. ¿Pairi matobitaiguëmi? Jirai nocomantaiguëmi catingsati cara ipëcobicicái Jesoquisisito, iroro yogabisaicoontaái. Pigótabecaro, carari yamai pomaguisantanairo picomëtanaaro. ² Patiro nosamitaiguëmi: ¿Pairi picanque jirai cara coshoni pogaiiguëmi Isëre Tosorintsi? ¿Aroquentaco pomoncaratiguëro isanguenare Moisés, ipasitëmuro Isëre Tosorintsi? ¿Teco imasitëmuro cara piquemisantobëro ora nocomantaiguëmi jirai? ¿Te pineicotima? ³ Jirai piquemisantaiguë oquemisantaqueminta Isëre Tosorintsi. ¿Yamai pijitaigabitaca aiqero pinguemisanantëtigue cara pomoncaraquero isanguenare Moisés? ¿Omitocoquemico pingantaiguëro ora icocaquëmi Tosorintsi? Jirai, poparintancaro Isëre Tosorintsi, ¿Yamai iroonti pasiatu pinguengane? Teni. ⁴ Tojai yobomirintsitaiguëmi matsiguenga aroquenta piquemisanqueri Quirisito. ¿Pitsipiriasicaroco? ¿Aroco pitsoingairi Quirisito yamai, pijocanairi? ⁵ Pinetse. Najique pigóiguëro ora ipasitaiguëmi Isëre Tosorintsi. Aisati itasongobentaiguëmi. ¿Pairi itasonganta? ¿Aroquentaco pomoncaratiguëro isanguenare Moisés? Teni. ¿Cagaroco itasongantimuro cara piquemisantaiguëro ora nocomantëgotëri Quirisito?

Jirai Abaram iquemisanqueri Tosorintsi, iroro iniacaninatancari.

⁶ ¿Teco aisati pingantaiguëmi ibega Abaram jiraisonori? Iquemisanquero omagaro ora icanqueri Tosorintsi, iroro iniacaninatancari cantaca te ingantaguetëmatio Abaram pairoraca ora te onganinate. ⁷ ¿Yamai pairi matsiguengatasantocari Abaram? ¿Iriro ira osicotajiri, ira quemisantasantotëri Tosorintsi? ⁸ Jiraisonori ora Sanguenari ocomantëgotëri matsiguenga ira cagari jorío, cara aiqenta inguemisantaiguë, aro iraniacaninataiguëri Tosorintsi. Icomantëri Abaram:

Piquemisanquina, iroro naniacaninatanquimi. Aisati basiniati matsiguenga, cara inguemisanquina cantaquibi obiuro, nagabisaicotiguëri.

⁹ Aisa icanta Tosorintsi itasongobentaiguëri antagaisati quemisantsiri, itimacagajiri, aisa icantaigari ibega Abaram. ¹⁰ Carari iraequi cogabitacha iromoncaratiro isanguenare Moisés, irabisaicoontimaro, iroonti iratsipiriasiquimaro tenta ingantiro omagaro. Iriáiguë Sharincabeniquë. Ocanti Sanguenari:

Iratsipiriacuqueri Tosorintsi iraequi te iromoncaratiro omagaro ora ocanque isanguenare Moisés.

¹¹ Pinetse. Te pairi moncaratirone Sanguenari. Quero pijiti pomoncaratasantiro pabisaicoontëmario. Quero iniacaninatasitari pairiraca Tosorintsi. Icanque Sanguenariquë:

Ira patiro iquemisanquina, aro naniacaninatëri cantaca te ingantaguetëmatio te onganinate, aisati nantimacagajiri yamai yaca quibatsica, përosati ingantima intime Jonogaguetequë.

¹² Aisati isanguenare Moisés te ogometái anguemisantiri Tosorintsi arota iragabisaicotajái, iroonti pogomecái:

Aroca përosati omoncaratasantiro ora ocanti, aro abisaicoontëmario.

Ora icancái Quirisito.

¹³ Jirai te omoncaratiro isanguenare Moisés, iroro ajátaguêqueme aiqhero Sharincabeniquê, carari imoncaratasantêro Jesoquirisito ora Sanguenari, imoncaratasantobicairo cara icamobicái. Iroro yogabisaicotaguêtajái Tosorintsi. Icasitígatêri Itomi arota quero icasitígatái eiro. Icancairo cara ocanti Sanguenari jirai:

Tosorintsi ingasitígatêri antagaisati ira pêquêgotênguichane anchatoquê.

¹⁴ Aro Quirisito icamobitaiguêri omagaro matsiguenga, jorío aisati cagari jorío, arota iromoncaratiro ora icanê Tosorintsi icanqueri Abaram jirai: iragabisaicotajiri iragui quemisanquerine. Iroro yogabisaicotaguêtajái yamai. Aisati Isêre Tosorintsi, coshoni pogacái cara aquemisanqueri. Iroro icasijaqueri Abaram jirai, aisati asiegui eiro quemisanqueri Tosorintsi cantaca cara iquemisanqueri Abaram.

Ora icanqueri Abaram Tosorintsi jirai.

¹⁵ Pinguengaiguero, nopiguemisantacagane, oca nametaigaca. Irogótobêma poro matsiguenga cara pênibaque ingamaque, aro inguanquima imanajiri poro ira ininti ora yasinta. Aro irisanguenatê iroquero iripajiro ira irojocanaine pairoraca. Iroroque oca sanguenari quero pairi pasiniatitêmatajirone. ¹⁶ Aisati icanqueri Abaram Tosorintsi: “Cara pinguemisanquinaca, aro nagabisaicotajimi”. Aisati icanqueri: “Aiquenta nagáqueri pomatsiguenga iragabisaicotaguêri antagaisati quemisanquerine”. Pinetse, te ingante: “Nagátaiguêri tojai Agabisaicoontatsiri”. Paniro icomantêgotêri Ira Quirisito. ¹⁷ Pinetse. Jirai aiti ora icantasantêri Abaram Tosorintsi. Icanqueri cara teraiquerai ine isanguenare Moisés. Aique pabisê osarini ocarati 430, aro Tosorintsi isanguenatacakeri Moisés. Te imasiniatitiro Tosorintsi ora icantasantê Abaram jirai. Te iromatobitiri. ¹⁸ Arome ingogueme Tosorintsi omoncaratirome eiro isanguenare Moisés arome abisaicoontêmaro, quero acantarime Abaram. Carari te iromoncaratiro iriro tenta ine. Te ingantiro ora ocanti isanguenare Moisés, iroonti iquemisanqueri Tosorintsi Ira cantêri: “Nagabisaicotajimi”.

¹⁹ Aro. ¿Pairo pinobique isanguenare Moisés? Pigótacagaigacái aitiro acantaguetiro ora te onganinate, arota ongoaguêri Ira agabisaicotajáine. Aique ipoque Quirisito, yamai te nongogajiro isanguenare Moisés. Quirisito Irianti isantsiguenga Abaram, Ira icomantêgotê jirai Tosorintsi: “Aiquenta nagáquemiri Agabisaicoontatsiri”. Aisati nongomantêmiro oca: Tosorintsi igáqueri ironomire: “Pingomantiri Moisés Nanibare”. Aique Moisés yogaguineri imatsiguenga Irinibare Tosorintsi. ²⁰ Irari Abaram inibatêri Tosorintsi catingasati, tiguêti agaguinerine Irinibare Tosorintsi. ²¹ Jirai icanqueri Abaram Tosorintsi: “Cara pinguemisanquinaca, nagabisaicoquimi”. Aique Tosorintsi isanguentacakeri Moisés. ¿Aroca yamai isanguenare pipêgatsacaro ora icanqueri Abaram Tosorintsi jirai? Tesonori. Yamai igóiguê eiro quero abisaicoontaro isanguenare Moisés, tenta oganinatantái. ²² Pogomeanti isanguenare cara aitiro acantaguetiro te onganinate, tenta angantobintiro ora icocacái Tosorintsi. Carari aitosati icantaigacái Tosorintsi: aroca anguemisanqueri Jesoquirisito, aro iragabisaicotajái.

²³ Jirai, tojai opomiritacacái isanguenare Moisés, aisa acanta eiro iromingaga. Aisati ocantaro ora omisantaigacái irooti cara ipoque Ira aquemisantaiguê. ²⁴ Aisati isanguenare Moisés posiacari ogomeantatsiri; pogomecái cara aitiro acantagueti ora te onganinate arota ongooguêri anguemisanti Quirisito, iraganinasêretacái cantaca te angantaguetêmatiro ora te onganinate. ²⁵ Yamai igóiguêri Quirisito eiro, aquemisanqueri. Aroque. Te aninte yamai ogometái anguemisantajiro. Aroque omoncaraca isanguenare Moisés.

Eiro quemisantatsi, acantari Abaram.

²⁶ Obirojeguinta quemisantaiguêri Jesoquirisito, itomintaiguêmi Tosorintsi. ²⁷ Antagaisati obiro pobaoisabiritaigacari Quirisito, pomatsiguengatacari aisati picantaigari ibega Iriro. Onganquima cara oguêmaro irorai manchaguinti. Aro irogótocotaiguêmi basini matsiguenga te inguemisante cara obiro irasi Quirisito. ²⁸ Yamai picarataigui jorío aisati ira cagari jorío, ibimantaga aitosati cagari ibimantaga, sêrari aisati tsinane, omagaro: pomoncaratobaga piquemisantiri Quirisito, yapatobentaiguêmi. Aroca pomatsiguengatacari Iriro, aisati pomatsiguengatobaga obirojegui ipanirootitaiguêmi Quirisito. ²⁹ Aisa ocanta, aroca piquemisanqueri Quirisito, picantaigari Abaram. Iritsita quemisanqueri, aique antagaisati quemisantatsiri. ¿Teca jirai icanqueri Tosorintsi: “Pinguemisanquenaca, aro nangantocobintêmi”? Irootisati icantaiguêmi yamai obiro, quero yamatobitimi. Iroro posiaiguêcari Abaram cantaquibi irasi ianiquite.

4

Ati acantaigabita jirai, terai iriboque Quirisito.

¹ Pigótotocotiri yameta casintagueta. Irineca itomi, icoque imeri antagaisati ora yasintagueta. Aro icantiri imatsiguena: “Aroca nangamaque, pingábintseneri notomi omagaro nasintagueta. Cara iriquibianë, aro pomairi antagaisati”. Aro icoque imairi itomi antagaisati irirota casintajimarone omagaro, carari ainroquerai ijaniquiti, teraiquerai irogóte iromisantiri iguirequite. Cara te iranintacaguiri iromeraro iromisantiri irasi onamitiri, aisa ocanta te iranintacaguiri itomi iromisantiro iraisiti irooti cara iriquibianë. ² Ainta omisantiri janequi aisati iriati omisantinero ora yasinta. Cara omoncarapëma ora yotsatanë iriri jirai, aro imairi antagaisati. ³ Aro acantabeta eiro jirai teraiquerai iriboque Quirisito. Pomisantabacái isanguenare Moisés: pogometaigabitái acantaigabita pomirintsitaguetsiri. Aisati aquemisantaigabitaro irogomeantane ora yametaiga matsiguengapague, ipomirintsítái. ⁴ Pabisë tojai osarini, aro omoncaraca ora yotsatanë Tosorintsi. Igáqueri Itomi, otsomaaqueri tsinane, jorío inabitapa, ipomiribiricáiro isanguenare Moisés, imoncaracái. ⁵ Igóguë eiro opomirintsitaro isanguenare Moisés te angantobintaguero. Aisa acantaigabitari ibimantaga, carari yamai te, aique yogabisaicotajái Quirisito, aisati itomintasanotaigacái Tosorintsi. ⁶ Yamai eiroegui itomi, iroro igátaguëcáiro Isère Itomi pinasërecái, coshoni pogacái. Iroro yamai pogomecái anganqueri “Pabati Tosorintsi”. ⁷ Yamaica cagari obiro ibimantaga; yamai obianti itomi Tosorintsi. Icábintsasantëmi, aiti icasijaquemiro omagaro imëmi aiquenta obironta irasi Quirisito.

Aroca omimirintsibenquimaro isanguenaquineri joríojegui Moisés, anganquimari ibimantaga.

⁸ Jirai te pigótaigabitimari Tosorintsi, pijitosorintsitasitari ira yobetsiquë Iriati. Pamanocotitari carari te inguemimi, teatisati irotopitimi tenta intosorintsite. ⁹ Carari yamai pigótocoiguëri Tosorintsi Irianti Tosorintsisonori, aisati Iriro igóguëmi. ¿Pairo picogobiti pingantajima pibega jirai? ¿Picoque aisati pingantajimari ibega ibimantaga? ¿Pairo pinguemisantobitasitimari cagari Tosorintsi? Quero yogabisaicotimi. ¹⁰ Obirojegui picantaguetasitaro jiesita cataguiterpaguequë aisati manchacoripaguequë aisati osarinipaguequë, pairoraca jiesita. Picantaguetasitabecaro aronta picogabeca iraniacanimataguëmi Tosorintsi. ¹¹ Notsorogasëretocoquëmi yamai aroca natsipiriasita cara nopomirintsibenquemiro nocomantëgotëri Quirisito.

Iquengagueca Paboro.

¹² Yamai, nopiguemisantacagane, pingantaiguena nibega naro: quero popomirintsibentajaro isanguenare Moisés. Jirai nopomirintsibentabecaro naro, carari nojocajiro, yamai nacantaiguëmi pibega obirojegui jirai, te pomomirintsitimaro tenta pigótiro. Cara niátasitaiguëmi jirai, te pitsoingaigabaquina. ¹³ Pigóguë jirai nocomantaigapëmi ora Caninaro Nibarintsi, ati ongantima iragabisaicoquëmi Jesoquisito. Pinguengaiguena cara naquenguitsatomotaiguëmi iroontita najanaítapë cara obirojeguiquë. ¹⁴ Jirai pit-sorogaiguëri janaitatsiri, carari te pomingobëna naro. Caninasati pogasobicobëna, aisa cantaca naro irisaanganetsite Tosorintsi cara pingábintsabaqueri. Aisati págacanimatobëna aisati cantaca naro Jesoquisito cara págacanimatobëri Iriro. Te pitsoingaigabaquina. ¹⁵ Jirai picaninabentaigabaquina. ¿Pairo te pinganinabentobitobaina yamai? Jirai picábintsasanoigabaquina. Arome nanganquimime: “Páguinaro piroqui, pomenaro”, arome pomenaro. Nigóque tojai pinintasantaiguëna jirai. ¹⁶ ¿Yamai pairo piguisabiriquina? ¿Aroquentaco catingasati nacantaiguëmi ora aisonori?

¹⁷ Ira matobipëmi irooti icoque pinganinabentiri iriro, carari quero imitocotimi. Icoque pitsoingaiguena arota pinguemisantiri iriro, piniacanimataguëri iriro, carari itsoigani. ¹⁸ Pinetse, caninataque aninti angábintsabacaguima, quero amatobitobaca. Caninataque angábintsabacaguima cara nantsibatimica aisati cara queroca nini naro. ¹⁹ Naqueincotaiguëmi cantaquibinta najaniquite aroquenta naquemisantacagaiguëmi jirai. Yamai naquengasëretëgotagaimi terainta pomoncaratiro ora icocagaiguëmi Quirisito, terainta pingantimari ibega Iriro. Yamai përosati natsipirobentanëmi cantaquinanta piniro përosati naquengasëretëgotanëmi irooti cara pingantasanotanëmari Quirisito. ²⁰ Nocogasanotabitaca nantioquoimime, aro caninasati nanibataganaimime. Yamai teni nogótotocotimi pairoraca nanganquimi cara nomitocotaiguëmi.

Queroca omoncaratasantiro isanguenare Moisés, quero abisaicoontaro, carari anguemisantarica Jesoquisito, iragabisaicocái.

²¹ Aroca pijitabeca pomoncaraqueo isanguenare Moisés ora pabisaicoontima, pingomantina: ¿Pigótasantiro ora ocanti isanguenare? ²² Ocanti ainta piteni itomi Abaram. Paniro itomintancaro ironomire. Ira basini asi iinasonori. ²³ Ira otomi ironomire iboguë icantasanotacari omagaro basini janequijegui. Carari cara inasitaca Isac otomi iinasonori antiasiporo, ora icanque Tosorintsi jirai: “Aro irinaje pitomi”. Irooti cara omoncaraca

Irinibare Tosorintsi cara iboguê otomi. ²⁴⁻²⁵ Posiacaganta oca pite tsinane. Paniro ojita Agar iroonti onamitaga. Posiacagantacaro iroro opomirintsibentaro isanguenare Moisés. Isanguenaquero iriro ora icantasantêri Tosorintsi cara otisiquê ora jitacha Sinaí cara Arabiaquê. Aisati otomi yosiacagantari joríojegui timaguetatsi yamai Jerosarênquê: itsipiriasitaigaro ipomirintsibentaigacaro isanguenare Moisés, omagaro, arota iraganinatiri Tosorintsi. ²⁶ Carari ainta basini tsinane, iinasonori Abaram ora jitacha Sara. Cagaro onamitaga. Posiacagantái iroro eiroegui sobiaquenguitsine basiniatiquê Jerosarên inatsi canta Jonogaguitequê, canta antimasanoiguêro. Cagari eiro asi onamitaga, te omomirintsibentimaro isanguenare Moisés; aitosati quero opomirintsibentaro. ²⁷ Irootisati isanguenatocoque Isaiás jirai:

Pisirabarotabitaca, obiro cantênguicha yamai pinganinatanae. Te pinee pintsomae pitomi, carari pingagatanêtiq; iromitojaiganaquemiri pijaniquite, carari ora ponamire quero itojaigui ojaniquite.

²⁸ Yamai, nopiguemisantacagane, eiro ancancari Isac. ¿Teco jirai icanqueri Abaram Tosorintsi cara terai irinêmate itomi: “Intojaiganaque pitomijegui ingantaiganaquimaro omaniqui”? Aroqueque intiasiparitanotê Abaram, carari iquemisanquero Irinibare Tosorintsi. Aro Tosorintsi ipêri itomi, ira Isac. Aisa ocanta cara aquemisanqueri Tosorintsi eiro, itimacagajái. ²⁹ Jirai ira Ismael, otomi onamitaga, iguisapininqueri ireinti, Isac, ira ipêri Abaram Tosorintsi. Aisa ocanta iraeigui cogatsi moncaratirone isanguenare Moisés iguisapinincái eiro quemisantatsiri aroquenta itimacagajái Tosorintsi Isêrequê, coshoni pogacái. ³⁰ Aro ocanti Sanguenari:

Icanqueri Abaram Tosorintsi: “Pigátajiro ora ponamire aisati otomi, ojáque jaanta. Ira Ismael quero icantari otomi pijinasonori, quero yágarantiro ora pomêri Isac aiquenta”.

³¹ Pinetse, nopiguemisantacagane; te omatsiguengatimaro ora onamitaga quero opomirintsibentaro isanguenare Moisés. Irianti omatsiguengataca itomisonori Abaram, ira Isac. Aquemisantiri Tosorintsi, iroro itomintagucái.

5

Pingoiganontima: teca pininte pomeguima jorío, aro pinguemisantiri Quirisito.

¹ Jirai yogabisaicotajái Quirisito, iroro yamai caninataque aguiatasanotairi. Te iraninte angantimari ironomitaga. Quero picogui iromeratêtimi pingantiro pairoraca ara pabisaicoontêma. ² Pinguemisantasantina. Naro Paboro nongomantaiguêmiro oca: aroca pitotima cara yametaiga jorío, pijique ogabisaicoquimi, pitsipiriasicaro cara pabentabecari Quirisito; quero icantiro yogabisaicotimi. ³ Nongomantaigaimi aisati: aroca pitotima arota pabisaicoontimaro, aisati caninataque pomoncaratasantiro antagaisati ora ocanque isanguenare Moisés, potsatenguero. Queroca pomoncaratiro omagaro, quero pogabisaicotimi. ⁴ Aroca pininti pomoncarataiguero Sanguenari arota iraniacandinataiguemi Tosorintsi, aroque pijoquero cara icábintsabitêmi. Aroque pijocajiri Quirisito pitsoinguêri. ⁵ Carari aquemisantauêri Quirisito eiro, anintacaguero Isêre Tosorintsi ogomecái, igóiguê iromoncaratiro Tosorintsi antagaisati icancái. Igóiguê aiquenta iraganinatasantacái. ⁶ Aroca piquemisanqueri Quirisito, jemita pitoca jirai, aisati jemita teca pitotima. Te inguenguero oca Tosorintsi. Aroca piquemisanqueri Quirisito, aro pinintaiguêri basini matsiguenga. Irooti oca icocaquemi Tosorintsi.

⁷ Jirai caninasati piquemisantagabitaca. Poguiatasanoigabitacaro ora aisonori. ¿Pairiroco jocaquimiro yamai cara piquemisantabeta? ⁸ Te irojocaguimiro Tosorintsi. Iroro icoigaguêtimi iragabisaicotajimi. ⁹ Aitica arosata piponganta pan, aro oponcaganêro tojai, otsatenganêro omagaro. Aisa ocanta aintaca paniro matobiantatsiri, iromatobitaiguêri tojai matsiguenga. ¹⁰ Nasêretacari Tosorintsi cara ingueancagaiguêmi ara nauengua naró. Teni nogóte pairiraca matobiquimi, carari ingasitigatêri Tosorintsi. ¹¹ Arome nongomantaguequerime matsiguenga: “Pitotima, aro pabisaicoontêmaro”, ¿Pairo icantaguebiriquina catsimari joríojegui yamai? Quero pini ara inguisantaguenga. Carari itsoigani ira cantêgotina negaca. Catingasati nocomantaguequeri matsiguengajegui: “Aroquenta icamobicái Quirisito corosiquê, aro iragabisaicotajimi cara pinguemisanqueri”. ¹² Ainta cantabitimi: “Pitotima cara yametaiga jorío”, tojai yaserigaiguimi, yamatobitimi. Nocogabeca iritotaiguema iriati.

Aroca pinintobagaiguema, antagati.

¹³ Yamai, nopiguemisantacagane, nongomantaiguêmi cara icoigaguêmi Tosorintsi iragabisaicotajimi, te iranintacaguimi pomomirintsibentimaro isanguenare Moisés. Yogabisaicoquemi, carari te iranintacaguimi pingantiro pairoraca picogui obirojegui. Icoaquemi pinintobagaiguema omagaro, aisati pomitocotobagaiguema. ¹⁴ Icanque Tosorintsi jiraisonori, aisati isanguenaquero Moisés:

Pinintiri basinipague pitimanamitane pibega cara pininta obiati, aitosati pingábintseri. Aroca anganquero oca, caninataque. Antagati, moncaraca. ¹⁵ Iroro cantènguicha piguisabacagaigaca, tojai picatsimatobaca cantaca cara pitsicobagaigaca, aisati pipègatobaca. Aroca pingatsimataigue, aro popoguriobaganëma; quero picantiro ora piquemisantaigui.

Ora ocogabeca eiro, aisati ora ococacá Isère Tosorintsi.

¹⁶ Nongomantasantëmi: pinguemasëretiro Isère Tosorintsi cara pogometaiquëmi pairorapageraca pinganque. Quero picantiro ora picogabeta obi roca te onganinate. ¹⁷ Aiti ora te ongomeite picogabeta pinganquerome obi roca; aisati aiti ococaquëmi Isère Tosorintsi ongantacaquëmi pinanquiminta Isère. Te omoncaratobaguima, pipègatobaca. Pinasitagueca, iroro te pingantobintaguëtiro ora caninaro picogabeca pinganqueme caninaro. ¹⁸ Aroca pinguemisnquero Isère Tosorintsi cara ongantacaquëmi ora pinganque, quero piquenquiro pomoncaratiro isanguenare Moisés.

¹⁹ Igótasantaigüë eiro ora te onganinate icantaguetopianti matsiguenga ira terai inguemisantiri Quirisito. Iniobintiro sërari cagaro iina. Oniobintiri tsinane cagari ojime, iquenganeintaguetiro pairorapageraca quimingaro, icantaguetiro te iripasiguite. ²⁰ Yobetsiquëri yosiacagantëri pairiraca ijitosorintsitasitagetari, yamanocotasitari ibabane, cagari Tosorintsi sonori. Imatsitanti aisati yamatobiantaro anchasi. Iguisabacaga, iguisatsatobaca, ijonobaga, inebetaro pairoraca yasinta basinipague; omanapague iguisaca, icogasanti irobotari pairiraca, te inguengaiguema, itsipariobaganaca. ²¹ Inintëri iráगतari casintaguetacha, yóganti, isinguitënta, yapasantë, aisati tojai basini te ongomeite. Jirai nocomantëntimi: “Arotasha pine. Aroca picantopiantiro omagaro ocapague, quero picantiro piáti cara iragáantanequë Tosorintsi cara itimi”. Yamai nagatsitaimiro: “Pigamema arota quero pintiro ora te onganinate”.

²²⁻²³ Carari Isère Tosorintsi pogomecái omitococái cara anintobaganëma, anganinaigüë, antimacagobaguima caninasati aroquenta omagoriasëretacacái, quero aguísabacaga, antsinsisati angantobaguima, angábintsabacaguima, aisati poganinatai, ocatacacái quero amatobianti aisati coshoni oguri Quirisito, quero aquenga eati caninari, iroro quero ipègatobintobaga, quero acantaguetiro te onganinate ora ocogabeca antirome. Ocapague te ometopitáiro isanguenare Moisés. ²⁴ Ira pèquëgotacha corosiquë icamaque, te irantaje aisati. Cara aquemisnqueri Jesoquirisito acanca eati pèquëgotacha, osiacagantaca acamaqueni, tiguëti ongantima onogaje antairo te onganinate. Aisa ocanta acamobiquero ora ameta jirai. ²⁵ Carari aroquenta otimacagajái aisati Isère Tosorintsi, pogomecái pigótacacái aitosati angantiro caninari. Intsome angantiro pairoraca ococacái. ²⁶ Quero oguibata eati, quero aguisagari basinipague. Querootisati ojonobaga.

6

Omitocotobaguimata.

¹ Nopiguemisnacanagane, aroca piniaqueri popiguemisnane icantaguetiro ora te onganinate, pomaniro Isère Tosorintsi oniaiguëmi cara pomitocotiri. Quero piguisiri, antsinsisati pinibatiri, piganinatari. Pigamema quero intaguimi obi roca camagari ora te onganinate. ² Pingábintsabacaguima, pomitocotobaguima. Aro pingantiro ora yogometaiagái Quirisito. ³ Aintaca paniro quingacha: “Nasintsisëreti, quero nacantaguetiro te onganinate, te naninte iromitocotina naro pairiraca”, aro iriati matobitacha, te inganinasërete. ⁴ Pinguenguema. Pigócaca caninarica ora picantagueti. Aroca caninari, pinganinatane. Quero poguibata, quero pomoncaratari basini, quero pitsoingui basini. ⁵ Antagaisati panirropague irotopitamaro irasi irantane ora irogóontëmaro Tosorintsi.

⁶ Caninataque omapinintiri ira ogometái Irinibare Tosorintsi ora coguitiomotari. Te onogue ingoguëtiomotái pairoraca. Caninataque ira quemisantatsi ingábintsaguiri imaiguëri. ⁷ Pigamaiguema. Quero pamatobitaiga obiatiëgui. Tosorintsi quero inintacaguiri isërontari pairiraca. Quero pitsoingui. Nosiacagantëmiro: pairoraca imanquëti matsiguenga, irootisati oguitso irágaje. ⁸ Aroca ingantopiantiro ora te ongomeite, iroonti ora icogabeta iriati, aro iriátë cara Sharincabeniquë iritaguëma. Irari aroca ingantopiantiro ora ococaqueri Isère Tosorintsi, iriátë Jonogaguëtequë cara përosati intimaque. ⁹ Quero operata acantiro ora caninari. Aroca angantopiantiro caninari përosati, aiquenta imaáiro Tosorintsi ora caninaro. ¹⁰ Aro caninataque angábintsaguiri omagaro matsiguenga, carari caninasantaque aiquero ajátanëtigue angábintsaguiri opiguemisnane.

Icarantëro Paboro isanguenare.

¹¹ Naro Paboro nasanguenauemiro oca: piniaquero oquibe nasanguenare. ¹² Ira cogaquimi pitotaiguema, patiro ícoque iraniacaninatiri imatsiguenga ira jorío. Te iraninte inguisaiguëri. Arome inganquimime negaca: “Pinguemisantiri Quirisito icamobitaiguëmi

corosiquë, irooti iragabisaicoontimi”, aro inguisaiguërime jorío. ¹³ Ira ogometaiguëmi, “Pitotima”, te iromoncaratiro iriati isanguenare Moisés, carari icogabeca pitotaiguema arota iraguibatanquimaro. Ingantocotaiguëmimime imatsiguenga: “Pinetse, nototacacari tojai Garasiasati; yamai iquemisantaguë aisa ocanta ora naquemisantaguë naroegui”. ¹⁴ Carari te onganinate naguibatima naati, iroonti nacaninabiriqueri Atingomi Jesoquirisito, Ira pêquëgotënguicha cara corosiquë. Yamai naquianca cantaquina nipëicocani, nacamobiquero ora te onganinate ora icoguëti matsiguenga te inguemisante. Yamai teni nanguengairo ora te ongomeite. ¹⁵ Quero yabisaicotasita antagaisati ira totacha, querootisati yabisaicotasita iraegui te iritotima. Pati ro caninataque intimacagajái Tosorintsi cara anguemisanqueri Jesoquirisito, aro iragabisaicotajái, imasiniatitajái. ¹⁶ Aroca piquemisanquero oca nocomantaiguëmica, aro imatsiguengataquemi Tosorintsi, ingantaiguëmi igoigane. Aisati nocogui iromagoriasëretaquemi Tosorintsi, intimacaquemi caninasati, aisati ingantaneintëgotaiguëmi.

¹⁷ Yamai nocogui quero paserigaina aitosati, querootisati pipëgatsatina. Nigótacaquimi ora nantineri Atingomi Jesus, iro ro iguisaiguëtëna tsoengatsiri, yamasitacaquina nobatsaquë.

¹⁸ Yamai, nopiguemisantacagane, nocogui ingábintsasëretaquëmi Atingomi Jesoquirisito. Aro ocarati ora nasanguenataiguëmi. *Paboro*

PABORO ISANGUENAQUINERI EJESOSATI

Paboro ibetsataigacari Ejesosati.

¹ ¿Aintajeguibi nopiguemisanacagane canta Ejesoquê? Nasanguenataiguimini naro Paboro. Igâquena Jesoquirisito nanguenguitsatocoquineri. Aisati icocaquena Tosorintsi nasanguenataiguimi obirojeguinta quemisantatsiri irasi Jesoquirisito aisati përosati piquemisanataganaqueri Iriro. ² Nocoguini përosati ingâbintsaiquemi Pabati Tosorintsi aisati iromagoriasëretagauemi arota intimacagaiguemi caninasati. Ingantaiguêmiro Iriro aisati Atingomi Jesoquirisito.

Icoigacái Tosorintsi.

³ Aroquenta aquemisanqueri Quirisito, tojai icábintsasantacái Tosorintsi yamai yaca quibatsica. Iriro Iriri Atingomi Jesoquirisito. Yamai yoganinatacái aisati anganquima aiquenta cara irâganacái canta Jonogaguitequê. Yamai icantobencái antagaisati caninaropague ora paniacha Jonogaguitequê eironta iraisati Quirisito. Iroto intsome angantocotiri: “Caninarisonoriguinte Tosorintsi”. ⁴ Jiraisonoriguinte cara teraiquerai irobet-siquiro quibatsi, icoigacái Tosorintsi arota anguemisantriri Quirisito cara icamobicái arota iraganinasëretái aisati iraniacandinatái catingsasati Iriroquê. ⁵ Inintasantacáinta Tosorintsi iroto ora icoigobicái jiraisonorí, itomintacái yasincaí ira Atingomi Otosorintsi cara aquemisanqueri Quirisito Ira camobicái, cara isëretaca Tosorintsi jiraisonorí. ⁶ Iroto ora intsome angantocotiri: “Tosorintsi caninarisonoriguinte”. Icábintsasantacái tojaisonorí eironta irasi Quirisito Ira inintasanoti. ⁷ Tojaisonorinta inintasantacái Tosorintsi igâqueri Itomi icamobicái. Iraatanê icamaque ijocobentajáiro ora acantagueti te onganinate. Aisati iromitococái angantiro ora caninaropague icábintsasantacáinta tojai. ⁸ Aisati tojainta icábintsacái Tosorintsi igôtasantaganacái ora icancái. ⁹ Aisati igôtacaganacái ora igâbiriqueri Quirisito. Jirai te ogôguero ora igâqueri cara iragabisaicocái. Te ogôgue, paniro isëretaca Iriati Tosorintsi. ¹⁰ Jiraisonorí iquengaigacái Tosorintsi icoigacái arota antingomintague-mari Quirisito. Cara omoncaraquema omagaro ora ininti Tosorintsi, irapatobiritaiguêmarí Quirisito antagaisati matsiguenga, ira timatsi cara Jonogaguitequê aisati ira timatsi yaca quibatsica. Ingantocoiguêri: “Quirisito Atingomisonorí”. ¹¹ Icoigacái. Yamai eironta itomijeguí Tosorintsi icábintsacái aisati iromisanatanacái irooti cara irâganacái Jonogaguitequê arota antiomoqueri Iriro. Icábintsaijái negaca aroquenta aquemisanqueri Quirisito. Jiraisonoriguinte iquengaigacái Tosorintsi icoigacái teraiquerai irobet-siquiro quibatsi, iquengaigacái aisati icoque ingâbintsaijái. Inganque Tosorintsi pairorapagueraca ora ininti. ¹² Naroegui jorio natsita quemisanataguêri Quirisito arota yamai cara iraniaiguêna matsiguenga ingantaiguê: “Aisonorí caninarisonorí Tosorintsi ipasiniatiaiguêri jorio”. ¹³⁻¹⁴ Aisati nacantaiguêmi pibega obirojeguí cara cagaribi jorio, cara piquemisanatagabaquero ora aisonorí jitacha Nibarintsi Caninaro, aro yogabisaicotaiguêmi Quirisito. Jirai icantaigacái Tosorintsi: “Aroca pinguemisanqueri Jesoquirisito Notomi, aro nomêmi Nasêre. Aisati náganêmi Jonogaguitequê pintiomoquina”. Aro yamai coshoni ogaiguêmi Isêre Caninaro, irooti pigôntaiguêma obiro iraisati Quirisito. Aisati pigôgui icábintsaiquêmi Tosorintsi antagaisati irooti cara irâgaiganaquemi Jonogaguitequê pintsibataiguêmarí përosati obirojeguinta iraisati. Iroto ora ingantaguêtaiguê omagaro matsiguenga: “Caninarisonorí Tosorintsi”.

Yamanocoqueri Ejesosati Paboro.

¹⁵ Aro naquemocotaiguêmi obiro cara piquemisanataguiri Atingomi Jesos aisati cara pinintaiguiri popyguemisanthane. ¹⁶⁻¹⁷ Iroto ora përosati nacarasiaqueri Tosorintsi obirojeguinta yogabisaicotaji. Aisati përosati namanocotaiguêmi catingsatiquê Tosorintsi Ira Caninarisonorí, Iriri Atingomi Jesoquirisito. Namanocotaiguêmi: “Pomeri Ejesosati Pisêre arota irogôtasantaiganaquemi”. ¹⁸ Namanocotaiguemi irogôtacagaiguemi ora paio yogabisaicobiritaiguêmi Tosorintsi. Icoguini iraganinasëretaguemi. Nocoguini irogôtacagaiguemi ora atraca ongantima Jonogaguitequê cara irâgaiganaquemi pintsibataiguêmarí përosati. Inganinatasantanê canta antagaisati quemisantatsiri. ¹⁹ Aisati nocoguini irogôtacagaiguemi Iriro sintsirisonoriguinte. Itosorintsitasanotineri omagaro quemisantatsiri. Yoganiasëretaái, itimacagajái, ²⁰ aisa ocanta itinaajiri Itomi cara icamaque Quirisito. Aro yoganiatanairi yáganêri Jonogaguitequê yogasobiaqueri ibacosonoriquê. Yoguêri agangunonoriquê icanqueri: “Notomi, Obiro Itingomisonoriguinte. Aroque noguibatêmi. ²¹ Aisa pobatas-antaguetiri antagaisati agâtachari, obatacagantatsiri, itingomipague, omagaro. Pobatas-antânêri omagaro timatsi yamaica aisati omagaro boquenguitsine aiquentata. ²² Aisati pigâtiro Obiro pairorapagueraca ora inatsi aisati pigâtaigueri antagaisati quemisantatsiri

ira botoibiritaiguimi. Yamai iriro icantaigaca paniro matsiguenga. ²³ Irrojegui quemisantatsiri irianti pasi. Iniaiguêmi Obiro Itingomi pitsibataigari aintanta Obiro irrojeguiquê. Iquemisantasantêmini. Aitosati pigáti omagaro pairorapagueraca ora inatsi”.

2

Itimacagajiri quemisantatsiri Tosorintsi.

¹ Carari jirai te pigógueri Tosorintsi. Aisati picantabetari ibegaiga camasêretatsiri. Te pinguemisantiri Tosorintsi. Picantagueigui ora te onganinate, pijáiguême aiqero Sharincabeniquê. Carari yamai yogabisaicotaiguêmi Tosorintsi itimacagajimi arota pijáiguê aiqero Jonogaguítequê, pintiomotasantaiguêri Tosorintsi canta. ² Jirai obirojegui picantaigari ira te inguemisante, piquemisantabetaigari Satanás ira itingomi omagaro camagari. Irro agáiguêri antagaisati matsiguenga ira te iriátsatagueri Tosorintsi. ³ Jirai acantabetari ira te inguemisante, acantaguetabetaigaro pairoraca ora te onganinate ora ocogabeta aisati pairoraca ora aquengabetaigaca arota acantiga. Irro ora iguisaneintobicái Tosorintsi aisati icanta iguisaneinqueri omagaro te inguemisantiri yamai. ⁴⁻⁵ Jirai acantaguetasantiro ora te onganinate, tenta ogógueri Tosorintsi, te anguemisantiri. Carari tojai icantaneintêgotagái Tosorintsi inintasantacáinta, icábintsaigacái Tosorintsi irasinta yoguero, aro ijocobentajái ora acantagueti te onganinate yogabisaicotajái. Jirai eiro aisati acantaigabitari ibegaiga camasêretatsiri, te anguemiri Tosorintsi, carari yamai aquemisanqueri Quirisito, itimacagajái aisa icanta itimacagajiri Jesoquisito. Yamai íaigui aiqero Jonogaguítequê. Aisonori icábintsasantaigái Tosorintsi agabeni. ⁶ Jirai icamaque Quirisito, aique itinaajiri Tosorintsi. Aisati acantari ibega Quirisito ipasiniatitajái Tosorintsi itimacagajái cara aquemisanqueri Quirisito Ira camobicái. Yamai coshoni aguiatêri Quirisito arota atsibatari Irro yamai aisati antsibatapêmaru aikuenta Jonogaguítequê. ⁷ Icoquini Tosorintsi cara ingantocotaiguêri matsiguenga yamai aisati pèrosati: “Caninarisonoriguente Tosorintsi. Incantaneintêgotasantaiguêri quemisantatsiri, tojaisonoru icábintsasantaiguêri cara igáqueri Itomi icamobitaiguêri”. ⁸ Icábintsasantaigáininta Tosorintsi, irro yogabisaicotaguêcái aroquenta aquemisanqueri Jesoquisito. Tigueti pingantima pigabisaicotima obiati. Irianti agabisaicotagaimi Tosorintsi. ⁹ Arome agabisaicotima eati, angantaiguême: “Eiro caninari, ogabisaicotaja”. Carari icábintasantái Tosorintsi, te angantiro eiro pairoraca. ¹⁰ Jirai itasongobencái Tosorintsi omatsiguengatacaru Quirisito aroquenta aquemisanqueri. Aisati icoque antaguetineri ora caninaropague. Jiraisonoru teraiquerai antime aroqueque icoigacái Tosorintsi antaguetasantiro pèrosati ora caninaropague.

Aroca aquemisantiri Quirisito, aro acantobaca omagaro: jorío aisati basiniatiegui matsiguenga cagari jorío.

¹¹ Yamai pinguengaiguema cara jirai te pigógueri Tosorintsi. Cagaribu obiro jorío ira totaigacha. Incantocotaiguêmi jorío: “Ira basinati matsiguenga te irogógueri Tosorintsi. Irro quimingari tenta iritotaiguema aisa nacanta naroequi”. ¹² Pinguengaiguema ati picantaiga jirai: te pigótocoigueri Quirisito, te pomatsiguengatimari joríojegui, teatisati pigóguero ora icantasantêri jorío Tosorintsi. Te pigógueri Tosorintsi, teatisati pigóguero ora icoque Tosorintsi ingábintsaiguemi iragabisaicotagaimi. Pitimasita tenta pigógueri. ¹³ Aisonori jirai pitimasitaiga picantaigaca cara pitimi jaasonorinta. Carari yamai obirojegui irasi Jesoquisito aroquenta piquemisantaguêri icamobitaiguêmi iraatobitaiguêmi. Aro yogabisaicotagaimi coshoni yogaguêmi yamai. ¹⁴ Jirai naru aisati antagaisati jorío naguisaneintaiguêmi tenta pinguemisantaguero isanguenare Moisés. Aisati piguisaneintaiguina naroequi obiro aisati pomatsiguengajegui. Aique yogabisaicocái Quirisito yobegopitajáiro cara aguisaneintobaca, itimacagajái caninasati yamai acantobagaigaca omagaro quemisantatsiri aquengaigaca. ¹⁵ Jirai icanque Tosorintsi ati ingantaiguêma cara intimaiguê jorío cara inguemisantaiguêro ora isanguenare Moisés. Nacantaisitaigaro nabisaicoontêmarome isanguenare. Carari icamobencái Quirisito, imoncarabintacáiro ora isanguenare Moisés arota quero pobomirintsitái queronta pigátái yamai. Jirai naquemisantaigabitaro naru. Obirojegui te pigóguero isanguenare Moisés. Nacasiriconiatitaigui te omatsiguengatobaguima. Carari yamai eiro irasi Quirisito, omatsiguengatacarinta Irro aisati omatsiguengatobaca. Yamai acantobagaigaca, ¹⁶ te anguisaneintobagajima. Cara aquemocoqueri Quirisito icamobicái cara corosique aquemisanqueri, icancái imatsiguenga Irro. Yamai teni opêgatsatimari Tosorintsi, teatisati opêgatsatobaguima, atimaigui caninasati. ¹⁷ Naroequi jorío. Jirai nigógabitacaro Irinibare Tosorintsi, naquemisantaigabitaro. Obirojegui te pigóguero. Pitimaigabita jaasonorinta. Aique eiro ipocasicái Quirisito. Ira iragátane icomantacái antagaisati ati angantajima omatsiguengatobagajima

aisati ágacananatobaguima. ¹⁸ Carari yamai aroquenta aquemisanqueri Quirisito yare-tacací cara Tosorintsiquê, jorío aisati ira cagari jorío omitococáinta Isêre Tosorintsi. ¹⁹ Jirai te pigóigueri Tosorintsi, te ingantimi. Carari yamai jee pigóiguiri Tosorintsi, it-omintauguêmi aisa pomatsiguengatacari omagaro ianiquite Tosorintsi quemisantatsiri. ²⁰⁻²² Eiro quemisantatsi osigaro ibango Tosorintsi. Cara antêro pongotsi, aguibatêro obe-batsaquêro quibatsi. Aique opatotaiguêro otingomipoa, anchapoa, osi, sibitsa, antagaisati. Aique obetsiquê pongotsi. Ora pongotsi aisati ocanta ibegaiga eiro botoibiritari Quirisito. Irro Atingomi. Icomantêgotauguêri Irro iragátaneegui aisati comantantatsirijegui. Aque-mobêro irinibare, aro omitococái Isêre Tosorintsi aquemisantaiguêri Quirisito. Yapatotái. Aiquero ajátanêtigue anguemisantasantanêri eiro quemisantatsi aisati coshoni aguiaguêri Quirisito Ira botocái aisa acanta cara apatobiritaigaro omagaro cara obetsiquêro pongotsi. Yamai Ejesosati obirojegui iraisati Quirisito aisa nacanta narogui jorío quemisantatsi iraisati. Pinancái Isêre Tosorintsi. Aisonori eiro acantaro pibega ibango cara itimi Tosorintsi.

3

Paboro intineri ira quemisanquenguitsine.

¹ Obirojegui cagari jorío, carari nanintauguimi. Namanocotaiguimi. Nocomantaiguêmi iragabisaicotaigaimi Jesoquirisito cara pinguemisanqueri. Nocomantêmintá iroro ora yomingabiriquina iromingamentoquê yaca Iromaquêca. ² Najique piquemocotaiguêna cara igáquina Tosorintsi najátagueque nongomantêgotêri Irro cara icábintsaiguêri anta-gaisati matsiguenga. ³ Igótacaquena naro ora isêretaca Irro jiraisonori, ora te irogóiguero matsiguenga. Carani nasanguenataiguêmi arosata. ⁴ Aroca pinibataiguêro oca nasanguenataiguemica aro pigóiguêro ora icomantêna Tosorintsi cara isêretaca icantocoqueri Quirisito ora te ogótengani jirai. ⁵ Te irogóiguero matsiguenga jirai, arosataanti igóiguêro comantantatsiri. Carari yamai ora Isêre Tosorintsi pigótacagaiguêna naroequinta iragátane Quirisito. ⁶ Obirojegui cagarimi jorío carari icomantêna Tosorintsi aroca pinguemisan-tauguêri Quirisito aro iragabisaicotaigaimi aisati icanca cara yogabisaicotaiguêna narogui jorío aisatinta icamobitaiguêmi Quirisito obiro. Cara piquemisanqueri yasintauguêmi Tosorintsi aisa icanta yasintauguêna naro joríojegui quemisantatsiri. Najítaiguiri nasi Pabati Tosorintsi; pijitiri yamai obirojegui pasi Piri; aisati irentitobaca. Aisati acanta omatsiguengatobaganaca. Eiro irasi Quirisito. Antagaisati ora icanque Tosorintsi jiraisonori icantocotaiguêna jorío cara naquemisanqueri, yamai icantaiguêmi aisati obiro-jegui cagari jorío. Oca Caninaro Nibarintsi. ⁷ Iroro ora iquenguitsatacaquina Tosorintsi. Aro icoiguêna naro, icábintseña imitocoquina cara nocomantêgotaguequeri. ⁸ JCaninarisonori Tosorintsi! Antagaisati basini quemisantatsiri obataiguina tenta nongomeite naro. Najica naro carantatsiri. Carari icábintसानоquina Tosorintsi. Icoiguêna naro cara nongoman-taguêtaigueri iragui cagari jorío cara Ira Quirisito icaninatasanoti. Irro cábintantatsiri carari quero pigótêmatagani omagaro ora icanque. Iragabisaicoqueri pairiraca quemisan-querine, intsibatêmari përosati. ⁹ Igáquina Tosorintsi nogótacagaigueri omagaro matsiguenga cara aisati inintauguêri irro Tosorintsi, icoguini iragabisaicotaigairi aisa icanta isêretaca jiraisonoriguinte cara teraiquerai irobetsiquero omagaro. Te ogótengani jirai, carari yamai icomantaigacáiro. ¹⁰ Icoguini Tosorintsi cara yamai ira agátachari aisa itingomipague cara Jonogaguitequê iraniaiguêri cara yogabisaicotaigairi Tosorintsi ira quemisantatsi, ingantaiguê: “Igótasanoti Tosorintsi”. ¹¹ Jiraisonori, teraiquerai irobetsiquero quibatsi, isêretaca Tosorintsi iragabisaicotaigairi matsiguenga, jorío aisa ira cagari jorío. Yamai ican-queri ora iquianca jirai cara icamobicái Jesoquirisito Atingomi carari ca aisa icaniatanaí. ¹² Aroquenta aquemisanqueri Jesoquirisito quero ipasiguitaigui catingasatiquê Tosorintsi, abentaigacari, omanaiguêri Irro, aquengaiguêri, inibatobaca eiro aisati Tosorintsi, igóiguê iquemacái, iniacananataigacái caninari aquemisanquerinta Itomi. ¹³ Iroro ora quero pi-pasiquibiritina cara natsipiriobiquemi. Pinganinasêretague iroronta isêretaca Tosorintsi.

Paboro yamanocotaiguêri Ejesosati.

¹⁴ Icabintasantacáinta Pabati Tosorintsi iroro natingomintasantaguêcari. Aisati na-manocotaiguimi. ¹⁵ Irro Iriri antagaisati quemisantatsiri yaca quibatsica, aisati cara Jonogaguitequê. ¹⁶ Caninarisonorinta Tosorintsi Ira tosorintsitasanotatsi. Irro cas-intaro antagaisati. Iroro namanocotaguêtaiguêmi aroquenta pinasêrequimi Isêre arota irosintsisêretauguemi cara pingantagueigue tojai ora caninaropague. ¹⁷ Aisati namanoco-tauguêmi cara coshoni irogaiguêmi Quirisito intimacaquemi paneingementoquê aro-quenta piquemisanqueri. Aisati namanocotaiguimi aiquero pijátanêtigue pigóiganaque inintasantauguimini aisati aiquero pijátanêtigue pinguemisantaiganaqueri. ¹⁸⁻¹⁹ Aisati

namaniri Tosorintsi irogótacagaiganaquimi obirojegui Ejesosati aisati omagaro quemisan-tatsiri cara tojaisonori inintasanoiguimini agabenisonori Quirisito. Irasi yoguiro inin-tasantaigái përosati. Te ogótengani omagaro ati ocanta cara inintasantaiguëmi. Aroca pigóiguë inintasantaiguëmi nocoguini tojai ingantocobentaiguemi Tosorintsi arota iri-tosongobentaiguëmiro antagaisati ora ininti ingantaiguemi Iriró. ²⁰⁻²¹ Sintsirisonorinta Tosorintsi teni ongométatomotiri cara ingantocobentasanotacái pabisanaquero ora omana-queri aisati pabisanaquero ora aquengaiga. Iroro ora aquemisantaguëqueri omagaro eiro Jesoquisito yamai intsome angantocotiri: “Caninarisonoriguente Tosorintsi. Tojaisonor-inta icantocobentaigái cara igáqueri Itomi iragabisaicotajái, iraniacaninataguerita cani-narisonori antagaisati quemisantatsiri yamai aisati përosati. Aro ocarati”.

4

Intsome anguengasëretaiquema.

¹ Nocomantëgotërinta Quirisito yomingaiguëna yaca iromingamentoquëca. Aroque nasanguenataiguëmi cara ati ocanta icantocobentasanotaigái Tosorintsi aroquenta aquemisqueri Jesoquisito. Yamai nangantasantaiguëmi aroquenta itomintaiguëmi obirojegui Tosorintsi cara yogabisaicotajimi Quirisito, yamai pintimobitaiguerei pingantaiguëneri ora caninaro. Aisati pinguengaiguema irootisati. ² Obirojegui, quero pomichati. Quero pipëgatsari Tosorintsi, querootisati pipëgatsari matsiguenga, pinibatiri caninasati. Antsiqueronisati pingantiri. Pomitocotiri popiguemisantane pinintirininta. Quero piguisaneintiri cara ingantagete ora te onganinate. ³ Pingogue pinguengaiguema irootisati, aroquenta pogometaiquëmi Isëre Tosorintsi pintimaigué caninasati, përosati pingantobagaiguema obirojeguinta irasi Quirisito. ⁴ Antagaisati quemisanqueri Quirisito iriantiegui quingaigacha aisati imatsiguengatobaganaa. Patiro Isëre Tosorintsi pinancái. Antagaisati eiro irágaiganacái Tosorintsi aiquenta cara Jonogaguetequë cara icanque Iriró jirai. Igóiguëronta oca iroro ora acaninasëretaguëque. ⁵ Paniro ini Atingomi. Paniro Iriró aquemisantaiguí. Paniro Iriró obaotisabiritaiga. ⁶ Ainta paniro Tosorintsi Ira obetsiquëro omagaro. Icanque pairoraca ininti. Iriró Pabationori omagaro eiro quemisantiri. Iriró casintái icantocobentasanotaigái, coshoni yogacái pinancáinta Isëre.

Ipaguaetaíro Quirisito panirootipague atarobacaare.

⁷ Aisonori aquengaiga eiro iraisatinta Quirisito. Aisati ipaguaetaíro panirootipague ora ininti imoncarataguetajáiro. Ipëna nro nongomantaguetiri omagaro matsiguenga ora Caninaro Nibarintsi. Ipagueiguëmi obiro basiniati pitarobacaare. ⁸ Ora Sanguenari ocanti: Cara yogainocanaa Quirisito cara Jonogaguetequë, aroqueque yagobiaqueri ira Satanás. Yágaiganaqueri tojai ira aguiataigabitari camagari jirai. Aisati ipaguaetaiguëri mat-siguenga pairoraca ininti.

⁹ ¿Pairoroco ocantira yogainocanaa? Ocanti cara ipaniaca canta Jonogaguetequë, aique yamasobingopë yaca quibatsica imatsiguengatapë icamobicái itiaca aisa itinaaja, aique yogainocanaa jonoquë. ¹⁰ Ira aguëpënguitsi yaca quibatsica Iriati againocanacha canta jonogasonorinta, yamai Tosorintsi icanqueri Iriró Itingomisonoriguente arota iragáante omagaro cara jonogasonorinta irooti osobisonorinta. ¹¹ Ipagueiguëri Quirisito iraegui quemisantatsi itarobacaarepague. Ainta ira icantacacari iragátane Quirisito. Basini icanque comantagueantatsiri, basini icanque quemisantacagantatsiri. Aisati Quirisito icanqueri basini omeantatsiri aisati ogameantatsiri. ¹² Yogaguetanacáiro arota eiro aisati antagaisati quemisantatsiri asintsisërebiriqueri anguemisantasantanëri Quirisito aisati ogótasantanëri. Aique ingantaigái Tosorintsi antaiguineri aisati omitocotaiguerei omitoigaanaqueri quemisantatsiri inguemisantasantanëri Quirisito. Irosintsisëretanëri. ¹³ Aro përosati ingábintacái arequima anguemisantasantëri Itomi Tosorintsi arota anguen-gaigari ibega Quirisito aisati ogótasantëri. Aro aiquero ajátanëtigue anguemisantaigana-queri angantaiganaquimari Iriró. ¹⁴ Jirai acantaigari ibega janequi, te ogótasantiro ora caninaro tenta anguemisantasantiri Quirisito. Jirai te anguenguema catingasati. Yama-tobitopiantái irapague ogameantaguetiro ora te onganinate. Carari te iraninte Tosorintsi angantimaro pibega anchato ora posibitaguete coguentima. Icoqui angantimari anti-asipari, icoguí ogótasantaiguero ora caninaro. ¹⁵ Icogasanti Tosorintsi cara anintaiguerei basini matsiguenga, aisati caninataque ongomantagueiguëri Irinibare ora aisonori. Aisati icoguí Tosorintsi aiquero ajátanëtigue angantaiguemari Quirisito aisati anguengaiguemari. Iriró Atingomi ¹⁶ antagaisati eiro quemisantatsiri aisa opatobiritaiguëmari. Icancai an-ganquimari paniro sërari. Yogomecái arota omitocotobaguima. Aisati yogomecái cara angantobaguima caninasati, aro aiquero ajátanëtigue anguemisantacaguiri basini aisati aiquero ajátanëtigue anintobagaiguema.

Quero picantaja pibega cara jirai.

¹⁷ Yamai nangantasantaiguëmi nongomantaiguëmi naro ora icogui Atingomi, quero pitimaigui aisati picantaigari ira te inguemisante. Icantagueigui pairoraca iriro, iquengasitaiganaca ¹⁸ tenta irogógueri Tosorintsi. Icantari ira te inguenganeintëmatima. Teni iranintaigue inguengasëretaiqueri Tosorintsi, teni iraninte irogógueri. Iroro te ingantocobintaguëtaigueri Tosorintsi, quero iáigui itimotiri Tosorintsi Jonogaguitequë. ¹⁹ Tojai icantaguetasanoigui ora quimingarosonori, te iripasiguitëmataigue cara yogamagasëreca. Aiquero iáiganaquitigue intaguetiro tsinanepague aisati ontaguetiri sëraripegue, icantagueiguiro tojaisonorori ora te ongomeite. Imichataigui, iroonti inganque ora inintaigui irirojegui. ²⁰ Carari cara nogometaiguëmi jirai nogometocoqueri Quirisito. Te nogometaiguëmi pingantaiguemari obirojegui ibega ira te inguemisante. Catingasati nogometaiguëmiro ora icogui Tosorintsi pinganquero ora caninaro. ²¹ Nigóti piquemocotaiguëri Jesus. Naati comantëgotëri ati icanta Jesus cara nocomantaiguëmiro ora aisonori. ²² Aro yamai quero picantaiga pibega jirai cara përosati picantagueigui ora te ongomeite irooti pamatobiantaa. Pijocajiro ora pintaguetasantabitaiga jirai ora te onganinate. ²³ Quero piquengasëretaa cara picanta jirai. Pomemari Tosorintsi, aro imasiniaitaigaimi. Omitocotaiguëmi Isëre Tosorintsi pinguengaiguero ora caninaro. ²⁴ Aroquenta yogabisaicotaigaimi Tosorintsi icantaiguëmi iraisati ianiquite. Iniacaninataiguëmi. Iroro yamai pingantaiguero ora caninaro. Aisati pingantacarinataiganaquimari ibega Iroro, iroonti icanque ora caninaro Irironta Caninari.

Yamai pingantaguetete ora caninaro.

²⁵ Yamai quero picantobagaja aisati quero pamatobitobagaja, pijocajiro, iroonti catinagasati pinibataiguëri popiguemisantane, eironta irasi Quirisito. Iroro aisati eiro omatisengatobaca. ²⁶ Aroca pinguisaneintiririca, omanapague pomaguisantiro irooti cataguetiri ²⁷ arota quero icantëmatimi Satanás ira camagari querota intaguëmi ora te onganinate. Queroca pobetsiquero omanapague, queroca popeicoitaro, përosatica pinguisaneintiri, aro irantacaquimi Satanás ora te onganinate. ²⁸ Aroca picositi, quero picositaí aisati. Pintarobacaate pobacoquë iroro caninaro. Aro aitipague inaguetanë pairoraca cara pomitocoqueri ira coguetatsi iraperi, imanchaqui, pairoraca. ²⁹ Quero pinibatiro ora te onganinate, iroonti pinibate ora caninaro arota pomitocotaguetiri ira quemaiabaquemine arota inganinasëretanë. ³⁰ Pingantaigue caninasati. Queroca pitimi caninasati, aro ogasërequima Caninaro Isëre Tosorintsi. Quero pogasëretacagaro Isëre ora coshoni pogaiquëmi iroronta pigóontaigaca obiro iraisati Quirisito irooti cara cataguetiriquë cara iribocapae Jesoquirisito irágaiganaquëmi Jonogaguitequë cara iraganinataimi. ³¹ Quero piguisa. Quero piguisaneiantü. Quero picatsimaanti. Quero piguisatsatanti. Quero picantocotasitaguetari pairiraca. Quero picogui pitsipiriacaguëri basini. Pijocajiro antagaisati cantacha nega. ³² Iroonti pingábintsabacaguëmi, pingantaneintëgotobaguëmi. Pomaguisantiri basini matsiguenga ora icanquëmi ora te onganinate piganinatobagajima ijocajimirona Tosorintsi ora picantaguetomoqueri te onganinate teni inguisaneintaigaimi yamai obironta quemisanqueri Quirisito. Aisati pingantimari ibega Tosorintsi quero pinguisaneintobitanëri popiguemisantane ora icantaguetomoquëmi te onganinate.

5

¹ ¿Teco obiro itomijegui Tosorintsi? Inintasantaiguëmini. Iroro pingantaguëquimari Piri. ² Pinintobaguëmi aisati pinganquimari Quirisito inintaigacái icamobicái Iriati. Iniacaninatëro Tosorintsi ora icantobencái Itomi. ³ Quero pintiro tsinane cagaro pijina, querootisati pintiri sërari cagari pijime. Quero poguimingsëretanti. Quero pinebetaro ora yasinta ira basinipague. Ira quemisantiri Quirisito quero icantiro negaca. Nocoguini ira pitimanamitane quero icantocotimi cara picantaiguëro negaca. ⁴ Quero pinibatëgotaguetiro tsinanepague, querootisati pinibatëgotaguetiri sëraripegue. Quero pinibatobaga ora quimingaroro. Quero pisërontobagaro ora te ongomeite. Antagaisati oca te onganinate quero omitocotaiguëmi. Iroonti caninaro angarasiaqueri Tosorintsi icábintsasantaigacáinta. ⁵ Pigóiguero oca: quero iáti Jonogaguitequë ira antagueantatsi, querootisati iáti ira quimingsëretatsi. Aisati ira nibetaro ora yasinta basini, aisa icantari ibega ira manëgotiri ibabane cagari Tosorintsisonorori. Querootisati iáti iriro Jonogaguitequë cara iragáantanequë Quirisito aisati irasi Tosorintsi. ⁶ Pigamaiguëma arota quero pairi matobitaiguëmi, aintanta cogatsi iromatobiquëmi irantacagaiguëmi ora te onganinate. Quero piquemisantaiguëri. Iguisaneintaiguëri Tosorintsi ingasitigaiguëri antagaisati ira te inguemisantiri. ⁷ Iroro ora quero picantaigari ibega iriro querootisati picantiro.

Pintimaigue cataguetiriquë.

⁸ Jirai picanta pitimaiguë tsitiniriquë picantagueigui ora te onganinate tenta pigóigueri Tosorintsi. Carari yamai pigóigüeri aroquenta piquemisañtaiguëri Itomi jitacha Quirisito. Aro pingantaiguema cara pintimaigue cataguitericuë catingasati Tosorintsi, pingantaigue ora caninaro ora ininti Iriró pingantaigue. ⁹ Aroca antime cataguitericuë, angábintsante, antime caninasati, catingasati anibatiro ora aisonori. ¹⁰ Posamitima: “¿Paioraca irani-acaninaté Natingomi?” Atsi pigóñtaiguemaro negaca ora icogui Tosorintsi, aro pingantiro. ¹¹ Quero picantari ibega ira cantaguetagatsi ora te ongomeite ira timaigatsi cara tsitiniriquë. Carari pipasiquitacagaiguiri ora icantaigui ora te ongomeite tenta omitocotaigueri pairiraca. ¹² Iroonti pasiguitagantsi ora icantagueigui comanoroni ora te onganinate. Teni ongomeite anibatégotiro. ¹³ Aroca anganque ora caninaro aisatica anguenguitatiro Irinibare Tosorintsi, osangueguitetocoqueri, ogótacaqueri ora icantagueigui ora te ongomeite, ogonijaquero omagaro icantagueigui te onganinate. Irogóiganaquero. ¹⁴ Ocari oca ocantagani:

Aroca pisamë, pingaguite. Aroca picamaque, pingabiritima. Aro irosangueguitetocoquemi Quirisito.

¹⁵ Pigamaiguema ati pingantima pingantaiguëro ora pairoraca. Quero picantari ibegaiga ira te irogóte. Itimasita iriro. Carari obiroyegui aisati pingantimari iraeigui ogótatsi. Itimaque iriro caninasati iquemisanquero Irinibare Tosorintsi. ¹⁶ Quero poperata. Përosati pintaiguero ora caninaropague arosoronita ira cantagueiguro ora te onganinate. ¹⁷ Quero picantasitaguetero pairorapageraca. Pinguengasantobëronta obitsita, pingogaiguero ora ininti Atingomi, aigue pingantaiguero. ¹⁸ Pinintica pinganinatë, quero pisinguitaigaa ontaqueminta ora tesonori onganinate, carari pinintacaguero inantasantimi Isëre Tosorintsi iroro antaquemine ora caninaro. ¹⁹ Pinibatobagaiguema pingántataiguero Irinibare Tosorintsi. Pingántabentiri Quirisito. Pingántatëgotiri pasiquë pinibare. Përosati pingántatagobagaiguema piganinasëretobaguima arota piniacaninata-gaiguëmari Atingomi. ²⁰ Aroquenta obiroyegui iraisati Jesoquisirito Atingomi, përosati pingarasiatagueri Pabati Tosorintsi antagaisati pairoraca icanquemi. ²¹ Aroca piniacobeingatiri Quirisito, piquemisañtaiguirininta, aro pinguemisañtacagobaguima aisati piniacaninatobaguima.

Caninataque iranintasantiro iina sërari, aisati caninataque onguemisantiri ojime tsinane.

²² Tsinanejegui ¿Piquemisanquero Atingomi? Aisati pinguemisantiri pijime irironta cantaca pitingomi. ²³ Ira sërari otingomintari iina, yomisantiro. Iriri aisati icantari ibega Quirisito Atingomi eironta quemisantiri yomisanatacái. Yogabisaicocái yasintaigái. ²⁴ Aisati apatoibiritari Quirisito cara aquemisantirini aisati ocanta ora tsinane caninataque përosati onguemisañtaiganaqueroi ojime omagoroquë. ²⁵ Obiroyegui sërari aisati pinintasanotiro pijina aisati icanta Quirisito inintasanotaigacái iroro eiro apatoibiritari Quirisito icamobicaínta ²⁶ arota irasintaigái aisati iraguëtaai anguemisanqueroñta Irinibare Tosorintsi. ²⁷ Icoguini iraganinatanotanacái arota cara iribocasitacái iraniacaninataigapái caninarisonoriguinte. Quero pini eiroquë pairorapageraca ora quimingari. Aro iraganacái eiro iraisati antiomoqueroi Jonogaguitequë përosati. ²⁸ Aisati ocanta caninataque sërarijegui iranintasanotaiguëro iina inganquero cara inintiro iraisati ibatsa. Ira nintiro iina, aisati ininca iriati, aisatinta iina ocantaro irasi ibatsa. ²⁹ Te poro quisachane iriati irootnta iraisati ibatsa, carari icábintsëro ibatsa, yomisantiro aisa icantari ibega Quirisito icábintsacái eironta quemisantiri. ³⁰ Yomisanatanacái eironta iraisati coshoni yogacái. ³¹ Ocanti Sanguenari:

Iroto ora aroca iráque iina poro sërari, intsiparianëmari iriri, aisati iniro, përosati coshoni iroganëmario iina. Ira sërari aisati iina ingantaiguëma paniro ibatsa iriro. Coshoni irogobaquima. Te onganinate irojocobagajima.

³² Oca osanguenaca jiraisonoriguinte. Iroto ogomeantagantsi caninaro. Ocantocoqueroi sërari cara iráquero iina. Carari yamai nigóti ocanti basini aisati. Ocantocoqueroi Quirisito cara irágaiganacái omagaro iraisati irianti quemisantatsirijegui. ³³ Yamai nagatsitaigaimiro sërari: pibega pininta obiati, caninataque pinintasantiro pasi pijina përosati. Aisati, tsinane, caninataque piniacobeingatiri pijime aisa pinguemisantiri.

6

Ati ocanta angantiri otomi aisati ati ingancái iriro.

¹ Janequijegui, aroca piquemisañtaiguëri Atingomi, icoguiñi aisati pinguemisantiri piri aisati piniro. Caninataque pinganquero negaca. ²⁻³ Jiraisonori Tosorintsi ipaiguëri matsiguenga ora jitacha 10 iragáantane aisati ojita mantamientos. Patiroonti pini cara icanque aroca anguemisanqueroica, aro ingábintsagaicái. Ocanti:

Pinguemisantiri piri aisati piniro. Aro pintimaque caninasati yaca quibatsica aisati cosamani pintimaque yaca.

Iroo caninataque cara inguemisanqueri iriri janequi. Aisati irooti cara irantiasiparitanê, iromisanqueri iriri. ⁴Yamai, sêrari casintari janequi, quero piguisasitaguetari ira pitomijegui, iroonti pogomeantêmari ora Irinibare Tosorintsi. Pingantasantiri inguemisantiri Atingomi.

Ati ingantima ibimantaga aisati iroborote.

⁵Obiroca ibimantaga, pinguemisantiri aisa pijâtsatiri pobatorote irironta pitingomi ira casintimi yaca quibatsica. Piniacobeingatiri. Aisa ocanta pintineri Quirisito antagaisati icogui, aisati pintineri pobatorote omagaro icogui iriro. ⁶Quero pamatobitiri, pintineri caninasati cara inetsimi aisati cara te iranetsemi. Pintarobacaatineri arota iraniacananatêmi. Pijâtsatiri aisati pinganquima cara piâtsatiri Quirisito. Pintineri Tosorintsi antagaisati ora icocaquimi. ⁷Aisonorinta pintineri Quirisito pinintirininta, te paniro pintineri sêrari. ⁸Pigôigui, pairoraca ora caninaro picanque, aro imêmiro Quirisito. Jemita obiro ibimantaga, jemita obiro iroborote, ingantocobentaiguêmi. ⁹Aisati obirojegui merataigari matsiguenga, pingantiri caninasati, pingâbintsaiqueri. Quero piguisaneitiri pigôtinta ainta Jonogaguetequê Atingomi. Iriro pasi Pitingomi aisati Itingomi ira pomeraro. Iniaiguiri omagaro matsiguenga iriatitati, obiro aisati pomeraro. Aisati picantobaga.

Ira quemisantatsiri icantari ibega soraro.

¹⁰Panibati nongomantaiguêmi, nopinguemisantacagane: pomaniri Atingomi cara irosintsisêretaiquemi pigeiri ingantiro Iriro. Cara pinguemisantasantiri, irooti irosintsiantaiguêmi Irironta sintsirisonoriguinte. ¹¹Pingantaiguêmaribega soraro Iromasati cara irobetsiquima cara iriatê imonanâtima arota quero yôgani. Irotsita iromatsaguîtêma. Aique iroquimaro igamisate coshotaquiro. Irisapatotêma. Irâquero oquibe ora iroticantobêmaro chocopi ogamataga. Iroquimaro coshori isampiriro. Aique irâque isabirite. Aisati pingantaiguêmaribega soraro, pabentaiguemari Tosorintsi, imaiguêmi omagaro ora popêgatanquimari camagari arota quero yamatobitaguetimi quero yagobeimi Satanás. Iriro itingomi camagaripague. ¹²Teni opêgatiimari matsiguenga, irianti ipêgataca ira te iraneingani. Ipêgasêretaiquemi arosonorini camagari: Satanás, aisati omagaro basinipague camagari. Ainta ira agâtachari, aisati ira itingomipague basini camagari, aisati ira cantaguetacagui matsiguenga ora te onganinate, aisati ira tsoengaguetacagui matsiguenga, antagaisati camagaripague. Igâtaiquiri antagaisati matsiguenga te inguemisantiri Tosorintsi. Iroonti icantaigui camagari ora te ongomeitêmate, ora quimingarosonorini, ora antagui matsiguenga ora te onganinate. Ira camagari iguisaiguêri Tosorintsi aisati iguisaigacái eiro eironta aguiataiguiri Quirisito. Inagueti ira camagari jonoquê aisati yaca quibatsica. ¹³Iroo ora pinguemisantaguêtaigueri Tosorintsi, pabentaiguemari. Pinintacagui iromitocoquemi. Imaiguêmi omagaro ora popêgatanquimari camagari. Iromitocotaiguêminti Tosorintsi aro pigabeiri cara ingogabequima camagari irantacaguimi ora te onganinate. Cara pitsonquero, pêrosati pinê paratinganê. ¹⁴Paratingaigue, pinguengero Irinibare Tosorintsi iroonti aisonori. Pinibate ora aisonori, aro popêgataca. Aroquenta piquemisantaiguêri Quirisito iniacananataiguêmi Tosorintsi. Pêrosati pingantiro ora caninaro. ¹⁵Cara pigôtasantaigui ora Nibarintsi Caninaro, quero pogasêretocotari Satanás. Aro pingogaigue pingomantaguetiri matsiguenga iragabisaicoqueri Quirisito cara inguemisanquerica iromagoriasêretagaiguanaqueri, intimacagui caninasati. ¹⁶Pinguemisantasantaiguanaqueri Quirisito, aro ingâbintsêmi arota quero icantêmatimi camagari, quero intaguetacaguimi ora te onganinate, aitinta tojai icoguini Satanás irantacaguimi. ¹⁷Aisati pabentaiguemari Tosorintsi, pigôtasantaigue aroque yogabisaicoquemi. Aro omitocotimi Isêre Tosorintsi cara pinibatanquimari camagari ora Irinibare Tosorintsi. Aro irisigabitsatanêmario itsoroguirotinta Irinibare Tosorintsi. ¹⁸Pomanopiantiri Tosorintsi cara ogometaguemi Isêre arota omitocotimi. Pomane cara pipêgatari aisati pomane cara tera popêgatiimari. Quero poperata. Pigamema pêrosati pomanocotaigueri antagaisati ira quemisantatsira. ¹⁹Aisati pomanocotaiguena naro arota quero notsorogui cara nanibatê, cara nongomantaguetiri matsiguenga catingsati, cara Tosorintsi inintasantaguiri icogui iragabisaicoaguêri omagaro quemisantiri Jesoquisito Itomi Tosorintsi cara icoque jiraisonoriguinte, ora te ogôtengani jirai. ²⁰Aroquenta nocomantêgotêri Quirisito yomingaiguêna naro iragâtane Quirisito. Nocoguini pomanocotaiguena arota caninasati nongomantaigueri matsiguenga ora Caninaro Nibarintsi cara icocaquina Tosorintsi.

²¹Nagâqueri Tíquico cara obirojeguiquê. Ingomantaigapêmi atiraca nacanta naro aisati pairoraca ora nanti. Iriro opiguemisantane aisati nanintane. Caninasati intineri Atingomi ora icogui Iriro. ²²Nagâtaiguêmiri ingomantêgotaigapêna naroequi canta. Aisati nocogui iraganinasêretaiquêmi. ²³Yamai, naguemisantacaganeegui, nocoguini

iromagoriasëretagaiguemi Pabati Tosorintsi aisati Atingomi Jesoquisito. Aisati nocoguini inguemisantantacagaiganaquemi obirojegui, aisati iromitocoquemi pinintasantaigueri popiguemisantane. ²⁴ Yamai, aroca pinintasantaiganaqueri Atingomi Jesoquisito ingábintsaiguemi.

Aro ocarati nasanguenataiguëmi. *Paboro*

PABORO ISANGUENAQUINERI JERIPOSATI

Paboro ibetsataigari ira Jeriposati.

¹ ¿Aintajeguibi nopiguemisantacagane canta Jeripoquë? Nasanguenataiguimini naro Paboro aisati Timoteo. Iriro aisa naro cantaca ibimantaga yasintina Jesus Ira Agabisaicoontatsiri. Nasanguenataiguimini obirojeguinta quemisantatsiri aisati ira omisantantatsi aisati ira omitocontatsi. ² Nocoguini përosati ingábintsaiguemi Pabati Tosorintsi aisati caninasati iromagoriasëretagaiguemi cara paneingomentoquë Iriro aisati Jesoquirisito Atingomi.

Icarasiaqueri ira Tosorintsi Paboro.

³⁻⁵ Cara naqueincotaiguëmi nacarasiaqueri Tosorintsi nacininasëretëgobentaiguëmi. Aisati namanocotaiguimi tojainta pomitocotaiguina cara nocomantëgotëri Jesoquirisito. Përosati pomitocotaiguina cara jirai piquemisantaiguëro ora Caninaro Nibarintsi irooti yamai. ⁶ Aroque yoganinasëretagaiguëmi Tosorintsi paneingomentoquë. Aisati nigótasanti Ira parintacaro Iriatisati tsonguëmirone irooti cara iribocapae Quirisito aisati ijita Jesus. ⁷ Caninataque naquengaiguimi negaca aroquenta nanintaiguimi pomitocotaiguinanta. Icabintsëna Tosorintsi aisati icábintsaiguëmi obiro. Iroro cara yomingaguëquina nocomantëgotëronta Caninaro Nibarintsi pomitocotaiguina te popasiquitaigue. Cara nocomantëgotëri Jesus nogometasantaguequeri matsiguenga pomitocotaiguëna aisati. ⁸ Igótina Tosorintsi cara nogasëretocoquimi nocoguininta naniajimi. Nanintaiguimi tojainta inintasantaguina Jesoquirisito. ⁹ Aitosati namanocotaiguimi cara aiquero pijáiguë pinintobaganëma aisati pinintanëri Tosorintsi aisati pigóguëro ora icogui arota përosati pingantaiguëro ora caninaro. ¹⁰ Namanocotaiguimi cara piniantaiguemaro pairorapagueraca arota pigóguero pingantaiguero ora caninaro. Aro piganinatiro paneingomento arota quero pipasiquiti cara iribocapae aisati Quirisito. ¹¹ Nocogasanti naro përosati pingantaiganaquero ora caninaro. Aro iromitocotaiguëmi Jesoquirisito piquemisantquerinta. Aique iranaiaguëmi matsiguenga, tojai iraniacandinatasantëri Tosorintsi.

Paboro itimobiqueri Quirisito.

¹² Nopiguemisantacagane, nongomantaiguëmiroto ora icanquina matsiguenga yaca pigótacaqueri tojai matsiguenga ora Nibarintsi Caninaro ¹³ aroquenta igóguë omagaro cara yomingabequina nocomantëgotirininta Quirisito. Aisati igóguëro antagaisati soraro irasi igobeingarite Iromasatijegui. ¹⁴ Yomianquina carari përosati nocomantëgotiri Jesoquirisito. Iroro isintsisëretagaütaiganaque tojai quemisantatsiri përosati aiquero icomantantaiganaquero Iriñibare Tosorintsi te intsoroguëmate.

¹⁵⁻¹⁷ Aintapague ira comantëgotëri Quirisito carari teni inguengena caninasati. Ijique irobaquena. Icogaigabitaca imomiritacaguina iratsipiriasëretagaiguena yaca iromingamentoquë. Aintasati basinipague caninasati icomantëgotaguëri Quirisito aroquenta inintaiguëna. Icogui iromitocotaiguena, igóguë yomianquena nocomantëgotitrota ora Nibarintsi Caninaro. ¹⁸ Jemita cara icomantememegarari quemisantatsiripague. Jemita caninasati icomantëgotaguëri Quirisito basini quemisantatsiri. Nacininatasanti yamai tojaini matsiguenga comantëgotëri Quirisito. Aitosati aiquero nanganinatanae përosati. ¹⁹ Nigóti cara pamanocotaiguina obiro, aisati naro omitocotina Isëre Jesoquirisito aisati ojita Isëre Caninaro Tosorintsi. Nigóti iragabisaicoquina Tosorintsi arota antagaisati matsiguenga iraniacandinataigueri aisati querota nacantagueti pairoraca ora te onganinate. ²⁰ Nocogasanti quero nipasiquitëmati, carari noguiaque nangantaiguëri matsiguenga caninasati iraniacandinataigueri Quirisito. Jirai nocomantëgotëri Quirisito naro catingasatiquë matsiguenga. Yamai jemita nantimeta, jemita nangameta. Patiro nocogui nanguemisantasantiri Quirisito përosati. ²¹ Aroca nantimobiqueri Quirisito, nongomantëgotanqueri Iriro përosati. Aroca nangamobiqueri, caninataque. Nanganinatanë nantimomiquerinta jonoquë. ²² Aroca nantimaque përosati, aro aiquero nanibatëgotaguequeri Quirisito, carari teni nogóte pairoraca nanganque. ²³ Aiti nocogui nantimaque. Aitisati nocogui nangamaque. Teni nogótasante pairoraca nanganque. Nocogasanti nangamaque arota najáte Jonogaguetequë. Caninataque nantimopëri Quirisito nanganinatasantanë. ²⁴ Aitosati nocogasanti nantimaque yaca quibtsaca arota nomitocotaiguemi obirojegu. Caninataquesati oca. ²⁵ Yamai najique përosati nantimaque obirojeguquë arota nomitocotaiguemi pinguemisantasantanëri Quirisito aisa pinganinasëretobitaiguëri. ²⁶ Aitosati nantimaque pinganinasëretaguë naronta boquënguistsine obirojeguquë aisati. Pinganinataiguë pingantocotaiguëri Quirisito: “Iriro caninarisonori. Yoguipigainari Paboro”.

Ora inganque Jeriposati.

²⁷ Përosati pinguemisantiro ora Nibarintsi Caninaro. Pingantaigue ora caninaro arota ira basini matsiguenga inguemisantaiguëri Quirisito. Aique jemita najáque obiroquë. Quero ca niáti naninti nanguemocotaiguëmi piquengaigaca përosati aisati pitarobacaatagui pinguemisantacaguiroi tojai matsiguenga ora Caninaro Nibarintsi. ²⁸ Quero pitsoroguri ira quisaneinquimine. Cara te pintsorogaiguëri, ironijagaiguëmari Tosorintsi cara itsibataiguëmi obiro aroquenta yogabisaicotajimi carari aisati ironijagaiguëri Tosorintsi ingasitigatëri ira quisaneinquimi icantaguetinta ora te onganinate. ²⁹ Pinguenguema. Obirojegui icoigaiguëmi Tosorintsi ipaiguëmiro cara pinguemisantaiguëri Quirisito aisati icoigaiguëmi cara pitsipiriobitaiguëri ³⁰ cara ipëgatsatagui matsiguenga catsimari aisa icanta ipëgatsataguëna naro jirai. Aisati piquemocotaiguëna itsipiriacaquinaro përosati irooti yamai.

2

Aisati pingantimari ibega Quirisito.

¹ Aroquenta icaninatagaimi Quirisito, aisa yoganasëretaimi aroquenta inintaiguimi, aroquenta ocantaiguëmi Isëre Tosorintsi piquenganeintaca, aroquenta ocanquemi picantaneintëgotobaca aisati, ² piganinataiguëna. Pinintobaganëma, pinguengaiganuima. ³ Quero pomichati. Quero piquenga obiati, carari pinguenguema ora aisonori. Aisati pinguëri caninasati basinegu ira quemisantatsiri. Piguibataiguëri. ⁴ Aisati pingábintseneri ora iraisati basini quemisantatsiri, cagarori pasiasi. ⁵ Pinguengaiguema aisati pinganguimari ibega Jesoquisito cara iquenga jirai. ⁶⁻⁸ Iriro Tosorintsi, carari cara jirai icanqueri: “Pabati, aroquenta anintasanotaguetiri matsiguengajegui pigáquinani iriroquë. Aro nojocanëro ora aisati nosiaquëmi pibega Obiro, aro nomatsiguengatanë arota nomitocotaigapëri irirojegui”.

Aro icanquero negaca. Iquemisantasanotëri Tosorintsi Iriri, imatsiguengatapë cara otosomaquëri iniro, icantari iromeraro matsiguengajegui. Iquemisanquëri Iriri irooti cara itsipiriaquero ora pasiguitagantsi cara icamaque corosiquë Iriro aisati icantacagabecari ibega óguëri. ⁹ Iriro ora yoganiataguëtajiri Tosorintsi yoguibatairi ira Quirisito yogairi aganguisonoriquë. Icanqueri Tosorintsi: “Obiro Itingomisonoriguente. Irinibacani-nataguëmita matsiguenga: ‘Obiro caninarisonori’”. ¹⁰ Iriro antagaisati irobaticageritomotagapëmi, antagaisati inatsi jonoquë, aisati iragui inatsi quibatsiquë, aisati omagaro inatsi osobiquë. ¹¹ Aisati antagaisati ingantocotaiguëmi: ‘Obiro Atingomisonori’”.

Irooti inganinatasantananëma Tosorintsi.

¹² Iriro ora, nanintane, nauenganeintaguëquimi piquemisantaiguënantaca cara natimaque obiroquë. Yamai teni nine naro obiroquë, carari përosati pinguemisantaiganaquëri Tosorintsi pingantaigue obirojegui ora icogui aroquenta yogabisaicoquëmi Tosorintsi. Pintsorogaigue querota picantaguetiro ora te onganinate Irirota cobeingari Tosorintsi. Piniacobeingatiri. ¹³ Iriro paiguëmiro cara pininti pingantiro ora icocaquëmi Iriro. ¹⁴ Quero pabenta, querootisa pipëgatsatari popiguemisantane, ¹⁵ arota quero icantocotaguetasitimi matsiguenga ira te inguemisantaigue, carari iraniacananatimi. Caninasati pingante aroquenta obiro ianiquitepague Tosorintsi. Pitümaiguë aganguisati matsiguenga ira cantagatsi ora te onganinate, patiro iquengaiguëro ora te ongemeite. Aisati picantari ibega osanguëguitatsiri tsitiniriquë, cara pingomantëgotiri Quirisito, pigótacaquëri matsiguenga cara icantagueti ora te onganinate. ¹⁶ Përosati pingomantaguëtaiguëri ora Nibarintsi caniatagantatsiri. Aique cara iribocapae Quirisito, poganinataiguëna tenta nongomantaigabitimiro Irinibare Tosorintsi. ¹⁷ Jirai ira joríojegui ipaiguëri Tosorintsi oisha tojai. Yógaiguëri ishëro iraraa. Aisati nacantari oisha yamai naraatanë cara iróquina nogometaiguëmironta Irinibare Tosorintsi. Nanganinatanë nigótinta aroque popaigacari Tosorintsi obirojegui cara piquemisantaiguëri. ¹⁸ Aisati obirojegui pinganinataigue cantaca cara nacininasëretanë naro.

Iragáqueri Timoteo Paboro.

¹⁹ Aroca iraninque Atingomi Jesus, naninti omanapague nagáquemiri Timoteo canta obirojeguiquë. Cara iripigaima ingomantëgotapaimi arota nanganinabentaiguëmi. ²⁰ Teni irine basini cantari ibega iriro. Paniro Timoteo icábintsaiguëmi obiro aisa nacanta cara nacábintsaiguëmi. ²¹ Ainta basinapague iquenganontaiga ora caninatomotiri iriro, carari te inguenguero ora icogui Jesoquisito. ²² Pigóguëri jirai Timoteo naniaquëri caninari cara itsibatëna imitocoquena cantaca notomisonori cara nocomantagueantiro Nibarintsi Caninaro. ²³ Noguiaque nagáquemiri cara nogóque pairoraca inganquina naro yaca iromingamentoquë. ²⁴ Noguiaquëri Atingomi Jesoquisito inganquëri Iromasati iromisotocajina arota najáque omanapague obiroquë naniaigaimi.

Icomantëgotëri Epajororito Paboro.

²⁵⁻²⁶ Yamai najique caninataque nagátajimiri aisati Epajororito opiguemisantane. Cani pigáquehari, tojai imitocoquena. Aisati itsibatëna cara nantineri Atingomi iroontita cara itsoingobëna matsiguenga catsimari ipëgatsatobëna. Aisati icantari soraro iquemisantiri itingomi iátsatiri, aisati Epajororito iquemisantiri Quirisito Atingomi iátsatiri tojai. Ico-gasanti iraniajimi. Piquemocotaiguëri ijanaitë yaca. Pogasëretocoigacari. Cara igóquero aisati yogasëretocotaiguëmi iriro. ²⁷ Aisonori ijanaitasantabica irorome ingame carari icantaneintëgotëri Tosorintsi yoguibegajiri. Aisati Tosorintsi icábintsëna naro querota icami Epajororito naroica querota nogasëretocotasantari. ²⁸ Yamai naninti nagátajimiri arota pinganinabentaigabajiri iriro. Aique nomagoriasëretanë naro yaca. ²⁹ Cara piniaigabajirica popiguemisantane pinganinabentaigabajiri, pingarasiatiri Tosorintsi cara yoguipigajimiri Epajororito. Irironta caninari iquemisantantiri Atingomi. Piniacananatobëri iriro aisati basini icantari iriro. ³⁰ Cara imitocoquena Epajororito pëmba-que ingamobiqueri Quirisito naroica. Icanquemiro imitocoquena tenta pinaigueni obirojegui yaca.

3

Pigamaiguemari ira cogatsi imegaigaimi jorio.

¹ Yamai, nopiguemisantacagane, pinganinabentaigueri Atingomi. Teni natsirisimaro oca nasanguenataiguëmica aroquenta omitocotaiguëmi. ² Pigamaiguemari ira cogatsi ingantacagaiguëmi ibega jorio. Yogomeanti quero yogabisaicotiri Tosorintsi ira te irito-tima. Itsoigani. Itotabeca iriro carari quero poganinatineri iraneingomento. ³ Aroca ototima eiro quero poganinatái aneingomentoquë. Quero ogabisaicota Orari Isëre Tosorintsi pogometajái cara antingomintaguëmari Jesoquisito, cara anguemisanqueri, aro iragabisaicotajái Tosorintsi, iraganinasëretáiro aneingomento. Aro anganinabentaiguëri Jesoquisito. Quero ogueiro cara iragabisaicotajái cara angante caninasati. ⁴ Arome abisaicoontimaro cara anganquero ora caninaro, querome yaretina naro basini matsiguenga. Nobataiguëri aroquenta tojai nacantabecaro naro. ⁵ Cara nogabisë 7 cataguteri itoitëna. Naro joriosonori. Naro ebereo imatsiguenga Isirael ira timanënguisti cara jirai. Aisati nomatsiguengatacari Benjamin itomi Isirael. Naquemisantantëro ora isanguenaque Moisés jirai naronta bariseo. ⁶ Aroquenta tojai nocoque nanguemisanqueri Tosorintsi, tojai nacatsimaque nocogabeca nógaiguerime ira quemisantaiguëri Quirisito. Jirai najique icantocotaquetasitari Tosorintsi cara yogometocotaiguëri Jesus Itomi Tosorintsi. ⁷ Jirai nacanta negaca. Najitabeca naro caninari, carari yamai nigóque omagaro ora nacanque jirai te omitocotina tenta oganinasëretina naneingomentoquë. Jirai nacantasitaro ora te omitocotina carari yamai naquemisanqueri Quirisito. Yamai nacanquero ora caninaro. ⁸ Naquianca yamai antagaisati ora najique jirai iroonti te ongomeite. Nobatabeca jirai cara najique aintaca caninari sërari, naro caninarisonori. Nigótinta yamai quero yogabisaicotajina Tosorintsi naronta joriosonori querootisati nacantabetaro ora caninari. Yamai patiro nocoguini nogótanëri Jesoquisito Natingomi. Naquianquero ora najique jirai aisa ocantaro pibega cajara. Nojocanëro. Nojocanëneri Quirisito arota naguiatasantiri aisa nogótasantiri ⁹ aisati irasintina. Cara naquemisanquero ora isanguenaque Moisés jirai, te oganinasëretina naneingomentoquë, carari yamai naquemisanqueri Quirisito, iniacaninatëna Tosorintsi aisati yoganinatinaro naneingomento. ¹⁰ Aisa ocanta yonianganquero Tosorintsi itasorintsite sintsirosonori cara yoganiatairi Itomi, nocoguini iritosongobentajina naro aisati arota iromitocotasantina nantimobiqueri. Aisa ocanta itsipiriobitaigacái Quirisito, nocoguini aisa nanganquimari Iriro natsipirique ibiaca Iriro cara nanguemisantacaguiri matsiguenga. Aisa ocanta icamobicái, nocoguini nangamobiquero omagaro ora nacantagueti te onganinate. Nocoguini nanganque antagaisati ora icogui Tosorintsi. ¹¹ Nocogasanti nogótiri Quirisito intimaque naneingomentoquë përosati. Nocogui ingabiriquina aisati nanganquimari ibega Quirisito icaniatanai.

Cara icomantëgotaa iriati Paboro.

¹² Terai nogótasantiri Quirisito carari nocogui nogótiri. Terai naretima nangantimari ibega Iriro, carari coshoni noguiatiri nanintini nanganque antagaisati ora icogui Tosorintsi. Iroro ora yogabisaicotaguërina Quirisito. ¹³ Nopiguemisantacagane, terajengari nangantimari ibega Iriro, carari teni nanguengairo ora nacanque cara jirai arota aiqhero najátanëtigue nogótasantanëri Quirisito. ¹⁴ Nantasantineri arota nogótasantiri. Icaimënani Tosorintsi canta Jonogaguitequë. Cara najáque canta narequimari Iriroquë aisati imënaro nanganquimari ibega Quirisito. ¹⁵ Obirojegui pameigaro piquenga omagaro aisa ocanta iquenguero Tosorintsi piquemisantaiguiri. Yamai pinguenguema iroro aisonori ora

nasanguenaquimi yamaica. Teca pinguenguema, ironijaaquemiro Tosorintsi ora catin-garo, ¹⁶ carari negaraca areca, intsome anguemisantanëro oca pogometáica Irinibare Tosorintsi.

Icogui Paboro angantimari eiro ibega iriro.

¹⁷ Nopiguemisantacagane, aisati pingantaiguena nibega naro. Aisati pinetsaigueri ira aguiataiguena arota piguiataiguena antagaisati obirojegui. Pinguemisantasantanëri Quirisito. ¹⁸⁻¹⁹ Jirai nocomantapinintaiguëmi ainta obirojeguiquë quisaneinqueri Quirisito. Aisati yamai niraicoquemì nacamanaaicotaiguëmi, tenta iraninte iriro ongomantëgotaiguëri Quirisito icamobicái cara corosiquë. Te intingomintimari Tosorintsi. Iroonti ininti ora ocogui ibatsa ora ijitosorintsitasita. Inibatëgotaiguero ora icanque, iroonti ora pasiguitagantsi. Iroonti iquengaigui ora inatsi yaca quibatsica. Iriáigüe Sharincabeniquë. ²⁰ Carari teni aisa angantaiguemari ibega irirojegui eironta ianiquite Tosorintsi. Ajáque aiqhero Jonogaguitequë cara Irirroquë. Yamai aguiaqueri iribocapae Atingomi cara iraguëpë cara Jonogaguitequë Ira Jesoquirisito Agabisaicoontatsiri. ²¹ Irro sintsirisonori inganque pairorapagueraca ora icogui cara itinaanaa icaniatanaí ipasiniatitanai ibatsaquë. Cara iribocapae aisati, imasiniatipáiro asiati obatsa cara ojanaitë ongamaque, aisati ongantajimaro pibega irasi ibatsa caninarosonori. Itasorintsitequë imasiniatipáiro, quero acamaji aisati.

4

¹ Iroro, nopiguemisantacagane, tojai nanintaiguimi, tojai nocogui naniaigaimi, tojai nacaninabentaiguimi, tojai nacaigábintaiguëmi. Përosati piguiataigueri Atingomi pinguemisantasantiri. Aisonori tojai nanintasantaiguimi. ² Yamai, Eboria aisati Sintique, namanocotaiguimi: “Quero piguisaneintobaga. Iromitocotimita Atingomi. Pinguengaigaima aroquenta piquemisanaqueri Irro”.

³ Yamai nagáquemi, nopiguemisantane, pomitocotaiguero ora pite tsinane onibatobagajimata aisati. Ora pite posintsisëretëna omitocoquena otsibataiguëna cara nocomantëgotëro ora Nibarintsi Caninaro jirai. Aisati omitocoqueri ira Quirimente aisa ira basini imitocotaiguëna. Aiti sanguenari canta Jonogaguitequë cara Tosorintsi isanguenatocoqueri iripajiroegui quemisantatsiri ira omitocoquena. Intiomotaiguëri jonoquë.

Pinganinabentaigueri Tosorintsi.

⁴ Obirojeguinta iraisati Atingomi, pinganinabentasantaigueri. Aisati nagatsitaimiro pinganinabentasantaigueri përosati. ⁵ Nocogui irogótcotaiguëmi antagaisati matsiguenga cara picábintsantasanti obirojegui quemisantatsiri Jeriposati. Yamai nasanguenataiguimi cara quero ocosamaniti cara iribocapae Atingomi. ⁶ Quero picantasëretaiqui obirojegui. Pomanocotiri Tosorintsi pairorapagueraca picogaigui pinguenguitsataigueri omagaro pingarasiataigueri aisati. ⁷ Aro iromagoriasëretaqueimi Tosorintsi. Carari te pairi ogótirone paio te pingantasëretobite. Carari cara pinguemisanaqueri Quirisito imaiguëmi cara pomagoriasëretanë, iroro omisantëmirone paneingomiento aisati ora piquenga. ⁸ Panibati, nopiguemisantacagane, nongomantaiguëmiro oca. Pinguengaiguero ora aisonori, quero pamatobianti. Pinguencotiri ira caninari. Piniacaninatiri pitingomipague. Pinguengaiguero ora catingaro. Pingantaguetiri caninasati ira basinipague. Piniantima pintime caninasati, quero picantaguetëmati ora te onganinate. Pinintobaguima, pomitocotobaguima. Pintaguetiro ora iquengaigaca matsiguengajegui ijiquero caninaro. Aitica caninaropague cantacha nega, pinguengaiguero, aitosati pinguengaiguero ora iniacaninati Tosorintsi. ⁹ Pingantiro omagaro ora nogometaguëmi, ora nocomantaiguëmi, ora piquemisantaigabaque. Pairoraca piniaiguë nantë naro, aro pintaiguero obirojegui aisati. Pinganqueroca negaca, aro iromagoriasëretaguëmi Tosorintsi paneingomientojeguiquë.

Ira Jeriposati tojai icábintsëri Paboro.

¹⁰ Jirai piquengasëretaguina pomitocoquina. Yamai tojai nacaninabentiri Atingomi cara nigóque picábintsagaina aisati. ¹¹ Aisonori picogaigabitaca pomitocotaiguena carari tiguëti ongantima iribocapë pomatsiguenga yaca. Te nongomantimi aitica pairoraca ora nocogui, teatisati nabentima yamai, aroquenta nigóque nacaninabentocotiro ora inatsira. ¹² Nametaro cara te ine noperi aisati nametaro cara pinasanti. Nigótanëro cara natimaque cara nitaseguë aisati nigótanëro cara natimaque cara te natasegue. Nigótanëro nacaninasëretanë cara aiti tojai, aisati cara aiti arosata. ¹³ Isintsisëretaquina Quirisito arota nantineri Tosorintsi antagaisati ora icocaquina naro. ¹⁴ Carari nacarasiaquemì obirojegui picantaneintëgotëna. Piquemocotaiguëna natsipirique, aro picábintsagaina. Caninasati picantaiguëro. ¹⁵ Cara jirai naquenguitsataigapëmiro cara piquemisantaigabaquero ora Caninaro Nibarintsi, pomitocotaigabaquena obirojegui cara nojocanëro Maseronia. Paniro obirojegui ira botoibiritari Quirisito Jeripoquë pomitocoiguëna. Teni irine basini.

Pigóiguëro oca. ¹⁶ Cara ninasegui Tesarónicaquë popagantënari quirequi. Aique basini popagantainari. ¹⁷ Te nomanimiri ira popagantaiguëna, carari cara popagantënari piguireguite nacaninabentaiguëmi nacarasiataiguëmi. Yamai nocogui aisati iromitocotimi obirojegui Tosorintsi. ¹⁸ Yamapënari Epajororito antagaisati ora popagantaiguëna. Caninataque ora picantaiguë. Aisonori popaiguëri Tosorintsi omagaro cara popaiguënari. Iniacaninatëro Tosorintsi icaninabentaiguëmi. Yamai nágobëro antagaisati, teni inae ora nocoque cani aitinta tojai. ¹⁹ Cara piquemisanqueri Jesoquisito, popaiguënarora nocoque. Aisati onganquima imaguëmiro Tosorintsi antagaisati ora picogaigui. Iriro casintaro omagaro caninaro. Iroro imasanotaguëquimiro tojai Irironta caninarisonori. ²⁰ Icaninatasanoti përosati Pabati Tosorintsi. Iroro ora intsome aniacaninatasantaguëqueri. Intsome antin-gomintasanotaiguemari. Aroque.

Itsonquero Paboro ora isanguenaquineri Jeriposati.

²¹ Pobetsataiguenari canta antagaisati ira quemisantaiguiri Jesoquisito. Icaegui quemisantatsiri naroiça ibetsataiguimi obirojegui canta. ²² Ibetsataiguimi antagaisati ira quemisantatsi ibangoquë Sésar ira igobeingarite Iromasatijegui. Aisati omagaro basini quemisantatsiri yaca Iromaquëça ibetsataiguëmi. ²³ Nocoguini ingábintsasëretaiquemi Atin-gomi Jesoquisito.

Aro ocarati ora nasanguenaquemi. *Paboro*

PABORO ISANGUENAQUINERI COROSASATI

Paboro ibetsataigari Corosasati.

¹ ¿Aintajeguibi, Corosasati? Nasanguenataiguimini naro Paboro. Naro iragátane Jesoquirisito, naquenguitsatocotirini. Iroro icocaquina Tosorintsi. Nacaraqueri yaca ira Timoteo opiguemisantane. ² Nasanguenataiguëmiro antagaisati quemisantaiguëri Tosorintsi cara Corosaquë. Piquemisanquerinta Quirisito, obiroyegui nopiguemisantane. Nocoguini aiqhero ingábintsaiguemi Pabati Tosorintsi aisati iromagoriasëretagaiganaquemi cara intimacagaiguëmi caninasati.

Paboro icarasiatocobintiri Corosasati.

³ Përosati namanocotopiantiri Tosorintsi iromitocoiguemi; aisati nacarasiatopiantiri Tosorintsi, Iriri Atingomi Jesoquirisito. Obiroyegui nacarasiatocobintimi. ⁴ Tojai naquemocotaiguëmi cara piquemisantasanotaiguëri Jesoquirisito Atingomi, aisati pinintasantagaiguëri opiguemisananepague. ⁵ Jirai piquemaquero Nibarintsi Caninaro, aroca pinguemisanqueri Jesoquirisito, aro iragabisaicoquemi. Aisonori piquemisantobëro. Yamai pigóiguë iromoncaraquero Tosorintsi omagaro Irinibare, pigueiri Atingomi cara iráganëmi canta Jonogaguitequë. ⁶ Irootisati Nibarintsi piquemisantaigabaquero obiroyegui, yamai ojátagueque omagarojeguiquë matsiguenga. Cara piquemisantobëro pigóquero aisonori icábintsaiguëmi Tosorintsi ipasiniatitaiguëmi. Aisa ocanta iquemisantaigabaquero basiniati matsiguenga, aisati ipasiniatitaiganaque. ⁷ Caninasati icomantaiguëmiro jirai Epájaras. Iroro icantina nibega naroequi, përosati icanquineri Quirisito. Caninasati icanquineri, icomantëgotëri cara nococaqueri naro. ⁸ Ipoque, icomantaigapëna cara piquemisantaiguëro Isëre Tosorintsi pinintasantagaiguëri popiguemisantaneegu.

Yamanocotaiguëri Corosasati Paboro.

⁹ Iroro cara naquemocotaiguëmi piquemisanti, noparintaigaca namanocotaiguëmi. Përosati namaniri Tosorintsi: “Pomitocoiguëri Corosasati. Pigótacaguiri omagaro pingocaguëri. Pomeri Pisëre ogótacaguiri ati picanta Obiroyegui aisati pogometasantiri ati onganima iraguiatiguëri Jesoquirisito”. ¹⁰ Aisati namanocotaiguëmi cara iromitocoquemi pintimaiguë caninasati arota inganinabentaiguëmi Atingomi, cara pingantaguetineri ora caninaripague. Aisati namanocotaiguëmi cara iromitocotimi aiqhero pijátanëtigue pigótasantanëri Tosorintsi. ¹¹ Aisati namanocotaiguëmi irosintsitaiguëmi pingantaguetiroyegui pairorapagueraca caninari; ingantacaquimiro Irironta sintsirisonorigunte aisati canirisonori. Pingantiro antsinsisati, quero pitsirisharo, pabetiro ora comëtaro, pinganinabentiro. ¹² Aisati namanocotopiantëri iromitocotimi pingarasiatiri Pabati Tosorintsi aroquenta tojai icantocobentaigacái. Yoganinasëretái arota ajátague canta imaáiro ora icasijacái. Canta antsibataigapëmari antagaisati quemisantatsiri cara pini cataguetirisonori.

Paboro iquenguitsatocokeri Jesoquirisito.

¹³ Jiraini atimabeta cara otsitiniguëtasanti, atingomintabetari Satanás aisati igamagaritapague. Yasintabetái Satanás carari yogabisaicotajái Tosorintsi, yamai yasincái Itomi Ira inintasanoti. Yamai atingomintasantari Atingomi Jesoquirisito. ¹⁴ Icamobicái, ipënantajáiro ora acantaguetomotiri Tosorintsi, iroro ijocobentaguetájáiro, yogabisaicotajái. Icábintsanocái, yamai quero iquengairo Tosorintsi ora acantagueti te onganinate.

¹⁵ Te iraneingani Tosorintsi, carari ipoque Jesoquirisito Itomi, icantasanotacari, yonigacáiri ati icanta Iriri. Jiraisonorigunte Quirisito obaqueti itimanë Irianti, teraiqueri ine pairoraca. ¹⁶ Iroro obetsiquëro omagaro: Jonogaguëte aisati Jonogaguëtesati, quibatsi aisati quibatsisati, iraequi aniaiguë, aisati iraequi te iraneingani, antagaisati. Aro yobetsicaiguëri omagaro te iraneingani: ira agátachari, obatacagantatsiri, itingomipague, omagaro yobetsiquëri Quirisito. Te irobetsicasitimari, iroonti yobetsicanontaigari Iriati irasintasantimari, irobotasantiri. ¹⁷ Irinagaque inë jiraisonori Quirisito ibatasantaguequero omagaroypague ora yobetsiquë. Igáantiro antagaisati, përosa ocanta; quero ca itasongobentiro, omagaro quero pinái. ¹⁸ Aquianca eiro aguitoquë. Ora aquianca agáantimaro omagaro ora anganque obacoquë, aguitiquë, obatsaque, omagaro. Aguito iroonti otingomi obatsa igáantaro omagaro. Aisa icanta Quirisito cantaca iguito antagaisati quemisantatsiri, igáantaigacái Irianti Atingomi. Icamobicái, icaniatanai. Iroro obataiguëri omagaro basini cabiritajachane. Itimaji Iroro, aro itimacagajiri iraequi quemisantiri, igáantiri omagaro Irianti Itingomi antagaisati. Ibasanotaiguëri, ¹⁹ itasorintsisanoti Irirosonorinta Tosorintsi. Iroro icocaqueri Iriri, icaninabenqueri Itomi. ²⁰ Jirai aguisaigabitari Tosorintsi,

ipëgatabitari eiro. Aique icamobicái Quirisito cara corosiquë yaparaabiricáiro iraraa. Yoganinasëretacái, aro yamai ágacanimatobaca eiro aisati Tosorintsi. Aisati cara icamaque Quirisito, yobetsiquëneri omagaro quibatsisati aisati Jonogaguitesati arota iraniacani-nataigabaqueri Tosorintsi.

Paboro iquenguitsatocoqueri Corosasati.

²¹ Jirai te pigóigueri Tosorintsi, te pinguengasëretaiquemari, piguisaigabitari. Iroonti piquengaiguëro ora te ongemeite, picantaguetiro. ²² Carari imatsiguengatapë Quirisito, icamobitaiguëmi, piquemisantaiguëri, aro yoganinasëretaiquëmi. Yamai Tosorintsi aisati obirojegui págacanimatobaca. Yamai imagoriasëretagaiguëmi Tosorintsi. Yamai iniacani-nataiguëmi aisa ocanta te pingantaguetëmate pairoraca quimingo. Yamai quero iquenguëtaimiro ora picantaguetabeca jirai. Ijitaiguëmi iraisati. ²³ Carari icocaquemi përosati ai quero pijátanëtigue pinguemisantasantaiganaqueri. Përosati piguiaqueri Atingomi irooti cara iripigapaima. Pigóiguë cara pibiraanaca Irinibare Tosorintsi omagaroguitequë matsiguengapaguequë. Ocomantagueri ati ocanta iragabisaicotaiguëri Quirisito cara inguemisanqueri. Aisa naro nibiraquero Irinibare aisa icanta tojai basini otsatengantiro. Obiro icomantaiguëmi Epájaras. Yamai pigótiri Tosorintsi, pigóiguë yogabisaicoquemi. Quero poperabentaro yamai, quero pomaguisantiro.

Paboro yogomequeri ora te ogótingani jirai.

²⁴ Tojai itsipirisanotë Quirisito ora iragabisaicoontëmari antagaisati quemisantaiguërine. Yamai aisati nosigari Quirisito, natsipiriobitaiguëmi cara nanguemisantasantacaquemi, aro nacanimatanë. ²⁵ Icanquena Tosorintsi: "Pomitocotaigueri omagaro popiguemisantane; pogometasantaigueri Nanibare". ²⁶ Aro yamai nogometaiquëmiro ora te ogótingani jirai. Yamai Tosorintsi igótacagaiguëri omagaro quemisantsiri. ²⁷ Icoqui Tosorintsi pigóiguero ora icantaiguëmi yamai; iroo caninarosonori nibarintsi. Cagaribi obirojegui jorio, carari coshoni yogasantaiguëmi Quirisito, yoguëmiro Isëre pasiquë pisëre. Yamai pigóiguë obiro irasi, aisati Iriro pasiegui, iráganëmi Jonogaguitequë pintiometaiquëri përosati. ²⁸ Nocomantëgotaiguëri Quirisito, aisati nogometaiquëri matsiguenga: "Pijoquero ora picantagueti te onganante, coshoni piguiatiri Quirisito, ai quero pijátanëtigue pinguemisantanëri". Nocogasantiri irogótasantiri Atingomi antagaisati nopiguemisantane. ²⁹ Iroo nopomiribirica nacantasantotëneri Quirisito yosintsitënantita songobenquinanta.

2

¹ Nocogui pigóigue cara përosati nopomiribintaiguëmi. Tojai namanocotaiguëmi, nacantopiantiri Tosorintsi iromitocotimi obirojegui Corosasati aisati piguemisantane cara Iraoriseaquë aisati omagaro basini quemisantsiri te iraneina. ² Nacantasantotëneri Atingomi arota pinganinasëretanë aisati pinintasantobaguima. Aisati nocogui pisëretimari Tosorintsi, aisati cara inomotasantimi ora pigóontimaro ora icocaquemi. Aisati nocogui irogótasantacaguimiri Ira jirai te irogótingani, Irianti Quirisito. ³ Igótasantiro omagaro Iriro, igóontasantaro antagaisati. Aiqueroti aiqueroti ironijaquero cara piguiatanëri.

Pigamemari matobiantatsiri.

⁴ Pigamema iromatobiquimica, irinibaantëmiro caninatsaro irinibare. Iroo nocomantëgotaguëqueri Quirisito caninarisonoriguente. ⁵ Aintana naro yaca, tesonori nantsibataiguemi canta, carari tojai naquengasëretëgotëmi. Nobesëreobiquemi cara caninasati pitimaigui aisati piquemisantasantanëri Quirisito. ⁶ ¿Teco jirai pisëretanacari Atingomi Jesoquisito, piquemisantatari? Aroque yogabisaicotajimi. Yamai përosati pisëretanëmari antagaisati cataguiteri, pinguemisantanëri, coshoni piguiatiri. ⁷ Nosiacagantëmiro panguirintsi; iroronta opari iaguero aisati iroo sintsitacaguero. Aisati picantaro obiro piguëshoniquimari Quirisito, aro irogótacaquemi aisati irisintsitacaquemi. Përosati pinguemisantasantiri, cara yogometaiquëmi jirai. Aisati pingantima përosati pingarasitasantatigueri Tosorintsi aroquenta icábintsasanoiguëmi.

⁸ Arotasha pine: quero piquemisantiri ira cogabitacha iromatobitaiguemi. Iroonti irogometaiquëmi omagaro iquengasëretagueta iriro, aisati ora igótagueta. Iroonti tsoigagantsi, iroonti irogomeantane matsiguenga jirai te irogóigueri Tosorintsi. Ira ogometasitimiro teni iraninte pinguemisantiro ora yogometaiquëmi Quirisito. ⁹ Cara imatsiguengatapë Quirisito icampái eiro cara pini obatsa. Aisati itasorintsitasanoti Irirota Tosorintsi. Iroo yoniagaguëcái, ati icanta Iriri. ¹⁰ Aroquenta poguëshonicari Quirisito, yoguëmiro Isëre pasiquë pisëre, itasongobentaiguëmi obironta irasi. Iriro Itingomisonori omagaro inaigatsi, ibatasantotaiguëri antagaisati agátachari, obatacagantatsiri, itingomipague, antagaisatipague. ¹¹ Yametaiga joriojegui itota ora icantabeca imatsiguenga Abaram. Aisa ocantabeta yamai cara pitoquimame, carari te omitocotimi. Carari yamai ijocaquero

Quirisito ora picantagueti jirai cagaro caninatatsi. Yamai te ongogue angantaguetopi-antairo ora te onganinate aroquenta ipasiniatitaigaái Quirisito. ¹² Cara pobaotisaibiritagacari, aisa ocanta pitsibatari Jesus cara icamaque itiaa icabiritanaa. Iniaiguêmi Tosorintsi aisa ocanta picamaque obiuro, pitiaca, picabiritanaa. Obiurora irasi Quirisito te pingantaguetopiantairo te ongomeite cantaca jirai; aisa ocanta picamobiquero ora quimingaro. Cara icaniatanai Quirisito, aisa ocanta picaniatanai aisati. Yamai pinasitaigaa, piquenguirinta Tosorintsi Ira tinaajiri Quirisito. ¹³ Jirai cantaigaquibi picamaqueni te pinguengaugueri Tosorintsi, tenta pinguemisantaiguerei, teatisati pitotima, carari picantaguetagabitaro pairoraca te ongomeite. Yamai icábintsaiquêmi Tosorintsi cara popabacari Quirisito, itimacagajimi cara aisa ocanta itimacagajiri Itomi, ijocajimiro picantaguetiro quimingari. Yamai te pinintaigüe pingantaguetajiro pigóiguênta pintiomoqueri Tosorintsi Jonogaguetequê. ¹⁴ Jirai opomiribintabituro isanguenare Moisés abisaicoontmarome, carari te omoncaratiro eiro. Pigótacagaigacái ainiro acantagueti ajáqueme Sharincabeniquê. Iro cantênguicha icamobitaigaái Quirisito cara corosiquê, ora yogabisaicoontaái. Imoncaratobicáiro isanguenare Moisés. Yamai quero opomiribintaaro. ¹⁵ Cara icamaque Quirisito icabiritanaa, yagobiaiguêri omagaro agátachari aisati obatacagantatsiri irianti camagaripague. Igótacagaigacái cara quero inintacaguiri camagari yagobiaái; imetocobintacái Quirisito.

Quero piquenguiro yogometaguetabetimi matsiguenga.

¹⁶ Te onganinate cara inguisabiritimiro matsiguenga ora papi aisati ora póga. Aiti cataguteripague imoncaratiro jorío, aisati ora imagorianta aisati cara irishongapaima manchacori irirai aisati osarini. Icoabeca pingantaiguero irootisati icanque iriro. Quero pomoncaratiro obiuro, quero piquemisantiri cara inguisabiritimiro. ¹⁷ Jirai tojai yametaiguetaiga jorío, iquengantari Tosorintsi. Carari yamai aroque yareca Quirisito. Irianti Irirosori, Itingomi antagaisati. Moncaraca yamai. Quero ogatsitairo ora yametaigabitara jorío. ¹⁸ Pigamema. Quero pinintacaguiri yamatobitimi. Jemita iritsoengumica. Ingantaiguêmi: “Pingantina nibega nro. Teni nongomeite. Intsome antingomintimari irisaanganetsite Tosorintsi, aro iragabisaicocái. Yoniaguêna, naniaqueri ira te iraneingani. ¿Pinaiqueri obiuro?” Aro yoguibatabitaca. Quero piquemisantiri. Itsoigani. ¹⁹ Te inguengueri Ira obatasnotacái, Atingomi Jesoquirisito. Te iraninte irogótiri. Carari eiro aguengasêretari Quirisito, igótacaganacái, imitococái, coshoni ogobaga, acantasantineri Tosorintsi ora icocacái.

²⁰ Icamaque Quirisito. Yamai iniaiguêmi Tosorintsi aisa picanta pitsibatari Quirisito cara corosiquê. Iniaiguêmi aisa picanta picamaque obiuro aisati. ¿Yamai paio pitsipiriobitasitaro picantasitabecaro ora icanquemi matsiguengapague queronta pogabisaicotimi? ²¹ Icantabequimi: “Aroca picogui pigabisaicotima, quero potsagatiro oca, quero paaguiri ira ibatsa, quero pintiri”. ²² ¿Teco ingantassitamaro matsiguenga cara yogometasitaiguêmiro negaca? Pinetse ¿Teco asi oguero opapinintaiguero operi? Aroca opêro, aroque, te ongantematiro asêre. ²³ Aroca irititêma matsiguenga, ijitabeca igóti, ijitabeca iquemisantasantini, ijitabeca te irobatima, ijitabeca icantasantineri Tosorintsi. Carari itsipriasita cara itica. Cara irititima, pêrosati ingoguiro ingantaguetiro cagaro caninatatsi, aisati pêrosati yoguibata.

3

“Caninasati pintimaigüe”, icanque Paboro.

¹ Jirai te pigóiguerei Tosorintsi, aiqero pijátaiguême Sharincabeniquê. Carari ipoque Quirisito icamobitaiguêmi, icaniatanai, iáque jonoquê isobigopê ibacosonoriquê Tosorintsi. Piquemisantineri, yogabisaicoquemi; aroquenta itimaaji Iriro, itimacagajimi obiuro aisati. Yamai quero piáti Sharincabeniquê, pijáiguê aiqero jonoquê. Pingogasantiro pingaque ora icogui Atingomi aisati pingantaiguemari ibega Iriro. ² Pinguengasêretima atiraca pingantima canta Jonogaguetequê; quero pinguengasêretapinintiro atiraca picanta yaca quibatsica. ³ Cara piquemisantineri aisa popabacari Quirisito Ira camobiquimi, aisa ocanta picamobiquero obiuro ora pameta jirai te ongomeite. Yamai quero piquengairo ora inatsi yaca quibatsica, quero picantaja pibega jirai. Yoganiasêretagaimi Tosorintsi, aro pitsibatantimari pintiomoaguêri Jonogaguetequê. ⁴ Aiquenta iripigapaima Quirisito yaca quibatsica, Ira aganiataái. Iragántapêro omagaro, aisati pitsibatantaiguêmi obiuro aisati pingantiquimari ibega Iriro.

“Quero pogatsitairo ora picantaguetabeca jirai te onganinate”.

⁵ Yamai obiurojgui irasi Quirisito, picamobiquero quimingari. Aro quero pogatsitairo ora picantaguetabeca jirai te onganinate. Sêrari, quero pintiro tsinane cagaro pijina. Tsinane, quero pintiri cagari pijime. Quero pomaguimpiani. Quero pinebetaro

tsinanepague; quero pinebetari sêrariapague. Quero pinebetague taro ora yasintagueta. Ora pinebetague taro, picantacacaro pitosorintsite; cagari Tosorintsi, irianti pobabane. ⁶ Tojai ocapague icantagueta matsiguengajegui te inguemisantiri Tosorintsi. Iroro inguisaguêquimari Tosorintsi yamai aisati caraquenta. ⁷ Jirai picantagueta betaro obirojegui, pasi poguiro. ⁸ Yamai pijocaiguro omagaro cantacha nega: quero piguisêntobaga, quero pitsimajengatobaga omanapague, quero picatsimanijintobaga, quero picabegobaga, quero pinibati quimingari. ⁹ Quero pamatobitobaga. ¿Teco yamai pomasiniatitajima? Quero pogatsitairo ora picantaigabita jirai. ¹⁰ Carari ipasiniatitasantêmi Tosorintsi, aisati yamai aiqero iraganinataiganaquemi Tosorintsi, irogôtacaquemi ora iquianca Iroro. Aisati aiqero pingantaiganaquimari ibega Iroro cara yobetsicanêmi jirai. ¹¹ Teni inguenguero Tosorintsi atraca acantaiga: jemita eiroca jorío, teca jemita; aroca otota, teca jemita. Te inguenguero atraca opaniaca, pairoraca igóiguê eiro. Jemita obimantagaca, jemita teca imimantêtai. Iroonti iquianque aquemisantirica Quirisito.

Ati icantaiga quemisantatsiri.

¹² Pinetse, icoigaiguêmi Tosorintsi iraisati. Inintasantaiguêmi aisati icogui piginatatananêma. Icocaquemi pasi poguiro pingábintsante aisati pingantaneintêgotante. Quero poguibata, quero pipêgatsatari matsiguenga ira quisêmine, pinibatiri caninasati, antsinisati pingantiri. ¹³ Pomitocotobaguima. Quero pipêgatari ira cantêmi ora te onganinate, carari pingábintseri. Pijocajineri, quero piquengairo ora icanquemi, aisa ocaita ijocajimiro Atingomi ora picantagueto moqueri quero iquengaimiro. Pingantimari ibega Iroro. ¹⁴ Panibati yamai: pinintasanotobaganêma antagaisati quemisantatsiri. Aroca pinintobaganêma, aro pinguengasêretobaguima, aiqero piginatatananêma, aiqero pingantaiguêmaro Atingomi. ¹⁵ Nocogui pinganinabentiri Quirisito Irironta paniro Atingomi. Pigóiguê icoigaiguêmi pinguengasêretiri Iroro aisati pomagoriasêretaique aisati coshoni pogobaguima. Aisati icogui pêrosati pingarasiatopiantaiguero Tosorintsi. ¹⁶ Pêrosati pinguengasêretiro ora yogomeque Quirisito. Cara igôtacaquemi, aro pogometobaganêma caninasati, piganinasêretobaganêma. Pingântaigueneri Tosorintsi Irinibare, pingântabentiri, pingântatêgotiri cara icábintsasantaiguêmintata Quirisito aitosati pingarasiasêretiri Tosorintsi. ¹⁷ Te ongogaigue iripasiguitaigái Atingomi Jesus. Aro pairoraca pinibati, pinibatiro arota inganinanê Iroro. Pairoraca pinganque, pingantineri Iroro. Icogui irisintsisêretimi piganinatiro omagaro ora pinganque. Aisati pingarasiatiri Pabati Tosorintsi.

Ati angantiri omatsiguenga.

¹⁸ Tsinane, pinguemisantiri pijime. Iroro icocaquemi Atingomi. ¹⁹ Sêrari, pinintasantiro pijina, quero piguisaneintiro. ²⁰ Janequi, pinguemisantiri asintaiguimi, pairoraca inganquemi irironta oganinatiri Atingomi. ²¹ Aintaca pitomipague, quero piguisasitagueteri arota quero itsirisimi. ²² Obiroca ibimantaga, pinguemisantantiri ira mananquemi, pairoraca inganquemi. Quero pamatobitiri; quero ca inetsimi, caninasati pingantineri, quero poperata. Aroca pitingomintari Atingomi, aro pisintsibentineri pobatorote ira pintine. ²³ Pairoraca pinganquineri, pisintsibentineri aisa onganquima pisintsibenquineri Atingomi, cagari paniro pobatorote. ²⁴ Aroque pigóiguê pairoraca pinganquineri Atingomi Jesoquisito, aiqenta imêmiro caninaro, iraganinataiguêmi canta Jonogaguetequenta, ingantocobentaiguêmi. ²⁵ Irianti ira cantapinintiro te onganinate, iratsipirique aintanta ira casitgâtêrine, jemita ibimantaga, aisati jemita latorote.

4

Pêrosati pomanocotiri Tosorintsi.

¹ Aintaca matsiguenga pomananane, caninasati pinebetsiquiri, pingábintseri. Nogôtacaquimi aintasati Pitingomi cara Jonogaguetequê, igóque antagaisati picantagueta. ² Pêrosa pingantaiguema pomanocotaigapinintiri Tosorintsi, pomanocotima obiati, pomanocotiri pomatsiguenga. Aisati pingarasiatopiantiri Tosorintsi icábintsiguêmintata. ³ Pigóiguê cara yomianquina aroquenta nocomantaguequeri matsiguengajegui atraca ongantima iragabisaicoqueri Quirisito. Yamai nocogui pomanocotina narogui aitosati, arota iromitocotina Tosorintsi nanguenguitsatocoqueri Atingomi yaca iromingamentoquê. ⁴ Pomanocotina arota notsatenguineri nongomantêgotiri Quirisito catingasati arota inguemasantobêro matsiguenga. ⁵ Aisati obirojegui, cara pitsibataigari ira te inguemisante, pintime caninasati, aro iraniaquemi, irogóiguê caninari Atingomi. Aisati caninasati pogometagueteri, quero poperataro. ⁶ Cara pinibataguequeri, pingábintseri. Quero paseriguiri. Aroca irosomiquimi pairoraca, caninasati potabitiri ingogantanêma iroro inguemisante.

Isanguenatocoqueri Tíquico.

⁷ Yamai nagátaiguëmiri Tíquico, opiguemisantane. Icanquineri Atingomi omagaro ipëri inganquineri. Imitocoquena cara naquenguitsatocoqueri Atingomi. Ingomantaigapëmi ati nacanta naro yaca. ⁸ Iroso nagábiriqერი, ingomantëgotai gapëna, aisati iraganinataigapëmi obirojegui. ⁹ Intsibatanëmari pomatsiguenga ira Onésimo. Nanintasantiri. Iriatisati iriro opiguemisantane, icanquineri Atingomi pairoraca icogui. Aro ingaraque pite comantapëmine omagaro nacantaiguë yaca.

Ibetsataigacari Corosasati.

¹⁰ Aintasati natsibatacari yaca yomianqueri Arisitárico, ibetsataiguëmi. Aisati ibetsataiguëmi Maricos, ira ireintitsari Berinabé. Aroque piquemocoqueri Maricos; aroca irarequimi, págacananatobëri caninasati. ¹¹ Aintasati yaca Jesus, aitosati ijita Jósito, ibetsataiguëmi. Icaegui maba irianti jorío, icarataiguina cara nocomantaguetiri matsiguenga ati ocanta iragáantane Tosorintsi. Tojai yoganinasëretai guëna. ¹² Aisati ibetsataiguëmi Epájaras pomatsiguenga. Icanquineri Quirisito antagaisati ora icocaqueri. Tojai yamanocotaiguimi iromitocotimi Tosorintsi, irisintsisëretimi pingantaigueneri omagaro ora icogui Irroso. ¹³ Nocomantëgotëri Epájaras: aisonori tojai ipomiribintaiguimi obiro, aisati ipomiribintaiguëri ira Iraoriseasati aisati ira Iyeráporisati. ¹⁴ Aisati ibetsataiguëmi Irocas jompiantatsiri, ira nanintasanti. Aisati Témas ibetsataiguëmi.

¹⁵ Nobetsataigari omagaro opiguemisantane cara Iraoriseaquë; aisati nobetsataro ora Nimpas aisati antagaisati quemisantatsiri ira bototaigacha cara obangoquë. ¹⁶ Oca nasanguenareca pinibataigueneri omagaro quemisantatsiri obirojeguiquë. Aique pigaganëro cara Iraoriseasati quë quemisantatsi; irinibataigabaquero irroso aisati. Aiti basini sanguenari ora imagantëmi irroso; pinibatobëro obirojegui. ¹⁷ Pingantiri Ariquipo: “Pingantantiro ora ipëmi pingantineri Atingomi”.

¹⁸ Yamai oca nasanguenatica naati nobetsatanquemiro. Aintana naro yaca. Quero popeicotina cara yomianquina yaca cara iromingamentoquë. Nocogui ingábintsai guemi Tosorintsi.

Aro ocarati ora nasanguenataiguëmi. *Paboro*

YOGUIBATË PABORO ISANGUENAQUINERI TESARONICASATI

Paboro ibetsataigari Tesarónicasati.

¹ ¿Aintajeguibi nopiguemisantacagane obiro botoibiritari Quirisito cara poeboroquë jítacha Tesarónica? Naro Paboro aisati itsibatina Timoteo aisa Siribano (iriatí Siras) nasanguenataiguimi obirojegui iraisati Tosorintsi. Iriro Pabati aisa Atingomi Jesoquirisito. ² Nocoguini përosati ingábintsauiguemi Iriro, aisati iromagoriasëretagaiguemi cara paneingomentoquë.

Tojai iquemisanti Tesarónicasati.

Përosati nacarasiataiguiri Tosorintsi aroquenta picantaiguero obiro ora caninaro. Aisati përosati namanocotiri ³ Pabati Tosorintsi naquengaiguimi pintaiguineri Tosorintsi aroquenta piquemisanqueri. Aisati naquengaiguimi cara pomitocotaiguëri basinipague matsiguenga pomagobiriqueri aroquenta pinintaigueri ira Tosorintsi aisa pinintobaca. Përosati cara pogueiri Atingomi Jesoquirisito cara iripigaima. ⁴ Nopiguemisantacagane, nigóigui inintaiguëmini Tosorintsi aisati nigóigui icoigaiguëmi icasiriconiatiguëmi obironta iraisati. ⁵ Jirai cara nocomantaigapëmiro Caninaro Nibarintsi, te nanibatasitimaro. Nigóiguë ora Caninaro Isère Tosorintsi ogótacagaiguëmi aisonori ora nocomantaiguëmi. Aisati pigóigui obirojegui atiraca nacantaiga cara noniagaiguëmiro Irinibare Tosorintsi. ⁶ Págasëretagaibaquero ora nocomantaigapëmi. Aro posigaiguëna obirojegui ora nacantaiguë naroeugu aisati posigaigacari Atingomi cara itsipiriacaiguëmi matsiguenga. Carari ora Caninaro Isère Tosorintsi poganinataiguëmi cara pitsipiriaguë. ⁷ Cara iquemocotaiguëmi obiro quemisantatsiri cara Maseroniaquë aisati cara Acayaquë igóiguë caninataque aisati ingantaiguëna pibegaiga obiro. ⁸ Aisonori pogabisobacaro ora Nibarintsi ora ipacái Atingomi. Te paniro inguemocotaiguemi Maseroniasati aisati Acayasati carari igótocotaguequemi tojai basinipague matsiguenga cara piquemisantaiguiri Tosorintsi. Yamai teni nanibatëgotaiguemi aroquenta igótocotaiguëmi ⁹ aisati icomantëgotaiguëmi cara págacananataigabaquena. Igóigui cara pijocaiguëri pobabaneegui cagari Tosorintsi, yamaicari piquemisantaiguiri Tosorintsiisonori Iriro caninari aisati poguiaiguëri Iriro. ¹⁰ Aisati icomantëgotaiguëmi cara përosati poguiaqueri Jesos Itomi Tosorintsi irooti cara iribocapae cara Jonogaguëtequë. Icamaque Iriro aique icabiritajiri Tosorintsi yoganiatairi, aique yogainocanaa carari aique iripigaima. Iragabisaicocái cara iratsipiriacaiguëri Tosorintsi irageui te inguemisante.

2

Ora icanque Paboro Tesarónicaquë.

¹ Yamai pigóiguë, nopiguemisantacagane, teni najátasitima jirai cara naniaiguëntimi. ² Pigóiguë iguisaigabaquina canta Jeripoquë itsipiriacaquenaro ora pasiguitagantsi. Cara obirojeguiquë ipëgatsaigabaquina matsiguenga itsoiguëgotëna. Carari imitocoiguëna Tosorintsi yosintsisëretaguëna te nontsorogaigue iroontita nocomantaiguëmiro Caninaro Nibarintsi ora ipaiguina Tosorintsi. ³ Aisati pigóiguë catingasati naquenguitsatasantimiro ora Irinibare Tosorintsi. Te nomatobitaiguemi, teatisati nongogaigue ora te onganinate. ⁴ Carari iniantaiguëna Tosorintsi, igáquena nongomantaiguëmiro Irinibare Caninaro. Te naninte irianacananataiguena matsiguenga, iroonti nocogasanti irianacananataiguena Tosorintsi Irirota ogótiro omagaro ora aquengasëretagara. ⁵ Aisati pigóiguë te nanibatasitaiguemi cara pinganinatasantaigue. Te nangantaitimi, “Obirojegui caninari”. Te nomatobitimi. Te nongogaigue piguireguite. Igóti Tosorintsi cara ninibatimiro ora aisonori. ⁶ Teatisati nongogaigue piniacananataigabaquina obirojegui teatisati basini. ⁷ Aisonori naroeugu iragátane Quirisito. Iroto caninataque piniacananataiguena. Caninataqueme nangantimime cara pintsorogaiguena carari te nanintiro. Cara obirojeguiquë te nangantimari ibega pitingomi. Nacábintsauiguëmi aisa nancantaro pibega tsinane otsotacaguiri ojaniquite ocábintséri caninasati. ⁸ Tojai nanintasantaiguimi. Iroto nacaninataguëque aroquenta nocomantaigapëmiro ora Caninaro Nibarintsi. Te nomichate tojainta nanintasantaiguimi irooti cara nitsongaiguëro nasintsire cara nomitocotaiguëmi.

⁹ Piquengaiguina, nopiguemisantacagane, cara përosati natarobacaatasantaiguë nomagotasantë cara obirojeguiquë arota nopë nabentiro pairoraca nocogaiguë, tenta nongue nobomirintsitaiguemi iroontita cara nocomantaiguëmiro Irinibare Tosorintsi.

¹⁰ Obirojegui piniaguëna cara natimaiguë caninasati obirojeguiquë. Aisati igóti Tosorintsi atiraca nacantaigaca. Te pairi cantëgotauguenane pairoraca ora te onganinate. ¹¹⁻¹² Aisati pigóiguë nacininasëretagaiguëmi nogometaiguëmi caninasati aisati nacantari ibega sërari cara yogometiri itomijegui. Nigátaiguëmi pinganque caninasati arota iraniacaninataigueri matsiguenga Ira Tosorintsi Irironta coigaiguëmi pintiomotaigapëri canta itimirori Irro cara yosanguegitosanti Tosorintsi iragáantanequë. ¹³ Iroro nacarasiataguëtaiguëri Tosorintsi përosati, cara caninasati págobëro ora nocomantaigapëmi tenta ongantima nasi nanibare, carari pigóiguë aisonori iroro Irinibare Tosorintsi ora piquemisantaibagaque. Opasiniatitacagaigapëmi poganinasëretagaigapëmi.

¹⁴ Nopiguemisantacagane, cara pitsipiriaiguëro ora icantaiguëmi pomatsiguenga te inguemisantaigue, aisati picantaigacari ibega ira botoibiritari Tosorintsi iraegui iraisati Quirisito cara Joreaquë. Canta, iguisaiguëri imatsiguenga jitacha jorío. Cara obiroquë iguisaiguëmi pomatsiguenga aisati. ¹⁵ Ira jorío yógaiguëri Ira Atingomi Jesos aisati yógaiguëri jirai ira comantantsiripague icharineegui jorío. Aisati icantaiguëna naro iguisaiguëna ijocaiguëna poeboropaguequë, te iraganinatiri Tosorintsi negaca. Ira jorío iguisanijintaiguëri antagaisati matsiguenga ¹⁶ tenta iranintacagaiguena nongomantaiguemiro Irinibare Tosorintsi obirojegui cagari jorío. Teni ingogaigue pinguemisantaigabaquero ora Caninaro Nibarintsi cara iragabisaicotaigaimi Tosorintsi. Përosati aiquero íataiganauquitigue icantaguetasanti tojai ora te onganinate, aro inguisaiguëri Tosorintsi ingasítigatasantaiguëri përosati.

Icogui Paboro iraniaigairi ira Tesarónicasati aisati.

¹⁷ Nopiguemisantacagane, cara atsipariobaca te aniobagajima omanapague, carari te nomáguisantaiguëmi përo cara naquenganeintimi. Yamai nocogasanti naniaigaimi aisati. ¹⁸ Nocogabetaja naniaigaimi obirojegui naro Paboro. Naquengabeca pite nani-ajantimi, carari yotiaquena camagari Satanás. ¹⁹⁻²⁰ Aiquenta cara iripigaima Atingomi Jesoquisito, tojai nanganinabiritaiguëmi obironta tsipataiguëneane catingsatiquë Irro cara ingampëna: “Caninasati picomantëgotasantëna, piquemisantacagaiguëri icaegui matsiguenga Tesarónicasati”.

3

¹ Tojai naquenganeintabitaiguëmi cara tera nanguemocotimi. Aro naquengaigaca caninataque ninëni naro paniro cara poeboroquë jitacha Atenas, ² carari irianti Timoteo nigáque iraniaigaimi. Irro opiguemisantane aisati ibimantaga irasi Tosorintsi. Imitocoguena cara nocomantëgotëro irinibare Quirisito Irironta Agabisaicoontatsiri. Nigáqueri cara inguemisantacagaiguëmi aisati iraganinasëretagaigaimi. ³ Nocoguini quero pairi ágasëretacha cara iguisaiguëmi matsiguenga. Nogótacaguero cara pitsipiriacacái matsiguenga aquemisanquerinta Atingomi. ⁴ Jirai cara natsibataiguëmi obirojegui nocomantaiguëmi aiquenta inguisaigacái matsiguengapague iratsipiriacacái. Yamai omoncaraca ora nocomantëmi. ⁵ Iroro ora naquengaguëtaigabitëmi tenta nogóte atiraca picantaiga, aro nigáqueri Timoteo iraniaigaimi canta Tesarónicaquë përosatica cara piquemisantaiganauqueri Tosorintsi. Najiquenta naro intagaiguëmi Satanás ora te ongomeíte, ora nocomantaigabitëmi naquemisantacagaigabitëmi jirai.

⁶ Aro yamai ipigaa Timoteo cara iniajantëmi, icomantapaina përo cara piquemisantaigu-iri Tosorintsi, aisati përo cara pinintobaca. Aisa icomantapë piquenganeintaiguina picogaigui piniagaina aisa nacanta nocogaigui naniaigaimi obiro. ⁷ Iroro ora, nopiguemisantacagane, aroquenta përo cara piquemisantaiguiri Tosorintsi nacininabentaiguëmi iroontita itsipiriacaquena catsimari matsiguenga yaca. ⁸ Yamai nacininasëretëcobentaiguëmi obirojegui natimagui caninasati cara nigóiguë përo piquemisantaiguiri Atingomi. ⁹ Tojai nacininabentaiguëmi, iroro ora tojai nacarasiataguëqueri Tosorintsi cara namanocotaiguëmi obirojegui. ¹⁰ Antagaisati cataguteriquë aisati tsitiniriquë, përosati namaniri Tosorintsi cara iranintacaguina naniaigaimi nanenisati aisati cara nomitocotaiguëmi ai-quero pijátanëtiague pinguemisantantaiganaqueri. ¹¹ Nocogaiguini iromitocotina Pabati Tosorintsi Irineni aisati Jesoquisito Atingomi arota naniaigaantimi canta Tesarónicaquë. ¹² Aisati namanocotaiguëmi cara iromitocotaiguëmi Atingomi aiquero pijáiguëtiague pinintasantobaganëma aisati pinintaiganaqueri omagaro matsiguenga aisa picantina nibegaiga naroeui cara nanintaiguëmi. ¹³ Namanocotimi arota iraganinasëretagaiguëmi Pabati Tosorintsi iraniacaninataiguëmi cara iribocapae Atingomi Jesos, aisati intsibataigapëmari antagaisati ira quemisantiri iraegui yoganinasëretaguë.

4

Ora ininti Tosorintsi anganquineri.

¹ Yamai, nopiguemisantacagane Tesarónicasati, aroquenta igóiguëri eiro Atingomi Jesus nangantantaiguëmi pingantiro ora nogometaigapëmi jirai atraca pingantaiguëma arota piganinataiguëri Tosorintsi. Aisa picantaiguëro yamai, aiquero pijátanëtigue pinguemisan-tasantiro caninasati. ² Pigóiguëro ora nogometaiguëmi ora igátaiiguëna Atingomi Jesus nocomantaiguëmi. ³ Ico gasanti Tosorintsi piganinatasantima. Ico gasanti cara quero pintagueti-ro tsinane cagaro pijina. Querootisati pintaguetiri sërari cagari pijime. ⁴ Carari icogui cara pigóigue antagaisati obirojegui págasanotiro pasi pijina coshoni poguero pingábintsëro pinguenguero caninasati. ⁵ Quero aisa picantaigari iraequi te irogótiri Tosorintsi. Inebet-asitaro tsinane icogasanti irantasitimaró. ⁶ Pinguemisantaiguero ora Sanguenari. Quero pintaguetiro iina popiguemisantane, querootisati pamatobitiri ira basinipague aroquenta pinebetaro ora yasinta. Ingasitígatasantëri Atingomi antagaisati ira cantacha negaca. Pigóiguëro oca aroquenta nocomantasantagapëmi jirai cara nacamanaaigapëmi. ⁷ Carari icoigaicái Tosorintsi angantaguetiro ora caninaro, te ingoigái antiro ora te onganinate. ⁸ Ira te inguemisantiro oca nibarintsica te iripëgatsatina paniro naro, Irianti ipëgatsata Tosorintsi Ira paigacáiro Caninaro Isère.

⁹ Pinintobaca yamai cara yogometaiguëmi Tosorintsi. Iro ro quero nasanguenataguëtaiguëmi cara pinintobaca arota quero natsipiriasati. ¹⁰ Nigóque pinintaiguëri omagaro Maseroniasati popiguemisantane. Yamaicari aiquero pijátaiiganauitigue pinintasantobaganëma. ¹¹ Pingogaigue pintimaigue caninasati, quero paseriguëri pomatsiguenga, pintiro patiro ora pasi pitarobacaare cara nacantasantagapëmi jirai. ¹² Aroca pinganquero negaca, aro iraniacaninataiguëmi antagaisati ira te inguemisante, aisati quero picogaro pairorapagueraca.

Cara iribocapae Atingomi Jesoquirisito inganiantanae ira igamaga quemisantatsiri.

¹³ Yamaica, nopiguemisantacagane, nocoguini nongomantaiguëmi atraca icanta ira camaguetatsi arota obirojegui quero pogasëretocotasantari aisati quero piraicotasantiri aronta piniaigari aisati. Quero aisa picantari ibegagueta ira te irogóigue cara iraganiatairi Tosorintsi ira igamaga quemisantatsiri. ¹⁴ Igóiguënta eiro icamaque Jesus aisati icaniantanae, aisati igóigui cara ira camatsi quemisantatsiri aisati inganquimari ibega Jesus. Iraganiataguetajiri Tosorintsi. Ira camatsi quemisantatsiri aisati icantari ira somatsi. Ingabiritanaima. Cara iribocapae Jesus irirojegui intsibatapaimari aisati. ¹⁵ Oca nacantaiguëmi iro ro Irinibare Atingomi: eiro tímatsi queroqueraí acami cara iribocapae Atingomi quero obataiguëri ira camënguëtsi. Iraguibataiguëri Tosorintsi iraganiataigari igamaga. ¹⁶ Irineni Atingomi masobingopaatsine cara Jonogauitiquë, iragáqueri itingomi ironomire Tosorintsi irisaanganetsite ingaimampëmarí itibore Tosorintsi. Aro ingabiritaiguëri iraequi camabitënguicha ira quemisantiri Quirisito, iraganiataigari. ¹⁷ Aique eiro tímatsi caniariquerainta ini, quero acami, aisati iráganacái jonoquë antsibataguëmarí ira camabitënguicha cara mingoriquë. Otonguibotaigabaquemari Atingomi cara jonoquë. ¹⁸ Përo cara antiomoqueri. Pingomantaiguëri antagaisati opiguemisantane oca nibarintsica arota poganinasëretobagaiguëma omagaro.

5

¹ Yamai, nopiguemisantacagane, teni naninte nasanguenataiguëmi cara atraca ongantima cara iribocapae Jesus. ² Tenta pigóigue cara iriboque cosirinti tsitiniriquë, quero pogueiri. Aisa ingampaema Atingomi, te pigóigue atraca ongantima iribocapae. Aroque pigóiguëro oca nocomantëmica jirai. ³ Cara ingantaigasegüe matsiguenga: “Yamai caninasati atimaigui, te pairi antaigáine”, omabocaigapëmarí irirojegui cara ingasitígataiguëri Tosorintsi quero isiga, aisati ingantaiguëmaro cara ocatsiti tsinane ontsomaenica quero pisiga. ⁴ Yamaicari obirojegui nopiguemisantacagane, teni aisa pingantimari ibega ira te inguemisantiri Tosorintsi tenta pinaigue cara tsitiniriquë. Quero imabocapëmi cara iribocapae Jesus, querootisati imabocapëmi ibeganti cosirinti. ⁵ Obirojeguinta timaigatsi cataguetiriquë picanque ora caninaro, obironta iraisati Tosorintsi. Iraequi te irogótiri Tosorintsi itimaigui cara tsitiniriquë icantagueti ora te onganinate. ⁶⁻⁷ Ira somatsi isami cara tsitiniriquë aisati ira singuitacha isinguita cara tsitiniriquë. Iro ro quero isamabitiri Atingomi eiro querootisati omaguisantiri aisa acantari ira basinipague te irogótiri Tosorintsi. Intsome angauite agueiri Atingomi. Intsome quero asinguita, iroonti anguengaiguëri Iro ro. ⁸ Carari eiro anëiti cataguetiriquë quero asinguita. Ainta soraro yogacaro ora coshotaquiri igamisate ineiquë aisati yogacaro coshori isampiriro iguitoquë. Aitosati eiro acantaigari ibega soraro angábintsaiiguëma aneingomentoquë cara anguemisantiri Tosorintsi, aisati angábintsaiiguëma cara anintobaganëma. Aitosati angábintsëma cara igóigui aroque yogabisaicocái Tosorintsi isetajáiro ora acantagueti te onganinate quero iguengairo. Aro angábintsaiiguëma cara anguenguëma arota quero yamatobitái camagari. ⁹ Teni

ingogue Tosorintsi ingasítigatái, iroonti icogui iragabisaicotajái, aroca anguemisanqueri Atingomi Jesoquirisito. ¹⁰Icamobicái Irro arota antimaigue cara Irroquê jemita eiroca caniari cara iribocapae jemitasati aroqueca angamaque. ¹¹Irro pingungasëretantaiguema, aikuero pijáiganaquitigue pinguemisantiri Tosorintsi pogometobaguimaro Irinibare cara picansiguero negara.

Yogomeque Paboro atiraca ingantaiguëma quemisantatsiri.

¹²Nopiguemisantacagane, pinintasantiri ira quemisantacagaiguimira. Ipomiribentaiguëmi cara yomisantimi yogometacaguimiri Atingomi. ¹³Piniacaninatasantiri pinintasantigueri cara itarobacaatimiro imitocotaiguimi. Aisati pintimaigue caninasati pinguengaiguema, quero piguisaneintobaga. ¹⁴Aitosati nangantasantimi, nopiguemisantacagane, pingomantasantaigueri intarobacaate ira peratacha. Pingamanaaigueri ira cantocotaguetasitimarine itingomipague. Pinguengasëretiri ira agasëretachari ira terai inguemisantasantiri Quirisito. Pomitocotiri ira te irisintsisërete. Antsiqueronisati pingantiri antagaisati. ¹⁵Aroca inguisëmica ira quisimi, quero pipëgatari, piganinatatiguiri aisati pingantaigueri caninasati omagaro ira basinipague. ¹⁶Pinganinasëretaigne përosati. ¹⁷Pomanocotopiantiri Tosorintsi përosati pinguengaigueri. ¹⁸Atiraca pingantaiguëma pingarasiataigueri Tosorintsi, iroronta icogui pingantaigue negaca obirojegui, obironta quemisantiri Atingomi Jesoquirisito.

¹⁹Pinguemisantatsatiro Isëre Tosorintsi quero pipëgatsataigaro. ²⁰Quero pitsoinguiro Irinibare Tosorintsi ora icomantimi ira comantantatsiri.

²¹Piniantaguetimaro omagaro ora yogometimi. Pinguemisantaiguero ora caninano. ²²Jaara pinabitsatiro ora te ongomeite. ²³Yamai nocoguini iromagori-asëretaguemi Tosorintsi aisati ingasiriconiatitaiguemi irasi Irro. Aitosati nocoguini iraganinataiguemiro pisëre aisa iraganinataiguemiro cara pinguengaiguema aisati iraganinataiguemiro omagaro ora pintaguete. Iraganinatasantaiguemi irooti cara iribocapae Atingomi Jesoquirisito. ²⁴Jirai icoigaiguëmi Tosorintsi. Yamai quero yamatobitimi. Iromoncaraquero Irinibare, iraganinataiguëmi. ²⁵Nopiguemisantacagane, pomanocotaiguena naroequi arota iromitocotaiguena Tosorintsi. ²⁶Caninasati pobetsatague-taiguemari antagaisati ira quemisantaigatsi cara. ²⁷Nigátaiguimiro naro aisati Quirisito pinibataigueneri oca sanguenarica antagaisati quemisantatsiri. ²⁸Yamai nocoguini ingábintsaiguemi Atingomi Jesoquirisito.

Aro ocarati ora nasanguenaquemi. *Paboro*

YOGATSITAIRO PABORO ISANGUENAQUINERI TESARONICASATI

Paboro ibetsataigari Tesarónicasati aisati.

¹ ¿Ainirobiegui, nopiguemisantacagane, obiro botoibiritari Quirisito cara poeboroquë jitacha Tesarónica? Naro Paboro aisa Siribano (iriati Siras) aisati Timoteo nasanguenataigaimi obirojegui iraisati Pabati Tosorintsi Ira coshoni yogacáí Iriro aisati Atingomi Jesoquirisito. ² Nocoguini përosati ingábintsaiquemi Pabati Tosorintsi aisati Atingomi Jesoquirisito. Iromagoriasëretagaigui aisati.

Iquemisanque Tesarónicasati, aisati inintobagaigaca.

³ Caninataque nacarasibentaiguimi Tosorintsi, nopiguemisantacagane. Aiquero piáiganaque piquemisantaiganaqueri Atingomi. Aisati aiquero piáiganaque pinintobagaiganaca. ⁴ Aro naantijegui nibatocotaiguimi obirojegui nocomantaguequeri ira botoibiritari Quirisito. Nocomantaigapëri cara caninasati picantaigui cara iguisaiguëmi catsimari matsiguenga aisati përo cara piquemisantaigui Tosorintsi. ⁵ Imitocoquimi Tosorintsi cara picantaigui caninasati cara itsipiriacagaiguëmi matsiguenga. Yoniagaiguëmiro Tosorintsi cara Iriro caninari. Aisati yoniagaiguëmiro cara iniacaninataiguimi intsbataiguëmi irooti cara pirequima Iriroquë. ⁶ Irironta caninari, caninataque cara Tosorintsi ingasitígataigueri omagaro ira quisaiguëmi. ⁷ Carari iromagoriasëretagaiguëmi obiro atspiriaigatsi aisati nomagoriasëretë naro cara nangarataiguëmi cara ingonijapae Atingomi Jesus imaniapaima Jonogaguetequë. Aisati intsbataigapëmari ironomireegui sintsirisonori. ⁸ Irosanguetetasantapë aisati ingampëmaro pamari. Ingasitígataigapëri antagaisati ira te iranintaigüe irogótiri Tosorintsi teatisati inguemisantatsatiro ora Caninaro Nibarintsi ora agabisaicoontatsi irasi Atingomi Jesoquirisito. ⁹ Iraegui ingasitígataiguëri Tosorintsi irojocaiguëri cara Sharincabeniquë përosati. Quero iniaigairi aisati Ira Atingomi cara irosanguëguiterequë. ¹⁰ Cara iribocapae Atingomi antagaisati ira quemisantiri inganinabentaiguëri iraniacaninataigabaqueri Iriro caninarisonori. Aisati inguenganeintasantaigabaqueri omagaro ira quemisantatsi aisa picanta obirojegui piquemisanquero Caninaro Nibarintsi ora nocomantaiguëmi jirai. ¹¹ Iroro përo cara namanocobentaguëtaiguimi obirojegui. Namaniri iraganinataiguëmi Tosorintsi Irironta coigaiguëmi. Aisati namaniri iromitocotaiguemi iromoncaratimiro ora caninaropague cara pininti pingantiro. Aisa nocogui iromitocotimi cara pintineri aroquenta piquemisanqueri Atingomi. ¹² Aroquenta yoganinataiguëmi Atingomi Jesus, iraniacaninataiguëri Iriro matsiguenga. Irogóiguëmi obirojegui iraisati Quirisito cara icábintsaiquëmi Tosorintsi aisati Atingomi Jesoquirisito.

2

Cara iribocapae Jesus.

¹ Yamai, nopiguemisantacagane, pigóigui iribocapae Atingomi Jesoquirisito aisati. Cara iribocapaeca irapatotaigapái cara Iriroquë. ² Yamai aisati nongomantaiguëmi quero pogasëreta querootisati pitsorogaigui. Aroca pairiraca nibapëmine: “Aroque omnarcaca cara irarepaima Atingomi”, quero piquemisantiri. Aroca inganquemi, “Pinibatëna Caninaro Isère Tosorintsi. Ocomantëna aroque omnarcaca cara irarepaima”, quero piquemisantiri. Aroca pairiraca cantëmine: “Nágobëro isanguenare Paboro. Icomantëna omanapague irarepaima Jesoquirisito”, itsoigani icantasita. ³ Quero pinintacagui pairiraca matobitimine teraiquerainta omoncaratima cataguiteri cara iribocapae Atingomi. Iritsita tojai matsiguenga inguisanjintaiguëri ira Tosorintsi. Iripëgatsataiguëmari. Aisati ingonijapë ira sërari te ingomeite ira quimingarisonoriguinte inancari Satanás. Irobaqueri matsiguenga. Inguisaneinquero omagaro ora icogui Tosorintsi. Iriro jätënguitsine cara Sharincabeniquë. ⁴ Inguisasantëri Tosorintsonori iriro. Aisati inguisasantëri antagaisati ira ijitosorintsitasita matsiguenga. Irobaqueri omagaro ira yamanaiguë matsiguenga. Irisobiaque cara oquibequë pongotsi irasi Tosorintsi, iriati jitënguichane Tosorintsi. Ingomantaguetiri iromatobitaguequeri matsiguenga ingantasiquimari: “Naro Tosorintsi”.

⁵ ¿Teco pinguengaigaima jirai cara aintaquerei ninabita obirojeguiquë, cara nocomantëgotëri ica sërarica? ⁶ Yamai obirojegui pigóigui pairoraca otiaqueri arota quero yoniagaigari matsiguenga ira quisasantëri Tosorintsi irooti cara omoncaraquima cataguiteri. ⁷ Aroque intasegui comanoroni ira te ingomeite quimigari. Terai ingonijapë aroquenta ainta paniro oticobëri irooti cara iriatë ira oticobëri. ⁸⁻¹⁰ Aique ingonijapë ira sërari te

ingomeite quimngarisonoriguinte. Cara iribocapae Atingomi Jesos irógopëri ira te ingomeite ira quisasantëri Tosorintsi, imijootapëri irojogopëri cara irosanguquitetocopëri. Irágáqueri Satanás ira quimngarisonoriguinte matobliantatsiri. Iromitocoqueri cara iritosongantantimaro iroonti tsoigagantsi arota inguemisantacaguiri matsiguenga. Ingoque iromatobitaigapëri antagaisati matsiguenga ira játënguistsine cara Sharincabeniquë tenta iraninte irágobëro ora Nibarintsonori. Iroro quero yogabisaicotaguëtajiri Tosorintsi.¹¹⁻¹² Iroro Tosorintsi inintacaguëqueri matsiguenga cara inguemisantiro ora tsoigagantsi aisa ora te ongatingate arota ingasitígataigueri Tosorintsi omagaro ira te inguemisantiro ora Nibarintsi Caninaro carari icogasantiro ingantagueti ora quimngaro.

¹³ Caninataque nacarasiatopiantëri Tosorintsi. Nacarasiabentaiguëmi, nopiguemisantacagane, aroquenta icoigaiguëmi Tosorintsi. Inintasantimi obirojegui. Iroro icoigaguëtëmi jirai iragabisaicotajimi. Poganinasëretaguëmi Caninaro Isëre Tosorintsi, aisati piquemiantaiguëro ora aisonori. Iroro yogabisaicotaguëtajimi isetajimiro ora picantagueti te onganinate quero iquengairo. ¹⁴ Iroro ora icoigaguëtëmi Tosorintsi aroquenta piquemiantobëro ora Irinibare agabisaicoontatsi ora nocomantanti arota piretaiguema Irirroquë aisati pingantaiguëmari ibega Atingomi Jesoquisisito cara yosanguëguiteti. ¹⁵ Yamai, nopiguemisantacagane, përosati cara pinguemisantantague. Quero pomaguisantiro ora nogometaiguëmi jirai cara natimaiguë obiroquë, querootisati pomaguisantiro ora nasanguenataiguëmi. ¹⁶ Tojai inintaigacái Atingomi Jesoquisisito aisa Pabati Tosorintsi. Aisati yoganinasëretagacái përosati. Icábintsaigacái, aro igóiguë ingancáiro omagaro icomantë. ¹⁷ Nocoguini iraganinasëretaguëmi paneingomentojeguiquë aisati iromitocoiguëmi aiqero pijátanëtigue pingantaigue ora caninaro aisa aiqero pijátanëtigue pinibataigue ora caninaropague.

3

Ora ingantaiguë Tesarónicasati quemisantatsiri.

¹ Yamai, nopiguemisantacagane, naninti pomanocobintaiguena narogui arota ora Irinibare Atingomi oretaguetima omanapague omagaruquitequë aisati arota iráigabaquero caninasati matsiguenga pibegaigabaquero obirojegui págobëro. ² Pomanocotaiguena aisati arota iromisantaguena Tosorintsi aintanta sërari catsimari cantaguetatsi tenta inguemiantague omagaro matsiguenga. ³ Irari Atingomi Iriró caninari iromoncaraquero Irinibare. Iromitocoiguëmi pinguenguëma caninasati, irosintsisëretanëmi, ingábintsaiguëmi arota quero intagaiguëmi camagari ora te onganinate. ⁴ Iriró Atingomi igótacaquina cara picantaigui yamai ora nocomantaiguëmi jirai, aisati përosati pingantaiguë antagaisati ora nongomantaiguëmi yamai. ⁵ Nocoguini Ira Atingomi iromitocoiguëmi pinguemaiguero cara inintaiguëmi Tosorintsi aisati antsiqueroni pinganqueri matsiguenga aisati pingantaiguemari ibega Quirisito cara iguisabitacari catsimari matsiguenga.

⁶ Yamai, nopiguemisantacagane, nongomantëmi ora icoaquemi Atingomi Jesoquisisito, aroca ioperata popiguemisantane quero potsititari peranti ira te intime cara nogometaiguëmi jirai. ⁷ Aroque pigóiguë obirojegui caninataque aisati pingantaiguena nibegaiga narogui nacantaiguë. Te nomeratima cara obiroquë. ⁸ Te nopaigue iraperi pairiraca teca nopë nabentiro. Përosati natarobacaatasantaiguë cara obiroquë catagueriquë aisati tsitiniriquë. Nomagotasantë tenta nongogue nobomirintsitaiguëmi. ⁹ Caninataqueme nomanaguëmirome pairoraca, carari te nanintiro. Nocogaiguë noniaguëmiro cara pintimaigue obirojegui pintarobacaataigue caninasati. ¹⁰ Cara ninasegui narogui jirai obiroquë nacantasantaiguëmi cara aintaca matsiguenga queroca itarobacaati querootisati yapi. ¹¹ Aroquenta naquemocoqueri ainta porocague obirojeguiquë ioperata, teni intarobacaate, patiro yaserigaiguëri ira basinipague, ¹² iroro nigátaguëtaiguëmi yamai aisati igáquemi Atingomi Jesoquisisito pingantaigueri irapague intarobacaate caninasati arota ine iraperi. ¹³ Nopiguemisantacagane, quero pomagoti cara picantaguetaiguero ora caninaro.

¹⁴ Aintaca ira te inguemisantiro përosati oca nasanguenataiguëmica, pigótiri, quero pican-tiri, querootisita pitsibatari arota iripasiguë. ¹⁵ Carari quero piguisaneintiro obirojegui. Pingomantëtiguëri caninasati irironta popiguemisantane. ¹⁶ Caninasati itimi Atingomi. Aisati nocoguini përosati iromagoriasëretaguëmi obirojegui intimacagaiguëmi caninasati atraca pinaguëti. Aisati naninti ingarataiguëmi Iriró coshoni irogaiguëmi.

¹⁷ Nobetsataiguëmi naro Paboro. Piniobëro oca nasanguenareca pigóiguë nasanguenataiguëmiro cara nobacoquë. Nameta antagaisati nasanguenarequë nasanguenati arosata nasiquë nobaco. Nasanguenatiro nopairo. ¹⁸ Yamai nocoguini ingábintsaiguëmi omagaro obirojegui Atingomi Jesoquisisito.

Aro ocarati ora nasanguenaquemi. *Paboro*

PABORO YOGUIBATËRO ISANGUENAQUINERI TIMOTEO

Paboro ibetsatari Timoteo.

¹ ¿Aintabi, Timoteo? Naro Paboro iragátane Jesoquirisito. Igáquina Tosorintsi Agabi-saicoontatsi. Aisati igáquina Jesoquirisito Ira oguei eiro iripigaima.

² Yamai nasanguenaquimini Timoteo obironta naguemisantacagane, obiro cantaca nasi notomi nacanqueminta piquemisanqueri Jesoquirisito. Nocoguini përosati ingábintsemi Pabati Tosorintsi, aisati ingantaneintëgotasantimi, iromagoriasëretaquemi, caninasati intimacagasantimi Iriro aisati Jesoquirisito Atingomi.

Yoganëri Paboro ira Timoteo cara Ejesoquë.

³ Jirai cara niáque aiqhero Maseróniaquë, nojocanëmi Ejesoquë nigátanëmi pinëni cara, pingantasantiri matsiguenga ogomeantatsiri cara quero yogomeantiro ora cagaro catin-garo. ⁴ Querootisati iquengabaguiti, querootisati inibatëgotiro iripajiro jirainisati queronta itsonguero. Antagaisati oca teni ongemeite, patiro ocanqueri matsiguenga yosamitasantobaca. Teni omitocotaigueri inguemisantiro Irinibare Tosorintsi. ⁵ Nogomeantiro narogui Irinibare Tosorintsi arota iranintobaganëma matsiguenga aroquenta iquemisantiro Irinibare Tosorintsi, aisati icaninaneinti aroquenta ijoquero ora icantagueti te onganinate, aisati yoguëtetaiguëri Tosorintsi iraneingomentoquë. ⁶ Aintapague matsiguenga ijoquero ora nogomeanti caninaro. Yogomeantiro iriro ora cagaro. Përosati inibatasantiro cagaro. ⁷ Icogetaigaca irogomeante ora icanti Tosorintsi jirai isanguenaque Moisés, carari teni inguemiro ora inibati teatisati inguemiro ora yogomeanti.

Ora isanguenabirique Moisés.

⁸ Igóigui eiro caninaro ora isanguenaque Moisés. Caninataque ogóiguë pairoraca isanguenabiriquero. ⁹ Igóigui ipagantacáiro ora caninaro Sanguenari Tosorintsi arota ongomantëgotaiqueri irianti ira cantaguetatsira te onganinate cagarori irasi ira cantiro ora caninaro. Ora isanguenaque Moisés ogótacaqueri matsiguenga cara icantaguetiro ora te onganinate. Ocomantëgotiri ira te inguemisante aisati ira quimingari aisati ira cantaguetatsi te onganinate aisa ira te iranintiri Tosorintsi tenta iromanirini pairoraca. Ocomantëgotirisati ira óguiri iriri aisa iniro. Ocomantëgotirisati antagaisati ógueri ¹⁰ aisati ira antaguetiro tsinane cagaro iina, ora antaguetiri sërari cagari ojime, aisa ira antaguetiri sërari, aisati ira cosiantiri matsiguenga. Ora Sanguenari comantëgotiri tsoigaigachari aisati tsoiguëgotasitari Tosorintsi. Aisati ocomantëgotiro pairoraca basini te onguenguema ora ogomeantagantsi caninaro. ¹¹ Oca ogomeantagantsi oquenguero ora Nibarintsi Caninaro ipëna Tosorintsi. Aroca inguemisanquero matsiguenga përosati intimacaqueri Tosorintsi Jonaguitequë.

Paboro icarasiaqueri Tosorintsi aroquenta icábintsëri.

¹² Nacarasiaquerini Atingomi Jesoquirisito Ira pënaro nongomantaguetiri matsiguenga ora Nibarintsi Caninaro. Imeratina aroquenta iniacaninatina naro. ¹³ Icanquinaro negaca caranta cara jirai nacantocaguetasitari ira quemisantatsiri aisati naguisëri. Carari icantaneintëgotëna Tosorintsi terainta nanguemisantiri terai nogótiri tenta nogótiro ora nacanque. ¹⁴ Iroto icábintsasantaguëquina Atingomi Jesoquirisito cara iquemisan-tacaguina aisa inintasantaguina. ¹⁵ Ocaro oca iroro aisonori. Caninataque irogótiro antagaisati matsiguenga ora ipocasique Jesoquirisito yaca quibatsica cara iragabisaicotiri ira cantaguetatsi te onganinate. Omagaro icantaguetomotiri te onganinate carari naro tojaisonori nacantaguetasantomotiri ora te onganinate. ¹⁶ Iroto icábintsaguëtëna naro aisati icantaneintëgotëna Jesoquirisito arota irogóige matsiguenga cara antsinisati inguisaneintaiguëri Tosorintsi ira cantaguetatsi te onganinate. Cara iraniaiguëna mat-siguenga aro ironijagaiguëmari Tosorintsi Iriro antsiqueronisati. Iraniaiguënanta mat-siguenga aro irogótanë aisati ingábintsaguëri iriro Tosorintsi aro inguemisantaiganaqueri, përosati intiomoqueri Tosorintsi Jonaguitequë. ¹⁷ Iroto intsome angantocotiri Tosorintsi aiqhero: “Iriro Atingomisonori caninarisonori. Te cagamane Irine. Teatisati iraneingani. Ipanirooti Iriro Tosorintsi te irine basini. Aroque”.

Icamanaaqueri Timoteo Paboro.

¹⁸ Yamai, notomi Timoteo, nangantasantimiro oca: pisintsisëretanë. Përosati pingo-mantëgotiri Quirisito, pingomantaguetiri matsiguenga cara jirai icomantëgotëmi igoman-tantatsirite Tosorintsi pingantiro caninasati. ¹⁹ Përosa cara pinguemisantiri Quirisito,

quero pijoquiri. Pigamema paneingomotoquë iraniacananinatimita Tosorintsi. Yamai ainta ira joquëri Quirisito tenta iraganinatiro iraneingomoto; teni inguemisantajiri Quirisito, yomaguisanqueri. ²⁰ Ainta pite ira Jimeneo aisati Arijantorero. Aroque ijoqueri Quirisito. Iroero nojoguëqueri pitirooti naro arota iratsipiriacaquimari iriro Satanás arota irogótanë quero icantocotaguetasitajiri Quirisito.

2

Pomanocotiri antagaisati matsiguenga.

¹ Iroero oca aisonori pomanocotiri antagaisati matsiguenga cara ingábintseri Tosorintsi. Aisati pingarasiaqueri Tosorintsi arota iromitocotaigueri omagaro matsiguenga ingantocotiri. ² Pomanocotiri antagaisati itingomipague iraugui agáantatsi arota ingantaiguero caninasati cara antimaiguere caninasati. Naro përosati naquengaiguiri Tosorintsi aro nacantaiguero aro caninaro. ³ Angantaiguëroca negaca iraniacananinatacá Tosorintsi Agabisaicoontatsiri. ⁴ Irirota cogasantatsi iragabisaicotaigueri antagaisati matsiguenga arota irogótiro nibarintsisonori. ⁵ Paniro ini Tosorintsi aisati paniro nibabintaiguiri matsiguenga catinasati Tosorintsiquë; Iriro matsiguengasonori jitacha Jesoquirisito. ⁶ Ipënbentaigaineri omagaro matsiguenga ora icantagueti te onganinate icamobitaiguëri arota iragabisaicotaigueri. Jirai te ogótabetingani oca nibarintsica carari yamai igótacacáiro Tosorintsi. ⁷ Iroero icoigaguëtëna Tosorintsi icanquina comantantatsiri aisati iragátane arota nongomantaguetiri oca nibarintsica matsiguengajeguiquë ira cagari jorío. Nongomeanti cara inguemisantiri Tosorintsi aisati irogóiguëro ora iroerosonori. Ninibati catinasati teni nontsoiguema naronta quemisantatsiri.

Ora inganque sërarijegui cara irapatoitima aisa ora ingantaiguë tsinanejegui.

⁸ Nocoguini atraca iromanaiguë sërari intinaiguero catero ibaco caninarinta iraneingomoto. Quero icantagueti te onganinate, querootisa iguisaneintiri pairiraca, querootisati itsoingui Tosorintsi. ⁹ Aisati nocoguini caninasati onguero omanchaqui tsinane querota inebetaro matsiguenga. Oganinatiro oguisi carari quero poganinatasantiro arota iranetsasitamaro matsiguenga. Querootisati pogaro caninaro manchaguinsi ora pënatacha tojai querootisa pairoraca coboriari cantaca oro aisati imapënequi shaota ora jitacha pëpira arota quero inibatëgotiro matsiguenga. ¹⁰ Carari caninataque oneingani tsinane aroquenta ocanquero caninasati aisa ocantaro pibega tsinane ora quemisantaiguatsi. ¹¹ Cara yapatotaiga quemisantatsiri quero pinibati tsinanepague arota onguemaigabaque aisati ogótane. ¹² Quero nanintacaguero tsinane pogometiri sërari querootisati pigátiri. Caninataque quero pinibati tsinanejegui cara yapatotaiga ira quemisantaiguiri Tosorintsi. ¹³ Nasanguenaquimiro negaca iritsitanta yoguibatë Tosorintsi Arán yoguetsiquëri. Aique yobetsiquëro tsinane jitacha Eba. ¹⁴ Teni iromatobitabimari ira Arán camagari iroonti ora tsinane yamatobique tenta onguemisantiri Tosorintsi ocanquero ora te onganinate. ¹⁵ Iroero yamai itsipiriacagaguëtiro tsinanejegui Tosorintsi cara ontsomaaquenica carari iragabisaicotajiro aroca onguemisanqueri Tosorintsi përosati, aisati onintirica omatsiguenga aisati onganqueca caninasati.

3

Ati ingantima omisantantatsiri.

¹ Oca aisonori. Ainta jitacha omisantantatsiri ira omisantaiguiri ira quemisanqueri Quirisito. Aintaca sërari cogatsi ingantimari omisantantatsiri, caninataque. ² Caninataque ingantiro negaca: intimaque caninasati arota iraniacananinatiri omagaro matsiguenga; iráquero paniro iina; inguenguema caninasati; përosati ingantima iraneicotima. Ira imatsiguenga ingogaiguëro irinibare. Irágobëri ira bocaigapënguistsine ibangoquë imabaqueri iraperi aisati jatasintsi irisomaminto. Aisati irogomeantë caninasati. ³ Quero isinguita querootisati iguisabacaga carari caninasati intime. Querootisati inintasantiri quirequi. ⁴ Aisati ira cogatsi ingantimari omisantantatsiri iromisantiri caninasati ianiquitejegui inganqueri itomi inguemisanqueri caninasati. ⁵ Queroca yomisantiri itomijegui caninasati, ¿Ati ingantima cara iromisantiri ira botoibiritari Quirisito? ⁶ Quero ini irirai quemisantatsiri querota iquenga iriatí caninari icantagueti te onganinate aisa icancari camagari jirai icasitgatëri Tosorintsi. ⁷ Aisati caninataque iraniacananinataigueri matsiguenga ira te inguemisantiri Tosorintsi querota icantocotaguetasitari querootisati camagari icantacagajiri te onganinate ira omisantantatsi.

Ati ingantima omitoconantatsiri.

⁸ Aisati ainta ira omitocotiri omisantantatsiri. Aisati inganquimari omisantantatsiri caninataque inganque caninasati arota iraniacaninataigueri matsiguenga. Iromoncara-
quero irinibare. Quero isinguita, queroootisa inintasantiri quirequi. ⁹ Inguemisantasantiro
ora nogometocotiri Quirisito naroequi aisati iragamema caninarica iraneingomentoquë.
¹⁰ Iritsita piniantobëmanta. Inganquero ca caninasati aro ca poguëri omitocoontatsiri.
¹¹ Aitosati ora tsinanejegui onganque caninasati arota iraniacaninataigueri matsiguenga.
Quero pini singuitacha tsinane. Queroootisati ocantocotaguetasitari pairiraca omatsiguen-
gapague. ¹² Ira águero paniro iina omitocoontatsiri. Aisati iromisantiri itomijegui can-
inasati. ¹³ Inganqueca negaca ira omitocoontatsiri aiqero iriátanëtigue inguemisan-
tasanotanëri Jesoquirisito, aisati irapiguemisantane irinibatocotaiguëri cara imitocoonti
caninasati.

Paboro isanguenatoqueri ira botoibiritari Quirisito.

¹⁴ Yamai nasanguenaquemi, carari nocoguini naniajantimi omanapague. ¹⁵ Queroca
naneimi omanapague, oca nasanguenaque pigóontëma atraca pinganque cara
pintsibataiguëmari quemisantatsiri irapatobiritaiguëmari Tosorintsi catimameri. Iraegui
quemisantiri icábintsëro ora aisonori aisati yogomeantiro. ¹⁶ Aroquenta yoniagaigacáiro
Tosorintsi ora aisonori irasi Quirisito, caninataque irogóiguero antaigasati matsiguenga.
Ira Jesoquirisito matsiguengatapënguisti cara otsomaqueri iniro. Irianti caninarisonori
pinasantacarinta Isëre Tosorintsi, iroro te ingantaguëtëmäte ora te ongomeite. Aisati
inaiguëri ironomire Tosorintsi Ira Josos. Aisati quemisantatsiri icomantëgotaguetiri Josos
ira basinipague matsiguenga. Omagaroguitequë iquemisantaiguëri matsiguenga. Aitosati
yogainocanaa Jonogaguitequë.

4

Ira te inguemisantajiri Quirisito, ijoqueri.

¹ Yamaica ocomantacái Caninaro Isëre Tosorintsi cara aiquenta pënibaque iripigaima Je-
soquirisito irinanë ira quemisantabecari Quirisito carari irojocajiri quero iquemisantajiri
aroquenta iquemisantobëri ira matobiantatsira aitosati iquemisanquero ora yogomeanti
camagaripague. ² Iroonti yogomeanti tsoigagantsi tenta onganinate iraneingomento
aisati te ingantaneintëgotobaguima. ³ Yogomeanti icanque: “Quero págui pijina. Quero
págui pijime. Aitipague perintsi quero papiro”. Tenta irogótiro cara Iriro Tosorintsi
ogüero omagaro perintsi caninaro. Igóiguero ira quemisanqueri Tosorintsi. Iroro can-
inataque irágobëro perintspague quemisantatsiri ingarasiataigueri Tosorintsi ⁴ Irironta
obetsiquëro antagaisati caninaro, ibatsapague aisati panguirintspague. Iroro intsome
ágaguëtobëro angarasiatoquero. Quero ojoquero. ⁵ Cara angarasiatuqueri omaniri Tosor-
intsi, ogótocoquero cara ijiquero caninaro perintspague.

Timoteo caninari omisantantatsiri.

⁶ Oca pogometasantiri opiguemisantane. Pinganquero ca negaca, obiro caninari omisan-
tantatsiri. Aisati pisintsisëretanë aroquenta caninasati piquemisantari Quirisito aisati
caninasati piquemisantiro ora nogomequemi naro. ⁷ Quero piquengasitaguero pairo-
rapagueraca quingabaguientsi aitinta te ongomeite. Përosati pingantiro ora icocaquemi
Tosorintsi. ⁸ Caninaro ora osintsitëna naroequi omitocotaiguënanta cara atarobacaati
caninasati. Carari caninarosonori anganque ora icogui Tosorintsi omitocotaiguinta
yamai aitosati cara antsibatapëmari Tosorintsi Jonogaguitequë. ⁹ Iroro nibarintsica
aisonori, catingaro. Caninataque iroro inguemisantaiguë matsiguengajegui. ¹⁰ Iroro
atarobacaataguëtaigui iratsipiriacaguëtinaro aroquenta oguiaqueri ingábintsena Tosorintsi
catimameri. Iriro Agabisaicoontatsiri irasi omagaro matsiguenga carari irianti yogabi-
saicoti ira quemisantiri.

¹¹ Oca nibarintsica pingomantantiro pogomeantiro. ¹² Obiro oboina sërari. Ainta basini
quemisantatsiri ingantocoquemi: “Quero naquemisantiri irironta janequiqueraí”. Pigu-
imarentiri aroquenta pitimi obiro caninasati. Poniagaigueri atraca ingantaiguema iriro
cara intimaque caninasati. Obiro pinibatasante catingasati. Pinintiri popiguemisantaca-
gane pomisantiri pingábintseri cara queroqueraí piquenga obiati. Pinguemisantasantiro
Atingomi Jesoquirisito. Pinguincotiro tsinane caninasati. Quero picantocotaguetiro
te onganinate. Pinganquero ca negaca piguimarentiri ira nibatocotimi te onganinate.
¹³ Queroqueraica nareta pinibatineri Sanguenari popiguemisantacagane. Pingomantiri
atiraca ingantima cara intimaque. Pogomeantimari Irinibarequë Tosorintsi. ¹⁴ Quero
pomaguisantiro ora ipëmi Tosorintsi jirai cara icoiaguëmi comantantatsiripague cara
yogaiguëmiro ibaco yamanocoiguëmi. ¹⁵ Përosati pinguengero ocapague nasanguenaque-
mica. Aro ira pomisantane iraniacaninataiguëmi aiqero pijátanëtigue pinguemisantiqueri

Tosorintsi. ¹⁶ Pigamema obiati aisati pigamemaro ora picomantanti. Përosati pogomeantiro. Pigabisaicotima obi ro negaca, aisati pigabisaicotiri ira quemisantaiguëmine.

5

Ora inganqueri Timoteo ira quemisantatsiri.

¹ Cara icantaguetiro te onganinate popiguemisantacagane antiasipari, quero pisintsit-satiri. Pingantiri caninasati pibeguiro cara pinintiri piri. Aisati pinganqueri oboina sërari pibeguiro ira pirenti. ² Pingantaiguero ora antiasiporopague pibeguiro piniro. Aisati pingantaiguero oboinapague tsinane pibegaiguero ora pitsiro. Pinguincotiro caninasati. ³ Obirojegui quemisantiri Quirisito pomitocotiro ogamaimentaga tenta irinëmate omatsiguenga ira omisantirone. Pisanguenatocotiro, pomero ora otarobacaare, pomero operi aisati. ⁴ Aintaca otomipague, pingantiri iromisantiro iniro iroronta omisantëri iriro jirai ocábintsëri. Aisati iromisantiri iriri igamainantaga. Inganquero ca negaca aro iraniacananatëri Tosorintsi. ⁵ Ora ogamaimentagasonori, tenta irinëmataje omatsiguenga, ogeuri Tosorintsi cara iromitocoquero. Përosati cara omaniri cara tsitiniriquë aisati cara cataguitiriquë. ⁶ Orari oraca ogamaimentaga ora cantaguetiro pairoraca ocogui, iniaquero Tosorintsi cantaca ogamaga. ⁷ Pingomantaguetiri negaca ira quemisantaiguiri Quirisito querota icantocotaguetiro ogamaimentaga teni ongemeite.

⁸ Aintaca paniro te iromisantiri imatsiguenga, teatisati iriri, teatisati iniro, teatisati antiasipari, iriro te inguemisantiro Irinibare Tosorintsi. Iriro catsini cantaca ira te inguemisantiro Irinibare Tosorintsi. Aroque ijocajiro. ⁹ Iroonti pisanguenatocote ogamaimentaga aroqueca omoncaraquero 60 osarini, aisati paniroca ojimetomaco, ¹⁰ iniacaninatiroca ira quemisantatsi, aisati pomisantirica janequi, opirica niantatsiri iraperi aisati jatasintsi irisomaminto, oquibaguititërica iguiti quemisantatsiri, omitocoverica janaitatsiri aisati ira atspiriaigatsi, ocanquero ca pairoraca caninano.

¹¹ Carari quero pisanguenatocotiro ogamaimentaga oboinaquerai terainta ogabise 60 osarini. Cara icamaque ojime pogasëretanaca piraicoqueri ocanque: “Quero nágai basini najime. Patiro nocogui nantarobacaquineri Quirisito”. Carari caraquesatan-tata ocoque omaguisantajiro cara pinibatëri Atingomi ocoguininta ágae basini irirai ojime. ¹² Aro irinibatocoquero matsiguenga ora te onganinate aroquenta te omoncaratiro ora onibare. ¹³ Aisati ojátagueque pongotsipaguequë onganquima peranto aisati onibatëgotaguetasi quimari ira basinipague matsiguenga. ¹⁴ Nocoguini ora ogamaimentapague ora oboinaquerai ágae basini irirai ojime, arota irinaje ojaniquite. Aisati nocoguini omisantiro obango caninasati, arota quero inibatëgotiro matsiguenga ¹⁵ aintanta ora ogamaimentapague aroque ojoqueri Quirisito aroquenta oquemisantajiri camagari Satanás. ¹⁶ Aintaca inomotiri quemisantatsiri omatsiguenga ogamaimentaga, caninataque iromitocotiro iriro arota quero imitocotiro ira quemisantaigatsi. Paniro ira botobiritaigari Quirisito iriro omitocotaiguërone ora ogamaimentagasonori.

Ora inganqueri Timoteo ira omisantantatsiri.

¹⁷ Caninataque quemisantatsiri iraniacananatasantaigueri omisantantatsiri yogomeantironta Irinibare Tosorintsi aisati iquenguitsatiro caninasati. ¹⁸ Moisés isanguenatocoveri jirai:

Quero poguineri cantiri itsobaquë sërari baaca ira agaticaguetiro tirigo, carari caninataque irape arosata.

Aisati ocanti basini Sanguenari:

Caninataque ira tarobacaatatsi iripë nabentengani.

¹⁹ Aintaca matsiguenga comantëgotirine omisantantatsiri icantagueti ora te onganinate, quero piquemisantiri queroca ini pite queroca maba ira comantëgotiri. ²⁰ Aintaca omisantantatsiri përosati icantagueti ora te onganinate, pisintsitsatiri catingasati quemisantat-sirijeguiquë arota intoroganeintaanguaque omagaro. ²¹ Irootisati pinibatiri iragui cantaguetatsi ora te onganinate. Iriatisati pisintsitsatigueri antagaisati. Quero pabisanaque poro. Irootisati pinibatiri omagaro caninasati aroquenta iniaiguëna narogui Tosorintsi, aisati iniaiguëna Jesoquisito, aisati iniaiguëna ironomire Tosorintsi ira igoigane. ²² Quero poguiri omanapague irirai omisantantatsiri terainta pigótiri. Aitica icantagueti ora te onganinate quero pogasitari quero pinintacaguiro ora icantagueti iriro. Pigamema. ²³ Aroquenta pijanaitapininque pisegotoquë, quero patirontati pógaro ora nija. Pijampitima. Aisati póguiamaro arosata oja oba. ²⁴ Aintaca cantaguetatsi ora te onganinate igótocotaiguiri antagaisati matsiguenga. Ainta basini te irogótocotengani. Caraquesatan-tata irogóquengani cara ingomantëgotëri Tosorintsi. ²⁵ Aintasati ira cantaguetatsi caninaropague igótocotaiguiri omagaro matsiguenga. Teco irogótocotengani yamai aro caraquesatantata irogóquengani.

6

Ora inganque quemisantatsiri ibimantaga.

¹ Ira ibimantaga quemisantiri Quirisito inguemisantasantirita ira casintari querota ira matsiguenga icantocotaguetasitari Tosorintsi querootisati ora Irinibare. ² Quero iperata ibimantaga irasi quemisantatsiri querootisati imaintiri ira casintari. Carari caninataque iraniacananatiri inguemisantiri iraninqueri intarobacaatasantineri irironta irapiguemisantane.

Timoteo, pogomeantiro oca nibarintsica pingomantantiro.

Ira ogomeantiro basiniati.

³ Aintaca ogomeantiro basiniati, te inguemisantiro ora caninaro Irinibare Atingomi Jesoquisito, ora ogomecái anganque eiro caninasati, ⁴ iriro quingasantabitacha carari te irogótasante pairoraca. Patiro ipégatsatari quemisantatsiri, aisa yomitojaiganaquero irinibare ora cantaquemarine matsiguenga iranebetimaro pairoraca aisati inguisabacaquima. Aisati onganqueri ingantocotaguetasitanēmari imatsiguenga, aisati quero iguemisantobaga, ⁵ inguisabacaguetacaquimari basini matsiguenga, ira quinguiro quimingaro tenta inguengero catingaró. Iquemisantomemegacaro Caninaro Nibarintsi icoguininta irágue quirequi. Jaara pinabitsatiri cantacha nega. ⁶ Carari te aro ongantengani negaca. Aroca anguemisantiri Quirisito eiro aro iraganinatacái.

Ira quirequi matobiantatsiri.

⁷ Cara ibogaguè te omaigapè pairoraca yaca quibatsica, querootisati ágaiganaji pairoraca cara angamaiguènica. ⁸ Carari aitaca operi aisati omanchaqui, intsome anganinabentaiguero caninasati. ⁹ Satanás cantaguiri ora te onganinate pairiraca ira cogatsi tojai quirequi. Ora icogui otsipiriacaqueri ongantacaquimari quero inecota aisati áganèri Sharincabeniquè. ¹⁰ Inintasantirica matsiguenga ira quirequi pèrosati inguiangeri, iroro ingantaguèque ora te onganinate arota irágue basini quirequi. Iroro ijoguèqueri Quirisito te inguemisantajiri. Itsipiriantetasita.

Pèrosati Timoteo inguemisantasantiri Tosorintsi.

¹¹ Carari obiuro Timoteo yasintimi Tosorintsi. Pigamemaro oca nasanguenaquimica. Pingantiro ora caninaro. Aitosati pingantimari Quirisito pinguemisantiri pèrosati. Pintangueri antagaisati. Quero pabenta cara iratsipiriacaquimi ira matsiguenga. Quero piguisaneintiri. ¹² Ira soraro yomanábintiri itingomi, aisati pingantimari ibega iriro pinguemisantasantiri pasi Pitingomi Jesoquisito pintasantineri Ira pèmiro pintiomotiri pèrosati Jonogaguetequè. Iroro icaimobiquimi Tosorintsi jirai. Aroque caninasati picomantaguequeri tojai matsiguenga obiuro iraisati Quirisito. ¹³⁻¹⁴ Iniaquiminta Tosorintsi Ira timagaiguiro omagaro, aisati iniaquiminta Jesoquisito Ira cantomoqueri Pontsio Pirato ora catingaró nibarintsi, nangantasantèmi pinguemisantiro antagaisati igátanèmi Iroro. Quero picantèmati ora te onganinate irooti cara iripigapaima Atingomi Jesoquisito. ¹⁵ Iribocapae cara icocaqueri Tosorintsi. Paniro Iroro caninarisonori. Iroro sintsirisonoriguinte. Iroro Atingomisonori. Iroro Ibingatsarite antagaisati basini itingomipague. ¹⁶ Paniro Iroro quero icami. Itimi cara cataguitersonoriquè cara te oretingani. Te poro neirine tenta iraneingani. Iraniacananataiguerita omagaro matsiguenga Irironta Itingomisonori. Irinibatocotaiguerita matsiguenga Iroro Caninarisonori.

Timoteo ingomantaguetiri casintachari.

¹⁷ Pingantasantaguetiri casintaguetachari: “Quero piquenga obiati. Querootisa irianti poguei piguirequite tenta ongomètate cara imiaquima piguirequite. Quero poguiasèretiro pasintaguetasantima. Irianti Tosorintsi piguiasèretasante pèrosatinta itimi. Iroro pinguemisanti. Irironta paigáiro antagaisati ora oganinatacái. ¹⁸ Pingantiro ora caninaro, pomitocotiri pitimanamitane pingantaneintègotiri. Quero pomichati. ¹⁹ Pinganqueroca negaca iroquemiro Tosorintsi ora pasiatu jonoquè, aisati pintiomoqueri Jonogaguetequè pèrosati”.

Paboro itsonquero ora isanguenaquineri Timoteo.

²⁰ Timoteo, pingábintsero Caninaro Nibarintsonori ora ipabaquimi Tosorintsi. Quero piquemisantiri ira ogomeantiro ora cagaro catingaró. Icantabeca igótiro ora aisonori, carari te irogótiro. Quero piquemisantiri, ²¹ aiantanta ira quemisaintobèri, aroque ijocajiro Nibarintsonori. Teni inguemisantajiri Tosorintsi teni irogótiri.

Ingábintsaiguemita Tosorintsi.

Aro ocarati ora nasanguenaquemi. *Paboro*

YOGATSITAIRO PABORO ISANGUENGAQUINERI TIMOTEO

Paboro ibetsatari Timoteo.

¹⁻² ¿Ainirobi, Timoteo? Naro Paboro. Icoiguëna Tosorintsi, igáquina Jesoquirisito nongomantaguetiri matsiguenga inguemisanquerica Jesoquirisito, aro intimasantacaqueri jonoquë përosati. Yamai nasanguenatimini Timoteo, naguemisanacagane nanintane, obironta aisa cantaca nasi notomi. Nocoguini përosati ingábintsemi Pabati Tosorintsi aisati Jesoquirisito Atingomi. Aisati ingantaneintëgotasantimi, aisati iromagoriasëretaquemi cara paneingomtoquë.

Icarasiaqueri Tosorintsi Paboro.

³ Cara naquenguimi përosati namanocotiri Tosorintsi iromitocotimi. Aisati nacarasiaqueri Tosorintsi obironta cantiro ora caninaro. Cara naquemisantiri naro aisa nacantari ibegaiga nomatsiguenga jirai iquemisanqueri Tosorintsi. Nigóti iniacaninatina caninarina. ⁴ Naquengaimi cara piraca jirai nojocanëmiri. Nocogasanti naniajimi arota nanganinasërete. ⁵ Aisati naquianquero cara piquemisanqueri Jesoquirisito. Cara irotsita quemisanqueri pishoro Iroira, aisati oquemisanqueri piniro Eonisi, aique obiro. Yamai nigóti piquemisantasanotiri Quirisito aisati picancaro pibegaigaca iroro pitirooti.

Quero pipasiquitiri Jesoquirisito.

⁶ Yamai naquiancagajimiro jirai cara noguëmiro nobaco namanocoquemi aro ipëmiro Isëre Tosorintsi icanquemi caninari comantantatsiri. Përosati pingomantaguetiri matsiguengajegui ora Irinibare Tosorintsi. ⁷ Iroro Caninaro Isëre Tosorintsi ocancái quero otosorogui matsiguenga. Aisati ogabiasëretacacái, aisati ocancái cara anintobaguima, aitosati omitococái anguenguema caninasati. ⁸ Quero pipasiquitiri Atingomi Jesus aiquero pingomantëgotiri, querootisati pipasiquitocotina cara yominguëtëna. Yáguëna nomantëgotërinta Quirisito. Iroro natsipiriobenque yamai. Aroca pitsipiriobenqueri obiro aro irisintsitacaquemi Tosorintsi. ⁹ Iroro agabisaicoquina naro aitosati obiro aique igacái ongomantaguetiri matsiguenga Irinibare caninaro. Te ingogái aroquenta acaninatí ei. Icaimasitacái icábintsacái aroquenta inintasantacái teraiquerai irobotsiquero omagaro. ¹⁰ Yoniagacái Tosorintsi inintaigacái aroquenta iconijaque Jesoquirisito Atingomi Ira camobitaiganacái omagaro aique icaniatanai. Aisati itimasanotaqueri ira quemisanqueri arota intiomoqueri përosati Jonogaguitequë. ¹¹ Aisa icoiguëna Tosorintsi nongomantëgotiro Irinibare. Aisati icoiguëna iragátane aisati icanquena naro ogomeantatsiri. ¹² Iroro ora natsipiriaguëque yamai carari teni nopasiquite nigótirinta Ira naquemisanque. Nigóti quero yamatobitina iromisanquina nopabacarinta irooti cara iribocapae aisati. ¹³ Përosati pingábintsëro ora nibarintsi caninaro ora nogomequimi. Pingomantantaguetiro. Përosa pinguemisantiri Jesoquirisito arota iromitocotimi pinintiri ira quemisantisira. ¹⁴ Jirai ipëmiro Isëre Caninaro Tosorintsi ora inanquimi obiroquë. Omitocoquemi pingábintsero ora icanquemi Tosorintsi ora aisonori.

Onesíporo imitocoqueri Paboro.

¹⁵ Aroque pigóque cara ijocaguëna Ijero aisati Eromójenes aisati omagaro basini Asi-asati. ¹⁶ Carari Onesíporo teni aisati ingantimari Asiasati. Tojai imitocotopiantëna. Te iripasiguitëgotina cara yominguëtëna. Nocoguini Atingomi ingantaneintëgotiri iroro aisati imatsiguenga. ¹⁷ Cara yaretajina Iromaquë icogopaina irooti cara iniajina. ¹⁸ Nocoguini ingantaneintëgotiri Onesíporo Atingomi cara iribocapae. Aroque pigóque obiro imitocotasanotëna cara Ejesoquë.

2

Pitsipiriobitiri Jesoquirisito.

¹ Yamai notomi irosintsisëretanëmita Jesoquirisito aroquenta icábintsëmi. ² Piquemaquena jirai cara naquenguitsatacaqueri tojai matsiguenga. Atsi obiro yamai nangantasantëmi pingomantasantiri caninari quemisantatsiri arota ingomantasantanëri basini irirai. ³ Ira soraro iáti iquemisantiri itingomi, aisa obiro pingantimari ibega soraro. Pinguemisantiri pasi Pitingomi Jesoquirisito. Aisati pitsipiriobitiri. ⁴ Ira soraro teni ingantocotiro iraisati ira te irisorarote. Patiro cantiro irasi soraro. Patiro iquemisantiri itingomi. ⁵ Aisati pairiraca maguempitiro perota quero yáguero copa queroca iquemisantiri ira agáguiri. Aisati pinguemisantiri Jesus Ira agáquemi. ⁶ Aisati ira antiro irantane iritsita

ágèrone iraperi. Aisati pintarobacaatineri Tosorintsi. Iromisanquemi. ⁷ Pinguenguero ora nacanque, aro irogótacaquemi Atingomi.

Pinguengueri Jesoquirisito.

⁸ Jirai cara itimiquerai David, iriro itingomi joríojegui. Jesoquirisito imatsiguenga David. Icamaque Quirisito icaniantanai. Yamai Iriro nocomantègoti Agabisaicoontatsiri. Pinguengueri obi-ro. ⁹ Iro-ro natsipiriaguëque yamai ijiquinanta matsiguenga naro cantaguetatsiri. Yoguëshotiaquina carari Irinibare Tosorintsi te irisitiquiro. Përosati cara nocomantagueantiro. ¹⁰ Natsipiriaguineri iraugui quemisanquerine Quirisito. Icoiguëri Tosorintsi iragabisaicoqueri përosati intiomotaiguëri cara Jonogaguetequë. ¹¹ Oca nibarintsica aisonori ocanti catingasati:

Aroca angamobiqueri Quirisito ei-ro, aisati antimomoqueri Iriro përosati. ¹² Aroca atsipiribonqueri Quirisito, aro osobicomoqueri përosati iragáantanequë, aisati omitocotaiguëri ei-ro. Aroca otsoinguëri, aisati ingantococái ei-ro: “Teni nogótimi”. ¹³ Queroca aquemisantriri ei-ro caninasati, përosati iromoncaraquero Irinibare queronta itsoinga Iriati Tosorintsi.

Ora inganque Timoteo.

¹⁴ Oca pingueancaguiri iraugui pomisanti. Aisati iniaquerinta Tosorintsi pingantasantiri quero ipëgatsatobaga, quero inibatègotiro basiniati nibarintsi, queronta omitocotiri ira quemobèrone. ¹⁵ Pobomirintsitima arota iraniacaninatimi Tosorintsi arota quero pipasiquiti. Aro inganquemi Iri-ro: “Caninataque ora picanque”. Pigótasantanëro ora ocanti Irinibare, aisati catingasati pingomantantiro. ¹⁶ Quero piquengasitaguearo pairoraca nibarintsi-pague aitiinta ora te ongomeite ongantaguetacaquerinta te onganinate ira quemobèrone. ¹⁷ Oca nibarintsi oguimingatanëri matsiguenga aisa onganquima pibega tsohotsi cara oquibianë. Iquemisantobëro cantacha nega pitirooti matsiguenga jitacha Jimeneo aisati Jireto. ¹⁸ Ica pitirooti ijocajiro ora nibarintsonori icanque aroque pabisanaque cara icaniaigai igamagaegui quemisantatsiri. Cara yogomeanti negaca yamatobiqueri basini matsiguenga arota irojocajiri Quirisito. ¹⁹ Carari ira botoibiritari Quirisito përosati cara inguemisantiri aroquenta icanque Atingomi: “Nigótiri ira nasiasi”. Aisati icanque: “Ira iraisati Quirisito irojoquero antagaisati ora te onganinate”.

²⁰ Cara ibangoquë casintachari aiti tojai perato conagaguetchari. Ora caninaro iroonti oro aisati basini coshori carari aiti basini yobetsiquëro quibatsi aisa anchato. Caninaro perato yapantaro matsiguenga. Aiti basini perato asi nija aisati asi cajara. ²¹ Oca peratopague aisa posigari quemisantatsiri. Ira agamacha te ingantaguetate ora te onganinate, aro imëri Atingomi itarobacaare caninaro. Iriro cantaca perato caninaro. ²² Pigamemaro ora iquengaigui oboina sërarijegui. Pijoquiro. Pingantiro ora caninaro. Përosati pinguemisantiri Atingomi. Pinintasantaigueri ira popiguemisantaneegui. Pinti-macagaigueri pintsibataiguemari caninasati ira manègotiri Atingomi irironta yoguëtetaigai Tosorintsi. ²³ Aintaca ira osamitasitapëmine ora te onganinate, quero potabitiri patironta icogui iriro iripëgatsatimi. ²⁴ Teni ongomeite opëgatsatobëmari eironta iraisati Quirisito. Caninataque anganqueri caninasati omagaro. Aisati caninataque ora ogomeanti ei-ro Nibarintsi Caninaro. Te ongomeite anguisanijintobaguima. ²⁵ Intsome ogometiri ira te iraninte inguemisantiro Nibarintsi Caninaro. Aisati intsome omanocoigueri Tosorintsi arota inguemisantacaguiri ora Nibarintsi Caninaro. ²⁶ Aro iromitocoqueri Tosorintsi cara iraneicotajima aisa irojocanairi camagari cara itingomintabecari jirai aroquenta iquemisanqueri Tosorintsi ira irirai Itingomi yamai.

3

Ati ingantima matsiguenga aiqumentata.

¹ Timoteo, nocoguini pigóte aiqumentata ira quemisantatsiri omomirintsiguitetomotanëri. ² Ira matsiguenga iranintasantanëma iriati. Inguianqueri quirequi. Aitosati iromichatë; inguengasantëma iriati. Quero inintiri Tosorintsi querootisati itingomipague; ingantocotaguetasiqumari. Quero iquemisantiri iriri querootisati iniro. Quero icogui icarasitocotiro pairoraca; querootisati yamani. ³ Quero inintiri imatsiguenga; ingantocotaguetasiqumari pairiraca. Inganquero pairoraca iraninque; aitosati ingatsimaque. Iripëgaqumari ira caninari. ⁴ Irinibatocotasiqumari imatsiguenga. Ingantasiqumaro pairoraca queronta iquenga. Iraninquero pairoraca carari quero inintiri Tosorintsi. ⁵ Inguemisantomemeguëmari Tosorintsi carari iritsoinguëri. Pigamemari obi-ro. Quero pitsibatari. ⁶ Ainta iriroquë ogomeantatsiri iátaguëti pongotsipaguequë yogomeantaguetiro tsoigagantsi yamatobipëro tsinane cantaguetatsira ora te onguenganeintima. Aro oquemisantobëri aroquenta onintaguequero pairoraca ora te ongomeite. ⁷ Përosati pigótagueatiguero iroro ora pairorapagueraca carari quero paretaiqa pigótiro ora aisonori.

⁸ Jirai itimi pite sērari matsi ira comantatsatiri Baraón. Paniro jitacha Janes ira basini ijita Jámpires ira pégacari Moisés. Aisa icantari ibega Janes aisa Jámpires, yamai ica matobiantatsiri ipégatsataro ora aisonori, teni ingomeite, iquemisantomemegacarinta Tosorintsi. ⁹ Quero yogomeanti cosamani. Omanapague iritsonguêma aroquenta irogócotaiguêri matsiguenga irianti matobiantatsiri aisati icancari ibega pitirooti ira pégatsacari Moisés jirai.

Pêrosati inguemisantiro Timoteo ora aisonori.

¹⁰ Notomi, piquemisanquero ora nogomeantê. Aisati piniaquena ora nacanque caninano. Pigóque ora nocomantêcobiriquero Irinibare Tosorintsi. Aisati pigóque naquemisanquero Tosorintsi, pigóque natsipiriobenquero aitosati te nanguisanjintiri matsiguenga nanintasantaiguirinta. ¹¹ Aisati pigóque obiro ora icantaguetaguêna ira catsimari Antioquiasati aisa Iconiosati aisa Irisitarasati. Tojai natsipiriaque carari yogabisaicoquina Atingomi. ¹² Nocoguini pigóte obiro iratsipiriaiguêni antagaisati ira quemisantasantêrine Jesoquirisito. ¹³ Carari ira matsiguenga te ingomeite aitosati ira matobiantatsi aiquero iriáiganauquitigue inganque ora te onganinate. Iromatobitaguequeri matsiguenga aisati iromatobitaigaima iriati. ¹⁴ Carari obiro pêrosati pinguemisantiro ora pigóque jirai ora pigótoconoquero ora aisonori aroquenta nogomequemiro nara jirai. ¹⁵ Aisatinta janequiqueraibinta pigóquero Sanguenari ora ogomecáira oquemisantacacári Jesoquirisito Ira agabisaicotajái jirai. ¹⁶ Ora Isêre Tosorintsi osanguenatacaqueri matsiguenga Iroonti Irinibare Tosorintsi. Pogomeanti ora aisonori. Aisati poniagaigui matsiguenga ora icantagueti te onganinate. Aitosati pogatingatiri. Aisati pogometiri ora inganque caninano. ¹⁷ Iroo angantagúque eiro caninasati aroquenta aquemisantaguêri Ira Tosorintsi Irironta cogagái angantaigueneri caninasati.

4

Aro ocarati ora icantasantôri Timoteo Paboro.

¹ Iniaiguina Tosorintsi. Aisati iniaiguina Jesoquirisito Ira Itingomisonori Ira bocapaatsine cara ingomantêgotaiguêri omagaro matsiguenga ira caniatatsi aisati ira camênguitsi ora pairoraca ingantaiguê. Iroo nangantasantêmi, Timoteo, ² pingomantantaguetiro Irinibare Tosorintsi cara inintiro inguemiro matsiguenga aisati ca quero inintiro atiraguiteca piniaguêri. Pinguemisantacagui, piniacagui ora icantagueti te onganinate. Pingomantiri ingante ora caninano. Quero pisintsitsatiri omanapague, antsinisatinta inguemisantobêro Irinibare Tosorintsi. Pogometiri caninasati. ³ Aiquentata irinanê matsiguenga ira quero inintanairo Caninano Nibarintsi. Irianti ingogaiguê ogomeantatsiripague arota irogometaguêri patiro ora icogui inguemisante. ⁴ Quero inintanaí iquemisantiro ora aisonori nibarintsi. Patiro iranintaguêro nibarintsipague ora te ongomeite. ⁵ Pêrosati pinguenguema caninasati, pabebintiri Quirisito cara pitsipiriobiquerinica, pêrosati cara pinguenguitsatacagaigui matsiguenga, pinguemisantacagui Caninano Nibarintsi, pitsonguero ora pitarobacaare.

Orequima cara ingamaque Paboro.

⁶ Pênibaque orequima cara iragamagaiguêna. Aro najáque Jonogaguetequê. ⁷ Aroquenta imitocoquina Tosorintsi, yamai nobaqueri camagari. Naquemisantasanôri Tosorintsi, nitsonquero natarobacaare. ⁸ Yamai naguiaqueri inganquina Atingomi: “Caninarononori ora picanque. Jeroca pomatseiro aroquenta piganataca”. Inganquinaro negaca Irironta caninari comantêgotantatsiri. Aisati ingantocotaiguêri antagaisati ira nintasantaiguiri aisati ira aguaigui iribocapae.

Icomantêgotiri quemisantatsiri Paboro.

⁹ Pininte omanapague popogopê piniopêna ¹⁰ aroquenta ijocanêna Temas. Iroontinta ininti ora inaguetatsi quibatsiquê tenta iraninte iratsipiriero, aique iáque Tesarónicaquê. Quirisente iáque Garasiaquê. Tito iáque Taramasiaquê. ¹¹ Paniro itsibatina Irocas. Pingogui Maricos pomapênari arota iromitocotina. ¹² Nigáqueri Tíquico iriáte Ejesoquê. ¹³ Aisati pomapênaro oquibepiriga nomanchaqui ora nojocanê ibangoquê Cáripio ira timatsi Toróarequê. Aitosati pomapênaro Sanguenaripague. Nanintasantiro ora osanguenataga cara masitsiquê. ¹⁴ Arijantoro ira antaguetiro coshori icantocoquena ora te ongomeite. Ingasitigatêri Tosorintsi aroquenta icantocotaguequina ora te onganinate. ¹⁵ Pigamemari obiro aroquenta teni iranintajiro Irinibare Tosorintsi, icantocotaguetasitajaro. ¹⁶ Cara noguibatê nocomantêgotaca catingsatiquê itingomi Iromasati teni pairi nibabintinane. Ijocaiganaquena antagaisati matsiguenga. Nocoguini quero icasitigatiri Tosorintsi ira jocanêna. ¹⁷ Carari imitocoquena Atingomi yosintsitêna aro nitsonquero nocomantaguequeri matsiguenga cagari jorio ora Nibarintsi agabisaicoontatsiri. Aisati

yogabisaicoquina cara iróquiname Iromasati. ¹⁸ Përosati iragabisaicoquinaro Tosorintsi ora te onganinate. Carari iromisanquena irooti ca nangamaque aique iráganêna Jonogaguitequê cara igáanti Iriro. Përosati iraniacaninatengani Iranta caninarisonori Atingomi. Aroque.

¹⁹ Nobetsataigari Aquira aisati Pirisira aisati imatsiguenga Onesíporo. ²⁰ Përosati inê Erásito cara Corintoquê. Nojocanêri Torójimo cara poeboroquê jitacha Mireto ijanaítêninta. ²¹ Nocogui omanapague popogopê obiro queroquerei otsaengati catsingaguiteri. Yaca aisati yobetsataiguêmi Eoboro aisati Porente, Irino, Caraoria, aisati omagaro popiguemisantane. ²² Nocoguini intsibatimi Atingomi Jesoquirisito irosintsisêretimi. Aisati nocoguini ingábintsasêretaiquemi obirojegui Tosorintsi.

Aro ocaratí ora nasanguenaquemi. *Paboro*

PABORO ISANGUENAQUINERI TITO

Paboro ibetsatari Tito.

¹ ¿Aintabi, Tito? Naro Paboro nasanguenaquimini. Naro ibimantaga yasintina Tosorintsi. Aisati naro iragátane Jesoquirisito. Igáquina nanguemisantacaguiri ira icoiguë Tosorintsi jirai. Aisati igáquina nogótsantaguiri ora aisonori arota inguemisantasantiro. ² Icoguini Tosorintsi intiomotaiguiri përosati Jonogaguitequë. Tenta intoisguëmatimani iroro icantaguëquero negaca jirai teraiquerai irobetsiquiro quibatsi. ³ Yamai icoguini Tosorintsi Agabisaicoontatsiri inguemaiguero nibarintsisonori antagaisati matsiguenga. Iroro igátaguëquina nongomantëgotiri. ⁴ Jirai naquemisantacaquemi. Iroro naquen-gaguëquimi obiro cantaca notomisonori. Yamai nasanguenaquimi, Tito, nocoguini përosati ingábintsemi Pabati Tosorintsi aitosati iromagoriasëretaquemi paneingomentoquë Iroro aisati Jesoquirisito Ira agabisaicocái.

Ora inganque omisantantatsiri.

⁵ Jirai nojocanëmi oboguesiquë jitacha Quereta arota pomitocotaiguiri opiguemisantane canta aisati pingoiguiri omisantantatsiripague cara poeboropaguequë arota iromisantiri quemisantatsiri aisati inguemisantacaguiri. ⁶ Caninataque intimaque negaca omisantantatsiri arota iraniacaninatiri omagaro matsiguenga irironta caninari: ira ágatsi paniro iina. Aisati inguemisantacaguiri Quirisito itomijegui cara irinibatocotiri matsiguenga: “Caninari itomi. Teni iripëgatsatimari iriri”. ⁷ Queroca itimi caninasati, quero poguiri omisantatsiri. Iriroca caninari aro intarobacaquineri Tosorintsi. Quero ini quingachari, querootisa singuitachari, quero ini quisabacagachari, carari caninasati inganqueri imatsiguenga pairoraca. Quero inintasantiri quirequi. ⁸ Caninataque iragobëri ira niantatsi imabaqueri iraperi, aisa iraninquero ora omitocotiri matsiguenga oranta caninaro, inguengema caninasati, inguemisanquero ora icanti Tosorintsi, irobetsiquimata iriati, inganque: “Naro iraisati Quirisito”. ⁹ Ira omisantaiguiri quemisantatsiri ingábintsero ora Nibarintsi Caninaro ora nogomeantë. Aro caninasati irogomequeri matsiguenga iriro, aisati iraguimairenqueri ira pëgatsataro Irinibare Tosorintsi.

Ati icanta Queretasati.

¹⁰ Aintanta tojai ira te inguemisantiri itingomi, inibatasitagueta, yamatobitasitari ira matsiguenga. Ainta joriopague ira cantatsi negaca. ¹¹ Piguimairentiri ira te ingomeite. Aroque yamatobiqueri matsiguenga tojai te inguiancagajiri Quirisito aroquenta yamatobiqueri ira matobiantatsi. Yogomeantiro ora te ongomeite inintininta iragasitimari quirequi. ¹² Ainta paniro Queretasati icomantëgotaiquëri imatsiguenga icanque: “Omagaro nomatsiguenga Queretasati irianti tsoigaigachari aisati perantijegui. Aitosati iroonti itimobiti iraperi”. ¹³ Aisonori icantocoqueri. Iroro pingantasantiri caninasati ira Quere-tasati përosati inguemisantiri Quirisito ¹⁴ quero iquengairo ora iquengabugaitasitomatiro jorío, querootisati iquemisantiri ira tsoenguero Irinibare Tosorintsi. ¹⁵ Iraca caninari, aro iniacaninatiro omagaro. Irari ira te inganinate, aisati ira tsoengatsi, quero iniacaninatiro pairoraca patironta inenguero ora quimingaro, tenta onganinateti ora iraneingomento. ¹⁶ Icantasita igóqueri Tosorintsi, carari itsoigani tenta intime caninasati. Iroro te ingomeite irianti iromaintaga. Quero icantëmatiro pairoraca caninaro.

2

Ogomeantagantsi caninaro.

¹ Pinibatiro përo Queretasati icomantëgotaiosati ora catingaró ora ogomeantagantsi caninaro. ² Pogometaguiri antiasiparipague negaca: quero icantasita pairoraca, përosati iragamema, aisati inguenguëma caninasati. Aisati inguemisantantatsiri Quirisito, iranintasantiri irapiguemisantane, antisqueronisati inganqueri imatsiguenga. ³ Aisati pingomantaiguero antiasiporopague caninasati onganquero omagaro, onguemisantiri Quirisito, quero ocantocotiri basini matsiguenga ora te onganinate, querootisa osinguitagueta, irorota ogometaguierone caninasati ⁴ ora oboinapague tsinane. Ongomantaiguero negaca: “Pinintiri ira águimi, caninasati pingábintseri pijaniquite, ⁵ pinguenguema caninasati, quero pintaguetiri sërari cagari pijime, pinguemisantiri pijime, pingotineri, pintatineri, pitsaguineri imanchaqui, pingantineri pomatsiguenga ora caninaro, querota icantocotaguetasitaro matsiguenga Irinibare Tosorintsi”.

⁶ Aisati ira oboinapague sërari pingantasantiri inguenguema caninasati. ⁷ Obitsita oniaguërine ora caninaro, arota iraniaiguemi aique irogóque aisa inganëro ora caninaro.

Përosati pogometiri ora catingaro. ⁸ Pinibate caninasati querota icantocotimi pairiraca ora te onganinate. Aroca pinganquero negaca aro iripasisugitanë, iromairetanë ira te iraninte inguemisantimi tenta ine ora ingantocotanëmi. ⁹ Aitosati pogometaiqueri ibimantaga inguemisantaiguero ira casintari, intarobacaatineri caninasati, quero ipëgatsatari, ¹⁰ querootisati icositiri pairoraca. Caninataque irogóque ira casintari quero yamatobitiri ibimantaga. Aro inganque casintari: “Caninari Tosorintsi Ira yogometocoque. Icanqueri ibimantaga caninari. Aisonori Iriro Agabisaicoontatsiri”.

Yoniagacái Tosorintsi icábintsacái.

¹¹ Aroque yoniagacáiro Tosorintsi icábintsacái cara icoguininta iragabisaicotaiguero omagaro matsiguenga: matsiguengasonori, biracocha, chori, omagaro. ¹² Irironta caninari Tosorintsi icábintsacái yomecái eiro quemisantatsiri ojocajiro antagaisati ora te onganinate. Yomecáiro anganquero nega: “Yamaica teni ongogue ora icogui basini matsiguenga yaca quibatsica ira te inguemisantaigue, patironta ocogui eiro ogótasantiri Tosorintsi. Yamaica aquenguero ora caninaro, atimaigui caninasati”.

¹³ Aisati yomecái cara aguiaqueri Tosorintsi Agabisaicoontatsiri Ira jitacha Jesoquisirito. Acaninataigui aronta iribocapae. Aniobairi caninarisonori aisati cobeingari Irironta Atingomi. ¹⁴ Jirai icamobicái icoquenta iragabisaicocái irojocajáiro antagaisati ora acantaguete te onganinate, ingancái eiro iraisati imatsiguenga, iraguëtaái. Aro yamai acantaguero ora caninaro. ¹⁵ Antagaisati oca pingomantagueteri Queretasati igáqueminta Tosorintsi. Aisati pingantasantiri inganque ora caninaro. Cara inganquero ora te onganinate, pisintsatsiri. Pinguemisantacaguiri. Përosati pingantiro obiro ora caninaro querota icantocotimi ora te onganinate.

3

Ora inganque quemisantatsiri.

¹ Pinguencagaiguero antagaisati Queretasati ira quemisanqueri Quirisito iraniacanitiri itingomipague ira agáantatsi. Aisati inguemisantaiguero. Pingantiri caninataque ingantaigui ora caninaro. ² Pingomantaiguero quero icantocotasitobaga ora te ongemeite. Querootisati ipëgatsatobaga, querootisa iguisanijintobaga queronta iquengasanta. Intimaigue caninasati. Aisati ingantineri antagaisati matsiguenga ora caninaro. ³ Jirai antagaisati eiro, te anguengaiguero Tosorintsi, teatisa anguemisantaiguero, iátaguetaigui eiro atraca, acantaguete pairoraca ocoque. Amatobitaigaca. Përosati aquengaiguero ora te onganinate. Te angantëmatiro ora caninaro. Anebetaguetero pairorapagueraca. Imaintaigái matsiguenga. Aitosati omaintobaga eiro aguisabacaga. ⁴ Carari cara yoniagacáiro Tosorintsi cara inintasantaiguëri omagaro matsiguenga aisati icábintsacái Tosorintsi Ira Agabisaicoontatsiri, ⁵ yogabisaicocái aroquenta icantaneintegotacái tenta angantëmatiro pairoraca caninaro. Te angantiro. Carari icábintsacái Tosorintsi yogabisaicoontaáiro Isëre Caninaro poguëtetanaái aisati opasiniatitanaái. ⁶ Ipasantacáiro Isëre Caninaro Tosorintsi aroquenta aquemisnanquero ora icancái Jesoquisirito Ira Agabisaicoontatsiri. ⁷ Icábintsacái iniacaninacái arota ingantái iraisati. Aisati oguiaqueronta antiomoqueri Jonogaguitequë përosati. ⁸ Aisonori ora icomantaigái Tosorintsi. Nocoguini pogometasantiri ira quemisanqueri Tosorintsi inguemaiguero oca nibarintsica. Pingantasantiri. Caninataque ingantaiguero matsiguengajegui ora caninaro omitocoquerinta.

Ora inganque Tito.

⁹ Quero posamitëgotaguetero ora te ogótingani. Querootisati pinibatëgotobagaro iripajiro jirainisati. Querootisa pipëgatsatari ira te irogomeantiro caninasati ora isanguenare Moisés. Omagaronta oca quero omitocotimi. ¹⁰ Aintaca ira casiriconiatitaguequerine quemisantatsiri, caninataque pingamanaairi quero yamatobitiri. Queroca iquemisantimi, pigatsitairi pingamanaairi aitosati. Queroca iquemisantimi përosati, pinetseri ira cagari asi eiro. Pomisotoquiri ¹¹ pigótoquerinta iquemisanquero tsoigantsi, aisati përosati icantaguetero te onganinate. Ingasitigatëri Tosorintsi.

¹² Cara nagáquemiri Aretemas queroca Tíquico, omanapague popogopë piniopëna canta poeboroquë jitacha Nicóporis nocoguinininta nagabisëro tsaenga canta. ¹³ Pomitocotasantiri Aporo aisati Senas ira nibabintineri matsiguenga catingasatiquë itingomi. Pomaiguero pairoraca ininti cara iragaganëma pitirooti. ¹⁴ Caninataque aguemisantacaganeeigui canta irogóganaque iromitocotiri basini ira coguitario pairoraca. Cara ingantaiguero negaca caninataque iroronta icocaqueri Tosorintsi. ¹⁵ Yobetsataiguimini antagaisati quemisantatsiri inatsi naróica. Pobetsataiguenari omagaro nanintane quemisantatsiri canta. Nocoguini ingábintsaiquemi Tosorintsi antagaisati obirojegu.

Aro ocarati ora nasanguenaquemi. *Paboro*

PABORO ISANGUENAQUINERI JEREMON

Paboro ibetsatari Jeremón.

¹⁻² ¿Aintajeguibi Jeremón, Apia, Ariquipo? Naro Paboro iromingaga yomianquina yaca Iromaquëca nocomantëgotirinta Jesoquisisito. Nasanguenataiguëmini naro aisati Timoteo opiguemisantane. Aisati nobetsataigari ira botoibiritari Jesoquisisito canta pobangoquë. Nanintimini obiro, Jeremón, aronta acarataiguë atarobacaataiguë jirai. Aisati naquianquimi, Apia, obironta nopiguemisantane, aisati naquianquimi obiro, Ariquipo, obironta natsibataca cara nocomantagueantëro Irinibare Tosorintsi. ³ Nocoguini përosati ingábintsaiquemi Pabati Tosorintsi aisati Jesoquisisito Atingomi. Aitosati nocoguini intimacagasantaiguemi caninasati iromagoriasëretaguemi paneingomentoquë.

Icarasiaqueri Tosorintsi Paboro.

⁴ Cara naquengaiquëmi përosati namanocotaiguimi, nacarasiaqueri Tosorintsi ⁵ obironta quemisantiri caninasati aisati pinintiri Atingomi Jesoquisisito aitosati pinintiri omagaro quemisantatsiri. ⁶ Namanocoquemi arota iraniaiguemi basini matsiguenga, aisati inguemisanqueri Quirisito irirojegui. Aitosati namanocotaiguëri aiquero iriáiganaque iriro irogótanëro ora ipaiguëri Tosorintsi cara iquemisantaiguëri Quirisito. ⁷ Nacanasërebiriqumini naro, Jeremón, aroquenta pinintasantiri ira quemisantaigatsi aisati poganinataiguëri pomitocoquerinta.

Yamanocoqueri Onésimo Paboro.

⁸ Caninataqueme nagáquimi naronta iragátane Jesoquisisito pinganque ora caninaro ⁹ carari teni nanintabetima. Iroro yamai namanaguëquimi aroquenta anintobaca. Yamai naro aroque nantiasiparitanë aitosatina iromingaga yomingabiriquinaro cara nocomantëgotëri Jesoquisisito. ¹⁰ Namanocobintairi obiroquë ira naquemisantacagaji yaca iromingamentoquëca ira Onésimo najitiri yamai notomitsari. ¹¹ Jirai iriro ibimantaga pomeraro te ingomeitomotimi, carari yamai iriro caninari iromitococái. ¹² Yamai nagátajimiri ira nanintasanoti. Págacananatobairi. ¹³ Nocogabeca irinitame naroica arota iromitocotina inganquima pibega obiro cara pomitocotina yamai yominguëtënanta cara nocomantëgotëri Jesoquisisito. ¹⁴ Carari teni naninte irine yaca queroqueraica pininti obiro. Patiro naninti nanganque ora picogui obiro. ¹⁵ Pinguenguema cara isigopitabitëmi jirai carari yamai aisati págobairi përosati iromitocoquemi, ¹⁶ quero picantacagajari ibega ibimantaga carari yamai irianti popiguemisantane aisa pinintane. Nanintiri naro, carari obiro nintasanotërine iriro cagari yamai ibimantaga irianti popiguemisantane. ¹⁷ Aroca pingantacaguina naro pitsipa aisati pingabairi iriro págobairi pingantacagajimari pibeguina naro. ¹⁸ Aroca icantaguetomoquimi ora te onganinate icositanëmica pairoraca irebetimica, pingocotajinaro naro. ¹⁹ Naro Paboro nasanguenaquimimi nasi nobocoquë. Naro pënabentaimirone. Teni nangulancajajimiro obiro ora pirebetina cara naquemisantacaguemiri Quirisito jirai. ²⁰ Caninasati pingantinaro ora namanaquimi eironta quemisantatsiri. Piganinasëretinaro naneingomento, Jeremón, nopiguemisantane.

²¹ Nasanguenaquimi nigóguiminta cara pinganquinaro ora namanaquemi aitosati tojai basini pinganque. ²² Aisati pobetsiquina nasamamento noguiaquenta iromisotocajina Tosorintsi aro cara naniaquintimi obironta manëgotaguina. ²³ Ibetsataimi Epájaras aisati yominguëtëri iriro icomantëgotërinta Jesoquisisito. ²⁴ Aitosati basini ibetsataiguimi Maricos aisa Arisitárico aisa Temas aisa Irocas ira omitocotaiguina cara natarobacaatineri Quirisito cara nocomantëgotiri.

²⁵ Nocoguini ingábintsasëretaguemi Ira Atingomi Jesoquisisito obirojegui. Aro ocarati ora nasanguenaquemi. *Paboro*

ISANGUENATAGUEQUINERI EBEREO IRAPIGUEMISANTANE

Tosorintsi inibatancáiri Itomi.

¹ Jiraisonori Ira Tosorintsi inibatagueantari comantantatsiripague, aisati isanguenat-acagaiguëri. Icomantaguetaiguëri omatsiguenga jiraisonori ² carari yamaica cataguiteri-pague inibatancáiri Itomisonori Ira yoguibatê Tosorintsi. Itomi jitacha Jesoquisrito. Ican-queri: “Notomi, Obiromo obetsiquêrone antagaisati, pasintaguetimaro omagaro, Obiromta obatacagantasanotatsiri”. Aro yobetsiquêro quibatsi, jonoquê, omagaro; aisati yobet-siquêri jonogasati, sêrari, basiniri, antagaisatipague. Aro Tosorintsi imoncaraquineri Itomi ora icanqueri. ³ Aisa Itomi icantasanotari ibega Iriri, aitosati yobariaguitetasanoti, igáantaguetasanotiro omagaro. Aisa icantasanotarinta ibega Tosorintsi, aisati yoniagas-antacái cara ati icanta Iriri. Cara iranintagueue ingantiro pairoraca, iritosonguiro, inganquero. Patiromo inibatê, aro ocaratí. Sintsirosonori Irinibare ora inantacacaro oma-garo ora inaguetanênguítisi. Jirai ainiro acantaguetiro ora te onganinate, iroro te angan-inataguête. Carari ipoque Quirisito, icamobicáiro ora antagueti cagaro caninatatsi, yobi-aquero, ipênabencáiro, isetajáiro catingasatiquê Tosorintsi, yoganinasêretacái. Aroquenta iguisêgotacáiri Itomi Tosorintsi itsipiriacacáiri, aro quero iguisêgotaái yamai. Icamaque, itiaca, icabiritanaa, yogainocanaa Jonogaguítequê, isobigopê ibacosonoriquê Tosorintsi Ira agáantasanotatsi omagaro.

Quirisito ibataiguëri ira ironomireegui Tosorintsi.

⁴ Aisati Itomi Tosorintsi ibataganotaiguëri antagaisati ironomire Tosorintsi irisaanganet-site. Iriri obaqueri Iriantinta Itomi Tosorintsi, carari yobetsicaca irisaanganetsite.

⁵ ¿Aintaco ironomire Tosorintsi icanque:

Obiromo Notomi, notomintêquemi?

Teni intomintimari ironomire. Irianti Quirisito itomintaca. Teatisati ingantocotiri irisaan-ganetsite Tosorintsi:

Naro piriñuima, nontomintê mari.

Te ingantiri negaca. ⁶ Aisati jirai cara Iritsita igáque Itomi yaca quibatsica, icantaiguëri ironomire:

Nococagaiguëri omagaro nasaanganetsite irobaticagueritotasitaigabaquimari Notomi, intingomintaiguê mari.

⁷ Icantocotaiguëri ironomire Tosorintsi:

Nagátaiguëri nonamire iragagajineri matsiguenga Nanibare, iriáiguê sintsirosonori aisa inganquimaro coguentimainga sintseingaro. Aintasati yosigaro pamari cara pitairinga omanapague.

⁸ Carari Tosorintsi icanqueri Itomi:

Tojai pigáantasanoti omagaro Obiromta Tosorintsi cobeingarisonori. Caninasati pigáantanê pêrosati, caninaro Pinibare. ⁹ Tojai pinintasantiro ora caninaro; tesonori pinintiro cara icantaguetiro matsiguenga ora te ongomeite, cara te inguemisantimi. Obiromta Tosorintsi, noganinasêretasantêmi, pabisaiguëri pobaiguëri iraegui pitsipa.

¹⁰ Aisati icanqueri Tosorintsi:

Obiromo Itingomi; jirai pobetsiquêro quibatsi, Jonogaguíte, aisati antagaisati ora inatsi.

¹¹⁻¹² Aiquenta omegaiguêma, carari Obiromo pêrosati cara pintimanê. Aisa ocanta manchaguítisi, inagatanê otsonganaquima, irojoquero, inganaquero irorai; aisati ocanta otsonganaquima oca quibatsica, omasiniatitanê omeganêma; pobetsicairo irorai. Paniromo Obiromo quero popasiniatiti, quero popega, quero pintiasipariti.

¹³ Tosorintsi te ingantêmatiri ironomire; te ingantiri irisaanganetsite negaca: “Pisobigue yaca nobacosonoriquêca; intsome antingomibintaiguëri omagaro irooti cara nagabeimiri antagaisati ira quisaigabitêmi”. ¹⁴ Omagaro ira ironomire irooti intagueti ara icoca-gaiguëri Tosorintsi. Iririojegui saangatsiri te ine ibatsa te iraneingani. Igátaiguëri Tosorintsi arota iromitocotaiguëri iraegui iragabisaicoité.

2

Caninataque anguemisantantiri Itomi Tosorintsi.

¹ Iroro icocagaigacái Tosorintsi anguengasêretiro omagaro ora icantaigacái Itomi, anguemisantantiri. Intsome angantasantiro, querota opecotaro. ² Irianti aisonori ira Tosorintsi igátaiguëri ironomire ingomantaiguëri matsiguenga. Aisati iguisaiguëri Tosor-intsi ira te inguemisantobêro Irinibare ora yogagajineri matsiguenga ira irisaanganetsite,

icasitígataiguëri tsoengatsiri. ³ Tojai ipomirintsibentaigacái Itomi ora iragabisaicoontaái. Yamai aroca otsoinguëri, ¿Pijiqueo isigopicaro atspiriagantsi, querota itsipiriacagáiro Tosorintsi? Jirai Iritsita Atingomi ogometaiguëri irogomere ati onganquima cara iragabisaicotajái Iriró. Aique icomantaigacáiro ira quemaiiguëri. ⁴ Itsibataigari Tosorintsi imitocotaiguëri. Yagobiacaqueri cara itasongagueanti ora te oneingani jirai, aisati ocantacagaiguëri Isère Tosorintsi tojai ara iquenganeintanca matsiguenga ora icogaguëti Tosorintsi. Aro igóiguë matsiguenga cara aisonori ora icantaiguëri Tosorintsi.

Jesos Itingomi antagaisati.

⁵ Aro yamaica nanibatégotëro basiniati quibatsi cara iragáantasanté Atingomi aikuëta. Tosorintsi quero ipiri ironomire iragáantane. ⁶ Aroque isanguenaque David jirai, yosamitëri Ira Tosorintsi:

Naantijegui matsiguenga, te nangantaiguëmi pibega Obiro. ¿Pairo piquengabiritaiguëna? Aisati ¿Pairo piniacananibiriqueri matsiguenga? ⁷ Cara pogaiganaquina yaca quibatsica poguibatëri pisaanganetsite, yabisaiguëna arosata, carari quero ocosamaniti cara irobataiguëna. Piniacananataiguëna, aisati picantaiguëna nasintaguequimaro omagaro ora pobetsiquë yaca quibatsica. ⁸ Pagobiacaquina cara natingomibintaiguëri omagaro ira pobetsiquë.

Ocari oca isanguenaque David. Pinetse, icanque: “Nabisaiganaqueri omagaro, intingomintaiguëna antagaisati inatsi”.

Carari yamaica terai omoncaratima omagaro, terai agabeiro omagaro yobetsiquë Tosorintsi, ⁹ iroro cantënguicha icábintsasanotaigacái Tosorintsi cara igáqueri Jesos ora ipoque yaca quibatsica, itsipiriasanotapë icamobicái arota quero iáti eiro Sharincabeniquë. Cara irirai imatsiguengatapë Jesos, arosata ibataigabaqueri ironomire Tosorintsi. Icamaque Quirisito, aro yoganiatairi Tosorintsi yoguibatairi Itingomisonoriguente, icobeingataqueri, yabisaigairi irisaanganetsite aitosati.

Pairo icamobique Jesos.

¹⁰ Omagaro yobetsiquëro Tosorintsi, inaguequero, aisati igáantasantëro antagaisati. Aisati icoque iriáiguë omagaro itomijegui cara Jonogaguetequë intiomotaigapëri cara igáanti Iriró. Iroro itsipiriasantacaguëqueri cara igáqueri Jesos ora irogóontëmari cara Iriró caninari, iroro iragabisaicoontëmari iraugui quemisanquerine. ¹¹ Aro yoganinataigacái Jesos, iroro yamaica ajitaguëtiri Iriró: “Pabati”. Aisati te iripasiguitëgotái Jesos icantaigái: “Igue”, aisati “Tsio”. ¹² Jirai Quirisito icanqueri Iriró cara Sanguenariquë:

Nongomantaiguëri igueegui aisati tsoiegui ati picanta Obiro; cara yapatoitaigaca ira quemisantimi, aro nangarataiguëri nangántabenquimi nanganinabenquimi.

¹³ Aisati icanque:

Aisa nacantaigari igueegui, naquemisanqueri Tosorintsi.

Icanque aisati:

Pinetsaiguëna Naro yaca aisati iraugui natenca, itomijegui Tosorintsi aisati irisintoegui ipënarí Pabati cara iquemisantaiguëna.

¹⁴ Omagaro eiroegui quemisantaiguëri Tosorintsi eanti matsiguenga, angamaiguë. Aisa Quirisito icampái ibega eiro cara ipaniaca Jonogaguetequë ipoque yaca quibatsica imatsiguengatapë, icamaque. Aro icamobicái arota iragabeiri camagari ira cogabitënguicha iráganacáime Sharincabeniquë cara angamaque. ¹⁵ Jirai otSOROGAIGABITACARO cara angamaiguëme, ajáqueme Sharincabeniquë, carari ipoque Quirisito yogabisaicotajái, yamaica teni ontsoroguro agamane. ¹⁶ Igóiguë eiro cara Quirisito te iromitocotaigari ironomire Tosorintsi, te ingábintsaugeri, carari ipocasiquero ingábintsaugacái eiro quemisantatsi, eironta imatsiguenga Abaram quemisantatsiri. ¹⁷ Icanque Quirisito caninasati, imatsiguengatapë aisa icantasanotacái ibega eiro, ireintiegui, arota ingantaneintëgotái. Aisati icantasanotëro omagaro ora icocaqueri Tosorintsi: Iriantinta Itingomisonori Saseriroti inibabencái, icamobicái arota iragabisaicotajái irisetaáiro Tosorintsi iromaguisantajáiro ora acantaguetomotiri te onganinate. ¹⁸ Jirai Jesos yagobiaqueri camagari cara icogabeca irantacaguirime ora te onganinate. Tojai itsipiriobicái Jesos igóontacaro ora atspiriaguë eiro pairoraca. Aro yamai igótasanti iromitococái cara icogabeca camagari iromerataigáime irantacacáiro ora quimingari.

3

Quirisito yabisëri ira Moisés.

¹ Yamai, nopiguemisantane, te pingantajima pibega jirai. Nongomantaiguëmi cara icogaiquëmi Tosorintsi pintiomotaiguëri canta Jonogaguítequënta. Pinguengaiguëri Jesus Ira piquemisantaguë. Igáqueri Tosorintsi yaca, icomantagueantë ati icanta Tosorintsi aisati pairoraca icocacái. Irianti Itingomisonori Saseriroti inibabencái catingsa-tiquë Tosorintsi, yogaganacáiro anibare cara amanocoqueri. ² Jirai Tosorintsi icanqueri Moisés: “Caninasati pogometaiguëri pomatsiguenga, pigótacagaiguëri omagaro ora nococagaiguëri”. Aro icanquero antagaisati ora icanqueri Tosorintsi. Carari Jesus yabisëri ira Moisés, icantasanotëro omagaro ora icanqueri Iriri. ³ ¿Teco aniacaninatasantiri ira obetsiquirora ibango: iroonti pongotsi, te aniacaninatasantiro? Igóque ira obetsiquirora ibango, te ogótëmate pongotsi. Aisa ocanta caninataque aniacaninatasantiri Jesus Irironta Atingomisonori; quero aniacaninatasantiri Moisés cagarinta Atingomi. ⁴ Ainta matsiguenga obetsiquero omagaro pongotsipague, carari yobetsiquëri Tosorintsi antagaisati timaigatsi. ⁵ Aro aisonori icanquero Moisés omagaro ora icocaqueri Tosorintsi. Irero iromeraro Tosorintsi, caninasati yogagajineri imatsiguenga ora icomantëri irero Tosorintsi ora abisënguítisine aikuenta. ⁶ Carari cagari Quirisito iromeraro Tosorintsi, Irianti Itomisonori. Icantasanotëneri Iriri antagaisati ora icocaqueri. Irianti Itingomi omagaro ira quemisantatsiri. Aroca asëretaiganaquimari përosati, anguemisantasantaiguëri, igóiguë eiro cara iráganacái Jonogaguítequë. Caninataque anganinabentaiguëri, aro igóiguë cara omatsiguengatacari Tosorintsi.

Tosorintsi iguisaiguëri ira tsoengaiguëri aisa pëgataigari.

⁷ Jirai osanguenatacaqueri David Isëre Tosorintsi, icanti:

Yamai, omagaro cataguitëriquë, aroca pinguemaigabaquero ora inibatëmi Tosorintsi, ⁸ quero pipëgatsataigari, querootisati pitsoingui. Quero picantaigari ibega pomatsiguenga jirai cara ipëgataigabitacari Tosorintsi canta tenta ontimingani, ijitaigabitaca quero icasitigatiri. ⁹ Icanque Irero: “Aisonori ipëgataigabitina pomatsiguenga jirai, iniantaiguëna aroca nangasitigataiguëri. Iniaigabitacarora tojai ora nitasongüneri; carari natsipiriasicaro tenta iranintaiguë inguemisantaiguëna. ¹⁰ Cosamani 40 osarini ipëgataiguëna. Irero naguisaneintaguëqueri, nacantaiguëri: “Përosati cara pitsoingaiiguëna, përosati cara pipëgataiguëna. Te pinguenganeintina. Te pingogue pigóigue pairoraca nococagaiguëmi”. ¹¹ Irero naguisaneintaguëqueri, nacantasantaiguëri: “Quero paretaiiga iroraiquë quibatsi, quero nimagoriasëretagaiguëmi canta caninaguiteroquë”.

Oca osanguenaca jirai.

¹² Nopiguemisantane, pigamaiguëma querota pitsoingui Tosorintsi catimanerisonori. Te pinganinasërete cara te pinguemisantiri, pijocanëri, popecotari. Cara pinganque negaca, cara pomaintiri Tosorintsi caninarisonoriguente, obiro te pingomeite. ¹³ Iroonti caninataque omagaro cataguitëri pingantobaguëna pisintsisëretobaguëna paniropague cara përosati pinguemisantasantanëri Tosorintsi, aroca quero yamatobitimi camagari inganquëmi pomaguisantiri Tosorintsi, pigatsitairo quimingaro ora pijoque jirai. ¹⁴ Carari aroca përosati anguemisantasantanëri Quirisito, asëretanëmari, igóiguë cara antsibatëmari Jonogaguítequë. ¹⁵ Ocanti Sanguenari:

Yamai, omagaro cataguitëriquë, aroca pinguemaigabaquero ora irinibaquëmi Tosorintsi, quero pipëgatsataigari, querootisati pitsoingui. Quero picantaigari ibega pomatsiguenga jirai.

¹⁶ ¿Pairi quemagabitacari Tosorintsi, carari te inguemisantiri, ipëgataigari? Iriantiegui antagaisati ira yomisotocaguë Moisés cara Ejípitoquë. ¹⁷ ¿Pairi itsirishaigaca Tosorintsi, iguisaiguëri tojai osarini ocaratí 40? Iraegui te inguemisantaiguëri, tojaipague icantague-tiro ora te onganinate. Aro Tosorintsi inintacagaiguëri icamaiguë cara tera ontimingani. ¹⁸ Tenta inguemisantaiguëri, irero icantasanotaguëqueri: “Quero paretaiiga iroraiquë quibatsi, quero nimagoriasëretagaiguëmi canta caninaguiteroquë”. ¹⁹ Irero igóiguë eiro cara tiguëti ingantaiguëma ingaiganaque caninaguiteroquë tenta inguemisantaiguëri Tosorintsi.

4

Icoguini Tosorintsi iromagoriasëretagái.

¹ Pinetse, icancái Tosorintsi: “Aroca pinguemisantaiguëna, náganëmi Jonogaguítequë, pintiomoquëna Naro, nomagoriasëretaguëmi”. Intsome agamaiguëma querota acantaigari ibega iragui te inguemisante jirai, te iraretimaro caninaguiteroquë. ² Aquemaigabaquero Caninaro Nibarintsi cara Quirisito iragabisaicotajiri pairiraca quemisanquerine iráganëri jonoquë. Aisa icanta irirojegui jirai iquemocotaiguëro caninaro quibatsi icasiriconiatanëneri irero Tosorintsi, carari te inguemisantiri, te ingaigapë caninaguiteroquë.

³ Aroque imagoriasëretacái Tosorintsi eiroegui quemisanqueri, aisati antiomoqueri Jonogaguitequë përosati, carari quero imagoriasëreti irirojegui ira te inguemisantiri. Icanque Tosorintsi:

Naguisaneintaiguëri, nacantasanotaiguëri: “Quero picagui obirojegui canta iroraiquë quibatsi, quero nimagoriasëretagaiguimi canta caninaguiteroquë”.

Jirai Tosorintsi yobetsiquëro omagaro quibatsi aisati Jonogaguite, itsonquero imagoriaque. Aisati yobetsiquëneri matsiguenga iromagoriasëremento, carari tenta inguemisantaigue, te iromagoriantimaro. ⁴ Cara Sanguenariquë icantocoquero cataguiteri comagoriantague, iroonti sábaro:

Ocarati 6 cataguiteri Tosorintsi yobetsiquëro antagaisati. Aroque. Aique cataguiteriquë 7 imagoriaque. Aro ocarati.

⁵ Aisati icanqueri Tosorintsi:

Quero paretaiga iroraiquë quibatsi, quero nimagoriasëretagaiguimi canta caninaguiteroquë.

⁶ Aro ocaninati ora icanque Tosorintsi jirai, carari te iromagoriasëretague ira quemaigabitacari tenta inguemisantaiguëri. Carari yamai aintapague quemisantatsi imagoriasëretaque Tosorintsi. ⁷ Pabisaignaque tojai osarini, aro icanai Tosorintsi aisati, “Yamai cataguiteri, nococagaiguëri matsiguenga inguemisantina, aro nomagoriasëretagaiguëri”. Irooti isanguenatacaqueri David:

Yamai, omagaro cataguiteriquë, aroca pingumaigabaquero ora inibatëmi Tosorintsi, quero pipëgatsataigari, querootisati pitsoingui.

⁸ Arome ingaaganëri imatsiguenga Josué cara caninaguiteroquë, querome Tosorintsi isanguenatacaquirime David cara isanguenatacoquero basinati cataguiteri cara iromagoriasëretague quemisantatsiri. ⁹ Iroro igóiguë eiro aiquenta iráganëri Jonogaguitequë antagaisati ira quemisantaiguëri Tosorintsi, intiomotaigapëri përosati, quero ipomirintsitëmati itarobacaataji arota iraretimaro Jongaguite. ¹⁰ Pairiraca abencari Tosorintsi, imagoriasëretapë. Jirai itsonquero itarobacaare Tosorintsi cara yobetsicaguequero omagaro, aique imagoriaque, te irantaje aisati. Aisati eiro, aroca ajáque cara Iriróquë, aisa angantaigapëmari ibega Iriró, imagoriasëretagapë.

¹¹ Intsome ongoasante aretaiguëma canta Tosorintsiquë cara iromagoriasëretacái. Quero ipëgatari, querootisati itsoingui. Queroca aquemisantiri quero aretari. ¹² Igóiguë eiro cara Tosorintsi catimanageronori. Te ongomëtatomotiri pairoraca. Intiro pairoraca inganque. Igóti antagaisati. Inibatantaro Irinibare ora ogótacacái ati acanta asërequë. Irinibare aisa ocantaro sabiri catsëbarosonori pitirooti cara ocaraque tsomagui. Igótasantiro Tosorintsi ora aquenga aisati igótasantiro ora ocogui aisati ora anganque, omagaro. ¹³ Te pairoraca ongantima ománomotimari Tosorintsi, teatisati pairiraca ingantima irománomotimari ora icanque, igótasanotacáinta ati acanta aisati atiraca inaigui eiro. Iniasanotiro omagaro. Ingomantëgotacái acaninatica eiro aisati ainiroca aquemisanqueri.

Jes icantari ibega itingomi saseriroti.

¹⁴ Intsome anguemisantaiganaqueri Tosorintsi përosati aintanta Jesus Itomi yogainocanaca cara Jonogaguitequë cara inibabencái catinasati Iririquë. Irianti itingomisonori Saseriroti yabisaguëri omagaro basini saserirotijegui. ¹⁵ Jirai imatsiguengatapë Jesus, itsipiragueque pairoraca, aisati ira Satanás icogabeca irantacaquerime ora te onganinate, carari te irantiro. Iroro igóontacaro Jesus ora atsipiraiquë eiro yamai, aisati igóque ati icancái camagari. Igóque ora pomirintsitococái, yogasëretococái icantaneintëgotacái, icábintscái, imitococái. ¹⁶ Aro quero yamai otsoingui omanocotiri Tosorintsi, igóquenta inguemacái, ingantaneintëgotacái ingábintscái iromitococái.

5

Ati acanta itingomi saseriroti.

¹ Ira matsiguenga icóiguë Tosorintsi ipiaqueri itingomi saseriroti, icocaqueri iromanocotaiguëri imatsiguenga. Aisati yóguëneri Tosorintsi ibirapague ira ipaiguë matsiguenga. Aisati icomantëri matsiguenga cara icaninatasanoti Tosorintsi. Aintaca poro antaguetiro ora te onganinate, ira saseriroti óguërine ibira ira yamapë cantaguetatsiri, itaquineri Tosorintsi. Aique yágacananatëri matsiguenga Tosorintsi aroquenta iquemisanqueri. ² Ira itingomi saseriroti aisati icancái ibega eiro: matsiguenga ini. Igóque ingantaneintëgotacái eiro cara angantaguetiro quimingaro, ainironta icantaguetiro iriro ora te onganinate. ³ Iroro yóguëquineri Tosorintsi iraisati oisha, itaquineri. Aique iróquineri Tosorintsi iroishatapague imatsiguenga cantaguetatsiri. ⁴ Te pairi pegachane itingomi saseriroti iriati, iriantu ipiaque Tosorintsi, aisa ocanta jirai cara Tosorintsi icóiguëri Aarón ipiaqueri itingomi saseriroti.

⁵ Aisa icanta Quirisito, te imeguima Iriati Saseriroti. Irianti icoiguë Iriri, ipiaqueri Itingomisonori saseriroti. Te ingantiro Iriati, carari icanqueri Tosorintsi: Obiuro Notomi, notomintëmi yamaica.

⁶ Aisati icanqueri basiniquë Sanguenari:

Përosati Obiuro Saseriroti, pisaserirotitë cara picantari ibega Meriquisirec.

⁷ Jirai cara inasegui Quirisito yaca quibatsica, tojai yamanopiantiri Iriri, iragasantaca, aisati icaimëri Tosorintsi, icanqueri: “Pabati, aroca nangamaque, nigóquimi pingabiritajina”. Iquemisantasanotërinta Tosorintsi, aro ipëri ora yamanocoque. ⁸ Aisonori, Iriroro Itomi Tosorintsi, carari iquemisantasanotëri Iriri, iroro itsipiriasantaguëque pairoraca. Aro igótanëro ati ocanta cara aquemisantiri eiro, atsipiriaque. ⁹ Cara iquemisantasanotëri Tosorintsi omagaro icocaqueri, iroro Tosorintsi igóntacari Ira Itomi cara Irianti caninarisonoriguente, yagobeiro cara iragabisaicotaigairi antagaisati quemisantaiguëri Iriri. Yamai quero íati eiro Sharincabeniquë, carari iráganacái Jonogaguetequë antiomqueri përosati. ¹⁰ Tosorintsi ipiaqueri Itomi Itingomi saseriroti, icanqueri: Obiuro Saseriroti, pisaserirotitë cara picantari ibega Meriquisirec.

Terai inguemisantante irageui isanguenaquine.

¹¹ Aiti tojai nocogabeca nogótacagaiguemi carari ocomëtaguetomotaiguëmi tenta pingogaiguëmi pinguemisantaigabaquero. ¹² Jirai tojai osarini piquemisantaigabitaca, carari yamai picantaigari ibega cara terai inguemisante. Onganinateme yamai pogometaiguëtime basini, carari picogaiguë irogótacagaigaimi aitosati irootisati ora yogometaiguëmi jirai. Aisati picantari ibega janequi, picogaiguero pitsomi tiguëti ongantima popero basini coshori. ¹³ Ira aisa icantari tsorori janequi, icogui itsomi, te irogóntimaroro ora caninaro, teatisati irogótiro ora te onganinate, tenta inguemisantantiro Irinibare Tosorintsi. Irari antiasiparitatsi yosigari quemisantantatsiri. ¹⁴ Carari pinguemisantaiguëtime Tosorintsi, pingogaiguëme poperi irasi antiasipari. Pigótasantaiguërome paio caninari pinganque aisati pigóiguërome ora te ongemeite, quero picantiro.

6

Ikamanaiguëri quemisantabetachari cara aiquero inguemisantasantanëri Quirisito.

¹ Iroro ora quero nogatsitaimiro ora noparintaca nogometocotopiantëri Quirisito tenta omomirintsite. Caninataque aiquero pijáiganaquitigüe pigótasantanëro omagaro ora icocagaiguëmi Tosorintsi. Nogometaiguëmi jirai: “Quero picantasitaguetero pairoraca, queronta pogabisaicotimi; tiguëti pingantima pigabisaicotima obiati. Caninataque pinguemisantiri Quirisito arota iragabisaicotajimi Tosorintsi. ² Pomaotisabiritaiguëmari Quirisito arota irogótocotimi matsiguenga cara piquemisantiri. Cara pomanocqueri Tosorintsi iromitocotiri popiguemisantane, poguineri pobaco iguitoquë. Cara angamaque angabiritanaima, iraganiatacái Tosorintsi. Aisati ingomantëgotaigacái”. Aro quero nogatsitaimiro oca aroquenta pigóiguëro. ³ Aroca iranintacaquina Tosorintsi, nogometaiguëmiro irorai arota pigótasananëro ora icocagaiguëmi Tosorintsi.

⁴ Pinetsaigüe. Aintapague matsiguenga iquemabecaro Irinibare Tosorintsi, icaninabentabecari Tosorintsi cara icábintsabitacari, omitocotabecari Isëre Tosorintsi coshoni poguëri. ⁵ Aisati igótabecaro caninaro Irinibare Tosorintsi, icaninabentabecaro; iniaguëtabecaro cara itasongomoqueri ira comantëgotaiguëri Quirisito, igótabecari Itingomi. ⁶ Oca igótabecaro omagaro, carari ipigapaa yomaguísantajiro ijocajiro, itsoinguëri Quirisito Ira iquemisantabeca jirai. Cara ijocajiro cara iquemisantabecari Quirisito, aisati icanca ipëicotajirini Quirisito. Itsoinguëri iriro, aitosati icoque iritsoengagajiri basini matsiguenga cara irisërontaiguëmari Quirisito aisati. Tiguëti ingantima imasiniatitajima inguemisantantari ira quemisantabetcha aroquenta ijocajiri Quirisito. Pigamemari, quero picantari ibega iriro. ⁷ Ira quemisantasantatsi yosigaro quibatsi cara opariaque angani, oquibianë panguirintspague, oguitsotanëneri ira panguitiro. Tosorintsi aganinatëro oca quibatsica caninari. ⁸ Carari ira quemisantabetcha yosigaro basini quibatsi cara aitosati opariaque angani. Ipanguitëro caninaguisori, carari te ontoiaigüe panguirintsi. Otojaiganaque totsei aisati porontspague. Aniaquero ora quibatsira, angantocoquero: “Te onganinate quibatsi. Intsome oporoiro, ataguëro omagaro”. Pigamema; quero picantaro ora quibatsi te ongemeite.

Yoganinataiguëri ira isanguenaquine.

⁹ Aroque nacamanaaiguëmi, nanintaneegui, carari nagamëmi aisonori cara piquemisantaiguëri Quirisito, yogabisaicotaigaimi, aro pitimaiguë caninasati picanquero caninaropague. Aisa picantaro quibatsi caninaro ora omitoiaiganaquero oguito. ¹⁰ Tosorintsi Irianti caninarisonoriguente, quero ipeicotaro cara pomitocotaiguëri popiguemisantane jirai, pinintaiguëri, përosati cara picantiro yamai.

¹¹ Nococagasantaiguêmi paniropague cara pêrosati pingábintsaiqueri popiguemisantane, aisati aiqero pinguemisantantaiganaqueri Tosorintsi, pigueiri Atingomi cara iribocapê irágaiganaquemi Jonogaguítequê. ¹² Quero poperabiritaro ora icocaquemi Tosorintsi. Iroonti pingantaiguemari ibega iraegui quemisantatsiri icantantaiguineri Tosorintsi antagaisati ora icocaqueri, irágobêro omagaro ora yobetsicaiguêneri Tosorintsi.

¹³ Pinetse, cara ocogui ogótacagui matsiguenga cara aisonori acantiri, acanque: “Igóti Tosorintsi aisonori oca nacanquemia. Aroca nomatobiqumi, iratsipiriacaquinata”. Te aisa ingantái Tosorintsi. Jirai cara Tosorintsi icantasanotêri Abaram cara imêri itomi, tenta irine basini ibatiri Iriro, patiro icanqueri: “Aisonori oca nocomantêmi, Naronta Tosorintsi; quero nopasiniatitimi Nanibare, quero namatobitimi”. ¹⁴ Aisati icanqueri ira Abaram: Aisonori, tojai nangantocobintimi, tojai nangábintsêmi, nomitocoquemi, tojai nomitojaiganaqueri pomatsiguengajegui.

¹⁵ Aro antsinisati yoguiaqueri Abaram irooti cara imoncaraquero Irinibare Tosorintsi. ¹⁶ Cara pairiraca matsiguenga icogui irogótacakeri basini cara icanqueri ora aisonori, inganqueri: “Aisonori nacanquemi, iniaquina Tosorintsi, igóque. Queroca aisonori, nocoguini iratsipiriacaquina”. Aro irogóque cara quero yamatobitiri imatsiguenga, Irirota cobeingarisonori Tosorintsi. ¹⁷ Cara icoque Tosorintsi irogótacagaiguêri iraegui quemisanqueri cara aiquenta imaiguêri omagaro ora yogaiguêneri, icantaiguêri: “Aisonori omagaro oca nongomantaiguêmi Naanti Tosorintsi. Quero nopasiniatitiro Nanibare”. ¹⁸ Aro aisonori Irinibare Tosorintsi: teni irogóte intoiguema. Carari aisati icanque: “Aisonori oca nongomantaiguêmi”, aro igóiguê eiro cara quero yamatobianti. Yamai aroca abentimari, igótasanti eiro iromoncaraquero ora icancái: ingábintsaiacái, iragabisaicotajái. ¹⁹ Aroca igóiguê yogabisaicocái, aro anganinabentasantêri, quero ogasêreta aisati. Aisati igóiguê inguemacái Tosorintsi cara omanocoqueri, aisati aiquenta arequima eiro cara Tosorintsiquê tiguêti oticobacáine. ²⁰ Ainta Jesus canta yamaica, icamobicái ibacái jonoquê, cara inibabencái Irirota Itingomisonori Saseriroti pêrosati cara icantari ibega Meriquisirec.

7

Ira Meriquisirec yabisaiuguêri saserirotijegui imatsiguenga Irebí.

¹ Yamai nongomantêgotêmiri ira Meriquisirec. Iriro jirai itingomi Saremisati. Aisati ipiaqueri saseriroti Tosorintsi Ira jonoquênintaberi. Aisati ainta Abaram. Yágaiganaqueri iratirite, yoguiataiganaqueri catsimari ira áganêri itomitsari. Imabocapêri ipoguiriaigapêri catsimari antagaisati itingomipague. Yamaigapairi itomitsari aisati ibiraegui ira yágabitanaca catsimari aisati yamapê tojai basini ora yasintabeca pairorapageraca. Cara ipigapaa itonguibotobacari Meriquisirec, icabêri: “Ingábintsemita Tosorintsi”. ² Aique yágarantêro Abaram ora yágabitsataiguêri catsimari, ipagaranqueri Meriquisirec, icanqueri: “Jeroca irasi Tosorintsi”. Aitica 10, aro ipêri patiro irasi Tosorintsi. Ira saseriroti ijita Meriquisirec, ora iripajiro ocanti caninarisonori. Aisati itingomi Saremisati. Sarem ocanti caninasati itimaiguê. ³ Iriro te irisanguenatêgotengani iriri teatisati iniro. Te irogótingani atiraca ocanta cara iboguê, teatisati irogótingani atiraca ocanta cara icamaque. Aisa ocanta pêrosati itimi, iriro icantari ibega Itomi Tosorintsi Ira pêrosati itimi isaserirotitasantanê.

⁴ Pinguengeri Meriquisirec irianti abisêri Abaram jirai. Abaram iparintaigacari joríojegui, carari itingomincari Meriquisirec iriro, ipagaranqueri 1/10 (aitica 10, ipêri patiro) ora yágabitsataiguêri iripoguiriane. Aisonori Meriquisirec yabisêri Abaram. ⁵ Aique itojaiganaque imatsiguenga Abaram irooti cara inê Irebí. Aro Tosorintsi isanguenatacakeri Moisés: “Tosorintsi ipegaiguêri saserirotijegui imatsiguenga Irebí. Aisati icocaqueri joríojegui imagaranqueri saseriroti arosata iraisati, ibira, ibanguire, iguireguite, omagaro. Aintaca 10, imêri paniro”. Aro isaserirotitê Irebí aisati imatsiguenga, antagaisati ipaniaca Abaranquê. ⁶ Ira Meriquisirec cagari imatsiguenga Irebí, carari iriro saserirotitênguisti, yágobêneri Abaram cara ipagaranpêri 1/10 iguireguite aisati ibiraegui (aintaca 10, ipêri paniro) ora irasi Abaram. Aique icabêri: “Ingábintsemita Tosorintsi”. Aro icantocobentobêri Abaram, ira icanque Tosorintsi intojaiganaqueta imatsiguenga. ⁷ Yamai igóiguê cara Meriquisirec obaqueri Abaram, yabisêri icanquerinta, “Ingábintsemita Tosorintsi”. ⁸ Yamai iraegui saseriroti yágapininqueri 1/10 (aintaca 10, yáguê paniro) ira ipagaranpêri matsiguenga, carari iraegui saseriroti imoncaracái cara icamaque. Iriro cantênguicha ira Meriquisirec inasitaca. Icantabeca te ingame iriro tenta ongantocotiri Sanguenari cara icamaque. ⁹⁻¹⁰ Jirai ipagaranqueri Abaram arosata (110: aitica 10, ipêri patiro) ora yágabitsaqueri catsimari itingomipague. Yamai yágobêri 1/10 ira saseriroti imatsiguenga

Irebí. Cara Abaram itonguibocari Meriquisirec jirai ipagarantobèri 1/10. Arome irinaqueme Irebí, imagaranquerime ira Meriquisirec aitosati. Meriquisirec yabisaiganaqueri Irebí aisati antagaisati imatsiguenga.

Ira saserirotijegui, imatsiguenga Irebí, tigue ingantima iragabisaicotái.

¹¹ Jirai itingomi saseriroti irianti Aarón cara Tosorintsi isanguentacaqueri Moisés. Isanguenatocotaiguèri saserirotipague paniacha Aarónquè aisati Irebíquè. Itimaigabita tiguètinta ingantima iragabisaicotajiri imatsiguenga. Iroro Tosorintsi igátaguèqueri basiniati Saseriroti, cagari imatsiguenga Irebí, Irianti cantari ibega Meriquisirec. ¹² Aro Ira Saseriroti basini igáque Tosorintsi iripégairi saserirotijegui imatsiguenga Irebí. Aisati tenta pairi abisaicoontimarone isanguenare Moisés, tiguètinta ongantima iromoncaratiro, aiti irorai Nibarintsi Caninaro opégajiro ora inaga isanguenare Moisés. Yamai Tosorintsi quero icantái omoncaratiro ora isanguenare Moisés. ¹³⁻¹⁴ Aisati Ira Saseriroti Irianti imatsiguenga Jorá cara igóiguè eiro, te aro imaniema Irebíquè. Jirai te irisaserirotite pairiraca imatsiguenga Jorá tenta Moisés irisanguenatègotèmatiri saseriroti paniènguicha Joráquè. Irianti isanguenatocoque iraugui irasi Irebí. ¹⁵ Yamai igóiguè eiro ainta Jesos Irianti Irirai Saseriroti aisa icantari ibega Meriquisirec. ¹⁶ Ira Jesos te iromatsiguengatimari Irebí carari isaserirotitasantacaqueri Tosorintsi aroquenta icaniantanè pèrosati. ¹⁷ Irootisati icanqueri Tosorintsi jirai:

Obiro Saseriroti pèrosati cara picantari ibega Meriquisirec.

¹⁸ Yamai pinabitaca ora isanguenatocotaiguèri saseriroti imatsiguenga Irebí, tsongaca. Te ingogue Tosorintsi omomirintsitairo yamai tenta ogabisaicotajái, aisati tenta oretacagái Tosorintsiquè. ¹⁹ Tiguètinta ongantima omoncaratiro isanguenare Moisés, quero pogabisaicotiri pairiraca. Carari cara angumisanqueri Quirisiti, iragabisaicotajái Tosorintsi, irojocajáiro ora acantaguèti te onganinate, intimacagajái. Quirisito yaretacacái canta Tosorintsiquè, igótacacáiri Iriri.

Icanque Tosorintsi: "Aisonori pèrosati isaserirotitanè Quirisito".

²⁰⁻²¹ Te ingantasitima Tosorintsi, icantasanti:

Naro Tosorintsi; oca nongomantèmi yamai, quero nopasiniatitiro Nanibare: "Obiro Saseriroti pèrosati".

Quirisito te aisa ingantimari ibega saserirotipague imatsiguenga Irebí. Irrojegui ipegaigaca saseriroti cara isanguenatocotaiguèri Moisés, carari Tosorintsi ipiaqueri Jesos Saseriroti. ²² Aisonori Jesos ibataiguèri basinipague saseriroti, aisati igótacacái cara iragabisaicotaigairi Tosorintsi irasintaiguèmaro antagaisati ira quemisantaiguèri. ²³ Tojai inaigabitaca iraugui saseriroti imatsiguenga Irebí aroquenta panironaque icamaiguè te pèrosati cara irisaserirotitaiganaque, ²⁴ carari Jesoquisisito pèrosati isaserirotitanè Irironta timatsi pèrosati. ²⁵ Pèrosati cara inganquima iragabisaicoontimari iraugui quemisanqueri, ira cogasantatsi iraretacaquimari catingsatiquè Tosorintsi. Pèrosatinta itimi Jesos, pèrosati inibabentanèneri iraisati.

²⁶ Aisonori, Jesos caninasationori isaserirotibentaiguèri quemisantatsiri, Irironta caninarisonoriguinte, te ingantèmatiro quimingari, te ingantaguetèmatiro, te aisa ingantimari iraugui cantaguetasanotatsi yaca quibatsica; aisati icaimèri Tosorintsi itempari cara Jonogaguitequè. ²⁷ Te aisa ingantimari ibega ira basini itingomi saseriroti. Antagaisati cataguitèri yógapininquineri Tosorintsi ibirapague itaquineri, tojai iquianquero ora te onganinate icantaguèti iroro aisati ora icantaguèti imatsiguengajegui. Carari te irógopiantineri ibira Quirisiti, patironta icamobicái Iriri. Aroque, antagati. Quero icamaji aisati. ²⁸ Jirai isanguenare Moisés: isaserirotitaiganaque imatsiguenga Irebí. Iriantiegui matsiguenga ini, ainero icantaguetiro ora te onganinate. Iroro cantènguicha aique Tosorintsi cantègotèri Quirisito: "Naronta Tosorintsi aisonori oca nocomantèmica: pèrosati isaserirotitanè Notomi Irianti caninarisonoriguinte".

8

Isaserirotitanè Quirisito canta Jonogaguitequènta.

¹ Yamai nocoguì pigótasantaigue cara Jesoquisisito ibataiguèri antagaisati basini saserirotijegui. Iriri Itingomisonori Saseriroti. Yamai ainta Iriri Jonogaguitequè, isobiaque ibacosonoriguè Tosorintsi Ira cobeingari. ² Ira imatsiguenga Irebí yamanopiantaiguèri Tosorintsi cara pongotsiquè ora yobetsiquè matsiguenga, ojita ibango Tosorintsi. Carari Quirisito Itingomisonori Saseriroti, inibabencái catingsatiquè Tosorintsi Jonogaguitequè cara ibangosonoriguè ora yobetsiquè Tosorintsi, cagaro ora yobetsiquè matsiguenga. ³ Ira itingomi saseriroti ipapininqueri Tosorintsi pairiraca; tojai itoquineri yóguèneri ibirapague matsiguenga, itaquineri. Carari Quirisito te iróguiri ibira; Iriati pacari Tosorintsi iganiamento cara icamobicái. Aique iáque Jonogaguitequè icampèri

Tosorintsi: “Yamai aroque nacamobitaiguëri matsiguengajegui niraatanëneri arota nagabisaicotajiri”. ⁴ Aintame Quirisito yamai yaca quibatsica, querome isaserirotitime, aintanta yaca saseriroti imatsiguenga Irebí yógapiniquineri Tosorintsi ibirapague cara isanguenatocotaiguëri Moisés. ⁵ Icantopiantabitaca ora icanquineri Tosorintsi. Icantopiantiro yaca quibatsica cara ibangoquë Tosorintsi cara antagaisati iroonti osiacagomento ora inatsi Jonogaguitequë cara itimi Tosorintsi. Jirai cara Moisés irirai obetsiquëneri Tosorintsi ibango, icanqueri Tosorintsi: “Canta oguitojaquë jitacha Siná nogometasantëmiro atiraca onganquima cara pobetsiquënaró nobango. Pobetsiquinaro aisati ongantasantëmaro ora noniaguëmi”. ⁶ Ocaninatabitaca ora isanguenaque Moisés jirai ora isaserirotitanca imatsiguenga Irebí, icanquineri Tosorintsi, inibabentaiguëri imatsiguenga. Carari oca icantasantë yamai Tosorintsi ocaninatasanti, tojai ora irorai Nibarintsi pabisëro isanguenare Moisés. Aisa icanta Quirisito, tojai icantasanotëneri Iriri, tojai yabisëri saseriroti imatsiguenga Irebí. ⁷ Onganinatasantëme ora isanguenaque Moisés, arome irabisaicoontëmarome matsiguenga, querome icomantiri Tosorintsi basini Nibarintsi. ⁸ Carari jirai te iraganinataiguëri Tosorintsi joríojegui tiguënta ingantima iromoncaratiro isanguenare Moisés. Iroro aiqero isanguenataguëque basini:

Icanque Atingomi: “Aiquenta nomaiguëri joríojegui irorai Nibarintsi; nongomantaiguëri antagaisati Isirael aisati omagaro ira paniacha Joráquë. ⁹ Ora irorai quero ocantaro pibega inaga ora nacantaiguëri. Jirai itimaigasegui omagaro joríojegui Ejípitoquë, carari nomisotocaigairi nágaiganaquëri basiniatiquë quibatsi. Te iromoncarataiguëro ora nacantaiguëri, te inguemisantaiguëna, iroro nojoguëtanëri. ¹⁰ Ora irorai Nibarintsi nongomantaiguëri aiquenta aisa onganquima negaca: nogótaquëri ora nococaquëri, aisati nanguencagaiguëri Nanibare, quero ipeicotaro. Nasintaigacari: irajiquina Naro Itosorintsite aisati najitaiguëri irirojegui nasiati. ¹¹ Aique quero pairo ogometiri imatsiguenga querootisati ireinti; quero icantiri: ‘Pigótiri Atingomi’, aronta irogótaiguëna antagaisati, itingomipague aisati ira cagari itingomi, antiasipari aisati janequi, omagaro irogóiguëna. ¹² Nangábintsaiguëri, nojocajineri ora icantaguetomoquina te onganinate, quero naquengairo aisati ora icantagueti”.

Oca icanqueri jorío Tosorintsi cara isanguenatacaquëri Jeremías, comantantatsiri jirai.

¹³ Cara icanqueri Tosorintsi “Nomaiguëri irorai Nibarintsi, quero ocantaro pibega ora inaga jirai”, aisa ocanta otsonganaquimaca ora inaga pëníbaque omeganëma. Yamai teni omomirintsibentimaro isanguenare Moisés.

9

Ati ocanta ibango Tosorintsi cara yamanaigui saserirotipague.

¹ Jirai Tosorintsi icomantaiguëri jorío omatsiguenga ati ocanta icocaquëri cara yamancotopiantaiguëri, aisati icanquëri ati ocanta pongotsi cara icanquineri Tosorintsi saserirotijegui inibabentaiguëri omatsiguenga. Ora pongotsi aisa ocantaro pibega tocoyapango cantaca cáripa. ² Aiti yotigantaro, aque cara tsomaguiria pongotsi icantopiantaiguëri Tosorintsi saseriroti ora irasi. Aiti pinasegui irobotane aisati aiti mesa. Cara mesaquë aiti pan ocarati 12 iraperi saserirotipague. Ora pan oniaguëri ainta Tosorintsi cara. Oca pongotsica iroonti ibango Tosorintsi. ³ Aique aiti basini yotigantaro oquibepiriga; tsomaguisonorinta inasanti Tosorintsi cara te ingue saserirotijegui. ⁴ Cara, aiti ora itagantapiniantaro casangajengaro, iroro yobetsicantari oro otsibataro yotigantaro cara inasanti Tosorintsi tsomaguisonorinta. Aisati aiti cara cajón itiriantacaro oro aisati. Tsomagui cajónquë aiti maba pinasegui: ora cobiti yobetsicantari oro jagaca maná cantaca pan; aisati aiti igotiqui Aarón ora quitsotanënguëtsi jirai; aisati ora pite mopë cara isanguenaquero Tosorintsi 10 iragáantane ora ipëri Moisés jirai. ⁵ Cara jonoica cajón ainta pite irosiacagomento irisaanganetsite Tosorintsi ijita querobín. Ira querobín iriro ogótaguëri cara ainta Tosorintsi iquëtaguëtasanti cara. Aisati inetsaiguëro otataro cajón cara ishaguëtopiantiro omagaro osarini itingomi saseriroti ora iraraa chibo aisati irasi sërari baaca. Cara Tosorintsi inobëro iraraa, ijocagaineri jorío ora icantagueti quimngaro, yomaguisantineri. Carari yamai quero notsatenguëmiro basini ati ocantagueti.

⁶ Aro yobetsiquëro pongotsi negaraca cara yoniaguëri Moisés Tosorintsi. Cara, icapinintaiguëri saserirotipague antagaisati cataguëteri icantaiguëneri Tosorintsi ora icocagaiguëri. ⁷ Carari tsomaguisonorini te ingaigue aintanta yotigantaro oquibepiriga. Irianti itingomi saseriroti catsi cara tsomaguisonorinta, patiro iqui poro osarini yabisanaquero yotigantaro patirontiatu. Yóguëneri Tosorintsi sërari baaca iraisati, aisati chibo irasi imatsiguenga, aque icanaque paniro, yáganëro iraraa, ishaguëantaparo otataroquë cajón, yamanopëri Tosorintsi: “Pabati, pingábintsaiguëna, pijocagainaro ora nacantagueti te ongomeite naro aisati ora icantagueti nomatsiguenga; quero piguisaigainaro aisati, quero piquengairo”.

Aro nega icantopiantëro itingomi saseriroti antagaisati osarini. ⁸ Pinguengero yotigantaro, cara poticaiguëri omagaro basini saseriroti aisati omagaro joríojegui cara quero icaigui. Tigueti inganëma ingaigapë cara catingasatiquë Tosorintsi. Oca pogomeanta Isëre Tosorintsi, igóiguë eiro cara përosati pinasegui yotigantaro, teraiquerai iraretimari Tosorintsi matsiguenga. ⁹ Caninataque anguengero oca arota ogóontimaro yamai: antagaisati ora ipapinintaiguëri Tosorintsi joríojegui jirai aisati omagaro ibirapague yógapintineri itaquineri, tiguëti ongantima oganinasëretaiguëri ira paigabitari Tosorintsi. Përosati igóiguë iriro cara te iraganinataiguëri Tosorintsi. ¹⁰ Jirai Moisés yogometasitaigari joríojegui: pairoraca yapaigui, aisati pairoraca yógaigaca, aisati atraca icanta iquibopiantaiga, tojai pairoraca cantacha nega. Irooti ora icocagaiguëri Tosorintsi jirai. Carari aro ocarati yamai. Ipoque yamai Quiriso Ira oguaigui cosamani. Yamai pinasitaca ora icocacái Tosorintsi, irorai, ocaninatasanti yamai.

Ira Quiriso yoganinasëretëri ira quemisantatsiri yamai.

¹¹ Aroque ipoque Quiriso aisa icampari ibega itingomi saseriroti, carari icábintsacái Irro icamobicái, Irironta Itingomisonori Saseriroti. Ora icanque Irro caninarisonori. Jirai icantabeca saserirotijegui cara pongotsiquë ora yobetsicaiguë matsiguenga, iroro cantënguicha iátaji Quiriso jonoquë cara ibangosonoriquë Tosorintsi. Ocaninatanoti aronta inibabencái canta Jonogaguetequë. ¹² Yaca quibatsica ira itingomi saseriroti iátopiantë omagaro osarini tsoaguinta ibangoquë Tosorintsi, cara inasati Irro, yáganëro iraraa chibo aisati irasi itiomijani sërari baaca. Irari Quiriso icamobicái Irineni, iratanë irasi iraraa, aique iáque Jonogaguetequë isobicomopëri Tosorintsi. Icanqueri Iriri: “Aroque nacamobitaiguëri antagaisati matsiguenga arota nagabisaicotajiri. Yamai pairiraca quemisanquinane përosati intioquina Naro aisati Obiro yaca Jonogaguetequë”. Icaamaque patiro, aroque, yamai quero yogatsitairo icamaji aisati. ¹³ Jirai yametaigacaro oca joríojegui. Aroca icantaguëtiro yomangantajiro, yóguëneri Tosorintsi chibo queroca sërari baaca; ira ibira camobiqueri casintari. Aisati yóguëro tsinane baaca itaquintiro, yágairo omamo, iconaguëro nija, ishaguëquineri ira cantaguetatsi te onganinate, aro Tosorintsi ijocajineri, isetajineri. Aique caninataque intsibataimari aitosati quemisantatsirijegui tenta inguimingatae yamai. ¹⁴ Aroca posaatabitacari matsiguenga iraraa ibirapague, iroasaasëretasantimaro iraraa Jesoquiriso caninarisonori ini. Posintsisëretëri Jesus Isëre Tosorintsi Ira timatsi përosati, aro iáque corosiquë icamobicái yosaasëretacái cara quemisanqueri; yamai quero opomirintsitasitaro abisaicoonta eati, acanquineri Tosorintsi ora icocacái, te anguengero angantajiro ora te onganinate. ¹⁵ Jirai patiro igóiguëro eiro isanguenare Moisés, carari te omoncaratiro. Ainiro acantaguetiro ora te onganinate, ajáqueme aiquero Sharincabeniquë. Aique ipoque Quiriso icamobicái isetajairo ora acantagueti te onganinate, yogabisaicotajiri, inibabencái catingasatiquë Tosorintsi, ipacáiro irorai Nibarintsi. Aro yamai icanque Tosorintsi: “Nobetsiquëneri ira nocoiguë ora caninaro, noguëneri Jonogaguetequë cara përosati inganinatasantomquina”.

Patiro icamobibiricái Quiriso.

¹⁶⁻¹⁷ Aro pinguengaiguero ora yametaiga omatsiguenga. Aitica irasi, isanguenaque: “Cara nangamaque, nocogui irasintëmaro nomatsiguenga ora nasi”. Aro isanguenaquero irasi iripajiro aisati iripajiro imatsiguenga asinquimarone ora irasi. Aique cara ingamaque, igóque ira asinquimarone. Queroquerai icami, quero yáguero. Carari ingamaqueca, aro iráganëro. ¹⁸ Aisa oanta jirai cara Tosorintsi sanguenataqueri Moisés ati oanta ora ingantaiguë joríojegui. Tiguetinta ingantima ingamaque Tosorintsi, igáqueri Moisés cara iragamagaiguëri ibira; aroque omoncaraca ora icanque Tosorintsi. ¹⁹ Jirai icomantaiguëri joríojegui Moisés ora icocaqueri Tosorintsi; inibataiguëneri Sanguenari. Aique yóguëri baaca aisati chibo, yáguëro iraraa iconoquero nija. Aisati yáguë ibiti oisha quiraapitiri aisati casangajengaro jitacha isopo, yoaquero iraraaquë ipoteaquero oshaguëpëri omagaro imatsiguenga aisati ora Sanguenari. ²⁰ Iroontita ishaguëqueri imatsiguenga, icanqueri: “Aroque nocomantaiguëmiro Irinibare Tosorintsi, yamai nagátaiguëmi pingantiro. Nashaguëantëmiro oca iraraaca arota pigóique cara iromoncaraquero Tosorintsi antagaisati ora icantaiguëmi. Icanque Irro: ‘Aroca përosati pinguemisanquina, aro përosati nangábintsaguëmi’ ”. ²¹ Aique ishaguëquero ibango Tosorintsi ora iguemisantomento aisati ishaguëtaquero omagaro ora inaguetatsi tsoaguë, ora irasi saseriroti cara icanquero ora igátaiguëri Tosorintsi. ²² Aro isanguenaque Moisés: “Oca iraraaca pobira poganinatëri pairiraca cantaguetatsiri. Queroca icamobitineri matsiguenga ibira, iraraatanëneri iraraa, quero yogabisaicotajiri Tosorintsi quero isetajineri cara icantaguetiro ora te onganinate”.

Patiro icamobicái Quiriso.

²³ Yaca quibatsica pinabitaca ibango Tosorintsi aisati omagaro inaguetatsi tso magui. Iroonti osiacogemento ibangosonori jonoquê. Caninataque ishaguêtaguequero pongotsi yaca osobica, yoganinancaro iraraa ibira. Carari te ongomeite iraraa ibira oganinatiro ibangosonori Tosorintsi cara Jonogaguitequê aisati orapague inatsi canta. Canta, iroonti caninatatsi basinati iraraa caninajaro pabisiro iraraa ibirapague, iroonti iraraa Jeso-quirisito. ²⁴ Aroque icamobicái Quirisito icanitanai. Te inganque ibangoquê Tosorintsi yaca ora yobetsiquê matsiguenga iroonti osiacogemento ora inatsi jonoquê, carari iáque Iririo Jonogaguitequê, aro icapê catingasatiquê Tosorintsi cara ibangosonoriquê cara inibabempái. ²⁵ Ira itingomi saseriroti látopiantê cara inasanti Tosorintsi, omagaro osarini yágapininquero iraraa sêrari baaca aisati irasi chibo; te iráguero irasi iraraa. Carari Quirisito te iraraatapinintaje irasi iraraa, patironta icamaque Iririo. ²⁶ Arome irágopiantêrome iraraa Tosorintsiquê, aisatime ongantimame ingamopiantê tojai cara yobetsiquêro quibatsi irooti yamaica. Carari yamai patiro ipoque, patironta icamobiqueri omagaro matsiguenga iragabisaicotasantaigairi quemisantatsiri, arota Tosorintsi iromaguisantineri ora icantagueti te onganinate. ²⁷ Igóiguê eiro cara patiro ingamaque matsiguenga, aro ocarati, quero yogatsitairo icamaji. Cara ingamaque poro, aique ingomantêgotêri Tosorintsi pairoraca inganque aitosati negaraca iriátê. ²⁸ Aisa icanta Quirisito patironta icamobicái iragabisaicotagairi tojai matsiguenga, quero iquengairo Tosorintsi ora icantagueti te ongomeite. Aiquenta iribocapae Quirisito aisati, carari quero ipocasiti ingamobitajiri matsiguenga ora icantagueti queronta icamaji aisati. Iribocapae iráganêri jonoquê iraequi aguiaiguêri.

10

Tigueti ongantima oganinatái isanguenare Moisés.

¹ Pinetsaiguero, omagaro ora isanguenatocoque jirai Moisés irianti irosiacogemento Quirisito Ira bocapênguistsine aiquenta, Ira caninarisonori. Cara ipogopê Quirisito, icábintsasantacái, yoganinasêretacái, carari jirai ira itingomi saseriroti yógapininqueri ibirapague antagaisati osarini ira tigueti ongantima iraganinatiri matsiguenga Ira mapêri ibira.

² Arome oganinasêretêrime matsiguenga iraraa ibira ira yóguêneri Tosorintsi itaquineri, querome yogatsitairome cara yógapininqueri ibirapague omagaro osarini queronta iquengairo ora icantagueti te onganinate. ³ Carari yógapininqueri ibira antagaisati osarini, iroro ora oqueancagopiantaguêqueri cara ainiro icantaguetiro ora te onganinate ⁴ tiguetinta agabeirone oganinasêretiri matsiguenga iraraa sêrari baaca aisati iraraa chibo. ⁵ Cara ipoque Quirisito yaca quibatsica icanqueri Tosorintsi:

Te piniacaninatiro iraraa ibirapague, te pinintiro imemiro tenta oganinasêretiri matsiguenga. Pigáquina yaca nibogobitaiguêri omagaro matsiguenga arota nangamobitaigueri naganinasêretaiiguêri. ⁶ Te piniacaninatiri omagaro cara yógapinintimiri ibirapague aisati itagopiantêmiri arota piganinatantimarime matsiguenga. ⁷ Aique nacanquemi: “Pabati Tosorintsi, aroque nipocasiquemi yaca nangantasantêmiro omagaro ora picocaquina. Nomoncaraquemiro antagaisati ora isanguenatocoquina jirai Sanguenariquê”.

⁸ Cara aroqueque icanque: “Te pinintiro cara yógapinintimiri ibirapague aisati itagopiantimiri, te piniacaninatobêri”, omagaro ora isanguenauque Moisés, ⁹ aique icanque: “Pocaquina yaca nangantasantêmiro omagaro ora picocaquina”. Yamai teni ongomeite cara iromapêneri Tosorintsi ibira matsiguenga tenta oganinatiri ira casintari, carari yamai icantasantiro Quirisito ora icamobiqueri Tosorintsi ora yoganinasêretantaigacari matsiguenga quemisantatsiri. ¹⁰ Patiro icamobitaigacái Jesoquirisito, quero icamaji aisati, imoncarasantêro ora icogui Tosorintsi. Yosaasêretasantacái, aisati omagaro quemisantatsiri, cantaca te angantaguetêmatiro pairoraca ora te onganinate.

Ira óguiri ibirapague teni iragabisaicoontimari. Irianti Quirisito agabisaicoontatsi.

¹¹ Aro icantopiantabita saseriroti jégui, yógapinintineri Tosorintsi ibirapague, itagopiantêneri, carari te oganinatiri ira cantaguetatsi ora te onganinate. ¹² Ira Quirisito patiro icamobicái, yoganinasêretaiiguêri antagaisati quemisanqueri, ijocajineri ora icantagueti quimingaro. Aroque moncaraca. Aique isobiaque ibacosonoriquê Tosorintsi, ¹³ yoguiaqueri Iririo irooti cara iragabeineri omagaro ira quisaneinqueri Quirisito. ¹⁴ Patironta icamobiqueri omagaro ira icoigaiguê Tosorintsi, yoganinasêretasantagueti. Tosorintsi iniaiguêri cantaca te ingantaguetêmatiro cagaro caninatatsi. ¹⁵ Aisati pogometasantacái Isêre Tosorintsi, igóiguê eiro iroonti aisonori. Jirai isanguenatacaqueri comantantatsiri:

Icanque Atingomi: ¹⁶ “Aiquenta nongomantaiguêri irorai Nibarintsi cara nogótacaqueri ora nococaqueri, aisati nangueancagaiguêri Nanibare, quero ipeicotaro”.

17 Aisati icanque:

Quero naquenguètairi aisati ora quimingaro icantaguetomoquina.

18 Pinetse, aroqueca Tosorintsi icábintsaignairi matsiguenga ora icantagueti te ongoemeite, aroqueca yomaguisanquineri, quero icóicotajiri cara imairi ibira ingamobiqueri arota iraganinatiri matsiguenga.

Intsome ajátasitiri aretimari Tosorintsi.

19 Nopiguemisantane, aroque icamobicái Quirisito iraabiritanacái, yogabisaicocái. Yamai igóiguè iniacaninatacái, quero otsorogui arequimarínica Tosorintsi yamai. 20 Jirai cara ibangoquè Tosorintsi aiti yotigantaro oquibepiriga; potiaqueri saseriroti querota iqui cara inasanti Tosorintsi. Aique icamobicái Quirisito icaniatanai, yaretacacái Tosorintsiquè. Iroto te inaguètaje yamai ora yotigantaro. Iroto yamai otsitiguèpari Tosorintsi tenta otsoroguirí. 21 Yamai isaserirotitè Quirisito, Irianti Itingomisonori Saseriroti inibabentaiguèri quemisantatsirijegui. 22 Iroto yamai intsome ajátasitiri aretimari Tosorintsi, quero otsoroguirí aroquenta igóiguè cara icamobicái Quirisito isetajáiro ora acantagueti quimingaro, yoganasèretancáiro Isère. Yamai igóiguè cara iniacaninatacái, yosaasèretacái. 23 Aisati igóiguè cara iromoncaraquero Tosorintsi omagaro ora icancái, quero yamatobitái. Yamai caninataque ongomantaguetiri basini matsiguenga oca aquemisantocoquerica.

24 Intsome yamai anguengabacagaiguema arota omitocotobaguima. Intsome asintsisèretaiqueri opiguemisantane iranintobaganèma aisati ingantiro ora caninaropague. 25 Intsome opatobiritimari Quirisito pèrosati. Quero picantari ibega irapague omaguisanqueri te inguengairi. Popatoitacaguimari popiguemisantane pisintsisèretobaguima pigótinta quero ocosamaniti cara iribocapae Atingomi. Caninataque pinganinabentiri aisati piganinatobagaiguema. 26 Pinetse, aroca igóiguè ora aisonori cara icamobicái Quirisito arota iragabisaicotajiri matsiguenga, caninataque asèretimari anguemisantasantiri. Te onganinate otsoinguirí ojocajiro cara aquemisantqueri. Ira cantatsi; “Quero naquemisantajiri Quirisito, nangantaguetirota pairoraca ora nongoque naro”, teni irinaje basini ira agabisaicotajirine. 27 Aisa aiquenta inguisaianaqueri iriro Tosorintsi iratsipiriacaqueri Sharincabeniqué omagaro ira tsoengaiguiri. Iratsipiriantequero cara tsitsiquè ira iguisanejegui. 28 Yametaiga joríojegui iragamagaiguèri ira tsoenguèro isanguenare Moisés, te inguemisantiro. Aintaca pite queroca maba ingantocoitèri: “Ira cantaguetiro ora te ongoemeite, naniaqueri”, aro iribasiaqueri imatsiguengajegui, quero yogasèretocotari. 29 Ira tsoenguèri Itomi Tosorintsi ingantocoqueri: “Itsipiriasicaro icamaque Quirisito, itsipiriasicaro iraatane iraraa, querojenga yogabisaicotajiri pairiraca”, aisati itsoinguguèro Isère Tosorintsi, ora cábintsacái, ¿Caninataqueo ingasitígatasantiri iriro Tosorintsi? Aisonori iratsipiriasanotaqueri aroquenta imaintèro iraraa Quirisito ora yosaasèretantabecari. 30 Igóiguèri Atingomi cara icanque jirai:

Aiquenta Naro quisaiguèrine ira tsoengatsiri, Naatisati atsipiriacaquerine.

Aisati icanque:

Aisonori, nongomantègotaiiguèri matsiguengajegui pairoraca ingantaguguè aisati negaraca iriáiguè.

31 Irirota cobeingarisonoriguente, aisati catimanerisonori, intsome aniacobeingatasantiri Tosorintsi Ira quisasanoiguèrine ira te inguemisantiri, iratsipiriasanotagaiguèri.

Quero pitsorogui pitsipiriobentineri Quirisito.

32 Pinguengaiguema iti picanta jirai, cara irorai piquemisantaiguèri Quirisito. Iguisaiguèmi matsiguenga cara piquemisanque, itsipiriacaiguèmi, carari pabequero antsinsisati, pèrosati cara piquemisanqueri. 33 Yapatobiritaiguèmi matsiguenga iguisaiguèmi icantaguebiriqumiro catsimari, isèrontaiguèmi, itsipiriacaiguèmi. Aisati picarataiguèri popiguemisantane ira itsipiriacaque; pogasèretocotaigacari, pomitocotaiguèri, picaninatagaiguèri. 34 Picantaneintègotèri ira yomingaiguè. Aisati cara yágabitsataiguèmiro ora pasintagueta, pinintacaqueri, te popègatimari, picaninataguè pigóiguènta cara quero yágabitsatimiro cara itimacagajimi Tosorintsi yaca aisati itsibatimi, aisati quero yágabitsatimiro cara aiquenta pèrosati pintiomoqueri Tosorintsi Jonogaguetequè. 35 Iroto quero pijocaguètajiro cara piquemisanqueri Quirisito, quero popeicotari pigótinta cara aiquenta ingábintsasantaiguèmi Tosorintsi. 36 Caninataque antsinsisati pingantiro omagaro ora icocaquemí Tosorintsi, aque iromoncaraquemiro antagaisati ora icantasanotèmi. 37 Icanque Tosorintsi Sanguenariquè:

Pènibaque iribocapae Atingomi, quero ocosamaniti. 38 Ira quemisanquinane pèrosati, naniacaninatèri cantaca te ingantaguetèmatiro ora te onganinate, aisati nantimacagajiri yamai aisati aiquenta intiomoquina Jonogaguetequè. Carari aroca irojocajiro cara iquemisanquina quero nacaninabentiri.

³⁹ Carari teni angarataiguero eiro ira tsorogatsi jocairo cara iquemisanque iriáiguê Sharin-cabeniquê. Pêrosati cara aquemisanthanê eiro, ajáque aikuero Jonogaguítequê.

11

Ora icantaiguê quemisantasantsiri jirai.

¹ ¿Ati ongantima anguemisantaiguêri Tosorintsi Ira te iraneingani? Aquemisanqueri, igótasantaiguê cara iromoncaratasantêro Tosorintsi antagaisati ora icancái. Aiti tojai teraiquerai aneiro, carari aquemisanqueri Tosorintsi, igótasantaiguê eiro aniaiguêro aikuera ora icasijacái. ² Iquemisantaiguê jirainisati, iroro ora igónijintacaiguêri Tosorintsi cara iniacananataguêri. ³ Aquemisanque, aro igóiguê jirai cara inibatêtoqueri, ora pinanca quibatsi, Jonogaguíte, aisati omagaro ora inaguetatsi. Inibatêtoiguê, pinanê. Te ine paioraca ora te irobetsiquiro. ⁴ Jirai Abel iquemisanqueri Tosorintsi cara yamapêneri ibira, irooti iniacananatancari Abel cantaca te ingantaguetê ora te ongomeite. Ira Cain, ireinti, te inguemisantiri Tosorintsi cara yamapêneri ibanguire; iroro te iraniacananataguêtiri iroro Tosorintsi. Ora yamapê Caín te oganinatiri Tosorintsi, orari irasi Abel iroro aganinatêri. Aro Tosorintsi igónijintacaqueri Abel cara iniacananatêri. Icamaque Abel, carari caninataque angantimari ibega iroro cara iquemisanqueri Tosorintsi, aro iraniacananatácái aisati.

⁵ Iquemisanque Enoc, yoganinatêri Tosorintsi. Iroro te ingamaguête; canianiro yáganêri Tosorintsi Jonogaguítequê. Ico gabecari imatsiguenga, te iraniajiri aroquenta yáganêri jonoquê. Cara terai imeguima, icantocoqueri iroro Tosorintsi: “Naniacananatasantirini Enoc”. ⁶ Queroca aquemisantiri Tosorintsi, quero oganinatiri. Aintaca cogatsi iraretimari, caninataque irajite cara aisonori ainta Tosorintsi, aisati caninataque iragueiri irotopitiri cara iromanocopêri, ingábintsabaqueri iraguei cogasantiri.

⁷ Aisati Noé iquemisanqueri Tosorintsi. Icanqueri: “Noé, aikuera opoque oquibeguente angani, onangasantanêma ongaaretanê omagaro quibatsiquê. Pobetsiquiro oquibe pitotsi ora pabisaicoontêma”. Terai oneingani angani terainta omariguêmate carari iquemisanqueri Noé. Tojai osarini yobetsiquêro pitotsi. Icamanaaigabitacari imatsiguenga carari te inguemisantaiguero. Aro yotetaiganaca Noé, iina, itomi icarati maba, aisato iraniroro maba. Yabisaicoantoro ora pitotsi, te ingamaiguê, ijogataigaca imatsiguenga tsoengatsiri cara ponangasantanaca nija. Tosorintsi ipoguiriaiguêri antagaisati. Irianti Noé abisaicotajatsi irironta quemisanquenguitsi aro iniacananatêri Tosorintsi cantaca te ingantaguetêmate ora te onganinate.

⁸ Aisati Abaram iquemisanqueri Tosorintsi. Icanqueri: “Abaram, nanintini pijáte basiniquê quibatsi ora noniaguêmira. Nomêmiro pasinquimaro piguebatsite”. Aito cara iquemisanque Abaram, iáque cara teraiquerai irogóte negaraca iriátê. ⁹ Pêrosati iquemisanqueri Tosorintsi cara iquenagueque itimabaguitabitaca tenta irisobigasante cara basiniquê quibatsi ora icanqueri Tosorintsi cara irasintêmaro. Te irobetsique caninaro ibango iroro cantênguicha itimi tocoyapangoquê cantaca cáripa. Aisati icantari Isac aisati Jacob ira canque irootisati Tosorintsi cara irasintêmaro quibatsi carari teatisati irisobigasante cara quibatsiquê. ¹⁰ Itimaque caninasati tocoyapangoquê aroquenta iquianquero basini poeboro inatsi jonoquê. Igóque cara iriátê Jonogaguítequê, intibataiguêmaro omagaro quemisantsiri, intimaque pongotsiquê caninaro aisati coshori, ora te irobetsiquiro matsiguenga Irianti Tosorintsi obetsiquêro.

¹¹ Aisati oquemisanque Sara. Iroonti sirabaro, te ontsomae otomi, aroque ontiasiporotasantê cara icanquero Tosorintsi: “Aikuera pintsomaaque pitomi”. Aro oquemisanqueri, pigóque cara quero yamatobitiro Tosorintsi, iromoncaraquero Irinibare. Aro yagobiacaquero cara poguê, otsomaaqueri otomi. ¹² Aisati aroque intiasiparitasantanê Abaram, pênibaque ingamaque. Te irine itomi carari yagobiacaqueri Tosorintsi cara itomintacari Isac. Yamai tojai icarataiguê imatsiguenga Abaram, te irogótingani atiraca icarataiguê. Icantagari ibega jonogatsi te irogótingani atiraca icarataiguê. Aisati tojaisonorini ini icantaigaro omaniquê onamiaguê oquibeguente angaare, cara tojaisonorini pini.

¹³ Aro icamaiguê irirojegui quemisantaigatsiri; itimabeca cara Canánquê carari te irani-asantaiguero omagaro icantasantaiguêri Tosorintsi. Te iraniasantiro, iroonti igótasantaiguê cara imaiguêri Tosorintsi ora icanque; aikuera iraniaquero. Aro iquemisantaiguêri, caninataganaque, icanque: “Tenta pêrosati nantime yaca quibatsica, quero nisobigasanti yaca”. ¹⁴ Cara icanque negaca, igóiguê eiro cara icogasantaguê iriáiguê cara pêrosati intimasantaiguê. ¹⁵ Arome irisêretaguêma iripigaiganajimame cara quibatsiquê cara ipaniaigaca jirai, aro iriáiguême. ¹⁶ Carari icogaiguê iriáiguê caninaguiteroquê cara Jonogaguítequê ora abisêro paioraca poeboro yaca quibatsica. Tosorintsi te iripasiquibiritaiqueri,

icanque: “Irirojegui notomi, Naronta Itosorintsite”. Icaninabentaiguëri Iriro. Aisati canta jonoquë Tosorintsi yobetsaiguëneri caninaro pongotsipague.

¹⁷⁻¹⁸ Aro icantasantëri Abaram Tosorintsi intomintëmari Isac aique intojaiganaque imatsiguenga. Cara iquibianë Isac icoque Tosorintsi iraniantimari ira Abaram aisonorica iquemisanqueri. Icanqueri: “Póguinari pitomi Isac, pitaguinari”. Aro iquemisanqueri Abaram, iáque, pëníbaque iróquerime itomi ira paniro. ¹⁹ Iquianca Abaram: “Aroca nóguëri Isac iragabeiro Tosorintsi iraganiatairi”. Aro pëníbaque iróquerime Isac cara icanqueri Tosorintsi: “Quero póguiri pitomi. Aroque naniantëmi. Yamai nigóque piquemisanasantina”. Te ingame Isac, carari icanca icamaqueni Isac aisa icanca yoganiatairini Tosorintsi.

²⁰ Aisati iquemisanque Isac, iroro ora icantocotaguëqueri itomi pite ijitaiga Jacob aisati Esaó. Yamanocoqueri Tosorintsi: “Pingábintsëcobentinari notomi pitirooti”. Aro aikuenta icábintsëcobenqueri tojai. ²¹ Aisa icanta Jacob iquemisanqueri Tosorintsi. Pëníbaque ingamaque, aroque yoticaro igotiqui, yoguitomocari Tosorintsi yamaqueri: “Pingábintsëcobentinari nacharine pitirooti itomi José. Pomitojaiganaqueri”. ²² Aisati José iquemisanque. Jirai itimi Ejípitoquë iroro aisati omagaro imatsiguenga, carari igóque cara aikuenta iriáigae joríojegui canta irasiquë iguebatsite. Cara icamaque icomantaiguëri imatsiguenga: “Pëníbaque nangamaque. Aikuenta cara pijáigae aguebatsitequë, páganainaro notonguiporoqui, pitipainaro canta”.

²³ Aique ira itingomi Ejípitosati igobeingarite iniaiguëri joríojegui cara itojaiganaque. Aro itorogaiguëri tojaisoroninta inanë. Igáqueri cara irjogatëri nijaaquë iraequi itomi jorío ira irirai íboguënguitsine. Iquemisanqueri Tosorintsi ira tomintagari Moisés. Cara íboguë, iníobëri caninari ini, aro te inguemisantiri ira cobeingari, imánopitëri itomi maba manchacori arota quero yóguiri. Igóque iriri aisati iniro cara Tosorintsi ingábintsëri itomi iripëgabintëri. ²⁴ Aro te ingame Moisés. Aique iquibianë obangoquë irisinto igobeingarite Ejípitosategui. Aro iquianca: “Teni nongogue nomatsiguengatimari Ejípitosati, naanti jorío”. ²⁵ Igóque cara joríojegui iquemisantaiguëri Tosorintsi, iroro itsipiriacagobitaiguëri Ejípitosati. Aisati igóque Moisés cara iroro itomitsari Baraón ira cobeingari. Iniacaninataiguëri Ejípitosatëgui aisati inganquimame irirome Ejípitosatisonori. Arome ingoquero, inganinabenquerome antagaisati inaguetatsi cara Ejípitoquë. Aisati igóque Moisés arome irojocanëri ime imatsiguengasonori ingantaguequeme ora te onganinate. Aro ijocanëro omagaro irasi Ejípitosati, icoque intsibataiguemari imatsiguengajegui, cara iratsipiriaguë. Igóque aisati cara inguisanijinqueri iroro Ejípitosati. ²⁶ Aisati iquianquero ora caninatasantsiri. Ijique: “Aikuenta Tosorintsi iragáqueri Agabisaicoontatsiri (Ira jitacha Quirisito) iragabisaicotaiguëna. Aro caninataque nantsibatëmari nomatsiguenga, natsipiriobiqueri Ira Agabisaicoontatsiri, pabisëro cara nasintaguequimaro omagaro inaguetatsi Ejípitoquë noguaquerinta Tosorintsi ingábintsasantëna aikuenta”.

²⁷ Aroquenta Moisés iquemisanqueri Tosorintsi Ira te iraneingani, te intsoroguari igobeingarite Ejípitosati. Aro ijocanëro Ejípito, igóquenta cara itsibatacari Tosorintsi. ²⁸ Aisati iquemisanqueri Tosorintsi cara icanqueri: “Moisés, aikuenta nagáqueri nasaanganetsite irabसानaque jonoica Ejípitoquë, iróqueri itomijegui tsoengaigatsiri, irianti itomi obatsi camënguitsine. Oiro aisa pomatsiguenga, pigamagaiguërica oboina oisha, pomotsitiro iraraa onamiquë omoro pobangopague, iraniaquero iraraa, aro quero iqui nasaanganetsite ógantatsiri, quero icami pitomipague cara pini iraraa oisha. Aisati popaiguero pan te ine ora piponganta”. Aro Moisés aisati imatsiguenga iquemisantaiguëro Irinibare Tosorintsi; yogamagaiguëri oishapague, yoguëro iraraa. Te ingamaque itomi obatsi joríojegui. Carari icamaiguë tojai itomipague Ejípitosati. ²⁹ Aroquenta iquemisantaiguëri jorío, Tosorintsi yobetsiguëneri abatsi piriabatsaro cara imontiaiganacaro joríojegui oquibe Angaare Quiraajari. Ipatimaiguëri isoraroteegui Ejípitosati, ijogataigaca antagaisati cara pipigatanaa nija.

³⁰ Aisati aroquenta Josué aisati joríojegui iquemisantaiguëri Tosorintsi, 7 cataguiteri ishongaigaparo poeboro ojita Jericó yanëitaiganaque. Aito cara opariaque oticoro Jericó. ³¹ Aro yogamagaigapëri omagaro Jericósati. Iroonti yogabisaicotajiro Rajab; jirai iníobintiri sërariipague ira cagari ojime carari yamai aroque oquemisanqueri Tosorintsi cara yareca iragátane Josué cara inetsasantëro Jericó. Págobëri caninasati omitocoqueri oquemisantobërinta cara icomantëgotëri Tosorintsi.

³² ¿Pari basini nongomantëgotë? Quero cotonguiboro nacantocotimiri tojai basini matsiguenga. Ainta Guereón, Barac, Sansón, Jepeté, aisati David, Samoel, aisati comantantsirijegui —ainta tojaisoriori quemisanqueri Tosorintsi. ³³ Iquemisanque, iroro ora yomanataguëqueri cobeingaripague, yágabitsaqueri iguebatsite yasintaigaparo; caninasati itingomibintaiguëri imatsiguenga icantaiguëro ora icocaqueri Tosorintsi; iniaquero cara Tosorintsi imoncaraquero Irinibare; ijoquengani cara secaripaguequë, carari Tosorintsi

yomisantëri, te iratsiquiri secari. ³⁴ Basini quemisantatsiri ijoquengani pamarique, iroro cantënguicha te iritaguima. Basini icogabeca iricaraquerime sabiriquë, carari yogabisaicotobëri Tosorintsi. Ijanaitë, carari yosintsitaiguëri Tosorintsi yogaguibegajiri. Im-itocotaiguëri Tosorintsi cara yagobiaqueri ira omanáchari quisachari, yomisigaiguëri omagaro. ³⁵ Oquemisanqueri Tosorintsi tsinane, iroro yoganiataguëtajiri icabiritajiri otomi camabitënguicha. Ainta basini quemisantatsiri itsipiriaguë, icanqueri: "Aroca pijocajiro cara piquemisanque, aro nopabaquëajimi quero natsipiriacaquimi". Carari yotabitanëri: "Quero nojocajiro cara naquemisanqueri Tosorintsi. Aiquenta iraganiatana, nantiomopëri Iriro". ³⁶ Ainta basini quemisantatsiri, isërontaigacari, ipasataiguëri tac tac tac, yoguëshotagarantëri sogatsaquë coshotsari, yomingaiguëri. ³⁷ Basini ibasegaiguëri. Aintapague itotaiguëri serochoquë yogamagaiguëri, basini icarataiguëri sabiriquë. Basini te inguitsagatima caninasati, iroonti icanaque imasi oisha aisati imasi cábara. Iquenagueque canta tenta ine ibango irasi. Ocoguitomotaiguëri pairoraca, icantaguebiri-queri catsimari, itsipiriacaiguëri. ³⁸ Isigopitaigacari ira quisaiguëri, icenagueque cara tera ontimingani aisati otisipaguequë. Imánopitaigacari quisaiguëri omoropaguequë tongagari aisati quibatsi. Icaninatasanti, carari te irágacananitiri ira quisaneiantatsiri tsoengatsiri, te iranintaiguëri. ³⁹ Iquemisanque icaegu, iroro ora igónijintacaiguëri Tosorintsi cara iniacaninataiguëri, carari te iranasantaiguero omagaro icantasantaiguëri Tosorintsi, iroonti igótasantaiguë ora aisonori imaguëri Tosorintsi aiquenta iraniaiguëro antagaisati icanqueri. ⁴⁰ Tosorintsi te ironijagaiguëri iriro ora yobetsiquineri icocaquerinta iraguaigacái eiro. Aiquenta ironijagaiguëri omagaro quemisantatsiri omoncarotobaquima cara imaáiro Tosorintsi antagaisati, iriro aisati eiro, ora yobetsicacái icasijacái, aisati iraganinasëretasantacái.

12

Pinguengeri Jesus, piguiatiri.

¹ Aro tojai iquemisantaiguë icaegu nocomantëgotëca. Cara anguemocotaiguëri omítococái anguemisanqueri Tosorintsi. Aisati inetsaigacái yamai igóiguë pairoraca acanque eiro. Yamai nosiacagantëmiro: ¿Teco pigóte ora yameta oboina irisiganëma irogóntima pairiraca obaquenguitsine? Cara irisiganëma irojocanëro iguitsagare oma irisiganasantanëma. Aisa ocanta caninataque ojocanëro pairoraca otiacái ora te ongomeite, pairoraca cométomocái, cara anganquineri Tosorintsi ora icocacái. ² Përosati intsome anguengeri Jesus Ira quemisantasantotsi. Iquemisantacaqueri matsiguenga, yogabisaicotaigairi. Tojai itsipiriobencái cara corosiquë jirai. Carari igóque iraganacái canta Jonogagueitequë, cara itsipiriobencái, te iripasiguitiro. Aique yogainocanaa. Yamaica ainta isobiague ibacasonoriquë Tosorintsi, itsibatacari iragáantomentoquë. ³ Jirai tojai iguisaiguëri tsoengatsiri Ira Jesus, tojai itsipiriacaqueri. Yamai pinguengasantiri arota quero pogasëreta, quero pitsirisharo cara itsipiriacaquemí obiro, quero pijocajiri Quirisito.

Tosorintsi yogatingatajiri quemisantatsiri ira cantiro ora te onganinate.

⁴ Yamai picantabecari cantaguetatsiri: "Pijocajiro ora picantagueti te onganinate", carari terai inguisemi, terai ingantaguebiritimiro catsimari, terai iróguimi, terai piraatanëneri Quirisito piraá. ⁵ ¿Aroco pomaguisanquero cara itomintëmi Tosorintsi? Aisati isanguenatacaqueri jirai cara canquemi Tosorintsi:

Notomi, cara nacamanaaquemi nogatingatajimi, quero pipëgatina, quero piguisina, quero pitsirisharo; Naanti Pitingomi. ⁶ Cara ingantagueque te onganinate nanintane, nacamanaaqueri, nogatingaqueri. Nogótacaqueri cara te nanintiro ora icantagueti. Cara natsipiriacaquemí pigóntëma cara notomintëmi.

⁷ Cara yogatingaquemi Tosorintsi, quero pitsirisharo. Nintaiguëmi, itomintaiguëmi, iroro iragatingataguëquimi. Aisa ocanta ametaro eiro cara acamanaairi otomijegui. ⁸ Omagaro sërari icamanaaqueri yogatingaqueri itomi. Aisati Tosorintsi. Queroca yogatingaiguimi, cagaribi obiro itomi, irisinto; te pomatsiguengatimari. ⁹ Jirai cara eiro janequiquerai yogatingacái ira asintái, aro aquemisantaiguëri. ¿Teco aisati caninataque antingomintimari, ominguiri Tosorintsi Ira asintái, Ira timasëretacagái yaca quibatsica aisati intimacagajái përosati Iriroquë canta Jonogagueitequë? ¹⁰ Iraegui asintái yaca quibatsica yogatingacái yogomecái cara ijitabeca iriro caninaro arota antimantimaro caninasati yaca quibatsica carari quero cosamani atimi yaca. Irari Tosorintsi yogatingacái caninasati igótinta omagaro, yogatingacái arota aisonori yoganinasëretacái. Icgasanti iraganinasëretái icaninatasantotsi Iriro. ¹¹ Aisonori teni ongogue iragatingatái Tosorintsi. Ocatsitanacánta te anganinabentiro, ogasëretocaro. Carari aiquenta anguengero, anguemisantantëri; anganinabentiro aroquenta oganinasëretacái.

Quero pomaintiro cara icábintsaigacái Tosorintsi.

¹² Cara pitsirishaca piguiatiri Quirisito aisa picanta pomagotasantaigabitaca, pingabir- itanaima, pisintsitae quero pijocajiri Quirisito. Aisonori iguisabiritaiguëmiro mat- suguenga aroquenta piquemisantaiguëri Tosorintsi, carari quero poperata, pingani- nasërete. ¹³ Caninasati pingomantëgotiri Quirisito pairiraca ijita, pingantineri Tosorintsi omagaro ora icocaquemi. Aique piginasëretiri popiguemisantane ogasëretabetachari, pingemisantasanguiri iriro. ¹⁴ Pingogasantaigne págacananatiguëri basini matsiguenga carari quero piguisaneintaiguiri querootisati iguisaneintaiguimi iriro. Aisati pingogas- ante pintingomintasantimari Atingomi. Aique iromitocoquemi pintimaque caninasati, iraganinasëretëmi. Cagaribica iraisati Atingomi, quero pitiomotiri. ¹⁵ Pigamaiguema arota quero pomaguisantiri Tosorintsi cara icábintsëmi, quero pijocajiro cara piquemisanguëri. Quero piguisaneintobaga arota quero pamasisëretaguëtacagari popiguemisantanepague. ¹⁶ Quero pintaguetiro tsinane cagaro pijina, quero pintaguetiri sérari cagari pijime. Querootisati pomaintiro cara icábintsaguëmi Tosorintsi. Quero picantari Esaó ira main- queri Tosorintsi, te inguengeri. Esaó irianti itomi Isac. Igóque cara ingamaque iriri, irasintëmaro iriro omagaro irasi iriri, aisati ingábintsëri Tosorintsi. Aro iquenabaguitë Esaó, ipigapaa, págasantëri itasegane. Iniopëri ireinti cara ingoquero maroro quiraaquiro. Inebetaparo, icampëri ireinti: “Igue, pomenaro pomarore nitasegasantëni”. Yotabitanëri Jacob: “Aroca nopëgajimi, ingantocobintëna naanti apati, imënaro iraisati cara ingamaque, aro nomëmi poperi”. Icampëri: “Aro. ¿Pairo nongogobique cara ingantocobintëna aiquenta cara pënibaque nangamaque yamaica?” Aro ipëri iraperi. Ira Esaó imaintëro cara ingábintsëri Tosorintsi aiquenta. Itsoinguëtiuguero. ¹⁷ Carari pigóiguëro cara aiquenta iquengairo Esaó ora icanque. Iragasantaca. Icobabeca ingantocobintirime iriro iriri aisati ingábintserime Tosorintsi. Tigueti ingantima ingantiro iriri aroquenta icantocobintëri ireinti. Aroque Jacob pëgairi Esaó. Tenta Esaó iranintiri Tosorintsi, ijoquero cara ingábintsëri aiquenta. Te inguemisante. Aro yamai, quero picantari ibega Esaó.

Ati ocanta icábintsagaicái Tosorintsi.

¹⁸ Te piniaiguero ora iniaiguë joríojegui jiraisonori canta oguitojaquë jitacha Sinaí cara icomantaiguëri Moisés ora icocagaiguëri Tosorintsi. Itsorogasantaguë cara iniaiguëro omanarontsi cobeingari, aisati oquibeguinte coguentima, aisati otsitinitasantanë catagui- teriquë. ¹⁹ Iquemaiguëro itibore cara itibotasantanë catsiguesonori, aisati iquemaigaba- quero Irinibare Tosorintsi cobeingari, itsorogasantaignaqueri. Icantaiguëri ira Moisés: “Quero inibataái querota acami. Pinibatiri obianti”. ²⁰ Itsorogasantaguëri cara icanque Tosorintsi: “Te naninte iriboque yaca oguitojaquë matsiguenga teatisati ibira. Pairiraca boquënguitsine, iragatiquëroca oguitoja, pobasegaiguëri pigamagaiguëri”. Aro itsorogasan- taiganaque joríojegui. ²¹ Tojaisonoriguinte icobeingatasantë Tosorintsi, irooti cara icanque Moisés: “Notsorogasantëri naro, nomogomogoatanaca”. ²² Obirojegui, tenta pijáigue Sinaíquë, irooro te pintsorogaiguëte. Iroonti ocanca paretaigaca basiniatiguë oguitoja ora jitacha Sión cara itimi Tosorintsi catimanageronori. Aisa ocanta piáiguë Jerosarénquë canta Jonogaguitequë, paretaigari Tosorintsi pigóigapëri. Icábintsasantëmi, quero pitsorogui- ri. Aisati pitsibataigapari tojaisonori ironomire Tosorintsi irisaanganetsite cara yapatobir- itaigari, icaninabentaiguëri. ²³ Aisati picarataiguëri antagaisati itomijegu Tosorintsi irisanguenatëgotaga Jonogaguitequë. Aisati ainta Tosorintsi Ira comantëgotaguëri omagaro matsiguenga negaraca iriátë aisati pairoraca inganque. Aintasati isërejegu antagaisati caninari iraequi quemisanqueri Tosorintsi jirai; aroque yoganinasëretaignaqueri Tosorin- tsi. ²⁴ Jiraisonori Tosorintsi icantasantë cara aiquentata imaguëri matsiguenga irorai Nibarintsi. Yamai imoncaracaro Irinibare cara ipoque Quirisito. Yamai pabencari Jesus pitentaigari Ira camobicái iraatánë iraraa. Iroro yosaatantajái Tosorintsi ora acantagueti te onganinate. Aisati jiraisonori Caín óguëri Abel ireinti, iroro icasitigabiriqueri Tosorintsi. Carari cara iraatánë Jesus, yogabisacotajái Tosorintsi. Iraraa Jesus caninero, pabisëro iraraa Abel.

²⁵ Jirai iraequi jorio ipëgatsacari Tosorintsi cara Moisés yogabisëneri imatsiguenga Irini- bare Tosorintsi. Tenta inguemisantaiguëri, itsipiriacaiguëri. Yamai aisati icogui Tosorintsi irinibataiguëmi obiro. Quero pipëgatsatari obiro aisati; popëgatsatimarica inguisaiguëmi aisati. Cagari matsiguenga nibacái yamai, Irianti Tosorintsi Ira timatsi Jonogaguitequë. ²⁶ Jirai cara Sinaíquë cara inibatë Tosorintsi yosebatëro quibatsi, carari yamai icanque: “Aiquenta panibati nosebatairo quibatsi, carari quero patiro quibatsi, aisati nosebatëri paba, manchacori, aisati omagaro jonogasati”. ²⁷ Icanque: “Panibati nosebatairo”, aro irojocaguequero omagaro ora yobetsiquë jirai, iritsonguëro ora te onguëshote. Iroonti inaatsine coshori ora tigueti ongantajima osebatima. ²⁸ Intsome angarsiatiiri Tosorintsi cara ipacáiro intimacacái iragántanequë cara quero posebataa. Intsome angantineri ora icocacái, intsome angarsiatiiri aisati anganinabentiri, intsome

antingomintimari Irironta caninarisonori aisati cobeingarisonori. ²⁹ Aisa icantaro tsitsi cara otaquero pairoraca, Tosorintsi cobeingarisonoriguinte inguisaiguëri ingasitígataiguëri antagaisati matsiguenga ira cantaguetiro ora te onganinate, ira tsoengatsiri.

13

Icanque: "Pintimaigue caninasati".

¹ Pinintobaganëma obiro aisati popiguemisantaneegui. ² Aroca irarequimi quemisantatsiri ira te pineiri jirai, yágacananatobëri. Jirai ainta yágacananatobëri carari te irogótiri, yogasomabaqueri caninasati, carari cagari matsiguenga, irianti ironomire Tosorintsi irisaanganetsite. ³ Pinguengaiguëri iromingaga, pingábintsaiguëri aisatime pinganquimame yominguëtëmini obiro aisati. Aisati pingábintseri ira icantaguebirique catsimari obironta imatsiguenga pitsipirique aisati obiro. ⁴ Caninataque iráguero iina sërari, águiri ojime tsinane. Aisati caninataque iraniobaquima ira ágasantobagacha. Carari Tosorintsi ingasitígatëri antagaisati ira aguimintaro iina, aisati omagaro ora aguimintari ojime. Iratsipiricaqueri pairiraca antaguetiro ora cagaro iina. ⁵ Quero picogui irinasante piguireguite, iroonti pinganinabnque ora pasinta inomotimi ipëmi Tosorintsi. Icanque Irro: "Coshoni noguëmi; quero nojocajimi". ⁶ Iroro angantaguëque:

Nigóque cara iromitocoquina Tosorintsi, quero notsorogui quero naquengasëreta, tiguënta ingantina matsiguenga iramasisëretina nasërequë.

⁷ Pinguenguëri ati icanta ira quemisantacagaiguëmi, ira ogometaiguëmi Irinibare Tosorintsi. Pinguengaiguëri ati icanta itimaigui caninasati. Aisati pingantaiguemari ibegaiga iriro cara iquemisantasantaiguëri Tosorintsi. ⁸ Quero ipasiniaititi Atingomi Jesoquisito, përosati cara icanta, jirai, yamaica, përosati. ⁹ Pinguemisantantiri Quirisito. Quero piquemisantiro ora yogometasitimi matsiguenga. Caninataque anguemisantiro ora yogomecái Tosorintsi Ira cábintsaigacái yosintsisëretacái. Ainta cantaguëmi popero oca quero papiro ora, carari itsipiriasita tenta oganinasëretiri iriati ora irogameantane, que-rootisati poganinasëretimi obiro. ¹⁰ Cara anguemisanquerica Quirisito Ira camobicái, aro iragabisaicotajái. Irari saserirotijegui te inguemisantiri; yametaigaro cara yogamaguiri ibira yaagaiguë ibatsa arota irabisaicoontimarome. Carari itsipiriasicaro tenta ogabisaicotiri. ¹¹ Aro ira itingomi saserirotijegui yógapinintiri ibira, yágapiniquero iraraa yoguëro tsomaguisonori ibangoquë Tosorintsi arota irojocanëneri matsiguenga ora icantagueti te onganinate. Aique yáganëro ibatsa ibira canta jaanta, sotonta poeborokuë, itaquiniro. ¹² Aisati icanqueri Jesus, yágaanaqueri sotoquë poeborokuë cara yogamagaiguëri. Cara, itsipiriasantë icamaque cara iraganinataiguëri ira matsiguengajegui quemisantaiguëri.

¹³ Isërontobitaigacari Jesus matsiguenga. Aisa acanta irisërontaigacái cara aguiatëri. Jemita, intsome anguemisantiri përosati. ¹⁴ Yaca quibatsica quero atimi cosamani, carari oguiaiguë antimopë përosati canta Jonogaguëtequë. ¹⁵ Aroquenta aquemisanqueri Jesoquisito, caninataque angarasiatiri Tosorintsi përosati aisati omanocotiri aisati ongomantaguetiri matsiguenga: "Caninarisonoriguinte Notosorintsite Ira natingomincara". ¹⁶ Obirojegui, quero pomaguisantaiguëro pomitocotobaganëma, aisati pingábintsaiguëri popiguemisantane coguitiachari. Oca iroro oganinatëri Tosorintsi.

¹⁷ Pinguemisantaiguëri ira quinguisatomotimiro Irinibare Tosorintsi, pintingomintimari. Yomisantaiguëmi yogometaiguëmi arota iraganinasëretaiquëmi pisërequë. Aiquenta Tosorintsi irosomitobëri: "¿Pairo pogometaiguëri ira piquemisantacaque? ¿Caninasatico iquemisantaiguëmi?" Aro ingomantapëri. ¿Teco caninataque ingantocoquëmi: "Jee, caninasati iquemisantaiguëna"? Carari quero piquemisantiri, ingantocoquëmi, "Teni inguemisantina", aro inguisaiguëmi Tosorintsi. ¹⁸ Najitaiguë te nangantagueti ora te onganinate. Tojai nocogaiguë nangantiro ora caninari. Pomanocotaiguëna cara nantime caninasati. ¹⁹ Aisati nocogasanti pomanocotaiguëna arota Tosorintsi iranintacaquina naniaigaimi aisati, iromitocoquina naretajimi omanapague. ²⁰ Aitosati nocogaini ingábintsaiguëmi Tosorintsi, Ira cogatsi iromagoriasëretagaiguëmi aisati inganquëmi pintimaigue caninasati. Jirai yoganiatairi Atingomi Jesus Ira camobicái iraabencáiro iraraa. Cara icamaque Jesus, aroque imoncaraquero Tosorintsi ora irorai Nibarintsi ora icantasantë jirai: aroque yobetsiquëneri quemisantatsiri cara iragabisaicotajiri intamacaganëri jonoquë Irroquë. Aro icantocobintacái Jesus, yomisantacái aisa icantari ibega casintari iroishate yomisantaiguëri. ²¹ Aitosati namanocotaiguëmi cara iraganinatimi Tosorintsi arota pingantaiguëro omagaro ora caninari, ora icocagaiguëmi. Aique inganinabntaiguëmi Tosorintsi aisati Jesoquisito Ira piquemisantaiguë. Caninataque antingomintimari përosati, angantocobentiri "Caninarisonoriguinte Atingomi Jesoquisito". Aroque.

Aro ocarati isanguenaquero.

²² Nopiguemisantaneegui, nocogui págacaninatobéro oca nasanguentaiguêmica tenta nomitojaiguero nanibare. Pinguengasantobéro, quero pijocajiro cara piquemisantaiguëri Quirisito. ²³ Pigóiguë cara yomianqueri Timoteo opiguemisantane. Yamai nongomantaiguëmi cara yomisotocajiri; queroca icosamaniti cara iribocapë yaca, nantsibatanëmari cara obirojeguiquë, naniaigaantimi. ²⁴ Pobetsataiguenari iraugui ogometocotaiguiri Atin-gomi aisati antagaisati quemisantatsiri cara. Yaca ibetsataiguëmi Itariasati quemisantatsiri. ²⁵ Nocogui Tosorintsi ingábintsaiguemi omagaro obirojegui. Aro ocarati.

ISANQUENAQUE SANTIAGO

Santiago ibetsataigari ira jorío quemisantatsiri.

¹ ¿Aintabi obirojegui, nomatsi quenga jorío quemisantatsiri? ¿Caninasati pitimaigui? Nasanguenataiguëmi naro Santiago, iromeraro Tosorintsi aisati iromeraro Atingomi Jesoquirisito. Nobetsataiguëmi obirojegui játaguequenguitsi jaapaguenta basinipaguequë poeboro.

Cara obomirintsitaiguëmi pairoraca, aro pinguemisantasante, pinganinate.

²Yamai, nopiguemisantane, nongomantaiguëmi oca: aroca obomirintsitaiguëmi pairoraca, caninataque pinganinatasantaiganaque. ³Pigótasantiro oca: aroca omomirintsitomiquimi, pabentimari Tosorintsi, aro iromitocotaiguëmi inguemisantasantaiguëmi përosati pinganquima obiro. ⁴Caninataque përosati pingantima cara pinguemisantasantaigü. Aique pinganinasëretaijanaque, pobetsicasëretasantaiguëma. Aro pingantineri Tosorintsi omagaro ora icocaquemira Iriro.

⁵Teca pigótiro ora icocaquemi Tosorintsi, aro pomaniri: “Pigótacaguina pairoraca picogui nanganque naro”. Aro irogótasantaquimiro, quero iguisatsatimi. ⁶Carari cara pomanqueri, pinguenguema: “Nigóque iquemaquina Tosorintsi, inganquinaro ora namanaqueri”. Quero pitsoingairi. Ainta basini yamanabecari Tosorintsi, carari caraquenta itsoingai te iragamemari inguemiri. Ijtabeca: “Yamai iquemaquina Tosorintsi”, carari caraquenta iquengaa: “Tenijenga inguemina”. Iriro aisa icantaro pibega omotoncaa angaare, posibatapininquero coguentima. ⁷Pigamema, pinganquimarica ira tsoengantatsi. Quero pijiti iráquero iriro pairoraca ingoicotabequimari Atingomi. ⁸Te përo ca ingantima aisati tenta irogóte pairoraca ora icogui.

⁹Ainta quemisantatsiri te irasintëmatima, carari caninataque inganinasëretanë aroquenta Tosorintsi iniacaninatëri iriro. ¹⁰Aisati caninataque ira casintasantacha inganinabiritiri Atingomi. Quero icaninabiritiro ora yasinta, queronta përosati pini, aisati queronta itimi përosati iriro. Aisa icancaro pibega tobaritega, omanapague ongamanë. ¹¹Cara coniamaniquë ocaninati otega, carari cara irobariasantanë paba osiguiricanë. Aisa icanta casintasantachari, omanapague ingamaque, irojocanëro omagaro ora yasintabeta. ¹²Aroca pingogabequima pingantiro te onganinate, carari querooca pintiro, aro pinganinasëretasantanë. Aisati imasanoquimi Tosorintsi intimacaguimi përosati cara Iriroquë. Aroque icanque: “Nantimacaguiri Jonogaguitequë antagaisati ira nintasantina”.

¹³Aintaca inguenguema ingantiro quimingari, quero icantasita: “Icocaquinaro Tosorintsi”. Pinetse, te iranintëmate Tosorintsi ingantiro te onganinate, teatisati ingocaguiri matsiguenga ingantiro. ¹⁴Carari cara inguengasëretiroca matsiguenga ingantiro ora quimantaro, aro ingoganë ingantiro. ¹⁵Aique, cara ingogasantanë ingantiro, aro ingantasantanëro; inantima iritsoenganai, aisati iroro iriátaguëque Sharincabeniquë. ¹⁶Quero pamatobita, nopiguemisantane, nanintane. ¹⁷Ira Tosorintsi Iriro cábintsaijái pasanoijáiro omagaro caninaro. Iriro obetsiquëri ira paba, manchacori, jonogasati, antagaisati inatsi. Yobariasanoti Iriro. Te imasiniatitëmate, irooti përosati icábintsasantaigái. ¹⁸Icoque Tosorintsi omatsiguengatimari. Iroto timagajái Irinibare. Igáairo ogometasantacái ora aisonori, aquemisanquero, irooti itomintancái. Yoguibatacái ei; aiquenta intomintëmari tojai basini matsiguenga.

Ora icocaqueri Tosorintsi quemisantatsiri.

¹⁹Yamai, nopiguemisantane, nanintane, caninataque anguemobëro ora icancái basini, carari antsinisati otabitiri, querootisati omanapague acatsimati. ²⁰Aroca angüëma, teni angantineri Tosorintsi ora icogui, ora aganinatiri Iriro. ²¹Pigóiguë aiti tojai picantague-tiro quimingarisonori. Yamai pijocasantanëro omagaro oca te ongomeite. Pisëretimaro Caninaro Irinibare Tosorintsi, aro piquemobë. Aroca pinguemisantasantotiro, aro ogabisaicosëretajimi. ²²Pingantasantiro ora ocomantaiguëmi Irinibare. Quero patiro piquemasitaro, arota quero pamatobita obiati. Teni onganinate pinguemasititiro, caranti pinguemisantasantotiro. ²³Ira quemasitaro, querooca icantasantiro ora ocomantëri, te irogóte ati icanta. Itsipiriasicaro iquemabecaro, tenta inguengasëretairo aisati. Yosiacar netsaborotatorionorntsi. ²⁴Inetsaborotabitaca carari aique iriátae, iromaguisanquero atraca oconta iboro. ²⁵Carari ira te iromaguisantiro, përosati iquengasëretëntiro Caninaro Irinibare Tosorintsi ora yabisaicoontaa, aisati përosati ingantasantiro ora ogometiri. Quero iquemasitaro. Aro iraganinatasantëri iriro Tosorintsi.

²⁶Aintaca paniro matsiguenga ijica aisonori iquemisanti, carari ainiro iguisataguetiri basinipague, yamatobita iriati. Terai inguemisantasante, aisa itsipiriasica,

iquemisantabeca. IcoGUI Tosorintsi ogóigue eiro quero asintsitsatiri omatsiguenga. ²⁷ Aisati icogui eiroca quemisantatsiri, angábintsaguetiri ira coguitacha: ira janequi camatsi iriri, iniro. Aisati angábintsaguetiro tsinane ogamaimentaga, omagaro cantacha nega. Aisati icogui Pabati Tosorintsi quero antagueti ibega ira tsoengatsi.

2

Caninataque anintobaganëma.

¹ Yamai, nopiguemisantane, piquemisantaiguëri Atingomi Jesoquisrito. Icaninatasanoti Iriro. Icocaquemi pinintaiguëri omagaro matsiguenga. Quero picábintsasitari paniro matsiguenga iroontita pomaintiri ira basini matsiguenga. ²⁻³ Pinguengaiguero oca: cara papatotaiga, aroca ingapë ira capërone caninaro iguitsagare aisati irogobacoro iraniyote irianti oro oro piniacaninatobëri, pingabëri: “Jeroca caninaro sobicomentotsi. PISO-bigopë”. Carari cara ingapë basini ira cagari casintacha, ira capërone inaga imanchaqui, aro pomaintobëri, pingabëri: “Quero piqui. Pineni cara. Paratingue queroa pisobique quibatsiquë”. ⁴ Cara picantaiguëro negaca, cara piniacaninatobëri paniro, cara pomaintobëri basini, te pingantiro caninari. Caninataque págacarinataigabaqueri omagaro. Quero poguibatiri paniro. Quero piquengasëreta picantiro negaca ora te onganinate.

⁵ Nopiguemisantane, nanintane, pinguemisantaiguena. Icoigaiguëri Tosorintsi iraeGUI cagari casintacha cara inguemisantasantaiguëri Iriro, intiomotaiguëri canta iragaantanequë jonoquë. Icanque Iriro: “Nosobiacaqueri Naroica omagaro ira nintaiguina”. ⁶ ¿Queroco poguibasiguitiri ira cagari casintacha pairoraca? ¿Cagarico ira casintacha matobiintetimi? ¿Teco iriatitati aganëmine catingasati itingomipaguequë yobomirintsitaiguëmi? ⁷ ¿Cagarico iriatitati cantëgotaguetasitaro iripajiro Atingomi Jesoquisrito Ira pitingomintaiga? ⁸ Cara Sanguenariquë, aiti iragaantane Atingomi. Icanti:

Pinintiri pitimanamire pibega cara pininta obiati.

Aroca pinganquero negaca, caninataque. ⁹ Aroca piniacaninatiri paniro carari pomaintëri basini, picanque ora te onganinate, picantaguetomoqueri Tosorintsi ora cagaro caninatatsi cara ocanti Sanguenari. ¹⁰ Arome pinguemisanquero omagaro isanguenare Moisés, carari aitica poro te pinguemisantiro, picantaguetomoqueri Tosorintsi ora te ongomeite. Aisa ocanta te pinguemisantiro ora basinipaque. ¹¹ Icanque Tosorintsi jirai, aisati isanguenaquero Moisés:

Quero pintiro tsinane cagaro pijina. Quero pintiri sërari cagari pijime.

Iriatisati cantatsi:

Quero póganti.

Yamai quero paguimintaro pijina, carari pógüërica matsiguenga, picantaguetomoqueri Tosorintsi ora quimingari tenta pinguemisantiro antagaisati isanguenare Moisés.

¹² Pinibataigue caninasati aisati pingantaigue caninasati ingomantëgotaguëminta Quirisito cara icantaiguëmi jirai: pinintiri pitimanamire aisa pibega cara pininta obiati. ¹³ Queroca piniacaninatiri basinipague, queroa picábintsiri, querootisati iniacaninatimi obiuro Quirisito. Carari iraeGUI cábintsabacagacha quero itsorogaigui cara ingomantëgotiri Quirisito.

Cara aquemisanqueri Tosorintsi, antineri ora icocacá.

¹⁴ Pinetse, nopiguemisantane: aintaca matsiguenga icantatsita: “Naquemisanti”, carari te ingábintsagueri basini matsiguenga, ¿Omitocoqueri cara iquemisanti? ¿Atiroco ongantima irabisaicoontëmaro? ¿Teco inguemisantasitima? ¹⁵ Aroca pigóque icocaró popiguemisantane ora imanchaqui aisati iraperi, pingábintseri pomeri. ¹⁶ Quero picantasitari: “Caninasati pijáte. Caninasati pomasitanëma. Caninasati pinguemima”. Queroca popiri ora icoca, ¿Caninarico oca picanquerica? Teni. ¹⁷ Pinetse. Aroca aquemisantatsita carari te oniagantimaro tenta omitocotiri basini, te ongomeite. Atsipiriasicaro, aquemisantabeca.

¹⁸ Ainta paniro inganquimica: “Piquemisantabeca obiati; carari naanti antineri Tosorintsi ora icogui”. Icanquero ora aisonori. Queroca pintineri Tosorintsi ¿Ati ongantima nogóquimi piquemisantasantiri? Carari cara caninasati nantineri Tosorintsi naro, pigóquina naquemisantasantiri. ¹⁹ Pigóti obiuro ainta paniro Tosorintsi. Caninataque. Aisati igóguero camagarijegui itsorogasantiri Ira Tosorintsi, imogomogoatanaca, carari quero yogabisaicotajiri. ²⁰ ¿Te pininte pigóte pinguemisantasantiri Tosorintsi? Queroca antineri ora icogui, atsipiriasicaro, aquemisantomemegacari. ²¹ Pinguengaiguëri omatsiguenga jirai ira jitacha Abaram. Yaganëri Isac itomi oguitojaquë, iróquimerime Tosorintsi. Aro icantocoqueri Tosorintsi: “Naniacaninatëri Abaram”. ²² Te inguemisantasitabetima Abaram. Iroonti intineri Tosorintsi ora icocaqueri. Irooti ora iquemisantasantanacari. ²³ Aro ocanca nega omoncaraca Sanguenari ora ocanti:

Iquemisanqueri Tosorintsi Abaram, iroro icantocotaguëqueri Tosorintsi: “Naniacaninatëri Abaram cantaca te ingantaguetëmate ora te onganinate”.

Aisati imatsiguengatacari Tosorintsi Abaram. ²⁴ Pinetse. Aroca patiro inabitëma inguemisantomemeguëma matsiguenga, tiguëti ingante Tosorintsi iraniacaninatiri. Cararica inguemisantasantotërinica Tosorintsi aisati irantaguetineri ora icocaguiri, aro iraniacaninatëri. ²⁵ Aisa ocanta Rajab ora niobintiri sërarpague canta Jericóquë. Ocábintsabaqueri jorío iragátane Josoe, aisati poniagobëri basini abatsi ora isigopiantaari ira cogabitacha iróguirime. Ontëneri Tosorintsi, iroro iniacaninatëro cantaca te ongantaguetëmätiro ora te onganinate. ²⁶ Queroca aneingai, camasanotaque obatsa. Aisa acanta, queroca antineri Tosorintsi ora icocacái, quero iniacaninatái Iriro. Iroonti aquemisasantasitabecari.

3

Ora anine.

¹ Nopiguemisantane, pigóiguëro oca: aiquenta ingomantëgotaguëri Atingomi ira matsiguengajegui, carari ingomantëgotasantaiguëri agabenisonori ira ogomeantatsiri. Inganqueri: “¿Pairo te pingantobitiro ora pogometaigabitacari pogomere? Poniagaiguëri caninasati. Caninataque pingantima obiati aisa ora pogomeantira”. Iroro, caninataque quero picogui antagaisati obirojegui pogomeanti. ² Aiti tojai ora inibatasitaro eiro, acantagueti ora te onganinate. Aintaca ira te irinibatasitamaro quimingari, iroro caninari igóquenta icanquero pairoraca caninari. Igáca caninasati. ³ Antimatëgotapininirica iguibe mora ibagantequë, aro inguemisancái. Otiomijani pinabita ora atimatëgotantari carari plátacaguiri iguibeguinte mora. ⁴ Pinguengero oquibe pitotsi ora moncaratacha 50 metoro. Oquibe pinabita pagobiaquero oquibe coguentima, carari oquenacaquero otiomijani pogatingatiro negaraca ininti iriatë ira casintaro. ⁵ Aisa ocanta anine. Otiomijani pinabita carari ocanque oquibeguinte pairorapagueraca. Aisati ocanta pibega tsitsi otiomijani otaquero oquibeguinte togantsi. ⁶ Aisa ocanta, cara anibatë arosata te onganinate, aisati oguimingatantëri tojai matsiguenga, onguisagaiguëmari tojai, ongantacaquero ora te ongomeite. Irirotora ogomecái negaca Sharincabenisati, cara inibatiro quimingari. Iroro tojai aguisatsatobaguëta. ⁷ Aro ogóguë eiro omirataguequimari basiniripague, atsigantatsiripague, tsimiripague, maranguepague, aisati simapague, omagaro. Ogometaguequeri. ⁸ Carari te pairi agabeirone inine iraguimairitiro arota quero inibatiro quimingari. Asi inibatantaro ora te onganinate. Cara ogamagacái pigantatsiri óguëmaroca, aisa ocanta cara amasitacacái anine cara anibatasitamaro ora te ongomeite. Iroro iriatanquima tojai matsiguenga Sharincabeniquë. ⁹ Iroro anine inibatantocotari Otosorintsite: “Icaninatasantoti Pabati Tosorintsi”. Carari irootisati aisati inibatëgotaguetasitari matsiguenga ira yosiacagantaca Iriati Tosorintsi. ¹⁰ Patiro pini obagante, iroro inibacananatëgotantari Tosorintsi aisati iroro aguisanijiantari omatsiguenga. Nopiguemisantane, te ongomeite ongonagaguetiro anibacananatiri aisati anguisatsatiri. ¹¹ Nosiacagantëmiro: cara picontiati nija caninajaro quero oconoataro quibisaaoro patironta pini omoro. ¹² ¿Aroco inanquimaro aranca manco patiroquë panguirintsi? Quero aro pini. ¿Aroco inanquimaro quëri irimaqui? Querootisati picontiati pite nija, patiroquë omoro. Aisa acanta eiro queroca acaninasëreti, quero inibati caninasati.

Ira igótacaganë Tosorintsi.

¹³ ¿Pigótico piquengasëreta? ¿Aitico pigóonta? Aro caninasati pintime. Quero piquengasanta obiati. Iroonti caninatatsi pingábintsante, aisati caninataque pinguenguema. ¹⁴ Aroca pinguisanentiri basinipague, aisati aroca pijonaqueri, quero piquengasanta obiati. Quero pamatobita; pijitasita picaninani, querootisati pijiti pigóti. ¹⁵ Aroca picantaguetiro ora te onganinate, te irogometimiro Tosorintsi. Cagaro irasi. Irianti matsiguenga ogomequimiro, aisati camagari. ¹⁶ Cara piguisaneintobaga, aisati cara pijonobaga, quero pitiomotobaga caninasati. Queroca pagama, pingantaguetasante tojaipague ora te onganinate. ¹⁷ Carari obiroca irogótacaganë Tosorintsi, aro pinganinasëretanë, pingábintsantanë, quero piguisabacaga. Quero pipëgatsatari pitsipa. Pingantaneintëgotobaganëma, pinibati catingsati quero pamatobianti. Caninasati pitimaigui. ¹⁸ Pairoraca opanguiti, águëro asi oguitso. Aisa ocanta aroca antimaque caninasati, angábintsante, aisati oguimairitiri quisachari aro iraniacananatacái Tosorintsi.

4

Iraegui te inguengasëretima aisati ira coguiro inatsi quibatsiquë.

¹ ¿Pairo pomanátobagobita? ¿Pairo piguisabacagobita? Piguisabacaca pinebetaronta ora yasintagueta basini. ² Picogaigabitato pairoraca, carari tenta páguero, iroro

pógaguëtobagueta. Pinebetabitario pairoraca, iroro cantënguicha tenta páguero, piguis-abacaca aisati pipëgatobaca. Te pingantiro ora picogui tenta caninasati pomanocotiri Tosorintsi. ³ Aroca pamanabetari, te imaugemiro Tosorintsi tenta ongomeite ora picogasantabitaca. Pati ro picogaigabita pingábintsema obiatiegui, te pingogue piganinatiri Tosorintsi. ⁴ Posiacaro aguimintari ojime: ocoqueri basini sérari, iriroque ojime ogu-isaneinqueri. Aroca pinintaguetiro omagaro inaguetatsi quibatsiquë, piguisërimi Tosorintsi. Antagaisati ira nintatsi iromatsiguengatimari tsoengatsiri, iguisëri Tosorintsi. ⁵ Aiti Sanguenari ocanti caninasati:

Igácairo Tosorintsi Isëre pinancaí. Yamai ocábintsacái, ocogasanti antimaque caninasati, anguemisantantiri Tosorintsi.

Te ongantasitima Sanguenari. ⁶ Carari icábintsaigacái Tosorintsi cara ocanti basiniquë Sanguenari:

Ipëgatarí Tosorintsi ira quingasantacha iriati caninari, carari icábintsaiguëri aisati imitocoqueri ira te inguengasantima.

⁷ Pomemari Tosorintsi, pinguemisantiri Iriro. Aro yamai popëgatimari camagari, iro-jocanaími. ⁸ Pabentimari Tosorintsi, arota coshoni irogaiguëmi Iriro. Jirai picantagueti tojai ora te ongomeite, yamai pijoqui ro pinganquima yacaqueroca, inantima pintime caninasati. Tojai pitsingüeri Tosorintsi jirai, carari yamai pingantiri: “Piganinasëretaina, pinguengasëretaguina ora caninari”. ⁹ Pinguenguema, pigasëretasantanëma tenta pingantiro caninari. Picabatabitaca, carari yamai onganinati piraquima. Picaninatabitaca carari yamai pigasëretanëma. ¹⁰ Aique pinganqueri Atingomi: “Teni nanganinate tenta nangantëmatiro ora caninari. Naninti pingábintsaina”. Aro ingábintsaimi, iraganinataími, iromitocoquimi. ¹¹ Quero picantëmanatiri popiguemisantane. Aroca pingantëmanatëri pomatsiguenga, aisati aroca pingantocotiri ora icantaguetiro quimingaro, aisati pitsingüero isanguenare Moisés, cara ocanti: “Pinintobagaiguema”. Carari picanque obiro: “Te onganinate ora ocanti isanguenare Moisés. Teni naninte nanintobaguima”. Cara pinganque “Te onganinate isanguenare”, te pinguemisantiro, pitsingüero. ¹² Pinetsaigue. Paniro Tosorintsi ipagantanquero isanguenare Moisés. Aisati paniro Iriro comantëgotaguërine omagaro matsiguenga. Paniro Iriro agabaisicotajirine quemisantatsiri, aisati iragáqueri Sharincabeniquë ira te inguemisantiri. Obiroque ¿Pairo pijita obiro cara pingantocoqueri pomatsiguenga: “Picantagueti”?

Te ogótingani ora inënguistsine naramani.

¹³ Yamai pinguenguema, obirojegui cantabitacha: “Yamai najáque, queroca naramani, atiraca poeboropaguequë, ninë poro osarini, nomimantagueque pairoraca, náguë quirequi tojai”. ¹⁴ Picantabeca negaca carari tesonori pigóte pairoraca inënguistsine naramani. Caniatabetsibi iroro cantënguicha aroque picancaro mingori. Te ongosamanite mingoriguite, omanapague omeganëma. Aisa obiro quero cosamani pitimi. ¹⁵ Caninataque pinganque negaca: “Aroca iranintacaquena Atingomi, queroca nacami, aro nanganquero pairoraca”. ¹⁶ Carari yamai piquengasanta obiati, piniacaninasita pinibatasitagueta. Te onganinate ora picanque. ¹⁷ Aroca pigótabetaro caninaro, carari te pingantiro, picantaguetiro quimingari.

5

Icamanaaqueri ira casintaguetachari.

¹ Yamai, obiro casintaguetachari, nongomantaiguëmi: piragaiguëmani caraquenta pingabaitaiguëni cara orequima atsipiriagantsi. ² Obatsaguetanë omagaro ora pasintaigabita. Aisati ora caninaro pomanchaquisite iritsongüero sagari. ³ Irraquiima ira pigoboriaritepague aisati piguireguita. Quero pamanantantajari queronta icomeitai. Aroca iraraquiima pigoboriaritepague aito cara irogótoqueumi matsiguenga cara popobotatitari piguireguita tenta caninasati popënabentiri pomeraro. Irogótoqueumi te pingante caninasati. Aisati ingomantëgotaguëmi Atingomi, aro pitsipiriaguë, quero pinajiri ira pasintabeta. ⁴ Pamatobitaiguëri pomeraroegui, te popënabentasantiri. Iguisaneintaiguëmi, yabentaigacari Atingomi. Igótoqueumi Irirota agátaiguëri omagaro ira timaigatsi. Igótoque te pingábintsante, iroro itsipiriaguëquimi. ⁵ Pati ro piquengasanta obiati, te pingangueri basini, picaninabentiro ora pasintagueta. Cara iránetanë pobira, aro pingaimëri pomatsiguenga: “Intsome ajagueri nobira. Aroque yánetanë”. Ira pobira aisa icantaiguëmi pibega obiro. Papasantaiguë, picaninabenquero caninaro. Aro ingantocoquimi Tosorintsi: “Aroque pasintagueca pairorapagueraca yaca quibatsica, yamai natsipiriagaiguëmi”. ⁶ Pogasëretacagasantacari ira caninataguetatsi; te pomasitëmatimari ora icoca. Iriro icamaguetaquëque carari te iripëgatsatimi. Iriro yamai iratsipiriaguëquimi Tosorintsi.

Pigueiri Atingomi pigamemari.

⁷ Nopiguemisantane, pigueiri Atingomi antsinisati irooti cara iribocapae. Pinguengueri ira panguitatsiri. Ipanguitêro oguitso. Aique yoguiaquero cosamani irooti cara oparigopiantanai angani. Aro otimanê oguitso. Aique yobiguitêro icaninabenquero ibanguire.

⁸ Aisati obirojegui, pigueiri Atingomi antsinisati. Pinganinabentiri pënibaquenta iribocapae. ⁹ Yamai, nopiguemisantane, quero picantaguetocotobaga. Aroca pinguisaneintobaguima, ingomantêgotêmi Atingomi: “Aiti picantagueti obiro”. Aronisatitapê yamai Ira comantêgotantatsiri, pënibaque iribocapae. ¹⁰ Pinguengueri ira comantantatsiri jirai ira igâtaiguê Tosorintsi, icomantêgotêri ipomiribintacari cara itsipiriacagaiguêri imatsiguenga. Yamai pingantaiguemari ibega comantantatsiri. ¹¹ Aroque piquemocoqueri comantantatsiri cara itsipiriobitiri Atingomi, carari yamai icaninatasantaiguê. Aisa pingantimari ibega iriro, aroca pitsipiriobiqueri Atingomi, aro pinganinatanê. Piquemoco-taiguêri Job, ira timênguisi jirai. Yobomirintsitasantêri Satanás carari përosati iquemisan-queri Tosorintsi Job. Aique icábintsasantêri Tosorintsi, irasinta yoguiro icábintsanti.

Quero picantasita.

¹² Pinetsaigue, nopiguemisantane. Pairoraca pinibati, quero picantasita: “Igôque Tosorintsi cara catingasati nacanquemi. Teca aisonori ora nacanque, iratsipiriacaguinata”. Patiro pinganqueca: “Aro, nanganquero”, aro pingantiro. Aroca pinganque: “Quero nacantiro”, antagati. Patiro pinganque catingasati. Quero picantasita, querootisati picantocotaguetasitari Tosorintsi arota quero itsipiriacaguimi.

Cara pomanakeri Tosorintsi.

¹³ ¿Aintaca ira atsipiriatsi? Caninataque iromanocotiri Tosorintsi inantima ingábintseri. ¿Aintaca ira obesëreacha? Caninataque ingántabentiri Tosorintsi: “Icaninatasanoti Tosorintsi”. ¹⁴ ¿Aintasatica ira janaitatsi? Pingantiri ingaimiri ira obatacagui quiemisantatsiri arota iriritaitagapêri asati, aisati iromanocotaigapêri Atingomi, inganque: “Iragaguibegajimita Atingomi obironta irasi”. ¹⁵ Cara iromanocotaigapêri janaitatsiri, iraguaiqueri Atingomi iraguibegajiri, aro iragabisaicoqueri. Ainta icantaguetica ira janaitatsi ora te onganinate, irojocajineri Tosorintsi, quero iquengairo aisati. ¹⁶ Iroro, nongomantaiguêmi: aroca picantagueti ora te onganinate, pingomantobaguimaro, aisati pomanocotobaguima arota ingábintsaguemi Tosorintsi iragaguibegajimi. Ira sërari aganinatêri Ira Tosorintsi, cara yamani iriro, irotopitasantêri Tosorintsi. ¹⁷ Jirai ainta comantantatsiri jitacha Erías, aisati icanta ibega eiro. Yamanasantêri Tosorintsi iriro, icanque: “Iquemisantabetaiguêmi nomatsiguenga. Nocoguini pingasitígataigueri. Quero pobariguineri yamai angani”. Aro pabisanaque maba osarini aganguisati basini, te omarigue angani quibatsiquê. ¹⁸ Aisati yamanaji icanque: “Yamai nocogui pobarigajiro aisati angani”. Aique opariatanaí angani pianai ibanguirepague joríojegui.

¹⁹ Pinetsaigue, nopiguemisantane: aintaca obirojeguiquê ira jocairone cara iquemisantabecari Tosorintsi, aisati icantaguetanairo tojai te onganinate, aroca pinguengasëretagairi pinguemisantacagajiri, ²⁰ pigóiguero oca: iriátême aiquero Sharincabeniquê, carari pogabisaicoqueri, yamai quero iátaji osobi. Aisati irojocajineri Tosorintsi ora icantaguetomoqueri ora cagaro caninatatsi, quero iquengairo.

Aro ocarati ora nasanguenataiguêmi. *Santiago*

YOGUIBATÈ PERORO ISANGUENAQUINERI IRAPIGUEMISANTANE

Ibetsataigari.

¹ ¿Aintabi nopiguemisantaneegui? Naro Peroro nasanguenataiguêmi. Naro iragátane Jesoquirisito. Nasanguenaquimini obirojegui jorío quemisantaiguiri Atingomi Jesoquirisito, negaraca pitimaguetaiguê canta Pontoquê, Garasiaquê, Caparosiaquê, Asiaquê, Bitiniaquê, omagaroguitequê, aroquenta yomisotocaiguêmi cara pitimaigabita jirai. ² Jiraisonori icoigaiguêmi Pabati Tosorintsi. Igótcotaiguêmi jirai cara pinguemisanqueri Quirisito yamai. Aisati yoganinasêretantaiguêmiro Isêre Caninaro ora quemisantaquemi posaataiguêmi iraraa Jesoquirisito, ora yogabisaicoontêmira. Nocoguini aiquero ingábintsaignaquitiguimi Tosorintsi aisati aiquero iromagoriasêretagaiganaquemi.

Intsome angarasiatiri Tosorintsi aroquenta yogabisaicotajái.

³ Intsome ongomante: “Icaninatasanti Tosorintsi, Ira Iriri Atingomi Jesoquirisito. Iriró caninarisonoriguinte”. Icantaneintêgotacái, icábintsasantacái, itomintacái, itimacagajái. Aisatinta icabiriqueri Itomi yoganiatairi Ira camênguisti, iroro igótacaguêcái cara iraganiataái aisati, iráganacái canta Jonogaguítequê. ⁴ Canta yobetsicaiguêmiro ora pintimantaiguemara Jonogaguítequê, ora yoguiacaquemi canta. Pêrosati onganinatê, quero pitsonga, querootisati pibatsagui. ⁵ Piquemisantaiguirinta Tosorintsi, iritosonquemi, ingábintsaguêmi irooti cara iribocasitapêmi Jesoquirisito iráganêmi Jonogaguítequê. Aique imaiguêmiro antagaisati ora yobetsicaiguêmi. ⁶ Iroro picaninasêretaguêtaiguê, carari opomirintsitomotaiguêmi yamai arosata. Pitsipiriabetaigaca carari quero ocosamaniti. ⁷ Ira antapinintiri oro iniantacari tsitsiquê arota irogóntimari iriroca orosonori. Aisati icanta Tosorintsi iranianapinintaiguêmi irogóntimi piquemisantaiguirica. Ira oro tojai ipênatabita, carari imeaquima. Aroca anguemisantiri Atingomi, quero opega. Iroro iraniananatasantaguêcái cara iribocapae Jesoquirisito. Ingampê: “Naniacaninataigapêmi. Nágaiganaquimi canta Jonogaguítequê. Pintsibataiguêna cara nigáantiro omagaro”. ⁸ Terai piniaigueri, carari pinintaiguêri, aisati piquemisantaiguiri, aisati tojai picaninatanobenqueri pigótinta pintiomotaiguêri pêrosati Jonogaguítequê. ⁹ Piquemisantaiguêrinta Jesoquirisito, iroro yogabisaicotaguêtaiguêmi, pomatsiguengataigacari. ¹⁰ Jirai iraequi comantêgotêri Tosorintsi icogabeca irogótirome atiraca ongantima cara iragabisaicocái Tosorintsi yamai. Isanguenatoquero, igóiguê icábintsanti Tosorintsi, carari te irogótasantiro, te inguemasantiro. ¹¹ Ainta comantantsiri ira pinanca Isêre Quirisito ora yogomeantanta. Icomantêgotêri Quirisito, cara ati ongantima iratsipiriaeque cara ingamobicái, aisati ingabiritanaima, intingomimpae. Carari te inguemasantaiguero comantantsirijegui. Icoagabitaca irogótirome. Yosamitobaca: “¿Pairiraca ocomantêgoti Isêre? ¿Atiraca ongantima omoncaraquema?” ¹² Carari icomantaiguêri Tosorintsi: “Quero pineiro obirojegui, irianti niaiguêrone ira timaiguênguistsine aiuenta”. Yamai igáquinaro Tosorintsi Isêre Caninaro, pigáquina nanguenguistsatomotaiguemiro, nongomantêgotiri Quirisito cara yogabisaicoonti. Ainta icogasantaigabita ironomire Tosorintsi irisaanganetsite irogóiguero atiraca oanta yogabisaicotajái Atingomi.

Tojai icábintsaignacái Tosorintsi, aro intsome anganinabentiri.

¹³ Yamai pinguengasantaiguema, caninasati pintimaigue. Pigóiguê cara iribocapae Jesoquirisito aniaigabajiri, aisati tojai ingábintsaignapái. Aro pinganinabentiri. ¹⁴ Yamai pinguemisantiri Tosorintsi obirojeguinta ianiquite. Quero picantaja pibega jirai cara picantagueti pairoraca ora te onganinate teja pigóigueri Tosorintsi. ¹⁵ Icaninatanoti Tosorintsi Ira coigaiguêmi yogabisaicotajimi itomintaiguêmi. Yamai aisa pingantimari ibega Piri. Piganinatasantaguetiro antagaisati ora pingantaiguê. ¹⁶ Jirai isanguenaquero Moisés:

Icanti Tosorintsi: “Naronta caninarisonoriguinte, iroro nococaquemi aisati pingantima caninari obirojegui nibega Naro”.

¹⁷ Aisati caninataque pigótoicoigueri Piri Tosorintsi igótasantaiguêmi atiraca ongantima antagaisati ora pingantaiguê caninataqueca. Ingomantêgotêri omagaro, panirootipague, pairoraca inganque aisati negaraca intimaque aiuenta. Pigóiguironta oca, ara piniacobeingatiri Iriró yaca irooti cara piretaiguêmaro Jonogaguíte. ¹⁸ Caninataque pingantaiguero caninari tojainta ipomiribintêmi Tosorintsi arota iragabisaicotajimi. Te iraninte pitsipiriasitima aisa ocantaro pibega ora yametaigabitaca omatsiguenga jirai, ira joríojegui. Pigóiguê cara Tosorintsi te iripênabentantaiguemiri quirequi teatisati oro ira quero

icosamaniti, aiquenta iritsongaima. ¹⁹ Irianti Itomi Caninari ipēnataiguēmi Tosorintsi aroquenta inintasanoiguēmi. Igáqueri Jesoquisito Itomi ingamobitaiguēmi iraraotobitaiguēmi arota irojocaigaimiro ora picantagueti quimingari, iragabisaicotaiguēmi. Cara icantaguetomoqueri Tosorintsi joríojegui, yametaiga yóguēneri Tosorintsi oisha, itaquineri arota irojocajineri ora icantagueti jorio. Irianti caninari oisha yóguēneri. Aisati Quirisito icantari ibega oisha, icaninatananoti, te ingantaguetēmate pairoraca ora te onganinate. ²⁰ Jiraisonori, teraiquerai irobetsiquiro quibatsi Tosorintsi, tojainta inintasantaiguēmi, icanque: “Aiquenta nagáqueri Notomi iragabisaicotajiri antagaisati ira quemisanquerine”. ²¹ Aroque ipoque Quirisito, icamobitaiguēmi. Aique yoganiatairi Tosorintsi, yáganairi jonoquē. Aroquenta yoganiatairi Quirisito, piquemisanqueri, aisati piquemisanqueri Tosorintsi. Pigóiguē icábintsaiguēmi aisati iraganiataigaimi obiro. Yamai poguiaiguēri cara iráganēmi cara Jonogaguitequē.

²² Aro piquemisanatobēro antagaisati ora yogometaiguēmi Tosorintsi. Iroonti aisonori yoganinasēretantaiguēmi pisērequē ipasiniatitaiguēmi arota pinintasantaiguēri popiguemisantaneegui. Yamai caninataque pinintasantobaganēma ²³ aroquenta itomintaiguēmi Tosorintsi itimacagajimi. Pigóiguē cara iboguē janequi, irantiasiparitanē ingamaque iriantinta matsiguenga. Carari yamai aroquenta piquemisanatobēro Irinibare jonoquē. Aroquenta yoganiatairi Quirisito, itimacagajimi yasintaiguēmi. Yamai picantaigari ibega Iriro catimanageri. Pintiomotaiguēri pērosati canta Jonogaguitequē cara quero picamaji. ²⁴ Ocanti Sanguenari:

Te antimanete cosamani eiro aisa acantaro singui te ontime cosamani. Angamaque aisa acanta cara osiguiricanē singuisi. Aisati omagaro ajitabeca caninaro, ora acantabeta, carari otsongaima. Iroonti cantaca pibega singuitega cara omanapague pisiguiriqui. ²⁵ Carari ora Irinibare Atingomi pērosati inē quero opega, quero opasiniatiti.

Iroonti Caninaro Nibarintsi ora icomantaiguēmi iragátane Tosorintsi ora pabisaicoontaima.

2

¹ Iroro yamai pijoquiro antagaisati ora te onganinate. Quero piguisa, quero pamatobianti, quero picantomemega caninaribi obiati, quero picoguiro ora yasinta basini, quero pitsoiguēgotari basini, querootisati picomantatsatobaga ora te onganinate. ² Ira irirai janequi ibogatsi icogasanti intsotasantiro otsomi iniro arota iriquibianē. Aisati obirojegui, pingantimari irirai ianiquite Tosorintsi, pingogasantiro Irinibare Atingomi arota pisintsisēretantimaro. Pinibatiro Irinibare, pinguengero, pigótasantanēri Tosorintsi. ³ ¿Teco pigóiguēri caninari Atingomi, icábintsasantaiguēmi tojai?

Quirisito icantaro pibega mopē timagantatsiri.

⁴ Aroca obetsiquēro mopēpongo aguibatēro oquibe otingomi mopē ora aguēshotērone pongotsi, ora ogábopēma basini mopē. Queroca pini oquibe, quero oquēshoti pongotsi. Popocasiigapēri Quirisito Ira cantaro mopē Ira timagantatsiri, aisati Ira yoguibatē Tosorintsi iniacaninatasantiri, carari itsoingaguēri joríojegui te inguemisantiri. ⁵ Aroquenta piquemisanatiguēri Quirisito, yogabisaicotajimi Tosorintsi pomatsiguengataigacari Iriro aisati icanquemi pomatsiguengataigacari antagaisati quemisantatsiri. Itimi Tosorintsi quemisantatsirijeguiquē. Aisati ijitaiguēmi nibatocontatsiri. Yamai pintineri omagaro icogui Iriro, catingasati pinibatiri Iriro, aisati pinibabentineri basini matsiguenga, pomanocotiri. Aisati pingantocotiri Tosorintsi cara Iriro caninari, pingarasiatiri aroquenta iniacaninataiguēmi aroquenta piquemisanqueri Jesoquisito. Ira Quirisito cantaca mopē oquibe. Jonoiqueroca, Tosorintsi yobetsiquē ibango. Obirojegui quemisantatsiri cantaquibi mopē; yogiaiguēmi Quirisitoquē aroquenta piquemisanqueri. ⁶ Aisati ocanti Sanguenari jirai:

Icanti Tosorintsi: “Cara Jerosaránquē noguēro otingomi mopē, Irianti Quirisito Ira nagáque joríojeguiquē. Nocoiguēri, naniacaninatasantēri. Antagaisati ira quemisanquerine Quirisito, nagabisaicoqueri, inganinabenqueri quero ipasiquiti”.

⁷ Obirojegui quemisanqueri Quirisito, ¿Teco piniacaninataiguēri? Iraegui ira tsoengaguēri te iraniacaninataiguēri. Cara Sanguenariquē, jirai ainta comantantatsiri icomantēgotēri ira te inguemisante, icanque:

Ira obetsiquiro pongotsi itsoingugēro mopē ijoquero ijiquero: “Te ongomeite”. Carari iniacaninatasantēro Tosorintsi, icantajiro otingomi mopē.

Aisati icanta itsoingaguēri Quirisito jorio, carari iniacaninatasantēri Tosorintsi, icanqueri Itingomi omagaro quemisantatsiri. ⁸ Aisati ocanti Sanguenari:

Ainta matsiguenga intibaca mopēquē tenta iraneiro. Aisati Quirisito icancaro mopē; icomētobacari matsiguenga tenta irogótaigabaqueri.

Aro ira antibacaro mopë yosiacagantacari ira te inguemisantiri Jesoquisrito, te irogóigue cara icogasanti Tosorinti iragabisaicoqueri. Tenta inguemisante iriátë Sharincabeniquë. ⁹ Carari obiroyegui teni aisa pingantimari ibegaiga iriroyegui. Icoigaiguëmi Tosorinti, yogabisaicotaiguëmi. Jitaiiguëmi nibatocontatsiri, pintineri omagaro icogui Atingomi, pinibataiguëri catingasati. Yoganinataiganaquemi. Icantaiiguëmi iraisati, pomatsiguengat-acari Tosorinti. Jirai te pigóiguëri, pinasitaca aisa picanta cara pitimaigabita tsitiniriquë. Carari yamai icoigaiguëmi, yosanguëguitetocotaiguëmi, pitimaigui cataguitëriquë. Yamai icoguini pingomantaguetiri matsiguenga: “Caninarisonori ora icancái Tosorinti?”. ¹⁰ Jirai te pinganinatibitima, carari yamai obiroyegui caninari, pomatsiguengatagacari Tosorinti. Te pigóigue jirai cara icantaneintëgotabitimi Tosorinti, yamai pigóiguë, picaninatasnoben-queri.

Caninasati pintiomotaiguëri matsiguenga.

¹¹ Nomatsiguenga, nopiguemisantane, nanintasantaiguëmini. Pigóiguë te pomatsiguen-gatasantimari iragui pitiomotaigabita yamai, queronta pitimi përosati yaca quibatsica. Aiquenta përosati pintimaje Jonogaguitequë. Nangantasantaiguëmi yamai, quero picantaguetiro ora te onganinate aisa quero picantiro ora icanti basini matsiguenga ira te irogóiguëri Tosorinti. Aroca picantaguetiro quimingari, quero picaninasëreti. ¹² Itsoiguëgotaguetasitimi matsiguenga: “Teni ingomeitaigue joriroyegui”. Carari caninataque pingantaiguero ora caninari arota iraniaiguëmi iriro, irogóiguëta aisonori piquemisan-taiguëri Tosorinti. Aiquenta, cara iribocapaenica Atingomi Jesoquisrito, aroonti irini-bataiguë matsiguenga: “Caninari Tosorinti. Ipasiniatitaiiguëri ira jorió, yoganinataiguëri”.

Pinguemisantiri pitingomipague.

¹³ Aroca pinguemisanqueri Atingomi Jesoquisrito, caninataque aisati pinguemisan-taiguëri pitingomipague inatsi yaca quibatsica. ¹⁴ Pinguemisantiri ira tingombintaigu-imi irironta pigobeingarite yaca quibatsica. Aisati pinguemisantaiguëri iragátaneegui. Igáqueri ingasitigataiguëri ira cantaguetatsi ora te onganinate, aisati iraniacaninataiguëri ira cantatsi caninasati. ¹⁵ Icogui Tosorinti pintimaigue caninasati arota iraniaiguëmi ira te irogótiri Tosorinti, arota piguimarentiri ira cantëgotaguetasitaiguëmi obiroyegui, aisati Ira Tosorinti. ¹⁶ Jirai, imerataigabitëmi Satanás intaquemiro quimingari. Yamai yapabaquëajimi aroquenta yagobiaqueri Quirisito arota pinganquero caninari. Quero pican-tomemegarero caninari cara picantagueti ora te ongomeite. Obiroyeguinta yamai iromeraro Tosorinti, aro pinguemisantantiri, pingantaiguero caninari. ¹⁷ Piniacaninataiguëri antagaisati matsiguenga. Pinintasantaiguëri popiguemisantane. Piniacobeingatiri Tosor-inti. Pinguemisantiri obiroyegui ira pitingomi yaca quibatsica.

Peroro yogometaiguëri ira ibimantaga.

¹⁸ Yamai nanganquëmini obiroyegui tarobacaatineri basini. Piniacaninatiri ira pintine. Pinguemisantiri ira meratimi caninasati, icábintsëmi, aisati pinguemisantiri ira catsimari. ¹⁹ Pinetse. Tosorinti iniacaninatiri pairiraca ira cantiro ora caninari ora icogui Iriro ora itsipiriobiq. ²⁰ Carari aroca pingantagueque ora te onganinate, ingasitigatëmi ira meratimi, caninataque. Quero iniacaninatimi Tosorinti. Aroca iratsipiriacaquëmi cara pinganquero caninari, queroca pipëgatsatari ira pintine, aro iraniacaninatëmi Tosorinti yamai. ²¹ Icoigaiguëmi Tosorinti cara quero pipëgatsatari ira quisasitimi. Pinguen-gasëretiri Quirisito, tojai iniacatsicabiritaiguëmi, te iripëgatsatimari. Yamai aisa pinganti-mari ibega Iriro. ²² Tesonori ingantaguetëmate Iriro ora te onganinate. Tesonori iromato-biante. ²³ Te iripëgatsatimari ira quisatsataiguëri, teatisati inguisatsatiri ira atsipiriacaqueri. Caraanti yamanaqueri Tosorinti, yabencari, igóque ingantocoqueri Iriro. ²⁴ Icamobicái Quirisito cara corosiquë itsipiriobencái cara acantaguetomotiri te ongomeite. Yamai quero iquengáiro aisati Tosorinti. Yamaica quero acantaguetajiro aisati, iroonti anganque caninari. Tojai iniacatsicabiritaigacái arota quero atsipiriaguero eiro. ²⁵ Pigóiguëri oisha te ine ora igóonta, tojai iátagueti. Queroca ini ira omisantiri, imiaquema. Jirai, obiroyegui picantagari ibega oisha, piátaguë negaraca, picantagueti pairoraca. Carari yamai pabentaigacari Quirisito Ira omisantaiguëmi, icábintsasanoiguëmi.

3

Ora inganque sërari, aisati iina.

¹⁻² Tsinane, pinguemisantiri pijime. Teca inguemisantiro Irinibare Tosorinti yamai, aro iraniaquëmi pijime cara caninasati piquemisanqueri, te pingogue basini sërari, aisati caninasati pitimi. Aro iraniacaninatëmi, aiquenta pinguemisantacaqueri. ³ Quero patiro picogui poganinatasantiro pomanchaqui, querootisati picaninatantaro piguisi, pitsatane, pairoraca. ⁴ Iroonti pingogasante piganinasëretima aisati pingábintseri pijime, quero

pipëgatsatari. Icoegasanti Tosorintsi pintime pingantima negaca caninasati. ⁵ Aisa ocanta jirai ocanquero caninaro tsinanejegui ora quemisantaiguiri Tosorintsi. Caninasati oti-maiguë, oquemisantaiguëri ojime. ⁶ Aisa ocanta jirai Sara iina Abaram. Oquemisanqueri, ojitiiri otingomi. Aisa pingantimaro pibega Sara, pinganquero caninari, pinguemisantiri pijime. Aique quero yomitorsoroguimi pijime, quero iguisimi. Aisati ingantocoquemi Tosorintsi.

⁷ Aisati obirojegui sërari: te aisa pingantimaro pijina, te osintsitasante. Iroro nangan-taguëquimi pingábintsero, piniacaninatiro. ¿Teco imeronisati Tosorintsi cara ontio moqueri Jonogaguitequë aisa picanta obiro ipëmiro? Queroca picábintsiro pijina, quero iquemimi Tosorintsi ora pomanaqueri.

Ira atspiriatasi cara icantiro caninari.

⁸ Aisati nangan-taiguëmi omagaro: pinguengasëretaiquema, pingantaneintëgotobaganëma, pinintaiguëri popiguemisantane, pingábintsabacaganëma. Quero pinguengasanta obiatiegui. Querootisati piqueincoitiri basini ira te ingomeite. ⁹ Aroca inganquemiro ora te on-gomeite, quero pitsirishari. Aroca inguisatsatëmi, quero pipëgatsatari. Pomaniri Tosorintsi ingábintseri. IcoGUI Tosorintsi iromitocotimi obiro cara pomanocoquerica ira quisat-satëmine. ¹⁰ Irootisati ocanti Sanguenari:

Pinintica pinganinasëretanë aisati pintime caninasati, quero piguisatsatiri basini, queroo-tisati pitsoigagueta. ¹¹ Quero picantaguetiro te onganinate, carari pingantiro can-inari. Pingogasante pintiomotobaguima caninasati ¹² inetsecobentirinta Atingomi antagaisati ira quemisantiri, aisati yomisantiri. Iquemaqueri cara yamanaqueri. Carari te inguemiri ira cantaguetiro te onganinate.

¹³ Aroca përosati pingantiro caninari, ¿Aroco ingoque iratsipiriacaquemi? Teni. ¹⁴ Aintaca poro iratsipiriacaquemi picantironta caninari, quero pogasëreta, quero pitsorogui. In-gantocobintëmi Tosorintsi, iromitocoquemi, iraganinatëmi. ¹⁵ Përosati pingingomintimari Quirisito. Aroca irosomiquimi: “¿Païro piquemisantobitiri?” inganquimi, aro caninasati potabitanëri, quero piguisantatanëri. Pingomantiri catingasati: “Yogabisaicotajinanta Iriro, ijocajinaronta ora nacantagueti te onganinate, aisati itimacagajina caninasati, cara icanque. Iroro naquemisantaguëqueri yamai”. ¹⁶ Pingantiro caninari arota quero pipasiquiti. Aique irogóque ira cantëgotasitaguequimi cara aisonori yoganinatëmi Quirisito, yogometsatëmi. Aro iripasisugitanëro ora icantocoquemi te onganinate. ¹⁷ Aroca ingoquero Tosorintsi pitsipiriobentiro cara pingantiro caninari, caninataque pitsipiriacaquero. Ingan-tocobintëmi. Carari quero icantocobintimi pitsipiriobitiroca cara picantaguetiro ora te onganinate.

Ora icanque Quirisito.

¹⁸ Jirai te anganinataigue eiro, tojai acantaiguë ora te onganinate, carari ican-inatasanti Quirisito. Patiro icamobicái Iriro arota iragabisaicotajái. IcoGasantë irogótacagajári Tosorintsi iráganacái Iriroquë. Icamabeca Quirisito carari te ongame isëre. ¹⁹ Ocamaque ibatsa, carari iásërepanënti canta osobiquë, cara jirai yomingaiguëri Tosorintsi isëre iraugui te inguemisantiri, arota irogótacaqueri Quirisito canta ora icanque Iriro. ²⁰ Icomantapinintabecari imatsiguenga Noé te inguemisantaiguëri jiraisonori cara yobetsiquëro Noé oquibe pitotsi, icomantaigabitacari imatsiguenga: “Pinguemisantaiguëri Tosorintsi”, carari te inguemisantiri. Aro igáquineri Tosorintsi oquibeguintesonori angani aisa jarini. Páganëri antagaisati tsoengatsiri. Ochonibani icarati ira abisaicotajatsi pitotsiquë. ²¹ Ira 8 yosigari iraugui baotisaticha yamai. Aroca omaotisatëma eiro, quero aquëtetantaro nija, quero acaasëreti. Ora baotismo posigaro cara icamobicái Jesoquisito, itiaca, icaniatanaí, yogabisaicotajái. Aisati osigaro cara abentari Tosorintsi oman-queri iraguëtesëretaaí aroquenta icamobicái Quirisito icabiritajá arota iraguëtesëretaaí. ²² Aro yogainocanaa Jesoquisito canta Jonogaguitequënta, isobicomopairi Tosorintsi ibacosonoriquë. Icarapairi Iriro, itingomimpë. Aisati igátaigapëri omagaro: ironomire Tosorintsi, agáantabitchari, Satanás, camagarijegui, basini itingomipague, antagaisati.

4

¹ Aro pigóiguë tojai itsipiriaque Quirisito ibatsaquë, te ingogue irisigabitsatimaro. Aisati obirojegui quero pisigopitaro atspiriaantsi. Aroca pitsipiriaguë pairoraca, quero picogui picantaguetajiro ora te onganinate ² aisa ican-taiga basini matsiguenga te inguemisante. Carari cara pitimaiguë quibatsiquë, patiro pingogasantiro pingan-tineri Tosorintsi omagaro ora ingocaquemi. ³ Jirai picantaguetaguëro quimingari aisa picantari iraugui te inguemisante. Antagati yamai. Quero pogatsitairo aisati. Jirai picantaiguëro pairoraca quimingari: pintaguetiro tsinane cagaro pijina, pisinguënta, pa-pasanoiguë aisati pisinguitasantaiga piguisabacaca, pamanocotabetari pobabaneegui ira

cagari Tosorintsi. ⁴ Ira pitsibataigabita jirai icantocoquemi yamai: “Ira quemisantatsiri, ¿Pairo te ingantobitina nibega naro? ¿Pairo te intsibatobitina?” Yamai isèrontaiguèmi inibatègotaguetsitimi. ⁵ Aiquenta cara iribocapae Quirisito, ingomantègotaguèri antagaisati matsiguenga ora inganque, iraugui caniariquerai aisati ira camènguisti jirai. Irosomitaigapèri ira quisaneinquimi: “¿Pairo piguisaneintobitiri ira quemisanquina?” inganqueri. Quero yotabitobèri. Ingomantègotapèri caninasati. ⁶ Iroero ora icomantaguèntè Caninaro Nibarintsi. Tojai ira quemagabaquero, aique icamasica carari ainta ira yogamagaiguè icomantègotèrinta itingomiquè, carari ira quemisanqueri Quirisito yamai itimasèreti Tosorintsiquè cara Jonogaguetequè pèrosati.

Intsome angábintseri opiguemisananeegui.

⁷ Pèmbaqué omoncaraquima omagaro ora iquanca Tosorintsi aisati ora inganque yaca quibatsica. Iroero ora pinguengaguèquima caninasati, pèrosati pomanocotopiantaiguèri Tosorintsi. ⁸ Pingogasantaigne pinintobaguima. Cara pinintobaca, quero piquengasèretiro pèrosati ora icantagueti basinipague te ongomeite, carari patiro pingábintseri. ⁹ Quero pabenta, quero picanti pairoraca cara iriboque popiguemisanane intimopè obiroquè. Quero pomichatiri. Caninasati pintimacagobèri. ¹⁰ Tosorintsi ipaguetaiguèmi obiro panirootipague ora pomitocoantaiguèmarì popiguemisananeegui. Quero pometaro. Cara icábintsaiguèmi obiro Tosorintsi, aisati pingábintsaiguèri ira basini. Quero pitsipiriaaro. ¹¹ Aroca ingantacaquemi Tosorintsi pinguenguitsataiguèri pomatsiguenga caninasati, pigaguineri Irinibare Tosorintsi. Aroca pomitocotaiguèri pomatsiguenga, pomaniri Tosorintsi iromitocotimi obiro, aro ingantacaquimiro caninasati. Pairoraca pingantaguè, pingantineri Atingomi Jesoquirisito. Aro iranaiaguèmi matsiguenga, inganque: “Aisonori Tosorintsi caninari”. Intsome aniacaninatasantaiguèri, antingomintasantaiguèmarì pèrosati.

Aroca pitsipiriobitiri Quirisito, pinganinasèretaigne.

¹² Nomatsiguenga, nanintasantaiguèmini. Nigóque tojai itsipiriacagaiguèmi yamai. Quero omabocaguimi. Icoquini Tosorintsi iraniantimi, inguemisanantasaguimi. Ainta basini quemisantatsiri aisati itsipiriaiguèro. ¹³ Aisati jirai itsipiriaquero Quirisito. Yamai cara pitsipiriaiguè picantaigacari Iriro, aisati itsibataiguèmi imitocoquemi, aro pigótasantanèri pinganinasèretanè. Aiquenta cara iripigaima Quirisito, iragáantèro omagaro. Aique pinganinasèretasanobiriquerì aroquenta pitsipiriaquero pabequero yamai. ¹⁴ Aroca inguisaneintaiguèmi matsiguenga cara piquemisanqueri Quirisito, pinganinasèretanè. Pinanquiminta Caninaro Isère Tosorintsi, omitocoquemi cara pabequero. Coshoni ogaiguèmi.

¹⁵ Carari quero póganti, quero picositanti, quero picantiro ora te onganinate, que-rootitsati paserigastagueparì pairoraca ingantè basini. Aroca inguisaneintobitaiguèmi ocapague, caninataque. ¹⁶ Aroca pinguemisanqueri Quirisito, iroero inguisaneintobiquèmi matsiguenga, quero pipasiquitobitiri Pitingomi. Pingante: “Caninari Tosorintsi; inintacaquena natsipiriobiquerì Quirisito”. ¹⁷ Aroque pareca cataguteri cara ingomantègotaguèri Atingomi omagaro matsiguenga pairoraca ora inganque aisati negaraca iriatè. Yoguibatacái eiro itomintaigacái. Aique iraugui te inguemisantiri. Aroca imarintima ingomantègotacái eiro, querosonori yabisèmati poro iraugui te inguemisantiri Tosorintsi. Iratsipiriasantaiguè. ¹⁸ Carari inintacacái Tosorintsi atsipiriasantaiguè arota anguemisantiri. Icábintsasantacái, iquemisantacacái, yogabisaicotajái. Pèmbaqueme ajáigueme eiro cara Sharincabeniquè, carari yamai ingasitgatasantaiguèri agabenisonori iraugui te inguemisante, te iranitiri pèrosatinta icantaguetiro quimingari. ¹⁹ Aroca icoiguèmi Tosorintsi pitsipiriobitineri, aro pinganinatanè obirojegui, pèrosati pingantiro caninari. Pomeri pisère Iriro pomaniri: “Pinebetsiquina”. Yobetsiquèmintajirai, iromisanquimi yamai, quero yamatobitimi.

5

Peroro yogometaguèri ira obatacaguiri quemisantatsiri.

¹ Yamai nasanguenataiguèmi obiro omisantantatsiri obatacaguiri piguemisanacagane. Aisati picantaiguina nibega naro, naronta omisantantatsiri aisati. Jirai naniaqueri Quirisito cara icamobicái, yamai nocomantègotèri tojai itsipiriasantè. Aiquenta cara iribocapae iragáantè omagaro aisati nantsibatobèmarì naro. ² Aisati picantaigari ibega ira omisantaiguiri iroishate irapajaqueri. Aisa picanta pomisantaiguèri piguemisanacagane, pinguemisanacaguiri irironta cantaca iroishate Tosorintsi. Pogometaguèri caninasati, caninasati ponagaiguèri ati ingantima inganquero caninari, quero pigátiri. Te onganinate pingomantaguetiri Irinibare Tosorintsi págantimari quirequi. Pingogasante pomitocotaiguèri. ³ Quero pisintsitsatiri, carari pintime caninasati, aro ingogaiguè ingantaiguèmi

pi-bega obiro. ⁴ Ai-quent-a, cara iri-bocapae Atingomi, Ira omi-san-tantatsirisonori, imaiguëmi ora caninarosonori, irogaiguëmi aganguisati-quë. Aisati irá-ganëmi Jonogaguite-quë, pinto-moqueri përosati.

⁵ Aisati, obirojegui oboina, pinguemisantaigu-eri iraegui antiasipari ira obaquemi iquemisan-que. Pingogaigue pinguemisantobaguima. Quero piquengasanta, iroonti caninasati pingábintsabacaguima, cara ocanti Sanguenari:

Ipëgatari Tosorintsi ira quingasantacha, carari icábintsaguëri ira te inguengasantima, imitocotaiguëri iriro.

⁶ Pomairetaigue catingasati-quë Tosorintsi, pitingomintimari Iriro, Irironta Pitosorintsite cobeingarisonori. Ai-quent-a irogaiguëmi aganguisati-quë. ⁷ Quero pitsorogui que-rootisati pogasëretocotaro pairoraca. Pomeri Tosorintsi pingomantiri: “Tojai nogasëreca. Págabitsatinaro, pomitocotina”. Aro iromagoriasëretaque-mi. ⁸ Arotasha pine, pigamemari camagari, ira Satanás. Tojai iquenagueque icogabeca irojocagajáiro cara aquemisantiri Tosorintsi. Carari quero aquemisantiri. Aisati icantari ibega iguibe secari cara itasegas-anti. Ingaimëca icoguini iraa-gueri matsiguenga, iritsongasantiri. ⁹ Pinguemisantasantiri Atingomi, arota popëgatimari camagari ira atsipiriacagaiguimi. Aisonori aiti ora pitsipiriagueque yamai. Nogótacaquimi aisati cara picanta obirojegui, itsipiriaguequero popiguemisantane omagaroguite-quë. ¹⁰ Quero ocasamanitasanti ora pitsipiriagueque yamai. Igóque Tosorintsi pitingomintaigari Jesoquisito, aro ai-quent-a irá-gaiganaquemi cara përosati pintiomotaiguëri caninasatisonori. Irasi yoguïro ingábintsaguëmi Tosorintsi iro-betsicasëretaguëmi, iraganinatasantëmi, irosintsitaiguëmi, iromisantasantaiguëmi. Cara Iriro-quë, quero pini atsipiriagantsi, quero pogasëretaja. ¹¹ Aro intsome antingomintasantimari përosati. Intsome aniacaninatasantaigu-eri caninarisonoriguinte Iriro. Aroque.

¹² Nigáqueri Siribano irá-ganëmiro oca sanguenarica. Tojai naniacaninatëri. Iriro nopiguemisantane, iquemisantasantiri Atingomi. Aro nocomantaiguëmi tojai icábintsasantaiguëmi Tosorintsi inintasantëmi. Catingasati nacanquemi-ro. Yamai përosati pinguemisantasantiri Atingomi pinganinabentaigu-eri. ¹³ Ibetsataiguëmi antagaisati opiguemisantane yaca Iroma-quëca ora aisati ojita Babironia. Ira icoigaiguë Tosorintsi itomintaigari, aisa picanta obirojegui icoigaiguëmi. Aisati ibetsataiguëmi nogomere Maricos, notomitsari. ¹⁴ Cara pobetsatobaganëma pá-gacaninatobaganëma caninasati pinintobaganëma. Nocoguini iromagoriasëretagu-emi Tosorintsi antagaisati obirojegui quemisanqueri Quirisito.

Aro ocarati ora nasanguenataiguëmi. *Peroro*

YOGATSITAIRO PERORO ISANGUENAQUINERI IRAPIGUEMISANTANE

Ibetsataigari.

¹ ¿Ainirobiegui, nopiguemisantane? Naro Simón Peroro nasanguenataiguimiro oca. Naro iromeraro Jesoquirisito aisati iragátane. Nasanguenataiguëmi aroquenta piquemisan-taiguëri Tosorintsi aisati Jesoquirisito aisa nacanta naroequi jorío naquemisanqueri jirai. Yogabisaicocái Jesus iniacananatacái aisati yoganinataigái, caninarisonrinta Iriró aisati Tosorintsi. ² Nocoguini aiqhero ingábintsasantaiganaquemi Tosorintsi aisati Jesus Atingomi, aisati aiqhero iromagoriasëretagaiganaquemi aroquenta pigóiganqueri.

Intsome aisonori angantaguetineri Tosorintsi ora icogui.

³ Icaninatananoti Jesoquirisito aisa isintsitananoti. Imitocotasantacái. Icoigaái irogótacagajári Tosorintsi Ira tosongobencái aisati yoganasëretái cara aquemisanqueri. Aisati icoigaái cara anganinabentaiguëri aisati antiomotiri caninasati. ⁴ Tojai itasongobencái, aisati omoncaraca omagaro Irinibare ora icancái. Iroro iromitocoontái cara quero ogatsitairo ora quimingari acantaguetabeta jirai yaca quibatsica aisa icanta icantagueti ira te inguemisante yamai. Cara anguemisanqueroa Irinibare intomintasantacái Tosorintsi, iraganinasëretacái, aisati anganquimari ibega Iriró. ⁵ Aroca pinguemisanqueri yamai, aisati caninataque pingogaigue pingantiro ora caninari. Aroca pinganquero caninari, aro caninataque pigótasantanë pairoraca icogui Tosorintsi. ⁶ Aroca pigóiguë pairoraca icogui, aro caninataque pigátima pigamasantima obiati arota quero picantiro quimingari. Aroca pigáquima obiati, caninataque quero piguisaneintiri ira cantëmi ora te onganinate: pabë-tiri. Quero pijocajiro cara piquemisanqueri Tosorintsi. Aroca pabequeri ira catsimari, aro caninataque aisati pinintasantiri Quirisito, pintingomintimari Pitingomisonori. ⁷ Aroca pijitaiguëri Pitingomisonori, aro caninataque pinintaiguëri omagaro popiguemisan-taneegui. Aroca pinintaiguëri popiguemisantane, aisati caninataque pingábintsaguëri antagaisati matsiguenga, aisati iraequi te inguemisante. ⁸ Aroca pingantaiguëro omagaro ocapague, pingantinerica Atingomi Jesoquirisito, aro quero picantasitaro, quero poperataro, aiqhero pigótasantanëri Atingomi aisati pinganinabenqueri. ⁹ Irari te ingantiro ocapague, icantari ibega comarajari ira te iranasante. Teni irogóasantiri Atingomi. Yomaguësanqueri cara jirai yogabisaicoqueri Atingomi yoguëtetairi. Teni intime caninasati. ¹⁰ Yamai, nopiguemisantane, pingogaigue pingantineri Tosorintsi antagaisati ora icocaquemi. Pigótasantima aisonorica icoigaiguëmi Tosorintsi cara iriítaquemi pintiom-queri përosati. Aro quero pijocajiro cara piquemisanqueri. ¹¹ Aisati iráganëmi caninasati cara pintiomotaiguëri cara iragáantanequë cara igáanti përosati Atingomi Jesoquirisito Ira catimanagerisonori, Ira agabisaicocái. Ingabëmi: “Pingapë yaca Naroica”.

“Quero popeicotaro oca nacantaiguëmica”.

¹² Nigóque cara aroque pigóiguëro oca nacantaiguëmica, aisati piquemisantobëro. Carari naninti nanguencaguimiro përosati. ¹³⁻¹⁴ Igótacaquena Atingomi Jesoquirisito cara quero cosamani natimi yaca quibatsica. Irorojenga caninatënguëmi nanguiancagajimiro aiquenta oca nasanguenataiguëmica yamai. ¹⁵ Aique, cara nangamaqueca, quero popeicotaro, përosati pinguengasëretagaiganaquero oca nocomantaiguëmica aisati përosati pingantiro caninasati.

Catingasati pogomecái Irinibare Tosorintsi.

¹⁶ Jirai, nocomantaiguëmi cara aiquenta iribocapae aitosati Atingomi Jesoquirisito iragáantasantapë. Te nomatobitimi, catingasati nacanquimi ora aisonori. Nanasano-taiguëri naroequi Ira Atingomi jirai cara iconijapë aisati cara itasongantagueque. ¹⁷⁻¹⁸ Jirai iáque Jesus oguitojaquë, natsibataigari naro aisati basini irogomere. Nanasanotaiguëri cara ipasiniatitanë, yobariasanotanë, aisati naquemaigabaqueri Tosorintsi, Ira caninarisonoriguënte, cara jonoquë inibatë icanque: “Iriro Ica Notomica nanintasantiri. Iriró nacaninanëintobiti, tojai naniacananatasantëri”. ¹⁹ Cara pigótacagái obotagantsi ora inatsi tsitiniriquë, aisa ocanata isanguenare comantantatsiri pigótacagasantacái ati ongantima ora boquënguëtsine irooti cara orequima cataguiteri cara iribocapae Atingomi Jesoquirisito iragáantasantapë. Aique irosanguëguëtsëretocotaiguëmi, irogótasantaquemi obiatiëgui Iriró caninarisonori. Caninataque pinguengaiguero Sanguenari. ²⁰⁻²¹ Nocoguini pigótasantiro oca: ora isanguenare comantantatsiri irooti Irinibare Tosorintsi. Pinguemisantiro

omagaro. Te irinibatasitima comantantatsiri tenta inguemasantiro iriati cagaronta irinibare iriro, Iroonti pogometaguèri Isère Tosorintsi, iroso isanguenataguèquero aisati iroso icomantantaguèquero.

2

Peroro icomantègotèri matobiantatsiri.

(Jor 4-19)

¹Jirai ainta inasegui comantantabetachari cara joríojeguiquè, carari irianti matobiantatsiri. Aisati irinopè obirojeguiquè ira matobitaigapèmine. Irogometaguèmiro tsoigagantsi, intoisguègotèmarì Tosorintsi. Igóiguè eiro icamobicái Jesus, iroso yogabisaicotaguècái, carari icanque iriro: “Jesus cagari Atingomi, cagari Agabisaicoontatsiri”. Iroso omanapague iritsongaguètèri Tosorintsi, ingasitígataiguèri iromatobiquemininta. ²Ainta tojai ira quemisanquerine, inganquimari ibega iriro, ingantaguequero ora te onganinate. Tojai ingantocotasitaguequimari Quirisito ora cagaro caninatatsi. ³Tojai iromatobitaiguèmi irogometasitaguequemiro pairoraca. Patiro icogui iráguasantanèma quirequi. Jirai icantocoqueri Tosorintsi: “Aiquenta natsipiriacagaiguèri ira matobitaiguèri quemisantatsiri”. Aisonori, queroque ocosamaniti cara iriáiguè Sharincabeniquè. ⁴Jirai ainta ironomirepague Tosorintsi ipégatsataigari, icantaguetiro quimingari. Aro icasitígataiguèri Tosorintsi, ijocaiiguèri cara Sharincabeniquè, yomianqueri cara otsitinitasanti. Canta, irinaiguè irooti cara ingomantègotaguèri Quirisito. ⁵Aisati jirai yogamagaiguèri Tosorintsi ira imatsiguengajegui Noé. Tenta iranintaigue inguemisantiri Tosorintsi, iroso igátaguètaiguèneri oquibeguintesonori angani, ponangasanotaca nija, páganèri antagaisati. Noé icamanaaigabitacari cosamani imatsiguenga cara irojocajirome ora quimingari, inguemisantirime Tosorintsi, carari te inguemisantiri. Paniro Noé yabisaicoontaro oquibe pitotsi, iriro aisati imatsiguengasonori icarati 7. ⁶Jirai, aisati itagaiguèri Tosorintsi omagaro Soromasati, aisati antagaisati Gomorasati. Itaguequero ibangojegui, omagaro iroguetane ora inatsi. Ironibatì somamo. Itsonqueri antagaisati. Yamai caninataque anguengaugero ora icanque Tosorintsi arota ogóigue ingasitígataiguèri iraugui te inguemisantiri, te iraniacobeingatiri. ⁷⁻⁸Cara teraiquerai iritaguiro Soroma Tosorintsi, yomisotocajiri ira sèrari caninari jitacha Lot. Itimabeca Soromaquè carari yogasèretasantaca imaintèro ora icainteti Soromasati quimingari.

⁹Aro igótasanti Tosorintsi iragabisaicoqueri ira pèmarine, inguemisantiri. Iromitocoqueri arota quero icantiro ora te ongemeite. Aisati igóique ingasitígatèri antagaisati ira cantaguetiro te onganinate, irooti cara orequima cataguetari cara ingomantègotaguèri Atingomi pairoraca ora ingantaiguè matsiguenga aisati negaraca iriáiguè. ¹⁰Iratsipiriacagaiguèri omagaro ira cogasi ingantaguetiro pairoraca te onganinate, te inguemisantiri itingomipague, teatisati itingomintimari Atingomi Jesoquisito. Tojai iquengasanta iriatiegui. Te intsorogaigue inibatègotaguetasitari ira agátachari aisati icantocotasitaguetari Ira Tosorintsi. ¹¹Iraegui sèrari te aisa ingantimari ibegaiga ironomire Tosorintsi. Pini isintsire ironomire pabisèro ora irasi cantaguetatsiri, carari catingasatiguè Tosorintsi, ira ironomire te irisintsitatsiri, teatisati ingomantègotari ira nibatasitaguetachari. ¹²Iraegui tsoengatsiri te irogóigue, icantasitaguetaro ora te ingueme, te irogóte. Quero isigopitari Tosorintsi cara ingomantègotaguèri, ingasitígataiguèri. Aisati icantaigari ibega basiniri ira iragamagaiguè matsiguenga. ¹³Tojai iratsipiriasantaiguè iriro. Icaninabentaiguèro ora inaguetatsi yamai; te inguengasèretima atraca ongantima caraquenta. Ora icanque iroonti pasiguitagantsi. Yamatobitaiguèmi cara icarataiguimi papatobiritaigari Atingomi, ijitabeca iquemisanti. ¹⁴Inebetaguetaro tsinanejegui. Pèrosati icantopiantiro quimingari. Icantaguetacagui iri te irisintsisèrete. Irasi yoguiro inebetaguetaro pairorapagueraca oguetacha. Iriáiguè Sharincabeniquè.

¹⁵Te iranintaigue intime caninasati, iroontita icantasitaguetaro pairoraca. Aisa icantari ibega Baram itomi Beor. Jirai, Baram irianti comantantabetachari carari icogasantabataca iráqueri tojai quirequi, te ingantasantiro ora icocaqueri Tosorintsi. ¹⁶Iriguito inibatànèri iborone. Imabocaca Baram tenta irogóte cara Tosorintsi nibatacaqueri boro. Iquenganeintasantaca Baram, aro igóque cara te iraninte Tosorintsi iraguiatiri ira pèrine quirequi. Aisa icanta icaegui tsoengatsirica, icogasanti irágue quirequi. ¹⁷Iraegui matobiantatsiri icancaro omoro ora te ine nija tiguèti iráquero imire. Tojai inibatasantaca carari te ingantèmatiro. Aitosati icantaro mingori ora páganè coguentima. Icobabeca angani matsiguenga. Iroonti mingori matobiqueri, aisa icanta ira matobiantaigatsi; teni iromitocotiri matsiguenga. Tosorintsi yobetsiquineri iriro ora intimantaiguema pèrosati cara tsitinirisonoriquè cara quero isotocaigai. ¹⁸Tojai iquengasantaiga iriati, icanque: “Piniaguaena. Nacantasitaguetaro pairoraca naninti”. Aro yamatobitobairi ira iriraique

jocabitacaro te onganinate ora icantagueti jirai, carari yamai yogatsitairo icantaguetajiro aisati. ¹⁹ Icanqueri matobiantatsiri: “Obiro aisa pingantina nibega naroequi. ¿Pairo te pingantobitiro pairoraca pinintaigui? Aro ingábintsaiguëmi Tosorintsi. Iranintacaquimi pingantaigue pairoraca. Atsi intsome, pingantina nibega naro”. Icantasicaro irinibare negaca tenta ingantaguetiro ora icogaigui iriati. Te irogóigue cara icantacaquero camagari ora te onganinate. Irianti iromeraro camagari. Irirome Tosorintsi intingomintima, irojoquerome ora te onganinate, intimaigaima caninasati. ²⁰ Ainta matsiguenga jirai ira cantaguetatsi tojai ora te ongameite. Aique iquemocoquero Atingomi Jesoquirisito, ijocanëro ora cagaro caninatatsi. Carari yamai yogatsitairo aisati icantaguetasantairo agabenisonori ora quimingari. ²¹ Pinetse. Caninatabitaca querome igótiri Tosorintsi. Carari ainta ira oganinatabitacari yogometabecari, icábintsaibitacari, carari ipëgatsacari, ijocanairi. ²² Ocantagani: “Ira otsiti yoguipigairo iricomarangane yapairo. Aisati atsipirisiitari cara aquibiri chancho. Carari aisati iripiganajima intitigapaimaro cajabatsari”. Aisonori ocantagani. Aisati icantaigari ibega ira quemisantabetacha, aique yogatsitanairo quimingari.

3

Cara iribocapae aisati Jesus.

¹⁻² Aro, nopiguemisantane, pigóiguë cara nanintaiguëmi. Jirai nasanguenaquemi, aisati yamai nasanguenataigaimi basini. Nocoguini nanguencagajimiro ora aroque pigótaiguë, ora icomantagueanti jirai comantantsirijegui. Aisati nanguancagasëretagaimiro iragántane Atingomi, Ira agabisaicocái. Irooti naquenguitsatomotaiguëmi naroequi iragátane. ³ Pigótaiguë cara queroquerai ipocaji Jesoquirisito, intimaiguë tojai matsiguenga ira te inguemisante, inganque pairoraca ora iranintaiguë, irinibatasitaguequimaro pairoraca ora irasi Tosorintsi. Irisërontaiguëmari Atingomi, ⁴ inganque: “¿Teco ingane Quirisito cara iribocapae? ¿Atini yamai? ¿Teco ingame jirai? Querojengari ipocaji. Cara jiraisonori icamaiguë omatsiguenga, irooti yamai, përosati pini omagaro quibatsi irootisati. Te omasiniatitaje. Tosorintsi teni inguemisantatsatái”. Iroro inganque tsoengatsiri.

⁵ Teni iraninte inguengero ora icanque Tosorintsi cara jirai cara icanque: “Inanëta omagaro jonoquë, inanëta nija, aisati inanëta quibatsi”. Aro ocanaca nega. Aro yobetsiquëro quibatsi yoganëro, oconijatanë angaarequë. Yamai oshonganacaro quibatsi angaare. ⁶ Aro ocanaca jirai, carari aique Tosorintsi icasitígataiguëri imatsiguenga Noë tenta intimaigaima caninasati. Igáquineri oquibeguintesonori angani, ponanganaca omagaroquite quibatsi. Irooti pipoguiriantaigacari antagaisati ira te inguemisantiri. ⁷ Carari icanque Tosorintsi: “Aiquenta nataqueroti oca quibatsica aisati ora inatsi jonoquë. Aisati nataicotaiguëri omagaro ira timatsi yaca”. Jirai icanque: “Nobetsiquëro quibatsi”, iroro pinantaguëca. Yamai cara icanque: “Nataqueru quibatsi”, ¿Queroco aisati icantiro? Carari terai omocaratima cara iritaguëro carari aiquenta ingomantëgotaguëri antagaisati ira te inguemisante, aisati iritaigotairo ora icanque. ⁸ Yamai, nopiguemisantane, pinguengero oca: ajitabecaro eiro 1,000 osarini cosamanisonori, carari te irajitiro cosamani Tosorintsi catimanageri. Iniaquero Iriro aisa ocanta patiro catagüteri. Poro catagüteri ocantomotari 1,000 osarini. Te ongosamanitomotiri Iriro. ⁹ Ajiquero eiro ongosamanitëti terainta omoncaratimaro ora icancái: terai iribocapae Atingomi. Carari te irajitiro Iriro cosamani. Quero yamatobitái. Cosamani yoguiaquero Tosorintsi ira tsoengatsiri icogasantinta ingantima yacaquero, arata quero iáti Sharincabeniquë. ¹⁰ Iriguito iribocapë Atingomi cara quero yagamari matsiguenga iromabocapëri, aisa ingampëmari ibega cosirinti cara imabocanti. Aique ongatsiguetanë sintisonori cara jonoquë, otsongasantanëma. Iritagasantanëma jonogasaki, paba, manchacori, omagaro, iritsongasantëma. Aisati quibatsi otaganëma otsongasantanëma antagaisati ora inatsi quibatsiquë, tsongaca, poguiriaca.

Ati onganquima aiquenta.

¹¹ Aro yamaica igóiguë eiro cara otsongaima omagaro ora aniaigui, caninataque ojocasantairo ora te onganinate, anguemisantantiri Tosorintsi, antime caninasati. ¹² Caninataque antimaque caninasati, ogometagaseguiri basini matsiguenga ora icanque Tosorintsi Irinibarequë. Intsome anguengero cara omoncaraquema catagüteri, iritaguëro ora inatsi jonoquë, antagaisati ora coshori ojatane ironeni, otsongasantanëma omagaro. ¹³ Carari aguiaiguëro ora inanaatsine omagaro irorai, cara icancái Tosorintsi: “Basini nobetsicae irorai Jonagaguete, aisati irorai quibatsi. Irooti caninarisonori, quero inai cantaguetajirone quimingari”. ¹⁴ Yamai nopiguemisantane, cara iroontita piguiaquëro ora irobetsiquë irorai Jonagaguete aisati irorai quibatsi, pingogasante pintimaigui

caninasati, págacaninatobaganëma, arota cara iribocapae Atingomi, iraniacaninatasantaigapëmi. ¹⁵ Nocoguini pigóigue cara queroquerai ipocaji Atingomi, iroonti yoguiaqueri matsiguenga inguemisantiri arota iragabisaicotajiri Iriro. Irooti ora isanguenataiguëmira Paboro, opiguemisantane ira anintasanti. Tojai igótacaqueri iriro Tosorintsi. ¹⁶ Aisati isanguenatacaqueri tojai. Aiti comëtaró, ora iquemabeca ira te irogóte ira te inguemisantasante. Itsoiguëgotacaro irinibare Paboro, te ingomantëgotiro catingasati. Aisa icanquero cara iquemabecaro basini Irinibare Tosorintsi, itsoiguëgotacaro, itsoinguëro. Iroro ora iratsipiriacagaguëtaiguëri Tosorintsi.

Aro ocarati isanguenaquero Peroro.

¹⁷ Yamai, nanintasantaiguëmi nopiguemisantane, nocomantaiguëmiro cara ati onganquima aiuenta. Yamai pigóiguë aique iriboquë ira cagari caninatatsi ira pëgatsatëmarine Tosorintsi, irogomeantë tsoigagantsi. Arotasha pine. Pigamemari matobiantatsiri arota quero icantacaguimiro ora te onganinate. ¹⁸ Aiquero pigótasantaiganaquitiguiro Atingomi Jesoquirisito Ira agabisaicotajái. Aisati aiquero pigótanëro cara icábintasantaguëmi. Pinguemisantasantänëri omagaro icanque Irinibarequë. Yamai intsome aniacaninatiri, intsome angantocotiri Iriro Atingomi caninarisonoriguinte yamai aisati përosati.

Aro ocarati ora nasanguenataiguëmi. Peroro

YOGUIBATĚ JOAN ISANGUENAQUE

Quirisito Ira timagantatsiri.

¹ Yamai nongomantĕgotĕri Quirisito Ira Nibarintsi timagantatsiri caniatcacagantatsiri. Cara inanĕ jirai, te irobetsiquengani. Naquemaiguĕri, naniaiguĕri noroquiquĕ, nanetsaiguĕri, notsagataiguĕri nobacoquĕ. ² Iconijateigapĕna yoniagaigapĕna Iriati Ira Nibarintsi timagai pĕrosati. Naniaiguĕri naquenguitsatocotaiguĕri Quirisito nocomantaiguĕmi. Ira timagantatsiri jirai tiomotabetari Iriri aro yamai iconijateigapĕna. ³ Nocomantaiguĕmi ora naniaiguĕ naquemaiguĕ arota pingantina nibega naro aisa pigŕotasante aisonori anguengasĕretaiquĕmari Pabati Tosorintsi aisa Jesoquisito Itomi. ⁴ Iroro ora nasanguenataguĕtaiguimi arota anganinasĕretasanote.

Iro Tosorintsi cataguitersonori.

⁵ Iroro oca nibarintsi nocomantaiguĕmica iroonti icomantaiguĕna Itomi Tosorintsi: Iriro Tosorintsi cataguitersonori. Te ingantaguetĕmatiro ora quimingaro; iroonti icanti ora caninarisonori. ⁶ Aroca anibataiguĕ aquengasĕretaiacarari Tosorintsi carari ainiroca anĕitaigui cara tsitiniriquĕ pĕrosati acantagueti ora te onganinate, otsoigaigani, teni angantaiguero Irinibare Tosorintsi ora catingaro. ⁷ Carari anĕitica cara catingasatiquĕ Tosorintsi, Irironta cataguitersonori, acanquero ora caninaro, aro aquengasĕretobaga. Aisa pĕrosati irosaantaairo iraraa Jesos Itomi Tosorintsi. Irosaatajairo ora acantagueti te onganinate. ⁸ Aroca anibatabitĕma teni angantagueti ora te onganinate, aisati ajitabequima aroque acaninatĕ, aro eati matobitajacha tenta angantiro catingasati ora nibarintsonori. ⁹ Aroca ongomantaguetiri Tosorintsi ora acantagueti quimingari, Iriro caninarisonori iriocaairo aroque icamobicai Jesoquisito. Irosaatajairo antagaisati ora te onganinate cara icanque jirai quero iquengairo aisati. ¹⁰ Aroca anganque: “Naro te nangantaguetĕmatiro ora te onganinate”, teni angantiro ora ocanti Irinibare, anganqueri Tosorintsi: “Pitsoigani, te pigŕote”.

2

¹ Obirojegui aisa picantari ibegaiga nasi najaniquite, nasanguenataiguĕmiro oca arota quero picantagueti ora te ongomeite. Aintaca pairiraca cantaguetiro quimingari, aintasati Ira nibotcotineri catingasatiquĕ Pabati Tosorintsi. Iriro Jesoquisito caninarisonori teni ingantaguetĕmatiro quimingari Iriro. ² Iriro pĕnabentaairo ora acantagueti te onganinate cara icamobicai. Te paniro eiroegui. Aisa ipĕnabentaiguĕneri ora icantagueti antagaisati matsiguenga.

Anguemisantiro ora icanti Quirisito.

³ Aroca anguemisanquero ora icancai Tosorintsi, aro ogŕotasantĕri. ⁴ Aintaca matsiguenga cantatsi igŕotiri carari teni inguemisantiro ora icanti Tosorintsi, itsoigani tenta ingantiro ora catingaro nibarintsonori. ⁵ Aroca anguemisantiri ora icanti, aique ajaguitigue anintasantanĕri Tosorintsi. Aisati ogŕotasantĕ anguengasĕretĕmari. ⁶ Carari anganqueca aquengasĕretari, aro intsome angantimari ibega Jesoquisito.

⁷ Nasanguenataiguĕmininta nanintasantaiquĕmini. Cagaro irorai oca nasanguenatica. Iroonti inaga jirai ora piquemocoque cara icancai Atingomi anintasantobaguima. ⁸ Irooti ora icanti Quirisito ora nasanguenataiguĕmi irorai, aisati irooti ora pomoncarati obirojegui cara pinintobaca. Cara anganquero negaca, aisa onganquima cara onguĕtaguetasantanĕ omeganĕma tsitiniri. ⁹ Angantasi timaca: “Anĕiti cara cataguitiriquĕ”, carari ainiroca aguisiri opiguemisantane, teni angantiro ora caninaro, pĕro cara ini tsitiniriquĕ. ¹⁰ Ira nintasantiri irapiguemisantane pĕrosati cara ini cataguitiriquĕ. Teni inae iriroquĕ ora antaquerine ora te onganinate. ¹¹ Irari ira quisaneintiri irapiguemisantane pĕrosati yanĕiti tsitiniriquĕ. Teni irogŕote negaraca iriatĕ aroquenta pogomarajasĕrequeri tsitiniri.

Intsome ojoquiuro antagaisati ora te onganinate.

¹² Obirojegui cantaca nasi najaniquite, nasanguenatimiro ijocajimironta Tosorintsi ora picantagueti te onganinate cara piquemisanqueri Quirisito. ¹³ Yamai obiro casintachari pijaniquite, nasanguenatimiro pigŕotasantirinta Jesoquisito Iriro catimanagerisonori. Oboinaegui, nasanguenatimiro pobaquerinta camagarisonori. ¹⁴ Janequijegui, nasanguenaquemi pigŕotasantirinta Pabati Tosorintsi. Yamai obirojegui antiasipari tomintaigachari, nasanguenaquemi pigŕotasantirinta Ira catimanagerisonori. Oboinaegui, nasanguenaquemi icanqueminta Tosorintsi sintsiri piquenguironta

Irinibare piquemisantiro, aisati pobaquerinta camagarisonori. ¹⁵ Quero picogasantiro pingantiro ora icantopiantaigui tsoengatsiri, queroootisa pinebetaigaro ora inaguetatsi quibatsiquê. Aintaca pairi nibetasantaro teni iranintiri Pabati Tosorintsi, ¹⁶ antagaisatinta oca inaguetatsi yaca quibatsica: ora icogasanti ibatsaquê, ora iniaque icoquero ora yasinta, ora iquianca iriati ibaqueri omagaro matsiguenga yoguibataca. Antagaisati oca opaniaca iraneingomentaquê quimingari matsiguenga, teni omaniema Tosorintsiquê. ¹⁷ Abisanaque ora inaguetatsi quibatsica aisati otsonganaquema ora icogaigabitara matsiguenga aisati ora inaguetatsira yaca, irari ira antatsi ora ininti Tosorintsi përosati cara intime jonoquê.

Ira quisaneinqueri Quirisito.

¹⁸ Najaniquitejegi nocomantaiguêmi pënibaque iripigaima Quirisito. Aisati queroquerai ocosamaniti irooti iribocapê matsiguenga jítacha antiquirisito ora ocanti ira quisaneinqueri Quirisito. Aroque piquemocotaigabaqueri. Yamai itojaiganaque ira quisanijinqueri Quirisito iroro ora ogótasantaguêque pënibaque iripigaima Quirisito. ¹⁹ Iriati ira quemisantabetari Quirisito carari aique iguisaneintanairi ijocanáci. Cagari iriro asiegui. Irirome quemisantiro pêroca intsibatací. Yamai antagaisati igótocoiguêri cara te inguemisantiri Quirisito teni inguengasêretaigái. ²⁰ Teni irogótaigue ira quisaneinqueri Quirisito, carari obirojegui ipëmiro Tosorintsi Isêre Caninaro Ora ogometaiguêmi cara pigótasantaiguêro ora aisonori. ²¹ Teni nasanguenatobitimiro ora te pigóguero carari aroquenta piquemisantiro ora nibarintisonori. Iroro ora nasanguenabiriquêmi arota pigóontêmarí ira tsoengatsiri cara irinibatasipêmaca irinibare. ²² Ira tsoigacha iriro ira cantêgotasitari: “Ira Jesos cagari Quirisito Agabisalcoontatsiri cagari Itomisonori Tosorintsi”. Iroro ira quisaneinqueri Quirisito itsoiguêgotari Pabati Tosorintsi, aisa itsoiguêgotari Jesos. ²³ Ira cantatsi Jesoquisito cagari Itomi Tosorintsi, teni irogótiri Quirisito teatisati irogótiri Pabati Tosorintsi. Irari cantatsi Quirisito Itomisonori Tosorintsi, aro igótasantiri, aisati igótasantiri Pabati Tosorintsi. ²⁴ Obirojegui, përosati pinguengaiguero nibarintsi ora piquemaiguê jirai cara piquemisanqueri Quirisito. Përoca pinguengaiguero ora piquemaiguê jirai, pinguentaiguêmani pinguengasêretaiguemari Itomi Tosorintsi aitosati Iriri. ²⁵ Icantasanotacái Jesoquisito përosati antiomoqueri Jonogaguetequê.

²⁶ Aroque nasanguenatocotaiguêri ira nintatsi iromatobitaiguemi. ²⁷ Obirojegui, ipaiguêmiro Tosorintsi Isêre Caninaro Ora inanquimi ogometaiguêmi. Quero picogui matsiguenga ogometimine. Iroonti Isêre Tosorintsi ogometasantaiguêmine, teni ontoiguema, ogometaiguêmi antagaisati. Përosati pingantima pinguengasêretaiguemari Quirisito aroquenta pogometaiguêmi Isêre Caninaro Tosorintsi.

Itomijegui Tosorintsi.

²⁸ Yamaicari najaniquitejegi, pinguengasêretaiguemari Quirisito arota cara iribocapae anganinásêretanê quero ipasiquiti cara aniobêri. ²⁹ Pigótasantaiguiri Tosorintsi teni ingantaguetêmate pairoraca Irironta caninarisonori. Ingantaiguêca matsiguenga caninasati, aisa pigóiguê cara Tosorintsi itomintaigacari irirojegui.

3

¹ Icantocotá Tosorintsi: “Irirojegui najaniquite”. Aisonori eiro ianiquite. ¡Pniaiguero! Tojaisonori inintasanotá Pabati Tosorintsi. Iroro te irogótaguêtái eiro matsiguenga tenta irogógueri Tosorintsi tenta inguemisantiri. ² Yamai nanintane, eiro ianiquite Tosorintsi. Terai ogóigue atiraca angantaiguêma, carari cara iribocapaca Jesoquisito, anganquimari íbega Iriro cara aniasantobêri. ³ Ira agueiri Quirisito icoguini ingantimari íbega Iriro. Icoquini irojocaguêtiro ora te onganinate iranque ora caninaro Irironta caninarisonori. ⁴ Ira cantaguetatsi te onganinate teni inguemisantiro tenta iromoncaratiro ora Irinibare Tosorintsi. Icantaguetiro ora te ongomeite tenta iraninte iragantatima. ⁵ Pigóguemi ora ipocobique Quirisito arota irágopitaáiro ora acantagueti te onganinate. Teni ingantaguetêmate Iriro. ⁶ Pairiraca quingasêretari Quirisito, teni ingantagueti. Ira përosati icantaguetiro quimingari te inguengasêretimari Quirisito, teatisa irogótiri.

⁷ Najaniquitejegi, pigamematasha querota yamatobitaiguemi matsiguenga. Ira antatsi ora caninaro, iriro caninari aisa icantari Jesos. ⁸ Ira përosati cantaguetatsi te onganinate, imatsiguengatacari camagari irironta obaquenguitsi camagarisonori icantasantaguetiro ora te onganinate. Iroro ora iconijataguêpê Itomi Tosorintsi. Ipocasipêro cara iriociaro antagaisati ora icantagueti camagari. ⁹ Irari ira itomintaca Tosorintsi teni ingantagueti përosati itimacaquerinta Tosorintsi caninasati; iroro ora te ingantagueti ora quimingari aisati icantajari Iriri. ¹⁰ Aro igótagani ianiquitejegi Tosorintsi aisati irasi camagari. Ira te ingante ora caninaro teatisa iranintiri irapiguemisantane, cagari ianiquite Tosorintsi. ¹¹ Jirai aquemaquero ora icanáci Tosorintsi: “Caninataque anintasantobaguima”. ¹² Quero

picantaigari Caín. Iriro iraisati camagari. Yóguëri ireinti. ¿Pairo yógobiqueri? Iniobërinta ireinti icanquero ora caninaro irari Caín icanquero ora te onganinate. Ijonaquerinta ireinti iroro yóguëqueri.

Anintiri opiguemisantane.

¹³ Nopiguemisantane, quero pomabocaiga cara inguisaneintaiguëmica ira te inguemisante. ¹⁴ Jirai te ogótiri Tororintsi. Ajáiguëme cara Sharincabeniquë. Aroque acantabeca acamaqueni. Aique Tosorintsi itimasanotacái. Carari yamai aique ajáiguë cara Jonogaguitequë. Yamai anintasantaiguëri opiguemisantane. Iroro ora ogótaguëque antiomoqueri Tosorintsi. Ira quisaneintiri imatsiguenga aroque icanca icamaqueni aro iriátë Sharincabeniquë. ¹⁵ Antagaisati ira quisaneintaiguiri imatsiguenga iriro icanta ógueri. Pigótasante yamai quero itimi ógueri Jonogaguitequë tenta irogótiri Tosorintsi. ¹⁶ Yamai igótasanti icamobicái Quirisito inintasantacáinta. Aisati intsome angantimari Quirisito. Teni onganinate ontsorogue angamobitaiguiri opiguemisantane omitocotaiguiri. ¹⁷ Aintaca casintachari iraniaqueri itimanamitane irapiguemisantane queroca pine iraperi, queroca ininti ipasitari, ¿Aroco iraninqueri Tosorintsi? ¹⁸ Najaniquitejegu, teni onganinate cara patiro anibatasitima: “Nanintiri nomatsiguenga”. Iroro caninataque angantaneintëgotanëri aisa omitocotasantëri. ¹⁹ Anintasantëca, ogótasantiro aguatiro ora nibarintsisonori. Aro anganinasërebiriqueri Tosorintsi, quero otosoroguri. ²⁰ Aroca ogótoconoquima cara acantaguetiro ora te onganinate, quero omagorianeinti icobeingatinta Tosorintsi. Carari igócái aroca aquemisantiri igótasantotinta antagaisati. ²¹ Yamai nanintane, aroca ogóque teni angantagueti ora te ongomeite, aro omagoriasëretë caninasati, quero otosoroguri Tosorintsi. ²² Cara anguemisantiro ora icanti Tosorintsi aisa anganque ora icocacái, aro omanopiantiri imasitasantacáiro ora omanaqueri. ²³ Iroro oca icantaigái: “Pinguemisantiri Notomi Jesoquisito. Pinintasantobaguima”. Iroro icancái Tosorintsi. ²⁴ Aroca anguemisanquero ora icanti Tosorintsi, aro anguegasëretimari aisati Iriro tiomosërecáine. Ogótasantë aquengasëretari Tosorintsi aroquenta ipacáiro Isëre Caninaro.

4

Ira matobiantatsiri aisa ira cantatsi caninaro.

¹ Nanintane, quero piquematsatiri antagaisati ira cantatsi iriro igáqueri Tosorintsi. Posamitsantiri pairoraca irogometaguëmi. Piniantimari aroca aisonori igáqueri Tosorintsi arosonorinta comantantabetacha matobiantatsiri inatsi yaca quibatsica. ² Iroro pigóntëmari Iroroca agáqueri Isëre Tosorintsi. Ingantocotaiguërica Jesoquisito negaca: “Imatsiguengatasantapë cara otsomaaqueri iniro. Ipaniaca Jonogaguitequë”, aro pigóqueri Iroro agáqueri Isëre Tosorintsi. ³ Carari pairiraca te ingantocotiri Jesoquisito imatsiguengatapë, iriro cagari iraisati Tosorintsi. Irianti antiquirisito ira quisaneinqueri Quirisito. Yamai ipoque yaca iriro piquemocotaiguë jirai. ⁴ Carari obirojegui irasi Tosorintsi. Iroro pobantaigacari Isëre Tosorintsi Iroronta sintsirosonori Ora inasërequimi. Te ongantima isintsire camagari ora inancari ira matobiantatsiri yaca quibatsica. ⁵ Iquengaiguëro aisati inibatëgotëro ora inaguetatsi te ongomeite. Ira te inguemisantiri Quirisito iquemaigabaqueri iroontinta yoguiatë ora quimingaro. ⁶ Eiro matsiguengatacari Tosorintsi. Ira ogótiri Iriro aisa iquemaigacái. Irari cagari irasi Tosorintsi teni inguemái. Iroro ogótaguëqueri ira comantanquero nibarintsisonori aisa ogóqueri ira matobiantatsiri quimingari.

Tosorintsi nintasanotantatsiri.

⁷ Nanintane, intsome anintobaguima iroronta yagobiacagái inintacagái Tosorintsi. Ira nintiri irapiguemisantane iriro ianiquite Tosorintsi igótiri. ⁸ Ira te iranintiri irapiguemisantane teatisa irogótëmatiri Tosorintsi, Irironta Tosorintsi nintasanotantatsiri. ⁹ Yoniagacái cara inintasanotái, iroro igátaguëqueri Itomi paniro yaca quibatsica cara iragabisaicotajái, arota antiomoqueri canta Jonogaguitequë. ¹⁰ ¿Pairo nintasanatsi? Ira Tosorintsi te anintiri eiro, carari Irianti inintasantái, iroro igátaguëqueri Itomi icamobicái ipënbentajáiro ora acantagueti te onganinate. Yamaica teni inguengairo Tosorintsi ora acantagueti.

¹¹ Nanintane, cara inintasanotái negaca Tosorintsi, iroro caninataque aisati anintobaguima. ¹² Te pairi neirine Tosorintsi. Carari anintobaquimaca aro intiomocái ai- quero ajáguítigue anintasanotanëri. ¹³ Ipacáiro Isëre Caninaro. Iroro igóontaa aquengasëretari Tosorintsi aisa itsibatacái eiro. ¹⁴ Igáqueri Pabati Tosorintsi Itomi irooti yaca quibatsica iragabisaicotaiguëri matsiguenga. Naniaigabaqueri nocomantëgotaiguëmiri. ¹⁵ Itiomoqueri Tosorintsi pairiraca cantëgotiri Jesos Iriro Itomisonori Tosorintsi. Aisati

Tosorintsi itiomuqueri iriro. ¹⁶ Igótasanti cara aquemisantiri Tosorintsi aisati inintasanotái Irironta nintasanotantatsiri. Aroca anintobaga, aisonori atiomotiri Tosorintsi aisa itiomocái Iriro.

¹⁷ Iroro ajáguítigue anintasantobaganêma, quero otsorogui querootisati ipasiquti eiro cara ingomantêgotacái Tosorintsi ora nacantagueti ora caninaro aisa ora te onganinate. Quero otsorogui yaca quibatsica aroquenta anintasantobaca. Aisati acantari ibega Itomi Tosorintsi Ira nintasantaiguiri matsiguenga. ¹⁸ Aroca igóti tojaisonori inintasanotái Tosorintsi quero otsorogui. Aroca anintasantêri Tosorintsi aisatica anintasantobaga, irágopitacáiro cara otsorogui. ¿Pairoroco ontsorogobique? Ira tsorogatsi aitosati iratsipiri-aquero; terai iranintasantiri Tosorintsi. ¹⁹ Intsome anintiri Tosorintsi Iritsintana nintasanotacái. ²⁰ Aintaca poro icantabeca: “Nanintiri Tosorintsi”, carari përosatica iguisaneintiri irapiguemisantane, itsoigani. Teca iranintiri irapiguemisantane ira inei, teatisa iranintiri Tosorintsi ira te iraneingani. ²¹ Oca icancái Tosorintsi: aroca anintasantiri Tosorintsi aisati intsome angantimari Irro anintasantiri opiguemisantane.

5

Ocarati maba ora comantêgotaguetiri Jesus Irro Quirisito.

¹ Itomintaigacari Tosorintsi antagaisati ira quemisantiri Ira Jesus aisati icantocotiri Irro Quirisito Agabisaicoontatsiri. Pairiraca nintiri Pabati Tosorintsi, aisati iranintaiguêri itomijegui Tosorintsi. ² Aroca anintiri Tosorintsi, aisatica anguemisantiro ora icantaigái, igóque anintaiguiri antagaisati ira itomijegui Tosorintsi. ³ Aroca anintiri Tosorintsi, ajátsatiri pairoraca igácái. Teni omomirintsite anguemisantiro ora icancái. ⁴ Pairiraca itomi Tosorintsi irobaqueri ira tseongisiri aisa irobaqueri camagari aisati omagaro ora inatsi yaca quibatsica. Iroro obaantaro cara aquemisantiri Tosorintsi. ⁵ Paniro ibantiro ora inatsi yaca quibatsica ira ogótasantiri Tosorintsi aisa iquemisantiri icanque: “Aisonori Jesoquisito Irro Itomi Tosorintsi”. ⁶ Irroque Jesoquisito bocapênguisti yaca quibatsica. Ibaotisatata nijaquê. Aisa icamobicái isheiro iraraa. Iroro ogomecáiro catingasati Ora Isêre Caninaro Tosorintsi. ⁷ Ocarati maba ora comantêgotaguetiri Jesus Irro Quirisito. ⁸ Isêre Tosorintsi ocomantêgotiri, aisa nija cara ibaotisatata Jesus ocomantêgotiri, aisati iraraa cara icamobicái. Oca mabati oquengaigaca cara ocomantêgotêri Jesoquisito. ⁹ Aquemisantisaqueri matsiguenga, cara icomantêgotiri basini matsiguenga, carari Tosorintsi përosati icomantê ora aisonori. Iroro ora intsome anguemisantatsatiri Tosorintsi cara icomantêgotêri Itomi. ¹⁰ Ira quemisantiri Itomi Tosorintsi iriro ogóêretasantatsi ora aisonori. Ira te inguemisantatsatiri Tosorintsi itsoingueri icantacacari tsoigachari tenta inguemisantiri Ira Tosorintsi cara icomantêgotiri Itomi. ¹¹ Aroque icomantacái Tosorintsi anguemisantirica Itomi intimacagasantacái yamai aisati përosati antiomoqueri canta Jonogaguítequê. ¹² Ira ogótiri Itomi Tosorintsi përosati intiomuqueri Jonogaguítequê. Ira te irogótiri quero itiomotiri, iriatê Sharincabeniquê.

Omanaqueri Tosorintsi.

¹³ Piquemisantaiguêrinta obirojegui Itomi Tosorintsi, iroro nasanguenataguêtaiguêmi yamai arota pigótasantiri Jesoquisito Irro timacagaiguimi yamai aisa pintiomuqueri canta Jonogaguítequê. ¹⁴ Igótasanti cara imoncaratiro Tosorintsi ora Irinibare. Aisati aroca omaniri ora ininti imaigái, aro inguemacái. ¹⁵ Aroqueca igóque cara iquemacái, aisati ogóque cara imacái Irro pairoraca omanaqueri. ¹⁶ Aroca piniakeri popiguemisantane cara icantagueti ora te onganinate, teca iriocairi Tosorintsi përosati iquemisantiri, pomanocobentiri aro iragabisaicoqueri Tosorintsi. Aintaca ira cantaguetatsi ora te onganinate aroque ijocajiri Tosorintsi, iriatê Sharincabeniquê. Quero pamanocobentiri cara icanque negaca. ¹⁷ Te ongomeite angantiro ora quimungaro carari ira cantaguetiro te irojocajiri Tosorintsi quero iáti Sharincabeniquê. ¹⁸ Igóti antagaisati ira itomintaca Tosorintsi teni ingantagueti përosati ora te onganinate, Irironta Itomi Tosorintsi ingábintsêri arota quero yagobeiri camagari. ¹⁹ Igóti eiro irasi Tosorintsi. Antagaisati iraequi te inguemisantiri Tosorintsi, iriantu quemisantaiguiri camagari. ²⁰ Igótaigui eiro cara ipogopê Itomi Tosorintsi igótacacáiri Tosorintsiisonori. Yamai atiomotiri Tosorintsi aisati atiomotiri Itomi jitacha Jesoquisito. Irro Tosorintsiisonori. Yamai itimacagasantacái aisati përosati intimacacái canta Jonogaguítequê. ²¹ Najaniquitejegui, pigamematasha. Quero piquemisantaiguiri ira cagari Tosorintsiisonori.

Aro ocarati ora nasanguenataguêmi. *Joan*

YOGATSITAIRO JOAN ISANGUENAQUE

Ibetsataaro irapiguemisantane.

¹ ¿Aintabi, tsio? ¿Ainta pijaniquite cara? Obiro igoigane Tosorintsi. Naro anti-
asipari nasanguenataiguëmini yaca. Nigóti piquemisanti ora nibarintsisonori, iroso
nanintaguëquimi. Aisati inintaiguëmini antagaisati ira ogótasantiro ora nibarintsisonori.
² Anintiro ora catingarora Irinibare Tosorintsi përosati aquenguiro eiro aisati përosati
pinë eiroica. ³ Tojaisonorori inintaigacái Tosorintsi aitosati Jesquirisito Itomi. Aque-
misantiro nibarintsisonori. Iroso nocoguëti ingábintsaiguemi Tosorintsi aisati ingan-
taneintëgotaiguemi aisati intimacagasanotaiguemi caninasati.

Pigamemari ira quisaneinqueri Quirisito.

⁴ Cara naniaiguëri pijaniquitepague, iquemisantaiguëro ora nibarintsisonori ora icancái
Tosorintsi. Aro nacaninasëretasantaiganaque. ⁵ Yamai, tsio, nocogui anintobaguima. Oca
nasanguenaquimica cagaro irorai, iroonti inaga jirai irooti ora icanti Tosorintsi. ⁶ Aroca
anintasantiri Tosorintsi, anguemisantiro ora icancái. Jirai piquemocoquero ora icancái
cara anintobaguima.

⁷ Yamai ainta arosonori matobiantatsiri itsoiguëgotaigacari Jesquirisito icanque: “Te
iromatsiguengatapë Jesquirisito. Te imaniema Jonogaguitequë”. Irirojegui matobiantat-
siri aisati ira quisaneinqueri Quirisito. ⁸ Pigamaiguemari iromatobiquimica. Tojai pico-
mantëgotëri Tosorintsi pitarobacaquineri. Yamai nocogui quero pobegaiguero pitaroba-
caare carari imaguemi Tosorintsi antagaisati ora icasijaquemi. ⁹ Pairiraca joquërone ora
yogomeque Quirisito te inguemisantajiro, te irogótiri Tosorintsi. Irari ira quemisantiro ora
yogomeque Quirisito, aro igótiri Tosorintsi aisati igótiri Itomi. ¹⁰ Aintaca ogomeantatsiri
iribocapë, aro posamitasantobëri arota pigótiri iroroca yogomeanti irasi Quirisito. Que-
roca iquenguiro ora yogomeanti Quirisito, quero pominguiri pobangoquë querootisati
pobetsatari. ¹¹ Aroca pobetsatobëmari ira matobiantatsiri pomatsiguengatobëmari, aroque
pomitocoqueri iromatobitaiguëri quemisantatsiri; picancari ibega iriro.

Icarantairo isanguenare Joan.

¹² Arosonori ora naninti nongomantaiguemi, carari teni naninte nasanguenatimiro.
Nocogui najáque cara obiroquë nanibataiguëmi catinasati arota anganinasëretaiganaque.
¹³ Ainta yaca ojaniquitepague pirento ora icoiguë Tosorintsi. Yobetsataimi canta.

Aro ocarati ora nasanguenaquemi. *Joan*

MABATAQUE ISANGUENAQUE JOAN

Ibetsatari Joan ira Gayo.

¹ ¿Aintabi, Gayo? Naro antiasipari nasanguenaquimini. Tojai naninquimi aroquenta piquemisanquero obiro ora nibarintsisonori.

Caninataque omitocoqueri opiguemisantane.

² Nanintane, namanocotopiantimi arota pintime caninasati. Nigóti piquemisan-tasanotiri Tosorintsi, aisati namanocoquemi arota pintegotsite. ³ Nacaninatanè cara icomantègotapèmi opiguemisantane cara aisonori piquemisanquero nibarintsisonori. ⁴ Tojai nacininasèretanè cara naquemocoqueri ira naguemisantacaganeegui cara iquemisantaiguèro nibarintsisonori. ⁵ Nanintane, caninasati picanque cara págacananatobèri popabaqueri iraperi popiguemisantane paniacha canta jaanta. ⁶ Aroque icomantègotapèmi yaca opiguemisantane cara tojai pinintaigabaqueri ira paniacha jaanta. Pèrosati pomitocotaigueri cara itiomopèmi aisati pomitocotaigabajiri cara iriátae iroronta icogui Tosorintsi pinganque negaca. ⁷ Iquenaguetanè icoguininta ingomantègotiri Jesoquirisito. Iáiguè te ingoicotèmataigueri ira te irogótiri Tosorintsi. ⁸ Iroro caninataque omaigueri eiro ora icogaigui aisa omitocotaigueri cara ingomantègotaguequero ora catingaro Irinibare Tosorintsi.

⁹ Nasanguenaquineri opiguemisantane ira botoitacha canta, irari Tióterejes te iran-
inte inguemina ora nacanti. Icoque iriro obatacaguirine quemisantatsiri. ¹⁰ Aroca najáque obiroquè, nongomantègotapéro ora icanti Tióterejes cara icantasica aisati it-
soiguègotaguèna, teatisati irágobèri ira aretacha comantantatsiri. Aitosati iguisaneinqueri
basini irapiguemisantane ira cogabitacha irágobèri. Te iranintacagui Tióterejes irágobèri
ira aretacha. Ijoqueri cara yapatoita.

¹¹ Nanintane, quero poguiatiri ira cantiro ora te onganinate. Piguatiri ira cantatsi
caninaro. Iriro ogótiri Tosorintsi; irari cantiro te onganinate teni irogótiri. ¹² Antagaisati
icantocoiguèri Temétirio caninari. Igótasanoiguèri iquemisantiro nibarintsisonori ora icanti
Tosorintsi. Aitosa naniacananatanotèri naro. Pigoiguè cara nocomantègotèri catingasati.

¹³ Arosónori ora naninti nongomantimi, carari te naninte nasanguenatimiro.
¹⁴ Nocoguini omanapague naniajimi canta arota anguegabaguitomotobaguima
omagaro. ¹⁵ Nocoguini caninasati pintime. Yobetsataguèmi popiguemisantane yaca.
Aisa obiro pobetsataguenari opiguemisantane canta.

Aro ocarati ora nasanguenaquimi. *Joan*

IRA JORAS ISANGUENAQUINERI IRAPIGUEMISANTANE

Ibetsataigari.

¹ ¿Ainirobiegui? Inintasanotaiguimi Tosorintsi. Naro Joras ireinti Santiago aisati iromeraro Jesoquirisito. Nasanguenataiguëmi obironta icoigaiguë Tosorintsi icábintsaiguëmi Jesoquirisito. ² Nocogui ingantaneintëgotasantaiguemi Tosorintsi aisati intimacagasanotaiguemi caninasati aisati iromagoriasëretaqueumi aitosati nocogui pigótasantiri inintasanoiguëmininta.

Pigamemari matobiantatsiri.

(2 Pe 2.1-19)

³ Nanintane, nocogabeta nasanguenataiguemime nongomantocoquerome cara yogabisaicotaigacái Jesoquirisito. Carari yamai igáquina Tosorintsi nasanguenataiguemi iro-ronta caninataque pisintsitaiganauero ora icomantëgotëri Jesoquirisito comantantatsiri jirai. Teni ine basini nibarintsisonori. ⁴ Aroquenta yaretaigapa matobiantatsiri. Ican-tomemegaparo caninari arota iraniacaninatiri matsiguenga carari iriati matobiantatsiri. Ainta isanguenatococa jirai irirojegui matobiantatsiri iriatë Sharincabeniquë. Irootita icábintsaigacái Tosorintsi iriroque përosati icantaguetasanti ora pairorapague-raca ora te onganinate. Icanque: "Inintasantái Tosorintsi. Quero icasitigatái". Aisati itsoiguëgotari Atingomi Jesoquirisito paniro Iriro yasintái.

⁵ Aroque pigóiguë jirai yomisotocajiri Tosorintsi ira matsiguenga jitacha Isirael cara Ejípitocuë. Yamai naninti nanguencagaiguemiro cara yogamagaiguëri Tosorintsi antagaisati ira te inguemisantiri. ⁶ Aisati pigóiguë ira ironomirepague Tosorintsi jirai ijocaiganauero cara itimaigabitario jonoganta, aro yomingaiguëri Tosorintsi cara tsitini-riquë përosati irooti cara iragáiguëri Tosorintsi Sharincabeniquë. ⁷ Aisati Soromasati Gomorasati aisati ira timatsi basinipaguequë poeboro aisa icanta ibega ironomire cantagueantatsiri icantaguetasanti jirai icogaiguë irante basiniati. Irirrojegui përosati yamai itsipiriantetiro pamari ora tera otsibacanete. Yamaicari agamaiguema.

⁸ Carari aroque igótabecaro oca iriati ira matobiantatsiri iquengasantaca aisa icantague-tiro përosati ora pairoraca inintaigui te onganinate. Teni inguemisantiri itingomipague. Aisati icantocotaguetasitari antagaisati ira caninari timatsi Jonogaguetequë. ⁹ Irari Miguel itingomi ironomireegui Tosorintsi irisaanganetsite teni irisintsitsatiri camagarisonori cara inibatobaca. Inibatobagobicari igamaga Moisés. Ira camagari inintabecari Moisés, carari Miguel ininque iráganëri jonoquë. Caraanti canqueri Miguel: "Irisintsitsatimita Natingomi". ¹⁰ Carari ira matobiantatsiri inibatëgotaguetasitaro ora te irogóiguero. Teni iraninte irogótiro ora iquianca Tosorintsi. Aisati icantaigari otsiti te inguenguema. Iro-ro ora yamasiantaigaca, aisati ipoguiriantaigaca. ¹¹ Iratsipiriaiguë aroquenta icantaigari ibega Cain cara icanquero ora ijique caninano, teni ingantiro ora icanti Tosorintsi. Aisatinta icantaigari ibega Baram ira matobitajacha ijocanëri Tosorintsi icogabetaninta irágueme tojai quirequi. Aitosati iratsipiriaiguë aroquenta icantaigari ibega Coré ira teni inguemisantatsitiri Moisés itingomi, inibatëgotaguetasitari, aro yogamaguëri Tosorintsi.

¹² Irianti aguimingatapëro jiesita cara papatoita obirojegui quemisantatsiri, cara pa-paigui aroquenta piquengaiguëri Tosorintsi aisa pinintobaca. Teni iripasiguitaigue iriro. Yapasantaiguë iquemaca yógaigaca, patiro iquengaigaca iriati. Iancaro mingori otsi-tinitabaca páganairo coguentima teni obariguiro angani. Aisati incanaro ancharo cara omoncaratabeta cara otimi oguitso carari quero otimi. Aisa incanaro ancharo osiabongui-titaga ora te ine oguitso. Icamasanotaiganaque. ¹³ Ira matobiantatsi incanaro angaare cara posebaata picontetanë osimare. Aisa yosigaro cara picontetanë ora icantagueti pasigui-tagantsi. Irirrojegui incanari jonogatsi ira quenasiagnetacha. Tosorintsi icantocoguëri matobiantatsiri icanque: "Iriáiguë tsitini-riquë agabenisonori canta përosa otsitiniti".

¹⁴ Cara jirai ibantanë Arán inanë. Aique icharinentanaca icarati 7. Ira carantatsi jitacha Enoc comantantatsiri. Icomantëgotaiguëri ira te inguemisante: "¡Pinetse! Iribocapë Atingomisonori intsibatapëmari tojaisonoru ironomireegui irisaanganetsite caninari. ¹⁵ Cara iribocapë ingomantëgotasanoiguëri omagaro. Irotopitacaqueri ira matobiantatsiri ingomantëgotaguequero antagaisati ora icantaguetasanti te onganinate. Aisati ingoman-tagueque omagaro ora inibatëgotasitacari Atingomi". ¹⁶ Yabentaigaca matobiantatsiri. Aisa icantocotaguetasitari matsiguenga. Patiro icogaigui ora ininti ingante iriatiegui. Iquengasantaganaca iriantiegui caninari. Inibanibatasanoiguë yomitojaiguëro irinibare

ijitacaqueri basini matsiguenga caninari iriro. Inibatëgotasitomegacari caninasati basini matsiguenga, iroontinta icogaigui ingábintsëma iriati.

Ora icocacái Tosorintsi.

¹⁷ Carari, nanintaneegui, pinguengaigairo ora icomantaigái jirai iragátane Jesoquirisito Atingomi. ¹⁸ Icomantaigué: “Cara aiqenta iribocaigapê matsiguenga iricóbíntsátapêro ora caninaro aisati ingantaguetaigapê ora icogui ingante ora te onganinate”. ¹⁹ Irirojegui casiriconiatitaigapêrine ira quemisantiri Tosorintsi. Patiro iquengaiguêro ora te ongomeite tenta inantimari Isêre Tosorintsi. ²⁰ Carari, nanintaneegui, nocogui pisintsitan-tanëmaro Irinibare Tosorintsi aroqenta piquemisantsanotêro. Aisati nocogui omitocotaiguemi Isêre Caninaro Tosorintsi cara pomaniquerinica. ²¹ Pijátsatanëri Tosorintsi arota pigóiguê cara inintantaiguimi. Pêrosati pinguengeri, pigueiri Ira Atingomi Jesoquirisito irooti cara iribocapae ingantaneintëgotaigapêmi irágaiganaquemi Jonogaguitequê cara pintiomopêri pêrosati. ²² Aintaca matiguenga pënibaque inguemisanque, pomitocotaigueri inguemisantirita Tosorintsi. ²³ Pinguemisantacaguii basinipague arota iragabisaicotajiri Jesoquirisito. Pigabisaicotiri arota quero iáti Sharincabeniquê cara pini pamari tsitsi. Pingantaneintëgotaigueri basinipague carari pigamema obirojegui, pintsorogaigue quero poguiatiri arota quero icantacaguimiro ora quimingari.

²⁴⁻²⁵ Ainta paniro Tosorintsonori Agabisaicoontatsiri. Isintsitagaiguêmi arota quero picantagueigui ora te onganinate. Irágaiganaquemi iraguêtetaigabaquemi pintegotsitaigapê Iriroquê pinganinasêretomotaigapêri. Aroqenta icábintsancáiri Jesoquirisito Itomi Tosorintsi intsome angantocotiri: “Itasorintsitasanoti, icaninatasanoti, icobeingatasanoti, yas-intaguitetasantaro antagaisati. Iriro Itingomisonoriguinte. Jiraisonori itimi, aisa yamai, aisa pêrosati itimi”.

Yamai aro ocarati. *Joras*

TOSORINTSI YONIAGUËRI JOAN ORA INGANQUE JESOQUIRISITO

Icomantëgotëri Jesoquirisito.

¹ Oca sanguenatëgotënguicha ora Tosorintsi icanqueri Jesoquirisito, ora yogagajineri ironomire, aique yogagajinaro naro, yamai nongomantaiguëmiro obiro. IcoGUI Tosorintsi cara irogóigue antagaisati quemisantatsiri ora inanënguitsine omanapague quero ocosamaniti. ² Aro tojai igótacaquina Tosorintsi aisati Jesoquirisito. Icomantënaró aisati nantiasantëro ora yoniaguëna. ³ Tosorintsi iraganinasëretëri ira nibatiro oca nasanguenataiguëmica, aisati omagaro quemaigabaquerone. Carari caninataque aisati quero iquemasitaro; inguemisantiro ora ocanqueri queronta ocosamaniti ora inanënguitsine.

⁴ Naro Joan nasanguenaquemiro oca obirojegui quemisantatsiri timaigatsi 7 poeboroquë cara Asiaquë. Yamai nongomantaiguëmi: ainta Tosorintsi përosati cara icanta. Jirai itimi, përosati ainta yamai, përosati cara inganquima aiquenta. Nocoguini ingábintsaguëmi Iriro aisati nocoguini iromagoriasëretaguëmi. Inganquemiro Iriro aisati Isëre Ora coshoni oguëri quemisantatsiri. ⁵ Aisati ingábintsaguëmi Jesoquirisito Ira catinasati yogagajairo ora icanqueri Iriro Tosorintsi, Ira Iritsita cabiritajacha cara icamaque, aisati Iriro Itingomisonori omagaro cobeingaripague ira tingombintabitacari imatsiguenga yaca quibatsica. Tojai acantaguëti eiro ora te onganinate, carari tojai inintasantacái Quirisito, icamobicái, iraabiricái yosaasëretancáiro iraraa. ⁶ Aisati ipegajái itingomi iragáantanequë antsibatëmari Iriro, aisati ipegajái saseriroti anibabentaiguëri catinasati quë Tosorintsi ira acarati aquemisanaguë, omanocotaiguëri. Intsome angante: “Caninarisonori Atingomi Jesoquirisito, intsome antingomintimari përosati”.

⁷ Pinetsaiguëri Quirisito. Cara iribocapae mingoriquë iranaiagabaqueri omagaro matsiguenga, aisati iraeGUI pëquëgotëri jirai. Aro intSOROgaianaque antagaisati timaigatsi quibatsiquë iraraicotaianaqueri. Aisonori onganquima negaca. ⁸ Te imasiniate Atingomi, Iriro agabeiro omagaro. Përosati cara icanta: jirai itimi, përosati ainta yamai, përosati cara inganquima aiquenta. Icanque Iriro: “Naro parintacaro omagaro, aisati Naro carantërone omagaro”.

Joan iniaqueri Quirisito.

⁹ Yaca aintana naro Joan popiguemisantane. Aroquenta aquemisanqueri Jesoquirisito, itsipiriacagaigacái matsiguenga yaca quibatsica. Aisati oguiaqueri Jesus antsibatimari iragáantanequë. Aroquenta naquenguitsataguequero Irinibare Tosorintsi, aisati aroquenta nocomantëgotëri Jesoquirisito, ijoquena yaca oboguesica jitacha Pátimos. ¹⁰ Aro tomincoquë namanocoqueri Tosorintsi, omitocoquina Isëre naquengasëretantëri. Naniobëro ora cantaca quisanitagantsi carari nagaguitaga. Naquemobëro aiquero natisitaquë catsiguesonori nibarintsi játsaque jaanta ocancaro tiborentsi. ¹¹ Icanquena:

—Naro parintacaro omagaro, aisati Naro carantërone. Pisanguenatiro omagaro ora piniaque, aique pomagantëri omagaro ira quemisantatsirijegui botoibiritari Quirisito cara 7 poeboroquë cara Asiaquë. Pomagantineri cara Ejesoquë, Isimírinaquë, Péregamoquë, Tiatiraquë, Sárisesiquë, Jirarejiaquë, Iraoriseaquë.

¹² Nanebintasitacari ira nibaquina. ¹³ Naniaquero ora yogantaro obotagantsi ocarati 7 obetsicaga oro. Cara aganguisati quë naniaqueri inibatëna yoganguiriaca, Irianti osigari Jesoquirisito Ira paniacha Jonogaguëtequë, imatsiguengatapë. Iquero oquibantsa iguitsagare, aiti pinë irisitigatsaqui ro ineiquë, obetsicaga oro. ¹⁴ Oquëtaguisitasanotë ora iguisi cataguisironori cantaca omegui. Iroonti cantaca iguisi antiasiparisonori ira ogótasantatsiri. Ora iroqui cantaca pamari cara pitairinga, inetsëro antagaisati, igóquero omagaro igócai ora aquianca. Aro iconijatomotanëna naro. ¹⁵ Ora iguiti ocoboriatanë aisati oquiraatanë aisati ocanca cara opotsoroti coshori cara tsitsiquë. Aroca iragatiquëri pairiraca iritaguëri. Inibatit catsiguesonori cantaca tojai nija cara ojaritasanti. Irianti cobeingari. ¹⁶ Ipogoqueri ibacosonori quë 7 jonogasati. Picontetapëri ibagantequë isabirite catsëbarisonori pitirooti. Yobariasanotë iboro cantaca paba cara yobariasanoti porirerere.

¹⁷ Cara naniaqueri, nitëanë iguitiquë, nacanaca nagamaga, carari yotsagaquina ibacosonori quë, icanquena:

¹⁸ —Quero pitsorogui, Naanti Jesus. Naro parintacaro omagaro, aisati Naro carantërone. Naro caniatasantatsiri; nacamasantabitaca, carari nacabiritaja aisati. Yamai përosati cara nanganquima nanganiatanë. Quero nacamaji. Aisati naro cantëgotërine matsiguenga aroca ingamaque, quero ca icami. Aisati nangantocoqueri pairiraca játënguitsine Jonogaguëtequë, aisa pairiraca játënguitsine osobiquë cara iriáiguë isëre ira camatsine cagari

quemisantatsiri. ¹⁹ Yamai pisanguenatiro oca piniaqueca, aisati ora inatsi yamai, aisati pisanguenatocotiro ora noniaguëmira aikuenta. ²⁰ Yamai nongomantëmiro ora te pigôte carani. Piniaqueri 7 jonogasaki nopogoqueri nobacosonoriquë: icancari ira obatacagaiguëri quemisantatsiri botoibirritina Naro cara 7 poeboropaguequë. Aisati ora 7 yogantaro obotagantsi obetsicaga oro; icantaigari ibega quemisantatsiri cara 7 poeboropaguequë.

2

Isanguenaquineri ira omisantaiguëri quemisantatsiri cara Ejesoquë.

¹ Aisati icanquena Jesus:

—Pisanguenatineri ira omisantaiguëri quemisantatsiri cara Ejesoquë: “Ira Quirisito pogotaiguëri 7 jonogasaki ibacosonoriquë aisati yanëitanë aganguisati 7 yogantaro obotagantsi obetsicaga oro, icanquemi: ² Nigótiro omagaro ora picantaguei, aisati nigóquero cara popomiribintënarora ora nococaquemi, te pitsirisimaro. Nigóque te pinintacaguëmatiri ira cantatsi te onganinate. Nigóque ipocasiquemi ira cantasitacha: “Naro iragátane Quirisito”, carari piniantacari pigóqueri irianti matobitaiguëri quemisantatsiri; te pinintacaguëri inguenguitsate. ³ Nigóque aisonori antsinisati pitsipiriobenquena te pitsirisimaro, te pijoquero ora picanquina. ⁴ Carari aiti patiro ora te nanintobitimi: jirai pinintasantabitëna, carari yamai te pinintasantina. Nogasëretocoquemi. ⁵ Pinguenguema atiraca picanta jirai, te pingantima yamai. Pinguenguema, pingantima yacaquero, pingantimajima pibega jirai cara obiraini piquemisanquina, pinintasantina. Queroca pinintajina, nopocasiquemi nágabitsaquemiro ora pogantaro obotagantsi, queroca picanta yacaquero. ⁶ Carari aiti cara naniacaninataiguëmi: te pinintacaguëri ingantagete ira Nicoraitaeguë, piguisëgotaigacari aisa nacanta naro naguisëgotaigacari. ⁷ Aitica piguemita ora piquemanta, pinguemisantiro ora ocomantaiguëri quemisantatsirijeguë Ora Isëre Tosorintsi. Jirai aiti Erënuquë anchato catimantague; arome irapëro jirai, përosati cara ingantimame inganiatë. Yamai aiti ora cantaro canta caninaguiteroquë jonoquë Tosorintsiquë. Ira agabeiro ora quimingaro aisati ingantopiantinaro ora nococaqueri, nomëri intsimaquero oguitso anchato ora catimantague jonoquë oganiatëri Jonogaguitequë përosati”.

Isanguenaquineri ira omisantaiguëri quemisantatsiri cara Isimírinaquë.

⁸ Aisati icanquena Jesus:

—Pisanguenatineri ira omisantaiguëri quemisantatsiri cara Isimírinaquë: “Quirisito Ira parintacaro omagaro aisati Ira carantërone, Ira camabitënguicha aisati icaniatanai, icanquemi: ⁹ Nigótiro omagaro ora picanque, aisati nigóque tojai picatsibiriquina, aisati teni pasintëmatima pairoraca, carari aiti tojai pasi noguëmiro jonoquë nacasijaquemiro. Aisati nigóque cara icantocotaguetasiquimi ira cantasitëmi: “Naro jorío quemisantatsiri”. Carari cagari iriro, irianti yasinta Satanás. ¹⁰ Cara itsipiriacaquemi iriro, quero pit-sorogui. Iromingagarantaiguëmi obiro ira Satanás iromingamentoquë, iraniantaiguëmi omagaro cara piquemisanquina. Pitsipiriaguë 10 cataguiteri. Arotasha pine omagaro ora nocomantëmi, quero pijocajiro cara piquemisanquina irooti cara pingamobiquina, aro naganiatasantaimi përosati canta Jonogaguitequë, pintsibatasantëna. ¹¹ Aitica piguemita ora piquemanta, pinguemisantiro ora ocomantaiguëri quemisantatsirijeguë Ora Isëre Tosorintsi. Ira agabeiro ora quimingaro aisati ingantopiantinaro ora nococaqueri, quero iáti Sharincabeniquë quero itsipireiro pamari”.

Isanguenaquineri ira omisantaiguëri quemisantatsiri cara Péregamoquë.

¹² Aisati icanquena Jesus:

—Pisanguenatineri ira obatacaguëri quemisantatsiri cara Péregamoquë: “Quirisito Ira picontëtapë ibagantequë isabirite catsëbarosonori pitirooti, icanquemi: ¹³ Nigótiro omagaro ora picanque, aisati nigóti cara pitioomqueri cara itimi tojai quemisantri Satanás, carari te irojocaguimiro cara piquemisanquina, coshoni poguiatina. Jirai cara obirojeguiquë itimabega Antipas, icomantëgotasantëna, icanque omagaro ora nococaqueri, iroro yogamagaguëqueri ira aguiaitaiguëri Satanás. Piniaqueri cara yóguëri carari te pijocajiro cara piquemisanquina Naro. ¹⁴ Iroro cantënguicha aitiro picantaguetiro ora te nanintiro. Ainta iconoiquemi obirojeguiquë ira ogomeantiro aisa icantari ibega Baram jirai. Baram yogomequeri Barac; aique icantaguetacagaiguëri jorío yamanaiguëri ibabane Moabisati, ira cagari Tosorintsi, irianti yobetsicasita matsiguenga; aisati intaguetiro tsinanepague te onguemisante. Yamai ainta obiroquë ira ogomeantiro irootisati: icanque: “Caninataque pomaniri ira yobetsiquë matsiguenga, aisati caninataque pintiro tsinanepague ora cagaro pijina”. Teni ingomeite cara yogomeantë. ¹⁵ Aisati pinintacqueri obiroquë ira ogomeantatsi aisa ocantaro irogomeantane Nicoraitaeguë ira naguisanijinti naro ora yogomeanti. ¹⁶ Pinguenguema, pingantima yacaquero. Queroca pijocajiro ora

quimingaro, najátasitaiguèmi nanguisèri ira piconoica te inganinate. Nacaraqueri nanga-sitigatèri nasabiritequè ora contetatsi nobagantequè. ¹⁷ Aitica piguemita ora piquemanta, pinguemisantiro ora ocomantaiguèri quemisantatsiri Ora Isère Tosorintsi. Ira agabeiro ora quimingaro aisati ingantopiantinaro ora nococaqueri, nomèri ora irapè ora maná te oneingani yamai oganinasèretiri: iroonti cantaca nopasitaigacari jirainisati ora jitacha maná. Aisati nomèri cataro mopè, nasanguenaquineri irorai iripajiro mopèquè; irogóquero iripajiro iriro, carari basini quero igótiro’ ”.

Isanguenaquineri ira omisantaiguiri quemisantatsiri cara Tiatiraquè.

¹⁸ Aisati icanquena Jesus:

—Pisanguenatineri ira obatacaquiri quemisantatsiri cara Tiatiraquè: “Quirisito Itomi Tosorintsi, Ira pinanta iroqui ocantaro pamari cara pitairinga aisati iguiti cobori-arisonori, icanquemi: ¹⁹ ‘Nigótiro omagaro ora picanque, nigóquimi pinintobaca aisati piquemisanquina, aisati pomitocotaiguèri pomatsiguenga, aisati pitsipiriobenquinaro ora pomirintsitomoquemi. Aisati nigótiro cara picantasantèro yamai ora nococaquemi; pabisèro ora picanque jirai. ²⁰ Carari aiti picanque ora te nanintiro: pinintacaquero ora tsinane quimingaro ogoqueri quemisantatsiri ora te onganinate. Iroonti cantaca Jesabel jirai iina Ajab quimingari itingomi jorío. Aisa ocantaro Jesabel jirai oca tsinaneca ocantasita: “Nocomantègotèri Tosorintsi”, carari pamatobitaiguèri ira nasintaiga. Pogomequeri intaguetiro tsinane cagaro iina aisati pogomequeri iraauguèri ibatsa ira yóguineri ibabaneegui, ira yobetsicasita matsiguenga. ²¹ Noguibebaro onguengue-mame ongantajimame yacaquero, carari te oninte ojocajiro cara oniobintiri sèrari ira cagari ojime. ²² Yamai nongomantèmi: noanaitirota, natsipiriacaquiro. Aisati ira quemisanquero queroca ijocajiro cara iniobintèro, aisati cara ijocanèna Naro, natsipiri-acagaiguèri iriro. ²³ Aisati nopoguiriaiguèri ojaniquite; irorota irogóontima antagaisati quemisantatsiri cara nigótasantiro omagaro iquengaigaca matsiguenga aisati nigótasantiro antagaisati ora icogaiguè. Caninaroca ora icantagueti, aro nangábintsiaiguèri; carari teca onganinate natsipiriacaqueri. ²⁴ Carari obirojegu Tiatirasati, teca piguiatiro Jesabel, teatisati pigótiro irogomeantane Satanás, caninataque ora picanque, quero nacantimi basini. ²⁵ Pèrosati cara pingantima pinguemisantina irooti cara nopocaje. ²⁶ Ira agabeiro ora quimingaro aisati ingantopiantinaro ora nococaqueri irooti cara nopigaima, nomèri intingomibintaiguèri tojai matsiguenga. ²⁷ Cara icanquina Naro Pabati nantingomibintas-antaiguèri omagaro matsiguenga, aisati ira agabeiro quimingaro inganquina nibega Naro, nanganqueri intingomibintaiguèri matsiguenga, nanganqueri cobeingari, iragabeinari antagaisati ira te inguemisantina. Iripoguiriaiguèri aisa inganquimaro pibega cobiti cara piporoqui. ²⁸ Aisati nomèri jonogasati conijatatsi coniamaniquè. Piguiatènaca aro coshoni noguèmi noniaguèmi Naati, pigótasantèna. ²⁹ Aitica piguemita ora piquemanta, pinguemisantiro ora ocomantaiguèri quemisantatsiri Ora Isère Tosorintsi’ ”.

3

Isanguenaquineri ira omisantaiguiri quemisantatsiri cara Sáriesiquè.

¹ Aisati icanquena Jesus:

—Pisanguenatineri ira omisantaiguiri quemisantatsiri cara Sáriesiquè: “Quirisito Ira pinanta Isère Tosorintsi Ora coshoni oguèri quemisantatsiri, aisati Ira pogoqueri 7 jonogasati, icanquemi: ‘Nigótiro omagaro ora picanque, aisati nigóque ijitasitaiguèmi obiro quemisantatsiri, carari naniaiguèmi te pinguemisantasantina tojainta pitsingui. ² Pigamema. Pisintsibiritiro ora piquemisanque quero pomaguisantiro. Naniaquemi cara te pomonaratiro ora icocaquemi Tosorintsi. ³ Pinguengero ora yogomequemi jirai ora piquemobè. Pinguengero, pingantajima yacaquero, pinguemisantiro. Queroca pagama, najátasiquemi natsipiriacaquemi. Te pigóte atiraca ongantima najátasiquemi; aisa nangampèmari cosirinti cara te pigóte atiraca ongantima iriboquè ingositapèmi. ⁴ Ainta tojai tsoengatsiri obirojeguiquè Sáriesisati, carari ainta arosantaanti quemisanquina itimi caninasati. Cara picantaguetiro ora te onganinate aisa posigaro piguisagare cara poguebatsitiro. Irianti ira quemisanquina te iraguebatsitiro iguitsagare. Naro nanganqueri ingagueiguèro iguitsagare catari iranèitacaquina naniacananatèrinta. ⁵ Ira agabeiro ora quimingaro aisati ingantopiantinaro ora nococaqueri, inguèro iguitsagare catarosonori. Quero nasetajineri iripajiro cara nasanguenatoqueri jonoquè. Aiti osanguenatagueca iripajiro omagaro timaiguènguetsine pèrosati cara Jonogaguetequè. Aisati nongomantègotèri iriro Pabatiquè: “Iriro ica iquemisanquina, nasincari”. Aisati nongomantèri ira ironomireegui Pabati. ⁶ Aitica piguemita ora piquemanta, pinguemisantiro ora ocomantaiguèri quemisantatsiri Ora Isère Tosorintsi’ ”.

Isanguenaquineri ira omisantaiguiri quemisantatsiri cara Jirarejaquè.

⁷ Aisati icanquena Jesus:

—Pisanguenatineri ira obatacaguiri quemisantatsiri cara Jirarejiaquë: “Icanquemi Jesoquirisito Ira caninarisonori tenta ingantaguetëmatiro ora te onganinate, aisati Ira nibatatsi ora aisonori, imatsiguenga David itingomi jirai, itingomibintasantacái. Inganque pairi játénguitsine Jonogaguítequë aroqenta iquemisanqueri Iriro, aisati inganque pairi quero íati tenta inguemisantíri Tosorintsi. Te pairi basiniatitirone Irinibare. Iriro cantëmi: ⁸ ‘Nigótiro omagaro ora picanque. Jirai nigáquemi: “Pinguenguitsatiro Nanibare, nomitocoquemi”. Aro piquenguitsaquero irooti yamai. Tigueti ingantimi iraguimairentimi. Te pisintsisërete, teatisati pintojaigue, carari piquemisanquero Nanibare te popasiquitiro. Picomantaguetaiguëri matsiguenga: “Naquemisanqueri Quirisito Natingomi”; te popasiquitocotina. ⁹ Ainta quemisantaiguëri Satanás, iguisaneinquimi. Iriati matobiantatsiri cantasitacha: “Naroegui jorío, naquemisanqueri Tosorintsi”. Teni inguemisante, itsoigani. Aiquenta naretacagaiguëmari obiroquë, irobotacagueritotasipëmi. Nogótacaguiri cara nanintasantimi obiro. ¹⁰ Itsipiriacaquemi, carari përosati picanquero ora nacanquemi, te pitsirisimaro. Iriro nangábintsaguëtëmi, quero pineiro oquibe-guinte atsipiriagantsi ora aiqenta naniantaiguëmari antagaisati timaigatsi quibatsiquë. Nogóontëmari atraca ingantaiguëma aroca inguemisanquina. Omomiritsitomotaiguëmari omagaro matsiguenga, carari obiro nojocaicobenquimi, quero opomiritsitomotimi. Quero ocosamaniti cara nopogopae. ¹¹ Pingantimani pinguemisantina arota quero pairi jocagumirone cara piquemisanquina, aro náganëmi Jonogaguítequë, pintsibatëna, nomëmi ora caninarisonori. ¹² Ira agabeiro ora quimingari aisati yngantopiantinaro ora nococaqueri, nantimacagasanotëri cara itimi Tosorintsi, quero yogaguëmata cara parigotiquë. Aisati nasanguenaquero ichotaiquë iripajiro Tosorintsi irogóontëngani cara irianti irasi Tosorintsi; aisati intimaque iboeborotequë Tosorintsi Irorai Jerosarën ora paniënguichane Jonogaguítequë, irianti Jerosaresati; aisati nasanguenaquero nasi nopairo irorai ora irogóontëngani cara iriro nasi nomatsiguenga. ¹³ Aitica piguemita ora piquemanta, pinguemisantiro ora ocomantaiguëri quemisantatsiri Ora Isëre Tosorintsi’ ”.

Isanguenaquineri ira omisantaiguiri quemisantatsiri cara Iraoriseaquë.

¹⁴ Aisati icanquena Jesus:

—Pisanguenatineri ira omisantaiguiri quemisantatsiri cara Iraoriseaquë: “Ira Quirisito imoncaraquero ora icanque; te iromatobitëmate, iroonti icomantëgotëri Tosorintsi ora aisonori; aisati iparintacaro antagaisati ora yobetsiquë Tosorintsi. Iriro cantëmi: ¹⁵ ‘Nigótiro omagaro ora picanque. Pinguemisantasantërome ora nococaquemi, nosiacagantëmirore ora catsiringajari; pitsoinguëname, nosiacagantëmirore ora catsingajari. Carari nigóquemi cara te pinguemisantasantinaro ora nococaquemi, teatisati pitsoingasantina; iroro nosiacagantëmi sabogajari. ¹⁶ Quero picantaro sabogajari. Nógacaro catsiringajari aisati nógacaro catsingajari, carari teni naninte nóguimaro nija sabogajari oguicomaranguënanta. Carari te pinguemisantasantina teatisati pitsoingasantina, pican-caro pibega sabogajari. Iriro nojocaguëquemi tenta naniacananatimi. ¹⁷ Picantabeca obiro: “Naro asintasantaguetachari, ainta tojai naguireguite, teni nongoguitemaro paio-raca”. Obiro cantënguicha naniaquemi Naro cara picoguitiasantaca; nacantaneintëgotëmi; pogasëretasantaca, te pigótiri Tosorintsi. Aisa picantari ibega ira te iranee, picantari ira saacanari tenta ine iguitsagare. ¹⁸ Yamai nacanquemi: pabentina Naro nomëmi ora coguitiomotimi. Ira antapinintiri oro iniantacari tsitsiquë cara iritagüë ora cagari orosonori. Aisati naninti pingantimari oro, pijocajiro ora te ongomeite, piganinasëretima caninaribi. Aique aisonori psintasantëma. Aisati naninti naniacananatimi aisa nanganquima nanguitsagaantëmiro irorai quitsagarintsi cataro, quero pipasiquitaji. Yamai picomarajasëreti carari naninti nangaoguitimi, naniasanotagajimi arota pinguenguma aisa nacanta cara naquenga Naro, pigótasantina. ¹⁹ Iraegui nanintasanti nogomequeri, nagatingaqueri, natsipiriacaqueri arota quero icantagueti ora te onganinate. Iriro pijocaguëtajiro ora picantagueti te onganinate, ora quimingari, pingantajima yacaqueroa, pigótiri Tosorintsi, quero pitsoinguri. ²⁰ Pinguenguena aintana Naro sotoquë naratingopë, nacaimëmi. Aroca pinguemaquina, aro pingaagobëna, pobetsatobëna pigasobicobëna, pomabaquina noperi, aique popëgotobëna aro omatsiguengatobaquima. ²¹ Ira agabeiro ora quimingari aisati yngantopiantinaro ora nococaqueri, nagasobiaqueri iriro cara nigáanti intsibatëna nagáantomentaquë. Aro inganquina nibega Naro cara nagobiaqueri antagaisati quimingari, nisobiaque Pabatiquë nocobeingataiguë. ²² Aitica piguemita ora piquemanta, pinguemisantiro ora ocomantaiguëri quemisantatsiri Ora Isëre Tosorintsi’ ”.

4

Joan iniaqueri Tosorintsi aisati antiaspariegui.

¹ Aique naniaji aisati, nianasantëro jonoquë, tso magui, cara pasiriaca sitëcori. Naquema-jiri Iriati Ira naquemaque cani; inibatëna aisati icantaro pibega tiborentsi. Icanquena:

—Omana, pigainogopëma yaca Jonogaguitequë; noniaguëmiroti ora cantënguichane aiquenta.

² Aito cara pinasërequina Isëre Tosorintsi cara jonoquë. Aro naniopëri Tosorintsi isobiaque cara iragáantomentoquë. ³ Iriro tojai icoboriaguiteti aisa icantaro mopë coboriari ora jitacha jácipe; aisati icoboriati cantaca mopë quiraaro ora jitacha sarónise. Aintasati ógue ishoncaro iragáantomento, ira cantaro mopë caniari ora jitacha esemerara. ⁴ Aisati oshoncaro iragáantomento Tosorintsi tojai basini sobicomentotsi ocarati 24. Cara, isobicaigui 24 antiasipari caiguro iguitsagarepague catarosonori, aisati imatseicari oro. ⁵ Opaniaca iragáantomentoquë Tosorintsi ocanta moretatsiri, aisati cantaca tijiringa. Aisati catingasatiquë iragáantomento aiti obotagantsi ocarati 7, posigaro Isëre Tosorintsi. ⁶ Aisati catingasatiquë iragáantomento naniaquero ora cantaca angaare oquibe catiarisonorigu-inte. Aintasati niaguetsira caniari icarati itsibasati ishoncari Tosorintsi. Aiti iroquipague iniantaguetara iboroquë aisati aiti iroquipague itapiiquë. ⁷ Paniro icantari ibega secari; basini icantari sérari baaca; ira basini icantari matsiguengaporo; ira carantatsi icantari paguitsa aratsi.

⁸ Paniropague ira niaguetsi aiti ibanguipague ocarati 6; aisati piniri tojai iroquipague tso magui aisati sotoquë. Përosati cara icantocobentaiguirosi Tosorintsi cataguiteri quë aisati tsitiniri quë, te iromagoreimate. Icantopiantë:

—Icaninatasanoti, icaninatasanoti, icaninatasanoti Atingomi Tosorintsi. Iriro sintsirisonorigu-inte, te omomirintsitomotimari pairoraca; yagobeiri omagaro. Përosati cara icanta; jirai itimi, përosati ainta yamai, aisati aiquenta inganquima përosati.

⁹ Iroontita ira niaguetsira caratatsi itsibasati icantocotopiantëri Tosorintsi caninarisonorigu-inte, cara iniacaninatasantiri, cara icarasiaqueri cara itasorintsitanoti aisati cara igáanti caninasati Ira timatsi përosati, ¹⁰ iraequi 24 antiasipari yobaticagueritotasi-cari Tosorintsi iragáantomentoquë, itingomintasantaigacari. Yágaiguëro imatseiropague, yoguëneri iguitiquë Tosorintsi icantaiguë:

¹¹ —Nacarasiataiguëmi aroquenta pagobiaqueri antagaisati ira quimingari. Obiro caninarisonorigu-inte, Natingomi, Notosorintsite, caninatasantatsiri. Antagaisati ingantaiguëmi Obiro caninari aisati sintsirisonorigu-inte. Picantaiguëri antagaisati, pobetsiquëro omagaro ora inatsi, pobetsicanontaiguëri Obiati. Obiro caninari.

5

Joan icomantëgotëri Jesus cara icantari oisha.

¹ Aro naniaquero sanguenari ibacosonori quë Tosorintsi cara isobiaque iragáantomentoquë. Ipogoquero sanguenari opinaguiricaga ora osanguenataga tso magui aisati otisitaquë, opinaguiricaga otsinetaga onamiquë arota quero inetsiro pairiraca. Ocarati 7 cara itsinetëgotëro. ² Aique naniaqueri ironomire Tosorintsi, icantabeca catsigue, icanque:

—¿Pairiraca caninari intsineriajiro oca sanguenarica aique imonariajiro?

³ Nanetsabeca, te pairi ponariajiro. Te irinëmate pairiraca caninari inganquero, te Jonogaguitesati, aisati te quibatsisati, aisati te osobisati, te pairi ponariajiro teatisati iranetsero. ⁴ Nogasëreca niragasantaca cara naniaque te irinëmate paniro caninari imonariajiro aisati ingomantë ora ocanti sanguenari. ⁵ Aique icanquena paniro antiasipari:

—Aroque piraca. Pinetseri; ainta Ira ponariajiro sanguenari. Iriro icantari ibega secari agabeiro antagaisati, tojai igáanti. Iriro imatsiguenga Jorá, aisati imatsiguenga David atingomi jirai. Iriro antsineriajiro aisati imonariajiro.

⁶ Aique naniaqueri Jesus yosiacari itomijani Oisha catingasati quë Tosorintsi. Yariatianque aganguisati quë iragáantomento, aisati ira itsibasati niaguetsira caniari, aisati antiasipari. Oconijatajiri cara yogamagaiguëri jirai. Aisati aiti 7 itsei aisati 7 iroqui. Ora iroqui posigaro Isëre Tosorintsi Ora igáque potsatianquero quibatsi. ⁷ Aique iáque itiomijani Oisha iragáantomentoquë Tosorintsi, yáguëro sanguenari cara ibacosonori quë. ⁸ Aique ira itsibasati niaguetsira caniari aisati 24 antiasipari yobaticagueritotasitaigacari Oisha. Paniropague yágaiguëro ora cantaca áripa. Aisati ipogotaiguëro ora cantaca tsota obetsicaga oro. Ora tsota jagaca casangajengaro carari iroonti ora yamanocotaiguirosi Tosorintsi quemisantatsirijegui. ⁹ Icantabentaiguëri Oisha, irorai icántataiguë:

—Obironta caninarisonorigu-inte, caninataque páguero sanguenari, pintsineriajiro. Caninataque pingantiro aroquenta yágaiguëmi. Piraatobiqueri ora piraa omagaro matsiguenga, pipënabentaiguëneri ora icantagueti te onganinate, pogabisaicotaiguëri

matsiguengapague negaraca itimaigui quibatsiquë, pogabisaicotagarantaiguëri ira nibataguëtiro basinipague nibarintsi. ¹⁰ Pipegaiguëri itingomipague intsi-bataiguëmari Tosorintsi cara igáanti, intingomibintaiguëri matsiguenga timaigatsi quibatsiquë. Aisati pipegaiguëri saserirotipague, irinibabentaiguëri matsiguenga arota Tosorintsi iromitocoiguëri iriro.

¹¹ Aique naniaiguëri tojaisonoriguente ironomire Tosorintsi irisaanganetsite ishongaigacaro iragáantomento Tosorintsi aisati ira itsibasati niaguëtsira caniari aisati 24 antiasipari. Aisati naquemaiguëri ¹² cara icantaiguë catsigue:

—Icaninatasanoti Ira Oisha yógaiguë matsiguenga; Irianti caninarisonoriguente. Irironta agabeiro omagaro, yasintaguetaro antagaisati, omagaro igótasanti, isintsitanoti, aro intsome angantocotaiguëri: “Obiro cobeingarisonori, naniacaninatasanotëmini, natingomintasantëmini Obironta caninarisonoriguente”.

¹³ Aisati naquemaiguëri omagaro ira yobetsicaiguë Tosorintsi, antagaisati inatsi Jonogaguëtequë, aisati irægüi inatsi quibatsiquë, aisati omagaro inatsi osobiquë (ira camaguënguitsi), aisati inaigatsi angaarequë, icantaiguë:

—Intsome angantocotaiguëri Tosorintsi aisati Iroishate: “Atingomintaigacari, aniacaninatasanoguëri Irironta caninarisonoriguente aisati isintsitanoti përosati”.

¹⁴ Icantaguë ira itsibasati niaguëtsira caniari:

—¡Aro negaca!

Aique irægüi 24 antiasipari yobaticagueritotasitaigacari Tosorintsi catimanagerisonori, icaninabentaiguëri yamanocoiguëri përosati.

6

Itsineriajiro Oisha sanguenari.

¹ Aique naniaqueri Jesos Iroishate Tosorintsi cara itsineriajiro ora obatatsi cara itsinetiro sanguenari. Aisati naquemobëri paniro ira niaguëtsira caniari inibatanë catsiguesonori cantaca tijiringa icanquena:

—Omana, pinetsapë.

² Nanetsapë, naniaqueri mora catari iqueicotari sërari ipogoquero ibiane. Aique ipëri imatseiro, iáque ibaqué aisati irobotanëri, iragabeiri ira pëgaquimarine. ³ Aique itsineriajiro basini cara itsinetiro sanguenari. Naquemaqueri basini niaguëtsira caniari icanquena:

—Omana, pinetsapë.

⁴ Isotocanë basini mora, tsonatairingari, aisati ira quijëgotari. Ipëri oquibe isabirite. Icanquengani:

—Yamai pogometiri matsiguenga iromanátobaguima irógabaguima aro irobaqueri ira óguërineme.

⁵ Aique Ira Oisha itsineriajiro ora maba cara itsinetiro sanguenari. Aro naquemaqueri ira basini niaguëtsira caniari icanquena:

—Omana, pinetsapë.

Aique nanetsanaque naniaqueri mora tsitari ira quijëgotari ipogoquero iromoncaraminto tinari. Iromoncaraquero perintsi ora pënatacha tojai tenta ine tojai. Iritasegaiguë matsiguengajegüi. ⁶ Naquemobëro nibarintsi aganguisati cara inaigasegüi itsibasati niaguëtsira caniari ocanque:

—Aroca intarobacaquë sërari poro cataguëteri aro iromanantë iraperi, patiro quiro tirigo queroca maba quiro sebara; carari ira asaiti aisati obaa cochoari quero yamanantiro queronta cotonguiboro iguireguite.

⁷ Cara itsineriajiro ora otsibasati cara itsinetiro sanguenari, aro naquemaqueri carantatsiri niaguëtsira caniari icanquena:

—Omana, pinetsapë.

⁸ Aique naniaqueri mora irironianti cateriri ira quijëgotari ijita Camagantsi. Icamaiguë arosonori matsiguenga piáiguë isère osobiquë. Aique icanqueri:

—Pijátë pigamagaiguëri tojaisonorini matsiguenga, 1/4 ira inaigatsi quibatsiquë.

Aro irógobaganëma matsiguenga sabiriquë; basini águëri itasegane ingamaiguë; basini irianaitë ingamaiguë; basini iritsongaiguëri secaripague.

⁹ Aique Ira Oisha itsineriajiro ora pabocorooti cara itsinetiro sanguenari. Aro naniaquero itagantaro casangajengaro ocantaro mesa. Osobi cara, naniaquero isërepague ira quemisantatsiri ira yogamagaiguë icomantanqueronta Irinibare Tosorintsi. ¹⁰ Icantaguë catsiguesonori:

—Natingomi caninaribi, përosati cara picantiro ora aisonori. ¿Ati ongantima pingomantëgotaiguëri quibatsisati ira agamagaiguëna? ¿Ati ongantima pinguisëcobaiguëna?

¹¹ Aro ipaguetaiguëri iguitsagarepague cataro, icanqueri:

—Pinobènta pomagoriobènta irooti cara iragamagaiguèri basini popiguemisantane carantatsiri.

¹² Cara itsineriajiro Oisha, yamai ocarati 6, posebatastantanaca omagaro quibatsi aisati jonoquè. Aro ira paba itsitinitasantanè icanaca tsimenguito, iriroqueraì manchacori iquiraaasantanè icanaca araatsi. ¹³ Aisati ira jonogasati iparigaguetanè quibatsiquè icanacaro manco tsooroquiuro cara pobariguero ora coguentimà sintsiro. ¹⁴ Iroquoè jonoquè opeganaca ocanacaro paperi opinaguiricaga. Aisati pogagaguetanaca oguitojapague aisati oboguesipague. ¹⁵ Aisati naniaiguèri cobeingaripague itingomi matsiguenga aisati ibingatsaritepague soraro, aisati itingomipague, aisati asintaguetachari, aisati ira te iras-intèmatima, aisati ibatorote aisati iratirite, omagaro naniaiguè isigaiganaca aiquero oguitojapaguequè cara pini omoropague imánaigapa itsorogasantaguènta. ¹⁶ Icantocotaigapèro oguitoja aisati mopè:

—Pomarigopè piteina pománaiguena arota quero ineina Tosorintsi aisati querota itsipiriacagaiguina Iroishate. ¹⁷ Yamai iguisaiguèna antagaisati naroequi cara iripoguiriaiguèna.

7

Isanguenaquero iripajiro Tosorintsi ichotaiquè imatsiguenga Isirael.

¹ Aique naniaiguèri ironomire Tosorintsi irisaanganetsite icarati itsibasati, yaratianque paniropague cara ocaraguiteti quibatsi, ira aguimairenquero coguentima arota quero ocoguintimati quibatsiquè, querootisati angaarequè, querootisati anchatosiquè. ² Aisati naniaquero basini irisaanganetsite iquenopè cara iconteteti paba. Yamapèro ora irisanguenatanquimari ichotaiquè matsiguenga iripajiro Tosorintsi catimanageri, irogóontè mari cara iriro irasi Tosorintsi. Ica ironomire icaimè sintsisonorri icanqueri basini itsibasati irisaanganetsite ira tsonguèrone aiquenta quibatsi aisati angaare. Icanqueri:

³ —Queroquerainta pitsonguètarò quibatsi, angaare, anchato, omagaro: naguibatobèrianta irasi Tosorintsi nasanguenaquero iripajiro Tosorintsi ichotaiquè ira quemisanqueroi Tosorintsi.

⁴ Aro nauquemaque cara icarati ira irisanguenachotaitaga: icarataigui 144,000 quemisantatsiri imatsiguenga antagaisati itomipague Isirael. ⁵ Aro isanguenachotaitaiguèri 12,000 imatsiguenga Jorá; aisati isanguenachotaitaiguèri 12,000 imatsiguenga Irobén; aisati icarataigue 12,000 imatsiguenga Gara; ⁶ aisati icarataigui 12,000 imatsiguenga Aser; aisati 12,000 imatsiguenga Nejatari; aisati 12,000 imatsiguenga Manasés, ⁷ aisati 12,000 imatsiguenga Simeón, aisati 12,000 imatsiguenga Irebí, aisati 12,000 imatsiguenga Isacar, ⁸ aisati 12,000 imatsiguenga Saborón, aisati 12,000 imatsiguenga José, aisati 12,000 imatsiguenga Benjamín.

⁹ Aique naniaiguèri tojaisonorri matsiguengapague, tigueti ingantima irogócoitiri atiraca icarataigui. Ipaniaigaca parigotipaguequè, inibataiguero basiniatipague nibarintsi. Icaiguèro iguitsagare cataro, ipogotaiguèro chorinasi, yapatobiritaigacari catingasatiquè Tosorintsi aisati Ira Oisha. ¹⁰ Icaimaiguè catsiguesonorri icantaiguè:

—Yogabisaicotaigacái Tosorintsi Ira sobigasegatsi iragáantomentoquè Irirò aisati Iroishate. ¹¹ Antagaisati ira irisaanganetsite yaratingaiguè ishongaigacaro iragáantomento Tosorintsi aisati ira 24 antiasipari aisati ira itsibasati niaguetatsira caniari, iparigaiguè quibatsiquè yaquitomotaigaca catingasatiquè Tosorintsi icaninabentaiguèri, itingomintaigacari, ¹² icantaiguè:

—¡Aro negaca! Icaninatasanoti Otosorintsite, igótasanoti omagaro, yagobiaquero antagaisati isintsitasantotinta. Caninataque antingomintimari, aniacobeingatasantiri, aniacaninatasantèri, angarasiasasantèri Irironta caninarisonoriguinte pèrosati. ¡Aro negaca!

¹³ Aique yosamitèna paniro antiasipari:

—¿Pari iraegui caiguero iguitsagare cataro? ¿Nega ipaniaigaca?

¹⁴ Notabitanèri nacanèri:

—Taa. Obiro ogótatsi.

Icanquena:

—Iraegui irianti atspiriaigabitènguicha jirai oquibeguintequè atspiriaigantsi, carari aroquenta iquemisantaiguèri Quirisito Iroishate Tosorintsi cara icamobiquero iraraatanèneri, aro yosaasèretaiiguèri Tosorintsi. Aisa ocanta itsagantaigacaro iguitsagare iraraa Jesoquisito, iroro oquètetaguèque. ¹⁵ Iroro inaguèque catingasatiquè iragáantomento Tosorintsi, icantaguetaiguèneri pèrosati cataguteriquè aisati tsitiniriquè cara ibangoquè Ira sobiaquenguitsira cara igáanti, Irirò cábinsaiguèrine intsibataiguèmarinta. ¹⁶ Quero itsipiriraja, quero icogajaro iraperi, querootisati imiretai. Querootisati yoragaari paba, querootisati imasobitaji irirojegui. ¹⁷ Pèrosati iromisantaiguèri Ira Oisha sobiaquenguitsi itsibatari

Tosorintsi iragáantomentoquë. Irro omisantaiguërine ingantacaquimari iroishate, aisati irágaiganaqueri cara nijaaquë caninajaro caniatacagantatsiri. Itsibataigacarinta Tosorintsi quero pinai araagantsi.

8

Ira Oisha itsineriajiro ora carantatsiri; aisati tiborentsi ocarati 7.

¹ Cara itsineriajiro ora carantatsiri cara itsinetiro sanguenari, omaireguitetanë Jonoga-guitequë cosamanisata.

² Aique naniaiguëri irisaanganetsite Tosorintsi icarati 7 yaratingaiganaque aro ipaiguënganiro tiborentsi. ³ Aique ipogopë basini ironomire Tosorintsi, ipogoquero iritagamento casangajengaro iroonti obetsicaga oro. Inapë catinasati cara itagantariquë. Ipënganiro tojai casangajengaro iritaguëro catinasatiquë Tosorintsi; intsibatanquimaro cara yamanocotiri Tosorintsi quemisantatsirijegui. ⁴ Pogainocanaca Tosorintsiquë ogatsiare casangajengaro oconaganacaro managantsi irasi quemisantatsiri. ⁵ Aique ira irisaanganetsite yáguero iritagamento iaquero tsitsimenguü opaniaca itagantaroquë, yáguëro imionguëro aiquero quibatsiquë. Cara oparigopë quibatsiquë pomanátanaca otiiringanë, aisati posebatanaca. ⁶ Aique yobetsicaiganaca ira 7 ironomire Tosorintsi cara intibotaiguëro itiborepague.

⁷ Aique itibotanë ira obatatsi, aro opariganë quibatsiquë iringue oconagaro araatsi aisati pamari ora tagarantëro arosatapague (1/3) quibatsi aisati 1/3 anchatosi, aisati pitaquero antagaitsati tobarispague. ⁸ Aique itibotanë ira basini, aro opariganë oquibequë angaare osigaro oguitoja pamaro. Cara oparigopë angaarequë opeganaca araatsi oquiraajata-garantanë 1/3 angaare. ⁹ Aisati icamagarantaiguë 1/3 iraugui inatsi angaarequë, aisati 1/3 oquibe pitotsipague pitsinagarantaca. ¹⁰⁻¹¹ Aique itibotanë basini irisaanganetsite Tosorintsi ira mabapënguisti, aro ipariganë poro jonogatsi jitacha Quibisiri. Ipamasoncoitanë, aique ipariaque nijaapaguequë yoguebisiataguepëro 1/3 nija aisati cara picontiataguëti nija. Cara yógaigacaro matsiguenga ora nija quibisiari, icamaiguë tojai matsiguenga. ¹² Aique itibotanë ira itsibasatipatsi ironomire Tosorintsi. Aro itsitinitagarantaguëtanë paba aisati manchacori aisati jonogatsijegui, 1/3 itsitinitanë. Te irobarianae paba 1/3 cata-guiteri. Aisati 1/3 cara tsitiniriquë te irosanguetanae manchacori. ¹³ Nanetsanaque nani-aqueri iguibe paguitsa yaranaque aganguisatiquë Jonogaguëte, icanque catsiguesonori:

—¡Aaaii! Ati ingantaiguëma matsiguengajegui timaigatsi quibatsiquë cara iratsipiriasan-otaiguë cara intibotaiguë ira mabanibaniquerai irisaanganetsite Tosorintsi.

9

Ora mabanibati tiborentsi carantatsiri.

¹ Aique itibotanë ira pabocorootipatsi ironomire Tosorintsi. Aro naniobëri jonogatsi aroquë iparigopë quibatsiquë. Ipënganiro irasirramento irasirianquimaro ora omoro játatsi tsomaguisonorinta. ² Aique yasiriapëro ora omoro. Ora pisotocanë catsiari oquibeguïn-tesonori. Ora catsiari pitsitinitanëro jonoquë aisati paba. ³ Cara pisotocanë catsiari aisati isotocaiganaque tsintsetiniro yaraguitetanë omagaro quibatsiquë. Icantaiguëngani cara irógabaguëteri matsiguenga ingantacatsigatëmari quitoniro. ⁴ Aisati icantaigabaqueri:

—Quero ati picantaguëtiro tobarispague, querootisati anchatosipague, querootisati ibanguiresi matsiguenga. Patiro pitsipiriacaqueri matsiguenga ira te irisanguenatimaro iripajiro Tosorintsi cara ichotaiquë. ⁵ Nococagaiguëmi piniacatsigatagaiguëmari anta-gaisati ira te inguemisantina irooti cara ingaraque pabocorooti manchacori, carari quero pogamaguëri.

Aro iniacatsigataigacari aisati icanta cara yóganti quitoniro, catsirisonoriguinte. ⁶ Ingogaigabitëma matsiguenga ingame carari quero icami. Tigueti ingantima ingame; quero isigopitaro catsiro. ⁷ Ira tsintsetiniro icantaigari mora cara yobetsiquiri casintari iriátë iromanátobaguëma. Cara iguitoquë yogaro cantaca imatseiro irianti oro. Ora iboro cantaca matsiguenga. ⁸ Ora iguisci cantaca oguisci tsinanane; ora irai cantaca irai secari. ⁹ Cara ineiquë yogaro coshotaquiro yotigantaro irosataamento aisati ichaapite. Aintanta tojai tsintsetiniro, cara yaraiganaque ora ibanguijegui ocatsiguëtanë cantaca tojaisonorori mora cara isigaiganaca inosiquëneri igarone soraro iraugui omanátaigacha. ¹⁰ Ora iguisci cantaca iguisci quitoniro aintanta itsei aisati igatsijare ora irógantaguequimari ingaraque pabocorooti manchacori. ¹¹ Ainta itingomi tsintsetinirojegui. Cara irinibarequë jorío ijita Abarón; irinibarequë guiriego ijita Aporión ora ocanti aguimingatiro ora caninaro. Ica irianti iromeraro camagarisonori. ¹² Abisaque obatatsi atsipiriagantsi; carari pitenibati cara intibotë basini pite irisaanganetsite.

¹³ Aique itibotanè basini ironomire Tosorintsi. Naquemobèro nibarintsi opaniaca otseiquè itagantaro casangajengaro obetsicaga oro ora inatsi catingsatiquè Tosorintsi. ¹⁴ Inibatèri ira tiboquero tiborentsi icanqueri:

—Popabaquèajiri ira itsibasati ironomire Tosorintsi yoguèshotiaque yoguè cara oquibi-aquè nija jitacha Eoparates.

¹⁵ Aro yapabaquèaigairi ira itsibasati ironomire Tosorintsi cara irógarantèri 1/3 anta-gaisati matsiguenga yobetsiquèrinta cara irógantè cara omoncaraquima osarini aisati manchacori aisati cataguitèri aisati negaraca irinasegue paba. ¹⁶ Ainta tojai soraro quijègotaigari imoraneegui icarati 200,000,000. ¹⁷ Aique naniaquero ora cantaca quisanitangantsi carari nagaguitaga. Iniacaquehenari Tosorintsi ira mora tojai aisati ira quijègotaigari. Ira soraro yogaigacaro ineiquè coshori quiraari aisati quisaari aisati cateriri. Ora iguito ira mora icantaro iguito secari. Cara ibagantequè pisotocanèri tairingasantachari, catsiari, aisati asopire ora ojenga camanijiantatsi otojetacagantatsi. ¹⁸ Oca mabati agamagantatsiri sotocanèri ibagantequè mora, tairingasantachari aisati catsiari aisati ojenga asopire, pogamagagarantaiguèri 1/3 antagaisati matsiguenga. ¹⁹ Iroero yógantari matsiguenga mora, ora ibagante aisati iguisí. Ora iguisí posigari marangue, ira itsigantari matsiguenga.

²⁰ Carari ira matsiguenga ira te ingamantimaro tsitsi ora sotocanèri mora, te irojo-caiguero cara icantaguetiro ora te onganinate, teatisati irojocaiguero cara iqemisanqueri camagari, teatisati irojocaiguero cara yamanocotiri ibabane, iriantí yobetsiquè matsiguenga, irianti oro aisati quirequi aisati mopè aisati anchato. Ibabane te iranee, te ingueme, te iranèite, carari te irojoquiri. ²¹ Aisati te irapabaquèaiguero ora icantagueti te ongomeite, pèrosati cara yógboga, pèrosati imatsitaguetiri matsiguenga yamatobiantacari imatsine, aisati te irojocajiro cara intiro tsinane ora cagaro iina aisati ontiri sèrari ira cagari ojime, teatisati irapabaquèaiguero cara icositanti.

10

Ora sanguenari comantègotèro ora cantènguichane aiquentata.

¹ Aique naniobèri basini sintsiri irisaanganetsite Tosorintsi yaguèpè cara Jonogaguitequè iquenantaparo mingori inèri ógue jonoica iguito. Ora iboro ocancari paba cara yobareí. Ora ibenapague cantaca cara pitairinga tsitsi. ² Ipogotiro otiomijani sanguenari otimiaga, yagaticaantacaro oquibe angaare ora iguitisonori, iroroque basini iguiti yagaticancaro quibatsi. ³ Aique icaimanè sintsi icantari cara icaimi secari. Cara icaimanè, naquemobèro cara otiiringanè ocarati 7. ⁴ Aroqueque otiirianneque 7, pènibaque nasanguenaquerome onibare, carari naquemobèri paniro aiquero jonoquè inibatànè icanquena:

—Quero pisanguenatiro ora pinibatè tijiringa, pomániro.

⁵ Ira irisaanganetsite Tosorintsi ira oguèro iguiti angaarequè aisati quibatsiquè itinaaquero ibacosonori aiquero jonoquè ⁶ icanasantanè aisonori:

—Aisonori itimi Tosorintsi catimanageri, Ira obetsiquèro omagaro: Jonogaguite, quibatsi, angaare aisati omagaro ora inaguetatsira. Quero ocosamaniti ⁷ cara omoncaraquema cara intibotèro itibore ira carantatsi ironomire Tosorintsi. Aique omoncaraquema ora imánaque Tosorintsi jirai cara icomantègotèri comantantatsiri jirai.

⁸ Ira naquemaque aiquero jonoquè aisati yogatsitaina inibataina icanquena:

—Pijáte páguiro otiomijani sanguenari ipogosisuinta irisaanganetsite agaticaquero angaare aisati quibatsi.

⁹ Aique níaque aiquero irisaanganetsitequè namanopèri imenaro sanguenari. Icanquena iriro:

—Jeroca, páguiro, popero. Cara pobagantequè omochatanè onganquima pitsia, carari cara pisegotuquè onguebisitanè. Aisa onganquima caninaro Irinibare Tosorintsi carari ogótacagaiguèmi cara iratsipiriasantaiguè matsiguenga aiuenta.

¹⁰ Aique náguèro sanguenari otiomijani ora ipogosisui irisaanganetsite, aro napèro. Cara nobagantequè opochatanè ocanaca pitsia. Cara nitsonquero napèro aro nasegotuquè oquebisitanè. ¹¹ Aique icantaiguèna:

—Aisati yamai pingomantègotiro atiraca ingantaiguèma aiuenta matsiguengapague negaraca itimi aisati pairoraca irinibare aisati pingomantègotiri itingomipague.

11

Ira pite comantègotèri Tosorintsi.

¹ Pèrosati naniaquero ora cantaca quisanitangantsi carari nagaguitaga. Aique ipènaró anchaqui cantaca ora imoncaraanta. Icanquena:

—Pijáte pomoncaratiro ora oquibe ibango Tosorintsi aisati itagantaro casangajengaro. Aisati pigócoitiri cara ati icarati ira quemisantatsi. ² Carari quero pomoncaratiro ora iranguitêire sotoquê iroontinta irasi basiniati matsiguenga ira cagari jorío; iranêitagueetanê cara Jerosarénquê iraguimingatêro tojai manchacori ingaraque 42. ³ Naroquerai agáquerine pite comantêgotênane inganaquero oquibepiriga manchaguints tsitaro. Inguenguitsato-coquina 1,260 catagueri. Inguenguisatomotaguequi matsiguenga: “Pijocajiro ora picantagueti quimingari; quero pogatsitairo aisati; pingantajima yacaqueroca; pintimaje caninasati”. ⁴ Ica pite comantêgotênane irianti cantaro pite anchato jitacha olibo, aisati icantaro pite obotagantsi ora oguënguicha catingasatiqê Atingomi casintaro omagaro quibatsi. Ingomantêgotasantêna pinancarinta Isêre Tosorintsi, aisati ogótacaqueri ora aisonori.

⁵ Aintaca inguisêri iraninque iróqueri, osotogaiganaqueri pitirooti pamari ibagantequê iritagasantêri ira quisêrine ogamagaiguëri. ⁶ Cara ingomantasegue iragabiauqueri Tosorintsi arota quero oparigaji angani iroontita irinibatocoqueri Tosorintsi. Aisati iragabiauqueri Tosorintsi cara omeganaima nija araatsi, aisati cara iratsipiriacagaiguëri quibatsisati pairoraca. ⁷ Cara iritsonguêro cara ingomantêgotêri Tosorintsi, irarequimari cobeingariniro quimingarisonoriguinte imaniapêma omoroquê játatsi tsomaguisonorinta. Inguisapêri iragabiapêri irógopêri. ⁸ Ira igamaga irinariaguequima aganguisatiqê poeboro, cara ipêicotaiquëri Atingomi jirai Jerosarénquê ora cantacaro Soroma aisati ocancaro Ejípito. ⁹ Maba catagueri aisati catinganeni, iranaiaguëri igamaga tojai matsiguengapague ipaniaigaca parigotipaguequê, ira nibataiguero basiniatipague nibarintsi. Quero inintacaguiri iteiri. ¹⁰ Antagaisati ira timaigatsi quibatsiqê inganinataiguê cara ingamaque comantantatsiri, aro imasitobagaguetanêma pairopagueraca queronta iquemajiri comantêgotiri Tosorintsi. ¹¹ Cara omoncaraca maba catagueri aisati catinganeni Tosorintsi icabiriqueri itimacagajiri. Aro yaratingaigai aisati. Antagaisati ira niaiguëri itorogasanotanê. ¹² Aique iquemaiquê aiqero Jonogaguitequê Tosorintsi icanqueri pitirooti:

—Omana pigainocaigapaima yaca.

Aique yogainocanaca Jonogaguitequê, cara iniaigaseguiri ira quisaigabitacari. ¹³ Cara yogainocanaca posebatasantanaca quibatsi pitêagueetanê arosatapague (1/10) pongotsi Jerosarénquê, aisa icamaiguê 7,000 matsiguenga. Ira matsiguenga inanaatsi yamanocotaiganaqueri Tosorintsi inatsi Jonogaguitequê. ¹⁴ Yamai pabisanaque basini atsipiriagantsi, carari coraque basini.

Intingomintaiquëmari Quirisito omagaro cara itibotêro tiborentsi carantatsi.

¹⁵ Ira carantatsi irisaangantsite Tosorintsi itibotanêro itibore. Oquemobêngani nibarintsi aiqero cara Jonogaguitequê icanque catsigue:

—Yamaica intingomintaiquëmari Atingomi omagaro quibatsisati, intingomibintaiquëri irooti përosati. ¹⁶ Aique ira 24 antiasipari sobicaiguënguisti irisobicomentoquê catingasatiqê Tosorintsi yaquitomotaiganaca quibatsiqê yamanocotaiguëri icaninabentaiguëri ¹⁷ icantaiguëri:

—Nacarasiataiquëmi, Natingomi Tosorintsi pitingomibintasantanênta, pigabeiro antagaisati; ainta Obiro yamai, pinênta jirai, quero popasiniaititi përosati. ¹⁸ Iguisaigabitêmi matsiguengajegui, iroto cantênguicha yamai pingasitígataiguëri irirojegui aisati pingomantêgotaiquëri ira camabitênguicha. Aisati pomaiguëri ora caninaro ira comantêgotêmiri, aisati quemisantatsiri aisati ira niacobeingatimi jemita itingomi, aisati jemita ira cagari itingomi. Carari popoguiriaguëri ira atsipiriacagaiguëri matsiguenga aisati ipoguiriaguëri.

¹⁹ Aique pasirianaca oquibe ibango Tosorintsi inatsi canta jonoquênta, aro oniaquengani cajón cara pini Irinibare Tosorintsi osanguenataga. Aro posebatanaca, pomanátanaca, pinibaguitetanê, otiirnganê, aisati opariganê oquibe iringue.

12

Ira sogoroniro iguisêro ora tsinane.

¹ Aique naniaquero ora cantaca quisanitagantsi carari nagaguitaga. Naniaque cara oconijaque tsinane cara Jonogaguitequê oquitsagantacari paba, pagatiquëri manchacori, omatseicari jonogasati icarati 12. Naquenganeintasantacaro. ² Opênibasigui, pênibaque ontsomaaque, otsiaca aro ocaimê:

—Ayabe, ayabe.

³ Aisati naquenganeintasantaca cara iconijapê cara Jonogaguitequê iguibeguinte sogoroniro quiraari. Ocarati iguito 7, aisati itsei 10, aisati imatseica 7 imatseiro. Irianti Sathanás, iguisaiguëri antagaisati ira quemisanqueri Tosorintsi. ⁴ Iguisiquê inosicargarantapêri

tojaisonori jonogasati, imiongaiguèri quibatsiquè. Yaratingopè aronisati catingasatiquè tsinane yoguiaquero cara ontsomaaqueri Otomi arota iraagabaqueri. ⁵ Aro otsomaaqueri Otomi, Ira tingomibintasantaguèrine antagaisati matsiguengapague, iragabeiri omagaro, quero ipègatsatari pairiraca. Otomi Irianti Jesus. Tosorintsi imabocapari iguibe sogoroniro, yágabitsaqueri Janequi, yáganèri jonoquè yogasobiaqueri iragáantomentoquè. ⁶ Pisiganaca tsinane canta tenta ontimingani cara aroque yobetsiquènero Tosorintsi, iromisanquero imèro operi cosamani ocaratí 1,260 cataguitèri.

Yomanátobaca canta Jonogaguítequè.

⁷ Aique canta Jonogaguítequè naniaqueri Miguel, itingomi irisaanganetsitejegui Tosorintsi, aisati itsibataigari ironomire Tosorintsi yomanátobaca iguibe sogoroniro aisati omagaro igamagarite itsibataigari iriro. ⁸ Ipègataigacari sogoroniro aisati igamagarite carari Miguel yagobeiri ⁹ ijocaguèri cara Jonogaguítequè irooti quibatsiquè ira sogoroniro iguibe aisa jirai ijita marangueniro irinaga aisati Satanás ira camagari matobitaiguèri quibatsiatiegui. Ijocaguèngani quibatsiquè iriro aisati antagaisati igamagarite ira icarataigui. ¹⁰ Aique naquemobèro nibarintsi catsiguero cara Jonogaguítequè icanque:

—Yamai Tosorintsi yogabisaicotaigari iraisati, yagobiaqueri omagaro pègatachari, isintsitaqueri iraisati aisati itingomibintasantaguèri Iriro aisati Quirisito aroquenta ijocaguèri ira camagari cara icantocotaiguèri opiguemisantaneegui catingasatiquè Tosorintsi, icogabeca iratsipiriacaigari aisati ingantacaguiro ora te onganinane. Icantocotaiguèri pèrosati, cataguitèriquè aisati tsitiniriquè. ¹¹ Carari ira quemisantatsiri yagobiantacari iraraa Quirisito Ira Oisha camobitaiguèri matsiguenga. Aisati yagobiantacari ora inibatègotèri Quirisito aisati cara iquemisanquero Irinibare Tosorintsi te intsorogue cara ingamobiqueri Quirisito. ¹² Aro pinganinataigae obirojegui timaigacari Jonogaguítequè. Carari pitsipiriasantaiguè obirojegui quibatsisati aisati angaaresati; inguisasantaguèmi camagari aroquenta yaguètasiquemi aisati igóti cara quero cosamani itimi quibatsiquè.

Ira camagari iguisabitacaro tsinane.

¹³ Cara yaguèque sogoroniro quibatsiquè tojai iguisapèro tsinane ora tsomaaqueri Otomi. Yoguiatèro icantagueitèro catsimari. ¹⁴ Carari itasonguèro Tosorintsi ipèro pite obangui cantaca ibangui iguibe paguitsa ora parantanaca pisigopitanacari marangueniro cara tera ontimingani cara Tosorintsi imèro operi maba osarini aisati agangusati basini. ¹⁵ Aique yomigontiatèro oquibe nija opaniaca ibagantequè sogoroniro, icogabeca cara áganèrone tsinane nija ¹⁶ carari omitocoquero tsinane ora quibatsi. Pitsiraanè quibatsi págobèro omagaro nija ora ijocabeca sogoroniro. ¹⁷⁻¹⁸ Aique iguisasantabitacaro tsinane sogoroniro, íatasitaiguèri omatsiguenga, iromanátaigapèmarí ira quemisantaguèro Irinibare Tosorintsi aisati iquenguitsatocotaiguèri Jesus.

13

Joan icomantègotèri pite cobeingariniro quimingarisonori.

¹ Aique yaratianque sogoroniro cara onamijaquè angaare. Aro naniobèri cobeingariniro quimingarisonoriguinte icontetapè cara oquibequè angaare. Aiti iguito ocaratí 7 aisati 10 itsei imatseia imatseiro. Patiropaguequè iguito osanguenaca iripajiro ora cantègotagueetasitari Tosorintsi. Ira cobeingariniro quimigari irianti matsiguenga iguisèri Tosorintsi ipègatari icantocotagueetasitari. ² Icantari ibega secari; ora iguiti ocantaro iguiti maini; íbagante ocantaro irasi iguibe secari. Ira sogoroniro (Satanás) yagobiaqueri, ipèri iragáantomento, icanqueri itingomibintaiguèri matsiguenga. ³ Aique naniaquero patiro iguito amasitasantaga ocamaque, carari pibeganaa ocianatanaí. Cara igótocoiguèri oca omagaro matsiguenga iquenganeintasantaigacari ira cobeingariniro, yoguiataiguèri. ⁴ Aisati itingomintaigacari sogoroniro ira pèri cobeingariniro quimingarisonori iragáantomento. Aisati itingomintaigacari ira cobeingariniro yamanocotaiguèri icantocotaiguèri:

—Quero ini basini cantaca ica. Querojengari pairi agabeiri ipègatari.

⁵ Tosorintsi inintacaqueri cobeingariniro quimingarisonoriguinte ingantocotagueetasitimari Tosorintsi 42 manchacori. ⁶ Aro icantocotagueetasitari Ira Tosorintsi aisati iripajiro aisati ibango aisati antagaisati ira timaigatsi Jonogaguítequè. ⁷ Aisati inintacaqueri iromanátaiguèri omagaro ira quemisantatsiri iragabeiri; inintacaqueri intingomibintaiguèri antagaisati matsiguengapague ipaniaigaca parigotipaguequè inibataiguro basiniatipague irinibare. ⁸ Omagaro timaigatsi quibatsiquè itingomintaigacari cobeingariniro quimingarisonoriguinte yamanocotaiguèri. Paniro ira quemisantari Tosorintsi te intingomintimari. Cara terai irobetsiquero ora quibatsi Tosorintsi, igótocoqueri antagaisati ira quemisanquerine, isanguenatocoqueri iripajiro isanguenarequè Iroishate Tosorintsi cara ingamobitaiguèri matsiguengajegui.

Ira basini cobeingariniro.

⁹ Aitica piguemita ora piquemanta, pinguemisantiro oca nasanguenaquimica. ¹⁰ Ira omianqueri basini, iriro aisati iromianquengani. Pairiraca óganquenguitsine basini sabiriquë, iriro aisati iróganténganiro sabiri. Aro yamai Tosorintsi icocagaiguëri quemisantatsiri cara përosati inguemisantangaanaque iratsipiriobentaiguëri Tosorintsi. ¹¹ Aique naniobëri basini cobeingariniro, irianti matobiantatsiri igomantantatsirite ira quimingarisonoriguinte, ipaniaca quibatsiquë icontetapë. Aisa icantari ibega Oisha aitinta pite itsei carari inibatë cantaca irinibare sogoroniro camagari. ¹² Tojai itingominta aisati icantari ibega cobeingariniro quimingarisonoriguinte ira obatsati, ira amasienguicha iguitoquë ocamaque. Icantaiguëri omagaro quibatsisati:

—Pintingomintimari ira amasienguicha iguitoquë, pinganinabentiri, pomanocobintaiguëri.

Aro icaninabentaiguëri, itingomintaigacari ira obatsati. ¹³ Aisati itasongagueque tojai ora te oneingani jirai. Aisati iniaigabaqueri matsiguenga cara yobariaquero ora pamari canta jonoquë irooti quibatsiquë. Icantaneintasantaigacari. ¹⁴ Itasonganti catingasati cobeingariniro quimingarisonoriguinte ira obatsati, aro yamatobitaiguëri tojai matsiguenga ira timaigatsi quibatsiquë. Icantaiguëri matsiguenga:

—Pobetsiquero irosiacagemento ira obaquina ira icaraque sabiriquë icaniatanai.

¹⁵ Aro yosiacagantaiguëri. Aique ira igomantantatsirite itasonguëro yoganiatëro aisati inibataquero aisati ora irosiacagemento pogamagaiguëri iraeui te iroboticageritot-asitimaro. ¹⁶ Aisati icantaiguëri cara irisanguenatëgotaiguëri omagaro matsiguenga. Isanguenaquero iripajiro cobeingariniro quimingarisonoriguinte cara ibacosonoriguë aisati ichotaiquë omagaro matsiguenga; itingomipague aisati iraeui cagari itingomi; ira casintaguetchari aisati ira te irasintaguëtëmätima, aisati ira meratari iromeraro aisati iromerataga; isanguenaqueri antagaisati. ¹⁷ Teca irisanguenatima pairiraca matsiguenga ora iripajiro quimingarisonori ora inómerote, quero ipimantiro pairoraca querootisati yamanantiro pairoraca.

¹⁸ Caninataque pigóiguero ora nongomantaiguëmi yamai, pigóontimaro inómerote cobeingariniro quimingarisonoriguinte. Iroonti inómerote matsiguenga, ocarati 666. Obirojegui quemisantatsiri, pigamaiguemari iriantinta matsiguenga matobiantatsiri catsimari. Cagari Tosorintsi. Quero poguiatiri. Pairiraca aguiatërine iriro aroque ijoquero cara yoguiatabitacari Quirisito.

14*Icomantëgotëri Oisha aisati ira cántabentëri.*

¹ Aique naniaqueri Jesus Iroishate Tosorintsi Iriri yaratianque oguitojaquë jitacha Sión. Itsibataigari 144,000 quemisantatsiri irisanguenachotaitaga. Isanguenaquero iripajiro Jesus Iroishate Tosorintsi aisati iripajiro Iriri cara ichotaieguiquë. ² Aisati naquemobëtiguero jonoquë ora cantaca tojai nija cara ojaritasanti aisati ocantaro tjiringa catsiguero. Aisati ocantaro tojai áripa cara itocataiguero. ³ Icántataiguëro ora irorai managantsi catingasati Tosorintsi, aisati ainta 24 antiasipari, aintasati itsibasati niaguëtsatsira caniari. Teni irine basini ira ogótiro ingántatiro, iriantiegui 144,000 ira icoigaiguë Tosorintsi cara quibatsiquë yogabisaicotaigairi. ⁴ Te ingantaguetë ora te onganinate, te irantiro tsinane, icaninatasantaigui. Yoguiataiguëri Iroishate Tosorintsi negaraca irominiaiganaqueri. Yogabisaicotaiguëri Tosorintsi aroquenta iquemisantantaiguëri Iriri aisati Oisha. ⁵ Te intoiguëmataiguema, iriantiegui caninarisonori.

Iquenguitsataiguë maba ironomire Tosorintsi.

⁶ Aique naniaqueri basini ironomire Tosorintsi irisaanganetsite yaranaque aganguisati jonoquë. Iquenguitsaquero ora Caninaro Nibarintsi ora përosati cara pini: Ira Tosorintsi iragabisaicoqueri omagaro ira quemisanqueri. Iquenguitsatomotaiguëri antagaisati matsiguengapague negaraca itimaigui quibatsiquë aisati pairorapagueraca irinibare. ⁷ Inibatë catsiguë:

—Pintingomintaiguemari Tosorintsi, pinguemisantiri. Pingantaiguëri matsiguenga: “Icaninatasanoti Tosorintsi”. Aroque omoncaraca cataguitëri cara ingomantëgotaiguëri antagaisati ira matsiguenga, inguisaiguëri tenta inguemisantiri. Pinganinabentiri pomanocotiri Ira obetsiquëro Jonogaguëte aisati quibatsi aisati oquibe angaare aisati cara picontiataguetanë nijapague.

⁸ Aique yoguiatëri basini irisaanganetsite icampë:

—Piporoque ora oquibe poeboro jitacha Babironia ocomeriguëtanë. Jirai ira Babironiasati icantaguëtagaiguëri ora te onganinate omagaro matsiguenga. Iroro Tosorintsi ingasitëtagaiguëri Babironiasati yamai, iripoguiriaiguëri.

⁹ Aique yoguiataiguèri basini ironomire Tosorintsi ira mabapènguitsi icampè catsigue:

—Pairiraca quemisantaiguèrine cobeingariniro quimingarisonoriguinte iroboticagueritotasitimari iriro aisati irosiacagomento, iranintacaqueri irisanguenatiri ichtotaiquè aisati ibacosonoriquè, ¹⁰ inguisaiguèri iriro Tosorintsi, iratsipiriacaiguèri catsirisonori quero icábintsiri. Canta Sharincabeniquè iratsipiriaguè pamariquè ora conagacha asopire ora ojenga camanjiantatsi aisati otojetacagantatsi. Irrojegui iraniaiguè antagaisati ironomire Tosorintsi aisati Ira Oisha. ¹¹ Pèrosati ogainocanèma igatsiare cara iratsipiriasantaiguè iritagaiquèma pèrosati, omagaro cataguiteri, omagaro tsitiniri, quero imagorei pèrosati iraugui obaticagueritotasiquimarine cobeingariniro quimingarisonoriguinte aisati irosiacagomento, aisati iranintacaqueri irisanguenachotaitiri ora iripajiro ira quimingarisonoriguinte. ¹² Iraegui quemisantiri Tosorintsi aisati Quirisito igótocoqueri irisanguenataga cobeingariniro quimingarisonoriguinte cara iriáiguè Sharincabeniquè. Igótaiguèro, icanquineri Tosorintsi omagaro ora icocaguiquèri aro quero itsirisharo cara iratsipiriacaqueri iriro matsiguenga catsimari, quero itsipiriasita cara iquemisanqueri Jesoquisito, quero iquemisantiri quimingarisonoriguinte.

¹³ Aique naquemobèro aiqero jonoquè cara pinibatè Isère Tosorintsi ocanquena:

—Pisanguenatiro oca: “Tosorintsi iraganinasèretaiguèri antagaisati quemisantaiguèri ira camaiaguènguitsine. Aisonori iromagoriasanotagaiguèri cara icantaiguèneri; ingábintsèri Tosorintsi quero yomaguisantiro ora icantaiguèneri.

¹⁴ Aique naniaquero mingori cataguitero. Jonoica mingori isobiaque paniro cantaca ira paniacha Jonogaguitequè imatsiguengatapè quibatsiquè, imatseicari oro. Ipogoquero ishatigote catsèbaro. ¹⁵ Isotocané ibangoquè Tosorintsi basini irisaanganetsite, icaimèri ira sobigatsi cara mingoriquè, icanqueri:

—Aroque omoncaraca yamai pobiguitiro ora tirigo cara quibatsiquè. Aroquenta osamatè, pobiguitiro yamai.

¹⁶ Aro ira sobigatsi cara mingoriquè ipèshaguequero ora tirigo cara ishatigotequè yobiguitèro omagaro cara quibatsiquè. ¹⁷ Aique isotocané basini ironomire Tosorintsi cara ibangoquè Jonogaguite. Aisati ipogoquero catsèbaro ishatigote. ¹⁸ Aro isotocané basini irisaanganetsite cara pitagani casangajengaro. Irro casintaro tsitsi irooti cara Tosorintsi iratsipiriacaiguèri ira matsiguenga. Icaimèri ira pogoquero catsèbaro ishatigote, icanqueri:

—Yamai popèshatiro óbateri quibatsiquè oranta oraga.

¹⁹ Aro ipèshaguequero óbateripague quibatsiquè yágaguequero yoguèro cara iragaticomentoquè Tosorintsi: iroonti posigaro cara aiquenta Tosorintsi inguisasanoiguèri antagaisati ira tsoengatsiri. ²⁰ Aique pagatiquenganí oba cara sotoquè poeboro. Pisotoané obaa opeganaca tojaisonorí araatsi, tojainta pareca cara ibagantequè mora. Játaque jaanta araatsi 300 quirometoro. Cara pisotoatanè oja oba iroonti quiraajaro ocantaro araatsi. Aisa ocanta cara Tosorintsi ingasitigatasantaiguèri matsiguenga ira te inguemisantiri. Pisotoatanè tojai iraraa. Iratsipiriacaiguèri catsirisonori arosonorí matsiguenga.

15

Irisaanganetsite Tosorintsi yáguèro ora pojo jagaca ora iguisa Tosorintsi.

¹ Aisati naniaquero ora cantaca quisanitagantsi carari nagaguitaga. Yoniaguènaró Tosorintsi ora inanènguitsine. Naquenganeintasantaca cara naniaiguèri canta Jonogaguitequè 7 ironomire Tosorintsi iratsipiriasanoigaqueri ira matsiguenga. Cara iritsonguèro iriro ora atsipiriagantsipague, aro ongaraque cara iguisa Tosorintsi quero iguisèmetaigairi matsiguenga aisati. ² Aisati naniaquero ora cantaca oquibe angaare catarisonoriguinte oconoacaro pamari. Cara jonoica angaare naniaiguèri iraugui te iragabeiri cobeingariniro quimingarisonoriguinte tenta itingomintimari, teatisati irosiacagomento, teatisati iranintacaguirí irisanguenatiri iripajiro quimingarisonori. Ipogotaiguèro áripa ora ipaiguèri Tosorintsi. ³ Icántabentaiguèri Tosorintsi, aisa icanta cara icántabenqueri Moisés jirai. Aisati icántataiguè ora irasi Quirisito Iroishate Tosorintsi. Icántataiguè icantaiguè:

—Natingomi Tosorintsi, tojai picantaguetiro omagaro caninari, pigabaiaguèri antagaisati Obironta sintsirisonoriguinte. Tojai pitasongaguetasantè pobetsiquèro omagaro, naquenganeintasantacaro. Ocaninatasanti ora picantagueti, catingasati picanquero. Obiro Itingomisonori antagaisati matsiguenga. ⁴ Natingomi, ¿Pairi inatsi cara quero itingomintimi? Querojenga paniro, iribocasitèmintá antagaisati itingominquemi aisati inganinabenquemi, iromanaquemi, inganque: “Picaninatasanti Obiro”. Paniro Obiro caninarisonori, te pingantèmatiro ora te onganinate. Iribocasitaguèmi omagaro matsiguenga negaraca itimaguetaiqui iroboticagueritotasiquimi iniaiguèronta cara pinibati catingasati.

⁵ Aique naniaquero tsmaguisonorinta ibango Tosorintsi canta Jonogaguitequë cara pasiriaca cara inasanti Tosorintsi, aisati cara pinë 10 iragáantane osanguenaca mopëquë. ⁶ Cara tsmaguisonori ibango Tosorintsi isotocanë irægüi 7 irisaanganetsite Tosorintsi atsipiriacagantatsiri. Iratsipiriacagaiguëri ongaraque 7 ira matsiguenga. Icaiganaque iguitsagarepague catarisonori, ora imatsaguita obetsicaga oro. ⁷ Naniaqueri paniro niaguetatsira caniari ipaguetaguëri panirropague irisaanganetsite ibaone obetsicaga oro. Orapague pojo jagaca ora atsipiriacagaiguërine tsoengatsiri. Ora atsipiriagantsi iroonti cara iguisa Tosorintsi Ira përosati cara itimi. ⁸ Piacaro pongotsi irosangueguitere Tosorintsi, itasongasanti. Aitinta tojai catsiari quero icanta iqui pairiraca ibangoquë Tosorintsi irooti cara ira 7 irisaanganetsite iritsongaiguëro 7 atsipiriagantsi carantatsi.

16

Ira irisaanganetsite yosocaguëro ora ibaonegatipague cara quibatsiquë.

¹ Aique naquemobëro nibarintsi catsiguero opaniaca tsmaguisonorinta ibango Tosorintsi ocanqueri 7 irisaanganetsite Tosorintsi:

—Pijáigue, posogüiro ora pobaonegati cara quibatsiquë arota Tosorintsi iratsipiriacaganoiguëri matsiguengajegüi.

² Aique iáque obatsisiri yosoquero ora ibaonegati cara quibatsiquë. Aro isomotaiguë omagaro matsiguenga irisanguenachotaitaga iripajiro cobeingariniro quimingarisonoriguinte aisati ira obaticagueritotasicaro irosiacagamento. Ora isomogüi catsisiri aisati sitiri. ³ Aique iáque basini ironomire Tosorintsi ira pitepënguisti, yosoquero ora ibaonegati aiquero oquibiaquë angaare; ora nija opeganaca araatsi cantaca iraraa camatsiri. Icamaguë antagaisati caniaripague cara angaarequë. ⁴ Aique iáque basini ira mabapënguisti yosoquero ora ibaonegati omagaro cara nijapaguequë aisati cara piconti-atagueti nija. Aisati opeganaca araatsi. ⁵ Aro naquemaqueri:

—Picaninati Obiro Tosorintsi, picatingati te pingantëmate ora cagaro caninatatsi; përosati cara picanta: jirai pitimi aisati yamai. Caninataque pitsipiriacagaiguëri, ⁶ piniaiguërinta cara yogamagaiguëri ira quemisantaiguëmi aisati ira comantëgotëmi. Icoagaiguë tsoengatsiri araatsi; yamai pógacari araatsi. Caninataque.

⁷ Aro naquemaque cara inibatë basini cara pitagani casangajengaro, icanque:

—Jee, aisonori, Natingomi, Obiro Tosorintsi, picantaguetiro omagaro pairoraca pigabeirinta antagaisati. Caninataque cara piguisaiguëri ira tsoengatsiri pitsipiriacagaiguëri, caninasati picomantëgotëri picantobiqueri catingasati.

⁸ Aro yosoquero basini irisaanganetsite cara pabaquë arota irisacaiguëri matsiguengajegüi. ⁹ Isacasantaiguëri catsirisonoriguinte, carari përosati iguisatsataiguëri Ira Tosorintsi, te ingantaiguema yacaqueroca tenta intingomintimari. Te iraninte irojocajiro ora icantagueti quimingari. Carari përosati icantocotaguetasitaigacari Tosorintsi Ira atsipiriacagaiguëri. ¹⁰ Aique yosoquero ora ibaonegati ira basini irisaanganetsite, yamai icarati pabocorooti, cara iragáantomentoquë cobeingariniro quimingarisonoriguinte. Iroro otsitinitaguëtanë omagaroguite cara igáanti iriro. Itsicaninetaiganaca cara ininequë matsiguenga icatsitasantaiguërinta. ¹¹ Përosati cara iguisatsataiguëri Ira Tosorintsi aisati icantocotaguetasitaigacari. Iguisacaro isomo aisati omagaro ora catsitasantëri. Carari te iranintaiguë irojocajiro ora icantaguetaguë quimingari. ¹² Aique yosoquero ora ibaonegati ira basini ironomire Tosorintsi, yamai icarati 6, cara oquibiaquë nija jitacha Eoparates. Opiriatanë nija; yamai ora nija te oticaigabaqueri ira itingomipague aisati isoraroteegüi ipaniaigaca canta icontetü paba. ¹³ Aique naniaiguëri ira sogoroniro aisati ira cobeingariniro quimingarisonoriguinte aisati igomantantatsisrite matobiantatsiri; ipaniaigaca ibagantepaguequë maba camagari aisati icantaigari ibega masonero. ¹⁴ Ira camagari itasongacamagaritaiguë ora terai oneingani. Iátasitaiguëri itingomiegüi quibatsiquë yapatotaigacari, icanqueri:

—Intsome antsibatobaguima omitocotobaguima omanátaiguëri Tosorintsi aisati antagaisati ira quemisantaiguëri. Patiro cataguetiropoguiriaiguëri.

Ijtasitaigacaro negaca irirojegüi, Irro cantënguicha Tosorintsi cantaguetatsi pairoraca, Ira agabeirine antagaisati. Quero pairi agabeiri Irro. ¹⁵ Aique inibatë Quirisito icanque:

—Atsi pinetse. Naro boquënguistsine cara te iragueina matsiguenga aisa nacantari ibega cosirinti bocatsi cara te pigeüeri. Inganinataiguë antagaisati ira aguaquinara, ira obetsiguenguicha, cantaca quero isami. Nocoguini inganinate, quero icantaguetiro ora te onganinate. Inganquimari ira quitsagatacha caninasati, quero iniagani saacanari, quero ipasiquiti.

¹⁶ Aro naniaiguëri ira camagari cantaca masonero yapatotaiguëri ira itingomipague cara caninaguiteroquë ijtaiguë jorio Arimajerón. ¹⁷ Aique ira irisaanganetsite Tosorintsi,

ira carantatsi, yosoquero ora ibaonegati cara coguentimaquè. Aito cara naquemaqueri cara inibatè Tosorintsi cara iragáantomentoquè, icanque catsigüe:

—Aroque moncaraca antagaisati.

¹⁸ Aito cara pomanátaguetanaca omanarontsi, otiiringaguetanè, aisati posebatastananaca sintsirisonoriguinte omagaro quibatsi pabisiro omagaro basini osebatacharipague cara inagasegui matsiguenga quibatsiquè jirai irooti yamai. ¹⁹ Aro pitsiraaguetanè oquibe poeboro jitacha Babironia piporocanè omagaro pongotsi, tsongaca; aisati piporocanè omagaro basini poeboropague omagaroquè quibatsi. Te iromaguisantiro Tosorintsi ora icantagueti te ongomeite Babironiasati; iguisasantaiguèri, itsipiriasantacagaiguèri. ²⁰ Aisati osiringaguetanaca antagaisati oboguesipague aisati opeganaca omagaro oguitojapague. ²¹ Aisati oparigaguetanè oquibeuinte iringue, ora tinatatsi patiro 40 quiro. Pèrosati ira matsiguenga iguisaneintasantaiganaqueri Tosorintsi, icantocotaguetasitaigacari aroquenta yobarigatequeri ora iringue icasitíginasanoiguèri itsipiriacagasantaiguèri.

17

Iquenguisatocoquero Babironia cara inguisèro Tosorintsi.

¹ Aique ipocasipèna paniro irisaanganetsite Tosorintsi aroque yosoquero ora ibaonegati, icampèna:

—Omana yaca. Noniaguèmiro ati ongantima cara Tosorintsi inguisèro ingasitigatèro ora tsinane antagueantatsiri antaguetiri sèrari, pisobiaque oquibequè nijapague ora ocanti ocantacagaiguèri matsiguengapague ora quimingaro. ² Ipocasitaiguèro itingomipague quibatsisati iquemisantaiguèro. Pogometaiiguèri cara intingomintimari ibabane ira yobetsiquè matsiguenga, ijitosorintsisitacari. Aisati omagaro matsiguenga ocantaguetacagaiguèri ora te onganinate iquemisantaiguèronta ogomeantane quimingaro.

³ Aro naniaquero ora cantaca quisanitagantsi carari nagaguitaga. Aro yáganèna cara tera ontimingani, poniaguènaro Isère Tosorintsi ora tsinane quijègotari ira iguibeguinte cobeingariniro quimingarisonoriguinte quiraari, iguito ocarati 7, aisati itsei 10. Irisanguenataga iganaquè cobeingariniro quimingarisonori tojai ora cantègotaguetasitari Tosorintsi.

⁴ Ora tsinane ocanaque oguitsagare quiraaquisaamagori. Aisati poganinatacari oro aisati caninaquiropague mopèqui coboriaquero aisati cataquero imapènequi shaota. Opogouero ototane obetsicaga oro. Piagantacaro tojai ora quimingaropague ora ocantagueti.

⁵ Cara ochotaiquè osanguenaca opairo ora tera ogótingani, ocanti: “Oquibe Babironia ora ogometaiiguèro tsinane antagueantatsiri ontaguetiri cagari ojime aisati pogometague-taiguèri tojai matsiguenga iquemisantasitaigari ibabane ira yobetsiquè iriro ijitosorintsisitacari”. ⁶ Aique naniaquero tsinane nigóque cara osinguitacaro irarara quemisantaiguèri Jesus, ira pógagantaiguè pairiraca pègatsataro. Ocaninatanè cara pogamagaiguèri. Cara naniaquero, tojai naquenganeintasantacaro. ⁷ Yosamitèna irisaanganetsite Tosorintsi icanè:

—¿Pairo piquenganeintobica? Nongomantègotèmiro tsinane ora te pigótori, aisati nongomantèmi ora te pigócotiri ira cobeingariniro quimingarisonoriguinte ira oqueicoca, iguito ocarati 7, aisati itsei 10. ⁸ Ira cobeingariniro quimingarisonori piniaque itimabeca jirai, teni irinaje yamai, carari pènibaque iripigaima irigontetanae cara omoroquè játatsi tsmaguisonorinta. Aiquenta Tosorintsi iragáqueri cara Sharincabeniquè. Cara jirai irorai yobetsiquè quibatsi Tosorintsi, isanguenaguero iripajiroegui antagaisati ira játènguitsine Jonogaguitequè, intimaiguè pèrosati. Carari iragui quibatsisati tsongatsiri ira te irisanguenatègotima, inguenganeintasantaiguèmi ira cobeingariniro quimingarisonori cara itimabeca jirai, ira te irinaje, aique irigontetaje aiquenta. ⁹ Pairiraca ogótatsi, inguemobèro ora nanganqueri yamai. Ora iguito caratatsi 7 posigaro 7 oguitoja cara pisobiaque tsinane. ¹⁰ Aisati ora 7 iguito posigari 7 cobeingari: aroque icamaiguè pabocorooti, ainta paniro yamai, aiquenta iribocapè carantatsiri. Carari cara iribocapè, quero itingomibintanti cosamani. ¹¹ Ira cobeingariniro quimingarisonoriguinte itimabeca jirai, teni irinaje yamai, irianti paniro cobeingari itingomi icarati 7 ira nacantocotaiguèmi. Irero cantènguicha inganiatanae, intingomibintaigairi matsiguenga aisati. Aiquenta iriatè Sharincabeniquè.

¹² Aisati icanquena ironomire Tosorintsi:

—Ora itsei ocarati 10 piniaque iroonti posigari 10 cobeingari intingomibintanque arosata aiquenta, intsbataiguèmi cobeingariniro quimingarisonori. ¹³ Ira 10 cobeingari iquengaigaca iraguiatiguèri cobeingariniro quimingarisonori ingantaiguèneri pairoraca ingocagaiguèri. ¹⁴ Iripègataigabitèmi Iroishate Tosorintsi, iromanátaigabitèmi, Irari Oisha agabaiaguèrine ira 10 cobeingari, Irironta Itingomi omagaro basini cobeingaripague,

itingomibintasanoiguëri antagaisati. Tosorintsi icoigauguëri omagaro quemisantatsiri ira coshoni yoguiataguëri Ira Oisha, iquemiantaguëri.

¹⁵ Aisati icanquena irisaanganetsite:

—Ora nijapague cara pisobiaque tsinane antagueantatsiri aisati ocantari ibega antagaisati matsiugapague cara negaraca itimaigui quibatsiquè aisati pairorapagueraca irinibare. ¹⁶ Aique ira cobeingariniro aisati itsei ora caratatsi 10 irianti cobeingari tsipataigari ira quimingarisonoriguinte, inguisaiguëro ora tsinane antagueantatsiri irojo-caiganajiro, irisopoquero, iritaguëro, iritsonguëro, iragaiguëro irooti obatsa. ¹⁷ Tosorintsi ingueancagaiguëri ira 10 cobeingari ingantaiguë ora ingocagaiguëri Iriroro arota omoncaratima ora iquianca Iriroro. Aisati Tosorintsi inganqueri ira cobeingaripague cara inguemiantaguëri cobeingariniro quimingari. ¹⁸ Ora tsinane quimingaro piniaque posigaro oquibe poeboro quimingaro ongabiritanëma aiquesta obataiguëri ira cobeingaripague omagaro quibatsiquë.

18

Tojai iraicotaiguëro Babironia.

¹ Aique naniaqueri basini ironomire Tosorintsi ipaniaca Jonogaguetequë yamasobingopë. Tosorintsi ipëri tojai isintsire, yosangueguiteti, iroro iquëtagueantaro quibatsi.

² Icampë catsigue:

—Piporoque ora oquibe poeboro jitacha Babironia ocomeriguetanë. Ipoguiriaigaca antagaisati Babironiasati. Yamai iriantu timaigatsi camagaripague cara poeboroquë, aisati ainta camagari iromingaga. Aisati itimi omagaro araguetatsiri quimingari. ³ Cantaca tsinane antagueantatsiri, ira Babironiasati icantaguetiro quimingari aisati yogometaguëri matsiugajegui ingantaguetasantë ora te ongomeite. Aisati icantaguetacagaiguëri cobeingaripague tojai ora te onganinate. Aisati icaninabentaigapëri iraequi pimantatsiripague; ipaniaigaca parigotipaguequë yamaigapëro pairoraca ipimantapëro yaguëri tojai quirequi, yaganëro basinipague, ipimantaiguëro yasintasantaguetanaca.

⁴ Aique naquemaqueri Tosorintsi canta Jonogaguetequë, icanque:

—Obirojegui quemisanquina, pisotocanë Babironiaquë pijáigüe canta jaanta. Nasintaiguëmininta, quero picantari ira te inguemisantina, quero picantaguetiro pairoraca ora cagaro caninatatsi, aro quero pitsibataigari cara natsipiriasanotagaiguëri Babironiasati. ⁵ Tojaisonoru icantaguetasanoti quimingaropague, quero nomaguisantiro ora icantaguetopiantaguë. ⁶ Jirai tojai itsipiriacagaiguëri basini, yamai tojai popëgataiguëmari, aiquesto pijátanëtigüe pitsipiriacagasantaiguëri iriroro. ⁷ Yasintanguetagabitacarora tojaipague; ijitaigabitaca caninari, yoguibataca ijitaigaca yabisaiganaqueri omagaro basini. Itimobitaiguëro pairoraca icogaguetequë. Carari aisa ocanta yamai pitsipiriasanotagaiguëri, pigasëretasantacagaiguëmari aisa ocanta cara icaninataiguë. Icantagabitaca: “Naroequi obatatatsi nacantaro pibega tsinane iina itingomi, cagarina nara ogamaimentaga, te nongoguimaro pairoraca, quero nogasëreta”. ⁸ Iroro ora patiro cataguitieriquë opogobique atsipiriagantsi poguiriaigantsi cara Babironiaquë. Ira Babironiasati ingamaiguë, iragasëretaguëma, iritasëgaiguë, iritagaiguëma. Naronta Tosorintsi, nagabeirinta antagaisati, natsipiriasanotagaiguëri nangasitigataiguëri.

⁹ Omagaro igobeingariteegui quibatsisati jirai icaninabentaigabitara Babironia itsibataigari Babironiasati cara icantaguetasantaguë ora te onganinate. Yamai iraicotaiguëro, icaimaiguë cara iniaiguëro ora catsiari cara pitaquengani Babironia. ¹⁰ Yaratingaiguë jaanta inetsaiguëro, itsorogaiguë aroca Tosorintsi ingasitigataiguëri iriroro aisati. Icantaguë:

—¡Aaaii! Piniacatsigatasantëro obirojegui Babironiasati. Quero pagamaro ora cataguitieri pitsipiriagantsite, picasitigatasantëngani.

¹¹ Aisati ira pimantaguetatsiripague iraicotaiguëro Babironia, icaimaiguë tenta irinaje pairi manantajirone ora ipimantaigabita. ¹² Yamaigapëro tojaipague, carari tiguëti ingantima imimantaigari oro, quirequi, caninaquiropague mopëqui aisati cataquiro imapënequi shaota. Teatisati imimantaigairo manchaguantsisite ora jitacha irino, teatisati quiraquisaamagori, carenisitero jitacha sera. Teatisati imimantaigairo anchato casangajengaro, basini anchatopague caninaro, irai catarisonori irasi iripanti (elefante), teatisati coshori cateriri aisati coshori asiro, caninaro mopë ora irobetsicanquima coshori pongotsi. ¹³ Teatisati imimantaigairo pachapaneri, casangajengasero ora yoganimatantaro iguisi, basini casangajengaro ora iritaguë, aisati basini casangajengaro jitacha mira, aisati basini jitacha náriro. Teatisati imimantaigairo oja oba, asaiti, tirigo aisati caninapanero tirigo; teatisati baaca, oisha, mora, irisicomento, aisati matsiugapague ibimantaga; aisonori ipimantaguetabetari matsiugenga. ¹⁴ Ingantaiguëri:

—Obiro Babironiasatijegui, teni inae omagaro ora picaninabentaigabitaca. Quero pinai ora picogasanti popaigue, querootisati pinai ora caninaropague inomotaigabitèmi, quero piniajiro aisati ora pasintaigabitaca.

¹⁵ Iraegui pimantaguetaguèro pairoraca cara Babironiaquè, yasintaguetagabitaro, ipobotaigabitari iguireguite. Yamai yaratingaiguè jaanta inetsaiguèro, itsorogaiguè cara aroca Tosorintsi ingasitigataiguèri iriro aisati. Iraicoquero Babironia, icaimaiguè, ¹⁶ icantaiguè:

—¡Aaaii! Tsongasantaca poboeborote tenta inae yamai, Babironiasati. Picantaigabitaro tsinane ocanaquero omanchaqui caninasitero iroonti tera irino quiraquisaamagori, aisati poganinatacari oro, caninaquiropague mopèqui coboriaqui oro aisati caninari imapènequi shaota. ¡Omanapague pitsonguètèmiro omagaro caninaro ora pasintaguetagabitaca!

¹⁷ Aisati antagaisati pitotsiberi: casintaro, ira játaguiro, ira tarobacaatiro pitotsi, aisati iragui quenantaro, yaratingaiguè ibitopaguequè jaanta ¹⁸ inetsaigapèro oquibe catsiari cara pitaquengani ora Babironia, icaimaiguè icantaiguè:

—¡Ocaninatabitaca ora oquibe poeboro, te ine basini ongantimaro Babironia! Pabisiro omagaro basini poeboropague.

¹⁹ Tojai yogasèretaganaca, yogacaro quibatsi iguitoquè. Iraicotaiguèro Babironia icaimaiguè icantaiguè:

—¡Aaaii! Tsongasantaca poboeborote pasi tenta inae yamai, Babironiasati. Piátasitaiguèmi tojai oquibe pitotsipague, páganèmiro tojai caninaripague, ipimantiro ira casintaro yáguèri tojai iguireguite. ¡Carari omanapague pitsanca omagaro caninaro ora pasintaguetagabitaca!

Icaninataiguè quemisantatsirijegui.

²⁰ Aique naquemaqueri basini icanque:

—Pinganinasèretaganaque, antagaisati Jonogaguitesati: quemisantatsiri, iragátane Quirisito, aisati comantantatsiri. Jirai tojai itsipiriasanotagaiguèmi, carari yamai ipègabentaiguèmi Tosorintsi ipoguiriaiguèri Babironiasati.

²¹ Aique naniaqueri irisaanganetsite Tosorintsi, isintsitasanti, itinaaquero oquibe mopè ijoquero oquibiaquè angaare, icanque:

—Nojoquero mopè nijaaquè, opegasantaca, quero oniajagani aisati. Aisa ocanta Babironia oquibe poeboro iritsongasantèro omanapague, quero oniajagani aitosati. ²² Quero quemajagani aisati Babironiaquè onibare áripa, querootisati isoncati, querootisati icobèti. Quero ini pairiraca tarobacaatatsine, querootisati quemajagani aisati iramposaguimento. ²³ Quero posanguéguitetaji obotagantsi cara Babironiaquè, querootisati quemajagani jiesita cara yáguèri ina sèrari. Jirai ainta inaigabita tojai pimantatsiri aisati manantatsiri Babironiaquè ipobotaiguèri tojaisonorri iguireguite. Icantaguetacagaiguèri omagaro matsiguenga tojai ora te onganinate, yamatobitaiguèri. ²⁴ Aisati yógagantaiguèri tojai comantantatsiri aisati quemisantatsiri, omagaro ira yóguè. Iroro ora Tosorintsi ipoguiriaiguètaiguèri antagaisati Babironiasati.

19

¹ Aique naquemaiguèri tojaisonorri Jonogaguitesati, icantaiguè catsigue:

—Irirosonori caninarisonoriguinte Otosorintsite: Irro agabisaicotajái. Icobeingaguitetasanoti, yagobiaqueri antagaisati. ² Aisonori icasitigataiguèri Babironiasati icomantègotèri catingasati, iguisaiguèri caninasati, itsipiriacagaiguèri aroquenta icantaguetasanotagaiguèri omagaro quibatsisati tojai ora te ongomeite, aisati icantaro pibega tsinane antagueantatsiri ocantaguetacaqueri basini ora quimingaro. Tojai ira Babironiasati agamagaiguèri quemisantatsiri, itsipiriacaiguèri, iroro yamai iguisècobentaguetaguèri Tosorintsi iraisati.

³ Aique icantaigai aisati:

—Icaninatasanoti Tosorintsi. Pèrosati ogainocanèma ogatsiare Babironia; iritagaiguèma pèrosati Babironiasati.

⁴ Ira 24 antiasipari aisati itsibasati niaguetatsira caniari yobaticagueritotasitaacari Tosorintsi Ira sobigatsi iragáantomentoquè, icaninabentaiguèri. Icantaguè:

—Aro negaca. Icaninatasanoti Tosorintsi.

⁵ Aique naquemaqueri basini ipaniaca iragáantomentoquè Tosorintsi, icanque:

—Piniacanineatiguèri Otosorintsite, pingántabentiri omagaro obirojegui antaiguèri, aisati antagaisati pomingatsaqueri; obirojegui itingomi aisati cagaribi itingomi, piniacaniatiri omagaro.

⁶ Aique naquemaiguëri tojai Jonogaguitesati inibataiguë catsigue cantaca tojai nija cara jaritasanti aisati ocantaro tjjiringapague, icantaiguë:

—Icaninatasanoti Atingomi. Itingomibintaiguina Iriro Irianti cobeingarisonori Tosorintsi Ira agabiaiguëri antagaisati. ⁷ Intsome anganinabentaiguëri anibacaninatëri. Yamaï omoncaraca cara iráaqueru iina Oisha, Irianti Quirisito iráganontaigacari antagaisati quemisantaiguëri. Aroque pobetsicaca iina. ⁸ Inintacaquero onguitsagatimaro caninasitero jitacha irino catarosonori te onguebatsitëmate.

Poganinatacaro irinosite caninasitero aisa ocantaro pibega ora caninaripague ican-taguetaguëneri Tosorintsi quemisantatsirijegui. ⁹ Aique itsibatëna icanquina:

—Pisanguenate: “Iraganinasëretaguëri omagaro igaimane Oisha cara iráaqueru iina, aisati irapajaguëri cara ijësitatequë”.

Aisati icanquena:

—Ocarì oca pisanguenaque, iroonti aisonori Irinibare Tosorintsi catingarò.

¹⁰ Aro nobaticagueritotasicari ira nibaquena, nantingominquimarime, carari icanquena:

—Quero picantiro naronta cantaquimi pibega obiò aisati ibegaiga popiguemisanta-neegui ira comantëgotëri Jesos aisati nacantaiguëneri ora icocacá. Quero picaninabentina nara, Irianti Tosorintsi pomanocobintë.

Ira quinguisatocoqueri Tosorintsi aisati icomantëgotëri Jesos.

Quirisito iqueicocari mora, yomanáqueri cobeingariniro Arimajerónquë.

¹¹ Aique naniaquero Jonogaguite pasirianaca cara icontetapë mora catari, aisati Ira Quirisito quijëgotacari, ijita Catingatatsiri iroonti icanquero ora aisonori; icanque caninasati aisati catingasati cara igáanti aisati cara yomanáanti imoncaracaronta irinibare. ¹² Ora iroqui cantaca tsitsi cara pitairinga; yagobiaiguërinta irageui pëgaigari, aro imatseica imatseiro obetsicaga oro itingomibintaiguëri omagaro cobeingaripague; aisati aiti iripajiro osanguenaca, paniro Iriro igótiro. ¹³ Iquitsagataro iguitsagare arosonori ipantabaguitacarò iraraa; ora iripajiro ojita Irinibare Tosorintsi. ¹⁴ Yoguiaitaiguëri isoraro-teegui ipaniaigaca Jonogaguitequë iguitsagataro irinosite catarosonori, iqueicotaitapari imoraneegui catari. ¹⁵ Picontetapëri ibagantequë Quirisito irinibare cantaca isabirite catsëbarisonori ora iricarantëmari irageui te inguemisantaiguëri teatisati intingomintaiguemari. Irianti cobeingarisonori intingomibintasantaigapëri antagaisati matsiguengapague, iragabeiri omagaro, quero pairi pëgatarine. Aisati Ira cobeingarisonori inguisaiguëri ira te inguemisantiri iratsipiriasanotaguëri, ingasitigataiguëri, aisa ongantimame iragatiquëri iritsinacaiguëri cantaca ira agatiquëro oba. Tosorintsi quisatsaiguëri Irianti sintsirisonoriguinte Ira agabeiri antagaisati. ¹⁶ Aiti iripajiro osanguenaca cara iguitsagarequë aisati ibariquë; ocanti: “Igabeingariteegui omagaro basini cobeingarijegui aisati Itingomisonori omagaro basini itingomiegui”.

¹⁷ Aique naniaqueri basini irisaanganetsite Tosorintsi yaratianque cara pabaquë, icaimaiguëri catsigue antagaisati tisopague, icantaigabaqueri:

—Omana popatoitaigapëma pijagaiguëri ibatsa imaiguëmiri Tosorintsi. ¹⁸ Pijagaiguëri ibatsa itingomipague, ibatsa igapitánte, ibatsa isorarote, ibatsa imorane aisati irasi ira quijëgotagari; pijaguëri ibatsa omagaro matsiguenga: ibimantaga aisati irasi casintari, ibatsa cobeingaripague aisati cagari itingomi, omagaro.

¹⁹ Aisati naniaiguëri ira cobeingariniro quimingarisonoriguinte aisati igobeingaritepague quibatsisatiegui aisati isoraroteegui, yapatotasitaigaca iromanataigabaquerinime Ira quijëgotapari imorane catari aisati isoraroteegui. ²⁰ Yáguëngani ira cobeingariniro quimingarisonoriguinte aisati yáguëngani igomantantatsirite matobiantatsiri ira tosongomotasantëri ira quimingarisonori ora yamatobiantaigacari tojaisonori matsiguenga, aisati icanqueri matsiguenga cara quero iquemisantiri Tosorintsi aisati isanguenatocotaigacarò iripajiro ira quimingarisonori cara ichotaiquë matsiguenga aisati yobaticagueritotasitaigacarò irosiacagomento ira cobeingariniro quimingarisonori. Aro yágaiganaqueri pitirooti, ira quimingarisonori aisati igomantantatsirite matobiantatsiri, ijocaiguëngani canianiro cara Sharincabeniquë cara pamariquë oconaga asopire ora ojenga camanijiantatsi otojetacagantatsi. ²¹ Iraegui basini tintaigacari ira cobeingariniro quimingarisonoriguinte yóguëngani isabiritequë ora paniacari ibagantequë Ira quijëgotacari imorane catari, yogamagaiguëri irinibarequë. Aro yaguëtaigapë antagaisati tisopague, yaagaigapëri ibatsa igamagaegui, iquemasetagacari.

¹ Aique naniobèri basini ironomire Tosorintsi, ipaniaca Jonogaguítequè, yamasobin-gopè, yamapèro irasiriamto irasirianquimaro ora omoro jàtatsi tsonaguisonorinta, aisati yamapèro oquibe carenatsa coshotsari. ² Yágapèri ira iguibe sogoroniro aisati ijita marangueniro irinaga aisati ijita camagari aisati Satanás, yoguèshotigasantapèri cosamani ipirisotèri 1,000 osarini. ³ Aisati ijoqueri cara omoroquè jàtatsi tsonaguinta, yasitocotas-antèri arota quero isotocaji, quero yamatobitaigairi quibatsisati irooti cara ongarque 1,000 osarini. Cara omoncaraquima 1,000 osarini irasiriègotairi cara omoroquè, iromiso-tocajiri carari quero icosamaniti. ⁴ Aique naniaiguèri isèrejegui tojai quemisantatsiri isobi-caiguè iragáantomentopaguequè; icantaiguèri Tosorintsi: “Pingomantègotaguèri matsiguengajegui”. Jirai iraugui te inguemisantiri ira quimingarisonoriguinte, teatisati irobotica-gueritotasitaiguemaro irosiacagomento, teatisati iranintacaguiri irisanguenatiro iripajiro cobeingariniro cara ichotaiquè aisati ibacosonoriquè, iquenguitsatocotaiguèri Jesos aisati Irinibare Tosorintsi, iroro yogamaguètaiguèri. Naniaiguèri iraugui cara yoganiatairi Quirisito itsibataigari ongarque 1,000 osarini itingomibintaiguèri matsiguenga. ⁵ Ira quemisantatsiri obataigatsi yoganiatairi; carari ira basini camaiguènguitsi te inganiataigae irooti cara omoncaraquima 1,000 osarini. ⁶ Inganinasèretasantaiguè ira obataiguènguitsine inganiantanae, aisati Tosorintsi iraganinatèri irirojegui. Aisati quero iáti irirojegui cara Sharincabeniquè cantaca ira tsoengatsiri te inguemisante; carari Tosorintsi ingantaiguèri saserirotijegui, intsibataiguèmari Tosorintsi aisati Quirisito intingomibintaiguèri mat-siguenga 1,000 osarini.

Tosorintsi iritsonguèri ira Satanás.

⁷ Cara abisanaque 1,000 osarini, iromisotocajiri ira Satanás cara omoroquè jàtatsi tsonaguisonorinta, ⁸ iriátasitaiguèri omagaro matsiguengapague iromatobitaiguèri. Irapatotasitaiguèri tojaisonorini isorarote iripoguiriaguèrime ira quemisantatsiri. Irirrojegui aisati ingantaiguèma ira jirai ijita Gog aisati Magog, tojai ingarataiguè ingantaiguèmaro pibega ora omaniqui cara otojaigui onamijaquè oquibe angaare. ⁹ Naniaiguèri cara ipocasitaiguèri ira quemisantatsiri cara Jerosarénquè, ora poeboro ininti Tosorintsi, ishongagaparo cara iritsongaigerime ira quemisantatsiri, carari Tosorintsi igátaiguèneri yobarigatetaiguèri pamari opaniaca Jonogaguítequè pipoguiriaguèri pitagaiguèri. ¹⁰ Ira camagari (Satanás) ira matobitaiguèri tsoengatsirijegui, ijoquengani cara Sharincabeniquè cara pamariquè oconaga asopire, cara aroque ijocaiquèngani ira cobeingariniro quim-ingarisonoriguinte aisati igomantantatsirite matobiantatsiri. Canta, pèrosati cara iratsipiri-asanoiguè, ingatsitasantaiguè omagaro cataguiteri aisati antagaisati tsitiniri, pèrosati cara irinaque.

Iriáiguè Sharincabeniquè omagaro ira te inguemisante.

¹¹ Aique naniaquero oquibe iragáantomento cataro, aisati naniaqueri Ira sobigatsi cara. Catingasatiquè Irro, játaque jaanta quibatsi aisati Jonogaguíte, opeganaca pitirooti, maa, te onajengani aisati. ¹² Aisati naniaiguèri ira camaiguènguitsi, itingomipague aisati ira cagari itingomi. Yaratingaigapè catingasatiquè iragáantomento Tosorintsi. Otimiaquengani sanguenaripague, cara osanguenaca omagaro ora icantaguèti matsiguenga te onganinate aisati otimiaquengani sanguenari cara isanguenatocotaigaca antagaisati quemisantatsiri intiomotaiguèri Tosorintsi. Aro icomantègotaguèri paniropague ira camaiguènguitsi negaraca iriátè, ocomantègotèri cara isanguenatocotaiguèri ora icantaguèti. ¹³ Ipaniaigaca igamagaegui ira tsitiaquenguitsi cara oquibiaquè angaare, aisati igamagaegui ira ti-jajacha, icontetaigapè cara yoganiataigairi. Aisati iconijataigapai ira játaiguènguitsi oso-biquè. Icomantègotaguèri paniropague ira camaigatsi cara negaraca iriátè; ingasitigatèri cara icantaguèti paniropague. ¹⁴ Aique iraugui camabitènguicha, negaraca ipaniaca igamaga aisati isère, ijocaiquèngani canta Sharincabeniquè cara pamariquè oconaga asopire ora ojenga camanijiantatsi otojetacagantatsi. Omagaro jàtènguitsine Sharincabeniquè quero isotocaji, quero ineiri Tosorintsi. ¹⁵ Jjocaiquèngani pamariquè antagaisati ira te irisanguenatègotima sanguenariquè cara osanguenaca iripajiro quemisantatsirijegui.

21

Irorai Jonogaguíte aisati irorai quibatsi.

¹ Aique naniaquero basini Jonogaguíte irorai aisati basini quibatsi irorai. Ora inaga Jonogaguíte aisati inaga quibatsi peguènguicha. Aisati opeganaca oquibe angaare. ² Naniaquero paguèpè ora poeboro jitacha Irorai Jerosarén, ora caninatasantatsi tenta inèmate quimingari. Opaniaca Jonogaguítequè cara Tosorintsiquè. Aroque pobetsicaca aisati ocantaro pibega tsinane poganinatata cara iráaquero sèrari ira oninque. ³ Aisati naquemaquero irinibare catsiguero opaniaca iragáantomentoquè, icanque:

—Pinetsaigue. Iáque Tosorintsi intimacagaiguëri matsiguengajegui, coshoni irogaiguëri, irasintaiguëmari. Irirójegui ingantaiguëri Itosorintsiteegui, irajitaiguëri: “Pabati Tosorintsi”.⁴ Aisati Tosorintsi iraganinasëretaiguëri, quero iragaja aisati. Quero icami pairiraca basini, quero yogasëretaja, quero icaimëgotiri imatsiguenga camatsi, quero icatsitëmatai. Aroque pabisanaque antagaisati ocapague.

⁵ Aique Ira sobigatsi cara iragáantomentoquë icanquina:

—Pinetse. Naro nobetsicaguetëro irorai antagaisatipague.

Aisati icanë:

—Pisanguenatiro oca: aisonori nacanquemi, te nomatobitëmati.

⁶ Aique icanquina naro:

—Aroque moncaraca; nitsonquero omagaro. Naro parintacaro omagaro, aisati Naro carantërone antagaisati. Aintaca paniro icogasanti irogótina, imiretasantë isërequë, nomëri nija caniatacagantatsi, intiomoquina përosati. Nomasitëmari, quero nocoicotiri.⁷ Ira agabeiro ora quimingaro aisaati ingantopiantinaro ora nococaqueri, nomëri omagaro ora noguëneri nacasijaakeri iraequi quemisantatsi. Aisati nontomintëmari iriro, aisati irajiquina Itosorintsite.⁸ Irari iraequi tsorogaiguëro iraguiatiri Jesus, ira tsoengaiguëri, ira cantaguetiro quimingaropague, ira óguiri matsiguenga, ira antaguetiro tsinane cagaro iina aisati ora antiri cagari ojime, ira matsiantatsi aisati yamatobiantaro imatsine, ira manëgotagaiguëri ibabane irianti ira yobetsiquë matsiguenga ijitosorintsisatitari, ira tsoigacha, omagaro icaegui iriáiguë Sharincabeniquë cara pamariquë oconaga asopire ora ojenga caminjiantatsi otojetacagantatsi. Quero ineiri Tosorintsi.

Ora Irorai Jerosarén.

⁹ Aique ipocasiquina paniro irisaanganetsite Tosorintsi, ira tsipatari jirai 6 basini irisaanganetsite cara yosocaiguëro ora ibaonegati cara quibatsiquë itsipiriasanotagaiguëri matsiguenga. Icampëna:

—Omana yaca. Noniaguëmiro ora Irorai Jerosarén. Iroero ocantaro tsinane cara iráaquero sërari. Oca iroonti cantaca iina Iroishate Tosorintsi.

¹⁰ Aro përosati naniaquero ora cantaca quisanitagantsi carari nagaguitaga; yágasëretanëna canta oquibequë oquitoja, aro poniaguënaró Isère Tosorintsi ora oquibe poeboro jitacha Irorai Jerosarén ora caninatasantatsi tenta inëmata quimingari. Opaniaca Jonogaguitequë cara Tosorintsiquë paguëpë quibatsiquë. Ora poeboro posanguëguitetasantapë aintanta Tosorintsi.¹¹ Ocoboriatasantapë cantaca mopë caninaro jitacha jásipe ora tojai pipënata, ocoboriaguitetasanoti aisati osaatasanti.¹² Aiti oquibe oticoro játaque jonoquë oshoncaro poeboro. Aiti omoro ocarati 12 cara oticoroquë. Aisati aianta 12 ironomire Tosorintsi yomisantaiguëro omoropague. Aisati omoropaguequë osanguenaca iripajiroopague 12 itomi Isirael.¹³ Aiquero cara iconteti paba aiti maba omoro; aiquero comate aiti maba omoro; cara aiquero toonquë aiti maba omoro; aitisati maba omoro aiquero cara iqui paba.¹⁴ Osobiquë oticoro aiti 12 oquibe mopë coshori. Patiroopague aiti osanguenaca patiro iripajiro iragátane Oisha icarati 12.

¹⁵ Ira irisaanganetsite nibaquena pogoquero iromoncaramento obetsicaga oro. Iromoncaro poeboro, omoro aisati oticoro.¹⁶ Ora poeboro iroonti cantaca oquibe cajón, aiti otsoba, otioqui, aisati pite omeriqui, omoncaratobaga omagaro otsibasati. Aisa oanta otsibasati. Imoncaraquero 2,200 quirometoro. Aisati ora poeboro játaque jonoquë 2,200 quirometoro.¹⁷ Aique imoncaraquero oticoro ati oanta jonoquë, ocaraque 64 metoro. Imoncaraque irisaanganetsite aisa oanta imoncaraque matsiguenga; irootisati iromoncaramento.¹⁸ Ora oticoro obetsicaga mopë caninaro jitacha jásipe. Ora poeboro obetsicaga orosonori osaatasantaga cantaca oniorontsi.¹⁹ Ora mopëpague osobiquë oticoro poganiatantaro tojai mopë caninaro. Ora mopë obatatsi iroonti jásipe, saaro. Aique jonoiquero, aiti basini mopë jitacha sajiro, quisaaro. Aique jonoiquero, ágata sabibiro; aique esemerara saacaniaro.²⁰ Aro ocarati otsibasati mopë. Aiti basini jonoiquero, iroonti ónise oconagaro quiraaro aisati catari; aique sarónise quiraaro; aique quirisórito cateriro; aique beriro caniaro; aique topasio iroronianti cateriro aisati saacaniaro; aique quirisoperasa caniaro basiniati; aique jasinto iroronianti quiraaquisaaro aique ora carantatsi iroonti amatisita saaquisaaro. Aro ocarati mopë 12 pinasitagueca.²¹ Cara omoropaguequë aiti sitëcoripague obetsicaga iguibe imapënequi shaota, ijita përira catari. Patiro sitëcori obetsicaga paniro përira. Aisati ora abatsi cara poeboroquë yobetsicancari orosonori, te ongonagaguitima; aisati osaatasantaga.²² Carari te naneiro ibango Tosorintsi, iguemisantomento, aiantanta Iroro Atingomi Otosorintsite Ira agabeiri antagaisati sintsirisonoriguinte ini. Aito cara yamanocotaiguëri Iroro aisati Quirisito Iroishate.²³ Ira paba te irosanguëguitetocotajiro ora Irorai Jerosarén, teatisati manchacori iraguëtaguetiro. Iroonti irosanguëguitere Tosorintsi aisati irasi Oisha posanguëguitetiro.²⁴ Përosati irosanguëguitetocotaiguëri antagaisati

matsiguengapague; aisati cobeingaripague iribocasitaigapè ingantaiguè: “Obiro Natin-gomi cobeingarisonoriguinte, picaninatasanoti”.²⁵ Quero pasita sitècoripague antagaisati cataguiteri; quero pinai tsitiniri oquètaguuetènta pèrosati.²⁶ Antagaisati matsiguengapague iribocaigapè ingantaiguè: “Caninaribi Obiro, picaninatasanoti”.²⁷ Quero oqui pairoraca ora te onganinate, quero iqui ira cantaguetiro quimingaro, querootisati tsoigachari. Irianti caiguèguitsine ira sanguenatègotènguicha isanguenarequè Oisha; intiomotaiguèri Iriro pèrosati.

22

¹ Aique yoniaguènarò ironomire Tosorintsi ora oquibe nija, catiaarisonori, caniatacagan-tatsiri. Opaniaca iragáantomentoquè Tosorintsi aisati irasi Oisha. ² Ora nija piátacaquero oquibe abatsi, otsibatáro. Onamijaquè nija aiti anchato ora catimantague. Panirópague manchacori pini oguíto. Ora osi otimacagaiguèri caninasati matsiguengajegui, quero ijanaitai aisati. ³ Cara Iroraíquè Jerosarén quero pini pairoraca ora te onganinate ora inguisè Tosorintsi. Quero pini quimingaro aintanta Tosorintsi aisati Iroishate iragáantomentoquè. ⁴ Antagaisati quemisantatsiri irantaiguèneri Tosorintsi omagaro ora icocagaiguèri. Iraneborotaiguèri, aisati irisanguenataga iripajiro Tosorintsi ichotaíquè. ⁵ Quero pini tsitiniri cara poeboroquè, quero icogui opotaguèti obotagantsi, quero ininti yosanguèguíteti paba, irosanguèguítequeronta Tosorintsi Atingomi. Ira quemisantatsiri intsibataiguèmarì pèrosati intingomibintaqueri.

Itsonquero Joan isanguenare.

⁶⁻⁷ Aique icanquena ironomire Tosorintsi:

—Aisonori oca icanque Atingomi Jesus, quero yamatobitimi; icanque: “¡Quero ocosamaniti nopogopae!” Jirai Tosorintsi yogometaiguèri iraugui comantantsiri iquenguíatsocotaiguèri. Yamai igáqueri irisaanganetsite irogometaiguèri omagaro ira quemisantatsiri atraca onganquima aiquenta; quero ocosamaniti cara omoncaraquema.

Tosorintsi iraganinasèretaiguèri antagaisati quemisantaigabaquero omagaro oca sanguenarica. ⁸ Naro Joan, naquemaquero aisati naniaquero oca nasanguenatocoqueca. Yoniaguènarò irisaanganetsite Tosorintsi. Aro nobaticagueritotasicari ira ogótacaqueno, nantingominquimarime, ⁹ carari icanquena:

—Quero picantiro naronta cantaquimi pibega obiro aisati popiguemisantaneegui ira comantègotaguèri Tosorintsi aisati iraugui quemisantaiguèro oca sanguenarica. Irianti Tosorintsi pomanocobintè.

¹⁰ Aisati icanquena:

—Quero pimáñiro oca pisanguenaqueca; pèñibaque omoncarapèma. ¹¹ Ira cantaguetiro te ongemeite, aiquero iriátanètinge inganquero pèrosati. Ira cantaguetiro quimingaro, pèrosati iraguimingatèma. Aisa icanta ira cantatsi ora caninaro, pèrosati cara inganquero. Ira quemisantasantsi, pèrosati ingantasantèneri Tosorintsi omagaro ora icocaqueri.

¹² Icanque Atingomi Jesoquisisito:

—Quero ocosamaniti cara nopogopae, nomaguetaipèri paniropague ora caninaro, aisa ocanta cara icantaguèti iriro. ¹³ Naro nacantaro ora A aisati Z Naronta parintacaro omagaro, aisati Naro carantèrone omagaro. Nobatasanti natimi jirai, pèrosati aintana yamai, pèrosati cara nanganquima aiquenta. ¹⁴ Iraganinasèretaiguèri Tosorintsi iraugui tsaquerone ora iguítasagare irosaasèretaiguèmaronta, aisati nanintacaqueri intsimaquero oguíto anchato ora catimantague aisati nanintacaqueri ingaiguè noboeboroque, ingaiganaque omoroquè. ¹⁵ Quero iqui poeboroquè ira cantatsi quimingari. Sotonta ainta tsoengatsiri, matsi aisati seripiari, ira antaguetiro tsinane cagaro iina aisati ora antaguetiri sèrari cagari ojime, aintatsi ógueri, ira manègotiri ibabane ira yobetsiquè matsiguenga ijitosorintsitasitari, aisati ira tsoigachari aisati ira cogatsi iromatobitiri matsiguenga.

¹⁶ Aisati icanque Jesus:

—Naro Jesus. Nagáqueri nasaanganetsite ingomantaguetaiguèri omagaro ira quemisantsiri ocapague piniaque aisati ora piquemaque. Yamai pigagajineri obiro. Jirai Tosorintsi icomantèri David: “Aiquentata nagáqueri pomatsiguenga iragabisaicotaigairi ira matsiguenga”. Aro nipoque nomatsiguengatacari David. Noparintacari David, aisati iriro nacharine jirai. Aisa Naro cantaca jonogasati conijatatsi coniamaniquè, yosanguèguíte-tasanti. Aisa nacanta nosanguèguítecotaigapèri omagaro matsiguenga.

¹⁷ Isère Tosorintsi aisati omagaro quemisanqueri Quirisito cantaca iina Iroishate, ocan-taiguè:

—Omana.

Ira quematsi, inganteta:

—Omana.

Iribocapêta ira miretatsi irógopëmaro ora nija caniatacagantatsi. Pairiraca coguiro, iribocapêta iróguimaro, quero icoicotiri.

¹⁸ Aisati icanque Jesus:

—Yamai nangamanaiguëri omagaro ira quemaignane, aisati irinibataiguëro oca sanguenarica, quero popasiniatitiro. Quero pisanguenatiro basini; pinganquero, iratsipiriacaquemi aisati ocanta atsipiriagantsi sanguenatëgotënguicha yaca sanguenarica. ¹⁹ Aisati quero pobegajiro ora inatsi yaca sanguenarica; pobeaquero, Tosorintsi quero inintacaguimi pitsimiro oguitso anchato ora catimantague. Quero pineiro ora poeboro caninarosonori ora sanguenatëgotënguicha yaca sanguenarica. ²⁰ Naro comantëmiro ocapague nacanque: “Jee, quero ocosamaniti cara nopogopae”.

Aro onganquima negaca. ¡Omana, Natingomi Jesus! ²¹ Nocoguini ingábintsaguemi obirojegui Atingomi Jesus. Aro negaca. Aro ocarati oca nasanguenaque. *Joan*